


Nuevo Testamento en
mixteco



New Testament in Mixtec, Atatláhuca (MX:mib:Mixtec,
Atatláhuca)

Nuevo Testamento en mixteco New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9665e546-39d0-5bd5-8b10-38916a94951f

Contents

SAN MATEO . . .	1
SAN MARCOS . . .	75
SAN LUCAS . . .	120
SAN JUAN . . .	197
HECHOS	254
ROMANOS	328
1 CORINTIOS . . .	360
2 CORINTIOS . . .	389
GÁLATAS	409
EFESIOS	420
FILIPENSES . . .	431
COLOSENSES . .	438
1 TESALONI- CENSES	445
2 TESALONI- CENSES	451
1 TIMOTEO . . .	455
2 TIMOTEO . . .	464
TITO	470
FILEMÓN	474
HEBREOS	476
SANTIAGO	498
1 PEDRO	506
2 PEDRO	515
1 JUAN	520
2 JUAN	528
3 JUAN	529
JUDAS	531
APOCALIPSIS . .	534

JNUHUN VAHA NI TEE SAN MATEO

*Lista ñayuu yucūn jeē ní
quiiji Jesucristo*

(Lc. 3.23-38)

¹ Yāha cúu lista ñayuu yucūn jeē ní quiiji Jesucristo. Te máá yá ni quiiji nuū yucūn rey David, te David ni quiiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i.

³ Te Judá ni cuu de tátá Fares jíin Zara, te náná ndíndúú i ni cuu Tamar. Te Fares ni cuu de tátá Esrom, te Esrom ni cuu de tátá Aram.

⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón.

⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí.

⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa.

⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías.

⁹ Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías.

¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías.

¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel.

¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor.

¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud.

¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob.

¹⁶ Te Jacob ni cuu de tátá José, tēe ni cuu yī María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

Jeē ní cacu Jesucristo

(Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quiijnáhan ña jíin José. Te nde ná tu quiijnáhan ña jíin de, te ni jecūhun séhe ña ni sáha Espíritu Santo.

¹⁹ Te José, tēe quiijnáhan ña jíin, chí tēe ndaā cúu de. Te

tu ní cúní de cuāha de jnūhun canu ña, chi sa cúní de jeē na jécuiñī sāhi jēē ma quíjnáhan de jíin ña.

²⁰ Te níiní súcuan nácani ni de, te jíin jéni ni quee-ni ñn ndajéhé maá Jítoho yō Yaā Dios nuū de, te ni cahān yā jíin de:

José, sēhe yucūn David, ma yūhu ró cueca ró ñasihí ró María, chi sēhe jeē scácu ña, vēji i nde nuū maá Espíritu Santo.

²¹ Te scácu ña ñn sēhe yíí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tācá jniñu yáha, návāha squícu jnūhun Jítoho yō Yaā Dios jeē ni cahān tēe ni nacani jnūhun ya nde jenahán. Te suhva ni cahān de:

²³ Coó ñn sūchi síhí, te nihīn séhe i,

te scácu i ñn sēhe yíí,
te conaní sūchí un Emanuel.
Achí tutu. Te síhví yáha cúní cahān: Yaā Dios ndeé yá jíin yó.

²⁴ Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de.

²⁵ Te tu ní quíxí de jíin ña, chi nde ni scácu ña sēhe yíí núú ña. Te ni snaní de i Jesús.

Jeē ní quijicoo tēe mago nuū yā

2

¹ Te ná ni cacu Jesús ini ñuu Belén ndañūū Judea, te tiempo un ndácu rey Herodes

jniñu. Yūcuán na te jecu tēe ndíchí jēē cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén.

² Te ni cacajñūhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núū cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñūhún ná i, áchí de.

³ Te rey Herodes, ná ni jini de jnūhun yáha, te ni cunéé ni de, nde jíin táca ñáyuu ñuu Jerusalén.

⁴ Te ni nastútú de tāca sútū cácujuhnu jíin tēe cástéén tutu ley Yaā Dios nuū ñáyuu. Te ni cajñūhún de tēe un ndé nuū cacu Cristo achí tutu.

⁵ Te ni cacachi nuū de:

Ini ñuu Belén ndañūū Judea. Chi suhva cáhán nuū tútu ni tee tēe ni nacani jnūhun ya nde jenahán:

⁶ Te róhó ñáyuu ñuu Belén ndañūū Judá,
cújuhnu ga ñuu rō vēsú tāca gá jeē cujuhnu ini Judá.

Chi suu ini ñuu rō quenda ñn Yaā ndacu jniñu,
te coto ya ñayuu maá rí Israel,
achí Yaā Dios.
Achí tutu.

⁷ Yūcuán na te Herodes ni çana sāhí de tāca tēe ndíchí un jéē naní mago. Te ni cajñūhun yúcún de ndé quívī ní cane quími ún.

⁸ Te ni tají de tēe un quíngoo de ñuu Belén. Te ni cahān de:

Cuángoo ní te cajñūhun yúcún ní ndé nuū íne sūchi lúli un. Te núu ni nanihīn ní i, te quijicoo ní castūhun ní

nuū ná, návāha suni máá ná quichiñúhún ná i, áchí rey.

⁹ Te jeē ní cajini de jñuhun ni cahān rey, te cuango de. Te máá quimi cáhnu jeē ní cajito de ichi núū cáne niāndii, yósnúu núū de cuahān nde ni jinū nuū íne sūchi lúli un, te yūcuan ní jecuiñī.

¹⁰ Te ná ni cajito de jeē ní jecuiñī quimi ún, te yōhyo ni cacusiñī ni de.

¹¹ Te ni jinūcoo de ni quivicoo de ini vehe, te ni cajito de nuū sūchi lúli un jín náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jín sūje cūtú jín sūje uvuā nuū i.

¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuango de nación Egipto

¹³ Te náa cuánuhun tāca téé mago, te ni scóto jēni José jeē ñn ndajéhé maá Jítoho yō Yaā Dios ni cahān yā jín de:

Ndocuiñī te cunu ró quíngoo ró jín sūchi lúli jín náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúli jínā jeē cáhni de i. Achí yá.

¹⁴ Te ni natahū ni José. Te cuango de jín sūchi lúli jín náná i, te ñuú ní cajica de cuango de nación Egipto.

¹⁵ Te ni coyūcú de yūcuan ndé ni jihī Herodes. Te sūcuan ni cuu návāha squícu jñuhun Jítoho yō Yaā Dios jeē ni cahān

tēe ni nacani jñuhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

Jeē ní ndacu Herodes jniñu jeē na cúu tāca sūchi yá lúli

¹⁶ Yūcuán na te Herodes ni jini de jeē sūcuan ni castáhú téé mago un de, te yōhyo ni quití ni de. Te ni tají de soldado cuango, te ni cajehni tāca sūchi yá lúli jéé uú cuiyā jín jéé yiquín gá jeē cáyūcú ini ñuu Belén jín tāca ñuu yajni. Chi je ni cajñuhun yúcún de tāca téé mago un nasaa tiempo ni cuu jeē ní cacu Jesús.

¹⁷ Te sūcuan ni squícu jñuhun ni cahān Jeremías, tēe ni nacani jñuhun Yaā Dios nde jenahán, chi ni cahān de:

¹⁸ Ini región Ramá ni jini sōho

rí
jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácuni ña ndusiñī ni ña, chi ni cajihī i.

Achí tutu.

¹⁹ Yūcuán na te ni jihī Herodes. Te ni scóto jēni José jeē ñn ndajéhé Jítoho yō Yaā Dios ni cahān yā jín de nuū ndeé de nación Egipto.

²⁰ Te ni cahān yā jín de:

Ndocuiñī te nuhun rō ñuu rō Israel jín sūchi lúli jín náná i. Chi je ni cajihī tēe cánducú cahni sūchi lúli jínā nuú. Achí ndajéhé.

²¹ Yūcuán na te ni ndocuiñī de, te cuanuhun de nación Israel jín sūchi lúli jín náná i.

22 Te ni nihīn de jnūhun jeē Arquelao ni nucuññ de nuū tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuango de.

23 Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute
(Mr. 1.1-8; Lc. 3.1-9, 15-17;
Jn. 1.19-28)

3

1 Te ni yāha tiempo, te ni jinū Juan tēe scuándute nde nuū ñūhun téhé ndañūū Judea, nácani de jnūhun suhva:

2 Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

3 Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ññ tēe cana jee nde nuū ñūhun téhé:
Sátūhva rō máá rō jijnáhan rō,
chi quee maá Jítóho yō.
Te sáha rō jniñu ndaā, chi vēji ya, achi de.

Achí Isaías.

4 Te sahma ñūhun Juan cúu ixi quiti nání camello, te núhni ññ cinturón ññ chīji de. Te jeē técu de cúu tíca ndicuéhyí jíin ndúxi yocō.

5 Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de.

6 Te ni canacani ndaā i cuéchi i nuū Yaā Dios, te ni scuándute de i ini yúte Jordán.

7 Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cácu rō núu castigo xeēn jeē quíji?

8 Núu súcuan te sáha rō jniñu váha, te súcuan stéén rō jeē ní canacani ndije ni rō jeē stóo rō cuéchi rō.

9 Te ma cáni ni rō cahān rō jeē cuu cácu rō síquī jeē cácuu rō yúcūn Abraham. Chi cáhán rī jíin rō jeē cuu sáha Yaā Dios jeē táca yūū yáha nduu sēhe Abraham jeē candíje váha, te núu cúní yā.

10 Te cácuu rō nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ññ cāa jeē cahnde nde yoho yujnu. Núu súcuan te sáha ya jíin rō nájñūhun jíin táca yujnu jeē tu cúun ndehē váha, jeē tahndé te cayū nuū ñuhún.

11 Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te

poder yā cúu nájñūhun ñuhūn. Te Yaā quiji chi cújéñnu ndasí yá. Chi tú na vé jéñnu cuiti cúu ri nuū yā, ni jeē cuajñíñu ri nuū yā vésú ññ jñíñu lúli gá nájñūhun jeē quénehen ri ndijēn yā.

¹² Te sáha ya nájñūhun sáha tēe scánda trigo, chi sásñn ya ñayuu vāha jíin ñáyuu cunéé, nájñūhun cúndoo trigo jeē quénda sñn paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

*Jeē ní jendute Jesús
(Mr. 1.9-11; Lc. 3.21-22)*

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya.

¹⁴ Te tu ní cúni Juan scuándute de ya, chi ni cahān de jíin yá:

Sa suhva cánuú jeē scuándute máá ní sāñá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jñíñu ndácu Yaā Dios, achí yá.

Yūcuán na te ni scuándute de ya.

¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andívi, te ni jito ya jeē cúun Espíritu Yaā Dios vēji, te cáa nájñūhun ññ paloma, te ni quee xinī yā.

¹⁷ Te ichi ándívi ni cahān ññ jñūhun:

Yāha cúu Sēhe ri jeē maní ndasí rí jíin, te yōhyo cúsiñ ni rí jíin, áchí.

*Jeē ní jito ndee jexeén Jesús
(Mr. 1.12-13; Lc. 4.1-13)*

4

¹ Yūcuán na te ni jinū Jesús nde nuū ññhun téhé ní sáha Espíritu Santo. Te yūcuán coto ndee jexeén yā, chi cúni jeē sáha ya cuēchi.

² Te ni íyo ndite ni yā uū xico nduú uū xico ññuú, sáa te jíi yā sōco.

³ Te ni quee maá jéxeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu ññ: Nasūu máni máá jíin stáa cátecu ñayuu, chi suni jíin táca jñūhun cáhán Yaā Dios, achí yá.

⁵ Yūcuán na te cuahān jexeén un jíin yá nde ññuú íi Jerusalén. Te ni jeni ya xinī torre templo.

⁶ Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ññhun, chi jnama ya rohó. Chi yósó núu tútu:

Tejñíñu ya ndajéhé yā quiji-coo coto rōhó.

Te cunundee yā rohó jíináhan ya,

návāha ma cáchihí ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho í Yaā Dios, núu jnama ya í chí tuú, áchí yá.

8 Te jexeén un ní jeca tucu ya cuahān jín yá nde xinī ñn yucu súcún ndasí. Te ni steén tǎcá nación ní cáhnu ñayīvi núu yā, te yōhyo luu cáa ndíhi.

9 Te ni cahān jín yá:

Tǎcá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

10 Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chiñúhún ñayuu maá Jítóho i Yaā Dios, te nuū maá-ni ya cuajñiñu i. Achí yá.

11 Yūcuán na te ni cujiyo-ni jexeén un cuáhān. Te ni que-coo ndajéhé Yaā Dios ni caje-ñiñu nuū yā.

Jeē ní quejéé Jesús nácani ya jñuhun región Galilea

(Mr. 1.14-15; Lc. 4.14-15)

12 Te ná ni nihīn Jesús jñuhun jeē íne Juan vecāa, te cuanuhun yā región Galilea.

13 Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máa región Zabulón jín Neftalí.

14 Te súcuan ni squícu jñuhun ni tee Isaías, tēe ni nacani jñuhun Yaā Dios nde jenahán:

15 Región Zabulón jín Neftalí, ichi jeē yíhi yumar, lado yūte Jordán nuū cáne niāndii,

jín región Galilea nuū cáyūcú ñayuu tǎcá nación tu jíní jñuhun ya.

16 Ñayuu ún chi nájnūhun cáyūcú i nuū néē,

te coto i nájnūhun ñn luz cáhnu.

Te ñayuu je yajni naa, nihīn i jñuhun váha ndasí, suu jñuhun jeē jnama ya anuá i.

Achí Isaías.

17 Te nde quivī yúcuan ní quejéé Jesús nácani ya jñuhun, te ni cahān yā suhva:

Nacani ni rō jijnáhan ró jéē stóo ró cuéchi ró, chi je ni cuyajni Yaā ndeé andiví jéē ndacu ya jniñu nuū rō, achí yá.

Jeē ní cana ya cuñn tēe jñi chācá

(Mr. 1.16-20; Lc. 5.1-11)

18 Te jíca Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar.

19 Te ni cahān yā jín de:

Condiquīn ruhū na quíhīn yō, te nasáha ri rohó tēe nihīn cuehē ñayuu candije ruhū, nájnūhun cánihīn rō chācá, achí yá.

20 Yūcuán na te ni castóo-ni de ñunu de, te ni candiquīn de ya.

21 Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jín Juan, sēhe Zebedeo. Te cáyūcú de ini barco jín tátá de Zebedeo, cánachijní de ñunu de. Te suni ni cana ya de jeē cóndiquīn de ya.

22 Te ni castóo-ni de tátá de jín barco, te ni candiquīn de ya cuango de.

Jeē ni stéén yā nuū cuehē ñayuu

(Lc. 6.17-19)

23 Te ni jica cuu Jesús ní región Galilea, ni steén yā jñūhun ini tācá vehe ñi jeē cúu sinagoga. Te ni nacani ya jñūhun vāha ndese ndácu Yaā Dios jniñu. Te ni nasávāha ya ñayuu cácuñū tācá-ni cuehyī.

24 Te ni jitē núu jñūhun ya cuahān ní región Siria. Te nuū yā ni caquindeca i tāca ñáyuu cácuñū, ñayuu cándoho tijni nuū cuehyí, jíin jéē jetú, jíin jéē ñúhun tachī ini, jíin jéē jihí yīhí, jíin jéē ni íjin. Te ni nasávāha ya i jíináhan i.

25 Te cuehē ñayuu región Galilea jíin Decápolis, jíin ñáyuu ñuu Jerusalén jíin región Judea, jíin táca ñuu ichi núu cáne niāndii yūte Jordán, ni cacondiquīn i ya.

Jeē ní nacani ya jñūhun nde nuū yúcu

5

1 Te ni jito Jesús nuū ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán.

2 Te ni quejéé yá ni steén yā tāca jñūhun yáha nuū de:

Jñūhun yōhyo ndetū

(Lc. 6.20-23)

3 Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chi je ni quīvícoo i ndaha Yaā andiví jéē ndácu ya jniñu nuū i.

4 'Yōhyo ndetū ñayuu cácuñūhá ni, chi ndusī ni i sáha Yaā Dios.

5 'Yōhyo ndetū ñayuu cáhīyo vītá suchí ini, chi ni jejnūhun ya jeē cutahū i ñayīví.

6 'Yōhyo ndetū ñayuu jeē nájñūhun jeē cájiī i sōco cájichī i, súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

7 'Yōhyo ndetū ñayuu cácuñúhú ni jnáhan, chi suni cundáhu ni Yaā Dios i.

8 'Yōhyo ndetū ñayuu cáhīyo ndoo ini anuá, chi coto i nuū Yaā Dios.

9 'Yōhyo ndetū ñayuu cánasámanī jnáhan, chi cahān Yaā Dios jeē sēhe ya cácuu i.

10 'Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chi je ni quīvícoo i ndaha Yaā andiví jéē ndácu ya jniñu nuū i.

11 'Yōhyo ndetū maá ró jijnáhan ró núu cácahān neé i nuū rō jeē síquī ruhū, te coto xeēn i rōhó, te stáú yáhu i rōhó, vēsú tú cuēchi ró.

12 Na cúsī ni rō jijnáhan ró núu súcuan, te sa víhyá gā cusī ni rō, chi cáhnu ndasí coo tahū rō nde andiví. Chi suni súcuan ni cajito xeēn i tāca tēe ni canacani jñūhun Yaā Dios jeē ní quijicoo xīhna gā vēsú rohó.

Jñūhun yátá síquī ñī jíin síquī luz

(Mr. 9.50; Lc. 14.34-35)

13 'Máá ró jijnáhan ró cájejniñu ró ini ñayīví nájñūhun jéjniñu ñī nuū cúñu návāha tú tehyū. Te núu ñī ún na náā jeē uhvuá, ¿te ndese nduu uhvuá tucu? Tuá

cuajniñu cuiti gā, chi sa cate ñayuu te cueñu i siquī.

14 'Máá ró cácuu nájnūhun luz jeē steén ini anuá ñayuu ñayiví. Te cácuu ró nájnūhun ñn ñuu íne xinī yúcu, jeē ma cúu quisāhí.

15 Te ni tu nástñn ñayuu ñn lámpara te chune i chíji cajón, chí sa suhva jéni i nuū sucún, návaha cundijin nuū tāca jéē cáyūcú ini vehe.

16 Te suni súcuan na stéén rō luz maá ró nuū tāca ñayuu, te suu cúu jeē cúni i jniñu váha cásáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

17 'Ma cáni ni rō jijnáhan ró jéē véji ri snáā rī ley jeē ni jéhe Yaā Dios nuū Moisés, jín jéē snáā rī tāca jnúhun ni cacahān tēe ni canacani jñūhun ya jenahán. Tú véji ri jeē snáā rī, chí sa suhva jeē steén cají rí jñūhun ndíso.

18 Chi jendaá cahán rī jín ró jeē núu níni íyó andiví jín ñáyiví, te ma náā cuiti ni ñn punto ni ñn letra nuū tútu ley yā, chí nde na squícu tāca ndíhi jñūhun jeē cahán.

19 Núu súcuan te núu ñn ñayuu tu squícu i ñn jñūhun yáha jéē ndácu ley yā, vésú ñn jñūhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñn ñayuu squícu i te stéén i jeē squícu ñayuu, yūcuán na

te kujéhu i ichi andiví nuū ndácu Yaā Dios jniñu.

20 Chi cáhán rī jín ró jeē núu tú coo ndaā gā jniñu cásáha ró vésú jniñu cásáha tēe cástéén tutu ley yā jín tēe grupo fariseo, te ma quívicoo cuiti rō ndaha Yaā andiví jéē ndacu ya jniñu nuū rō.

Jeē ni stéén yā jeē ma quití ni yō

(Lc. 12.57-59)

21 'Je ni cajini ró jnúhun ni cacahān jín ñayuu jenahán, jeē ma cáhni i ndíyi, te na-ni ñayuu núu cahni i ndíyi, te cundaā cuēchi i nuū tāca tóhō, achí.

22 Te ruhū chí cáhán rī jín ró, vésú núu máá jéē quití ni ñn ñayuu jito i jnáhan i, suni cundaā siquī cuēchi i ún. Te núu ñn ñayuu cahān neé i nuū jnáhan i, núu súcuan te cundaā cuēchi i un núu justicia kujéhu ga. Te núu ñn ñayuu cahān i nuū jnáhan i: Róhó jéē canéé íi, achí i, núu súcuan te quívi i nuū ñuhún infierno te núu ma nácani ni i.

23 'Jeē yúcuán te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuēchi siquī jnáhan ró,

24 núu súcuan te squéndōo ró jéē socó rō ún xiin altar, te xīhna gā quihñ rō ndumaní rō jín jnáhan ró. Yūcuán na te nandicó ró socó rō.

25 'Te núu ñn ñayuu quihñ i jín ró nuū tohó jeē cacān i cuēchi siquī rō, núu súcuan te níni cuáhān rō jín i ichi te sándaā maá ró jín i, návaha ma squívi i róhó núu juez. Chi

juez siáha de róhó núū policia,
te chune de róhó vecāa.

²⁶ Te jendaá cahán rī jín ró
jeē ma quēnda cuiti rō yūcuán,
chi nde chunaa rō ndihī cuiti
xūhun jēē cājicān de.

*Jeē ni stéén yā jeē ma
cósiquí ndéē jnáhan*

²⁷ 'Ni cajini ró jnúhun ni
cacahān jenahán jeē ma
cósiquí ndéē jnáhan ñayuu.

²⁸ Te ruhū chi cáhān rī jín
ró jeē núū ñn tēe ndéhe de nuū
ñn ñahan jeē ndiyo ni de ña,
yūcuán na te je ni casíquí ndéē
de ñahan ún ini anuá de.

²⁹ 'Núū súcuan te núū tinūu
lado váha ró sáha jeē quívi ró
cuéchi, váha ga quenehen ró
te scáne ró, návāha tuá sáha
ró cuéchi. Chi váha gā jeē náā
ñn tinūu ró vēsú jeē cóo ndihī
yiqui cúñu rō te quihīn rō in-
fierno.

³⁰ Te núū ndaha váha ró
sáha jeē quívi ró cuéchi, váha
ga cahnde rō te scáne ró,
návāha tuá sáha ró cuéchi. Chi
váha ga jeē náā ñn ndaha ró
vēsú jeē cóo ndihī yiqui cúñu
rō te quihīn rō infierno.

*Jeē ni stéén yā jeē ma
ndusñn jnáhan*

(Mt. 19.9; Mr. 10.11-12;
Lc. 16.18)

³¹ 'Te suni ni cacahān nde
jenahán: Núū ndé ñn cúní stóo
ñasihí, te na cuáha acta nuū ña
jeē ndusñn jín ña.

³² Te ruhū chi sa cáhān rī
jín ró jeē núū ñn tēe stóo de
ñasihí de, te núū nasūu jéē tíjni
ni ña, núū súcuan te sáha de jeē
casíquí ndéē ña de, chi condee
ñā jín inga tēe. Te núū ñn tēe
condeca de ñahan ní ndusñn,
suni casíquí ndéē de ña.

*Jeē ni stéén yā siquī jnúhun
jéjnūhun téyí*

³³ 'Te suni ni cajini ró
jnúhun jeē ni cáhān jín ñayuu
nde jenahán: Núū ni jejnūhun
téyí ró jeē squícu ró, jito jínúū
Yāā Dios, núū súcuan te cánuú
squícu ró jéē ni cáhān teyí ró
un, áchí.

³⁴ Te ruhū chi cáhān rī jín
ró jijnáhan ró jeē ní ñn siquī
jníñu ma cahán teyí ró nde
jín síhví Yāā Dios, ni ma
cahán teyí ró jeē jito jínúū yā.
Te núū jéjnūhun téyí ró te tú
váha jeē ndácunehen ró andiví
ni ñayiví. Chi andiví cúu nuū
ñn mesa nuū ndácu Yāā Dios
jníñu.

³⁵ Te ñayiví cúu nájnūhun
teyū nuū ñn jehē yā. Te ni ma
ndácunehen ró ñnu Jerusalén,
chi suu cúu ñnu maá Yāā cúu
Rey kujéñu.

³⁶ Ni ma cahán rō jeē na
cóndeē cuéchi siquī rō núū
tu squícu ró. Ma cahán rō
súcuan, chi ma cúu cuiti sáha
ró jéē ni ñn ixí xíní rō ndu-
cuíjín chí ndujnúú.

³⁷ Chi suhva-ni cahān rō:
Cuu, achí rō. Tuú, achí rō.
Chi núū chisóo gá rō jnúhun
cahān rō, te nuū jexeén vēji.

*Jeē ni stéén yā jeē ma cuáha
yó jéē ndútahū ñayuu*

(Lc. 6.29-30)

³⁸ 'Ni cajini ró jnúhun jeē
ni cáhān jín ñayuu jenahán:
Núū ñn tēe ndahva de tinūu
jñahan de, suni súcuan na
ndáhva tinúú de. Te núū ñn
tēe stáva de jnúhun jñahan de,
suni súcuan na stáva jnúhun
de, áchí.

³⁹ Te ruhū chi sa cáhán rī jín ró: Ma nácuāha ró jéē ndútahū tēe sáha ndevāha jín ró. Chi sa núu ndé tēe çani de yiqui núu lado váha ró, te vāha ga suni cuāha ró inga lado cani de, vēsú jeē nácuāha ró jéē ndútahū de.

⁴⁰ Te núu ndé tēe stáú yáhu de róhó te quēnde de camisa rō, suni cuāha ró jnúhun jeē na quíhín de jín ndé ticāchi ró.

⁴¹ Te núu ndé tēe scāca de róhó jéē condiso ró ndajniñu de ñn kilómetro, te caca ró úu kilómetro jín de.

⁴² Te na-ni ñayuu núu jícán i ndajniñu ró, te cuāha ró núu i. Te ñayuu jícán núu ndajniñu nuū rō, ma sasáhán ró cuāha ró núu i.

Jnúhun jeē cundáhú ni yō ñayuu cájito uhū yohó
(Lc. 6.27-28, 32-36)

⁴³ Te suni ni cajini ró jnúhun jeē ni cáhán nde jenahán: Cundáhú ni rō ñayuu cáhiyo manī jín ró, te coto uhū rō ñayuu cájito uhū rohó, áchí.

⁴⁴ Te ruhū chi sa cáhán rī jín ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha vāha ró jín ñáyuu cáquitī ni nuū rō. Te cacān tahú rō jehē ñáyuu cácahān neé núu rō te cájito xeēn i róhó.

⁴⁵ Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cúndijin nuū ñáyuu cunéé jín ñáyuu váha. Te jéhe ya saū nuū ñáyuu casáha

jniñu ndaā jín núu ñáyuu casáha jniñu neé.

⁴⁶ Chi núu iyó manī rō jín máá-ni ñayuu jeē manī jín ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de.

⁴⁷ Te núu máni jnáhan ró cáhán yñúhún ró jín, çte na vé jeē váha ga sáha ró núu súcuan? Chi nde ñayuu tu cácañdije Yaā Dios, suni súcuan casáha i.

⁴⁸ Núu súcuan te ndaā na cóo ndihī jeē sáha ró, nájnūhun iyó ndaā ndihī jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

¹ Te jeē sáha ró táca jniñu váha nuū Yaā Dios, coto ró jéē ma sáha ró máá siquī jeē cūni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví.

² Jeē yúcuan te jeē sáha ró caridad, te ma sáha ró jéē cūni táca ñáyuu, nájnūhun casáha tēe stáhú-ni, cáhiin de nuū cúchitú ñayuu ini táca vehe ñi sinagoga jín núu yáhu. Chi súcuan casáha de návāha cuajnúhún ñayuu de jeē váha casáha de. Jendaá cáhán rī jín ró jeē tahū de cúu jeē jejnúhún ñayuu de.

³ Te róhó jíjnáhan ró, núu casáha ró caridad, te sáha yuhu rō, návāha nde amigo vāha ró tú cuni jeē sáha ró.

⁴ Súcuan na sáha yuhu rō caridad. Te máá Tátá rō jeē

jító ya jeē sáha yuhu rō, in
quívī te cuāha ya tahū cuu rō.

*Jeē ni stéén yā ndese cacān
tahú yō*

(Lc. 11.2-4)

⁵ Te jeē cájicān tahú rō, te
ma sáha rō nájnūhun cásáha
tēe stáhú-ni. Chi cánujnahan
ni de cuiñi de cacān tahú de
nuū iyó chitú ñayuu ini tãcá
vehe i sinagoga jíin táca yíqui
yáhu, návāha cuni ñayuu te
cuajnúhún i de. Jendaá cahán
rī jíin rō jeē maá yúcuan-ni
cúu tahū jeē nihín de, suu jeē
jejnúhún ñayuu de.

⁶ Te róhó jíjnáhan rō, núu
cájicān tahú rō, te ndiví rō
ini vehe rō te casi rō yehyí.
Te cacān tahú rō nuū maá
Tátá rō, Yaā ndeé yuhu jíin rō.
Yūcuán na te máá Tátá rō jeē
jító ya jeē súcuan sáha yuhu
rō, sáha ya jeē jicán rō.

⁷ Te jeē cájicān tahú rō, te
ma cahán saá-ni rō jnúhun jeē
tu cájecūhun ni rō, nájnūhun
cásáha ñayuu tu cájini jnúhun
Yaā Dios. Chi cájeni ni i
jeē núu cuehē jnúhun súcuan
cahán i, te sáá te cuni sōho ya,
te tuú.

⁸ Núu súcuan te ma sáha rō
nájnūhun cásáha máá i. Chi
máá Tátá rō, je jíin yā na
vé cájini ñúhún rō nde ná tu
cacān rō nuū yā.

⁹ Núu súcuan te suhva cacān
tahú rō:

Tátá maá ná jíjnáhan ná jéé
ndeé ní andiví,
níní na cóo yíñúhún ná nuū ní,
chi Yaā i cúu ní.

¹⁰ Te ñúhun ni na jéé yachí
quiji quívī ndacu ní
jniñu ní ñayiví yáha.

Te na cóo tãcá jniñu nújnahan
ni ní,

nájnūhun iyó ini andiví,
súcuan na cóo ini
ñayiví.

¹¹ Staā jeē cátecu na táca quívī,
cuāha ní núu ná vijna.

¹² Te cone cahnu ni ní núu
tãca cuéchi cásáha ná
núu ní,

nájnūhun cáhine cáhnu ni
na núu ñayuu casáha
cuéchi nuú ná.

¹³ Te ma cuáha ni jnúhun jeē
coto ndee jexeén sañá,
chi sa suhva jnama ní saña
núu táca jéé neé.

Chi máá ní cúu Yaā ndácu
jniñu, te jní ní poder,
te yōhyo luu cújéhnú ní ní
cáni. Súcuan na cóo.
Amén.

Achi rō jíjnáhan rō.

¹⁴ 'Chi núu cone cáhnu ni
rō nuū ñayuu casáha cuéchi
nuú rō, te suni súcuan cone
cáhnu ni maá Tátá rō andiví
nuú cuéchi rō.

¹⁵ Te núu ma cóne cáhnu ni
rō nuū ñayuu casáha cuéchi
nuú rō, te suni súcuan ma
cóne cáhnu ni maá Tátá rō
nuú cuéchi rō jíjnáhan rō.

*Jeē ni stéén yā siquī jnúhun
condite ni*

¹⁶ Te núu condite ni rō jeē
chiñúhún rō Yaā Dios, te ma
sáha rō nájnūhun cásáha tēe
stáhú-ni. Chi cásáha de jeē
coto xií de, te súcuan stéén de
nuú ñayuu jeē iyó ndite ni de,
návāha cuajnúhún i de. Jen-
daá cahán rī jíin rō jeē maá
yúcuan-ni cúu tahū jeē nihín
de, suu jeē jejnúhún ñayuu de.

¹⁷ Te máá rō jíjnáhan rō,
núu iyó ndite ni rō, te sa

chuhun vāha ró xínī rō te nandahá núū rō,

¹⁸ návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te ñin quivī te cuāha ya tahū cuu ró.

Ndese coo cúca yó nde andiví

(Lc. 12.33-34)

¹⁹ Ma cóndihvī ni rō caya rō ndajniñu cúca ini ñayivī yáha, chi quivī tiquíxin, te cáne xehyu, te tívi. Te suni quívicoo ñacuñhá te sácuiñhá.

²⁰ Chi sa suhva sáha ró táca jniñu váha návāha cayā tahū rō nde andiví. Chi yūcuan má quivī tiquíxin ni ma cáne xehyu jeē tívi. Ni ma cúu quivī ñacuñhá sácuiñhá.

²¹ Chi nde nuū nihín rō tahū váha ró, yūcuan cúu nuū cóndihvī ni rō siquī.

Tinūu cúu lámpara yiqui cúñu

(Lc. 11.34-36)

²² Tinūu ró cúu nájñuhun lámpara nuū yiqui cúñu rō. Núu súcuan te núu tinūu ró iyó ndijin, te ní-ni yiqui cúñu rō cúndijin.

²³ Te núu tinūu ró tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chi núu máni jeē jeni néé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquī xúhun

(Lc. 16.13)

²⁴ Ni ñin mozo ma cúu cuajniñu de nuū uñ patrón. Chi quivī ni de nuū ñin te coo manī de jíin inga, chí squícu váha de nuū ñin te sájéé ni de nuū

inga. Te suni súcuan ma cúu cuajniñu ró núu Yaā Dios te núu máni siquī xúhun ndihvī ni rō.

Yaā Dios ndíto ya yohó
(Lc. 12.22-31)

²⁵ Núu súcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéé cúhun ró.

²⁶ Condēhe ró ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vésú súcuan te máá Tátá rō andiví scáji yā tí. Te cánuú ndasí gá rō jijnáhan ró vésú táca saa ún.

²⁷ ¿Te ndé ñin ró, á cuu scuéhnu ró máá ró sava metro gā, vésú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jéé ita táca yúcū. Chi tu sájniñu, ni tu táu.

²⁹ Te cáhán rī jíin ró jeē ni rey Salomón, quivī ní ñuhun de sahma váha ndasí, tu ní ñuhun de sahma lúu súcuan nájñuhun ita ún.

³⁰ Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu róhó jijnáhan ró jéé ma sáha ya jeē nihín rō sahma. ¿Te naun tu cácandije ñihin ró jéé ndíto ya rohó?

31 Núu súcuan te ma nácani ndasí ni rō siquī jeē cáji rō, jeē coho rō, jeē cahun rō.

32 Chi tāca ñáyuu ñayīvi jéē tu cácanđije cúu jeē máni siquī jeē yáha cándihvī ni i. Te máá rō jijnáhan rō, chi íyó Tátá rō andiví, te jíní yā jeē cájini ñúhún rō tāca jéē yáha.

33 Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jijn siquī jeē sáha rō jniñu ndaā jeē nújnahan ni yā. Yūcuán na te sáha ya jeē nihín rō tāca jéē yáha.

34 Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi caní ni rō siquī jnúndóho jeē iyó ná ñn ná ñn-ni quiví.

Jeē ma cahán yō siquī cuéchi jnánhan yó
(Lc. 6.37-38, 41-42)

7

1 'Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá rō jeē casáha rō súcuan.

2 Chi nájnūhun cácahān rō siquī cuéchi ñayuu, suni súcuan cahān yā siquī cuéchi rō. Te cūhva jeē cándihvī ni rō siquī i, suni cūhva yúcuan sáha ya jijn rō.

3 Chi cuéchi jnánhan rō cúu nájnūhun jeē íne ñn yāca lúli tinūú i. ¿Te naun cásáha rō cuenta jeē súcuan, te tu cásáha rō cuenta cuéchi máá rō jeē cúu nájnūhun jeē íne ñn nduhu tinūu máá rō?

4 ¿Te naun cácahān rō jijn jnánhan rō: Na táva rī yāca íne

tinūu rō, te tu cánacani ni rō jeē íne ñn nduhu tinūu máá rō?

5 Tēe stáhú-ni cácuu rō núu súcuan. Xihna gā tinūu máá rō tava rō nduhu, te yūcuán na te cuu condēhe váha rō jéē táva rō yāca tinūu jnánhan rō.

6 'Ma sáha fuerza rō ñayuu cunéé quívicoo i nuū jnúhun íi yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani rō jnúhun ya nuū ñáyuu jeē tu cúní cuiñi cuajnúhún. Chi cándāa i nájnūhun quini jeē jeñú tí siquī perla jeē ndeé yahu ga.

Cacān yō nuū yā te nihīn yō
(Lc. 11.9-13; 6.31)

7 'Cacān rō nuū Yaā Dios, te cuāha ya nuū rō. Te nducú rō tāca jéē váha íyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahán yehyí ndé nune quiví i.

8 Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cúní i.

9 ¿Te ndé ñn rōhó núu sēhe rō jicán i staā nuū rō, te á cuāha rō ñn yuū nuū i?

10 ¿Te núu jicán i ñn chācá, te á cuāha rō ñn coō nuū i? Tú cuiñi súcuan.

11 Núu súcuan te máá rō jijnáhan rō, vēsú ñayuu iyó cuéchi cácuu rō, te cájini rō cuāha rō jéē váha nuū séhe rō. Te nagā ni cuu máá Tátá rō andiví jéē ma cuāha ya jeē váha nuū ñáyuu jicán nuū yā.

12 'Te nájnūhun cúní rō jeē sáha váha ñayuu jijn rō, suni

súcuan na sáha vāha ró jín i. Chi tutu ley Moisés súcuan ndácu jniñu, jín táca tutu tē ni canacani jñuhun Yaā Dios.

Siquī jeē quívi yó yéhyí túū
(Lc. 13.24)

13 'Condiñvī ni rō quívicoo ró ndaha Yaā Dios. Chi cúu nájñuhun ñin yéhyí túū. Chi yéhyí jín ichi jeē cuahán nuū jnahnú ndetū ñayuu, jité te cáhnu, te cuehē i quívicoo yūcuán.

14 Te yéhyí jín ichi jeē cuahán nuū nihín tahu i cotecu i, chi tuū yehyí te cuíñi ichi, te jecu-ni i cánihñ i.

Jín jniñu cásaha ñayuu te nácuni yō ndese ñayuu cácuu i
(Lc. 6.43-44)

15 'Te ma cándíje cuíti rō tē stáhú jéē cácahán de jeē jñuhun Yaā Dios cánacani de. Chi nájñuhun lanchi, quíti tú xeēn, súcuan cásaha de vējicoo de nuū rō. Te ñni anuá de chi cácuu de nájñuhun yihī, quíti xeén.

16 Jín jniñu cásaha de te nácuni rō de ndese tē cácuu de. Chi cúu nájñuhun jeē tu scóyo ró ndehē uva xinī ññu, ni tu scóyo ró higo xinī ññu yóquin.

17 Te tācá yujnu váha chi jēhe ndehē váha, te yujnu néé chi cúun ndehē neé.

18 ññin yujnu váha ma cúun ndehē neé, te ni ññin yujnu néé ma cuáha ndehē váha.

19 Te tācá yujnu jeē tu jēhe ndehē váha, chi tahndē te cayū nuū ññuhún.

20 Te suni súcuan cácuu tē ún, chi jín jniñu cásaha de te nácuni rō ndese tē cácuu de.

Nasūú ndihi ñayuu quívicoo andiví
(Lc. 13.25-27)

21 'Nasūú ndihi ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máá nene ñayuu jeē squícu jniñu cúni Tátá rī andiví.

22 Te quívi jeē sándaā rī jniñu ñayuu, te cuehē i cahán jín rī: Jitoho na jijnáhan ná, ni canacani ná jñuhun jín síhví ní, te ni caquenehen ná táchī jín síhví ní, te ni casáha ná cuehē jniñu jéhnu jín síhví ní jeē náa ni ñayuu sáha. Achi i.

23 Yūcuán na te cahán rī jín ñayuu ún: Tu jíní cuíti rī rohó. Cujiyo quingoo ró, chi ñayuu casáha jniñu néé cácuu ró, achi rī.

Siquī uú vehe
(Lc. 6.47-49; Mr. 1.22)

24 'Núu súcuan te tāca ñayuu jeē cájini sōho jñuhun cáhán rī te squícu i, cácuu i nájñuhun ñin tē ni nacani vāha ni, te ni jeni de vehe de siquī cáva.

25 Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquī cáva ndéé.

26 Te tāca ñayuu jeē cájini sōho jñuhun cáhán rī te tu squícu i, cácuu i nájñuhun ñin tē cánéé jeē ní jeni de vehe de nuū ññiti.

27 Te ni cuun saū, te ni quiñi ndute ññuhún cuehē, te ni quee tachī xeén, te ni cachundahá vehe ún. Te ni cótúú-ni, te ni naa ññi-ni. Achí yá jín i jijnáhan i.

28 Te ná ni jīnu ni cahān Jesús tāca jnūhun yáha, te ñayuu cuehē un ní canaa ni i ni cajini i jnūhun ni steén yā.

29 Chi ni steén vāha ya nuū i, chi máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñn tēe ndóho cuehyī stehyú
(Mr. 1.40-45; Lc. 5.12-16)

8

1 Te ni nanuu Jesús yucu ún, te cuehē ñayuu cándiquīn i ya.

2 Te ñn tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahān de jíin yá:

Jíni na jéē cuu sáha ní jéē nduvāha ná, te núu cúní ni, áchí de.

3 Te Jesús ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

4 Yūcuán na te ni cahān Jesús jíin de:

Ma cáchi cuiti rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

Jeē ní nasávāha ya mozo capitán
(Lc. 7.1-10)

5 Te ni quívi Jesús ñuu Capernaum. Te ñn tēe nación Roma jeē cúu capitán, ni quee

de nuū yā, te ni cahān ndahú de jíin yá:

6 Mozo na cátú i vehe ná, chí ni ljin i te ndóho xeēn i, áchí de.

7 Te ni cahān Jesús:

Quihīn rī nasávāha ri i núu súcuan, áchí yá.

8 Te ni cahān capitán jíin yá:

Tu cújéhu ná jéē quihín ni quívi ní vehe ná. Chi máá jéē cahán-ni ní, te na ndúvāha-ni mozo na.

9 Chi máá ná suni ndíso jniñu ná ní casáha tēe cácujeñu ga. Te cújéhu ná núu táca soldado na. Te núu cáhán na jíin ñn de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

10 Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquīn yā ún:

Jendaá cahán rī jíin ró jeē ni nación yō Israel tu ní nihín rī ni ñn ñayuu cándije nihín súcuan, nájnūhun cándije tēe yáha, vésú tēe nación tu jíni jnūhun Yaā Dios cúu de.

11 Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví.

12 Te sava ñayuu nación Israel jeē maá i quívicoo núu, te sa quenehen ya i quihín i nuū neē, chí tu ní cácuñe i. Te yūcuan ndáhyū i te nacayihí

yuhu i jeē ndoho xeēn i. Achí yá.

13 Yūcuán na te ni cahān yā jín tēe cúu capitán:

Cuánuhun vehe ró, chí sáha ri nájnūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chīso Pedro

(Mr. 1.29-31; Lc. 4.38-39)

14 Te ni jehēn Jesús vehe Pedro. Te ni jito ya naná chīso de jeē catú ña yíhi quíji ña.

15 Te ni jñi ya ndaha ña, te ni quenda-ni quíji ún ña. Te ni ndocuñi ña, te ni sáha ña jeē ní cayeji de jín yá.

Jeē ní nasávāha ya cuehē ñayuu

(Mr. 1.32-34; Lc. 4.40-41)

16 Te jeē ní cuaa ni quecoo ñayuu jín cuéhē ñayuu jeē ñūhun tachī ini i. Te ni quenehen ya tachī un cuángoo jín jnúhun cáhān-ni ya. Te suni ni nasávāha ya tāca ñayuu cácuñū.

17 Te súcuan ni cuu návāha cundaā jñūhun ni cahān Isaías, tēe ni nacani jñūhun Yaā Dios jenahán: Máá yá ni tejiyo ndinuū cuehyi cándoho yó, achí Isaías.

Siqui ñayuu jeē cácuñi i condiquin i ya

(Lc. 9.57-62)

18 Te ni jito Jesús jeē ní ndicó ndúū cuehē ñayuu yā. Te ni cahān yā jín tēe cáscuáha jín yá jeē na yáha de jín yá inga lado mar.

19 Te ñin tēe stéén tutu ley Yaā Dios, ni quee de nuū yā, te ni cahān de:

Maestro, condiquin na níhín quíhín yó ndé-ni cúu-ni nuū quíhín ni, achí de.

20 Te ni cahān Jesús jín de:

Tāca ñūcuii, iyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú rī, achí yá.

21 Te inga tēe ni cahān de jín yá, te tēe scuáha jín yá cúu de:

Condetu ní ndé na quíchindūji ná tátá na xíhna gā. Yūcuán na te condiquin na níhín, achí de.

22 Te ni cahān Jesús jín de:

Condiquin ruhū na quíhín yó. Te stóo tāca ndíyi na chindūji jñáhan ndíyi, chí ndíyi cácuñū ñayuu tu cácuñi. Achí yá.

Jeē ní jecuñi tachī níhin jín mar ni sáha ya

(Mr. 4.35-41; Lc. 8.22-25)

23 Yūcuán na te ni quívi Jesús ini barco, te tēe cáscuáha jín yá ni quívicoo de cuahān de jín yá.

24 Te nuū mar ni jecuñi ñin tachī níhin, te ni stónda ndute mar, ni quívi ini barco un. Te Jesús chí quíxí yá.

25 Te tēe cáscuáha jín yá ni castónda de ya, te ni cacahān de:

Jnama ní yóhó, chí je quée yó chíji ndute, achí de.

26 Te ni cahān yā jín de:

¿Naun cáyūhú ndasí ró? Te tu cácuñi níhin ró jéē cácu ró sáha ri, achí yá.

Yūcuán na te ni ndocuñi yā, te ni cahān yā nuū tachí níhin

un jíin núū mar. Te ni cuu nayúú íi-ni.

²⁷ Te ni canaa ni de jíjnáhan de, te ni cacahān de:

¿Ndé ñin ga cúu tēe yáha, jéé ndé tachī níhin jíin mar cájetáhu jéé cahán de? áchí de.

Tēe Gadara jeē cándoho tachī

(Mr. 5.1-20; Lc. 8.26-39)

²⁸ Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyí, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni ñin ñayuu tu cúu yāha i ichi yúcuán.

²⁹ Te ni cacana cóhó de ni casáha tachī:

¿Naun vēji ní núū ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhīn cuehē quīnī cájitu tī.

³¹ Te tachī jeē cáñuhun ini tēe un ní cacahān ndahú jíin yá:

Núū quenehen ní sáña, te cuāha ní jnúhun na quívīcúo ná ini quīnī cáhīn yūcuán, áchí.

³² Te ni cahān yā jíin:

Cuángoo núū súcuán.

Te ni quendacoo tachī ún ini tēe ún, te ni quívīcúo ini quīnī. Te quīnī un ní cajinu tī ni caningava tī ñin yucáva, te ni ndaquīhi tī ndute mar, ni cajihī tī.

³³ Te tēe cándito tī ni cajinu de cuangoo de jeē ní cayūhú de. Te ni najinūcúo de ñuu.

Te ni cacastūhún de tācá jniñu yúcuán, jíin ndese ni cuu jeē ní quendacoo tachī ini ndíndúú tēe ún.

³⁴ Yūcuán na te ndivii ñayuu ñuu un, ní quendacoo i cuacandēhé i Jesús. Te ná ni jinūcúo i nuū íne ya, te ni cacahān ndahú i jíin yá jeē na quénda ya región yúcuán quíhīn yā.

Jeē ní nasávāha ya ñin tēe ndóho cuehyī ni íjin

(Mr. 2.1-12; Lc. 5.17-26)

9

¹ Yūcuán na te ni ndīvī Jesús ini barco. Te ni nayāha ya cuahān yā inga lado mar, te ni najinū yā ñuu maá yá.

² Te ni caquindeca ñayuu ñin tēe ndóho cuehyī ní íjin, cá tú de nuū ñin camilla. Te ni jini Jesús jeē cá candíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ní rī nuū tāca cuéchi rō, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuán, chí cáhán de jnúhun ndevāha jeē quití ni Yaā Dios.

⁴ Te ni jini Jesús jeē súcuán cájeni ni de, te ni cahān yā jíin de:

¿Naun cájeni ni rō jeē cahán ndevāha rī?

⁵ Jeē uú jnúhun yáha, ¿ndé ñin yí gá cáa? ¿A jéé cahán rī jíin tēe cúhu: Je íne cáhnu ní rī nuū tāca cuéchi rō? ¿Chí yí gá jeē cahán rī: Ndocuñī te caca

ró, chi je ni nduvāha ró, achi rī?

⁶ Te vijna te na stéén rī jeē maá rí, Yaā ní nduu tēe, ndiso jniñu ri ini ñayiví yáha jéē cóne cáhnu ni rī nuū cuéchi.

Yūcuán na te ni cahān yā jín tēe ni íjin ún:

Ndocuiñī te naquihin ró camilla rō te quinhun rō vehe ró, áchí yá jín de.

⁷ Yūcuán na te ni ndocuiñī-ní tēe ún, te cuanuhun de vehe de.

⁸ Te ná ni cajito ñayuu un jeē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñin tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuáhān yā. Te ni jito ya nuū ñin tēe nání Mateo, néne de nuū cutútú xúhun renta. Te ni cahān yā jín de:

Condiqūn ruhū na quíhín yō.

Te ni ndocuiñī de, te cuahān de jín yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe cásáha cuéchi, suni cáyūcú de cáyeji de staā jín Jesús jín tēe cáscuáha jín yá.

¹¹ Te tēe grupo fariseo, ni cajito de, te ni cacahān de jín tēe cáscuáha jín yá:

¿Naun yéji maestro rō jín tēe cástútú xúhun renta jín inga tēe cásáha cuéchi? áchí de.

¹² Te ni jini Jesús, te ni cahān yatá yá jín de:

Ñayuu cáhīyo vāha, tu jini ñúhún i tēe tájna, chi ñayuu cácuñú cúu jeē jini ñúhún.

¹³ Cuáhán jijnáhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu ñi: Cúni rī jeē na cúndáhú ni rō jnáhan ró, nasūu jéē socó rō quiti nuū rī, achí Yaā Dios nde jenahán. Te ruhū nasūu jéē véji ri cana ri ñayuu tú cuéchi, jeē cúu i nájnūhun ñayuu cáhīyo vāha, chí sa suhva véji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

Jeē ní cacajñúhún de ya síquī jeē cóndite ni

(Mr. 2.18-22; Lc. 5.33-39)

¹⁴ Yūcuán na te tēe cáscuáha jín Juan tēe scuándute, ni que-coo de nuū Jesús. Te ni cacahān de jín yá:

Sāña jín tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jín máá ní, ¿naun tu cásáha de súcuan?

¹⁵ Te ni cahān Jesús jín de:

¿A cuu condite ni de níni jéē iyó rí jín de? ¿A cuu cucuíhyá ni ñayuu cáhīn vico nándāha, te núu níni néne tēe nándāha? Te quee quiví jeē cújiyo tēe nándāha, te quiví ún chí condite ni i.

¹⁶ Te ni cahān yā uū jnūhun yatá síquī jeē tu quijnáhan jnūhun jeé jéē steén yā jín táca jnūhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chí núu súcuan te ndiyi pedazo jeé un, te

tahndē gā jeē tuhú un, te nducáhnū ga nuū catáhdé un.

¹⁷ Te suni tu cáchuhun vino jeé ini ññi túhú. Chi núu súcuan te ndatā ññi ún, te naa vino jíin ññi. Chi cánuú jéē chúhun i vino jeé ini ññi jéé, te súcuan te quéndōo vāha ndindúú. Achí yá.

Jnūhun sēhe síhí Jairo jíin ñahan ní quehé yusáhma ya (Mr. 5.21-43; Lc. 8.40-56)

¹⁸ Te níni cáhán Jesús tāca jnūhun yáha, te ññi tēe cújéhnū nuū ñáyuu hebreo, ni quee de nuū yā. Te ni jecuiñi yiti de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuiñi Jesús, te cuahān yā jíin de, te suni cuango tēe cáscuáha jíin yá.

²⁰ Te mēhñu ñáyuu cuango jíin yá ni quee ññi ñahan, te je ni cuu uxī uū cuiyā ndóho ña cuehyi niñi. Te ni quee ña ichi yátá yā, te ni quehé ña yusáhma ya.

²¹ Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña.

²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeē yúcuan ní nduvāha ró, achí yá.

Te ni nduvāha ña máá hora un.

²³ Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē

quíchindūji de i, jíin núu ñáyuu cuehē, cásávaā i.

²⁴ Te ni cahān yā jíin i:

Cujiyo jíináhan ró, chi sūchi síhí yáha, tu ní jihí i chi quíxi-ni i, achí yá.

Te ni cajecū catá i jeē ni cáhān yā.

²⁵ Te ni quenehen ya ñáyuu cuehē ún, te ni quívi ya ini vehe. Te ni jñi ya ndaha sūchi síhí ní jihī ún, te ni ndocuiñi-ni i.

²⁶ Te ní región yúcuan ní jitē núu jnūhun jniñu jéhnū ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yúcuan cuahān yā. Te uū tēe cuáá cuango de yatā yā, cácana jee de:

Máá ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cá candíje ró jéē cúu nanune ri tinūu ró? achí yá.

Te ni cacahān de:
Cá candíje ná, achí de.

²⁹ Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cá candíje ró, achí yá.

³⁰ Te ni cananune-ni tinūu de. Te Jesús ni cahān níhin ya jíin de:

Ma cáchi cuiti rō nuū ni ññi, achí yá.

³¹ Te máá de chi ni quendacoo de, te ni cajete-ni de jnūhun ní región yúcuan jéē súcuan ni sáha ya jíin de.

Jeē ní nasávāha ya ñn tē ññhín

³² Te nuū ní quendacoo tē un cuángoo de, te ni quecoo ñayuu jiín ñn tē ññhín, jeē ñúhun tachī ini de.

³³ Te ni quenehen ya tachī un cuáhān. Te tē ññhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuíti yō ni ñn jniñu súcuan ini ñuu Israel, achí i.

³⁴ Te tē grupo fariseo chi ni cacahān de:

Tē yáha chi quénehen de tachī jiín fuerza maá jexeén jeē cujéhu nuū tachī, achí de.

Jeē cundáhú ni yā ñayuu cuehē

³⁵ Te ni jica cuu Jesús tācá ñuu jiín rancho, te ni steén yā jnūhun ini tācá vehe ñi sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyī cándoho i.

³⁶ Te cundáhú ni yā jito ya nuū ñayuu cuehē ún. Chi cándoho i te cácuñhyá ni i, chi cácuu i nájnūhun lanchi jeē tú jito ho tī, chi tu ndíquin i Yaā cúu Jito ho i.

³⁷ Yūcuán na te ni cahān yā jiín tē cácuáha jiín yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tē cahnde chí jecu-ni de cúu.

³⁸ Núu súcuan te cacān tahú rō nuū maá Jito ho rō Yaā Dios jeē na táji yá cuehē tē na quíngoo de cahnde de trigo, cúu jeē nacani de jnūhun ya nuū ñayuu. Achí yá.

Jeē ní nacāji ya uxī uū tē apóstol

(Mr 3.13-19; Lc. 6.12-16)

10

¹ Yūcuán na te ni cana ya uxī uū tē jeē scuáha de jiín yá. Te ni jēhe ya poder nuū de jeē quenehen de tachī ini ñayuu, jiín jēē nasávāha de ñayuu cácuñu tācá ndinuū cuehyī.

² Te yáha cúu síhvī ndihúxi uū tē apóstol un: Tē ñn cúu Simón jeē suni nání Pedro, jiín ñani de Andrés. Te uū gā de cácuu sēhe Zebedeo, te nání de Jacobo jiín Juan.

³ Yūcuán na te Felipe, Bartolomé, Tomás, Mateo tē ni stútú xúhun renta, Jacobo sēhe Alfeo, jiín Lebeo jeē suni nání Tadeo,

⁴ jiín Simón tē grupo cananista, jiín Judas Iscariote, tē jeē ní nastúu de ya.

Jeē ní tají yá ndihúxi uū de quinacani de jnūhun

(Mr. 6.7-13; Lc. 9.1-6)

⁵ Te ni tají Jesús ndihúxi uū tē yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñayuu jeē násūu ñayuu hebreo cácuu i, ni ma quívicoo ró táca ñuu ñayuu Samaria.

⁶ Chi nuū maá-ni ñayuu nación yō Israel quíngoo ró, chí cácuu i nájnūhun lanchi jeē ní sana.

⁷ Te jeē quíngoo ró te suhva nacani ró jnūhun: Je ni cuyajni Yaā ndeé andiví jeē ndacu ya jniñu nuū rō, achí rō.

8 Te nasávāha ró ñáyuu cándoho cuehyī stehyú jín ñáyuu cándoho tāca gá cuehyī, te nastécu rō ndīyi te quenehen ró táchī ini ñayuu. Te súcuan-ni ni jēhe rī poder nuū rō jeē sáha ró, te suni súcuan-ni sáha ró jín i.

9 Te ma cóndiso ró xúhun oro, ni xúhun plata, ni centavo cuechí.

10 Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi siquī jniñu jeē nácani ró jnūhun nuū ñáyuu, te cánuú coto i róhó.

11 Te na-ni ñuu chí rancho núu ni jinūcoo ró, te yūcuán nducú ró ññ ñayuu vāha, te coyūcu ró vehe i nde quingoo tucu ró.

12 Te jeē quivī ró vehe ñayuu ún, te cahān rō jeē na quíji jnūhun ndeyí jnūhun sñ ni nuū i.

13 Te núu ñayuu vāha cácuu i, te jnūhun ndeyí ní cahān rō quendōo siquī i. Te núu nasūu ñáyuu vāha cácuu i, te jnūhun ndeyí ní cahān rō ma quendōo siquī i.

14 Te núu iyó ñáyuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i.

15 Jendaá cahán rī jín ró jeē quivī juicio te xeēn gā coo castigo siquī ñuu casáha súcuan vésú siquī ñuu Sodoma jín ñuu Gomorra nuū ní casáha ndasí ñáyuu cuéchi.

Jeē coto xeēn ñayuu de jínāhan de

16 'Cuni sōho ró, chi táji rí rohó quíngoo ró nájñūhun lanchi mēhñu yíhī. Núu súcuan te coo listo rō nájñūhun coō, te coo vitá ni rō nájñūhun paloma.

17 Te condito ró máa ró nuū ñáyuu, chi quee quivī jeē quíndeca i róhó núu tohó, te cani i róhó ini tācá vehe ññ sinagoga.

18 Te suni nde nuū tācá gobernador jín rey quíndeca i róhó jēé siquí ruhū. Te súcuan te nune ichi jeē nacani ndaā rō jnūhun ri nuū de jín núu ñáyuu tācá nación jeē tu jíní jnūhun Yaā Dios.

19 Te núu ni jendeca i róhó núu tāca téé ún, ma nácani ndasí ni rō ndese cahān rō. Chi máa hora un te máa yá steén nuū rō ndese cahān rō.

20 Chi nasūu máa ró cúu jeē cahán, chi Espíritu maá Tátá rō cúu jeē cahán jín yuhu ró.

21 Te sava ñayuu tu cá candíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jín náná jeē na cúu.

22 Te ndihi ñayuu quitī ni i nuū rō jeē siquí ruhū. Te ñayuu jeē cuiñi ñihin nde jeē jínu jnūndóho, ñayuu ún chi cácu ánuá i.

23 Te núu cájito xeēn i róhó ññ ñuu, te cunu ró quíhñ rō inga ñuu. Chi jendaá cahán rī jín ró jeē ma ndécáva ró caca cuu ró ndihi nación yō Israel te ndiji-ni máa rí, Yaā ní nduu tēe.

24 'Ññ tēe scuáha, tu cújēhnu de nuū maestro de. Ni tēe

cúu mozo, tu cújéhnú de nuū patrón de.

²⁵ Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rí, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñn cúu jeē yūhu yó
(Lc. 12.2-9)

²⁶ 'Núu súcuan te ma yūhu ró coto ró ñáyuu. Chi tāca jnúhun cácahān sáhi i ma quéndōo sáhi cuiṭi, chi ndihí natūu ndi-jín, te cuni ñáyuu.

²⁷ Jnūhun ní cahān rī jín ró jeē tu ní jíní ñáyuu, na nácastūhun cájí ró nuū i. Te jnūhun ní nacani sáhi rí nuū rō, na nácani jee ró yátā tācá vehe.

²⁸ Te ma yūhu ró coto ró ñáyuu cahni yiqui cúñu rō, chi ma cúu cahni i ánuá rō. Chi sa suhva yūhu ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jín yiqui cúñu rō infierno.

²⁹ 'Te tācá saa chi tú yahu ndéé tī, chi nde uū tī jeē ñn centavo lulí. Te ni ñn tī tu nínga nuū ñúhun te núu tu jéhe Tátá rō jnūhun, chi ndíto ya tī.

³⁰ Te nagā ni cuu róho jíjnáhan ró, chi nde ndihí ixí xíní rō je ni cahu ya.

³¹ Núu súcuan te ma yūhu ró jíjnáhan ró, chi cánuú ndasí gá rō nuū yā vēsú cuehē tācá saa.

Ñáyuu jejnūhún Jesucristo nuū inga ñáyuu
(Lc. 12.8-9)

³² 'Te tāca ñáyuu jeē cuajnúhún ruhū nuū inga ñáyuu, suni súcuan cuajnúhún rí i nuū Tatá rī, Yaā ndeé andiví.

³³ Te tāca ñáyuu jeē ma cuajnúhún ruhū nuū inga ñáyuu, suni súcuan ma cuajnúhún rí i nuū Tatá rī, Yaā ndeé andiví.

Jeē siquí Jesús te cusñn ini ñáyuu
(Lc. 12.51-53; 14.26-27)

³⁴ 'Ma cáni ni rō jíjnáhan ró jéē véji rí jeē cóyūcu maní ñáyuu ñayiví. Tú véji rí jeē cóyūcu maní ñáyuu, chi sa suhva cuajnáhan i jeē siquí ruhū.

³⁵ Chi jeē siquí ruhū te cusñn ini sēhe yí jín tátá, te sēhe sáhi jíjn náná, te sēhe jēnu jíjn náná chíso.

³⁶ Chi tāca ñáyuu candíje ruhū, chi jnáhan vehe i cúu jeē quitī ni nuū i.

³⁷ 'Te núu ndé ñn ñáyuu maní gā i jíjn tátá i chí jíjn náná i vēsú jíjn ruhū, nasūu ñáyuu vāha cúu i jeē cóndiquñ i ruhū. Te núu ndé ñn ñáyuu maní gā i jíjn sēhe yí i chí jíjn sēhe sáhi i vēsú jíjn ruhū, te suni nasūu ñáyuu vāha cúu i jeē cóndiquñ i ruhū.

³⁸ Te na-ni ñáyuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquñ i ruhū, nasūu ñáyuu vāha cúu i jeē cóndiquñ i ruhū.

³⁹ Te núu ndé ñáyuu cúní i cácu i nuū jnūndóho quiji nuū i jeē siquí ruhū, núu súcuan

te jnahnū ndetū i nńí cáni. Te núu ndé ñn ñayuu vēsú na cúu i jeē siquí ruhū, te cotecu i nńí cáni.

Jeē iyó táhū yō nuū Yaā Dios
(Mr. 9.41)

⁴⁰ Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú ruhū, cájetáhú i Yaā ní tají ruhū vēji ri.

⁴¹ Núu na-ni ñayuu cuatáhú i ñn tēe nácani jnūhun Yaā Dios, siquí jeē jica de jniñu Yaā Dios, núu súcuan te inuú-ni coo tahū de nuū Yaā Dios jíin tēe nácani jnūhun Yaā Dios. Te núu na-ni ñayuu cuatáhú i ñn tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā.

⁴² Te núu ndé ñáyuu cuāha i vēsú ñn ñajin ndute míjin coho ñn sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

Jeē ní tají Juan uū tēe nuū yā
(Lc. 7.18-35)

11

¹ Te ná ni jinu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

² Te íne Juan vecāa. Te ni nihín de jnūhun tācá jniñu sáha Cristo. Te ni tají de uū tēe cáscuáha jíin de,

³ cuacajnūhún de ya:

¿A máá ní cúu Cristo jeē achí tutu jeē quíji, chí condetu yó inga tēe quíji? áchí de.

⁴ Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró.

⁵ Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i.

⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

⁷ Te náa cuanuhun ndindúú tēe ún, te ni quejéé Jesús cahān yā jnūhun Juan jíin ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí?

⁸ Te núu tuú, ¿te na vé ni jécondēhe ró núu súcuan? ¿A ñn tēe cúní cujéhnu jeē ñūhun sahma lúu? Tuú chi cájini rō jeē tēe cáñuhun sahma lúu, máni ini vehe rey cáyūcú de.

⁹ ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhān rī jíin ró jeē suu ni jécondēhe ró, te cújéhnu ga Juan yáha vēsú tāca gá tēe ni canacani jnūhun Yaā Dios.

¹⁰ Chi jnūhun Juan cúu jeē ni cahān Yaā Dios jeē yosó núu tútu íi:

Tají rí tēe nacani jnūhun ri
cosnūú de ichi núú
Cristo,

návāha coo tūhva ñayuu jeē
jinú yā.

Achí Yaā Dios, achí tutu.

11 Te jendaá cahán rī jín ró
jeē ini ñayīví yáha cújéhnū ga
Juan tēe scuándute vēsú tāca
gá tēe jeē ni íyo ini ñayīví. Te
vēsú súcuan te tāca tēe núu
ga ini ñuu nuū ndácu Yaā
andiví jniñu, cújéhnū ga de
vēsú Juan.

12 Te nde quivī ní quee Juan
tēe scuándute, te nde vijna, chí
cánducú ndéyí ñayuu quívicoo
i ndaha Yaā andiví jēē ndácu
ya jniñu nuū i. Te nde ñayuu
xeēn cánducú ndéyí i siquī.

13 Chi nde ná tu quiji Juan,
te ni íyo máá ley Moisés, te
suni ni íyo tāca tēe ni canacani
jnūhun Yaā Dios. Te ni ca-
castūhún de ndese coo jeē
ndacu Yaā Dios jniñu.

14 Te ni cacahān de jeē ndíji
Elías. Te núu cáconi rō cu-
atáhú ró jnūhun, te jíní rō
jeē máá Juan cúu tēe jeē ní
cachi tutu jeē quiji, chí cúu de
nájñūhun Elías.

15 Tāca róhó jēē jíní sōho, na
chúsóhó ró.

16 Yāhá cachi rī ñn jnūhun
yátá návāha na cúni rō ndese
cúu ñayuu tiempo vijna. Cúu i
nájñūhun sūchi lúlí cáhiin nuū
yáhu cácasiquí i. Te cácana
ndee i xinī jnáhan i:

17 Ni cativí rī scuilí, te tu
ní cájita jéhé ró. Te ni ca-
jita ri yaa jeē cuihyá jíta, te
tu ní cándahyū rō, achí i. Te
nájñūhun cándāa sūchi lúlí un

jēē tu ní nújnahan ni i ni ñn,
súcuan cándāa ró.

18 Chi ni quiji Juan te cuehē
jínū ni íyo ndite ni de, tu ní
yéji de ni tu ní jíhi de. Te
tu ní cánujnahan ni rō, chí ni
cacahān rō jeē ñūhun tachī ini
de.

19 Yūcuán na te ni quee maá
rí, Yaā ní nduu tēe, te yéji rī
jíhi ri, te tu cánujnahan ni rō,
te chísoó jnūhun ró cacahān rō
jeē máni máá jēē yéji rī jíhi
ri vino. Te quijnáhan ri jín
tēe cástútú xūhun renta jín
tāca gá tēe cása ha cuēchi, achí
ró. Te núu cúndichí ñn tēe jín
jnūhun Yaā Dios, te jín jniñu
sáha de te nátūu jeē tēe ndíchí
cúu de. Achí yá.

*Jeē ní cuxeēn yā nuū sava
ñuu nīhni ni
(Lc. 10.13-15)*

20 Yūcuán na te ni quejéé yá
cuxeēn yā nuū tāca ñuu nuū
ni sáha ya cuehē jniñu jéhnū,
chí tu ní canacani ni i jeē stóo i
cuēchi i. Te ni cahān yā:

21 Nacā jeē xeēn ndoho ró,
ñáyuu ñuu Corazín. Te nacā
jeē xeēn ndoho ró, ñáyuu ñuu
Betsaida. Chí núu ini ñuu Tiro
jín ñuu Sidón ni sáha ri jniñu
jéhnū jeē ni sáha ri ini ñuu
maá ró, te yachí nacani ni
ñayuu ñuu un jēē stóo i cuēchi i
núú. Te sáha i seña jeē steén
jeē nácani ni i siquī cuéchi i,
chí chuhun i sahma jnúú te
chuhun i yaā xinī i núú.

22 Núu súcuan te cáhan rī
jín ró jeē quivī coo juicio te
xeēn gā coo castigo siquī rō
jijnáhan ró vēsú jeē ni íyo siquī
ñuu Tiro jín ñuu Sidón.

23 Te r6h6 n̄ayuu n̄uu Capernaum, ¿á cájeni ni r6 jeē cujéhnú ró nájñuhun ìn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Chi núu ini n̄uu Sodoma ni sáha ri jniñu jéhnú jeē ni sáha ri nuū maá ró, te coo n̄uu yúcuán ndé vijna núu.

24 Núu súcuán te cáhán rī jín ró jeē quiví coo juicio te xeēn gā coo castigo siquī r6 vésú jeē ni íyo siquī n̄ayuu n̄uu Sodoma. Achí yá.

Nehen nuū rī ndetātu ró, achí yá

(Lc. 10.21-22)

25 Te suni quiví un ní cahān Jesús:

Na cútahū na núu ni Tátā, Jitoho ándiví jín n̄ayiví. Chi ni jesi ní táca jñuhun ndíchí ní, jeē ma cúni n̄ayuu ndíchí jín n̄ayuu tūhva cuenta n̄ayiví yáha. Te ni steén ni núu n̄ayuu cácuu nájñuhun sūchi lúli.

26 Chi súcuán ni nujnahan ni ni Tátā, achí yá.

27 Te ni cahān gā yā:

Ndiví ni jēhe Tátá rī nuū rī. Te tu cájini n̄ayuu ndé ìn cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cájini n̄ayuu ndese Yaā cúu máá Tátá, chi máá-ni Sēhe cúu jeē jiní. Te íyó n̄ayuu jeē cuní maá Sēhe steén yā nuū i ndese Yaā cúu Tátá yā, te máá i suni cuní i.

28 Táca ró jēē ni cuíta ró jín táca jniñu jín ley jeē yí sáha jín ró, nehen quiví coo ró ndaha ri, te ndetātu ró sáha ri.

29 Quiví ró núu jniñu ndácu máá rí, te scuáha ró coo ró

nájñuhun íyó máá rí. Chi vītá ni rī te suchí ni rī. Te súcuán te ndetātu ró jín ánuá r6 sáha ri.

30 Chi tú yí jēē cuandetū r6 nuū rī, ni tú yí jēē squícu ró jniñu ndácu ri. Achí yá.

Jeē ní cataxín de yoco trigo quiví ndetátú

(Mr. 2.23-28; Lc. 6.1-5)

12

1 Te ìn quiví ndetātu ní yáha Jesús cuahān yā nuū cáa trigo. Te tēe cáscuáha jín yá, cáji de s6co. Te ni quejé de cátaxín de yoco trigo cáyeji de.

2 Te ni cajito tēe grupo fariseo, te ni cacahān de jín yá:

Condēhé, chi tēe cáscuáha jín ró casáha de jniñu jeē tu íyó váha sáha yó quiví ndetátú, áchí ley Moisés.

3 Te ni cahān maá yá jín de:

¿A tu ní cácahu ró tutu ndese ni sáha David, ìn quiví jeē ni jí de s6co jín tēe cáhīn jín de?

4 Te ni quiví de ini vehe Yaā Dios. Te ni yeji de pan ì jeē yosó ndijin nuū Yaā Dios. Te tú na ley jeē cáji de, ni tēe cáhīn jín de, chi máá-ni sutū cuu cají. Te vésú súcuán te tú na cuēchi ní íyo siquí de.

5 ¿Te á tu ní cácahu ró tutu ley Moisés, ndese casájniñu sutū ini templo, vésú quiví ndetātu cúu? Te tú na cuēchi íyó síquí de, vésú quiví ndetātu casájniñu de jniñu jeē cácuu de sutū.

6 Te cáhán rī jín ró jeē maá rí jeē íyó yáha, cújéhnú ga rī vésú templo.

7 Te tu cájecūhun ni rō jijnáhan ró jnūhun yáha jeē yosó núū tútu īi jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vésú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahán rō súcuan siquī téé jeē tú na cuēchi núú.

8 Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, achí yá.

Jeē ní nduvāha tēe ni ichī ndaha

(Mr. 3.1-6; Lc. 6.6-11)

9 Yūcuán na te cuahān Jesús, te ni quivī ya ini vehe īi sinagoga.

10 Te yūcuan íne ñn tēe ni ichī ñn ndaha de. Te cácuni tēe grupo fariseo jeē niñin de cuēchi siquī yā, te ni cacajnūhún de ya:

¿A íyó ley jeē cuu nasávāha yó ñayuu cuhú quivī ndétátú? achí de.

11 Te ni cahān yā jín de:

¿Ndé ñn róhó, núu névāha ró ñn lanchi, te núu nínga tí ini ñn yaū quivī ndétátú, te á tu jéhén rō natava rō tī, chí naún?

12 ¿Te á tu cánuú ndasí gá ñn tēe vésú ñn lanchi? Núu súcuan te vetū-ni sáha yó jniñu váha quivī ndétátú, achí yá.

13 Yūcuán na te ni cahān yā jín téé ni ichī ndaha ún:

Scaá ndaha ró.

Te ni scaá de, te ni nduvāha-ni nájnūhun íyó inga.

14 Yūcuán na te ni quenda-coo tēe grupo fariseo, te ni

candajnūhún de siquī Jesús, ndese cahni de ya.

Jnūhun Jesús jeē ni cáhān Isaías nde jenhán

15 Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquīn i ya. Te ni nasávāha ya ndihi ñayuu cuhú.

16 Te ni ndacu ya jniñu nuū i jeē ma stéén i ya.

17 Te súcuan ni cuu návāha squícu jnūhun ni cahān Yaā Dios siquī Jesús, te ni nacani Isaías jnūhun ya un ndé jenhán:

18 Yāha cúu mozo rī jeē ní nacāji rī, te manī rī jín yá, te cúsī ni rī jín yá.

Te cuāha rī Espíritu rī coo jín yá.

Te máá yá sándaā jniñu ñayuu tácá nación.

19 Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

20 Ma sáha xeēn yā jín ñayuu ni cunihin jnūndóho siquī,

ni ma snáá yā ñayuu jeē maá lulí-ni cácandíje.

Chi cujéhnū ya siquī ndihi, te ndaā ndacu ya jniñu.

21 Te ñayuu tácá nación cocuhun ni i jeē jnáma ya i.

Achí Yaā Dios, achí Isaías nde jenhán.

Jeē ní cacahān de jeē jeniñu ya fuerza Satanás

(Mr. 3.19-30; Lc. 11.14-23; 12.10)

22 Yūcuán na te ni caquin-deca i nuū yā ñn tēe cuáá ññhín, chí ññhun tachī ini de. Te ni nasávāha ya de. Te ni ndundijin tinūú de te ni nacahān de.

23 Te ndihi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

24 Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhn nuū tachí, áchí de.

25 Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásñn máá te cájeñáhan máá, núu súcuan te snāá jeē iyó váha máá. Te núu ñn ññu chí ñn vehe casásñn máá te cájeñáhan máá, te ma cúu ga coyūcu cáhnu.

26 Te suni súcuan Satanás núu quénehen jnáhan tachí, núu súcuan te sásñn máá. ¿Te ndese cuiñi ññin Satanás jeē ndácu jniñu núu súcuan?

27 Chí cácahān rō jeē jíin fuerza Satanás quénehen ri tachí. Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachí, cájeni ni rō? Núu súcuan te máá i jíjnáhan i cachi jeē ní castívi ndasí suhva ró ni cacahān rō jeē cáquenehen ri tachí jíin fuerza Satanás.

28 Te tuú chí sa jíin Espíritu Yaā Dios cúu jeē quénehen ri

tachí. Núu súcuan te je ndéé Yaā Dios mēhñu ró jeē ndácu ya jniñu.

29 ¿Chí ndese cuu quívi ñn tēe ini vehe tēe ndacuī jeē quenehen de ndajniñu de? Chí cánuú jeē xíhna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachí.

30 'Te ñayuu tu iyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

31 'Jeē yúcuan cáhān rī jíin ró: Iyó modo coo jññhun cáhnu ni nuū tāca cuéchi casáha ñayuu, jíin núu tāca jññhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i.

32 Te núu na-ni ñayuu cahān i siquī ruhū, Yaā ní nduu tēe, cuu cóne cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

Jññhun yujnu váha jíin yujnu néé

(Lc. 6.43-45)

33 'Núu yujnu váha, te váha ndehē, te núu yujnu néé, te cánéé ndehē. Chí jíin ndéhē te jíni yō ndese yujnu cúu. Te suni súcuan ñayuu.

34 Va sēhe coō cácuu ró, chí xeēn rō nájnñhun coō. ¿Ndesse cuu cahān rō jññhun váha, chí ñayuu casáha néé cácuu

ró? Chi jniñu jeē jéni ni anuá ñayuu, máni yūcuan cáhán i.

³⁵ Tēe vāha cáhán de jñūhun vāha, chi íyó ndāa anuá de. Te tēe sáha néé cáhán de jñūhun néé, chi cánéé ánuá de.

³⁶ Te cáhán rī jín ró jeē tācá na-ni jñūhun cácahān ñayuu, nacuāha i cuenta jñūhun un quivī coo juicio.

³⁷ Chi jín jñūhun ni cahān rō sándaā yā siquī rō, núu jeē quéndōo ndāa rō chí jéē cóndee cuēchi siquī rō. Achí yá.

Jeē ní cajicān ñayuu tu cácaandíje ñn jniñu jéhu

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cácuni na jéē sáha ní ñn jniñu jéhu jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jín de:

Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i ñn jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu stéén rī nuū i, chí máá-ni jniñu jéhu nájnūhun ni cuu jín Jonás, tēe ni nacani jñūhun Yaā Dios.

⁴⁰ Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáá te natecu rī.

⁴¹ Te tāca ñayuu ñuu Nínive nuū ní nacani Jonás jñūhun, natecu i jín ñayuu tiempo

yáha, quivī juicio jeē sándaā yā cuēchi, te cahān i cuēchi siquī ñayuu yáha. Chi máá i ni canacani ni i ni castóo i cuēchi i quivī ní nacani Jonás jñūhun nuū i. Te vijna chi cújéhu ga ruhū Yaā íne yāhá vēsú Jonás, te tu cácaandíje ró rúhū.

⁴² Te reina jeē ní cújéhu nación ichi sur, natecu ña jín ñayuu tiempo yáha, quivī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jñūhun ndíchí ní cahān rey Salomón. Te vijna chi cújéhu ga ruhū, Yaā íne yāhá vēsú Salomón, te tu cácaandíje ró rúhū.

Tachī jeē nastútú jnáhan ndívi ini ñayuu

(Lc. 11.24-26)

⁴³ 'Núu ni quenda ñn tachī ini ñn tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá:

⁴⁴ Na quínuhun rī vehe nuū ní quenda ri. Te núu ni ndee tucu, te jító jeē tēe tu cándíje ún, cúu de nájnūhun ñn vehe íyú te ni ndundoo.

⁴⁵ Yūcuán na te jéquihin uxā gā tachī neé gá vēsú maá. Te quívicoo ini tēe un jéē cóyūcu yúcuan. Núu súcuan te xeēn gā ndoho tēe un jéē sándihí vēsú jeē xíhna ñūhún. Te suni súcuan ndoho ñayuu tiempo yáha jeē casáha néé. Achí yá.

Naná yā jín ñani yā

(Mr. 3.31-35; Lc. 8.19-21)

⁴⁶ Te níní súcuan cáhán yā jín ñayuu ún, te ni quee naná yā jín táca ñani yā, lín ña nuū

quéhe, te cúní ña cahān ña jín yá.

⁴⁷ Te ni cachi ñn tēe nuū yā:

Náná ni jín táca ñani ni cáhiin nuū quéhe, te cácuni cahān jín ní, achí de.

⁴⁸ Te ni cahān yā jín tēe ni cahān súcuan jín yá:

¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jín yá. Te ni cahān yā:

Suni náná rī jín ñani rī cácuu táca jéē yáha.

⁵⁰ Chi táca ñáyuu casquícu jniñu cúní maá Tátá rī, Yaā ndeé andiví, suu cácuu ñani rī, cuáha rī, náná rī. Achí yá.

Jnūhun yátá síquī tēe jéte trigo

(Mr. 4.1-9; Lc. 8.4-8)

13

¹ Te quiví un ní quenda Jesús vehe cuahān yā, te ni jinū yā ni cucōo ya yumar.

² Te ni cutútú cuéhē ndasí ñayuu nuū yā. Te ni quiví ya ini ñn barco, ni cucōo ya. Te táca ñáyuu un cáyūcú i yumar.

³ Te jín jnūhun yátá ni cahān yā cuehē jnūhun nuū i, te súcuan ni cahān yā:

Ñn tēe cate trigo, ni quenda de jeē cáte de.

⁴ Te ná ni quejé de jéte de, te jecu trigo ni jitē yuhíchi. Te ni quecoo saa, ni cayeji tī.

⁵ Te jecu gā trigo ni jitē nuū ñūhun yuū, nuū tú cuehē ñuhun. Te yachī-ni ni cane, chí tu cóquin ñuhun.

⁶ Te nuū ní cane niāndii, te ni ichī-ni, te ni casun, chí tu ní níhín nuū quihín yoho.

⁷ Te jecu gā trigo ni jitē nuū náne iñu. Te ni jehnu iñu ún, te ni jesi nuū.

⁸ Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī.

⁹ Táca róhó jéē jíni sōho, na chúsóhó ró. Achí yá.

Najehē cahán yā máni jnūhun yátá

(Mr. 4.10-12; Lc. 8.9-10)

¹⁰ Yūcuán na te tēe cáscuáha jín yá un ní quecoo de nde nuū yā, te ni cacajñuhún de ya:

¿Najehē cúu jeē máni jnūhun yátá cahán ni jín ñáyuu? achí de.

¹¹ Te ni cahān yā jín de:

Róhó jínáhan ró chí sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cácdíje, chí ma jécūhun ni i.

¹² Chi ñayuu je jécūhun ni, chí stéén gā yā nuū i, te víhyá gā cuni i. Te ñayuu tu cácdíje, sa suhva naa jecu jeē je jíní i ún.

¹³ Jeē yúcuan cáhán rī jnūhun yátá jín i. Chí vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeē tú na vé ni cájini i.

¹⁴ Ñayuu yáhá chí squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán: Vésú cuni nahín ró, te ma jécūhun ni rō,

te vēsú coto ró, te ma nácuni rō.

15 Chi ñayuu yáha yōhyo ni ndunīhni ni i,

te yōhyo uhū chusóhó i,

te nájñūhun cájesi i tñnūú i,

návāha coo nájñūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quīvīcoo i nuū rī

jeē nasávāha ri anuá i nuū cuéchi i.

Achí Yaā Dios, achí tutu.

16 Te máá ró jijnáhan ró, yōhyo ndetū rō, chí cájito ró jíin tñnū ró, te cájini nahín ró jíin sóho ró.

17 Chi jendaá cahán rī jíin ró jeē cuehē tēe ni canacani jñūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sóho de jeē cájini sóho máá ró, te tu ní cájini de. Achí yá.

Jeē ní castūhun cáji yá jñūhun yátá tēe jéte trigo

(Mr. 4.13-20; Lc. 8.11-15)

18 Nūú súcuan te cuni nahín jíijnáhan ró na vé cuní cahán jñūhun yátá tēe jéte trigo: Trigo un cúu jñūhun Yaā Dios.

19 Te ñayuu cájini sóho jñūhun ndese ndácu Yaā andiví jniñu, núu tu cájecūhun ni i te cácuu i nájñūhun trigo jeē ni jítē yuhíchi. Yūcuán na te quíji jexeén te quénde-ni jñūhun ini anuá i.

20 Te trigo jeē ni jítē nuū ñūhun yuū cúu nájñūhun ñayuu cájini sóho jñūhun, te yachī-ni cájetáhú i te cácusī ni i jíin.

21 Te tu cúcutú jñūhun ún ini anuá i, te jecu-ni quiví cájetáhú i. Te núu ni quejéé jñúndóho, chí jíto xeēn ñayuu i siquī jñūhun ún, te quejéé nácani yátá ni i.

22 Te jeē ni jítē nuū náne iñu cúu ñayuu cájini nahín jñūhun, te cándihvī ni i siquī jeē iyó ini ñayiví yáha, te cúní i cucucá i, te stáhú un i cujnéñu i jíin. Te ndihi jeē yáha jési nuū jñūhun ya, te tu íje i jíin jñūhun ya.

23 Te trigo jeē ni jítē nuū ñūhun váha cúu nájñūhun ñayuu cájini nahín jñūhun, te cájecūhun ni i, te cáhije i jíin jñūhun ya. Te sava i cúu nájñūhun nunī jeē jéhe ciento jeē ñn ñn, te sava ga i jéhe unī xico, te sava ga i jéhe ocō uxī. Achí yá.

Jñūhun yátá síquī ite lasú

24 Te ni cahán yā inga jñūhun yátá jíin de:

Jeē ndácu Yaā andiví jniñu cúu nájñūhun ñn tēe jeē ní jete de trigo váha nuū ñūhun de.

25 Te iyó ñn tēe jíto uhū de tēe chíí trigo. Te náa cáquixī tēe chíí trigo jíin táca jñáhan de, te ni jehēn ni jete ndiquin lású nuū trigo de, te cuahán.

26 Te nuū ní cane trigo ún, te ni cane yoco i, te suni súcuan ni jehnu ite lasú un.

27 Yūcuán na te ni jengoo mozo ni cacahán i jíin patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū?

28 Te ni cahán de jíin i: ñn tēe jíto uhū ruhū ni sáha jeē yáha. Te ni cacahán mozo un jíin de: ¿Núu súcuan te á cúní

ni jēē na quíngoo ná te jnuhun ná? áchí i.

²⁹ Te ni cahān de: Tuú, chí núu jnuhun ró lású un te sanaa te jnuhun ró ndé jíin trigo.

³⁰ Vāha ga na cuéhnu máá ndé quivī tahndé. Te quivī un cáhān rī jíin téē cahnde jeē xīhna gā ite lasú cahnde de, te chucú tūtú de návāha cahmu yó. Yūcuán na te trigo chí cahnde de ndīvi ini yacā rī, achí de. Áchí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jēē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéhu ñn ndiquin mostaza jeē ní jequin ñn téē nuū ñūhun de.

³² Te jendaá jeē ñn ndiquin lúli gá cúu vēsú tāca gá ndiquin. Te núu ni jehnu, te cúu cáhnu ga vēsú tāca gá yucū, chí ndúu nájnūhun ñn yujnu. Te quíjicoo saa, te cásáha ti tacā tī chíji ndaha ún. Achí yá.

Jnūhun yátá síquī levadura
(Lc. 13.20-21)

³³ Te inga jnūhun yátá ní cahān yā jíin de:

Jeē ndácu Yaā andiví jniñu nuū ñayuu cúu nájnūhun levadura jeē ní quihin ñn ñahan. Te ni saca ña jíin únī kilo harina, nde ni ndaa ndihi ñujen ni sáha. Achí yá.

Jeē máni jnūhun yátá cáhān yā jíin i

(Mr. 4.33-34)

³⁴ Tāca jnūhun yáha ní cahān Jesús jíin ñayuu cuehē ún. Te tāca jēē ni steén yā, máni jnūhun yátá ní cahān yā jíin i.

³⁵ Súcuan ni sáha ya návāha squícu jnūhun ni cahān téē ni nacani jnūhun Yaā Dios nde jenahán:

Cahān rī tāca jnūhun yátá jíin ñayuu,
te cachi rī tāca jnūhun yísáhi ndé quivī ní jecōo ñayiví.

Achí tutu, achí yá.

Jeē ní castūhun cáji yá jnūhun ite lasú

³⁶ Yūcuán na te ni nacuatáhu Jesús nuū ñayuu. Te ni ndīvi ya ini vehe. Te téē cáscuáha un ní jinūcoo de nuū yā, te ni cacahān de jíin yá:

Nacani cáji ní jnūhun yátá ite lasú nuū ná, achí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu téē.

³⁸ Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén.

³⁹ Te téē jíto uhū jeē ní jete lasú un cúu máá jexeén. Te quivī tahndé cúu quivī jínu ñayiví. Te téē cahnde un cácuu ndajéhé Yaā Dios.

⁴⁰ Te nájnūhun tahndē ite lasú te cayū nuū ñuhún, súcuan coo quiví jínu ñayiví.

⁴¹ Chí máá rí, Yaā ní nduu téē, tají rí ndajéhé rī quíngoo. Te nastútú yá tāca ñayuu casquíví jnāhan nuū cuéchi,

jín ñáyuu casáha jniñu néé, quenehen ya i mēhñu ñáyuu ndácu ri jniñu nuū.

42 Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i.

43 Yūcuán na te ñayuu squícu nuū yā chi ndindéé i nájñuhun niāndii, te coyūcú i nuū ndácu máá Tátá i jniñu. Tāca rōhó jēē jini sōho, na chúsóhó ró.

Jñuhun yátá síquī yejnū xūhún jeē yísāhi

44 Te jeē ndácu Yaā andiví jniñu nuū ñáyuu, suni cúu nájñuhun ñn yejnū xūhún jeē yísāhi chíji ñn ñuhun. Te ni nanihñ ñn tēe, te ni nacasi tucu de síquī. Te jeē cúsiñ ni de jín, te ni jehēn de ni xícó ndihi de jeē névāha de, te ni jeen de ñuhun ún.

Jñuhun yátá síquī perla jeē ndeé yahu

45 Te jeē ndácu Yaā andiví jniñu nuū ñáyuu, suni cúu nájñuhun ñn tēe jéen xícó, te ndúcú de perla váha.

46 Te ni jini de ñn perla jeē yáhu ndasí, te ni jehēn de ni xícó ndihi de jeē névāha de, te ni jeen de perla un.

Jñuhun yátá síquī ñunu jñi chācá

47 Te jeē ndácu Yaā andiví jniñu nuū ñáyuu, suni cúu nájñuhun ñn ñunu jeē cásingava de ini mar, te quívicoo ndinuū chācá.

48 Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini

jīca, te chācá tú vāha cáscáne de.

49 Te suni súcuan coo quiví jínu ñayiví. Chi quijicoo ndajéhé yā, te sásñn ya ñayuu casáha jniñu néé méhñu ñáyuu casáha jniñu váha.

50 Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jñuhun yátá síquī ndajniñu ndeé yahu

51 Te ni cajñuhun yá de jínáhan de:

¿A ní cajecūhun ni rō tāca jñuhun yáha, chí tuú? áchí yá.

Te ni cacahān de jín yá:

Ni cajecūhun ni ná, áchí de.

52 Te ni cahān yā jín de:

Iyó váha núu súcuan. Te ñn tēe stéen tutu ley Yaā Dios, núu je ni cutūhva de ndese ndácu Yaā andiví jniñu, te cuu stéen de tāca jñuhun síquī ún. Chi cúu de nájñuhun ñn tēe chíí vehe. Te ini yejnū de táva de ndajniñu ndeé yahu, sava jeē jeé jín sava jeē je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

53 Te ná ni ndihi ni cahān Jesús tāca jñuhun yátá yáha, te ni quenda ya yūcuan cuáhān yā.

54 Te ni najinū yā ñuu yā Nazaret. Te ni steén yā jñuhun ini vehe ñi sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndíchí? ¿Te

ndese cúu sáha de tācá jniñu jéhnū yāhá?

⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas.

⁵⁶ Te suni cáyūcu cuáha de jíin yó yāhá. ¿Te ndese jíin de tāca jñūhun yáha núu súcuan? Achí ñayuu.

⁵⁷ Te súcuan ni cacujéē ni i nuū Jesús. Te ni cahān yā jíin i:

Tāca tēe nácani jñūhun Yaā Dios, íyó yíñúhún ñayuu jíin de, te máni ñayuu ñuu maá de jíin ñayuu vehe maá de cúu jeē tu íyó yíñúhún jíin de. Achí yá.

⁵⁸ Te tu ní sáha ya cuehē jniñu jéhnū yūcuán, chí tu cácañdije i ya.

Jeē ni jíhī Juan tēe scuándute (Mr. 6.14-29; Lc. 9.7-9)

14

¹ Te tiempo yúcuán te Herodes, tēe ndácu jniñu región Galilea, ni jini jñūhun de jñūhun Jesús.

² Te ni cahān de jíin ñayuu cáhiin jíin de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhnū. Achí de.

³ Chi Herodes, je ni ndacu de jniñu jeē na quívi Juan vecāa, jíin jéē na cónuhñi de jíin cadena. Súcuan ni sáha de jeē siquí Herodías, ñasihí ñani de Felipe.

⁴ Chí Juan ni cahān de nuū Herodes:

Tu íyó ley condeca ró ña, achí de.

⁵ Te jeē yúcuán ní cuni Herodes cahni de Juan. Te yúhú de jeē quívi ni ñayuu, chí ndihi i jéni ndije ni i jeē ñin tēe nácani jñūhun Yaā Dios cúu Juan.

⁶ Te ñin quívi ni sáha Herodes ñin víco quívi ní cacu de. Te sēhe síhí Herodías ni quívi i ni jita jéhé i nuū ñayuu ní cana de ún. Te ni cusí ni Herodes ni sáha i.

⁷ Te ni jejnūhun téyí de jeē cuáha de núu na vé cacān i nuū de.

⁸ Te ni jehēn i ni cajñūhún i náná i na vé cacān i. Te ni ndívi i nuū Herodes, te ni cahān i:

Cuáha ní xínī Juan tēe scuándute, cone nuū ñin cohō, achí i.

⁹ Yūcuán na te rey Herodes ni cucuíhyá ni de. Te siquí jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuán ní ndacu de jniñu jeē na cuáha nuū i.

¹⁰ Te ni tají de soldado jeē na quícahnde xínī Juan ini vecāa.

¹¹ Te ni quee soldado un jíin xínī Juan, íne nuū ñin cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yíqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe (Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jñūhun, te ni cujiyo ya yúcuán cuáhān yā jíin barco, jeē cóne sín ya

in lugar nuū tú ñayuu. Te ni cajini ñayuu jeē cuahán yā. Te tācā ñuu ni quendacoo i cájica jéhé i, cuajnahani ya.

14 Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñayuu cácuñu jeē véjicoo i jíin.

15 Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te taji ní ñayuu na quíngoo i tācā ñuu, te cuaan i jeē caji i.

16 Te ni cahān Jesús jíin de:

Tu jíni ñúhún quíngoo i, chi cuāha máá ró jeē caji i, áchí yá.

17 Te ni cacahān de jíin yá:

Tú na vé cánevāha ná yāha, chi uhūn-ni staā jíin úu-ni chācá, áchí de.

18 Te ni cahān yā jíin de:

Cuāha na quíji, áchí yá.

19 Te ni cahān yā jíin ñayuu un jéē na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñayuu cuehē ún.

20 Te ndivii i ni cayejí, te ni candutú chíji i. Te ni canastútú de pedazo jeē ní quendōo, te ni chitú úxí uū jíca.

21 Te tēe ni cayejí un cúu nájñuhun uhūn mīl, te sīn ga cúu ñahan jíin súchi lúli.

*Jeē ní jica jéhé yá nuū mar
(Mr. 6.45-52; Jn. 6.16-21)*

22 Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quingoo de nde inga lado mar, níni jēē nātají yá ñayuu un quíngoo i.

23 Te nuū ní cuu ni nacuatáhú yá nuū i, te máñuhún-ni ya ni caa ya yucu, cuacacān tahú yā. Te ni cuaa, te íne máñuhún yá yūcuán.

24 Te barco un, je ni cuu sava nuū mar cuahān. Te ndute mar un nātundahá níhin barco, chi vēji tachí ichi núu de.

25 Te jeē yínee gā ni quee Jesús nuū de, jica jéhé yá nuū mar.

26 Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

27 Te ni cahān-ni Jesús jíin de:

Ndeyí coo ni rō, te ma yūhu ró, chí máá rí cúu, áchí yá.

28 Yūcuán na te ni cahān Pedro jíin yá:

Núu máá ní cúu, te cahān ni jíin ná jēē na cáca jéhé ná nuū mar te jeē na núu ní, áchí de.

29 Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndute cuahān de nuū Jesús.

30 Te nuū ní jíni de jeē níhin yíhi tachí, te ni yūhú de. Te ni quejéé de quée de chíji ndute. Te ni cana cóhó de:

Jnama ní sáña, áchí de.

31 Te Jesús ni jñi-ni ya ndaha de. Te ni cahān yā jíin de:

Tēe tu cándije nihin cúu ró. ¿Naun ni nayūhu ró? Achí yá.

³² Te ni quívi ya ini barco un jín de, te ni jecuiñi-tachí.

³³ Yūcuán na te tēe cáhiin ini barco un, ni cajecuiñi yití de nuū yā. Te ni cacahān de:

Jendaá ndije jeē Sēhe Yāa Dios cúu ní, áchí de.

Jeē ní nasávāha ya ñayuu cácuñi región Genesaret

(Mr. 6.53-56)

³⁴ Te ni quenda jíyo ya jín de nuū mar un, ní jinū yā región Genesaret.

³⁵ Te ñayuu yūcuan ní canacuni i ya. Te ni cascáca i jñūhun tācá ndañū yūcuan jeē ní jínū yā. Te ñayuu ni caquindeca i ñayuu cácuñi nuū yā.

³⁶ Te ni cacahān ndahú i jín yá jeē na quéhé i vésú yusáhma ya. Te tāca ñáyuu jeē ní caquehé sahma ya, ni canduvāha i.

Siquí ndese cújnehén ñáyuu
(Mr. 7.1-23)

15

¹ Yūcuán na te jecu tēe grupo fariseo jín tēe cástéen tutu ley Yāa Dios, ni quendacoo de ñuu Jerusalén, te ni quecoo de nuū yā. Te ni cacahān de jín yá:

² Tēe cáscuáha jín ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staá. Achí de.

³ Te Jesús ní cajñūhun yá de:

Te máá ró jijnáhan ró, ¿suni naun cástívi ró jniñu ní ndacu Yāa Dios nuū rō? Chi sa

costumbre maá ró cúu jeē casquicu ró.

⁴ Chi ni cahān Yāa Dios: Coo yíñuhún ró jín tātá rō jín náná rō. Te núu ndé in cahān siquí tatá chí siquí naná, na cúu nahín, áchí Yāa Dios.

⁵ Te máá ró chí cácahān rō jeē cuu cahān in tēe jín tātá de jín náná de: Ma cúu chindéé ñáhán ná níhin cuáha na jeē caji ní jeē cúhun ní, chí ndihí jeē névāha ná, je ní socō na núu Yāa Dios.

⁶ Te tēe cahān súcuan, tuá cánuu chindéé ñáhán de tātá de náná de, áchí ró jijnáhan ró. Te súcuan cástívi ró jniñu ní ndacu Yāa Dios, jeē siquí costumbre ni cajequin máá ró.

⁷ Tēe stáhú-ni cácuu ró. Ndaá ni nacani Isaías jñūhun siquí rō nde jenahán, yósó núu tútu i jeē ní cáhān Yāa Dios:

⁸ Ñayuu yáha chí máá yuhu-ni i cájetáhú i ruhū, te nasūu ndé jín ini jín ánuá i.

⁹ Te cáchiñuhún sáa-ni i ruhū, chí jñūhun cástéen i cúu jniñu ní candacu tēe, te nasūu jeē ní ndacu máá rí cúu.

Achí Yāa Dios. Achí yá.

¹⁰ Te ní cana ya ñayuu cuehē ún, te ní cahān yā jín i:

Cuni sōho vāha jijnáhan ró, te chuhun ní rō:

¹¹ Nasūu jeē quívi ini yuhu ñayuu cújnehén i sáha. Chi jñūhun jeē quenda yuhu i, yūcuan cúu jeē cújnehén i sáha, áchí yá.

¹² Yūcuán na te tēe cáscuáha jín yá, ní quecoo de nuū yā, te ní cacahān de:

¿A jíní ni jéē ní caquití ni tēe fariseo jeē ní cajini sōho de jnūhun ni cahān ní? áchí de.

13 Te ni cahān maá yá:

Cácuu de nájñūhun yujnu jeē tu ní náchuhun Tátá rī, Yaā ndeé andiví, te ñin quiví te jnūhun ya quihīn.

14 Na quíngoo maá de. Chi cácuu de nájñūhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndindúú de ñinga de xehvā. Achí yá.

15 Te ni cahān Pedro jíin yá:

Castūhun cájí ní jnúhun yátá yáha nuū na jíjnáhan ná, áchí de.

16 Te ni cahān Jesús:

¿Te á suni maá ró ná tu jecūhun ni rō chí naún?

17 ¿A tu cájecūhun ni rō jeē tāca jéē yéji ñayuu, chi quiví chíji i, te quénda-ni cuahān?

18 Te jnūhun jeē quénda yuhu ñayuu, chi nde ini anuá i vēji, te yūcuan cúu jeē kujnéhén i sáha.

19 Chi nde ini anuá ñayuu quénda jeē jéni néé ni, jeē jéhni ndīyi, jeē casíquí ndéē jnáhan, jeē jíca jnéni, jeē sacuíhná, jeē cahán jnūhun stáhú, jeē cahán yāa síquí jnáhan.

20 Tāca jéē yáha cúu jeē kujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

*Ñahan inga nación jeē ní candíje ñihin
(Mr. 7.24-30)*

21 Te ni quenda Jesús yūcuan cuáhān yā región Tiro jíin Sidón.

22 Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ní sáña víi. Chi sēhe síhí ná, ñūhun tachī ini i, te yōhyo xeēn ndóho i, áchí ña jíin yá.

23 Te tu ní cáhán cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quihín ña, chi cána jee ña vēji ña yatá yō, achí de.

24 Te ni cahān yā jíin ña:

Nuū maá-ni ñayuu nación Israel ni tají Yaā Dios sáña vēji ná, chi cácuu i nájñūhun lanchi, quití ní sana.

25 Te ñahan ún chi ni quee ña, te ni jecuíñi yití ña nuū yā, te ni cahān ña:

Tátā, chindéé ñáhán ní sáña víi, achí ña.

26 Te ni cahān yatá yá jíin ña:

Tu íyó váha jeē quénde yō staā sēhe, te cuáha yó núu ína, achí yá.

27 Te ni cahān ña:

Jendaá cahán ni Tátā, te chindéé ñáhán ní sáña vēsú cúu ná nájñūhun ina. Chi suni maá tí cánihīn nahín tí pedazo staā cuechíjéé cóyo chíji mesa jitohe tí cáyeji tí, achí ña jíin yá.

28 Yūcuán na te ni cahān Jesús:

Yōhyo vāha jeē cándíje ñihin ní súcuan, nánā. Te na sáha ná jéé cuní ni, áchí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuñū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya.

³⁰ Te cuehē ñayuu ni que-coo i nuū yā, te cándeca i tāca jēē cájica chácua, jeē cuaá, jeē ñihín, jeē cacúhndú, jín cuéhē gā ñayuu cácuñū. Te ni caje-quin i nuū jehé Jesús. Te ni nasávāha ya i jínāhan i.

³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinū ñayuu cuaá. Te ni cacahān i jeē yóhyo vāha Yaā cúu Yaā Díos ñuu i Israel.

Jeē ni scáji yā cuñ mil tēe (Mr. 8.1-10)

³² Yūcuán na te ni cana Jesús tēe cáscuáha jín yá, te ni cahān yā jín de:

Cúndáhú ni rī ñayuu cuehē yāhá, chi je ni cuu unī quiví cáyūcú i jín rí, te tuá na vé caji i. Te tu cúní rī natají rí i nuhun ndite i, chi núu súcuan te sava ichi te cuíta lí i. Achí yá.

³³ Te ni cacahān tēe cáscuáha jín yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yucu, achí de.

³⁴ Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, jín jecu chācá lúlí, achí de.

³⁵ Yūcuán na te ni cahān yā jín ñayuu cuehē un jēē na cucōo i.

³⁶ Te ni quihin ya ndihúxá staā jín cháca ún, te ni nacuatáhú yá nuū Yaā Díos. Te ni tahu cuéchí yá, te ni jēhe ya nuū tēe cáscuáha jín yá, te máá de ni casaja nuū ñayuu.

³⁷ Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca.

³⁸ Te tēe ni cayeji ún, nde cuñ mil de cúu, te sñn ga cúu ñahan jín súchi lúlí.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndiví ya ini barco, te cuahān yā región Magdala.

Jeē cájicān de ñn jññu jéñnu nuū yā (Mr. 8.11-13; Lc. 12.54-56)

16

¹ Te ni quecoo tēe grupo fariseo jín tēe grupo saduceo nuū yā. Chi cáconi de coto ndee de ya, te ni cajicān de jeē na sáha ya ñn jññu jéñnu jeē coo ñn seña ichi ándiví.

² Te máá yá ni cahān yā jín de:

Núu ni ini, te cácahān rō: Nandii, chi ni nasácuéhé i andiví, achí ró.

³ Te jenéhen chi cácahān rō: Vjna te cuun saū, chi ni nasácuéhé i andiví, achí ró. Tēe stáhú-ni cácuu ró. Chi cájecūhun ni rō ndese stéen seña andiví, te tu cájecūhun ni rō ndese stéen tācá jññu jéñnu sáha ri tiempo yáha.

⁴ Ñayuu yáha jeē casáha jññu néé, tu cájetáhú cuiti i

Yaā Dios. Te cájicān i jeē sāha ri ñn jniñu jéhnū jeē coo ñn seña andiví. Te tuá na inga jniñu jéhnū stéén rī nuū i, chí máá-ni jniñu jéhnū nájñūhun ni cuu jíin Jonás, tēe ni nacani jñūhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

Jñūhun levadura tēe fariseo (Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuango de jíin barco inga lado mar.

⁶ Te ni cahān Jesús jíin de: Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān máá de:

Va siquī jeē tú na staā ndíso yó, jeē yúcuan cáhán yā súcuan, áchí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tēe tu cándíje ñhin cácuu ró.

⁹ ¿A ná tu jecūhun ni rō jeē tu ní cáhán rī súcuan siquī jeē tu ndíso ró stáá? ¿A tu cánucūhun ni rō jeē ní tahu cuéché rí uhūn staā ni cayejí uhūn mil tēe, te nasaa jīca ni canastútú ró jeē ni quéndōo?

¹⁰ ¿Te á tu cánucūhun ni rō jeē ní tahu cuéché rí uxā staā ni cayejí cuūn mil tēe, te nasaa jīca ni canastútú tucu ró?

¹¹ ¿Te najehē tu cájecūhun ni rō jeē násūu siquī staā ni

cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yíhi levadura, chí sa suhva ni cahān yatá yá jeē ma cándíje de jñūhun stáhú cástéén tēe fariseo jíin tēe saduceo.

Jeē ni cáhān Pedro jeē Jesús cúu Cristo (Mr. 8.27-30; Lc. 9.18-21)

¹³ Te nuū ni jíin Jesús región Cesarea Filipo jíin tēe cáscuáha jíin yá, te ni cajñūhun yá de:

Ruhū, Yaā ní nduu tēe, ¿ndé ñn cúu rī cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē Jeremías chí inga tēe ni nacani jñūhun Yaā Dios cúu ní. Achí de.

¹⁵ Te ni cahān yā jíin de: Te máá ró, ¿ndé ñn cúu rī cácahān rō? achí yá.

¹⁶ Te ni cahān Simón Pedro: Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā tēcu ní cáni, áchí de.

¹⁷ Te ni cahān Jesús: Yōhyo ndetū rō, Simón sēhe Jonás, chí nasūu ñn ñayuu ni steén jñūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō.

¹⁸ Te ruhū suni cáhán rī jíin ró jeē máá ró cúu Pedro, jeē cuní cahān: yuū. Te

jnūhun ndaā jeē ni cáhān rō jeē maá rí cúu Cristo, suu cúu nájnūhun ñn yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cá candíje ruhū. Te tu ndé vé cundeyí cuiti siquī i, ni jnūhun xeēn jeē cájihī i, tuá na vé cúu sáha jíin ánuá i.

19 Te máá ró condiso jniñu ró sáha ró jéē quívicoo ñayuu ndaha Yaā andiví jeē ndacu ya jniñu nuū i. Te táca jéē cási rō jeē ma sáha ñayuu ini ñayiví yáha, suni casi jeē cáyucú nde andiví. Te táca jéē cuáha ró jnúhun sáha i ini ñayiví yáha, suni jeē cáyucú nde andiví cuáha jnūhun. Achí yá.

20 Yūcuán na te ni ndacu ya jniñu nuū téé cáscuáha jíin yá, jeē ma cáchi de nuū ní ñn ñayuu jeē cúu ya Cristo.

Jeē ní castūhún Jesús jeē cúu yā

(Mr. 8.31-9.1; Lc. 9.22-27)

21 Te nde saá ní quejéé Jesús cástūhun cájí yá nuū téé cáscuáha jíin yá jeē jíni ñúhún quihīn yā ñuu Jerusalén. Te táca téé jéhnu jíin sūtū cácujeñnu jíin téé cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá.

22 Yūcuán na te Pedro, ni cana máñuhún de ya, te ni quejéé de cáhān de nuū yā:

¿Naun cáhān ni súcuan? Chí tu cúní Yaā Dios jeē cuu súcuan. Tu jíni ñúhún cuiti ndoho ní jnúndóho yáha, áchí de.

23 Te ni ndió cóto ya nuū Pedro, te ni cahān yā jíin de:

Cujiyo quihīn rō, chí cáhān rō ná cáhān Satanás. Chí téē ndúcú stíví ruhū cúu ró. Te tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájeni ní ñayuu. Achí yá.

24 Yūcuán na te ni cahān yā jíin téé cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuáha i jnūhun ndoho i jnúndóho jeē siquí rī, vēsú na cúu i.

25 Chí núu ndé ñayuu cuní i cácu i nuū jnúndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē siquí ruhū, te cotecu i ní cáni.

26 ¿Chí ndé cuajniñu vēsú na cundeyí ñayuu nihīn i ní ñayiví, te núu quiví i nuū jnahnú ndetū i? Chí tú na jíin cuiti chunaa ñayuu jeē cácu ánuá i.

27 Chí ruhū, Yaā ní nduu téē, ndiji ri jíin táca ndajéhé rī, te yōhoyo luu cujéñnu ri nájnūhun cújéñnu Tátá rī. Yūcuán na te cuáha ri tahū nuū ñn ñayuu núu ndese jniñu ni casáha i.

28 Te jendaá cahān rī jíin ró jeē sava téē cáhīn yáha, ma cúu de chí nde cuni de jeē maá rí, Yaā ní nduu téē, ndácu ri jniñu jíin poder rī.

Jeē tucu ni nduu ya
(Mr. 9.2-13; Lc. 9.28-36)

17

1 Yūcuán na te nuū inū quiví te Jesús ni jeca ya Pedro jíin Jacobo jíin Juan ñani Jacobo,

cuahān sīn ya jīn de ĩn yucu súcun.

² Te yūcuán, tucu ni nduu ya nuū de. Chi ni ndindēe nūū yā nájñūhun niāndii. Te sahma ya ni nducujín quiyi ndasí, nájñūhun nduva luz.

³ Te ni cajito-ni de jeē Moisés jīn Elías, tēe ni cahīyo jenahán, cándajnūhún de jīn yá.

⁴ Te ni cahān Pedro jīn yá:

Nacā jeē váha jeē cáhīn ná yáha. Te núu cúní ni te na sáha ná únī vehe ramada, ĩn cuu máá ní, inga cuu Moisés, te inga cuu Elías, achí de.

⁵ Te ní ní cáhán gā de, te ni quiji vicō nūhun jēe yaa ndasí, ni jesi-ni nuū de. Te nuū vicó un ní cahān ĩn jñūhun:

Yāha cúu Sēhe ri jeē maní ndasí rí jīn, te cúshī ni rī jīn. Na cúni nahín ró jñūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de.

⁷ Yūcuán na te ni quee Jesús, te ni soó yá ndaha ya siquī de. Te ni cahān yá:

Ndocuiñī, te ma yūhu ró jijnáhan ró, achí yá.

⁸ Te ni candacoto de, te tuá tēe un ní cájito de, chi máá ĩn na Jesús.

⁹ Te ni cananuu de jīn yá yucu ún. Te ni ndacu ya jniñu nuū de:

Ma cáchi rō nuū ní ĩn jeē súcuan ni cajito ró, chi nde na nátecu maá rí, Yāa ní nduu tēe, achí yá.

¹⁰ Yūcuán na te tēe cáscuáha jīn yá, ni cacajnūhún de ya:

Núu súcuan te tēe cástéén tutu ley Yāa Dios, ¿najehē cácahān de jeē cánuú ndiji Elías xīhna gā, te sáá te quiji Yāa cúu Cristo? achí de.

¹¹ Te ni cahān Jesús jīn de:

Jendaá cúu jeē xīhna gā quiji ĩn tēe cuu nájñūhun Elías, te sátūhva de ndihí, achí tutu.

¹² Te cáhán rī jīn ró jeē jé ni quiji tēe ni cuu nájñūhun Elías, te tu ní jíní ñayuu jeē suu de cúu. Te ni casáha ndevāha ñayuu jīn de ndihí jeē ní cacuu ni maá i. Te suni súcuan stóho i ruhū, Yāa ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájñūhun Elías.

Jeē ní nasávāha ya ĩn sūchí jīhí yīhí

(Mr. 9.14-29; Lc. 9.37-43)

¹⁴ Te ni najinū yā jīn de nuū ñayuu cuehē ún. Te ni quee ĩn tēe, ni jecuiñī yití de nuū yā, te ni cahān de:

¹⁵ Cundáhú ni ní séhe yí ná, chi yōhyo xeēn ndóho i cuehyí jīhí yīhí. Te je ni cuu cuehē jínu cótúú i nuū ñuhún jīn nūū ndúte.

¹⁶ Te ní quindecá ná i nuū tēe cáscuáha jīn ní, te tu ní cúu sávāha de i, achí de.

¹⁷ Te ni cahān Jesús:

Ñayuu yōhyo nīhni ni cácuu ró chi tu cácandíje ró jēe cuu nduvāha i. ¿Nasaa ga quiví condee rī jīn ró? ¿Te nasaa ga quiví cuandeyí ni rī jīn ró? Cuáquihin sūchí un na quiji i, achí yá.

18 Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

19 Yūcuán na te tēe cáscuáha un, ní cacajnūhun sīn de ya:

¿Najehē tu ní cúu quenehen ná tachí un jijnáhan ná? achí de.

20 Te ni cahān yā:

Siquī jeē tu cácañdije nihin ró jēe cuu sáha ró. Chi jendaá cahán rī jīn ró, jeē núu candíje ró vēsú in tihlī-ni, cūhva nájnūhun in ndiquin mostaza, te cuu sáha ró táca-ni jniñu yí. Chi cuu cahán rō jeē na cújiyo yucu yáha quihīn inga lado, te cujiyo-ni. Te táca-ni jniñu chi cuu sáha ró, te núu candíje nihin ró jēe cúu.

21 Te in tachí súcuan chi ma quēnda cuiñi quihīn, te núu tu cacān tahú rō te coo ndite ni rō. Achí yá.

Jeē ni cahān tucu ya jeē cúu yā

(Mr. 9.30-32; Lc. 9.43-45)

22 Te jíca cuu Jesús jīn de jijnáhan de región Galilea, te ni cahān yā jīn de:

Máá rí, Yaā ní nduu tēe, nastúu i ruhū nuū táca tēe xeēn.

23 Te cahni de ruhū, te nuū uní quivī te natecu rī, achí yá.

Te ni canducuíhyá ndasí ni de jeē ni cahān yā jnūhun yáha.

Siquī xūhun cuajniñu ini templo

24 Te ni jinū yā ñuu Capernaum jīn tēe cáscuáha jīn

yá. Te tēe cástútú xūhun templo ni quecoo de, te ni cacajnūhún de Pedro:

Te maestro maá ró jijnáhan ró, ¿á tú cuāha de xūhún cuajniñu ini templo, chí naún? achí de.

25 Te ni cahān Pedro:

Cuu, achí de.

Te ná ni quivī de ini vehe, te xīhna gā Jesús ni cahān yā jīn de:

¿Ndese jéni ni rō, Simón? Tāca tēe cácuu rey ini ñayivī yáha, ¿ndé núu cájicān de xūhun renta jīn xūhun cuajniñu ñuu? ¿A núu séhe de chí núu ñáyuu sīn vehe? achí yá.

26 Te ni cahān Pedro:

Nuū ñáyuu sīn vehe, achí de.

Te ni cahān Jesús:

Núu súcuan te tú na inga cujéhnu nuū séhe rey jeē cacān xūhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

27 Te na chúnaa yō, návāha tu squítí ni yō de. Núu súcuan te cuáhán ndé yumar, te scáne ró gancho jeē jnī chācá, te tava rō chācá jēe jnī xīhna gā. Te ndica rō yuhu ti, te yūcuan nīhīn rō in xūhun jēe cánda chunaa rō jeē cájicān de. Te quindēca ró núu de jeē cúu ruhū jīn rōhó. Achí yá.

Ndé ñáyuu cúu jeē cujéhnu ga

(Mr. 9.33-37; Lc. 9.46-48)

18

1 Te suni quivī un ní quecoo tēe cáscuáha un núu yā, te ni cacajnūhún de ya:

¿Ndé ñn cújéhnú ga nuū ñáyuu jeē ndácu Yaā andiví jniñu nuū? achí de.

² Te ni cana ya ñn sūchi lúlí, te ni jeni ya i mēhñú de.

³ Te ni cahān yā:

Jendaá cahān rī jín ró, núu tú nandió cóo ni rō te caní ni rō nájnūhun ñn sūchi lúlí, ma quívi cuiti rō ndaha Yaā andiví jéē ndacu ya jniñu nuū rō.

⁴ Núu súcuan te ñáyuu jeē jéni ni i jeē tu cújéhnú i, nájnūhun jéni ni sūchi lúlí yáha, suu i cújéhnú ga nuū ñáyuu jeē ndácu Yaā andiví jniñu nuū.

⁵ Te na-ni ñáyuu núu jeē siquí ruhū jetáhú i ñn sūchi lúlí nájnūhun sūchi yáha, te ruhū jetáhú i. Achí yá.

Xeēn coo siquí ñáyuu quívi nuū cuéchi
(Mr. 9.42-48; Lc. 17.1-2)

⁶ Te núu ñn sūchi lúlí yáha cándije i ruhū, te núu quívi i cuéchi sáha na-ni ñáyuu, te vāha ga núu ni conuhnī ñn yōso cáhnu sucūn ñáyuu ún, te quēe i chíji ndute mar nuú.

⁷ Nacā xeēn cúu jín ñáyuu ñayiví, chí máni íyó jéē nducú squívi ñáyuu nuū cuéchi. Te máni súcuan coo ini ñayiví. Te nacā xeēn ndoho ñáyuu jeē squívi jnáhan nuū cuéchi.

⁸ Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quíhín, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quívi ró núu cotecu rō ní cáni, vēsú jeē cóndee ndindúú

ndaha ró jéhē rō te quívi ró núu ñuhún jeē cayú ní cáni.

⁹ Te núu tinūu ró sáha jeē quívi ró cuéchi, vāha ga tava rō te scāne ró na quíhín, návāha tuá sáha ró cuéchi. Chí vāha ga jeē coo ñn-ni tinūu ró te quívi ró núu cotecu rō ní cáni, vēsú jeē cóndee ndindúú tinūu ró te quívi ró núu ñuhún infierno.

Jnūhun yátá síquī lanchi jeē ní sana
(Lc. 15.3-7)

¹⁰ 'Coto ma sájéē ni rō nuū ní ñn sūchi lúlí yáha. Chí cahān rī jín ró jeē táca ndajéhé andiví jéē ndíto ya i, níni cáhñn ya nuū maá Tátá rī andiví.

¹¹ Chí ruhū, Yaā ní nduu tēe, vēji rī jeē jnáma rī ñáyuu jeē ní sana i nuū Yaā Dios.

¹² '¿Te ndese cájeni ni rō? Núu ñn tēe ndéca de ñn ciento lanchi, te núu sana ñn tí, ¿á tu stóo de cuūn xico xahūn cuūn gā tí yucu, te ndicó de quinanducú de quiti ní sana ún?

¹³ Te núu ni nanihñn de tí, te ndaā jeē yóhoyo ga cúsiñ ní de jín quiti ún vēsú jín cúūn xico xahūn cuūn gā quiti jeē tu ní sana.

¹⁴ Te suni súcuan maá Tátá rō, Yaā ndeé andiví, tu cúní yā jeē jnahnú ndetū ni ñn sūchi lúlí yáha.

Siquí jeē cóne cáhnu ni yō nuū jnáhan yó
(Lc. 17.3)

¹⁵ Te núu jnáhan ró ní sáha de cuéchi siquí rō, núu súcuan te castūhun ró nuū mañuhún-ni de jeē ní sáha de cuéchi siquí rō. Te núu

ni jetáhú de jnūhun ni cahān rō jín de, núu súcuan te je ni ndumanī de jín ró ni sáha ró.

16 Te núu tu ní jétáhú de jnūhun cáhán rō, te quicāna ró ñn chí úū gā ñayuu quihīn rō jín núū de, cuu i testigo jín ró, te cundaā cuēchi de te ndumanī de jín ró.

17 Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácañdije. Te núu tu ní jétáhú tucu de jnūhun cahān ñayuu cácañdije ún, te siáá rō de na cóo de najnūhun ñn tēe tu cándije nuū Yaā Dios chí tēe stútú xūhun renta.

18 Jendaā cahān rī jín ró jēe tāca jēe cāsī rō jēe ma sáha ñayuu ini ñayīvi yáha, suni casī jēe cáyūcú nde andiví. Te tāca jēe cuáha ró jnūhun sáha i ini ñayīvi yáha, suni jēe cáyūcú nde andiví cuáha jnūhun.

19 Te suni cáhán rī jín ró, núu uū jnáhan ró ini ñayīvi yáha, inuú cani ni rō siquī ñn jēe cacán tahu rō, núu súcuan te máá Tátá rī andiví cuáha ya jēe cájicān rō.

20 Chi núu ndé mí ndútútú úū chí únī ñayuu jēe cáchiñúhún i ruhū, te yūcuan íne ri jín i, áchí yá.

21 Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núū jnáhan ná jēe sáha de cuēchi siquī ná? ¿A ndé uxā jínu chí naún? áchí de.

22 Te ni cahān Jesús:

Tu cáhán rī jín ró jēe máá uxā jínu, chí nde uxā jínu jēe uní xico uxī.

Jnūhun yátá siquī mozo jēe tu ní íne cáhnu ni

23 'Núu súcuan te Yaā ndeé andiví, suhva cúu jēe íne cáhnu ni yā nuū ñayuu ndácu ya jniñu nuū: Cúu najnūhun ñn rey jēe cuní de sándaā de jín mozo de jēe cátaū nuū de.

24 Te ni quejéé de sándaā de jín i. Te ni caquindeca i ñn mozo jēe taú tijni millón peso nuū de.

25 Te tú na vé névāha mozo un chunaa nuū de. Te ni ndacu de jniñu jēe na cúyāhu mozo un jín ñasihí jín séhe jín táca ndajniñu, te nucūnaa xūhun táu.

26 Yūcuán na te ni jecuiñi yití mozo un, te ni cahān ndahú de jín patrón de ún: Condetu ní, te na chúnaa ndihi ná xūhun ní, áchí de.

27 Te máá patrón ni cundáhú ni de mozo de. Te ni íne cáhnu ni de jēe taú mozo de ún, te ni siaá de jēe ma chúnaa gā.

28 Te ni quenda mozo un cuáhán de, te ni najnáhan-ni de jín ñn jnáhan mozo de jēe taú jecu peso nuū de. Te ni jñi de tēe ún, te ni quitu de sucūn, te ni cahān de: Chunaa jēe taú rō nuū rī, áchí de.

29 Te jnáhan mozo de un ní jecuiñi yití núū de, te ni cahān ndahú jín de: Condetu te na chúnaa ndihi ri xūhun ró, áchí.

30 Te máá de tu ní cuní de, chí ni chune de tēe un vécāa nde quiví nachunaa jēe taú nuū de.

31 Te tāca jnáhan mozo de ni cajito jēe súcuan ni sáha de, te ni cajnahuhū ndasí ni de. Te cuango de nuū patrón de, te

ni cacachi de ndihi ndese ni cuu.

³² Yūcuán na te patrón un ní nacana de mozo un, te ni cahān de jín: Mozo ndevāha cūu ró. Chi ni ine cáhnu ni rī ndihi jeē taú rō nuū rī, chi ni cahān ndahú ró jín rí.

³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, áchí de.

³⁴ Te ni quitī ndasí ni patrón, te ni ndacu de jniñu jeē na quívi vecāa nde nachunaa ndihi jeē taú nuū de.

³⁵ Te ni jīnu ni cahān yā, te áchí yá:

Nájnūhun ni sáha rey un jín mozo de, suni súcuan sáha máá Tátá rī andiví jín táca röhó núu tu cone cáhnu ni rō nuū jnáhan ró nde jín ini jín ánuá rō, núu na-ni cuēchi sáha i nuū rō. Achí yá jín de jínáhan de.

Siquí jeē ma stóo jnáhan tēe jín ñahan
(Mr. 10.1-12; Lc. 16.18)

19

¹ Te nuū ní ndihi ni cahān Jesús táca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii.

² Te cuehē ñayuu ni candiquīn i ya, te yūcuan ní nasávāha ya ñayuu cácuñū.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusín ñn tēe jín ñasihí de núu na-ni siquí cūu, chí naún? áchí de.

⁴ Te ni cahān yā:

¿A tu ní cácahu ró tutu ñ ndese ni sáha Yaā Dios ñayuu nde xīhna ñúhún? Chi tēe jín ñahan ni sáha ya, achí.

⁵ Te suni ni cahān Yaā Dios: Jeē yūcuan cūu jeē stóo tēe tátá de náná de, te quijnáhan de jín ñasihí de, te ñn na cuu ndindúú de, áchí Yaā Dios, achí tutu.

⁶ Núu súcuan te tuá cūu uñ jnáhan de, chí ñn na cūu. Jeē yūcuan tu íyó váha jeē stóo jnáhan, chí jeē ni squíjnáhan Yaā Dios cūu, áchí yá.

⁷ Te ni cacajnūhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvāha acta jeē ndusín de jín ña? áchí de.

⁸ Te ni cahān yā jín de:

Siquí jeē níhni ni rō jijnáhan ró, jeē yūcuan ní jēhe Moisés jnūhun jeē stóo ró ñasihí ró. Te nde xīhna ñúhún chí nasūu súcuan ní cuu.

⁹ Te ruhū chí cáhán rī jín ró, núu ñn tēe stóo de ñasihí de, te núu nasūu jēe tǐjni ni ña, te quijnáhan de jín inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusín, suni cásiquí ndéē de ña, áchí yá.

¹⁰ Yūcuán na te ni cacahān tēe cáscuáha jín yá:

Te núu ma cūu stóo tēe ñasihí de, núu súcuan te váha ga ma cóndeca de ñahan, áchí de.

¹¹ Te ni cahān yā jín de:

Jnūhun ni cahān rō yāhá, tu níhín jníñu nuū ndihí tēe, chí máá nene tēe jeē ni sáha Yaā Dios jeē nihín jníñu nuū.

¹² Chí íyó tijni siquī jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquī jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnúhun jeē ma cóndeca de ñahan, na cuatáhú de núu súcuan. Achí yá.

Jeē ni jícān tahu Jesús jehē sūchi lúli

(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúli, jéē na sóo yá ndaha ya xinī i te cacān tahu yā jehē i. Te tēe cáscuáha jíin yá, ni cacahān de nuū ñáyuu vējicoo jíin i.

¹⁴ Te ni cahān Jesús:

Cuāha jnūhun na quíjicoo sūchi lúli jíinā nuū rī, te ma cási rō jeē quíjicoo i. Chí ñayuu jeē ndió cóo ni i cani ni i nájñuhun sūchi yáha, suu i quíví ndaha Yaā andiví jéē ndacu ya jniñu nuū i, achí yá.

¹⁵ Te ni sóo yá ndaha ya xinī i jíināhan i. Te ni quenda ya yūcuan cuáhān yā.

Jnūhun tēe cúcá

(Mr. 10.17-31; Lc. 18.18-30)

¹⁶ Te ñin tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachí ní, ¿na jniñu vāha sáha ná te nihín tahu na cotecu na ní cáni andiví? achí de.

¹⁷ Te ni cahān yā jíin de:

¿Naun cáhán rō jeē tēe vāha cúu rí? Tú ni ñin tēe vāha íyó, chí máá ñin-ni Yaā Dios. Te núu cúní rō cotecu rō ní cáni, te squícu rō jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndiyi. Ma cosíquí ndéē jnáhan ró. Ma sacuíhná ró. Ma sajnúhún ró.

¹⁹ Cuatáhú ró nuū tatá rō nuū naná rō. Te cundáhú ni rō jnáhan ró nájñuhun cundáhú ni rō maá ró, achí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lúli ná. ¿Te na vé cúmanī gā sáha ná núu súcuan?

²¹ Te ni cahān Jesús:

Núu cúní rō squícu ndihí ró, cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquin rō ruhū quihín yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chí yōhyo yí quívicoo de ndaha Yaā andiví jéē ndacu ya jniñu nuū de.

²⁴ Te cáhán tucu rí jíin ró jeē yachí gā yáha ñin camello yaū yutícuí, vésú jeē quíví ñin ñayuu cucá ndaha Yaā Dios

jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jñūhun yáha, te ni cacajñūhun jñáhan de:

¿Ndé ñáyuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi ndihi-ni cuu sáha ya, achí yá.

²⁷ Yūcuán na te ni cahān Pedro:

Saña jíjnáhan ná ní castóo ná ndihí jeē cánevāha ná, te cándiquīn na nihín. ¿Te na vé nihín na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíjnáhan ró jēe ñn quivī conene rī mesa ndacu rī jniñu, te yōhyo luu kujéhnū rī ini ñayīvi jéé. Te quivī ún te máá ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel.

²⁹ Te tāca ñáyuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i ñn ciento gā jeē súcuan. Te suni nihīn tahú i cotecu i ní cáni.

³⁰ Te cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

Jñūhun yátá síquī tēe cáasájniñu

20

¹ Te suhva cúu jeē ndácu Yaā andiví jniñu nuū ñáyuu: Cúu nájñūhun ñn tēe chí ñuhun. Te ñn nehen ni quenda de, ndúcú de tijni mozo jeē taxín ndéhē uva de.

² Te ni sándaā de jíin mozo un jéē chúnaa de ñn denario jeē quiví. Te ni tají de tēe un cuángoo jeē taxín uva de.

³ Yūcuán na te ni quenda tucu de nájñūhun cahān. Te ni jito de nuū sava ga tēe cáyūcu sáa-ni de nuū yáhu.

⁴ Te ni cahān de jíin: Róhó jíjnáhan ró, cuángoo taxín ró uva rī, te chunaa vāha ri yāhu ró, áchí de. Te tēe un cuángoo de.

⁵ Te ni quenda tucu de jeē cuácuu cahuxī uū jíin jéē cuácuu cahunī, te suni súcuan ni nihīn tucu de mozo.

⁶ Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhīn sáa-ni ró yáha ní ndiáca? áchí de.

⁷ Te ni cacahān tēe ún: Siquī jeē tú ni ñn ní cána saña jéē sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chi chunaa vāha ri yāhu ró, áchí de.

⁸ Te nuū ní ini, te tēe chí ñuhun ni cahān de jíin tēe cújéhnū nuū mozo de: Cana xini tēe cáasájniñu te chunaa rō yāhu de, te xīhna gā tēe ni quivícoo sandīhí, te sáa te tēe ni quivícoo xīhna ñuhūn, áchí de.

⁹ Te ni quecoo tēe jeē ni

quívicoo cahuhūn. Te ñn denario ni caquihin ñn ñn de.

10 Yūcuán na te ni quecoo tēe jeē ni quívicoo xīhna ñuhūn. Te cájeni ni de jeē cuehē gā quiyāhu de. Te ñn-ni denario ni caquihin ñn ñn de.

11 Te nuū ní caquihin de, te ni caquejéé de cácahān sōo de siquī tēe chíí ñuhun, áchí de:

12 Máá ná jijnáhan ná, ndiáca ni casájniñu ná, te ni candoho ná jéē jihní. Te tēe yáha jéē ni quívicoo sandīhí, chí máá ñn hora-ni ni casájniñu de. Te inuú-ni ni chiyāhu ní sáña jíin de, áchí de.

13 Te tēe chíí ñuhun ni cahān jíin ñn de: Amigo, nasūu jéé tú vāha sáha ri jíin ró. ¿A tu ní sándaā yō jeē ñn denario quiyāhu ró, chí naún?

14 Núu súcuan te quihin yāhu ró te quinhun rō. Chí cúní rī jeē tēe ni quívicoo sandīhí yáha, inuú quiyāhu de jíin máá ró.

15 ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jíináhan de siquī jeē vāha ni rī? áchí de.

16 Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandīhí, nduu i nuū. Te ñayuu cácuu nuū, nduu i sandīhí. Chí cuehē ñayuu cána ya jeē candíje i ya. Te jecu-ni i candíje, te nácāji ya maá i jeē ndúu i sēhe ya. Achí yá.

Jeē ni cáhān tucu Jesús jeē cúu yā

(Mr. 10.32-34; Lc. 18.31-34)

17 Yūcuán na te ná ni quihin Jesús ichi cuahān yā ñuu Jerusalén, te ni cana sīn ya ndihúxí uū tēe cáscuáha jíin yá. Te ni cahān yā jíin de:

18 Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñu jíin núu tēe cástéén tutu ley. Te ndonda de siquī rī jeē cúu rī.

19 Te squívī de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácata de nuū rī. Te cani de ruhū, te sáa te cahni de ruhū jicā cruz. Te nuū uní quivī te natecu rī. Achí yá.

Jeē ni jícān naná Jacobo jíin Juan ñn favor nuū yā

(Mr. 10.35-45)

20 Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuñī yití ña nuū yā, jícān ña ñn favor nuū yā.

21 Te ni cajnūhun yá ña:

¿Na vé cuní rō?

Te ni cahān ña:

Cuāha ní jnūhun jeē quivī ndácu ní jniñu te conēne ndindúú séhe ná yáha xiin ní, ñn i lado vāha ní, te ñnga i lado jecó ní, achí ña.

22 Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rí? Achí yá.

Te ni cacahān de:

Cuu sáha ná.

23 Te ni cahān yā jíin de:

Jendaá jeē ndoho ró jnũndóho nájñuhun jeē quíji siquĩ rĩ, te ndoho xeēn rō nájñuhun ndoho ri. Te jeē cónēne ró lado váha ri jíin lado jecó rí, nasũu rúhũ cúu jeē cuáha jñuhun. Chi je íyó túhva cuu táca téee jeē ní nacáji Tátá rĩ, te tēe un níhĩn. Achí yá.

²⁴ Te uxĩ gā tēe cáscuáha jíin yá ní cajini de jñuhun yáha. Te ni caquitĩ ni de nuũ uú ñani ũn.

²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuũ ñáyuu táca nación. Chi cándaçu níhin de jñiñu nuũ i, te máá de cáchí ndese coo.

²⁶ Te máá ró jijnáhan ró, chi ma sáha ró súcuan. Chi núu ndé ĩn ró cúní cujuhnu, sa suhva cuajniñu ró núu jnáhan ró.

²⁷ Te núu ndé ĩn ró cúní cuu nuũ, sa suhva sáha ró máá ró mozo nuũ jnáhan ró.

²⁸ Chi suni súcuan sáha ruhũ, Yaā ní nduu tēe, chí nasũu jēē véji ri jeē cuajniñu ñayuu nuũ rĩ, chí sa suhva véji ri jeē cuajniñu ri nuũ ñáyuu. Te cuāha ri maá rí cuu rĩ návāha jnama ri cuehē ñayuu, achí yá.

Jeē ní nasávāha ya uũ tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquĩn i ya.

³⁰ Te yuhíchi un cáyũcu uũ tēe cuáá. Te ni cajini de jñuhun jeē yáha Jesús cuahān yā, te ni cacana jee de:

Máá ní jeē cúu ní Séhe yucũn David, cundáhú ni ni sáña, áchí de.

³¹ Te ñayuu un ní cacahān i nuũ de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucũn David, cundáhú ni ni sáña víi, achí de.

³² Te ni jecuiñĩ Jesús, te ni cana ya ndĩndúú téee cuáá un, te ni cajñuhun yá de:

¿Na vé sáha ri jíin ró cácuñi rō?

³³ Te ni cacahān de jíin yá: Jeē na ndũndijin tinũu ná cácuñi ná, áchí de.

³⁴ Te ni cundáhú ni yā de. Te ni tee ya ndaha ya tinũú de. Te ni candundijin-ni tinũú de. Te ni candiquĩn de ya cuango de jíin yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuũ cuácuyajni ya ñuu Jerusalén, te ni jinũ yā jíin téee cáscuáha jíin yá ñuu Betfagé, jeē íne jehē yucu Olivos. Te ni tají yá uũ tēe cáscuáha jíin yá jeē quíngoo de.

² Te áchí yá jíin de:

Cuáhán ñuu lulí íne ichi núu. Te yūcuan níhĩn rō ĩn burra, núhni tĩ jíin ĩn burro lulí. Te ndají ró tĩ, quiijicoo ró jíin tí nuũ rĩ.

³ Te núu ndé ĩn cahān jíin ró, te cachi rō nuũ: Máá Jítóho yō jíni ñúhún yá tĩ, achí rō. Yūcuán na te siáá-ni i tĩ, quiiji ró jíin tí, achí yá.

4 Te súcuan ni cuu tãcá jniñu yáha návãha squícu jnūhun ni cahān tēe ni nacani jnūhun Yaā Dios nde jenahán, yósó núū tútu:

5 Cachi rō nuū ñáyuu ñuu Jerusalén jeē naní ñuu Sión:

Yahá condēhe ró jeē véji Rey rō.

Tu sájehnu ya maá yá, chi máá burra-ni yósó yá,

jín burrito, sēhe quití ndíso.

Achí tutu.

6 Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de.

7 Te ndéca de burra jín séhe tí, ni ndecoo de nuū yā. Te ni casoó de sahma de siquí tí, te ni jecosó yā tí.

8 Te cáhiin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi.

9 Te ñayuu cuangoo ichi núú jín ñáyuu cuangoo ichi yátá, cácana jee i:

Yōhyo cújehnu Yaā cúu Sēhe yucūn rey David. Yōhyo vāha Yaā cúu Yaā jeē véji jín jniñu máá Jítóho yō Yaā Dios. Te yōhyo cújehnu máá Yaā Dios. Achí i.

10 Te nuū ni quívi ya ñuu Jerusalén, te ndihí ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? áchí i.

11 Te ni cacahān ñayuu vējicoo jín yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañū Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

12 Yūcuán na te ni quívi Jesús ini templo cáhnu Yaā Dios. Te ni quenehen ya tãca ñáyuu cájeen quití te cánaixico núú ñáyuu jeē socō i. Te ni scotúú ndeyi ya tãca mesa tēe cástáyí xūhún, jín silla tēe cáxícō paloma.

13 Te áchí yá jín i:

Yósó núú tútu ñ jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájñūhun yaū cava ñacuīhná ni canasáha ró. Achí yá.

14 Yūcuán na te sava ñayuu cuaá jín ñáyuu chacuá ni quecoo i nuū yā ini templo un. Te ni nasávãha ya i.

15 Te sutū cácujuhnu jín tēe cástéén tutu ley Yaā Dios, ni cajito de tãcá jniñu jehnu sáha ya, te ni cajini de jeē cácana jee sūchi lúlí ini templo: Yōhyo cújehnu Yaā cúu Sēhe yucūn rey David, achí i. Te ni caquití ni de.

16 Te ni cacahān de jín yá:

¿A tu jini ró jēe súcuan cácahān sūchi yáha? áchí de.

Te ni cahān Jesús jín de:

Jini ri. ¿Te á ná tu cahu ró jēe yosó núú tútu ñ jeē suhva cáhán ñ tēe jín Yaā Dios?

Sáha ní jēe tãca sūchi lúlí jín sūchi cájexin,

vāha ndasí cáhán i jeē Yaā cujehnu cúu Cristo.

Achí.

17 Te ni stóo ya de. Te ni quenda ya ñuu Jerusalén,

cuahān yā nde ñuu Betania. Te yūcuan ní ndōo ya jecuāā ún.

Jeē ni cáhān yā nuū yújnu higo

(Mr. 11.12-14, 20-26)

18 Te jenéhen inga quivī cuanuhun yā ñuu Jerusalén, te jíi yā sōco.

19 Te ni jito ya ñin nundēhe higo, ín yuhíchi. Te ni jehēn yā jehē. Te tú na ndehē ni níhín yā, chí máá ndaha-ni ín. Te ni cahān yā jíin:

Vijna te ma cúun cuiṭi gā ndehē xinī rō, achí yá.

Te ni ichī-ni yujnu higo ún.

20 Te tēe cáscuáha jíin yá, ni canaa ni de cájito de. Te ni cacajñuhún de ya:

¿Ndese ni sáha ní jéē yachí-ni ni ichī yujnu higo? achí de.

21 Te ni cahān yā jíin de:

Jendaá cahán rī jíin ró, núu candíje ró te tú cani siquī ni rō, te cuu sáha ró jniñu jéhnu nájnūhun ni sáha ri jíin yujnu higo. Te nde jniñu jéhnu ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájnūhun cahān rō.

22 Te tāca jéē cacán tahu rō jijnáhan ró, te núu candíje ró jéē nihín rō, te nihín rō. Achí yá.

Siquī jeē ndíso jniñu Jesús

(Mr. 11.27-33; Lc. 20.1-8)

23 Te ni quivī tucu ya ini templo cáhnu. Te níni stéén yā jñūhun, te sutū cácujeñu jíin táca téé jéhnu jeē cándacu jniñu nuū ñáyuu hebreo, ni

quecoo de nuū yā. Te ni caca-jñuhún de ya:

¿Ndé ní nihín jniñu ró jéē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

24 Te ni cahān Jesús:

Suni ruhū, cajñūhun rí rohó ñin jñūhun jijnáhan ró, te núu cuu stío cuiñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha.

25 ¿Ndé ñin ni tee jniñu siquī Juan jeē ni scuándute de? ¿A Yaā Dios chí táca téé? áchí yá jíin de.

Yūcuán na te ni canda-jñūhun máá de:

Núu cahān yō jeē Yaā Dios ni tee ya jniñu un siquī Juan, te cahān de jíin yó: Núu súcuan ¿te najehē tu ní cácañdije ró de?

26 Te núu cahān yō jeē ñáyuu ni catee jniñu un siquī de, te cáyūhu yó ñáyuu, chí ndivii i cácañdije i jeē téé ni nacani jñūhun Yaā Dios ni cuu ndije Juan. Achí de cácahān maá de.

27 Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cachi rī nuū rō ndé ñin ni tee jniñu siquī rī sáha ri jniñu yáha, áchí yá.

Jñūhun yátá siquī uú sēhe yí

28 Te ni cahān gā yā jíin de:

Cuni nahín ró jñūhun yátá yáha: ñin tēe ni iyo uū sēhe yí de. Te ni cahān de jíin ñin i: Séhē, quihín rō taxín ró ndehē uva rī vijna, áchí de.

29 Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún.

30 Te tēe un ní jehēn de nuū ínga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jéhén i.

31 ¿Te ndese cájeni ni rō? Jeē ndindúú i, ¿ndé ñn i ni squícu jniñu cúní tatá i? áchí yá.

Te ni cacahān de:

Sūchi jéē ni cáhān de jíin xihna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quíví ró.

32 Chi ni quiji Juan, ni steén de ndese condiquín rō jñuhun ndaā, te tu ní cá candíje ró jñuhun ni cahān de. Te sa suhva tēe cástútú xúhun renta jíin ñahan cájica jnéni, ni candíje i jñuhun ni cahān de. Te máá ró, vēsú ni cajito ró jéē ní candíje i, te tu ní cá nacani cuiti ni rō jeē candíje ró. Achí yá.

Jñuhun yátá síquī tēe néé cá sájniñu nuū uva

(Mr. 12.1-12; Lc. 20.9-19)

33 'Cuni sōho ínga jñuhun yátá jijnáhan ró: Ni íyo ñn tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxīn. Te ni jeni de ñn vehe súcún návaha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

34 Te máá tiempo ndutútú uva, te ni tají de jecu mozo cuanuquihin sava uva nuū tēe cá sájniñu ún.

35 Te tēe un ní cajñi de mozo un. Te ñn i ni cacani de, te ínga i ni cajehni de, te ínga i ni cajēhe de yuū xiní.

36 Te tēe chíí uva ni tají tucu de jecu gā mozo cuan-goo, cuehē gā vēsú jeē xihna ñuhún. Te suni súcuan ni casáha tēe un jíin ndihí mozo un.

37 Te jeē sándihí na te ni tají de sēhe de cuahān. Te jéni ni de: Tēe ún chí cuatáhú de jijnáhan de nuū séhe rí.

38 Te tēe cá sájniñu ún, núu ní cajito de nuū séhe tēe chíí uva, te ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áchí.

39 Te ni cajñi de i, te ni caquenehen de i ínga lado, te ni cajehni de i. Achí yá.

40 Yūcuán na te ni cajñuhun yá de:

Núu súcuan te núu na quíji tēe chíí uva un, ¿te ndese sáha de jíin tēe cá sájniñu ún? áchí yá.

41 Te ni cacahān de jíin yá:

Ma cundáhú cuiti ni de táca tēe cá sáha jniñu néé un, chí cahni de. Te cuāha de ñuhun cáá uva un núu ínga sava tēe sájniñu nuū, cuu sava de ndehē jíin. Te quíví ndutútú ndehē, te tēe ún nacūaha de sava ndehē nuū tēe chíí uva. Achí de.

42 Te ni cahān Jesús jīn de:

22

¿Te á ná tu cahu ró jnúhun yáha jeē yosó núū tútu iī, jeē ruhū cúu nájñūhun ñn yuū? Chi áchí tutu:

1 Yūcuán na te ni cahān tucu Jesús inga jñūhun yátá jīn de jijnáhan de:

Yuū jeē ní casquéhichī tēe cájeni vehe,
yuū yáha nduu jeē quítuu vehe.

2 Súcuan cúu jeē ndácu Yaā andiví jniñu nuū ñáyuu: Cúu nájñūhun ñn rey jeē sáha de ñn vico jeē nándāha sēhe yíí de.

Máá Jítóho yō Yaā Dios ni sáha ya súcuan,
te cánaa ni yō jító yó jniñu yáha.

3 Te ni tají de tāca mozo de cuacana ñayuu jeē ni cáhān de jīn jéé quíjicoo. Te ñayuu ún tu ní cácuni i quijicoo i.

Achí tutu.

43 Núu súcuan te cáhān rī jīn ró jeē cujiyo-ni jeē ndácu Yaā Dios jniñu nuū rō jijnáhan ró, te nacuaña ya jniñu un núū inga ñayuu jeē squícu váha i jniñu ndácu ya nájñūhun cúní yā.

4 Te ni tají tucu de jecu gā mozo quingoo, te áchí de jīn: Cahān jīn ñáyuu ní cana ri un jéé iyó túhva ndeyu. Chi je ni jehni rī stiquī rī jīn táca gá quiti ní nduu, te ndihí je iyó túhva. Nehen jijnáhan ró vico nándāha. Achí rō jīn i. Achí de.

44 Te ñayuu tu cácandíje, ndoho i nájñūhun ndóho ñayuu jeē cotúú siquī yuū te jnánhú i. Te quiví sándaā Yaā Dios cuēchi, te ñayuu tu cácandíje, ndoho i nájñūhun ndóho ñayuu jeē nínga yuū siquī i te cundihí i sáha. Achí yá.

5 Te ñayuu ní cana de ún tu ní cásáha i cuenta. Chi ñn i cuahān nuū ítu i, te inga i cuahān nuū jniñu sáha i.

45 Te sutū cácujuhnu jīn tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē siquī maá de cúu jñūhun yátá ní cahān yā siquī tēe cásajniñu nuū uva jīn tēe cájeni vehe.

6 Te sava ga i ni cajñi i tāca mozo rey, te ni casácatā i nuū, te ni cajehni i.

46 Te ni canducú de modo jñi de ya. Te cáyūhú de jeē quiti ní ñayuu, chi cájeni ni i jeē tēe nácani jñūhun Yaā Dios cúu ya.

7 Yūcuán na te yōhoyo ni quiti ni rey. Te ni tají de soldado de ni jengoo, ni cajehni de ñayuu ní cajehni ndiyi ún, te ni cajehmu de ñuu i.

8 Yūcuán na te ni cahān de jīn sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñáyuu váha cácuu i.

9 Núu súcuan te cuahān jijnáhan ró tāca núū náquijnáhan calle. Te cana ró núu nasaa ñayuu nihín rō, na quíjicoo i vico nándāha. Achí de.

Jñūhun yátá siquī vico nándāha

10 Te ni quendacoo mozo un cuángoo tǎcá ichi. Te ni castútú de ndihi ñayuu ní canihĩn de, cúu ñayuu cunéé, cúu ñayuu váha. Te súcuan te ni chítú ñayuu ini vehe nuū iyó vico nándāha.

11 Te ni quĩvĩ rey ini vehe jeē cahán de jíin ñayuu ni cutútú. Te ni jito de nuū ĩn tēe jeē tu ñúhun sahma jeē ni jéhe de cuhun ñayuu quijicoo vico nándāha.

12 Te ni cahán de jíin tēe ún: Amigo, ¿ndese ni quĩvĩ ró yáha jēē tu ñúhun ró sahma vico nándāha? áchí de. Te máá tēe ún tu ní cáhán cuiti de.

13 Yūcuán na te ni cahán rey jíin tēe cájeni cohō: Jnĩ de te cuhni rō ndaha de jehē de, te quenehen ró de na quihín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey.

14 Chĩ cána Yaā Dios cuehē ñayuu jeē na cándíje i. Te jecu-ni i candíje, te máá i nácāji ya jeē ndúu i sēhe ya. Achí Jesús.

Siquĩ xúhun renta

(Mr. 12.13-17; Lc. 20.20-26)

15 Yūcuán na te cuangoo tēe grupo fariseo. Te ni canda-jnūhún de núu ndese sáha de návāha cahán yā ĩn jnūhun jeē nihín de cuēchi siquĩ yā.

16 Te ni catajĩ de jecu tēe cáscuáha jíin máá de jíin tēe grupo Herodes cuangoo de. Te ni cacahán de jíin yá:

Maestro, cájini na jēē tēe cáhán ndaā cúu ní, te stéén ndaā ní ndese squĩcu ñayuu nuū Yaā Dios. Te tu yúhú ní

jeē cahán ni ĩn ñayuu siquĩ ní, chí tu sáha ní cuenta ndese cúu ĩn ĩn i, chí ĩnuú-ni sáha ní jíin i.

17 Núu súcuan te cahán ní ndese jéni ní ní: ¿A iyó váha jeē chúnaa yō renta nuū rey nación Roma jeē jnĩ nación yō, chí tuú? áchí de.

18 Te ni jini Jesús jeē cájito ndee de ya. Te ni cahán yā jíin de:

Tēe stáhú-ni cácuu ró. ¿Najehē cájito ndee rō ruhū?

19 Stéén xūhun jēē jéconaā renta na cóto ri, achí yá.

Te ni castéén de ĩn denario nuū yā.

20 Te ni jito ya, te ni cajnūhun yá de:

¿Ndé ĩn nuū cúu jeē ndeé nuū xūhun yáha, te ndé síhvĩ cúu jeē ndeé yāhá?

21 Te ni cacahán de jíin yá: Nuū jíin síhvĩ rey un cúu, áchí de.

Yūcuán na te ni cahán yā jíin de:

Núu súcuan te nacuāha ró núu rey un jēē yihĩ cuenta nuū de, te nacuāha ró núu Yaā Dios tāca jēē yihĩ cuenta nuū maá yá, achí yá.

22 Te nuū ní cajini de jeē ndichí ní cahán yā jnūhun yáha, te ni canaa ni de, te ni castóo de ya, te cuangoo de.

Jeē ní cacajnūhún de siquĩ jeē nátecu ndiyĩ

(Mr. 12.18-27; Lc. 20.27-40)

23 Te suni quĩvĩ un ní que-coo jecu tēe grupo saduceo nuū yā. Te tēe un cacahán jeē tu nátecu cuiti ndiyĩ. Te ni cacahán de jíin yá siquĩ ĩn jnūhun, áchí de:

24 Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñiñ nuū ndíyí ñani de. Achí Moisés.

25 Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de.

26 Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de.

27 Te nuū ní ndihí de ni cajihí, te suni ni jihí ñahan ún.

28 Núu súcuan te quiví nátecu ndíyí, ¿ndé ñn de cuu ña ñasihí de? Chi ndihúxá de ni condeca de ña. Achí de jíin yá.

29 Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu ñ, ni tu cájini rō jeē iyó poder Yaā Dios jeē nastécu yā ndíyí.

30 Chi quiví nátecu ndíyí, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yaā Dios andiví.

31 Te siquī jeē nátecu ndíyí, ¿á tu ní cácahu ró tutu jnūhun jeē cahán Yaā Dios jíin ró?

32 Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

33 Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios
(Mr. 12.28-34)

34 Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā.

35 Te ñn de jeē cúu tēe stéén tutu ley Yaā Dios, ni cajñūhún de ya, chi coto ndee de ya cuní de:

36 Maestro, ¿ndé ñn cúu jnūhun ndácu jniñu cánuú ndasí gá nuū tutu ley? achí de.

37 Te ni cahān Jesús jíin de: Coo manī ndasí ró jíin máá Jítóho rō Yaā Dios, nde jnáā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ní jeē ní jñūn rō, achí tutu.

38 Yāha cúu jniñu ndácu ya jeē cujéhu ga te cánuú ndasí gá.

39 Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájñūhun cundáhú ni rō maá ró.

40 Te chíji ndindúú jnúhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

41 Te ní ní cáyūcu tútú gá tēe fariseo un, te Jesús ni cajñūhun yá de:

42 ¿Ndesé cájeni ni rō siquī Cristo? ¿Sēhe ndé yucūn cúu ya?

Te ni cacahān de: Sēhe yucūn David, achí de.

43 Te ni cahān yā jīn de:

Núu súcuan ¿te ndese cúu jeē David ni cahān de Jitoho de ya, ni sáha Espíritu Santo ndejenahán? Chi ni cahān de:

44 Máá Jítoho yō Yaā Dios ni cahān yā jīn Jítoho rī, Yaā quiiji:

Cucōo ró lado váha ri nuū cujéhnú ró,

te na sáha ri jeē quende rō poder tāca jéē cájito uhū rohó.

Achí Yaā Dios. Achí David.

45 Te núu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? áchí yá.

46 Te ni ñn de tu ní cúu stió cuiñí cuiñi de jñūhun nuū yā. Te nde quiñí ún tuá ni ñn de ní chūndeyí ni de cajñūhún de ya.

Jeē ni cahān yā jeē iyó cuéchi de jijnáhan de

(Mr. 12.38-40; Lc. 11.37-54; 20.45-47)

23

1 Yūcuán na te ni cahān Jesús jīn ñáyuu jīn tée cáscuáha jīn yá:

2 Tēe cástéén tutu ley Yaā Dios jīn tée grupo fariseo, cájeni ni de jeē ndíso jñíñu de jeē steén de ley jeē ni jéhe ya nuū Moisés.

3 Núu súcuan te cuatáhú ró te squícu ró tāca jéē cándacu de nuū rō. Te ma sáha ró nájnūhun cáscáha máá de. Chi cácahān-ni de, te tu cáscuácu de.

4 Chi suni cástéén de tāca ley ni catava máá de jeē yí sáha, te cátee de siquī ñáyuu, te tu cákundeyí i squícu i. Te máá

de jijnáhan de, chi ni ñn xinī ndáha de tu cáscánda de jeē squícu de.

5 Te máni siquī jeē na cuájñuhún ñáyuu de cúu ndihí jeē casáha de. Chi cánujnahan ni de cuhni de cuehē jñūhun tutu i jneē de jīn ndaha de. Te suni cáscáni ga de yuhvā yusáhma de jeē steén jeē cáscujéhnú ga de vēsú inga ñáyuu.

6 Te cánujnahan ni de cucōo de nuū silla yñíñuhún gá nuū cáyeji ñáyuu vico, jīn silla yñíñuhún gá ini vehe i sinalgoga.

7 Te suni cánujnahan ni de jeē cahán yñíñuhún ñáyuu jīn de nuū calle, jīn jéē cahán i maestro jīn de.

8 Te máá ró jijnáhan ró, ma cuáha ró jñūhun jeē cahán ñáyuu maestro jīn ró. Chi ñnuú cácuu ndihí ró jéē cácuu ró hermano, te iyó ñn-ni Maestro rō jeē cúu ruhū, Cristo.

9 Te ma chiñíñuhún ró ni ñn téē ñayívi yáha jeē cahán rō padre jīn de. Chi iyó ñn-ni Tátá rō jijnáhan ró, Yaā ndeé andiví.

10 Te suni ma cuáha ró jñūhun jeē cahán i jitoho jīn ró. Chi iyó ñn-ni Jitoho rō, te suu cúu ruhū, Cristo.

11 Te téē mēññu ró jijnáhan ró jeē jeññíñu nuū jñáhan, suu de cúu jeē cujéhnú ga.

12 Chi téē jeē sajeññu de máá de, sa ndululí de. Te téē jeē sálulí de máá de, sa ndujéhnú de.

13 Nacā xeēn ndoho róhó téē cástéén tutu ley jīn róhó téē fariseo, chi téē stáhú-ni

cácuu ró. Chi cájesi rō jeē quívi ñayuu ndaha Yaā andiví jeē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

14 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yúcuan xeēn gā ndoho ró castigo.

15 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi ní ñuhun íchi jiín ní mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te cásáha ró jēe vihyá gā cúu cuēchi i jeē quihín i infierno vēsú maá ró.

16 'Nacā xeēn ndoho ró, chi cácuu ró nájnūhun tēe cuáá jēe steén ichi nuū ñáyuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

17 Tēe cánéé tēe cuáá cácuu ró jēe castíví ró jnūhun cácahān rō. ¿Ndé ñn cúu jeē kujénu ga, á oro un chí Yaā Dios jeē ndeé ini templo jeē sáhíí oro un?

18 Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō.

19 Tēe cánéé tēe cuáá cácuu ró jēe castíví ró jnūhun cácahān rō. ¿Ndé ñn cúu jeē kujénu ga, á ndajniñu yúcu nuū altar, chí Yaā Dios jeē sáhíí yā ndajniñu ún?

20 Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jiín ndajniñu yúcu nuū altar ndácunehen de.

21 Te tēe jeē jéjnūhun téyí, te núu ndácunehen de templo, núu súcuan te nde jiín Yaā Dios jeē ndeé ini templo ndácunehen de.

22 Te tēe jéjnūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jiín máá Yaā Dios jeē ndeé nuū mesa un.

23 'Nacā xeēn ndoho rōhó tēe cástéén tutu ley jiín rōhó tēe fariseo, chi tēe stáhú-ni cácuu ró. Chi cásáha ró úxí úxí nuhní tamínú jiín yucú anís jiín yucú comino, te cásocō rō ñn ñn siquí tāca úxí un núu Yaā Dios. Te cástóo ró jnūhun cánuú ndasí gā nuū ley, suu jeē cáca ndaā rō, jiín jēe cundáhú ni rō jnáhan ró, jiín jēe candíje ró. Tāca jēe yáha cánuú sáha ró núu, te suni ma stóo ró jēe socó rō

tāca yúcū ún.

²⁴ Cácuu ró nájñūhun tēe cuáá jēe steén ichi nuū ñayuu. Chi cásquicu ró ñin jeē lulí gá un, te cástóo ró jēe cánuú gá. Te suu cúu nájñūhun jeē cātava rō chūcún ndíhī jeē ñūhun nuū ndúxi, te cácocó ró ñin quití cáhnu jeē naní camello.

²⁵ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi nájñūhun jeē cánacate ró yátā vaso jín yátā cohó. Te ichi íni rō chi ñūhun máni máá jñūhun cuíhná jín jñūhun ndíyo ni.

²⁶ Tēe cuáá cácuu ró, fariseo. Xihna gā sáha ró jēe coo ndoo ini anuá rō, te yūcuán na te suni coo ndoo tāca jēe casáha ró jēe cájito ñayuu nuū.

²⁷ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi cándāa ró nájñūhun vehe ndíyi nuū panteón jeē cáyaa. Chi ichi yátá jito luu, te ichi íni ñūhun chitú yiqui ndíyi jín táca jēe tehúy.

²⁸ Te súcuan cácuu máá ró, chi ichi yátá rō casáha ró jeē tēe ndaā cácuu ró nuū ñáyuu. Te ichi íni rō ñūhun chitú jñūhun stáhú-ni jín jñūhun néé.

²⁹ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi casáha ró vehe siquī nuū yíndūji ndíyi jíí rō, tēe ni canacani jñūhun Yaā Dios nde jenahán. Te casáha luu ró vehe siquī nuū yíndūji tāca tēe ni iyo ndaā.

³⁰ Te cácahān rō: Núu jeē suni yúcu yó tiempo jeē ní cotecu ndíyi jíí yō, te ma squívi nduu yō jín de jeē cáhni yō tēe ni canacani jñūhun Yaā Dios, achí ró.

³¹ Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jñūhun ya.

³² Núu súcuan te tāca cuéchi jeē ní casquejéé ndíyi jíí rō, máni un casáha ga maá ró.

³³ 'Va sēhe coō cácuu ró, chi xeēn rō nájñūhun coō. ¿Nde se cácu ró jēe ma jnahnú ndetú rō quingoo ró infierno?

³⁴ Núu súcuan te tají rí tāca tēe nacani jñūhun Yaā Dios nuū rō, jín táca tēe ndíchí jēe castéén jñūhun ya. Te sava de cahni rō, te sava de cata caa ró jicā cruz. Te sava ga de caní ró de ini táca vehe ñi sin-agoga, te scūnu ró de quingoo de táca ñuu.

³⁵ Te súcuan te condee cuéchi siquī maá ró jeē ní cajehni jíí rō tāca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto ñi jín altar.

³⁶ Jendaá cahán rí jín ró jeē tāca cuéchi yáha condee siquī ñáyuu iyó vijna.

Jeē cucuíhyá ni yā jito ya ñuu Jerusalén
(Lc. 13.34-35)

³⁷ 'Róhó ñuu Jerusalén, jéhni rō tēe cánacani jñūhun Yaā Dios, te jéhe ro yúu xiní tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe ró, nájñūhun ndují jēe

nastútú tí sēhe ti chíji ndijēn tī, te tu ní cúní rō.

³⁸ Núu súcuan te vijna te stóo uun na ri rohó jíin séhe rō.

³⁹ Chi cáhán rī jíin ró jéē ndé vijna te ma cóto cuiti gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā véndiji jíin jniñu máá Jítóho yō Yaā Dios, achi i. Achí yá.

Jeē ní cachi yā jeē náā templo

(Mr. 13.1-2; Lc. 21.5-6)

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnáhan jeē cúu máá templo un.

² Te ni cahān yā jíin de:

Tāca jéē cájito ró yáha, jendaá cahán rī jíin ró jeē quiji quivī jeē ma cóso jnáhan ga ni ñin yuū, chi ndihi jnanū. Achí yá.

Na seña coo nuū cuácuyajni ndihi ñayiví

(Mr. 13.3-23; Lc. 21.7-24; 17.22-24)

³ Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajnūhun sán de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndiji ní jíin jéē jínu ñayiví? áchí de.

⁴ Te ni cahān Jesús:

Coto ró jéē ma stahú ni ñin de rohó.

⁵ Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

⁶ Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quivī ndihi ñayiví.

⁷ Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyī xeēn. Te cháha chúcuan jnáa.

⁸ Te tāca jéē yáha cácuu jnūndóho quejéé xíhna ñúhún gá.

⁹ Yūcuán na te nastúu i róhó jíjnáhan ró jéē stóho i róhó te cahni i róhó. Te ndihi ñayuu quitī ni i nuū rō jeē siquí ruhū.

¹⁰ Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i.

¹¹ Te canecoo cuehē tēe stahú, te cahān de jeē jnūhun Yaā Dios cánacani de, te stahú de cuehē ñayuu.

¹² Te nducuehē jniñu néé, te jeē yúcuan cuehē i ma cóo manī gá i.

¹³ Te ñayuu cuiñi nihin jíin jnūhun ri nde quivī jínu, ñayuu ún chi cācu.

¹⁴ Te jnūhun yáha síquī ndese ndácu Yaā Dios jniñu, cuitē núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

¹⁵ Te Daniel, tēe ni nacani jnūhun Yaā Dios, ni tee de jnūhun ñin tēe néé jéē quíji. Te

róhó jéē cácahu tutu ún, na jécūhun ni rō. Chi ñn quivī te cuni rō jeē sāha ndevāha de jeē stīvi de tācá ndajníñu ii ini templo, te cuiñi de ini lugar ii.

16 Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

17 Te ñayuu cáyūcu núu quéhe, ma ndívi i ini vehe jeē quénehen i ndajníñu i, chi cánuú cunu yachī i návāha cācu i.

18 Te ñayuu cáhīn nuū itu, ma ndíji i vehe jeē quíhin i sahma i.

19 Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña.

20 Te cacān tahu rō jeē ma quíji jnūndóho un jéē cunu ró máá tiempo cúun yuhvā ni quivī ndétátú.

21 Chi jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan.

22 Te núu tú nastíyi Yaā Dios tiempo jnūndóho ún, te ni ñn ñayuu ma cácu cuiñi i. Te jeē siquí ñáyuu cácandíje jeē ní nacāji ya, jeē yúcuan nastíyi ya tiempo un.

23 Núu súcuan te núu ñn ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i.

24 Chi canecoo tēe cástáhú jéé achi de jeē Cristo cúu de, chí achi de jeē tēe nácani

jnūhun Yaā Dios cúu de. Te sāha de jniñu jénu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu.

25 Je ni castūhun rí nuū rō vijna nde ná tu coo.

26 Núu súcuan te núu cahān ñayuu jíin ró: Cuácondēhe ró, chí nde nuū ñūhun téhé íne ya, achi i, te ma quíhin rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jíinahan ró.

27 Chi nájnūhun jeē ndíndēe sāha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quivī ndiji ruhū, Yaā ní nduu tēe, chi ndihi ñayuu coto.

28 Te nájnūhun jeē cutútú téji ndé-ni cúu nuū catú quiti ní jíhi, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

Ndese coo quivī ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

29 Yūcuán na te núu ni ndihi tāca jnūndóho quivī ún, te cojnúú níāndii, te yoō ma ndíi gā. Te ningoo quími andiví. Te tāca jéé íin andiví chí quisi i.

30 Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu kujénu ri.

31 Te tají rí ndajéhé rī quingoo, te tiví ñihin ya trompeta. Te quinastútú yá ñayuu ní nacāji ri ndicúun lado ñayiví,

nde ñn lado ñayīvi jīn ndé inga lado.

32 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

33 Te suni súcuan núu ni cajini rō jeē ní quejéé cúu tãcá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo.

34 Jendaá cahán rī jīn ró jeē ma cúu ndihi ñayuu jeē cóto jnūndóho ún, chí nde squícu ndihi jniñu ún.

35 Andiví jīn ñáyīvi chí naa, te tãca jnúhun cáhān rī chí ma nãá, chí ndihi squícu.

36 'Te quivī jīn hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chí máá ñn ni Tátá rī Yaā Dios cúu jeē jiní.

37 'Chí nájñūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe.

38 Chí quivī ún, nde ná tu cuun saū xeén, te cáyeji i cájiji i, cánandāha i, te cájehe i sēhe síhí i jeē nándāha, nde ni jinū quivī jeē ni quiví Noé ini barco cáhnu jeē naní arca.

39 Te tu ní cá candíje ñayuu jeē cuun saū xeén, te ni cuun, te ni ndaa ndute ni cajihī ndihi i. Te suni súcuan coo núu na ndíji ruhū, Yaā ní nduu tēe.

40 Te quivī ún cone uū tēe sájniñu nuū ítu. Te ñn de naquihin ri, te inga de ndōo.

41 Te coo uū ñahan jeē ndíco cáhnu, te ñn ña naquihin ri,

te inga ña ndōo. Súcuan cuu jeē sava ñayuu naquihin ri te sava i quendōo, chí tu ní cá candíje i.

42 'Núu súcuan te ndito na cóo ni rō, chí tu cájini rō na quivī ndiji Jitoho rō.

43 Te na chúhun ni rō jeē cahán jñūhun yátá yáha: Tēe chíí vehe, núu jeē jiní de na hora quiji ñacuīhná, te condito de, te ma cuáha de jñūhun sácuīhná ndajniñu vehe de núu.

44 Te rōhó jijnáhan ró, suni súcuan coo tūhva ró, chí máá hora jeē tú na vé cájeni ni rō, te ndiji ruhū, Yaā ní nduu tēe.

*Jñūhun yátá síquī mozo
(Lc. 12.41-48)*

45 'Núu súcuan te coo ró nájñūhun ñn mozo jeē ndíto xinī te squícu vāha. Te máá patrón ni jeni de mozo un jéé cóto i ñayuu vehe de, návāha scáji i máá hora.

46 Te yōhyo ndetū mozo un jéé núu ni ndee patrón, te cuni de jeē súcuan squícu vāha i.

47 Jendaá cahán rī jīn ró jeē cani de mozo un jéé cóto i ndihi ndajniñu de.

48 Te núu mozo sáha néé cúu i, te jeni ni i jeē ma ndíji yachī patrón i,

49 te quejéé i cani i jnáhan mozo i, te caji i coho i jīn tēe cánajīni,

50 núu súcuan te ndee-ni patrón quivī jeē tu ndétu i jīn hora jeē tú na vé jeni ni i.

51 Te stóho xeén de i, te squíví de i nuū cáhīn tēe stáhú-ni. Te yūcuan ndáhyū i te nacayihí yuhu i jeē ndoho xeén i. Achí yá.

Jnūhun yátá síquī uxī sūchi síhí

25

1 Te suhva cúu jeē ndácu Yaā andiví jniñu nuū ñáyuu: Cúu nájnūhun ñn vico nándāha. Te ni iyo uxī sūchi síhí jeē ní caquihin i linterna cándaha i, te ni quendacoo i cuajnahān i ñn tēe nandāha.

2 Te uhūn i chi tú ndito xinī i, te uhūn i chi ndito xinī i.

3 Te sūchi tú ndito xinī, cándaha i linterna i, te tu cándaha i petróleo jeē náchuhun i.

4 Te sūchí ndito xinī, chi cándaha i botella petróleo jíin linterna i.

5 Te níní cúcuéé quiji tēe nandāha ún, te ni quee māhná, te ni caquixī ndihi i.

6 Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan rō, áchí.

7 Yūcuán na te tāca sūchi síhí un ní candonda i, te ni casátūhva i linterna i.

8 Te sūchi tú ndito xinī, ni cacahān i jíin sūchi ndito xinī: Cuāha jecu petróleo nuū rī jijnáhan rō, chi cuandahvā linterna rī, achí i.

9 Te ni cacahān sūchí ndito xinī: Ma cúu, chí ma cánda jeē cúu máá rí jíin máá rō. Vāha ga quingoo rō núu cúyāhu, te cuaan rō jēe cúu máá rō. Achí i.

10 Te níní cuángoo i cuaan i, te ni quee-ni tēe nandāha. Te sūchi cáhīyo tūhva un, ní quívicoo i jíin de vico nándāha de. Te ni ndihyū yehyí.

11 Te ni cunúu, te ni que-coo uhūn gā sūchi síhí un. Te ni cacahān i jíin tēe nándāha: Nune ní yehyí na quívicoo ná, áchí i.

12 Te ni cahān maá de: ¿Ndé nuū véjicoo rō? Chí tu jíiní rī rohó, áchí de. Achí yá.

13 Yūcuán na te ni cahān yā:

Núu súcuān te ndito coo ni rō, chí tu cájini rō na quívicoo na hora ndiji ruhū, Yaā ní nduu tēe. Achí yá.

Jnūhun yátá síquī tēe ní jēhe núu xūhun núu tāca mozo

14 Te suhva cúu jeē ndácu Yaā andiví jniñu nuū ñáyuu: Cúu nájnūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jíjnáhan, te ni jēhe núu de xūhún de nuū i, jeē na sájniñu i jíin návāha nducuehē.

15 Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuān ni jēhe de, chí jíiní de nasaa canda ñn ñn i sájniñu i jíin. Yūcuán na te ni quihin de ichi cuahān jicá de.

16 Te mozo jeē ní quihin uhūn mil xūhún, ni sájniñu de jíin. Te ni nihīn de uhūn gā mil síquī.

17 Te mozo jeē ní quihin uū mil xūhún, suni ni nihīn de uū gā mil síquī.

18 Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

19 Te ni yāha cuehē tiempo, te ni ndee patrón mozo un

jíjnáhan. Te ni nandacān de cuenta nuū i.

²⁰ Te ni quee mozo jeē ní quihin uhūn mil xūhūn un, te ni naçuāha de xūhūn un núū patrón de jíin uhūn gā mil jeē ni níhīn de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni níhīn na síquī. Achí de.

²¹ Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chī váha ni squícu ró ĩn jniñu lúli-ni, te vijna te cuāha ri jniñu jéhnū ndacu ró. Te quivī ró núu cusī ni rō jíin rí. Achí de.

²² Yūcuán na te ni quee mozo jeē ní quihin uū mil xūhūn un. Te ni cahān de: Ni jēhe ní uū mil nuū ná, te yāha íyó uū gā mil jeē ni níhīn na síquī. Achí de.

²³ Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chī váha ni squícu ró ĩn jniñu lúli-ni, te vijna te cuāha ri jniñu jéhnū ndacu ró. Te quivī ró núu cusī ni rō jíin rí. Achí de.

²⁴ Te ni quee mozo jeē ní quihin ĩn mil xūhūn un, te ni cahān de jíin patrón: Je jíin na níhīn jēē téē xeēn cúu ní. Chī cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jēhe ní.

²⁵ Te jeē yúcuan ní yūhu ná, te ni jehēn na ní chīsāhi ná xūhun ní chīji ñuhun. Te yāhá na náçuāha na xūhun ní. Achí de.

²⁶ Te ni cahān patrón jíin de: Mozo cuxí cúu ró te máni jniñu néē sáha ró. Chī jéni ni

rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jēhe ri.

²⁷ Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núu. Achí de jíin i.

²⁸ Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núu mozo névāha uxī mil.

²⁹ Chī ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i.

³⁰ Te mozo yáha jēē tu sájniñu váha, quenehen ró i na quíhīn i nuū quéhe nuū néē. Te yūcuan ndáhyū i te nacayihí yuhu i jeē ndoho xeēn i. Achí patrón un.

Siquī jeē cóo juicio tācá nación

³¹ Te ni cahān gā yā:

ĩn quivī te ndiji máa Yaā ní nduu tēe, te cuu ya Rey nuū ñayuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhnū ya.

³² Te ndutútú ñayuu tācá nación nuū yā. Te sásīn ya i jíjnáhan i, nájnūhun cúsīn lanchi jíin ndixúhú sáha téē ndító ti.

³³ Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá.

³⁴ Yūcuán na te cahān Rey jíin ñayuu cáhīn lado váha ya:

Nacā ndetū rō jeē ni sāha Tátá rī jín ró. Nehen quivícoo ró núū ndácu ró jniñu. Chi nde quiví ní jecōo ñayiví te je ni sātūhva ya nuū ndacu ró jniñu.

35 Chi ni jii rī sōco, te ni cajēhe ro jēē ní yeji rī. Ni jichī rī ndute, te ni cajēhe ró jēē ní jhi ri. Ni quiji ri nde ñuu jicá, te ni cajēhe núú ró vehe ni ndōo ri.

36 Ni cumanī sahma ri, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jín ñayuu cáhiin lado váha ya.

37 Yūcuán na te cahān ñayuu váha un jín yá: ¿Na quiví ní cajito ná níhín jēē jii ní sóco, te ni cajēhe na jēē ní yeji ní, chí jēē jichí ni ndute, te ni cajēhe ná ní jhi ní?

38 ¿Te na quiví ní cajito ná jēē ní quiji ní ndé ñuu jicá, te ni cajēhe núú ná vehe ni ndōo ní, chí jēē cúmanī sahma ní, te ni cajēhe ná?

39 ¿Te na quiví ní cajito ná jēē cuhú ni, chí jēē íne ní vecāa, te ni jecondēhe ná níhín? achi i.

40 Yūcuán na te cahān Rey jín i: Jendaá cahān rī jín ró jēē ná ni casáha ró súcuan jín in tācá hermano rī jeē cácanđije, vēsú ñayuu núu ga cúu i, te nuū maá rí ni casáha ró.

41 Yūcuán na te suni cahān Rey jín ñayuu cáhiin lado jecó yá: Ñayuu jnahnū ndetū cácuu ró. Cujiyo quingoo ró núū ñuhún jeē cayú ní cáni, nuū iyó túhva cone jexeén jín táca

táchī jeē cájejniñu nuū.

42 Chi ni jii rī sōco, te tu ní cajēhe ro jēē cáji rī. Ni jichī rī ndute, te tu ní cajēhe ro jēē coho rī.

43 Ni quiji ri nde ñuu jicá, te tu ní cajēhe núú ró vehe ndōo ri. Ni cumanī sahma ri, te tu ní cajēhe ró. Ni cocuhū rī, ni ine ri vecāa, te tu ní jēcondēhe ró ruhū. Súcuan cahān yā jín ñayuu cáhiin lado jecó yá.

44 Yūcuán na te cahān ñayuu un jín yá: ¿Na quiví ní cajito na níhín jēē jii ní sóco, chí jēē jichí ni ndute, chí jēē ní quiji ní ndé ñuu jicá, chí jēē cúmanī sahma ní, chí jēē cuhú ni, chí jēē íne ní vecāa, te tu ní cajēhe na jēē cúmanī nuū ní? Achi i.

45 Yūcuán na te cahān yā jín i: Jendaá cahān rī jín ró, jeē tu ní casáha ró súcuan jín ni in tācá hermano rī jeē cácanđije, vēsú ñayuu núu ga cúu i. Núu súcuan te suni nuū maá rí cúu jeē tu ní casáha ró, achi yā.

46 Yūcuán na te quingoo ñayuu un núū ndóho i ní cáni. Te ñayuu váha un quivícoo i nuū cótecu i ní cáni. Achi Jesús.

Jeē ní casquíjnáhan de jñuhun jeē jñi de Jesús

(Mr. 14.1-2; Lc. 22.1-2; Jn. 11.45-53)

26

1 Te nuū ní ndihi ni cahān Jesús tāca jñuhun yáha, te ni cahān yā jín téé cáscuáha jín yá:

2 Je cájini rō jeē uū na quiví te coo vico pascua. Te ruhū,

Yaā ní nduu tēe, nastúu i ruhū jeē cúu rī jicā cruz, achí yá.

³ Yūcuán na te sutū cácujuhnu, jíin tēe cástéén tutu ley, jíin táca tēe jéhu jeē cándacu jniñu nuū ñáyuu hebreo, ni candutútú de ini patio vehe palacio maá sūtū cujéhu ga jeē naní Caifás.

⁴ Te ni candajnūhún de ndese jni de Jesús jíin jnúhun stáhú, te cahni de ya.

⁵ Te ni cacahān de:

Ma jní yó de máá quívī vico, chí ndonda ñayuu siquī yō, achí de.

Jnúhun ñahan jeē ní chuhun perfume xinī yā

(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, tēe ni ndoho cuehyī stehyú.

⁷ Te ni quee ñin ñahan nuū yā, ndáhá ña ñin frasco yuū luu jeē ñúhun aceite perfume jeē yóhoyo yahu ndéé. Te ni chuhun ña xinī yā ní ní jéé yéji yā staā.

⁸ Te ni cajito tēe cáscuáha jíin yá, te ni caquitī ni de, te ni cacahān de:

¿Najehē cúu jeē náa saá-ni perfume jiñā?

⁹ Chi cuu xīcō yahu yó núú, te cuāha yo xúhun núú ñáyuu ndahú. Achí de.

¹⁰ Te ni jini Jesús jnúhun cácahān de. Te ni cahān yā jíin de:

¿Naun casáha ró jéé nácani uhū ni ñahan yáha? Chi ñin jniñu váha cúu jeē ni sáha ña jíin rí.

¹¹ Chi ní ní coyūcu ñáyuu ndahú jíin ró, te ruhū chí tuá condee rī jíin ró.

¹² Chi jeē ní chuhun ña perfume yáha ruhū, suu cúu jeē ni sátūhva ña ruhū nde quívī quíndūji ri.

¹³ Jendaá cahān rī jíin ró jeē ní cáhnu ñayīvi ndé-ni cúu nuū cuité jnúhun yáha jéé jnáma ri ñayuu, suni nacani i jnúhun jeē ni sáha ñahan yáha, návāha cocuhun ni ñayuu ña, achí yá.

Jeē ní nastúu Judas yā

(Mr. 14.10-11; Lc. 22.3-6)

¹⁴ Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu.

¹⁵ Te ni cahān de jíin:

¿Nasaa cuāha ní núú ná, te na nastúu ná de nuū ní? achí de.

Te ni cajēhe ocō uxī xúhun plata nuū de.

¹⁶ Yūcuán na te nde quívī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máá quívī jeē quejéé vico jeē cáyeji ñayuu pan jeé tú na levadura yíhi, te ni quiijicoo tēe cáscuáha un núú Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? achí de.

¹⁸ Te ni cahān yā:

Cuángoo nde ñuu, vehe tēe jeé jé ní cacahān yō, te cahān rō jíin de: Achí máá Maestro jeē ní cuyajni quívī cuu yā. Te vijna te caji yā vico pascua ini

vehe ní jín tée cáscuáha jín yá, achi rō. Achí yá.

19 Te tēe cáscuáha jín yá, ni casáha de nájñuhun ni ndacu Jesús jniñu nuū de, te ni casátuhva de jeē cuxíni ya vico pascua.

20 Te jeē cuácuaa, te ni quee yā, te ni cucōo ya mesa jín ndihúxí uū tēe cáscuáha jín yá.

21 Te níni yéji yā jín de te ni cahān yā:

Jendaá cahān rī jín ró jeē ñin rōhó nastúu ruhū vijna, áchí yá.

22 Te ni cacucuíhyá ndasí ni de. Te ná ñin ná ñin de ni cacajñuhún de ya:

¿A sáña cúu? áchí de.

23 Te ni cahān yā:

Ñin rōhó jéē cáyeji cáhnu jín rí ñin cohō, suu ró nastúu ruhū.

24 Te ruhū, Yaā ní nduu tēe, jendaá cúu jeē quihín rī cuu rī, nájñuhun yósó jñuhun rí nuū tútu ñi. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

25 Yūcuán na te ni cahān Judas, tēe nastúu ya:

¿A sáña cúu, Maestro? áchí de.

Te ni cahān yā jín de:

Suu ró cúu, áchí yá.

26 Te níni jéē cáyeji de jín yá, te ni quihin ya pan, te ni nacuatáhú yá, te ni tahu cuéché yá, te ni jēhe ya nuū tēe cáscuáha jín yá. Te ni cahān yā:

Caji rō jijnáhan ró, chí yāha cúu yiquí cúñu rī, áchí yá.

27 Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró.

28 Chí yāha cúu niñi rī jeē cuáha rí jeē cúu contrato jeē, te cati jeē ndundoo cuēchi cuehē ñayuu, te coo jñuhun cáhnu ni nuū cuéchi i.

29 Te cáhān rī jín ró jeē ndé vijna te ma cóho ga rī ndūxi ndehē uva yāhá, chí nde quiji quiví ndacu Tátá rī jniñu ñí ñayiví, te sáa te coho tucu rí jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya (Mr. 14.26-31; Lc. 22.31-34; Jn. 13.36-38)

30 Te ni jita ya ñin yaa ñi jín de jijnáhan de. Te ni quenda ya cuahān yā jín de nde yucu Olivos.

31 Yūcuán na te ni cahān yā: Ndivii rō nayūhu ró jeē siquí ruhū jecuáa vijna. Chí suhva je yósó jñuhun rí nuū tútu ñi, ni cahān Yaā Dios: Cuāha rí jñuhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, áchí.

32 Te jeē nátecu rī, te xīhna ruhū cosñuu rí quihín rī región Galilea, te sáa te najinūcoo ró, áchí yá.

33 Yūcuán na te ni cahān Pedro:

Vēsú ndihí de na náyūhú de, te máa ná chí ma náyūhú cuítē ná, áchí de jín yá.

34 Te ni cahān yā jín de:

Jendaá cahān rī jín ró jeē jecuáa vijna, nde ná tu cana líhli, te yūhu ró jeē jñi ñayuu

rohó, te unī jínu cahān rō jeē tu jíní rō ruhū, achí yá.

35 Te ni cahān Pedro jín yá:

Vēsú núu cuu na jín ní, te ma cahān cuiṭi na jéē tu jíní na níhín, áchí de.

Te suni súcuan ni cacahān ndihí tēe cáscuáha jín yá.

Jeē ni jícān tahú yā nuū huerto Getsemaní

(Mr. 14.32-42; Lc. 22.39-46)

36 Yūcuán na te ni jinū Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī yūcuan cácān tahú rī, achí yá.

37 Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxií ni yā jeē quíji jñūdóho siquī yā.

38 Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jín rí.

39 Te ni jica ya jecu gā, te ni jecuiñi yití yá ni jequin ya nuū yā nuū ññhun, te ni jicān tahú yā suhva nuū Yāā Dios:

Tátá maá ná, núu cuu te tejiyo ní jñūdóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, áchí yá.

40 Yūcuán na te ni ndee yā nuū ndinúni tēe cáscuáha jín yá, te ni jito ya jeē cáquixi de. Te ni cahān yā jín Pedro:

¿A tu ní cánda ró condito ró jín rí vēsú ñn hora?

41 Coó ndito ni rō te cacān tahú rō jeē chindéé ñáhán yá rohó jéē ma sáha ró cuéchi jeē coto ndee jeneé rōhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

42 Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jñūdóho yáha jeē ma ndóho ná, te na cóo jeē cuní maá ní núu súcuan, áchí yá.

43 Te ni ndee tucu ya nuū de, te ni jito ya jeē cáquixi tucu de, chi yōhyo cáji de māhná.

44 Te ni stóo ya de, te cuahān tucu ya cuacacān tahú yā vuelta unī. Te suni jñūhun yūcuan ní cahān yā.

45 Yūcuán na te ni ndee tucu ya nuū de jijnáhan de, te ni cahān yā jín de:

Vijna te cusū rō te ndetātu ró. Te je ni quee hora, te ruhū, Yāā ní nduu tēe, natūu ri te jñi tēe cáhīyo cuéchi ruhū.

46 Ndocuiñi jijnáhan ró, chi je vēji tēe nastūu ruhū, te quihín yō jín de, áchí yá.

Jeē ní cajñi de Jesús

(Mr. 14.43-50; Lc. 22.47-53; Jn. 18.2-11)

47 Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujeñnu jín táca tēe jéñnu cándacu jñiñu nuū ñáyuu hebreo, ni catají tēe ún.

48 Te Judas, tēe nastūu ya ún, je ni jēhe de ñn seña nuū tēe un jijnáhan, chi ni achi de:

Tēe jeē téchūhu rí un cúu. Te jñi ró jíjnáhan ró, áchí de.

49 Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya.

50 Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajñi de Jesús.

51 Te ñn tēe jeē cáhīin jíin Jesús, ni tava de espada de, te ni jehnde de sōho ñn mozo maá sūtū kujéhu ga.

52 Yūcuán na te ni cahān Jesús jíin de:

Nachuvāha espada rō, chi tāca jēē cájejnáhan jíin espada, suni jíin espada cuu.

53 ¿Te á tu cájini rō jeē cuu cacān tahú rī nuū Tatá rī, te vijna ñúhún tají yá víhyá gā uxī uū mil ndajéhé andiví jeē jnama ruhū?

54 Te núu súcuan, ¿te ndese cuu squícu jñūhun cáhán tutu ñi jeē cánuú ndoho rí súcuan? áchí yá.

55 Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yu-jnu jeē jñi ró rúhū jeē súcuan. Tāca quívī ni cucōo rí jíin ró jíjnáhan ró ñni templo cáhnu, ni steén rī jñūhun, te tu ní cájñi ró rúhū.

56 Te súcuan cásaaha ró návāha na squícu jeē cahān tutu ñi jeē ní catee tēe ni canacani jñūhun Yāā Dios, achí yá.

Yūcuán na te ndihī tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujeñhu ga

(Mr. 14.53-65; Lc. 22.54-55, 63-71; Jn. 18.12-14, 19-24)

57 Te tēe ni cajñi Jesús, cuango de jíin yá nuū Caifás, tēe cúu sutū kujéhu ga. Te yūcuan cáhīin tūtú tēe cástéén tutu ley jíin táca tēe jéhu cándacu jniñu.

58 Te Pedro chi jíca-ni ndíquín de ya, te ni jinū de patio sutū kujéhu ga. Te ni quívī de ñni patio, te ni cucōo de jíin táca policía, návāha coto de ndese coo síquī yā.

59 Te sutū cácujeñhu jíin táca tēe jéhu jíin ndihī tēe cásaaha junta kujéhu ga, ni canducú de tēe cahān jñūhun yáá síquī Jesús, chi cahni de ya cácuni de.

60 Te vēsú ni quecoo cuehē ñayuu cácahān yaá, te tu ní cánihīn de cuēchi síquī yā jeē cáhni de ya. Te jeē sándihí te ni quecoo uū testigo jeē cahān yaá síquī yā.

61 Te áchí:

Tēe yáha ní cahān de jeē cuu canu de templo Yāā Dios, te nuū uní-ni quívī te nucondichi sáha de, áchí.

62 Yūcuán na te ni ndocuiñi maá sūtū kujéhu ga, te ni cahān de jíin yá:

¿Naun tu cáhán cuiti rō? ¿A íyó ndáā jeē cácahān tēe yáha síquī rō? Achí de.

63 Te Jesús tu ní cáhán cuiti yā. Te ni cahān maá sūtū kujéhu ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jín yá.

64 Te ni cahān yā:

Suu ri cúu, nájnūhun cáhán rō. Te na cástūhun rí nuū rō jijnáhan ró jeē tāca quívi jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jeē ndíji ri ichi ándiví jín vícō. Achí yá.

65 Yūcuán na te sutū cujéhu ga ni jehnde de sahma de jeē quití ndasí ni de, te ni cahān de:

Tēe yáha chi cáhán de jnūhun ndevāha jeē quití ni Yaā Dios, chi sáha de maá de Sēhe Yaā Dios. ¿Ndé jíní ñúhún gá yō testigo núu súcuan? Chi je ni cajini ró jnūhun ndevāha cáhán de.

66 ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cáhán de súcuan, te jíní ñúhún cuu de, achí.

67 Yūcuán na te ni catesihí de nuū yá, te ni cacani de ya. Te sava ga de ni cacatu de nuū yá.

68 Te ni cacahān de:

Te núu Cristo cúu ró, te cachi rō ndé ñn cúu jeē ní cani rōhó, achí de.

Jeē ní cachi Pedro jeē tu jíní de ya

(Mr. 14.66-72; Lc. 22.56-62; Jn. 18.15-18, 25-27)

69 Te níni jēe súcuan cúu, te Pedro néne de nuū quéhe ini patio. Te ni quee ñn ñahan

jéjníñu vehe ún, te ni cahān ña jín de:

Róhó chi suni ni jica ró jín Jesús tēe Galilea, achí ña.

70 Te maá de tu ní cáchi de, chi ni cahān de ni cajini ndíhi ñayuu:

Tu jíní rī na jnūhun cáhán rō, achí de.

71 Te ni quenda de yéhyí núu quéhe, te ni jito inga ñahan nuū de. Te ni cahān ña jín ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

72 Te inga jínu tu ní cáchi tucu de, chi sa ni cahān teyí de:

Tu jíní rī tēe ún, achí de.

73 Te ni cunúu jecu gā, te ñayuu cáhīn yūcuán ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cáhán rō jeē tēe Galilea cúu ró, achí i.

74 Yūcuán na te ni quejéé de cáhán teyí de jeē na cóndee cuēchi síquí de núu tu cáhán ndaā de:

Tu jíní cuiti rī tēe ún, achí de.

Te ni cana-ni líhli.

75 Te ni nucūhun ni de jnūhun ni cahān Jesús jín de: Nde ná tu cana líhli, te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē cuángoo de jín yá nuū Pilato

(Mr. 15.1; Lc. 23.1-2; Jn. 18.28-32)

27

¹ Yūcuán na te ni cundi-jin. Te tāca sūtū cácujuhnu jíin táca téé jéhu jeē cándacu jniñu nuū ñayuu hebreo, ni casquijnáhan de jnūhun ndese sáha de jeē cuu Jesús.

² Te ni cajihni de ya, te cuango de jíin yá nuū Poncio Pilato, téé cúu gobernador.

Jeē ni jīhī Judas

³ Yūcuán na te Judas, téé ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacuāha de ocō uxī xūhun plata jeē ní níhīn de nuū sutú cácujuhnu jíin núu tāca téé jéhu.

⁴ Te ni cahān de jíin:

Cuēchi ni sáha ná jēē ní nastúu ná ĩn téé cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scāne Judas xūhún un ĩni templo. Te ni quenda de cuahān de, te ni scuéhne de máá de.

⁶ Te sutū cácujuhnu ni canastútú de xūhún un, te ni cacahān de:

Ma cúu chuhun yó xūhun yáha ĩni yejnū nuū cásocō ñayuu, chí xūhun jēē ní jéconañ jeē cúu ĩn téé cúu, achí de.

⁷ Yūcuán na te ni casándaā de jeē xūhun yúcuān cuān de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá.

⁸ Jeē yúcuān cúu jeē ndé vijna naní ñuhun ún Lugar Ñuhun Niñī.

⁹ Te sūcuān ni squícu jnūhun ni cahān Jeremías, téé ni nacani jnūhun Yaā Dios nde jenahān: Ni caquihin de ndihócó uxī xūhun plata, te sūcuān-ni cúu ĩn yāhu jeē ní casáha ñayuu Israel cuenta jeē ndeé yā nuū i.

¹⁰ Te jíin xūhun un ní cajeen de ñuhun quíxin, nájñuhun ni ndacu máá Jítoho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, téé cúu Pilato, te ni cajñuhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhán rō.

¹² Te sutū cácujuhnu jíin téé jéhu cándacu jniñu, ni cacahān de cuēchi siquī yā. Te tú na vé ni cáhán cuítī yā.

¹³ Yūcuán na te ni cahān Pilato jíin yá:

¿A tu jíni ró jēē cacahān de cuehē cuēchi siquī rō? achí de.

¹⁴ Te tu ní cáhán cuítī yā ni ĩn jnūhun jíin de. Te nahán ní naa ni gobernador jeē tú na vé ni cáhán yā jíin de.

Jeē ní cundaā jeē cúu yā
(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siáá de ĩn téé ĩne vecāa, núu na-ni téé cácuñi ñayuu.

16 Te suu quivī un íyó ñn tēe íne vecāa, nání de Barrabás, te je ni jītē núu jñūhun jeē ní sáha de cuēchi xeēn.

17 Te nuū ní candutútú ñayuu, te ni cahān Pilato jíin i:

¿Ndé tēe cáculi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

18 Súcuān ni cahān de chí cúní de siaá de Jesús. Chí je ni jecūhun ni de jeē ní cacucuésun ni táca sūtū un cájito de ya, te jeē yúcuān ní quijicoo jíin yá nuū de.

19 Te níni jēē néne Pilato silla nuū sándaā de jñiñu, te ñasihí de ni tají ña jñūhun nuū de: Ma quívī nduu rō jíin ñáyuu siquī tēe ndaā jíñā, chí yōhyo ni siūhu jéni ruhū cuni jeē siquí de, achí ña.

20 Te sutū cáculjéñu jíin táca tēe jéñu, ni cascáhán de ñayuu jeē na cácul i jeē siaá de Barrabás, te na cúu Jesús.

21 Yūcuān na te ni cajñūhún tucu gobernador:

Jeē uú de, ¿ndé ñn de cáculi rō jeē siaá rī? achí de.

Te ni cacahān i:

Siaá ni Barrabás, achí i.

22 Te ni cajñūhún Pilato:

Núu súcuān te ¿ndese cáculi rō jeē sáha rī jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, achí i.

23 Yūcuān na te ni cahān Pilato:

¿Na cuēchi ni sáha de núu súcuān? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

24 Te ni jini Pilato jeē tu cúndeyí de jíin ñáyuu, chí sa víhyá gā cáculvaā i. Te ni ndacu de jñiñu jeē na quíji ndute, te ni nandahá de nuū ñáyuu cuehé ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá ró jíin náhan ró na cóndee. Achí de.

25 Te ni cacahān ndihi ñayuu:

Suu siquī maá ná jíin síquī séhe ná na cóndee cuēchi jeē cúu de, achí i.

26 Yūcuān na te ni siaá de Barrabás. Te ni ndacu de jñiñu jeē na cáculi táca soldado un Jesús, jíin jēē cáca caa de ya jicā cruz.

27 Yūcuān na te soldado un cuangoo de jíin Jesús íni palacio. Te ni cacana de ndihi jñáhan de ni candutútú núu yā.

28 Te ni caquenehen de sahma ya, te ni cachuhun de ya ñn sahma cuehé jeē cúu sahma rey.

29 Te ni casáha de ñn corona íñu, ni cachuhun de xinī yā. Te ni cachihí de ndaha vāha ya ñn yujnu jeē náññūhun bastón. Te ni casácatā de nuū yā, chí ni cajecuiñī yití de, casáha de jeē chíñūhún de ya.

Nacā jeē vāha rey cúu Rey ñayuu hebreo, achí de.

30 Te ni catesihí de nuū yā. Te ni caquihin de yujnu jeē ní cachihí de ndaha ya, te ni cacani de xinī yā.

31 Te nuū ní cuu ni casácatā de nuū yā, te ni catava

de sahma cuehé un, te ni canachuhun de ya sahma máá yá. Te cuangoo de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

32 Te nuū ní quendacoo soldado un jíin yá, te ni canajnáhan de jíin ñn tēe ñuu Cirene, naní de Simón. Te ni catejniñu de tēe un jéē cóndiso de cruz yā.

33 Te ni jinūcoo de ñn lugar nuū naní Gólgota, jeē cuní cahān Lugar Yiquí Xíní.

34 Te ni cajēhe de vino jeē ni sácā núu jíin ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

35 Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñn ñn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñn ñn de sahma ri, achi yā, achí tutu.

36 Yūcuán na te ni cacucōo de yūcuan jéē cóto de nde cuu yā.

37 Te ni catee de ñn jnūhun xinī cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

38 Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá.

39 Te ñayuu cáyāha yūcuan cáscuicó i xinī i, te cacahān neé i:

40 Róhó chi cáhán rō jeē cánu rō templo cáhnu, te nuū

uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

41 Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhnú jíjnáhan de, suni súcuan ni cacahān catá de, te áchí de cacahān máá de:

42 Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de.

43 Ni candíje de Yaā Dios, te na jnáma ya de vijna te núu cúndáhú ni yā de, chi ni cahān de jeē cúu de Sēhe ya. Achí de jíjnáhan de.

44 Te tēe cuíhná jeē cándita caa xiin ya, suni súcuan ni cacahān neé de.

Jeē ní jíhī Jesús

(Mr. 15.33-41; Lc. 23.44-49; Jn. 19.28-30)

45 Te nuū ní cuu cahuxī uū, te ni cunee ní cáhnu nde cahunī.

46 Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios máá ná, Yaā Dios máá ná, ¿naun ni stóo ní sáña?

47 Te sava ñayuu cáhīn yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, áchí i.

48 Te ni jinu-ni ñn tēe, ni jequihin de ñn cachī, te ni chundaji de nuū vinagre iyá.

Te ni tee de xinī ñn yujnu, te ni tee de yuhu ya jeē coho ya.

49 Te sava ga de ni cacahān:

Condetu ró, na cóndēhe yó núu quiji Elías jnama de chí tuú, áchí de.

50 Te Jesús ni cana jee ya inga jínu, te ni jihī-ni ya.

51 Te sahma ndíta caa jeē ndihyú cuarto iī ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto.

52 Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i.

53 Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñnu iī Jerusalén, te cuehē ñayuu ni cajito nuū i.

54 Te ná ni jihī Jesús, te tēe cúu capitán jíin tēe cáhīin jíin de jeē cándito de nde cuu yā, ni cajini de jeē ni jnāa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

55 Te yūcuan cáhīin cuehē ñahan, cándēhe jíca ña. Te suu ñahan un ní candiquīn ña Jesús nde Galilea, vējicoo ña cájejnīñu ña nuū yā.

56 Te unī ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

57 Te nuū ní ini quivī ún, te ni quee ñn tēe cúca, nání de José, te tēe ñuu Arimatea cúu

de. Te suni tēe ni scuáha jíin Jesús cúu de.

58 Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de.

59 Te José ni quihin de yiqui cúñu yā, te ni chusúcún de ñn sahma cuitá íyó ndoo.

60 Te névāha de ñn yaū jeē ní caan jeē jíca ñn cava, nuū ná tu quindūji ndīyi. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de.

61 Te María ñuu Magdala, jíin inga María, cáyúcú ña ichi núu nuū yíndūji ya.

Jeē ní cacondito soldado nuū yíndūji ya

62 Te ni cuu tācá jniñu yáha máa quivī jeē casátūhva ñayuu jeē quiji quivī ndétātú. Yūcuán na te ni cundijin maá quivī ndétātú. Te sutū cácujeñnu jíin tēe grupo fariseo ni jengoo de nuū Pilato.

63 Te ni cacahān de: Cánucūhun ni na jēe nde na técu tēe stáhú néé un te ni cahān de jeē nátecu de nuū uní quivī.

64 Núu súcuan te ndacu ní jniñu na cóto vāha tācá soldado yuhu yáú un nde núu ni yāha unī quivī. Chi núu tuú te sanaa te quijicoo tēe ni cascuáha jíin de, te tava cuīhná de ndīyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñūhún. Achí de.

65 Te ni cahān Pilato:

Yāha cáhīyo soldado. Cuángoo jíin de, te sácutu váha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutu de yuū jeē ndihyú yuhu yáú nuū yíndūji ya, te ni castūn nīhin de. Te ni castóo de tācá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondēhé ña nuū ní yíndūji Jesús.

² Yūcuán na te ñin sanaa-ni te ni jnāa nīhin ndasí. Chi ñin ndajéhé maá Jítóho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stáa ya yuū ndihyú yuhu yáú un, te ni cucōo ya siquī.

³ Te ndíndēe núū yā nájnūhun taja, te sahma ñūhun ya yaa quiyi nájnūhun yuhvā volcán.

⁴ Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de.

⁵ Te ni cahān ndajéhé jíin ndíndúú ñahan ún:

Ma yūhu ró, chi jíiní rī jeē vécondēhe ró Jesús, Yaā ni jíhī jicā cruz.

⁶ Tuá yā yāhá, chi je ni natecu yā, nájnūhun ni cahān yā. Nehen condēhe ró nuū ní cachíndūji de ya.

⁷ Te yachī quingoo ró, te cachi rō nuū tēe cáscuáha jíin yá jeē ní natecu yā. Te xīhna gā maá yá jinū Galilea, te sáá te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yíndūji ya, te yachī cuangoo ña. Te cáyūhú ña, te suni yōhyo cácusī ñi ña. Te ni cajinu ña cuacastūhún ña nuū tēe cáscuáha jíin yá.

⁹ Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñūhún ña ya.

¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu.

¹² Te sutū cácujuhnu ni candutútú de nuū táca tēe jehnu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núū soldado jijnáhan.

¹³ Te ni cacahān de jíin:

Cahān rō jijnáhan ró jēe tēe cáscuáha jíin de ni quijicoo jecuáa, te ni catava cuñna ndīyí un níni cáquixī rō, achí rō.

¹⁴ Te núu na cúni gobernador jnūhun yáha, te máá rí quiscahán rī de, návāha tú nihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájñūhun ni cacahān jīn de. Te nde vijna chi súcuan cácahān ñayuu hebreo nájñūhun ni cacahān soldado un.

Jeē ní tejnīñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de.

¹⁷ Te nuū ní cajito de nuū yā, te ni cachiñúhún de ya. Te sava de tu cácaandíje vāha de jeē maá yá cúu.

¹⁸ Te ni quee ya nde nuū de, ni cahān yā jīn de:

Je ni jēhe Tátá rī ndihi poder nuū rī jeē ndácu ri jniñu andiví jīn ñáyiví.

¹⁹ Núu súcuan te cuángoo nuū ñayuu tācá nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máá Tátá jīn Séhe jīn Espíritu Santo.

²⁰ Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jīn ró ní cáni nde quiví jīnu ñáyiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute
(Mt. 3.1-12; Lc. 3.1-9,
15-17; Jn. 1.19-28)

¹ Yāha quéjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jín Cristo.

³ Te tēe ún cana jee de nde nuū ñūhun téhé:

Sátūhva ró máá ró jijnáhan ró, chí quee maá Jítoho yō.

Te sáha ró jniñu ndaā, chí vēji ya, achi de.

Achí Isaías.

⁴ Te Juan ni jinū de nde nuū ñūhun téhé, scuándute de ñayuu. Te cáhán de jín i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i.

⁵ Te tāca ñáyuu región Judea jín ñáyuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁶ Te sahna ñūhun Juan cúu ixi camello, te núhni ñn cinturón ññ chíji de. Te jeē técu de cúu tīca ndicuéhyí jín ndúxi yocō.

⁷ Te suhva ni nacani de jnūhun:

Quiji máá Yaā cujéhnu ndasí. Chí tú na vé jéhnu cuiti cúu ri nuū yā, ni jeē cuajniñu ri nuū yā vésú ñn jniñu lúli gá nájñuhun jeē cuíta ndeyi ri ndají rí correa ndijēn yā.

⁸ Te ruhū chí jín ndute scuándute ri rohó jijnáhan ró, te Yaā ún chí nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quivī, te Jesús ni quenda ya ñuu Nazaret ndañū Galilea, te Juan ni scuándute de ya ini yūte Jordán.

¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xinī yā, te cáa nájñuhun ñn paloma.

¹¹ Te ichi ándiví ní cahān ñn jnūhun:

Máá ró cúu Sēhe ri jeē maní ndasí rí jín, te yōhoyo cúsiñ ni rí jín ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñūhun téhé ní sáha Espíritu Santo.

¹³ Te uū xico quivī ni condee yā nuū ñūhun téhé un núu ím quiti yúcú. Te ni jito ndee Satanás yā, chí cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

14 Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu.

15 Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jíjnāhan ró, te candíje ró jnūhun jeē jnáma ya rohó. Achí yá.

Jeē ní cana ya cuūn tēe jniñ chācá

(Mt. 4.18-22; Lc. 5.1-11)

16 Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájni chācá cácuu de, te cásinga de ñunu de ini mar.

17 Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, achí yá.

18 Yūcuán na te ni castóo-ni de ñunu de, te ni candiquīn de ya.

19 Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyūcú de ini barco de, cánachijnī de ñunu de.

20 Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jíin mozo de, te ni candiquīn de ya cuangoo de.

Jeē ní quenehen ya tachī ini ñn tēe

(Lc. 4.31-37)

21 Te ni jinū yā jíin de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnūhun.

22 Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jniñu siquī ndíhi. Te tēe cástéén tutu ley Yaā Dios, tu súcuan cástéén de.

23 Te ini vehe iī sinagoga ñuu un íne ñn tēe jeē ñūhun tachī ini. Te ni cana cóhó de:

24 ¿Naun vēji ní núu na jíjnāhan ná, Jesús ñuu Nazaret? ¿A vēji ní jéē snāā ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jíin táchī ún:

Casi yuhu ró te quenda ró ini de, achí yá.

26 Te tachī ún xeēn ni jehni yihí tēe ún. Te ni cana cóhó, te ni quenda ini de cuahān.

27 Te ndíhi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñn jnūhun jéé cúu jeē yáha? Chi tēe yáha cújéhu de jeē ndácu de jniñu nde nuū tachī te quéndacoo, achí i.

28 Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chísó Simón Pedro

(Mt. 8.14-15; Lc. 4.38-39)

29 Te ni quenda ya jíin de jíjnāhan de ini vehe iī sinagoga. Te Jesús ni jehēn yā

jiín Jacobo jiín Juan nde vehe Simón jiín Andrés.

³⁰ Te náná chíso Simón, catú ña yíhi quíji ña. Te ni castühún de nuū yā jeē cuhú ña.

³¹ Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

³² Te ni quēe niāndii te ni cuaa. Te ni quecoo ñayuu jiín táca ñáyuu cácuñu jíin jéé ñúhun tachī ini.

³³ Te táca ñáyuu ñuu un ní cacutútú i yéhyí un.

³⁴ Te ni nasávāha ya cuehē ñayuu cácuñu tijni nuū cuehyí, te ni quenehen ya cuehē tachī un cuángoo. Te tachī chí je cájini un yá, te tu ní jéhe ya jñuhun jeē cástühun ndé ñi cúa ya.

Jeē ní nacani ya jñuhun región Galilea

(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sñin ya yatā ñúu nuū tú ñayuu, te yūcuán ní jicān tahú yā.

³⁶ Te Simón jiín téé cáhñin jíin de, ni jenanducú de ya.

³⁷ Te ni cananihñin de ya, te ni cacahān de jíin yá:

Tāca ñáyuu cánanducú i níhñin, áchí de.

³⁸ Te máá yá ni cahān yā:

Sa suhva na quíhñin yō tāca gā ñuu íne yajni, návāha suni

nacani ri jñuhun nuū i, chí jeē yūcuán ní quee rī. Achí yá.

³⁹ Te súcuán te ni jica cuu ya ní región Galilea, ni nacani ya jñuhun ini vehe ñi sinagoga táca ñuu, te ni quenehen ya tachī ini ñayuu.

Jeē ní nasávāha ya ñi tēe ndóho cuehyí stehyú

(Mt. 8.1-4; Lc. 5.12-16)

⁴⁰ Te ñi tēe ndóho cuehyí stehyú, ni quee de ni jecuiñi yití de nuū yā, te ni cahān de jíin yá:

Jíni na jeē cuu sáha ní jéé nduvāha ná, te núu cúní ni, áchí de.

⁴¹ Te Jesús ni cundáhú ni yā de, te ni soó yá ndaha ya siquí de, te ni cahān yā:

Cúní rī. Te na ndúvāha ró, áchí yá.

⁴² Te ná ni cahān yā súcuán, te ni nduvāha-ni tēe ndóho cuehyí stehyú un.

⁴³ Yūcuán na te nátaji yá de quinuhun de, te ni cahān níhñin ya jíin de:

⁴⁴ Ma cáchi cuiñi rō nuū ní ñi. Chí quisteén rō maá ró nuū sutú, te condahá ró jeē socó rō nuū Yaā Dios siquí jeē ndúndoo ró núu yā, nájñuhun ni ndacu Moisés jñiñu jenahán. Te súcuán te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejéé de nácani de jñuhun nuū ndiñi ñayuu ndese ni nduvāha de. Te siquí yūcuán tuá ni cúu quívi Jesús táca ñuu, chí cúchitú ndasí ñáyuu nuū yā. Te ni jica ya yatā táca ñuu nuū tu cúchitú

ñáyuu. Te tāca lado ni quijicoo ñayuu nuū yā.

Jeē ní nasávāha ya ñn tēe ndóho cuehyī ni íjin
(Mt. 9.1-8; Lc. 5.17-26)

2

1 Te ni cuu jecu quivī, te ni quivī tucu Jesús ñuu Capernaum. Te ni cajini ñayuu jeē néne ya vehe.

2 Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jñuhun Yaā Dios nuū i.

3 Yūcuán na te ni quecoo cuūn tēe nuū yā, cándiso de ñn tēe ndóho cuehyī ni íjin.

4 Te tu ní cúu quivícoo de nuū yā siquī jeē chitú ñáyuu. Te ni cacao de siquī véhe, te ni canune de ndaā nuū ín ya, te yaū un ní cascúun de tēe cúhú, catú de nuū ñn camilla.

5 Te ni jini Jesús jeē cácanđe de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

6 Te yūcuan cáyūcú jecu tēe cástéen tutu ley Yaā Dios, te tēe un ní cajeni ni de siquī yā:

7 ¿Naun cáhán tēe yáha súcuan? Cáhán de jñuhun ndevāha jeē quití ni Yaā Dios, chi nasūu Yáā Dios cúu de jeē cóne cáhnu ni de nuū cuéchi.

8 Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī?

9 Jeē uú jñuhun yáha, ¿ndé ñn yí gá cáa? ¿A jéē cahán rī jíin tēe cúhú: Je íne cáhnu

ni rī nuū tāca cuéchi ró? ¿Chí yí gá jeē cahān rī: Ndocuiñī te naquihin ró camilla rō, te caca ró, achi rī?

10 Te vijna te na stéén rī jeē maá rí, Yaā ní nduu tēe, ndíso jníñu rī ini ñayivī yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

11 Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

12 Yūcuán na te ni ndocuiñī-ni tēe ún, te ni naquihin de camilla de, te ni quenda de cuahān de, jító jínúu ndihi ñayuu. Te ndivii i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cuiti yō ni ñn jniñu súcuan, áchí i.

Jeē ní cana ya Leví
(Mt. 9.9-13; Lc. 5.27-32)

13 Te ni quenda tucu ya cuahān yā nde yumar. Te tāca ñáyuu ni jinūcoo i nuū yā, te ni steén yā jñuhun nuū i.

14 Yūcuán na te ni yáha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquin ruhū na quíhín yō.

Te ni ndocuiñī de, te cuahān de jíin yá.

15 Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaaha cuéchi, suni cáyūcú de cáyeji de staā jíin Jesús jíin tēe cáscuáha

jiín yá, chi iyó cuéhē de jeē cándiquīn de ya.

¹⁶ Te tēe cástéén tutu ley Yaā Dios jiín tēe grupo fariseo, ni cajito de jeē yéji yā staā jiín ndihi tāca tēe ún. Te ni cacahān de jiín tēe cáscuáha jiín yá:

¿Naun yéji maestro rō jiín tēe cástútú xúhun renta jiín inga tēe cása ha cuēchi? áchí de.

¹⁷ Te ni jini Jesús, te ni cahān yā jiín de:

Ñayuu cáhīyo váha, tu jini ñúhún i tēe tájna, chi ñayuu cácu hū cúu jeē jini ñúhún. Te ruhū nasūu jēe véji ri cana ri ñayuu tú cuēchi, jeē cúu i nájnūhun ñayuu cáhīyo vāha. Chi sa suhva vēji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

Jeē ní cacajñūhún de ya siquī jeē cóndite ni

(Mt. 9.14-17; Lc. 5.33-39)

¹⁸ Te ni cuu ñin quivī jeē cáhīyo ndite ni tēe cáscuáha jiín Juan, jiín tēe cáscuáha jiín grupo fariseo. Te ni quecoo jecu tēe, ni cacahān de jiín Jesús:

Tēe cáscuáha jiín Juan jiín jēe cascuáha jiín grupo fariseo, tijni jínu cáhīyo ndite ni de. Te tēe cáscuáha jiín máa ní, ¿naun tu cása ha de súcuan?

¹⁹ Te ni cahān Jesús jiín de:

¿A cuu condite ni de níni jēe iyó rí jiín de? ¿A cuu condite ni ñayuu cáhīn vico nándāha, te núu níni néne tēe nándāha? Chi núu néne tēe nándāha, te ma cúu condite ni i.

²⁰ Te quee quivī jeē cújiyo tēe nándāha, te quivī ún chi condite ni i.

²¹ Te ni cahān yā uū jnūhun yátá síquī jeē tu quijnáhan jnūhun jeē jēe steén yā jiín táca jnūhun jenahán. Achí yá:

Ni ñin tu náchuhun ñin pedazo sahma jēe núu ñin sahma túhú. Chi núu súcuan te ndiyi pedazo jeē un, te tahndē gā jeē tuhú un, te nducáhnū ga nuū catáhnde un.

²² Te suni tu cáchuhun vino jeē ini ñi túhú. Chi núu súcuan te vino jeē un ndatá ñi ún, te naa vino jiín ñi. Jeē yúcuan cánuú jēe chúhun i vino jeē ini ñi jēe.

Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

²³ Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jiín yá, cájica de cuahān de, te ni quejé de cátaxín de yoco trigo cáyeji de.

²⁴ Yūcuán na te tēe grupo fariseo ni cacahān de jiín yá:

Condéhé. ¿Najehē casáha tēe cáscuáha jiín ró súcuan? Chi áchí ley Moisés jeē ma cúu sáha yó ni ñin jniñu quivī ndétátú. Achí de.

²⁵ Te ni cahān maá yá jiín de:

¿A tu ní cácahu cuiti rō tutu ndese ni sáha David, ñin quivī ní cumanī jeē cáji de, te ni jii de sōco jiín tēe cáhīn jiín de?

²⁶ Te ni quivī de ini vehe Yaā Dios. Te Abiatar ni cuu sutú cujéhnū ga. Te ni yeji de pan ñi jeē yosó ndijin nuū Yaā Dios. Te tú na ley jeē cáji ni ñin tēe,

chi máá-ni sutū cuu caji. Te suni ni jēhe de ni cayejī tēe cáhīin jín de. Te tú na cuēchi ní íyo siquī de. Achí yá.

27 Te suni ni cahān yā jín de jíjnāhan de:

Tu ní jéconā ñayuu jeē ndóho i nuū quivī ndétátú, chi ni jeconā quivī un jéē ndétátú i.

28 Núu súcuan te ruhū, Yāā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mt. 12.9-14; Lc. 6.6-11)

3

1 Te ni quivī tucu Jesús ini vehe i sinagoga. Te yúcuan ine ñin tēe ni ichī ñin ndaha de.

2 Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi siquī yá.

3 Yūcuán na te ni cahān yā jíin tēe ni ichī ndaha ún:

Ndocuñī te condichi rō mēñu yáha, áchí yá.

4 Te ni cajñuhun yá de jíjnāhan de:

¿Ndesé cáhán ley siquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéē cúu i? áchí yá.

Te máá de tú na vé ni cacahān de.

5 Te ni quitī ni yā ni jito ya nuū de jíjnāhan de, te ni cucuíhyá ni yā jeē níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de.

6 Yūcuán na te ni quenda-coo tēe grupo fariseo, te ni casquijnāhan de jñuhun jíin tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

7 Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquīn i ya.

8 Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñuhun i jniñu jéhnu ni sáha ya, te ni quecoo i nuū yá.

9 Te ni cahān yā jíin tēe cáscuáha jíin yá jeē na cóo tūhva ñin barco quivī ya, návāha ma chítú níhin ñayuu cuehē ún xiin ya.

10 Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyī, te chítú níhin i xiin ya jeē quehé i ya cácuni i.

11 Te ñayuu cáñuhun tachī ini, núu ni cajito nuū yā, te cájecuñī yití núu yā, te cácana cóho:

Máá ní cúu Sēhe Yāā Dios, achí.

12 Te ni ndacu níhin ya nuū tachí un jéē ma cáhán gā jeē cúu ya Sēhe Yāā Dios.

Jeē ní nacāji ya uxī uū tēe apóstol

(Mt. 10.1-4; Lc. 6.12-16)

13 Yūcuán na te ni caa ya cuahān yā ñn yucu. Te ni cana ya tāca tēe jeē cuní maá yá caca jíin yá, te ni quecoo de nuū yā.

14 Te ni jeni ya uxī uū de jeē cuñi de jíin yá, te taji yá de quingoo de nacani de jñūhun.

15 Te ni sáha ya jeē cóndiso jñiñu de nasávāha de ñayuu cuhú te quenehen de tachī ini ñayuu.

16 Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro.

17 Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jñūhun, nájñūhun yíhi fuerza taja.

18 Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

19 jíin Judas Iscariote, tēe jeē ní nastúu de ya.

Jeē ní cacahān ñayuu jeē jeniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quívi ya ñn vehe jíin tēe cáscuáha jíin yá un.

20 Te ni ndutútú tuçu cuehē ñayuu, te ni tuá ni cúu caji yā staā jíin de.

21 Te tāca jñáhan vehe ya ni cajini jñūhun jeē súcuan cúu. Te ni quecoo de venūquihin de ya. Chi cácahān de jeē ní sana xinī yā.

22 Te suni tēe cástéén tutu ley Yaā Dios jeē ní quijicoo

nde ñuu Jerusalén, ni cacahān de:

Tēe yáha ñūhun Satanás ini de, jeē cujéhnū nuū tachí. Te jíin fuerza un quénehen de tachí, achí de.

23 Te ni cana ya de jíináhan de, te ni cahān yā ñn jñūhun yátá jíin de:

¿Nde se cuu quenehen Satanás maá?

24 Chi núu ñn nación sásñn máá te cuajnáhan máá, nación un má cúu ga coyūcu cáhnu.

25 Te núu ñayuu ñn vehe sásñn máá te cuajnáhan máá, ñayuu un má cúu ga coyūcu cáhnu.

26 Te suni súcuan Satanás jíin jñáhan tachí, chi núu sásñn máá te cuajnáhan máá, núu súcuan te ma cóo ga, chi sa suhva naa.

27 Te ni ñn tēe ma cúu quívi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen rī tachí.

28 Te jendaá cahán rī jíin ró jeē iyó modo coo jñūhun cáhnu ni nuū tāca cuéchi cásaáha ñayuu, te suni nuū tāca jñūhun néé cácahān i.

29 Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, achí yá.

30 Súcuan ni cahān yā, chi ni cacahān i jeē quénehen ya tachí jíin fuerza Satanás.

Naná yā jíin ñani yā
(Mt. 12.46-50; Lc. 8.19-21)

31 Yūcuán na te ni quee naná yā jín táca ñani yā. Te ín ña nuū quehe, te ni tají ña jñuhun cuahān nuū yā jeē cána ña ya.

32 Te ñayuu cáyūcu nǎ xiin ya, ni cacahān i jín yá:

Náná ni jín táca ñani ni cáhīn nuū quehe, te cácuni cahān jín ní, áchí i.

33 Te ni cahān maá yá:

¿Ndé ñn cúu náná rī jín ñani rī? achí yá.

34 Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jín ñani rī cácuu tāca ñayuu yáha.

35 Chi tāca ñayuu casquícú jniñu cúní Yaā Dios, suu cácuu ñani rī, cuāha rī, náná rī, achí yá.

Jñuhun yátá síquī tē jéte trigo

(Mt. 13.1-9; Lc. 8.4-8)

4

1 Te yumar ni quejéé tucu Jesús steén yā jñuhun. Te ni cutútú cuéhē ndasí ñayuu nuū yā, te jeē yúcuan ní quívi ya ni cucōo ya ini ñn barco nuū mar. Te tāca ñayuu un cáyūcú i yumar.

2 Te jín jñuhun yátá ni steén yā cuehē jñuhun nuū i, te súcuan ni cahān yā:

3 Cuni nahín jínáhan ró: ñn tē cate trigo, ni quenda de jeē cate de.

4 Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tī.

5 Te jecu gā trigo ni jité nuū ñuhun yuū, nuū tú cuehē

ñuhun. Te yachī-ni ni cane, chí tu cóquin ñuhun.

6 Te nuū ní cane niāndii, te ni ichī-ni, te ni casun, chí tu ní níhín nuū quihín yoho.

7 Te jecu gā trigo ni jité nuū náne iñu. Te ni jehnu iñu ún, te ni jesi nuū, te tu ní jéhe nunī.

8 Te jecu ni jité nuū ñuhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ñn ñn nunī, te sava ga ni jéhe unī xico, te sava ga ni jéhe ciento. Achí yá.

9 Yūcuán na te ni cahān yā jín de:

Tāca rōhó jéé jini sōho, na chúsóhó ró. Achí yá.

Najehē cahán yā máni jñuhun yátá

(Mt. 13.10-17; Lc. 8.9-10)

10 Yūcuán na te ni quendōo máa na yā, jín ndihúxí uū tē cáscuáha jín yá, jín jecu gā ñayuu cáhīn jín de. Te ni cacajñuhún de ya na vé cuni cahān jñuhun yátá un.

11 Te ni cahān yā jín de:

Róhó, chí sáha Yaā Dios jeē cájecūhun ni rō jñuhun ni yisáhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīn sñn síquī, chí máni jín jñuhun yátá cahán rī tāca jñuhun jín i.

12 Súcuan cáhán rī návāha vésú cájito i, te quendōo i nájñuhun jeē tú na vé ni cájito i. Te vésú cájini sōho i, te ma jécūhun ni i, te ma násāma ini i quívicoo i nuū rī, te ma cóo jñuhun cáhnu ni nuū cuéchi i, áchí yá.

*Jeē ní castūhun cáji yá
jnūhun yátá tēe jéte trigo*

(Mt. 13.18-23; Lc. 8.11-15)

13 Te ni cahān gā yā jíin de
jíjnāhan de:

Núu tu cájecūhun ni rō
jnūhun yátá yáha, ¿te ndese
jecūhun ni rō tāca gá jnūhun
yátá núu súcuan?

14 Tēe jéte trigo cúu tēe
scuíté núu jnūhun Yaā Dios.

15 Te trigo jeē ni jítē yuhíchi
cúu nájñūhun ánuá sava
ñayuu. Chi cájini nahín i
jnūhun ya, te ná ni cajini i, te
quíji-ni Satanás te quénde-ni
jnūhun ini anuá i.

16 Te trigo jeē ni jítē nuū
ñūhun yuū, chi cúu nájñūhun
ánuá sava ñayuu cájini nahín
jnūhun, te yachī-ni cájetáhú i
te cácusī ni i jíin.

17 Te tu cúcutú jnūhun ún
ini anuá i, te jecu-ni quivī
cájetáhú i. Te núu ni quejéé
jnúndóho, chí jíto xeēn ñayuu
i síquī jnūhun ún, te quéjéé
nácani yátá ni i.

18 Te jeē ni jítē nuū náne iñu
cúu nájñūhun jecu gā ñayuu.
Chi vēsú ni cajini sōho i,

19 te cándihvī ni i síquī jeē
iyó ini ñayivī yáha. Te cácuni
i cucúcá i, te stáhú un i jeē
cutóo ni i síquī tācá ndajñīñu.
Te ndihi jeē yáha cácuñéñu i
jíin, te jési nuū jnūhun ya, te tu
íje i jíin jnūhun ya.

20 Te trigo jeē ni jítē nuū
ñūhun váha cúu nájñūhun
ñayuu cájini nahín jnūhun,
te cájetáhú i, te cáhije i jíin
jnūhun ya. Te sava i cúu
nájñūhun nunījeē jéhe ocō uxī
jeē ñin ñin, te sava i jéhe unī

xico, te sava ga i jéhe ciento.
Achí yá.

*Jnūhun yátá síquī lámpara
(Lc. 8.16-18)*

21 Suni ni cahān yā jíin de:

Núu nástīn ñayuu ñin
lámpara, ¿a chūne i chíji ñin
cajón chí chíji jíto? Tuú,
chí jéni i nuū sucún návāha
cundijin.

22 Te suni súcuan, tu iyó ni
ñin jnūhun sáhi jeē ma cúni
ñayuu, chí ndihi tāca jnūhun
natūu ndijin te cuni ñayuu.

23 Tāca róhó jéē jíni sōho, na
chúsóhó ró, achí yá.

24 Te suni ni cahān yā jíin i:

Cuni sōho váha ró. Chi
cūhva jeē chusóhó ró jnūhun
Yaā Dios, suni cūhva un cuáha
ya nuū rō, te víhyá gā cuāha
ya nuū maá ró jeē chusóhó
váha ró.

25 Chi ñayuu je jécūhun ni,
stéén gā yā nuū i. Te ñayuu tu
cándíje, máá jecu jeē jíni i ún,
sa suhva naa. Achí yá.

*Jnūhun yátá síquī trigo jeē
jéhnu*

26 Te ni cahān gā yā:

Súcuan cúu jeē ndácu Yaā
Dios jniñu nuū ñáyuu: Cúu
nájñūhun trigo jeē ní jete ñin
tēe.

27 Yūcuán na te quíxí de te
ndónnda de, te súcuan jíca quivī
cuahān. Te trigo un cáne te
jéhnu. Te máá de tu jíni de
ndese cúu jeē jéhnu.

28 Chi máá ñuhun sáha jeē
jéhnu trigo, xīhna gā yucū, sáá
te cáne yoco, yūcuán na te íje
máá núnī.

29 Te núu ni cuaan trigo un,
te quéjéé ñayuu cájehnde i, chí

je ni jinū quivī tahndé. Achí yá.

Jnūhun yátá síquī ndiquin mostaza

(Mt. 13.31-32; Lc. 13.18-19)

³⁰ Te suni ni cahān yā:

Na cáhán rī ìn jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

³¹ Ndúcuehē i nájñūhun jénu ìn ndiquin mostaza jeē jéquin i nuū ñūhun. Te yūcuan cúu ìn ndiquin lúli gá vésú tāca ndiquin jeē iyó.

³² Te ná ni jequin i, te cáne te jénu ga vésú tāca gá yucū, te cúnáñnu ndaha. Te tāca saa chí sáha tī tacā tī nuū cuándahū xinī ún. Achí yá.

Jeē máni jnūhun yátá cáhán yā jín i

(Mt. 13.34-35)

³³ Te cuehē jnūhun yátá súcuan ni cahān yā jín ñáyuu, núu nasaa cánda i jecūhun ni i.

³⁴ Te tāca jéē ni stéen yā, máni máá jnúhun yátá ní cahān yā jín i. Te nuū tēe cáscuáha jín yá chí ni nacastūhun cájí yá jnūhun ún.

Jeē ní jecuiñī tachī níhin jín mar ni sáha ya

(Mt. 8.23-27; Lc. 8.22-25)

³⁵ Te jeē cuácuaa quivī ún, te ni cahān yā jín tēe cáscuáha jín yá:

Na yáha yó quíhñ yō inga lado mar, achí yá.

³⁶ Te ni casquéndōo de ñayuu cuehē ún, te ni quivicoo de ini barco nuū je ìne Jesús, cuangoo de jín yá. Te suni

cuangoo jecu gā barco jín de jínáhan de.

³⁷ Te ni jequñhi ìn tachī níhin, te ni stónnda ndute mar, te ni quivī ini barco. Te je yajni chitú ndute ini barco.

³⁸ Te Jesús cátu yá yatā de ini barco, quíxí yā te yíhi ìn sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiñī yā, te ni cahān yā nuū tachí níhin un jín núu mar:

Jecuiñī te nayúú-ni coo ró, achí yá.

Te ni jecuiñī tachī, te ni cuu nayúú ì-ni.

⁴⁰ Te ni cahān yā jín de jínáhan de:

¿Naun cáyūhú ndasí ró? ¿Naun tu cácandíje ró jéē cácu ró sáha rí?

⁴¹ Te yōhyo ni cayūhú de, te ni cacahān de jín jnáhan de:

¿Ndé ìn ga cúu tēe yáha jéē nde tachī níhin jín mar cájetáhú jéē cahán de? achí de.

Tēe Gadara jeē ndóho tachī
(Mt. 8.28-34; Lc. 8.26-39)

5

¹ Te ni jinū Jesús jín de jínáhan de inga lado mar, región Gadara.

² Te ná ni quenda ya ini barco un, te ìn tēe ñūhun tachī ini, ni quenda de nde nuū yíndūji ndiyi, te ni quee de nuū yā.

3 Tēe un ndéé de nuū yíndūji ndīyí. Te tu jéjníñu jeē jíhni ñayuu de, ni jíin cadena.

4 Chi cuehē jínu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ñin cúndeyí jíin de.

5 Te nduú ñuú jíca de yucu jíin núu yíndūji ndīyí, te cána cóhó de, te stújí de máá de jíin yúu.

6 Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā.

7 Te ni cana cóhó de:

¿Naun vēji ní núu ná, Jesús Sēhe Yaā Dios, Yaā kujéhnu téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

8 Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

9 Te ni cajñūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, áchí de.

10 Te ni cahān ndahú ndasí de jíin yá jeē ma tájí yá tachī quendacoo región ún.

11 Te yajni yucu yúcuan cáhīn cuehē quíñī cájitu ti.

12 Te tachī jeē ñūhun ini tēe un ní cacahān ndahú jíin yá:

Núu tají ní sáñá, te cuāha ní jñūhun quíñīcoo ná ini quíñī yūcuán, áchí.

13 Te Jesús ni jēhe ya jñūhun. Te ni quendacoo tachī ún ini tēe ún, te ni quíñīcoo ini quíñī, te íyó nájñūhun uū mil tī. Te quíñī un ní cajinu ti ni ñingoo

ti ñin yucáva, ni quíñīcoo ti nuū mar. Te ni ndaquíñi ti ndute, ni cajihī tī.

14 Te tēe cándito ti, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñayuu ñuu un jíin ñayuu tāca rancho. Te cuangoo ñayuu un cuácondēhé i na vé ni cuu.

15 Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñūhun de sahna, te je ni nducájí xínī de. Te ni cayūhú ñayuu ún.

16 Te tēe ní cajito, ni canacani de jñūhun nuū ñayuu, ndese ni nduvāha tēe ni ñuhun tachī ini, jíin ndese ni candoho quíñī ún.

17 Yūcuán na te ni caquejéé i cacahān ndahú i jíin yá jeē na cújiyo ya región yūcuan quíhīn yā.

18 Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuáha ya jñūhun quíhīn de jíin yá.

19 Te Jesús tu ní jēhe ya jñūhun, chi ni cahān yá jíin de:

Cuánuhun vehe ró núu jñáhan ró, te nacani ró jñūhun nuū i ndese yōhyo jéhnu jñiñu ni sáha máá Jítoho rō jíin ró, te ndese ni cundáhú ni yā rohó, áchí yá.

20 Te ni quenda de cuahān de, te ni quejéé de nácani de jñūhun táca ñuu Decápolis ndese yōhyo jéhnu jñiñu ni sáha Jesús jíin de. Te ndīvii ñayuu un ní canaa ni i cájini nahín i.

Jnūhun sēhe síhí Jairo jíin ñahan ní quehé yusáhma ya
(Mt. 9.18-26; Lc. 8.40-56)

21 Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar.

22 Te ni quee ñin tēe cújéhnú ini vehe ñi sinagoga, naní de Jairo. Te ná ni jito de nuū yā, te ni jecuiñi yití de nuū jehé yā.

23 Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquē i návāha na ndúvāha i te cotecu i, áchí de.

24 Yūcuán na te cuahān yā jíin de. Te cuehē ñayuu cándiquín i ya, te ni chitú níhin i xiin ya cuango i.

25 Te mēhñu ñayuu un cuahān ñin ñahan cúhú, jeē ní cuu uxí uū cuiyā ndóho ña cuehyī niñi.

26 Te yōhyo ni ndoho ña, chi ni jexin ña tāca jeē névāha ña jíin cuéhē tēe tájná, te tu ní jéjníñu jeē ndúvāha ña, chi sa suhva víhyá gā sáha.

27 Te ñahan yáha ná ni nihīn ña jnūhun Jesús, te ni quee ña ichi yátá yā mēhñu ñayuu cuehē ún, te ni quehé ña yusáhma ya.

28 Chi ni jeni ni ña: Vēsú maá sahma ya na níhín rī quehé rí, te nduvāha rí, jéni ni ña.

29 Te ni jecuiñi-ni niñi ña, te ni jini ña jeē ní nduvāha ña cuehyī ún.

30 Te Jesús ni jini yā jeē ní nduvāha ñin ñayuu jíin fuerza

yā. Te ni ndió cóto ya nuū ñayuu cuehē, te ni cahān yā:

¿Ndé ñin ni quehé sahma rí? Achí yá.

31 Te tēe cáscuáha jíin yá, ni cacahān de:

Jíto ní jéē ñayuu cuehē yāha ní chitú níhin i xiin ní te cáquihí i níhín ní cáni ichi, te cájnūhun ní ndé ñin ni quehé sahma ní.

32 Te máá yá jíto ya cháha chúcuan, cúní yā jeē na cáchi ñayuu ni sáha.

33 Te ñahan un yúhú ña te quísi i ña, te je jíni ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndihí ndese ni cuu jíin ña.

34 Te ni cahān yā jíin ña:

Séhē, ni candíje ró jéē cuu nasávāha rí rohó, te jeē yúcuan ní nduvāha ró. Cuahán te na ndúsñi ni rō, chi je ni nduvāha ró cuehyī ní ndoho ró, áchí yá.

35 Te níni cáhán gā yā súcuan, te ni quecoo ñayuu cáyúcú vehe tēe cújéhnú ini vehe ñi sinagoga, te ni cacahān i jíin de:

Je ni jihí sēhe síhí ní. Te ma sajnéñu ga ní Maestro, achí i.

36 Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnú ini vehe ñi sinagoga:

Ma yūhu ró, chi candíje ró jéē nastécu rí i, áchí yá.

37 Te tu ní jéhe ga yā jnūhun condiquín ñayuu yā, chi máá-ni Pedro jíin Jacobo, jíin Juan ñani Jacobo.

38 Te ni jinū yā vehe tēe cújéhnú ini vehe ñi sinagoga,

te ni jito ya ñayuu, cácuvaā i, te cándahyū i, te cácana cóhó i.

³⁹ Te ni quívi ya, te ni cahān yā:

¿Najehē yōhyo cáśavaā rō te cándahyū rō? Sūchi síhí yáha, tu ní jíhí i, chí quíxí-ni i, áchí yá.

⁴⁰ Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máá-ni tátá jíin náná sūchi síhí un, jíin téē cáhīn jíin yá, te ni quívi ya jíin de nuū catú sūchi síhí ní jihī ún.

⁴¹ Te ni jñi ya ndaha i, te ni cahān yā jíin i:

Talita cumi, achí yá. Te jñuhun un cúní cahān: Síhí, cáhān rī jíin ró, ndocuiñí, achí yá.

⁴² Te ni ndocuiñí-ni sūchi síhí un, te ni nacaca i, chí je iyó i uxí uū cuiyā. Te yōhyo ni canaa ni ñayuu cájito i.

⁴³ Te ni ndacu nīhin ya jñiñu nuū i jíin náhan i jeē ma cáchi cuiti i nuū ni iin. Te ni cahān yā jeē na cuáha ña jeē cáji sūchi síhí.

Jeē cuánuhun yā ñuu Nazaret
(Mt. 13.53-58; Lc. 4.16-30)

6

¹ Te ni quenda Jesús yūcuán, te cuanuhun yā ñuu yā. Te téē cáscuáha jíin yá cuangoo de jíin yá.

² Te máá quívi ndétātu ní steén yā jñuhun ini vehe iī sinagoga. Te cuehē ñayuu ní canaa ní i cájini nahín i, te ni cacahān i:

¿Ndé nuū ní cutūhva téē yáha tāca jñuhun yáha? ¿Te ndese cúu jeē cahán de jñuhun ndíchí yáha jíin jéé sáha de jñiñu jéhu yáha?

³ Chí téē yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáha. Achí i.

Te súcuan ni cacujéē ni i nuū Jesús.

⁴ Te ni cahān yā jíin i:

Tāca téē nácani jñuhun Yāā Dios, iyó yíñúhún ñayuu jíin de, chí máni ñayuu ñuu maá de, jíin jnáhan de, jíin ñayuu vehe de cúu jeē tu iyó yíñúhún jíin de. Achí yá.

⁵ Te tu ní cúu sáha ya cuehē jñiñu jéhu yūcuán. Chí jecu-ni ñayuu cácuñu ní soó yá ndaha ya síquī i, te ni nasávāha ya i.

⁶ Te náā ní yā jíto ya jeē tu cácdíje ñayuu jíin náhan i. Yūcuán na te ní jica cuu ya táca ñuu yajni, ní steén yā jñuhun.

Jeē ní tají yá ndihúxí uū de cuanacani de jñuhun
(Mt. 10.5-15; Lc. 9.1-6)

⁷ Te ni cana ya ndihúxí uū téē cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jñiñu de quenehen de tachí ini ñayuu.

⁸ Te ni ndacu ya jeē tú na vé condiso de jeē cuajñiñu de ichi, ní ñunu, ní staā, ní xūhún. Chí máá vara-ni condahá de.

⁹ Te quihí de ndijēn, te ma quihín de jíin ūu sahma, áchí yá.

¹⁰ Te suni ni cahān yā jíin de:

Na-ni vehe núu ni quivicoo ró, te yūcuán coyūcu ró ndé quenda tucu ró quihín rō inga ñuu.

¹¹ Te núu ñn ñuu tu cájetáhú i rōhó, ni tu cúní i cuní nahín i jñūhun cahān rō, na quéndacoo ró yūcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Jendaá cahán rī jíin ró jeē quiví coo juicio te xeēn gā coo castigo siquī ñuu cáśaha súcuán vēsú siquī ñuu Sodoma jíin ñuu Gomorra nuū ní casáha ndasí ñáyuu cuēchi.

¹² Te ni quendacoo de cuahān de, te ni canacani de jñūhun jeē na nácani ni ñayuu jeē stóo i cuēchi i.

¹³ Te suni ni caquenehen de cuehē tachī ini ñayuu. Te ni cachihi de aceite cuehē ñayuu cácuñu, te ni canduvāha i.

Jeē ni jíhí Juan tē scuándute (Mt. 14.1-12; Lc. 9.7-9)

¹⁴ Te rey Herodes ni jini jñūhun de jñūhun Jesús, chí ni jītē núu jñūhun ya ní cáhnu. Te ni cahān de:

Tēe yūcuán cúu Juan tēe ni scuándute, te ni natecu de. Jeē yūcuán iyó poder de sáha de jñiñu jéñnu. Achí de.

¹⁵ Te sava ga ñayuu ni cacahān i:

Tēe un cúu Elías jeē ní nacani jñūhun jenahán.

Te sava ga i ni cacahān:

Tuú chí ñn tēe nácani jñūhun Yaā Dios cúu de, nájñūhun tēe ni canacani jñūhun ya nde jenahán, áchí i.

¹⁶ Te ná ni jini Herodes, te ni cahān de:

Tuú chí yūcuán cúu Juan jeē ní ndacu ri jñiñu ni tahndē xinī, te ni natecu de núu súcuán, áchí de.

¹⁷ Chí máá Herodes ni ndacu de jñiñu jeē na quiví Juan vecāa, jíin jéē na cónuhñi de jíin cadena. Súcuán ni sáha de jeē siquí Herodías, ñasihí ñani de Felipe. Chí Herodes ni quihin de ña jeē cúu tucu ña ñasihí de.

¹⁸ Te Juan ni cahān de nuū Herodes:

Tu iyó ley jeē cóndeca ró ñasihí ñani rō, achí de.

¹⁹ Te jeē yūcuán Herodías ni jito uhū ña Juan, te cúní ña jeē na cúu de, te tu ní níhín ña modo.

²⁰ Chí Herodes yúhú de cahni de Juan, chí jíin de jeē tēe ndaā tēe ndoo cúu Juan. Te jeē yūcuán ní jesi de jeē nducú ña jeē cúu Juan. Te núnjahan ni de jíin nahín de jñūhun cáhán Juan, vēsú tu jécūhun vāha ni de.

²¹ Te ni quee ñn quiví jeē ní cundeyí Herodías. Chí ni sáha Herodes ñn vico quiví ní cacu de, te ni jēhe de jeē ní cacuxíni tēe cándiso jñiñu nuū de, jíin tēe cácuu capitán, jíin tēe cácujuhnu región Galilea.

²² Te ni quiví sēhe síhí máá Herodías, ni jita jéhé i nuū chitú un. Te ni cacusñi ni rey Herodes jíin tēe cácuixíni jíin

de. Te ni cahān de jíin súchi s̄hí un:

Cacān na vé cuní rō, te cuāha ri nuū rō, achí de.

23 Te ni cahān teyí de jeē cuáha de núu na vé cuní i cacān i, vēsú nde sava región jeē yíhi ndaha de.

24 Te ni quenda i, ni jeca-jnūhún i náná i:

¿Na vé cacān na núu de? achí i.

Te ni cahān ña:

Xinī Juan tēe scuándute cacān rō nuū de, achí ña.

25 Yūcuán na te ni ndīvi-ni i nuū rey, te ni cahān i:

Cúní na jéē vijna ñúhún-ni cuāha ní xinī Juan tēe scuándute, cone nuū ñin cohō, achí i jíin de.

26 Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquī jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuán tu ní cúní de sásáhán de jeē ni jíicān i.

27 Te ni tají-ni de ñin soldado jeē quíquihin de xinī Juan.

28 Te ni jehēn soldado un vecāa, te ni jehnde de xinī Juan. Te ni quee de jíin xinī Juan, íne nuū ñin cohō. Te ni jēhe de nuū súchi s̄hí un, te máá i ni jēhe i nuū naná i.

29 Te tēe cáscuáha jíin Juan ni canihīn de jnūhun, te ni jengoo de, ni candonehen de yiqui cúñu Juan, te ni cachindūji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

30 Yūcuán na te tēe cácuu apóstol jeē ní tají yá cuangoo

nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnūhun ni castéén de.

31 Te ni cahān yā jíin de:

Na quíngoo yó ñin lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

32 Yūcuán na te ni quīvi ya ñin barco jíin táca tēe apóstol un, te cuangoo s̄in ya jíin de ñin lugar nuū tú ñayuu.

33 Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde tācá ñuu ni quendacoo i, te yachī cuangoo i, te xīhna gā i ni jinūcoo vēsú maá yá.

34 Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jitoho tī. Te ni steén yā cuehē jnūhun nuū i.

35 Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu.

36 Núu súcuán te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, achí de.

37 Te ni cahān Jesús jíin de:

Cuāha máá ró jeē cáji i, achí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

38 Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úū chācá íyó, áchí de.

³⁹ Yūcuán na te ni cahān yā jíin ñáyuu jeē na cúcōo sán i cuenta grupo nuū íte.

⁴⁰ Te ni cacucōo sán ciento ciento i, jíin cincuenta cincuenta i.

⁴¹ Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tée cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i.

⁴² Te ndivii i ni cayejí, te ni candutú chíjí i.

⁴³ Yūcuán na te ni canastútú de pedazo staā jíin chāca jéē ní quendōo, te ni chitú úxí uū jīca.

⁴⁴ Te tēe ni cayejí, chí uhūn mil de cúu.

Jeē ní jica jéhé yá nuū mar (Mt. 14.22-27; Jn. 6.16-21)

⁴⁵ Yūcuán na te ni cahān-ni Jesús jíin tée cáscuáha jíin yá jeē na quívicoo de barco, te cosnūú de yāha de inga lado mar ñuu Betsaida. Te máá yá chí natají yá ñayuu quinhun i, te sáá te suni quihīn yā.

⁴⁶ Te nuū ní cuu ni natají yá i, te ni caa ya yucu cuacacān tahú yā.

⁴⁷ Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi.

⁴⁸ Te ni jito ya jeē yóhyo jnūndóho cáscaca de barco, chí ñihin vējí tachī ichi núú de. Te jeē yínee gā ni quee ya nuū de, jīca jéhé yá nuū mar. Te yāha ya nuū de quihīn yā nuū.

⁴⁹ Te ni cajito de jeē jīca ya nuū mar, te ni cajeni ni de jeē jihná cúu, te ni cacana cóhó de.

⁵⁰ Chí ndihí de ni cajito nuū yā, te ni cayúhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chí máá rí cúu, áchí yá.

⁵¹ Te ni quívi ya ini barco un, te ni jecuíñi-ni tachī. Te yóhyo ni canaa ni de cájito de.

⁵² Chí cándāa néé gá jeē níjnūní de, chí ni jíin jniñu jéhnú jeē ní nducuehē staā, tu ní cájecūhun ni de jeē máá yá cúu Yāā ní tají Yāā Dios.

Jeē ní nasávāha ya ñayuu cácuñu región Genesaret (Mt. 14.34-36)

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco.

⁵⁴ Te nuū ní quenda ya jíin de ini barco, te ñayuu yúcuani ni canacuni-ni i ya.

⁵⁵ Te yachī ni jengoo i tācá ndañúú yūcuán, te ni caquin-deca i ñayuu cácuñu, cáyosó i nuū camilla, vējicoo ñayuu nuū ní jito i íne ya.

⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya.

Te tāca ñayuu jeē ní caquehé sahma ya, ni canduvāha-ni i.

Siquī ndese cújnehén ñayuu (Mt. 15.1-20)

7

1 Yūcuán na te tē grupo fariseo jíin jecu tē cástéén tutu ley Yaā Dios, ni quen-dacoo de ñuu Jerusalén, te ni quecoo de nuū Jesús.

2 Te tē un ní cajito de jeē sava tēe cáscuáha jíin Jesús, ni cayeji jnehén de staā, chí tu ní cáscuicu de costumbre jeē nándahá de nuū Yaā Dios. Te ní cacahān siquī de.

3 Chí tēe fariseo jíin ndihi ñayuu hebreo, névāha i costumbre jenahán jeē ma cáji i staā núu tu nandahá váha i xihna gā.

4 Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te iyó cuéhē gā costumbre jenahán jeē casquicu i, nájnūhun jeē ndúndoo taza, tindohō, cohō cáa, jíin jíto.

5 Te tēe fariseo jíin tēe cástéén tutu ley Yaā Dios, ni cacajñūhún de ya:

Tēe cáscuáha jíin ró, ¿naun tu cáscuicu de costumbre ñayuu jenahán? Chí sa cáyeji jnehén de staā, achí de.

6 Te ni cahān yā jíin de:

Ndaā ni nacani Isaías jñūhun siquī rō jíjnáhan ró jeē tēe stáhú-ni cácuu ró. Chí súcuan ni tee de jñūhun ni cahān Yaā Dios nde jenahán: Ñayuu yáha chí máá yuhu-ni i cájetáhú i ruhū, te nasūu ndé jíin ini jíin ánuá i.

7 Te cáchiñúhún sáá-ni i ruhū, chí jñūhun cástéén i cúu jniñu ní candacu tēe, te nasūu jeē ní ndacu máá rí cúu.

Achí Yaā Dios. Achí Isaías.

8 Súcuan cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costum-bre jeē ní cajequin ñayuu, jeē ndúndoo tindohō jíin taza. Te cuehē gā costumbre súcuan cáscuicu ró, achí yá.

9 Te suni ni cahān yā:

Cásiáá rō jniñu ní ndacu Yaā Dios, návāha squicu ró costumbre ni cajequin máá rō.

10 Chí Moisés ni cahān de: Coo yíñúhún ró jíin tátá rō jíin náná rō. Te núu ndé ñin cahān siquī tátá chí síquī naná, na cúu nahín. Achí Moisés.

11 Te máá ró chí cacahān rō jeē cuu cahān ñin tēe jíin tátá de náná de: Ma cúu chindéé ñáhán ná níhín cuáha na jéé cáji ni jéé cúhun ní, chí ndihi jeē névāha ná, chí Corbán cúu, achí ró. (Te jñūhun Corbán cuní cahān jeē ni sócō nuū Yaā Dios.)

12 Te cacahān rō jeē núu súcuan cahān ñin tēe, te tuá cánuú chindéé ñáhán de tátá de náná de.

13 Te súcuan cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cáháha ró, achí yá.

14 Te ni cana tucu ya ñayuu cuehē ún, te ni cahān yā jíin i: Cuni sōho váha ró jíjnáhan ró, te chuhun ni rō:

15 Tāca jéé iyó, te núu ni quívi yuhu ñayuu te tu

cújnéhén i sáha. Chi jeē quéndá ini anuá ñayuu, yūcuan cúu jeē cújnéhén i sáha.

16 Tāca róhó jéē jíni sōho, na chúsóhó ró, áchí yá.

17 Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni caca-jnūhún de ya síquī jnúhun yátá yáha jéē ni cáhān yā.

18 Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jéē quívi ini ñayuu, ma cúu cújnéhén i sáha?

19 Chi tu quívi ini anuá i, chí chíji i quívi, te quéndá-ni cuahān, achí yá.

Súcuan ni steén yā jeē tāca jéē yéji ñayuu, tu cújnéhén ánuá i sáha.

20 Te ni cahān gā yā:

Jeē quéndá ini anuá ñayuu, yūcuan cúu jeē cújnéhén i sáha.

21 Chi nde ini anuá ñayuu quéndá jeē jéni néé ni, jeē casíquí ndéé jnáhan, jeē jíca jnéni, jeē jéhni ndíyi,

22 jeē sacuíhná, jeē ndíyo ni ndajniñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahán yā síquī jnáhan, jeē sandúxí máá, jeē canéé xíní.

23 Tāca jniñu néé yáha, máni ini anuá ñayuu quéndá, te cújnéhén i sáha, áchí yá.

Ñahan inga nación jeē ní candíje nihin

(Mt. 15.21-28)

24 Te ni quenda ya yūcuan cuahān yā región Tiro jíin Sidón. Te ni quívi ya ñn vehe,

te cúni yā jeē tú ni ñn ñayuu cuni jeē íne ya yūcuán. Te vésú súcuan, te tu ní cúu cone sáhi yá.

25 Te ñn ñahan íyó séhe síhi ña jeē ññuhun tachí ini i, ni nihín-ni ña jnúhun jeē íne ya. Te ni quee ña, te ni jecuíñi yití ña nuū jehé yā.

26 Te ñahan ñuu jíca cúu ña, chí nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhi ña.

27 Te ni cahān Jesús jíin ña:

Nasūu núu maá ní vēji ná, chí máni nuū ñayuu cácuo séhe Israel. Chi tu íyó váha jeē quénde yō staā séhe te cuāha yó núu ína, achí yá.

28 Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájnúhun ína. Chi suni máá tí cáhīin tí chíji mesa, cánihín tí staā cuechí jéē cóyo yuhu sūchi lúlí cáyeji tí, achí ña.

29 Yūcuán na te ni cahān yā jíin ña:

Váha ni cahán ní. Cuahán ní núu súcuan, chí je ni quenda tachí ún ini séhe síhi ní, achí yá.

30 Te ni najinū ña vehe ña, te ni jito ña jeē catú séhe síhi ña nuū jíto, te je ni quenda tachí ún ini i.

Jeē ní nasávāha ya ñn tēe sóhó cástété

31 Te ni quenda tucu ya región Tiro, ni yáha ya Sidón jíin táca ñuu Decápolis, te ni jinū yā mar Galilea.

32 Te ni caquindeca i ñn tēe sóhó cásteté nuū yā, te ni cacahān ndahú i jíin yá jeē na sóo yá ndaha ya siquī de.

33 Te ni quenehen sñn ya de nuū ñáyuu cuehē ún, te ni chune ya xinī ndáha ya sóho de, te ni tesīhi yá, te ni quehé yá yaá de.

34 Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

35 Te ni nanune-ni sóho de, te ni nduvāha yáa de, te ni naçahān vāha de.

36 Te ni ndacu ya jniñu nuū ñáyuu un jeē ma cáchi i nuū ní ñn. Te vēsú ni cahān ñihin ya jíin i, te víhyá gā ni cajete i jñuhun.

37 Te yōhyo ni canaa ni i cájito i, te ni cacahān i:

Vāha sáha ya tācá jniñu, chí nde tēe cásohó, cánacuni sóho de, te tēe cándāa ññhñ, cánahān vāha de sáha ya, achí i.

Jeē ni scáji yā cuñn mil ñáyuu

(Mt. 15.32-39)

8

1 Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

2 Cúndáhú ni rī ñáyuu yāhá, chí je ni cuu unī quivī cáyūcú i jíin rí, te tuá na vé caji i.

3 Te núu natajī rí i quinhun ndite i vehe i, te cuíta íi i sava ichi, chí íyó sava i jeē jicá véjicoo i, achí yá.

4 Te tēe cáscuáha un ní cacahān de:

¿Te ndé nuū ñihín yō staā caji i jíin náhan i? Chí yāhá tú na ñáyuu yúcu, achí de.

5 Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, achí de.

6 Yūcuán na te ni cahān yā jíin ñáyuu cuehē un jeē na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún.

7 Te suni cándiso de jecu chācá lúli. Te ni nacuatáhú yá siquī, te ni cahān yā jeē suni saja de jíin náhan de.

8 Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jica.

9 Te tēe ni cayeji un, íyó nájnūhun cuñn mil de. Te ni nacuatáhú yá nuū ñáyuu ún, te cuanungoo i.

10 Yūcuán na te ni ndiví-ni ya iní barco jíin tēe cáscuáha jíin yá, te cuahān yā región Dalmanuta.

Jeē ní cajicān de ñn jniñu jéhnú nuū yā

(Mt. 16.1-4; Lc. 12.54-56)

11 Yūcuán na te ni quecoo tēe grupo fariseo, te ni caquejé de stíchí de Jesús. Te cáncuni de coto ndee de ya, te ni cajicān de jeē sáha ya ñn jniñu jéhnú jeē coo ñn seña ichi ándiví.

12 Te ni jitū ni yā siquī jeē tu cá candíje de jínáhan de, te ni cahān yā:

¿Naun cájicān ñayuu yáha in jniñu jéhnú nuū rī? Jendaá cahán rī jeē ma stéén rī ni in jniñu jéhnú nuū ñáyuu yāhá.

13 Te ni squéndōo ya de jínáhan de, te ni ndīvi tucu ya ini barco, te cuahān yā inga lado mar.

Jnūhun levadura tēe fariseo (Mt. 16.5-12)

14 Te tēe cáscuáha jíin yá ni canaa ni de condiso de jeē cáji de, chí in-ni pan cánevāha de ini barco.

15 Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuán cáhán yá súcuán, achí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhán rī súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rī súcuán siquī jeē tu cándiso ró stáā? ¿A yóhyo uun ni rō candíje ró?

18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō?

19 Chí ná ni tahú cuéchí rí uhūn staā ni cayejí uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:
Uxī uū jīca, achí de.

20 Te suni súcuán ná ni tahú cuéchí rí uxā staā ni cayejí cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:
Uxā jīca, achí de.

21 Te ni cahān yā jíin de:

Te nde vijna ¿á ná tu jecūhun ni rō jínáhan ró?

Súcuán ni cahān yatá yá jeē ma cándíje de jnūhun stáhú cástéén tēe ún.

Jeē ní nasávāha ya tēe cuáá ñuu Betsaida

22 Yūcuán na te ni jinū yā jíin de ñuu Betsaida. Te ni caquindeca ñayuu in tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

23 Yūcuán na te ni jniñ ya ndaha tēe cuáá un, te ni quenehen ya de yatā ñūu ún. Te ni tee ya tesíhi yá tñūu de, te ni tee ya ndaha ya siquī. Te ni cajnūhun yá de núu cuu coto de jecu.

24 Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chí ná cáa yujnu cáa i, achí de.

25 Yūcuán na te ni tee tucu ya ndaha ya siquī tñūu de. Te ni ndacoto vāha de, te ni nduvāha-ni tñūu de, te ni jito cájí de ndíhi-ni.

26 Te ni natajé yá de quinuhun de vehe de, te achí yá:

Ma quívi ró ñuu, ni ma cáchi cuíti rō nuū ní in, achí yá.

Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

27 Yūcuán na te Jesús jíin tée cáscuáha jíin yá, cuahān yā tācá ndañúu Cesarea Filipo. Te ichi un ní cajnúhun yá de:

Ruhū, ¿ndé ñn cúu ri cácahān ñayuu?

28 Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnúhun Yaā Dios nde jenahán. Te sava ga i cácahān jeē inga tēe ni nacani jnúhun Yaā Dios cúu ní.

29 Yūcuán na te ni cajnúhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

30 Te ni ndacu ya jniñu nuū de jíináhan de jeē ma cáchi de jnúhun yáha nuū ní ñn ñayuu.

Jeē ní castühún Jesús jeē cúu yā

(Mt. 16.21-28; Lc. 9.22-27)

31 Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhnú jíin sūtū cácujehnú jíin tēe cástéén tutu ley, squéhichí de ruhū, te cahni de ruhū. Te nuū uní quiví te natecu rī, achí yá.

32 Te cájí ní cahān yā jnúhun yáha. Yūcuán na te Pedro, ni cana máñúhún de ya, te ni quejéé de cáhán de nuū yā jeē ma cuáha ya jnúhun coo súcuan.

33 Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chi cáhán rō ná cáhán Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achí yá.

34 Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnúhun ndoho i jnúndóho jeē siquí rī, vēsú na cúu i.

35 Chi núu ndé ñayuu cuní i cācu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē siquí ruhū jíin síquī jeē scáca i jnúhun jeē jnáma rī ñayuu, núu súcuan te cotecu i ní cáni.

36 ¿Chi ndé cuajníñu vēsú na cúndeyí ñayuu nihīn i ní ñáyiví, te núu quiví i nuū jnahnú ndetū i?

37 Chi tú na jíin cuiti chunaa ñayuu jeē cácu ánuá i.

38 Te ñayuu yáha tu cácañdíje cuiti i, te máni máá cuéchi cása i. Te núu na-ni ñayuu cúcanu i nuū ñayuu yáha jeē siquí ruhū, Yaā ní nduu tēe, jíin síquī jnúhun cáhán rī, suni súcuan cucanu rī jeē siquí máá i, quiví ndíji rī jíin táca ndajéhé ndoo rī. Te quiví ún chi yōhyo luu cujéhnú rī nájnūhun cújéhnú Tátá rī. Achí yá.

9

1 Te suni ni cahān yā jīn de jijnáhan de:

Jendaá cahán rī jīn ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jīn poder yā, achí yá.

*Jeē tucu ni nduu ya
(Mt. 17.1-13; Lc. 9.28-36)*

2 Yūcuán na te nuū iñú quiyī te Jesús ni jeca ya Pedro jīn Jacobo jīn Juan, cuahān sīn ya jīn de ñn yucu súcún. Te yūcuán, tucu ni nduu ya nuū de.

3 Te sahma ya ni ndindēe, te ni nducujín quiyī, nájnūhun yuhvā volcán. Te tú ni ñn ñayuu ñayīvi yáha cuu nacate jeē ndúquiya ndasí súcuan.

4 Te ni cajito de jeē Elías jīn Moisés cándajnūhún de jīn yá.

5 Yūcuán na te ni cahān Pedro jīn Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ñn cuu máa ní, inga cuu Moisés, te inga cuu Elías, achí de.

6 Chi yōhoyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de.

7 Te ni quiji vicō nūhun ní jesi-ni nuū de. Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jīn. Te na cúni nahín ró jnūhun cahán yā. Achí.

8 Te ni candacoto-ni de, te tuá tēe un ní cájito de, chi máa ñn na Jesús.

9 Te ni cananuu de jīn yá yucu ún. Te ni ndacu nīhin ya jniñu nuū de jeē ma cáchi de

nuū ní ñn jeē súcuan ni cajito de, chi nde na nátecu maá yá, Yaā ní nduu tēe, achí yá.

10 Jeē yúcuan ní cachuvāha de tāca jēe ní cuu ún, te cácajnūhun jnáhan de na jnūhun cúu jeē nátecu yā.

11 Te ni cacajnūhún de ya:

Te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

12 Te ni cahān yā:

Jendaá cúu jeē xīhna gā quiji ñn tēe cúu nájnūhun Elías, te sátūhva de ndihī, achí tutu. ¿Te ndese cáhán tucu tutu i siquī ruhū, Yaā ní nduu tēe? Cáhán jeē ndoho xeēn rī, te sájēe ni i nuū rī.

13 Te cáhán rī jīn ró jeē jé ni quiji tēe ni cuu nájnūhun Elías, te ni casáha ndevāha ñayuu jīn de tāca jēe ní cacuu ni maá i, nájnūhun cáhán jnūhun de nuū tútu, achí yá.

Jeē ní nasávāha ya ñn sūchi nūhun tachī ni

(Mt. 17.14-21; Lc. 9.37-43)

14 Te ni najinū yā jīn de nuū sava ga tēe cáscuáha jīn yá, te ni cajito ya ñayuu cuehē ndasí, ni cajicó ndūū i de. Te suni cáhīn tēe cástéén tutu ley Yaā Dios, cátejnhán jīn de.

15 Te nuū ní cajito tāca ñáyuu un jēe véji ya, te ni canaa ni i. Te cájino i cuangoo i nuū yā jeē cahán i jīn yá.

16 Te ni cajnūhun yá i:

¿Na siquī cátejnhán ró jīn de jijnáhan de? achí yá.

17 Te ni cahān ñn tēe íne yūcuán:

Maestro, vendeca ná séhe ná núū ní, chí ñũhun ñn tachī ini i, te ni cuñhín i ni sáha.

18 Te ndé-ni cúu nuū íne i, te tachī un scótúú i, te jéhi yíhí-ni i. Te jée tiñū yuhu i, te squíhñi jnúhun i. Te cuacuxíí ndasí i sáha. Te ni cahān ndahú ná jíin tée cáscuáha jíin ní jeē na quénehen de tachī ún, te tu ní cúu sáha de, áchí de.

19 Te ni cahān yā jíin de jíjnáhan de:

Ñayuu tu cándíje cuiti cácuu ró. ¿Nasaa ga quiví condee rí jíin ró? ¿Te nasaa ga quiví cuandeyí ni rí jíin ró? Cuáquihin sūchí un, na quíji i, áchí yá.

20 Te ni caquindeca de i nuū yā. Te nuū ní jito tachī un núū yā, te ni jehni yíhí-ni i. Te ni cotúú i, te cónehén cócání i, te jée tiñū yuhu i.

21 Te Jesús ni cajnúhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i.

22 Te ni cuu cuehē jínu scótúú táchí ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jeē ndúvãha sēhe ná, áchí de.

23 Te ni cahān Jesús jíin de:

Núu cuu cándíje ró jéē sáha ri, chí ñayuu cándíje te cuu tãca jéē cuní i, áchí yá.

24 Te máá tátá sūchí un ní cahān jee de:

Cándíje ná, te chindéé ñáhán ní sãña jéē cándíje ñihin ga ná, áchí de.

25 Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachí jeē sañhín sásóhó, ruhū ndácu ri jniñu jeē na quenda ró ini sūchi yáha, te ma ndívi ga rō ini i, áchí yá.

26 Yūcuán na te ni cana cóhó táchí ún, te ni jehni yíhí tucu i, te ni quenda cuahān. Te sūchí un ní cuu i nájnūhun ndívi. Te ni cacahān cuehē ñayuu jeē jé ni jihí i.

27 Te Jesús ni jñi ya ndaha i, te ni ndonehen ya i, te ni nucuiñi-ni i.

28 Yūcuán na te ni quívi ya ini ñn vehe, te tée cáscuáha jíin yá, ni cacajnúhun sñn de ya:

¿Najehē tu ní cúu quenehen ná tachí un jíjnáhan ná? áchí de.

29 Te ni cahān yā:

Íin tachí súcuan chí ma quenda cuiti te núu tú cacān tahú rō te coo ndite ni rō, áchí yá.

Jeē ni cáhān tucu ya jeē cúu yā

(Mt. 17.22-23; Lc. 9.43-45)

30 Te ni quenda ya yūcuan jíin de jíjnáhan de, te ni yāha ya ndañúū Galilea cuahān yā. Te tu ní cúní yā jeē cuní ni ñn ñayuu.

31 Chi stéén yā nuū tée cáscuáha jíin yá, te áchí yá:

Máá rí, Yāá ní nduu téē, nastúu i ruhū nuū tãca téē xeēn. Te cahni de ruhū, te núu ni jihí rí, te nuū uní quiví te natecu rí, áchí yá.

32 Te tu ní cájecūhun ni de jnúhun yáha, te cáyūhú de cajnúhún de ya siquí jnúhun ni cahān yā.

Ndé ñáyuu cúu jeē cujéhnuga

(Mt. 18.1-5; Lc. 9.46-48)

33 Te ni jinū yā jíin de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

34 Te tu ní cácahān cuíti de, chi ichi un ní cacahān de siquī núu ndé ñn de cujéhnuga.

35 Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cujéhnuga, na cúu ró tée núu ga nuū tāca jnáhan ró, te cuajníñu ró núu jnáhan ró.

36 Yūcuán na te ni jñi ya ndaha ñn sūchi lúlí, te ni jení ya i mēhñú de jíjnáhan de. Te ni nundee yā i, te ni cahān yā jíin de:

37 Na-ni ñayuu núu jeē siquí ruhū jetáhú i ñn sūchi lúlí nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chí suni Yaā ní tají rúhū jetáhú i, áchí yá.

Ñayuu tu cáhān siquī yā, ñn i jíin yá

(Mt. 10.42; Lc. 9.49-50)

38 Yūcuán na te ni cahān Juan jíin yá:

Maestro, ni cajito ná ñn tēe jeē jíin síhví ní quénehen de tachí ini ñayuu. Te ni cajesí ná jēe sáha de, chí tu jíca de jíin yó, achí de.

39 Te ni cahān Jesús jíin de:

Ma cásí rō jeē sáha de. Chí ni ñn tēe jeē jíin síhví rí sáha

de jniñu jéhnuga, ma cúu nacahān de siquī rí.

40 Chí tēe tu cáhān siquī yō, ñn de jíin yó.

41 Te na-ni ñayuu núu jeē siquí ruhū cuāha i vēsú ñn ñajin ndute coho ró, siquí jeē cácañdije ró ruhū, ndaā ndije cúu jeē nihín i tahū i. Achí yá.

Xeēn coo siquī ñáyuu quívi nuū cuéchi

(Mt. 18.6-9; Lc. 17.1-2)

42 Te núu ñn sūchi lúlí yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñn yōso cáhnu sucūn ñayuu ún, te quēe i chíji ndute mar nuú.

43 Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chí vāha ga jeē cóndee ñn-ni ndaha ró te quívi ró núu cotecu rō ní cání, vēsú jeē cóndee ndindúú ndaha ró te quívi ró infierno, nuū cayú ñuhūn jeē ma ndahvá cuíti.

44 Te yūcuán chí tu cájihí tindacú, te tu ndahvá cuíti ñuhūn.

45 Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chí vāha ga jeē cóo cúhndu ró te quívi ró núu cotecu rō ní cání, vēsú jeē cóndee ndindúú jehē rō te quívi ró infierno, nuū cayú ñuhūn jeē ma ndahvá cuíti.

46 Te yūcuán chí tu cájihí tindacú, te tu ndahvá cuíti ñuhūn.

47 Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chí vāha ga jeē

quívi ró ñuu nuū ndácu Yaā Dios jniñu jíin ñn na tinūu ró, vēsú jeē cóndee ndindúú tinūu ró te quívi ró infierno.

48 Te yūcuán chi tu cájihī tindacú, te tu ndáhvá cuiti ñuhūn.

49 'Chi nájnūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuvuā sáha ññ.

50 Vāha íyó ññ, te núu ññ ún na náa jeē uhvuá, ¿te ndese nduu uhvuā tucu sáha ró? Núu súcuan te cuu ró ñayuu váha, nájnūhun íyó váha ññ. Te na cóyūcu váha ró jíin jnáhan ró. Achí yá jíin de.

Siquí jeē ma stóo jnáhan tēe jíin ñahan
(Mt. 19.1-12; Lc. 16.18)

10

1 Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnūhun nuū i, nájnūhun sáha ya.

2 Yūcuán na te jecu tēe grupo fariseo ni quecoo de nuū yā, chi cáconi de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusñn ñn tēe jíin ñasihí de.

3 Te ni cahān yā jíin de:

¿Na jniñu ni ndacu Moisés nuū rō nde jenahán?

4 Te ni cacahān de:

Moisés ni jēhe de jnūhun jeē cúvāha ñn acta jeē ndusñn de jíin ña, te ndōo ña, áchí de.

5 Te ni cahān Jesús jíin de:

Siquí jeē níhni ni rō jijnáhan ró, jeē yūcuan ní ndacu de jniñu yáha núu rō.

6 Te nde xihna ñuhún, ná ni sáha Yaā Dios ndihi, chi tēe jíin ñahan ni sáha ya.

7 Jeē yūcuan cúu jeē stóo tēe tátá de náná de, te quijnáhan de jíin ñasihí de.

8 Te ñn na cuu ndindúú de, áchí Yaā Dios. Núu súcuan te tuá cúu uū jnáhan de, chi ñn na cúu.

9 Jeē yūcuan tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

10 Te tēe cáscuáha ún nuū ni quívicoo de vehe, te ni cacajnūhún tucu de ya siquí jnūhun ún.

11 Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de.

12 Te núu ñn ñahan stóo ña yí ña te condeca ña inga tēe, suni cásiquí ndé ña de. Achí yá.

Jeē ni jícān tahu Jesús jehē sūchi lúli

(Mt. 19.13-15; Lc. 18.15-17)

13 Yūcuán na te ni quecoo ñayuu jíin sūchi lúli, jéē na sóo yá ndaha ya xinī i. Te tēe cáscuáha jíin yá, ni cacahān de nuū ñayuu vējicoo jíin i.

14 Te ni jito Jesús, te ni quiti ni yā, te ni cahān yā jíin de:

Cuāha jnūhun na quíjicoo sūchi lúli jíin ña nuū rī, te ma cási

rō jeē quíjicoo i. Chi ñayuu jeē ndió cóo ni i cani ni i nájñuhun sūchi yáha, suu i quívi ndaha Yaā andiví jeē ndacu ya jniñu nuū i.

¹⁵ Te jendaá cahán rī jín ró, núu ñn ñayuu tú cuatáhú i jeē ndácu Yaā Dios jniñu nuū i, nájñuhun jétáhú ñn sūchi lúlí, ma quívi cuiti i ndaha ya, achí yá.

¹⁶ Te ni nundee ya i, te ni soó yá ndaha ya xiní i, te ni jicān tahú yā jehē i jínáhan i.

Jñuhun tēe cúca

(Mt. 19.16-30; Lc. 18.18-30)

¹⁷ Yūcuán na te ni quihin tucu ya ichi cuahān yā. Te jínu ñn tēe ni quee de, te ni jecuiñí yití de nuū yā, ni cajñuhún de ya:

Tēe vāha cúu ní Maestro. Te cachí ní, ¿na jniñu vāha sáha ná te nihín tahú na cotecu na ní cáni andiví? áchí de.

¹⁸ Te ni cahān yā jín de:

¿Naun cáhán rō jeē tēe vāha cúu rí? Tú ni ñn tēe vāha íyó, chí máá ñn-ni Yaā Dios.

¹⁹ Je jíní rō tǎcá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

²⁰ Te ni cahān tēe un jín yá:

Tǎcá jniñu yáha je ni squícu ná ndé ná lúlí ná, Maestro, achí de.

²¹ Yūcuán na te ndáhú jito ya nuū de jeē cúsiñ ni yā jín de. Te ni cahān yā:

Ñn na jniñu cúmaní sáha ró núu súcuan. Cuáhán te xīco ró ndihí jeē névāha ró, te cuāha

ró núu ñayuu ndahú. Te nde andiví cuāha ya jeē váha ndasí núu rō. Yūcuán na te quiji ró condiquín rō ruhū, te cuāha ró jñuhun ndoho ró jnúndóho jeē síquí rī, achí yá.

²² Te ná ni jini sōho de jñuhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

²³ Yūcuán na te Jesús ni ndacoto ya ní xiin ya, te ni cahān yā jín tēe cáscuáha jín yá:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

²⁴ Te tēe cáscuáha jín yá, yōhyo ni canaa ni de jeē ní cajini de jñuhun ni cahān yā. Te ni cahān tucu ya jín de:

Séhē, ñayuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i.

²⁵ Yachí gā yāha ñn camello yaū yutícuí, vésú jeē quívi ñn ñayuu cúcá ndaha Yaā Dios jeē ndacu ya jniñu nuū i, achí yá.

²⁶ Te víhyá gā ni canaa ni de cájini de, te ni cacajñuhun jnáhan de:

¿Ndé ñayuu cúu jeē cácu núu súcuan?

²⁷ Te ni ndacoto ya nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, chí ndihí-ni jniñu cuu sáha ya, achí yá.

²⁸ Yūcuán na te ni cahān Pedro jín yá:

Sāña jínáhan ná, ní castóo ná ndihí jeē cánevāha ná, te cándiquín na níhín, achí de.

29 Te ni cahān Jesús:

Jendaá cahān rī jīn ró jijnáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jīn síquī jeē scáca i jnūhun jeē jnáma rī ñayuu,

30 núu súcuan te nanihīn i ñin ciento gā jeē súcuan vijna, cúu vehe, cúu ñani, cúu cuáha, cúu náná, cúu séhe, cúu ñuhun, te nde jīn jéé cóto xeēn ñayuu i. Te nde inga vida quiji te cotecu i ní cáni.

31 Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chí ndujéhu i, áchí yá.

Jeē ni cahān tucu ya jeē cúu yā

(Mt. 20.17-19; Lc. 18.31-34)

32 Te cáñuhun de ichi jeē cáa cuahān ñuu Jerusalén. Te Jesús yósnúu yá nuū téé cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jīn yá. Yūcuán na te ni cana sīn tucu ya ndihúxí uū téé cáscuáha, te ni quejéé yá cástūhún tucu ya nuū de tāca jéé quiji siquí yā.

33 Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu téé, nuū sutú cácujuhnu jīn núu téé cástéén tutu ley. Te ndonda de siquí rī jeē cúu rī, te squívi de ruhū nuū téé nación Roma jeē cáyūcú Jerusalén cándacu jniñu.

34 Te tāca téé un sácata de nuū rī, te cani de ruhū, te

tesihí de nuū rī, te sáa te cahni de ruhū. Te nuū uní quivī te natecu rī, achí yá.

Jeē ni jicān Jacobo jīn Juan ñin favor nuū yā

(Mt. 20.20-28)

35 Yūcuán na te Jacobo jīn Juan, ndindúu séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñin jeē cacán na núu ní, áchí de.

36 Te ni cahān yā jīn de:

¿Ndese cácuni rō jeē sáha rī jīn ró? achí yá.

37 Te ni cacahān de:

Cuáha ní jnūhun jeē cónēne ná xiin ní quivī ndujéhu ní, ñin ná lado váha ní, te inga ná lado jecó ní, áchí de.

38 Yūcuán na te ni cahān Jesús jīn de:

Tu cájini rō na vé cúu jeē cájicān rō. ¿A cuu ndoho ró jnūndóho nájnūhun jeē quiji siquí rī? ¿Te á canda ró ndoho xeēn rō nájnūhun ndoho rī? achí yá.

39 Te ni cacahān de:

Cuu sáha ná.

Te ni cahān yā jīn de:

Jendaá jeē ndoho ró jnūndóho nájnūhun jeē quiji siquí rī, te ndoho xeēn rō nájnūhun ndoho rī.

40 Te jeē cónēne ró lado váha rī jīn lado jecó rī, nasūu rúhū cúu jeē cuáha jnūhun. Chi je íyó túhva cuu tāca téé jeē ní nacāji Tátá rī, te téé un níhīn, achí yá.

41 Te uxī gā téé cáscuáha un, ní cajini de jnūhun yáha, te ni caquitī ni de nuū Jacobo jīn Juan.

42 Te Jesús ni cana ya de, te ni cahān yā jín de:

Cájini rō ndese cásáha tēe cácujuhnu nuū ñáyuu tācá nación. Chi cándacu nīhin de jniñu nuū i, te máá de cáchí ndese coo.

43 Te máá ró jijnáhan ró, chi ma sáha ró súcuan. Chi núu ndé ñn ró cúní cujéhnu, sa suhva cuajniñu ró núu jnáhan ró.

44 Te núu ndé ñn ró cúní cuu nuū, sa suhva sáha ró máá ró mozo nuū tāca jnáhan ró.

45 Chi suni súcuan sáha ruhū, Yaā ní nduu tēe, chi nasūu jéē véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuāha ri maá rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá

(Mt. 20.29-34; Lc. 18.35-43)

46 Yūcuán na te ni jinū yā ñuu Jericó jín tēe cáscuáha jín yá. Te sáá te ni quenda ya yūcuan jín de jín ñáyuu cuehē ndasí. Te Bartimeo tēe cuáá, sēhe Timeo, néne de yuhíchi, jícán de caridad.

47 Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucūn David, cundáhú ni ni sáña, achí de.

48 Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víí, achí de.

49 Yūcuán na te ni jecuiñi Jesús, te ni cahān yā:

Cana de na quíji de.

Te ni cacana i tēe cuáá un: Ndeyí coo ni rō. Ndocuiñi, na quíhín yō, chi cána ya rohó, achí i jín de.

50 Yūcuán na te ni scáne de ticāchí de, te yachí ni ndocuiñi de, te ni jinū de nuū Jesús.

51 Te ni cahān yā jín de:

¿Na vé cuní rō jeē sáha ri jín ró?

Te máá de ni cahān de:

Maestro, jeē na ndúndijin tinūu ná cuní na, achí de.

52 Te ni cahān Jesús jín de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūu de, te ni ndiquin de Jesús cuahān de jín yá ichi ún.

Jeē ni quívi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11

1 Te ni cuyajni ya ñuu Jerusalén, véji ya ñuu Betfagé jín ñuu Betania, jeē íne jehē yucu Olivos. Te ni tají yá uū tēe cáscuáha jín yá jeē quíngoo de.

2 Te achí yá jín de:

Cuángoo ñuu lulí íne ichi núu. Te núu ni quívi-ni ró yūcuan, te nihīn rō ñn burro núhni tī, jeē ní ñn tēe ná tu coso de tí. Te ndají ró tī, quíjicoo ró jín tí.

3 Te núu ndé ñn cajnūhún naun cándají ró tī, te cachí ró: Máá Jítóho yō jíni ñúhún yá tī,

te yachī natajī yá tī ndiji ti, achi rō. Achí yá jíin de.

4 Te cuango de, te ni canihīn de burro un núhní tī yehyí núū quēhe nuū náquijnáhan ichi. Te ni candají de ti.

5 Te sava ñayuu cáhīn yūcuan ní cacahān jíin de:

¿Na vé cúu jeē casáha ró jeē cándají ró burro jíinā? achí i.

6 Yūcuán na te ni cacahān de nájnūhun ni cachi Jesús. Te ni casiáá i ti vējicoo de jíin tí.

7 Te ni ndecoo de jíin tí nuū Jesús, te ni casoó de sahma de siquī tī, te ni jecosō yā tī.

8 Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

9 Te ñayuu cuango ichi núú jíin ñáyuu cuango ichi yátá, cácana jee i:

Yōhyo cújéhnū ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios.

10 Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnū máá Yaā Dios. Achí i.

11 Te ni quīvi Jesús ñuu Jerusalén, jíin ini templo cáhnu. Te ni jito ya nuū tācá ndajniñu yúcu ní yúcu. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo

(Mt. 21.18-19)

12 Te inga quīvī ún, nuū ní quenda ya ñuu Betania cuahān yā jíin de, te jíi yā sōco.

13 Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhín yā, chi máá ndaha-ni ín. Chi nasūu tiempo ndehē cúu.

14 Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

15 Te ni najinū yā jíin de ñuu Jerusalén. Te ni quīvi ya ini templo cáhnu, te ni quenehen ya ñayuu cájeen quiti te cánaxīco núū ñáyuu jeē socō i. Te ni scotúú ndeyi ya tāca mesa tēe cástáyi xūhún, jíin silla tēe cáxīcō paloma.

16 Te tu ní jéhe ya jnūhun jeē yáha ñayuu ini templo jíin ndajniñu ndiso i.

17 Te ni steén yā jnūhun nuū i, achí yá:

Yósó núū tútu iī jeē cahán Yaā Dios: Vehe ri chi vehe nuū cájicān tahu ñayuu tācá nación cúu, achí yá. Te máá ró jijnáhan ró chi nájnūhun yaū cava ñacūlhna ní canasáha ró, achí yá.

18 Te tēe cástéén tutu ley Yaā Dios jíin sūtū cácujehnū, ni cajini de jnūhun yáha, te ni quejé de cánducú de modo ndese cahni de ya. Chi cáyūhú de jeē ndujéhnū ga máá yá vésú máá de, chi tāca ñáyuu yōhyo cácusī ni i cájini i jnūhun stéén yā.

19 Te jeē cuácuaa, te ni quenda ya ñuu Jerusalén cuahān yā.

*Jeē ni ichī nundēhe higo
(Mt. 21.20-22)*

20 Te jenéhen inga quiṽi ni nayāha ya jín de cuahān yā. Te ni cajito de jeē nundēhe higo un je ni ichī nde yoho.

21 Yūcuán na te ni nucūhun ni Pedro, te ni cahān de jín yá:

Maestro, cundēhe ní nundēhe higo jeē ni cahān ni núu, te vijna je ni ichī caján, áchí de.

22 Te ni cahān Jesús jín de:

Candíje ró jéē sāha Yaā Dios jeē jicán rō.

23 Chi jendaá cahán rī jín ró, núu ndé ñāyuu cahān i jeē cújiyo yucu yáha quihīn nde nuū mar, te núu tú nacani síquī ni i, chí sa suhva candíje i jeē cóo nájnūhun ni cahān i, yūcuán na te cundaā jeē ni jícān i.

24 Jeē yúcuan cáhān rī jín ró, táca jéē cacán tahu rō, te núu candíje ró jéē nihín rō, te nihīn rō.

25 Te jeē cájicān tahu rō, te cone cáhnu ni rō nuū ñāyuu casáha cuēchi síquī rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró.

26 Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, áchí yá.

*Siquī jeē ndíso jniñu Jesús
(Mt. 21.23-27; Lc. 20.1-8)*

27 Yūcuán na te ni najinū tucu ya ñuu Jerusalén. Te jica

cuu ya ini templo cáhnu. Te sutū cácujeñnu jín téē cástéén tutu ley Yaā Dios jín téē jéñnu cándacu jniñu, ni quecoo de nuū yā.

28 Te ni cacajnūhún de ya:

¿Ndé ní nihīn jniñu ró jéē sāha ró jniñu yáha? ¿Te ndé ñn ni tee jniñu síquī rō jeē sāha ró súcuan? áchí de.

29 Te ni cahān Jesús:

Suni ruhū, cajnūhun rí rohó ñn jnūhun jínáhan ró. Te núu cuu stío cuñí rō, yūcuán na te cachi rī nuū rō ndé ní nihīn jniñu rí jeē sāha rí jniñu yáha.

30 ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca téē? Cachi nuū rī, achí yá.

31 Yūcuán na te ni canda-jnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jín yó: Núu súcuan ¿te najehē tu ní cáccandíje ró de?

32 Te núu cahān yō jeē ñāyuu ni catee jniñu un síquī de, te quitī ni ñāyuu nuū yō, achí de cácahān maá de.

Chí cáyuhú de jeē quitī ni ñāyuu, chí ndivii i cáccandíje i jeē téē ni nacani jnūhun Yaā Dios ni cuu ndije Juan.

33 Jeē yúcuan ní cacahān de jín yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rí sāha rí jniñu yáha, áchí yá.

*Jnūhun yátá síquī tēe néé
cásajniñu nuū uva*

(Mt. 21.33-46; Lc. 20.9-19)

12

1 Te ni quejéé yá cahán yā jnūhun yátá jíin de jíjnáhan de:

Íin tēe ni nachuhun de cuehē uva, te ni jesi de corral, te ni sáha de ñn nuū cúhun ndehē un táxín. Te ni sáha de ñn vehe súcún návāha cuu coto de ní cáhnu.

7 Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

2 Te máá tiempo ndutútú uva, te ni tají de ñn mozo de cuanuquīhin sava uva nuū tēe cásájniñu ún.

3 Te tēe un ní cajni de mozo un, te ni cacani de i, te ni canatají de i cuanuhun i súcuan-ni.

4 Yūcuán na te tēe chíí uva un ní tají tucu de ñga mozo cuahān. Te tēe cásájniñu un ní cajēhe de yuū xiní mozo un, te ni castújí de, te ni cacahān ndevāha de nuū.

5 Te tēe chíí uva ni tají tucu de ñga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

6 Te tēe chíí uva, íyó ñn sēhe de jeē maní ndasí de jíin. Te jeē sándihí na ni tají de sēhe de un cuahān nuū tēe cásájniñu. Te jéni ni de: Tēe ún chi cuatáhú de jíjnáhan de nuū séhe ri.

7 Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí.

8 Te ni cajni de i, ni cajehni de i, te ni cascáne de i ñga lado. Achí yá.

9 Yūcuán na te ni cajnūhun yá de:

Núu súcuan ¿te ndese sáha tēe chíí uva un? Ndiñi de te cahni de tēe cásájniñu ún, te cuāha de ñn hun cáá uva un núu ñga sava tēe sájniñu nuū.

10 ¿Te á ná tu cahu ró jnūhun yáha jeē yosó núu tútu ñi, jeē ruhū cúu nájñūhun ñn yuū? Chi áchí tutu:

Yuū jeē ní casquéhichí tēe cájeni vehe,
yuū yáha nduu jeē quítuu vehe.

11 Máá Jítoho yō Yaā Dios ni sáha ya súcuan, te cánaa ni yō jíto yó jniñu yáha.

Achí tutu, achí yá.

12 Yūcuán na te ni canducú de modo jni de ya. Chi ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te siquī jeē cáyūhú de jeē quítí ni ñayuu, te ni castóo de ya te cuango de.

Siquī xūhun renta

(Mt. 22.15-22; Lc. 20.20-26)

13 Yūcuán na te ni catají de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā ñn jnūhun jeē nihín de cuēchi siquī yā.

14 Te ni quecoo de, te ni cacahān de jíin yá:

Maestro, cájini na jeē tēe cáhán ndaā cúu ní, te tu yúhú ní jeē cahán ni ñn ñayuu siquī ní. Chi tu sáha ní cuenta ndese cúu ñn ñn i, chi ñnuú-ni sáha ní jíin i. Te stéén ndaā ní ndese squícu ñayuu nuū

Yaā Dios. ¿Te á íyó váha jeē chúnaa yō renta nuū rey nación Roma jeē jnái nación yō, chí tuú? ¿A chúnaa yō, chí má chúnaa yō? Achí de jín yá.

15 Te máá yá jiní yā jeē stahú-ni de, te ni cahān yā jín de:

¿Najehē cájito ndee rō ruhū? Cuāha ñn xūhún na cóto ri, achí yá.

16 Te ni cajēhe de xūhún. Te ni jito ya, te ni cajnūhun yá de:

¿Ndé ñn nuū cúu jeē ndee nuū xūhun yáha, te ndé síhví cúu jeē ndee yáhá?

Te ni cacahān de jín yá:

Nuū jín síhví rey un cúu, áchí de.

17 Yūcuán na te ni cahān yā jín de:

Núu súcuan te nacuāha rō núu rey un jéē yíhi cuenta nuū de, te nacuāha rō núu Yaā Dios táca jéē yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

Jeē ní cacajnūhún de siquī jeē nátecu ndīyi

(Mt. 22.23-33; Lc. 20.27-40)

18 Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndīyi. Te ni cacahān de jín yá siquī ñn jnūhun, áchí de:

19 Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuñi i nuū ndīyi ñani de, áchí tutu.

20 Núu súcuan te ni íyo uxā ñani. Te tēe núu ní quiñáhan de jín ñahan. Te ni jihí de, te tú sēhe de ní íyo.

21 Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe unī.

22 Te ndihúxá de ni condeca de ña, te ni ñn de tú sēhe de ní íyo. Te jeē sándihí te suni ni jihí ñahan ún.

23 Núu súcuan te núu na nátecu de jínáhan de quiñáhan de ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jín yá.

24 Yūcuán na te ni cahān yā jín de:

Yōhoyo cástívi rō jnūhun siquī jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndīyi.

25 Chi quiñáhan de nátecu ndīyi, te tuá na jnūhun quiñáhan tēe jín ñahan coo. Chi coo i nájnūhun ndajéhé Yaā Dios andiví.

26 Te siquī jeē nátecu ndīyi, ¿á tu ní cácahu rō tutu ní tee Moisés, ndese ni cahān Yaā Dios jín de mēhñu yúcū jeē cayú yáñuhún? Máá rí cúu Yaā Dios Abraham jín Isaac jín Jacob, achí yá jín Moisés.

27 Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōhoyo cástívi rō jnūhun núu súcuan. Achí yá jín de.

Jniñu cánuú ndasí gá jeē ní ndacu Yaā Dios
(Mt. 22.34-40)

28 Te ni quee ñn tēe stéén tutu ley Yaā Dios, te ni jini de jeē castíhí jnáhan tēe un jíin Jesús. Te ni jini de jeē váha ni nastió cuíñí yā jñuhun. Te ni cajñuhún de ya:

¿Ndé ñn cúu jñuhun ndácu jniñu cánuú ndasí gá nuū tāca gá jniñu ni ndacu ya jenahán? áhí de.

29 Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñn-ni ya iyó.

30 Núu súcuan te coo maní ndasí ró jíin máá Jítóho rō Yaā Dios, nde jnáā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ní jeē níjnūní rō, jíin ní fuerza rō. Yāha cúu jniñu ndácu ya jeē cánuú ndasí gá.

31 Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró. Tuá inga jñuhun ndácu jniñu cánuú gá iyó, chí suu máá jēe yáha-ni. Achí yá jíin de.

32 Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chí ndaā chí iyó ñn-ni Yaā Dios, te tuá na inga yā iyó.

33 Te cánuú jēe coo maní ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ni yō jnáhan yó nájnūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiti jíin tāca gá

jeē socó yō nuū yā. Achí de jíin yá.

34 Yūcuán na te ni jini Jesús jeē váha ni stió cuíñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chūndeyí ni de cajñuhún de ya.

Siquí jeē cúu Cristo sēhe yucūn David

(Mt. 22.41-46; Lc. 20.41-44)

35 Te stéén Jesús jñuhun ini templo, te ni cahān yā:

¿Ndese cúu jeē cáhān tēe cástéén tutu ley Yaā Dios jeē Cristo cúu sēhe yucūn David?

36 Chí máá David suhva ni cahān de jñuhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū cujéhnu ró,

te na sáha ri jeē quende rō poder tāca jēe cájito uhū rohó.

Achí Yaā Dios. Achí David.

37 Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áhí yá.

Te ñayuu cuehē, cánujnahan ni i cájini nahín i tāca jñuhun cáhān yā.

Jeē ni cáhānyā jeē iyó cuéchi de jínáhan de

(Mt. 23.1-36; Lc. 11.37-54; 20.45-47)

38 Te stéén yā jñuhun, te ni cahān yā jíin i:

Coto má candíje ró tāca tēe cástéén tutu ley. Chí cácusí gá

ni de cáñuhun de sahma cáni jeē steen jeē cujéhnun de, cájica cuu de jíin. Te cánujnahán ni de jeē cahán yíñúhún ñáyuu jíin de ini calle.

³⁹ Te cánujnahán ni de cucōo de nuū silla yíñúhún gá ini vehe íi sinagoga, jíin silla yíñúhún gá nuū víco cáyeji ñayuu.

⁴⁰ Te cáquende de vehe ñahan ní caquendōo ndáhú. Te nahán cájicān tahu de návāha caní ni ñayuu jeē tú na cuēchi de. Tēe yáha jíjnáhan de chí xeēn gā ndoho de castigo. Achí yá.

Jeē ni sócō ñahan viuda xūhún
(Lc. 21.1-4)

⁴¹ Te ñn quíiví néne Jesús ini templo ichi núú tāca yéjnū nuū cásocō i xūhún. Te jíto ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún.

⁴² Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yejnū ún.

⁴³ Yūcuán na te ni cana ya tēe cáscuáha jíin yá, te ni cahán yá jíin de:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca ñáyuu cucá.

⁴⁴ Chí tācá i ni casocō i jeē ni ndóo síquí xúhun cuéhē i. Te ñahan yáha, vēsú ndahú ndóho ña, te ni chuhun ndihi ña jeē cótecu ña. Achí yá jíin de.

Jeē ní cachi yā jeē náā templo
(Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te ñn tēe scuáha jíin yá ni cahán de:

Maestro, condēhe ní ná luu jíto tācá vehe yáha jéē cúu templo, jíin tāca yúū jeē ní cuvāha, áchí de.

² Te ni cahán yā jíin de:

Tācá vehe náhnu yāha jéē cájito ró, chí ma cóso jnáhan ga ni ñn yuū, chí ndihi jnanū. Achí yá.

Na seña coo nuū cuácuyajni ndihi ñayiví
(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sín de ya:

⁴ Castūhun ní nuū ná, ¿ndé quíiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ní cahán ní? áchí de.

⁵ Te ni cahán yā jíin de:

Coto ró jéē ma stahú ni ñn de róhó.

⁶ Chí quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

⁷ Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quíiví ndihi ñayiví.

⁸ Chí ndonda nación síquí inga nación, te ndonda ñuu

siquī inga ñuu jeē cuajnáhan. Te cháha chúcuan jñāa, te coo jnamā, te ndonda ñayuu siquī jnáhan i. Te tāca jéē yáha cácuu jñūndóho quejéé xíhna ñúhún gá.

9 Te condito ró máá ró, chi nastúu i róhó núū tāca tóhō, te ini tācá vehe i sinagoga cani i róhó. Te quindecia i sava ró núū tācá gobernador jíin núū tāca rey, te cahān i cuēchi siquī rō siquī jeē cácañdije ró rúhū. Te súcuan te cuu nacani ró jnúhun ri nuū de.

10 Te jíni ñúhún jéē xíhna gā cuitē núū jnúhun nuū tācá nación ndese jnáma ri i, te sáá te ndihi quivī.

11 Te núu ni cajñi de róhó cuángoo de jíin ró nuū tāca tóhō, te ma nácani ni rō xíhna gā ndese stío cuiñi rō nuū de te cācu ró. Chi máá hora un te máá Yaā Dios cuāha ya jnúhun nuū rō ndese cahān rō, te jnúhun ún cahān rō. Chi nasūu máá ró cúu jeē cahān, chi Espíritu Santo cúu jeē cahān.

12 Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jíin náná jeē cahni.

13 Te tāca ñayuu quitī ni i nuū rō jeē siquí ruhū. Te ñayuu cuiñi ñihin jíin jnúhun ri nde quivī jínu, chi cācu i.

14 Te Daniel, tēe ni nacani jnúhun Yaā Dios, ni tee de jnúhun iin tēe néé jéé quíji. Te róhó jéé cácahu tutu ún, na jécūhun ni rō. Chi iin quivī te cuni rō jeē sáha ndevāha de jeē stívi de tācá ndajñiñu i

ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

15 Te ñayuu cáyūcu núū quēhe, ma ndívi i ini vehe jeē quénehen i ndajñiñu i, chi cánuú cunu yachī i návāha cācu i.

16 Te ñayuu cáhīin nuū itu, ma ndíji i vehe jeē quíhin i sahma i.

17 Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña.

18 Te cacān tahu rō jeē ma quíji jñūndóho un jéé cunu ró máá tiempo cúun yuhvā.

19 Chi jeē quejéé un te coo cuehē jñūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jñūndóho ún te ni ma cóo ga jeē súcuan.

20 Te núu tú nastíyi máá Jítóho yō Yaā Dios tiempo jñūndóho ún, te ni iin ñayuu ma cácu cuiti i. Te jeē siquí ñayuu cácañdije jeē ní nacāji ya, jeē yúcuan nastíyi ya tiempo un.

21 Núu súcuan te núu iin ñayuu cahān jíin ró: Yáhá condēhe ró íne Cristo, chí: Yūcuán condēhe ró íne ya, achi i, te ma candije ró jéé cahán i.

22 Chi canecoo tēe cástáhú te cahān de jeē Cristo cúu de, chí cahān de jeē tēe nácani jnúhun Yaā Dios cúu de. Te sáha de jñiñu jénu jeē naa ni ñayuu coto i, návāha stáhú de nde máá ñayuu ní nacāji ya, te

núu na cúu.

²³ Te ndito na cóo ni rō, chi je ni castūhun rí nuū rō vijna nde ná tu coo.

Ndese coo quiṽ ndiji Yaā ní nduu tēe

(Mt. 24.29-35, 42-44; Lc. 21.25-36)

²⁴ Te quiṽ ún, núu je ni ndihi jnūndóho ún, te cujnúú níandii, te yoō ma ndíi gā.

²⁵ Te ningoo quiṽ in andiví. Te tāca jēe in andiví chi quisi i.

²⁶ Yūcuán na te coto ñayuu nuū maá rí, Yaā ní nduu tēe, ndiji ri jín vícō, te condiso ri cuehē poder, te yōhyo luu kujéhu rí.

²⁷ Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayiví, nde nuū ndíhi ñayiví te nde nuū ndíhi andiví.

²⁸ Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

²⁹ Te suni súcuan núu ni cajini rō jeē ní quejéé cúu tāca jniñu jeē ni cáhān rī, yūcuán na te na jécūhun ni rō jeē ní cuyajni quiṽ ndíji ri, te yachí coo.

³⁰ Jendaá cahán rī jín ró jeē ma cúu ndíhi ñayuu jeē cóto jnūndóho ún, chi nde squícu ndíhi jniñu ún.

³¹ Andiví jín ñáyiví chi naa, te tāca jnúhun cáhān rī chi ma náā, chi ndíhi squícu.

³² Te quiṽ jín hora jeē ndíji ri, tú ni in ñayuu jiní, ni máa ndajéhé cáhīyo andiví, ni máa

rí, Sēhe Yaā Dios. Chi máá in ni Tátá rī cúu jeē jiní.

³³ Núu súcuan te na cócuhun ni rō tāca jnúhun yáha, te ndito na cóo ni rō, te cacān tahú rō, chi tu cájini rō na quiṽ ndíji ri.

³⁴ Chi coo nájnūhun in tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha in in de. Te ni ndacu de jniñu nuū tēe ndito yéhyí jēe na cóndito de.

³⁵ Te suni súcuan róhó jijnáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndíji ri, á jēe cuácuaa, chí ñuu, chí jēe cána líhli, chí jénéhen.

³⁶ Chi in sanaa-ni te ndíji ri, te coto ró jēe ma nánihīn rī rohó jēe tu ndíto ró.

³⁷ Te jnúhun cáhān rī jín ró jijnáhan ró, suni cáhān rī jín ndivíi ñayuu: Ndito na cóo ni rō jijnáhan ró. Achí yá.

Jeē ní casquíjnahān de jnúhun jeē jni de Jesús

(Mt. 26.1-5; Lc. 22.1-2; Jn. 11.45-53)

14

¹ Te cúmanī uū gā quiṽ te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujuhnu jín tēe cástéén tutu ley, ni canducú de modo ndese jni de Jesús jín jnúhun stáhú, te cahni de ya.

² Te ni cacahān de:

Ma jní yó de máa quiṽ víco, chí ndonda ñayuu siquī yō, achí de.

Jnūhun ñahan jeē ní chuhun perfume xinī yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyī stehyú. Te níní yéji yā staā, te ni quee ñin ñahan nuū yā, ndáhá ña ñin frasco yuū luu jeē ñūhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā.

⁴ Te sava tēe cáhīin yūcuan ní caquitī ni de, te ni cacahān de:

¿Najehē cúu jeē náā saá-ni perfume jiñā?

⁵ Chi cuu xīcó yahu yó víhyá gā unī ciento denario, te cuāha yo núū ñáyuu ndahú núú, áchí de.

Te ni cacahān sōo de jíin ña.

⁶ Te ni cahān Jesús:

Ma stáhān rō ña. ¿Naun cásáha ró jēē nácani uhū ni ña? Chi ñin jniñu váha cúu jeē ní sáha ña jíin rí.

⁷ Chi níní coyūcu ñáyuu ndahú jíin ró, te núu cācuni rō te cuu sáha vāha ró jíin i. Te ruhū chi tuá condee rī jíin ró.

⁸ Chi ni sáha ña ndihī jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū.

⁹ Jendaá cahán rī jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ní sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰ Yūcuán na te Judas Iscarote, ñin jeē ndihúxí uū tēe cáscuáha un, ní jehēn de nuū sutú cácujeñhu, ni sándaā de jíin jēē nastúu de Jesús nuū jijnáhan.

¹¹ Te nuū ní cajini sōho sutū un jēē cahán de, te ni cacusiñ ni, te ni cajejnūhun jeē cuáha xūhun núū de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaa Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jēē quisátūhva ná cuxíni ní vico pascua? áchí de.

¹³ Te ni taji yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quiyi ndute. Te condiquin rō de quihīn rō jíin de.

¹⁴ Te vehe jeē ndívi de, yūcuan cahān rō jíin tēe chí vehe: Achí máá Maestro; ¿Ndé ñin cúu cuarto vehe ní cuāha núú ní núu cuxíni ya vico pascua jíin tēe cáscuáha jíin yá? achí rō.

¹⁵ Te máá de stéén de ñin cuarto cáhnu nde xinī véhe jeē je iyó túhva. Te yūcuan sátūhva ró jēē cuxíni yó, áchí yá jíin de.

16 Te cuangoo tēe cáscuáha ún, te ni jinūcoo de ñuu, te ni canihin de nájñuhun ni cahān yā jín de. Te ni casátuhva de jeē cuxíni ya vico pascua.

17 Te jeē cuácuaa, te ni quee ya jín ndihúxí uū de.

18 Te ni cacucōo de mesa cáyeji de staā, te ni cahān yā:

Jendaá cahān rī jín ró jeē ñn róhó jéē yéji jín rí, nastúu ro rúhū, achí yá.

19 Yūcuán na te ni cacucuíhyá ni de, te ná ñn ná ñn de ni cacajñuhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

20 Te ni cahān yā jín de:

Ñn jeē uxí uū rō jeē cáyeji cáhnu jín rí ñn cohō, suu nastúu ruhū.

21 Te ruhū, Yaā ní nduu tēe, jendaá cúu jeē quihín rī cuu rī, nájñuhun yósó jñuhun ri nuū tútu ñ. Te nacā xeēn ndohó tēe nastúu ruhū. Vāha ga núu tu ní cácu tēe un núu, áchí yá.

22 Te níni cáyeji de jín yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jín yá. Te ni cahān yā:

Caji rō jijnáhan ró, chi yāha cúu yiquí cúñu rī, achí yá.

23 Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihí ndihí de.

24 Te ni cahān yā jín de:

Yāha cúu niñ rī jeē cuáha ri jeē cúu contrato jeé, te cati jeē ndundoo cuéchi cuehē ñayuu.

25 Te jendaá cahān rī jín ró jeē ndé vijna te ma cóho

ga rī ndūxi ndehē uva yāhá, chi nde quiji quivī ndacu Yaā Dios jññu ññ ñayiví, te sáa te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

26 Te ni jita ya ñn yaa ñ jín de jijnáhan de. Te ni quenda ya cuahān yā jín de nde yucu Olivos.

27 Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jñuhun ri nuū tútu ñ, ni cahān Yaā Dios: Cuáha ri jñuhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí.

28 Te jeē nátecu rī, te xīhna ruhū cosnúu rí quihín rī región Galilea, te sáa te najinūcoo ró, áchí yá.

29 Yūcuán na te ni cahān Pedro:

Vēsú ndihí de na náyūhú de, te máa ná chi ma náyūhú cuiti ná, áchí de jín yá.

30 Te ni cahān yā jín de:

Jendaá cahān rī jín ró jeē jecuáa vijna, nde ná tu cana líhli uū jínu, te yūhu ró jeē jññ ñayuu rohó, te uní jínu cahān rō jeē tu jíní rō ruhū, achí yá.

31 Te ni cahān teyí de jín yá:

Vēsú núu cuu na jín ní, te ma cahān cuiti na jéé tu jíní na níhín, áchí de.

Te suni súcuan ni cacahān ndihí de.

Jeē ni jicān tahú yā nuū huerto Getsemaní

(Mt. 26.36-46; Lc. 22.39-46)

32 Yūcuán na te ni jinū Jesús jín tée cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī cacān tahú rī, achí yá.

33 Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxií ni yā jeē quíji jnūndóho siquī yā.

34 Te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, áchí yá.

35 Te ni jica ya jecu gā, te ni jecuiñī yití yá ni jequin ya nuū yā nuū ñúhun. Te ni jicān tahú yā nuū Yāā Dios jeē núu cuu te ma ndóho ya jnūndóho jeē quejéé quiji siquī yā.

36 Te suhva ni cahān yā:

Tátá maá ná, ndihi-ni jniñu cuu sáha máá ní. Te tejiyo ní jnūndóho yáha jéé ma quíji siquī ná. Te nasūu jéé cuní maá ná, chí jeē cuní maá ní na cóo, áchí yá.

37 Te ni ndee yā nuū ndinúní tée cáscuáha jín yá, te ni jito ya jeē cáquixí de. Te ni cahān yā jín Pedro:

Simón, ¿á quíxí rō? ¿A tu ní cánda ró condito ró jín rí vēsú ñn hora?

38 Coó ndito ni rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé rōhó. Chí cuní ndije ánuá rō squícu vāha ró, te yiquí cúñu rō chí tu fuerza, achí yá.

39 Te ni jehēn tucu ya, ni jicān tahú yā, te suni jnūhun yúcuan ní cahān yā.

40 Te ni ndee ya nuū de, te ni jito ya jeē cáquixí tucu de, chí yōhyo cájī de māhná. Te tuá ni cánihīn de jnūhun stíó cuiñí de nuū yā.

41 Te ni ndee yā jeē vuelta unī, te ni cahān yā jín de:

Vijna te cusū rō te ndetātu ró. Te tuú chí je ni cuu, chí je ni quee hora, te ruhū, Yāā ní nduu tēe, natūu rī te jñī tēe cáhīyo cuéchi ruhū.

42 Ndocuiñī jijnáhan ró, chí je vēji tēe nastúu ruhū, te quihīn yō jín de. Achí yá.

Jeē ní cajñī de Jesús

(Mt. 26.47-56; Lc. 22.47-53; Jn. 18.2-11)

43 Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yu-jnu. Chí sutū cácujuhnu jín tée cástéén tutu ley jín tée jéhu cándacu jniñu, ni catajī de tēe ún.

44 Te Judas, tēe nastúu ya ún, je ni jēhe de ñn seña nuū tée un jijnáhan, chí ni cachi de:

Tēe jeē téchūhu rí un cúu. Te jñī ró jijnáhan ró quihīn rō jín, te ma siaá cuiti rō, achí de.

45 Te ni quee de nde nuū Jesús, te ni cahān de jín yá:

Maestro, Maestro, achí de. Te ni techūhú de ya.

46 Te tāca gā tēe un ní cajñī de ya, te cuango de jín yá.

47 Te ñn tēe íne jín yá ni tava de espada de, te ni jehnde

de sōho ñn mozo maá sūtū
cujéhnū ga.

48 Te ni cahān Jesús jíin
ñáyuu cuehē ún:

¿Te va tēe cuihná cúu ri jeē
véjicoo ró jíin espada jíin yu-
jnu jñi ró rúhū jeē súcuan?

49 Tāca quivī ni ine ri jíin ró
jijnáhan ró ini templo cáhnu,
ni steén rī jñūhun, te tu ní
cájñi ró rúhū. Te súcuan
cásáha ró návāha na squícujeē
cáhán tutu iī, achí yá.

50 Yūcuán na te ndihī tēe
cásuáha jíin yá, ni castóo de
ya, ni cajinu de cuango de.

Tēe suchí jeē ní jinu

51 Te ñn tēe suchí, ndíquín
de ya cuahān de jíin yá. Te
ndíi de máá ññ sahma cuitá.
Te ni cajñi tēe ún de.

52 Te máá sahma cuitá un ní
canihñ. Te ni jinu máá ññ-
ni de cuahān de.

Jeē ní indichi Jesús nuū junta tēe cácujehnū ga

(Mt. 26.57-68; Lc. 22.54-55,
63-71; Jn. 18.12-14, 19-24)

53 Yūcuán na te ni jinūcoo
de jíin Jesús nuū sutū cujéhnū
ga. Te tāca sūtū cácujehnū jíin
tēe jéhnū cándacu jñiñu jíin tēe
cástéén tutu ley, ni candutútú
de.

54 Te Pedro chi jíca-ni
ndíquín de ya, te ni jinū de
nde ini patio sutū cujéhnū ga.
Te ni cucōo de jíin táca policia,
násaā de ññhūn.

55 Te sutū cácujehnū jíin
ndihī tēe cásaaha junta cujéhnū
ga, ni canducú de cuēchi siquī
Jesús, chi cahni de ya cácuni
de. Te tu ní canihñ de.

56 Chi cuehē de ni cacahān
yaá síquī yā, te tu ní quíjnáhan
jñūhun ni cacahān de.

57 Yūcuán na te ni can-
docuiñī sava de, te ni catee
de cuēchi siquī yā, achí de:

58 Máá ná ni cajini ná cáhán
de jeē canu de templo yáha jéē
ní cuvāha ni casáha tēe, te nuū
uní quivī te nacani de inga jeē
násūu jíin ndaha tēe cuvāha,
áchí de. Achí jíjnáhan.

59 Te ni jñūhun yáha tu ní
quíjnáhan tucu jeē cácahān de
siquī yā.

60 Yūcuán na te sutū cujéhnū
ga ni ndocuiñī de nuū ñáyuu
cuehē ún, te ni cajñūhún de
Jesús:

¿Naun tu cáhán cuiti rō? ¿A
iyó ndáā jeē cácahān tēe yáha
síquī rō? achí de.

61 Te máá yá tu ní cáhán
cuiti yā, chi tú na vé ni stío
cuñí yā. Te sutū cujéhnū ga ni
cajñūhún tucu de ya:

¿A máá ró cúu Cristo, Sēhe
Yaā vāha jeē cujéhnū? achí de
jíin yá.

62 Te ni cahān yā:

Suu ri cúu. Te coto ró jéē
ruhū, Yaā ní nduu tēe, condee
rī lado vāha Yaā iyó poder,
te ndiji ri ichi ándiví jíin vícō,
achí yá.

63 Yūcuán na te sutū cujéhnū
ga ni jehnde de sahma de jeē
quití ndasí ni de, te ni cahān
de:

¿Ndé jíni ññhún gá yō tes-
tigo núu súcuan?

64 Chi je ni cajini ró jéē
cáhán de jñūhun ndevāha jeē
quití ni Yaā Dios, chi sáha de
máá de Sēhe Yaā Dios. ¿Te
ndese cájeni ni rō? Achí de.

Te ndihi de ni cacahān jeē na cūu yā.

⁶⁵ Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachi ndé iin cūu jeē ní cani rōhó, áchí de.

Te tāca tēe policia ni cacani de nuū yā.

Jeē ní cachi Pedro jeē tu jíin de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhiin de jíin Jesús. Te ni quee iin ñahan jéjníñu vehe sutū cujéhnu ga ún.

⁶⁷ Te ni jito ña nuū de jeē néne de násaā de yuñúhún. Te ni jito vāha ña nuū de, te ni cahān ña:

Róhó chi suni ni jica ró jíin Jesús, tēe ñuu Nazaret, achí ña.

⁶⁸ Te máá de tu ní cáchi de, chi ni cahān de:

Tu jíin rī de, ni tu jíin rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli.

⁶⁹ Te ñahan jéjníñu un ní jito tucu ña nuū de, te ni quejéé ña cáhán ña jíin ñayuu cáhiin yūcuán:

Tēe yáha suni jnāhan tāca tēe un cūu, áchí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jíin Pedro:

Jendaá ndije jeē suni jnāhan de cūu ró, chi tēe Galilea cūu ró, te inuú-ni cáhán rō jíin de jíināhan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíin rī tēe un jéé cácahān rō jnūhun de, áchí de.

⁷² Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jíinu, te yūhu ró te cahān rō unī jíinu jeē tu jíin rō ruhū. Te ni nacani ni de siquī jnūhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujeñnu ni candutútú de jíin tēe jéhnu cándacu jniñu, jíin tēe cástéén tutu ley, jíin ndihi tēe casáha junta cujéhnu ga, te ni casquijnáhan de jnūhun. Te ni cajihni de Jesús, te cuangoo de jíin yá nuū Pilato, tēe cūu gobernador.

² Te Pilato ni cajnūhún de ya:

¿A máá ró cūu Rey ñayuu hebreo? achí de.

Te ni cahān yā:

Suu ri cūu, nájñūhun cáhán rō.

³ Te sutū cácujeñnu un ní cacahān de cuehē cuēchi siquī yā.

⁴ Te Pilato ni cajnūhún tucu de ya:

¿Naun tu cáhán cuiti rō? ¿A tu jíin ró jéé cuehē cuēchi cácahān de siquī rō? achí de.

⁵ Te tu ní cáhán cuiti yā ni iin jnūhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúū yā

(Mt. 27.15-31; Lc. 23.13-25; Jn. 18.38-19.16)

6 Te íyó costumbre Pilato jeē quiví víco un siaá de ñn tēe íne vecāa, núu na-ni tēe cáconi ñayuu.

7 Te íyó ñn tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndīyí.

8 Te ni quecoo ñayuu cuehē, te ni cacahān i jíin Pilato jeē na sáha de nájñūhun íyó costumbre de.

9 Te ni cahān Pilato jíin i:

¿A tu cáconi rō jeē siaá rī tēe cúu Rey rohó ñayuu hebreo? achí de.

10 Súcuān ni cahān de, chí cúní de siaá de Jesús. Chí je ni jecūhun ni de jeē ní cacucuésun ni táca sūtū un cájito de ya, te jeē yúcuān ní quiijicoo jíin yá nuū de.

11 Te sutū cácujuhnu un ní cascáhán de ñayuu cuehē un jēe váha ga na cácan i jeē siaá Pilato Barrabás.

12 Yūcuán na te ni cajñūhún tucu Pilato:

Núu súcuān ¿te ndese cáconi rō jeē sáha rī jíin tēe jeē cacahān rō jeē cúu de Rey rohó ñayuu hebreo? achí de jíin i.

13 Te ni cacana jee i:

Cata caa ní de jicā cruz, na cúu de, achí i.

14 Te ni cahān Pilato:

¿Na cuēchi ni sáha de núu súcuān?

Te ñayuu un ní cacana jee tucu i:

Cata caa ní de jicā cruz, na cúu de, achí i.

15 Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jíin jéē cata caa de ya jicā cruz.

16 Yūcuán na te soldado un cuángoo de jíin yá ini patio palacio, jeē sácatā de nuū yā. Te ni canastútú de ndihí jnáhan de.

17 Te ni cachuhun de ya ñn sahma cuehé ndíhí jéē cúu sahma rey. Te ni casáha de ñn corona iñu, ni cachuhun de xiní yā.

18 Yūcuán na te ni cacana de:

Nacā jeē váha rey cúu Rey ñayuu hebreo, achí de.

19 Te ni cacani de yujnu xiní yā, te ni catesihí de nuū yā, te ni cajecuiñí yití de nuū yā, casáha de jeē chiñūhún de ya.

20 Te nuū ní cuu ni casácatā de nuū yā, te ni catava de sahma cuehé ndíhí un, te ni canachuhun de ya sahma máa yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

21 Te ñn tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejniñu soldado un de jeē cóndiso de cruz yā.

22 Te cuángoo de jíin yá ñn lugar nuū nání Gólgota, jeē cuní cahān Lugar Yiqui Xíní.

23 Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya.

24 Te ni cacata caa de ya jicā cruz. Te ni casáha de sorteo jeē siquí ndese nihīn ñn ñn de sahma ya.

25 Te cahīn ni cacata caa de ya.

26 Te jnūhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí.

27 Te suni ni cacata caa de uū tēe cuihná nuū uū gā cruz, ñn de lado váha ya, te inga de lado jecó yá.

28 Te ni squícu jnūhun cáhán tutu iī: Ni casquíjnáhan de ya jíin tēe cásáha neé, achí.

29 Te ñayuu cáyāha yūcuán cáscuicó i xinī i, te cácahān neé i:

Jājaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró.

30 Núu súcuan te jnama ró máá ró, te nuu ró jicā cruz viī, achí i.

31 Te suni súcuan ni cacahān catá sutū cácujuhnu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

32 Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jíjnáhan de.

Te tēe cándita caa jíin yá, suni súcuan ni cacahān neé de.

Jeē ni jihī Jesús

(Mt. 27.45-56; Lc. 23.44-49; Jn. 19.28-30)

33 Te nuū ní cuu cahuxī uū, te ni cunee ní cáhnu nde cahunī.

34 Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

35 Te sava ñayuu cáhīn yūcuan, ní cajini i jnūhun ún, te ni cacahān i:

Cuni nahín, chi cána de xinī Elías, tēe ni nacani jnūhun Yaā Dios jenahán, achí i.

36 Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, achí de.

37 Te máá Jesús ni cana jee ya, te ni jihī-ni ya.

38 Yūcuán na te sahma ndíta caa jeē ndihyú cuarto iī ini templo cáhnu, ni ndatā sava sava nde xinī te nde nuū jehé.

39 Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, achí de.

40 Te suni cáhīn sava ñahan, cándēhe jicá ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé.

41 Te ñahan yáha ní candiquín ña ya, ni cajejníñu ña nuū yā nde náa jica ya Galilea. Te suni cáhīn cuehē gā ñahan jeē ni jéngoo jíin yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

42 Te ni ini quivī ún. Te quivī sátūhva cúu, chi sajnē cúu quivī ndétátú.

43 Te ni quee José, tēe ñuu Arimatea. Te cúu de ñn tēe cújéhnú nuū junta cujéhnú ga. Te suni ñúhun ni de jeē quiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús.

44 Te Pilato chi náā ni de jeē yachí ni jihī yā. Te ni cana de capitán, te ni cajñuhún de tēe un núu je ni jihī yā.

45 Yūcuán na te ni cucáhnú ni de jeē ni cáhān capitán jíin de, te ni jēhe de jñuhun jeē quihin José yiqui cúñu yā.

46 Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quíndūji ndīyi, jeē ní caan jicā ñn cava. Te ni jesi de ñn yaū yuhu yáú un.

47 Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

1 Te ni ini quivī ndétátú, te María ñuu Magdala, jíin María naná Jacobo, jíin Salomé, ni cajeen ña tãcá perfume jeē quíchuhun ña yiqui cúñu yā.

2 Te jenéhen quivī domingo, jeē ní cane niāndii, te ni jinūcoo ña nuū ní yíndūji ya.

3 Te cáhān ña:

¿Ndé níhīn yō tēe tejiyo yaū ndihyú yuhu yáú? áchí ña.

4 Te ni candacoto ña, te ni cajito ña jeē jíe ni cujiyo yaū cáhnú un cuáhān.

5 Te ni quivīcoo ña ini yaū ndīyi. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña.

6 Te ni cáhān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhī jicā cruz. Tuá yā yāhá, chí je ni natecu yā. Yāhá condēhé ró nuū ní cachindūji de ya.

7 Cuánungo te cachi rō nuū tēe cáscuáha jíin yá, jíin núu Pedro, jeē xihna gā maá yá jinū Galilea, te saá te najinūcoo de. Te yūcuán coto de nuū yā, nájnūhun ni cáhān yā jíin de nde saá, áchí yá jíin ña.

8 Yūcuán na te ñahan un ní quendacoo ña nuū ní yíndūji ya, te cájinu ña cuangoo ña. Chi quísi i ña jeē cáyūhú ña. Te tu ní cácachi cuiti ña nuū ní ñn, chí cáyūhú ña.

Jeē ní nane Jesús nuū María ñuu Magdala

(Jn. 20. 11-18)

9 Te Jesús ni natecu yā jenéhen quivī domingo. Te xihna gā ni nane ndijin yā nuū María ñuu Magdala, ñahan jeē ní quenehen ya uxā tachī ini.

10 Te cuahān ña cuacastūhún ña nuū tãca tēe ni cajica jíin yá jeē ní nane ya nuū ña. Te cácuquíhyá ni de te cándahyū de.

11 Te nuū ní cajini de jñuhun jeē ní jito ña nuū yā jeē técu

yā, te tu ní cá candíje de jnūhun cáhān ña.

Jeē ní nane ya nuū uū tēe cáscuáha jíin yá
(Lc. 24.13-35)

¹² Yūcuán na te ni quenda-coo uū jnáhan tēe ún, cájica de cuahān de ichi rancho, te sūn modo ni nane ndijin yā nuū de.

¹³ Te ni canandicó de, ni cacastūhún de nuū tāca gá jnáhan de. Te ni tu ní cá candíje tucu jnáhan de jeē cácahān ndíndúú de.

Jeē ní tejniñu ya de nacani de jnūhun
(Mt. 28.16-20; Lc. 24.36-49; Jn. 20.19-23)

¹⁴ Te cúcuéé gá te ni nane ndijin yā nuū ndihúxí in de jeē cáyucú de mesa cáyeji de staā. Te ni cahān yā nuū de, chí nīhni ni de jeē tu cá candíje de jeē cácahān jnáhan de un, jéé ní natecu yā ni cajito de ya.

¹⁵ Te ni cahān yā jíin de:

Cuángoo jíin náhan ró ní ñayiví, te nacani ró jnúhun ri nuū tāca ñáyuu ndese jnáma ri i.

¹⁶ Te ñáyuu candíje te cuandute i, chí cācu i. Te ñáyuu tú candíje, chí jnahnū ndetū i.

¹⁷ Te ñáyuu candíje, sáha i tācá jniñu jéhnū yáha jeē steén jeē iyó rí jíin i: Jíin síhví rí quenehen i tachī ini ñáyuu. Te cahān i tijni yuhu jéé.

¹⁸ Te núu ni jniñi sanaa i coō, chí núu ni jhi i veneno, te ma sáha daño jíin i. Te suni soó i ndaha i siquī ñáyuu cácuñū, te nduvāha. Achí yá jíin de.

Jeē ní ndaaya cuanuhunya andiví

(Lc. 24.50-53)

¹⁹ Yūcuán na te nuū ní ndihi ni cahān maá Jítoho yō jíin de jíin náhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya.

²⁰ Te máá de ni quenda-coo de, ni canacani de jnūhun ya tāca lado ndese jnáma ya ñáyuu. Te máá Jítoho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndáá jnūhun cánacani de. Te ni cuu. Amén.

JNUHUN VAHA NI TEE SAN LUCAS

1 Cuehē tēe ni cajicu de ni catee yúcún de historia Jesús, tācá jniñu jeē ni sáha ya ni cajito yó.

2 Te ni catee de tāca jnúhun jeē ní cacastühun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya.

3 Te máá ná, suni ni nanducú yúcún ná tāca jnúhun ya, nde nuū ní quejéé. Te ni jeni ni na jéē suni íyó váha jeē téé cájí ná tāca jnúhun yáha núū ní, amigo Teófilo.

4 Te súcuan te cuni ni jéē íyó ndáa tāca jnúhun jeē ní cacastühún i nuū ní.

Jeē ní cachi ndajéhé jeē cacu Juan tēe scuándute

5 Tiempo jeē ní cuu Herodes rey región Judea, te ni ñyo ñn sutū ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún maá sūtū Aarón cúu ña.

6 Te ndindúú de cahīyo ndaā de nuū Yaā Dios, te ndaā vāha cásquicu de jniñu ndácu ley maá Jítoho yō Yaā Dios, cájito tāca ñáyuu.

7 Te tú sēhe de íyó, chi ñahan númá cúu Elisabet, te je jéhu ndindúú de.

8 Te ñn quiví te jéjníñu Zacarías nuū jniñu jeē cúu de sutū nuū Yaā Dios, chi ni quee quiví jeē ndívi grupo de.

9 Te ni casáha de sorteo, nájnūhun íyó costumbre sutū.

Te ni sáha tocar Zacarías jeē quiví de ini cuarto ñi templo Jítoho yō Yaā Dios, te cahmu de sūje cūtú.

10 Te hora jeē cayú sūje cūtú, te tāca ñáyuu cuehē cáhīn i fuera, cájicān tahu i.

11 Te ni cane ñn ndajéhé maá Jítoho yō nuū de, ñn ya lado váha altar nuū jéhu de sūje cūtú.

12 Te ni cunéé ni Zacarías ni jito de nuū yā, te yōhyo ni yūhú de.

13 Te ni cahān ndajéhé un jín de:

Zacarías, ma yūhu ró, chi je ni chihi Yaā Dios cuenta jeē ni jícān tahu rō. Te ñasihí ró Elisabet, scácu ña ñn sēhe yí, te snání ró i Juan.

14 Te yōhyo cusī ni rō. Te cuehē ñayuu cusī ni jeē cácu i.

15 Chi kujéhu sēhe ró sáha máá Yaā Dios. Te ma cóho i viño ni ndixi cuí. Te cunuú máá Espíritu Santo jín i, nde ná tu cacu i.

16 Te sáha i jeē cuehē ñayuu nación rō Israel ndívicoo i nuū Jítoho i Yaā Dios.

17 Te xīhna gā Juan quiji nacani jnúhun Jítoho yō Jesús, te sáa te quiji ya. Te sáha i nájnūhun ní sáha Elías, tēe ni nacani jnúhun Yaā Dios jehahán, te conevāha i poder jeē nácani i jnúhun, nájnūhun ní conevāha Elías. Te sáha i jeē tāca tátá ndumaní de jín sēhe de. Te suni sáha i jeē ñáyuu ñhni ni cuatáhú i nuū Yaā Dios, nduu i ñayuu ndaā. Súcuan sátūhva i ñayuu návāha candíje i máá Jítoho yō jeē quíji ya. Achí ndajéhé.

18 Te Zacarías ni cajnūhún de ya:

¿Ndese cucáhnū ni na núu jendaá cúu? Chi tēe jéhnū cúu ná, te suni jéhnū ñasihí ná, áchí de.

19 Te ni cahān ndajéhé un jíin de:

Máá rí cúu Gabriel, te íne rí nuū Yaā Dios, jejniñū rí nuū yā. Te ni tají yá ruhū vēji rí cahān rī jíin ró, te nácani rí jnūhun vāha yāha núu rō.

20 Te jeē tu ní cándíje ró jnúhun ni cahān rī, te cuñhín ró, te ma cúu cahān rō, chi nde na cácu sēhe ró. Te squícu nahín jnúhun cáhán rī yāhá, na quée quivī, achí ndajéhé.

21 Te ñayuu cáhīin ichi fuera, cándetu i Zacarías, te cájeni ni i na vé ni cuu jeē cucuéé de ini cuarto i templo.

22 Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de iñ jeē ni stéén yā nuū de. Te máá seña na ni sáha de nuū i, chi ni cuñhín de.

23 Te nuū ni jínu quivī ni jejniñū de ini templo, te cuanuhun de vehe de.

24 Te ni cuu jecu quivī, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhén ña. Te jéni ni ña:

25 Súcuān ni sáha máá Jítoho yō jíin rí, te ni tejiyo ya jnūhun jeē cúcanu rī nuū ñáyuu jeē tú sēhe rí, jéni ni ña.

Jeē ní cachi ndajéhé jeē cacu Jesús

26 Te nuū iñú yoō, te ni tají Yaā Dios ndajéhé yā Gabriel,

ni jehēn yā iñ ñuu naní Nazaret, ndañū Galilea.

27 Te ni jehēn yā nuū iñ sūchi síhí nání María. Te je ni cundaā jeē quijnáhan ña jíin iñ tēe nání José, te sēhe yucūn rey David cúu de.

28 Te ni quivī ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhyo ndetū gā cúu ró núu tāca gā ñahan, áchí yá.

29 Te nuū ni jíto ña nuū yā, te ni cunéé ni ña jeē súcuān cáhán yā, te jéni ni ña naun cáhán yā súcuān jíin ña.

30 Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē vāha jíin ró.

31 Te jecūhun sēhe ró te scácu ró iñ sēhe yí, te snání ró i Jesús.

32 Te kujéhnū i, te conaní i Sēhe Yaā kujéhnū téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájnūhun jíi i David ni cuu de rey.

33 Te ní cáni ndacu i jniñū nuū ñáyuu nación Israel. Te ma ndíhi cuiñi jeē ndácu i jniñū. Achí ndajéhé.

34 Yūcuān na te ni cajnūhún María:

¿Ndese coo jeē ni cáhán ní? Chi ná tu coo yí ná, áchí ña.

35 Te ni cahān ndajéhé un:

Máá Espíritu Santo quiji siquī rō, te poder maá Yaā kujéhnū téyí sáha iñ jniñū jéhnū jíin ró. Te jeē yúcuān máá súchi íi jeē cácu, quiñi cuenta i nuū Yaā Dios, te

cahān ñayuu jeē Séhe Yaā Dios cúu i.

³⁶ Te suni cástūhun rí nuū rō jeē jnāhan rō Elisabet, suni scácu ña ñn sēhe vēsú je jēhnu ña. Te vijna iyó íñū yoō jeē tuá cácahān ñayuu jeē cúu ña ñahan númá.

³⁷ Chi ndihi-ni cuu sáha Yaā Dios, te tu iyó ni ñn jeē ma cúu sáha ya, achí ndajéhe un.

³⁸ Yūcuán na te ni cahān María:

Cuu núu súcuan, chi sáha ná táca jniñu ndácu Jitoho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhe un cuáhān-ni ya.

Jeē ni jécondēhé María Elisabet

³⁹ Te ni cuu jecu quivī, te yachī cuahān María, ni caa ña yucu cuahān ña ñn ñuu región Judea.

⁴⁰ Te ni jinū ña vehe Zacarías, te ni cahān ña jíin Elisabet.

⁴¹ Te nuū ní jini Elisabet jeē cahán María jíin ña, te sūchi ñúhun chīji ña ni canda-ni i. Te ni cunuú Espíritu Santo ini anuá ña.

⁴² Te ni cahān jee ña:

Ni sáha Yaā Dios jeē yóhoyo ndetū gā cúu ró núu táca gá ñahan, jíin jéē yóhoyo ndetū sēhe ró.

⁴³ ¿Te ndese cúu jeē ní quee naná máá Jitoho rī nuū rī? Chi tu cújēhnu cuiti rī.

⁴⁴ Chi jeē ní jini-ni ri jnūhun ni cahān rō jíin rí, te sūchi ñúhun chīji ri ni canda i jeē cúshī ni i.

⁴⁵ Te nacā ndetū rō jeē ní candíje ró, chi squícu nahín

tāca jnúhun ni cahān maá Jitoho yō jíin ró. Achí Elisabet.

⁴⁶ Yūcuán na te ni cahān María:

Cáhán rī jeē cújēhnu ndasí máá Jitoho yō Yaā Dios, ⁴⁷ te cúshī ni rī jíin Yaā Dios, Yaā jnáma ruhū.

⁴⁸ Chi ni sáha ya cuenta ruhū, vēsú tu cújēhnu rí.

Te na squícu ri jniñu ndácu ya.

Te nde vijna te táca ñayuu jeē nácacu, cahān i jeē yóhoyo ndetū rī.

⁴⁹ Chi Yaā jnā ndihi poder, ni sáha ya jniñu jēhnu jíin rí.

Te Yaā ñi ndoo cúu ya.

⁵⁰ Te ní cáni cundáhú ni yā táca ñayuu ndíso iyo nuū yā.

⁵¹ Ni sáha ya jniñu jēhnu jíin poder yā,

chi ni scúnu ya ñayuu casándúxí máá,

⁵² te ñayuu cácujeēhnu, ni quende ya jeē cújēhnu i.

Te ñayuu ndahú chi ni sajeēhnu ya i,

⁵³ te ñayuu cájiī sōco ni jēhe ya jeē cáji vāha i.

Te ñayuu cucá ní natají yá i súcuan-ni.

⁵⁴ Te ni chindéé ñáhán yá yohó, ñayuu nación Israel, jeē cácuu yó mozo yā,

te tu náā ni yā jeē cundáhú ni yā yohó.

⁵⁵ Chi súcuan ni jejnūhun ya nuū táca jíi yō,

nuū Abraham jíin táca yúcūn de jeē cóo ní cáni.

Achí María.

56 Te ni condee ña jíin Elisabet nájnūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

57 Te ni jinū quivī jeē scácu Elisabet sēhe ña, te ni scácu ña ñin sēhe yíí.

58 Te tāca ñáyuu ndeé yajni jíin ña jíin táca jnáhan ña, ni cajini i jeē yóhyo ni cundáhú ni Yaā Dios ña, te ni jengoo i ni cacahān i jnūhun sīi ni jíin ña.

59 Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquin un. (Te yūcuan cúu ñin jnunī nuū yiqui cúñu tāca sūchi yíí hebreo jeē steén jeē cácuu i ñayuu Yaā Dios.) Te snání i sūchí un sīhvī tátá i Zacarías nuú.

60 Te ni cahān naná i:

Ma cúu, chi Juan conaní i, áchí ña.

61 Te ni cacahān i jíin ña:

¿Te naun? Chi tú ni ñin jnáhan ró nání súcuan, áchí i.

62 Yūcuán na te jíin seña ni cacajnūhún i tátá sūchí un ndese cúní de jeē cónaní i.

63 Te máá de ni jicān ñin tutu, te ni tee de: Juan conaní i. Te tāca ñáyuu un ní canaa ni i cájito i.

64 Te ni nduvāha Zacarías jeē ní cuñhín de, te ni quejé de cáhán de jeē yóhyo vāha Yaā cúu Yaā Dios.

65 Te tāca ñáyuu ndeé yajni jíin de, yóhyo ni canaa ni i. Te ní yucu región Judea ni jité núu tāca jnūhun yáha jeē súcuan ni cuu.

66 Te tāca ñáyuu jeē ní cajini jnūhun, ni quejé i cácanani ni i, te cácajnūhun jnáhan i:

¿Ndese coo na cuéhnu sūchi yáha? áchí i.

Chi máá Jítóho yō yóhyo ni sáha ya jeē vāha jíin i.

Jnūhun luu jeē ní nacani Zacarías

67 Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

68 Yóhyo vāha Yaā cúu máá Jítóho yō, Yaā Dios yohó ñáyuu Israel,

chi ni quiji ya nuū yō jeē cácuu yó ñáyuu yā, te ni jnama ya yohó.

69 Te ni jeni ya ñin Yaā iyó poder jeē jnáma ya yohó,

te Yaā ún cacu yucūn mozo yā rey David.

70 Chi súcuan ni jejnūhun ya, ni cacahān tāca tēe ndoo ánuá jeē ní canacani de jnūhun ya jenahán.

71 Chi ni cacahān de jeē jnáma ya yohó núu jeē cájito uhū yohó, jíin núu jeē cáquiti ni nuū yō.

72 Chi ni cundáhú ni yā tāca jíi yō jijnáhan, te tu ní náa ni yā contrato íi yā.

73 Chi suu un ní jejnūhun téyí yá nuū jíi yō Abraham,

74 suu jeē jnáma ya yohó núu ñáyuu cájito uhū yohó, návāha cuajniñu yó núu yā, te ma yūhu yó i.

75 Te coo ndaā coo ndoo ánuá yō, cuajniñu yó núu yā tāca quivī jeē cótecu yō.

76 Te róchó súchi lúli, cuu ró tée nacani jnūhun Yaā cujēhnu téyí.

Chi cosnūu ró ichi núu maá Jítóho yō, návāha sātūhva ró ñáyuu, te sáa te quiji ya.

77 Te castūhun ró nuū ñáyuu maá yá jeē jnáma ya i, jíin jéē cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cúndáhú ni yā yohó.

Jeē yūcuan tají yá maá Yaā jeē sáha jeē cúndijin ini anuá yō, quiji ya nde andiví,

79 návāha jecūhun ni yohó jéē cáyūcu nájñūhun nuū neē nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

80 Te sūchi lúli un ní jehnu i te ni ije i jíin jnúhun ya. Te ni condee i nde nuū ñúhun téhé ndé quiví ní quenda ndijin i nuū ñáyuu Israel.

*Jeē ní cacu Jesús
(Mt. 1.18-25)*

2

1 Te ni cuu jecu quiví, te Augusto, tée cúu rey, ni ndacu de jniñu jeē coo censo jeē núcósō síhví ndivii ñáyuu ní cáhnu nuū ndácu de jniñu.

2 Yāha cúu censo xīhna ñúhún jéē ní casáha de ná ni cuu Cirenio gobernador nación Siria.

3 Te ndivii ñáyuu cuanungoo i ná ñuu ná ñuu maá i jeē nácuāha i síhví i.

4 Te suni José ni quenda de ñuu Nazaret, ndañū Galilea.

Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de.

5 Te ni jehēn de návāha nacuāha de síhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo.

6 Te níni cáhīin de yūcuán te ni jinū quiví jeē cácu sēhe ña.

7 Te ni scácu ña sēhe yí núu ña, te ni chusúcún ña i sahma cuitá, te ni jequin ña i ini ñn nundōo núu yéji quiti, chi tuá núne mesón condee ña.

Jeē ní canecoo ndajéhe yā nuū pastor

8 Te yajni ñuu Belén cáhīin tée cácuu pastor, te cándito de lanchi de ní niñu jecuáa nde yucu ún.

9 Te ñn sanaa-ni te ni cane ñn ndajéhe maá Jítóho yō nuū de, te nduva máá Jítóho yō ni ndindēe ní núu cáhīin de. Te yōhyo ni cayūhú de.

10 Te ni cahān ndajéhe un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsi ndasi ni tāca ñáyuu:

11 Chi vijna nde ini ñuu David ni cacu ñn Yaā jnama róchó, te máá Jítóho yō Cristo cúu ya.

12 Te súcuan nacuni rō sūchi yíquin un, chi ñúsúcún i sahma cuitá te catú i ini ñn nundōo núu yéji quiti. Achí yá.

13 Te ñn sanaa-ni te ni canecoo cuehē gā ndajéhe andiví, cáhīin ya jíin ndajéhe

un, te cácahān yā jeē yóhoyo vāha Yaā cúu Yaā Dios. Te áchí yá:

14 Yóhoyo luu cújéhnú Yaā Dios nde nuū sucún.

Te na ndúvāha ni tāca ñáyuu ñayīvi, sāha ya jeē cúsiñ ni yā jíin i.

Achí táca ndajéhé.

15 Yūcuán na te cuanungoo ndajéhé un andiví. Te tēe cácuu pastor ni cacahān de jíjnāhan de:

Na quíhín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

16 Te yachī cuangoo de, te ni nanihín de María jíin José jíin súchi yíquín un, cátu i ini nundōo núū yéji quiti.

17 Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un.

18 Te ni canaa ni tāca ñáyuu cájini nahín i jnūhun cácahān tēe cácuu pastor.

19 Te María, ni quendōo tāca jnúhun yáha nuū jeē níjnūní ña, te nácani ni ña siquī.

20 Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jēe ní cajini sōho de jíin jēe ní cajito de, chí ni squícu nahín nájnūhun ni cahān ndajéhé yā jíin de.

Jeē ní castéén de i nuū Yaā Dios ini templo

21 Te ni cuu unā quiví jeē ní cacu ya, te ni casáha de circuncidar sūchi yíquín un. Te ni casnání de i Jesús, chí síhví yúcuan ní cachi ndajéhé yā

nuū María nde ná tu jecūhun i.

22 Te ni jíinu quiví jeē casquícu ña costumbre jeē ndúndoo ña nuū Yaā Dios jíjnāhan ña, nájnūhun cáhán ley jeē ní jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios.

23 Súcuan ni casáha de, chí yósó núū tútu ley yā: Tāca súchi yí núú jēe cácau, quihí cuenta i nuū Jítóho yō Yaā Dios, achí tutu.

24 Te suni cuasocō de nájnūhun cáhán ley maá Jítóho yō: Socō rō uū liví chí úu paloma, achí tutu.

25 Te ni íyo in tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quee maá Yaā jnama ñayuu nación de Israel. Te máá Espíritu Santo íyó yá jíin de.

26 Te je ni castūhun yá nuū de jeē ma cúu cuiti de chí nde coto de nuū Cristo jeē tají maá Jítóho yō Yaā Dios.

27 Te ni steén yā nuū de jeē quihín de templo quiví ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájnūhun cáhán ley Moisés.

28 Te Simeón ni ñunundee de i, te ni cahān de jeē yóhoyo vāha Yaā cúu Yaā Dios, te áchí de:

29 Tátā Yaā Dios, vijna te cuu cuāha ni jnúhun jeē cuu ná, chí je ni cusí ni ná. Chí je ni squícu ní jnúhun ni jējnūhun ní núū sāña jēe

cúu ná mozo ni.

30 Chi ni jito jínúu na núu Yaā jnama sãña jíjnáhan ná.

31 Chi ni jeni ní yá jeē jnama ya táca ñáyuu ñayīví.

32 Te máá yá sáha jeē cúndijin ini anuá ñayuu táca nación,

návaha jecūhun ni i siquī ní.

Te sáha ya jeē kujéhnū ñayuu maá ní Israel.

Achí Simeón.

33 Te José jíin náná i cánaa ni de cájini nahín de jnūhun ni cahān Simeón siquī i.

34 Te ni jicān tahu Simeón jehē de jíjnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichī ni cuehē ñayuu i.

35 Te súcuan te quenda ndijin ndese cájeni ní táca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

36 Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lúlí ña te ni condee ña jíin yā ña uxā cuiyā.

37 Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe īi, chi jéjníñu ña nuū Jítoho yō Yaā Dios nduú ñuú, te ndite ni ña te jícān tahu ña.

38 Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jíin táca ñáyuu Jerusalén jeē

cañuhun ni i jeē quée Yaā jnama i.

Jeē cuánungoo de ñuu Nazaret

39 Te ni jínu ni casquícu de táca jniñu ndácu ley maá Jítoho yō Yaā Dios, te cuanungoo de ñuu de Nazaret, ndañúu Galilea.

40 Te sūchi lúlí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

Jeē íne sūchi lúlí Jesús ini templo

41 Te ndijnahān cuiyā jéngoo tátá i náná i ñuu Jerusalén, jeē cúu vico pas-cua.

42 Te nuū ní cuu uxī uū cuiyā i, te cuangoo tucu de Jerusalén, nájñūhun sáha sáha de quivī vico ún.

43 Te ni yáha vico, te cuanungoo de. Te sūchi lúlí Jesús, ni quendōo i Jerusalén, te tu ní cájini José jíin náná i.

44 Te cájeni ni de jeē cuahán i mēhñu ñáyuu cájica ichi ún. Te ni cajica de ñn quivī, te sáá te ni cananducú de i mēhñu táca jnáhan de jíin ñáyuu cájini jnáhan de jíin.

45 Te tu ní cánanihīn de i. Te ni canandicó de cuangoo de Jerusalén, cuananducú de i.

46 Te nuū uní quivī te ni cananihīn de i ini templo, néne i mēhñu tée cástéén tutu ley Yaā Dios, te jíini nahín i jeē cácahān de te cájnūhún i de siquī jnūhun ún.

47 Te táca ñáyuu cájini jnūhun cáhán i, cánaa ni cájito jeē váha cájí xínī i te váha nástió cuíñī i jnūhun.

48 Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rī cānanducú rí rohó, achí ña.

49 Yūcuán na te ni cahān i:

¿Naun cānanducú ní sāña?

¿A tu cájini ni jēē cānuú cocu ná jíin jniñu Tátá na Yaā Dios? Achí i.

50 Te tu ní cájecūhun ni tátá i náná i jnūhun ni cahān i.

51 Yūcuán na te cuanuhun i jíin de jíinahan de ñuu Nazaret, te ni jendije i nuū de. Te náná i, ni quendōo tāca jnūhun yáha núū jeē níjnūnī ña.

52 Te Jesús ni jehnu ga i, te ni cundíchi gá i, te cúsi ni Yaā Dios jíin i, te suni súcuan tāca ñayuu.

Jnūhun Juan tēe scuándute

(Mt. 3.1-12; Mr. 1.1-8;

Jn. 1.19-28)

3

1 Te ni cuu xahūn cuiyā jeē ndácu Tiberio jniñu nñ nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia.

2 Te sutū kujéhu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé.

3 Te ni jica nuu de tācá ñuu jeē iyó yajni yūte Jordán. Te cáhán de jíin ñayuu jeē na nácani ni i jeē stóo i cuéchi

i te cuandute i, návāha cone cáhnu ni Yaā Dios nuū cuéchi i.

4 Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo in tēe cana jee nde nuū ñūhun téhé:

Sátūhva ró máá ró jíinahan ró, chi quee máá Jítóho yō.

Te sáha ró jniñu ndaā, chi vēji ya.

5 Te tāca xéhvā na ndúndaā, te tācá yucu jíin loma na ndúnduhvā,

te na ndúyóhó ichi yácuá, te na ndúlī ichi ndáyí.

Te ndihi un cúu jeē ndúvāha ndundaā anuá ñayuu nuū yā.

6 Te ndihi i cuni i jeē jnáma Yaā Dios i.

Súcuan cahān Juan, achí tutu.

7 Te ni quendacoo cuehé ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájnūhun coō. ¿A cájeni ni rō jeē cuu cunu ró cácu ró núū castigo xeēn jeē quíji?

8 Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cácu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje vāha, te núu cúní yā.

9 Te cácuu ró nájnūhun nundéhé jeē tu jéhe ndehē váha. Te vijna je iyó túhva Yaā Dios jeē cuáha ya castigo

xeēn, nájñuhun je íyó tühva ñn cāa jeē cahnde nde yoho yujnu. Núu súcuan te sáha ya jíin ró nájñuhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

10 Te ñayuu un ní cacaññuhún i de:

¿Te ndese sáha ná núu súcuan? Achí i.

11 Te ni cahān de:

Róhó jéē cánevāha uū sahma, na cuáha ró ñn nuū jeē tu névāha. Te róhó jéē cánevāha jeē yéji, suni súcuan na sáha ró, áchí de jíin i.

12 Te suni jecu tēe cástútú xúhun renta, ni quecoo de jeē cuándute de. Te ni cacaññuhún de Juan:

Maestro, te máá ná, ¿ndese sáha ná jíjnáhan ná?

13 Te ni cahān Juan jíin de:

Ma scaá ró cácan ró xūhún, chí máá cúhva-ni jeē ní ndacu jniñu nuū rō, achí de.

14 Te suni ni cacajññuhún jecu soldado:

Te máá ná, ¿ndese sáha ná jíjnáhan ná? áchí de.

Te ni cahān Juan jíin de:

Ma quénde rō ndajniñu ni ñn jíin jñuhun siúhú ni jíin jñuhun stáú yáhu, te cusñ ni rō jíin yáhu ró, áchí de.

15 Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

16 Te ni cahān Juan jíin i jíjnáhan i:

Ruhū chí jíin ndute scuándute ri rohó. Te vēji ñn Yaā jeē nájñuhun scuándute ya rohó cúu jeē cuáha ya Espíritu

Santo condee ini anuá rō, te poder yā cúu nájñuhun ñuhún. Te cújéñnu ndasí yá, chí tú na vé jéñnu cuítí cúu ri nuū yā, ni jeē cuajniñu ri nuū yā vēsú ñn jniñu lúli gá nájñuhun jeē ndají rí vēsú correa ndijēn yā.

17 Te sáha ya nájñuhun sáha tēe scánda trigo, chí sásñn ya ñayuu váha jíin ñáyuu cunéé, nájñuhun cúndoo trigo jeē quénda sñn paja. Te nastútú yá trigo yā ndívi ini yacā yā. Te paja chí jnaa yā nuū ñuhún jeē ma ndahvá cuítí. Achí Juan.

18 Te súcuan te jíin cuéhē gā jñuhun ni stíhví ni de ñayuu un, ní nacani de jñuhun váha Yaā Dios nuū i.

19 Te suni ni cahān xeēn de nuū Herodes, tēe cúu gobernador, chí tēe un ní nacueca de Herodías, ñasíhí ñani de Felipe. Te cuehē gā jniñu néé súcuan ni sáha Herodes.

20 Te sa víhyá gā ni sáha de jeē neé gá, chí ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

21 Te nde ná tu quívi Juan vecāa, ná ni ine de ni scuándute de táca ñáyuu, te suni ni scuándute de Jesús. Te jícán tahu yā, te ni nune-ni andívi.

22 Te ni cuun Espíritu Santo ni quee xiní yā, te cāa nájñuhun ñn paloma. Te ichi ándívi ní cahān ñn jñuhun:

Máá ró cúu Sēhe ri jeē maní ndasí rí jíin, te yōhyo cúsn ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

23 Te ná ni quejéé Jesús steén yā jnūhun, te íyó yá nájñūhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí,

24 te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José,

25 te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai,

26 te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá,

27 te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri,

28 te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er,

29 te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat,

30 te Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim,

31 te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán,

32 te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón,

33 te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá,

34 te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor,

35 te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala,

36 te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec,

37 te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán,

38 te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chi ni sáha ya de.

Jeē ní jito ndee jexeén Jesús (Mt. 4.1-11; Mr. 1.12-13)

4

1 Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jīnū yā nde nuū ñúhun téhé ní sáha Espíritu Santo.

2 Te ni ine ya yūcuan úū xico quivī, te ni jito ndee jexeén yā, chí cúní jeē sáha ya cuēchi. Te tāca quivī ún tu ní yéji cuiṭi yā, te ná ni yāha quivī ún, te jí yā sōco.

3 Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yāha na ndúu staā caji rō, achí.

4 Te ni cahān Jesús jíin:

Tuú chí yósó núu tútu iī: Nasūu máni máá jíin stāā cátecu ñayuu, chí suni jíin táca jnúhun cáhán Yaā Dios, achí yá.

5 Yūcuán na te cuahān jexeén un jíin yá nde xinī ñn yucu súcún, te ñn núnúu-ni ní steén nuū yā tācá nación ní cáhnu ñayiví.

6 Te ni cahān jíin yá:

Nuū maá ró cuāha ri jeē kujéhnu ró núu ndivii nación yāha, chí yōhyo luu cáa. Chí máá rí jnāi ndihi, te cuu cuāha ri nuū ndé ñn cúní rī.

7 Núu súcuan te núu cuiñi yítí ró chiñúhún ró ruhū, te cuāha ndihi ri nuū rō. Achí jexeén.

8 Te ni cahān Jesús jíin:

Satanás, cujiyo quihīn rō, chí yósó núu tútu jeē chiñúhún ñayuu maá Jítóho i Yaā Dios, te nuū maá-ni ya cuajníñu i. Achí yá.

9 Yūcuán na te cuahān jexeén un jíin yá nde ñuu Jerusalén. Te ni jeni ya xinī

torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chí jnama ya rohó.

10 Chí yósó núu tútu:

Tejníñu ya ndajéhé yā quiji-coo coto rōhó.

11 Te cunundee yā rohó jíjnáhan ya,

návāha ma cáchihí ró jéhé rō nuū yuú.

Achí tutu. Achí jexeén.

12 Te ni cahān Jesús:

Tuú chí suni yósó núu tútu jeē ma cóto ndee ñayuu Jítóho i Yaā Dios, núu jnama ya i chí tuú, achí yá.

13 Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnúhun región Galilea

(Mt. 4.12-17; Mr. 1.14-15)

14 Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jité núu jnúhun ya.

15 Te ni steén yā jnúhun ini tācá vehe iī sinagoga, te ndihi ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

16 Te ni najinū yā ñuu Nazaret nuū ní jehnu ya. Te quivī ndétátú ní quiví ya ini vehe iī sinagoga, nájnūhun sáha sáha ya. Te ni ndocuiñi yā jeē cahu ya tutu iī.

17 Te ni cajēhe de tutu ní tee Isaías, tēe ní nacani jnúhun Yaā Dios nde jenahán. Te ni

nune ya tutu ún, te ni nanihīn yā nuū yosó jnúhun ni cahu ya:

18 Espíritu maá Jítoho yō Yaā Dios iyó yá jíin rí, chi ni tejníñu ya ruhū jeē nácani rí jnúhun vāha nuū ñáyuu ndahú.

Te ni tají yá ruhū vēji rí jíin jnúhun jeē ndúvāha ni ñayuu cá cucuhyá ni.

Te castūhun rí nuū ñáyuu cáyihī ndaha jexeén jeē coo libre i.

Te sáha rí jeē ndúndijin ini anuá ñayuu tu cájecūhun ni,

te jnama rí ñayuu jeē cándoho i sáha jnáhan i.

19 Te nacani rí jnúhun jeē ní quee tiempo jeē sáha Jítoho yō Yaā Dios jeē váha ñayuu.

Achí tutu ni cahu ya.

20 Te ni nacasi yā tutu ún, te ni nacuāha ya nuū tée jéjníñu ini sinagoga, te ni nucōo ya jeē steén yā jnúhun nuū ñáyuu cáhīn ini sinagoga. Te tācá i cájito vāha i nuū yā.

21 Te ni quejéé yá cahán yā jíin i:

Vijna te ni squícu jnúhun cáhán tutu i yāha ní cajini sōho ró, áchí yá.

22 Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajnúhun jnáhan i:

¿A násūu séhe José cúu tēe yáha?

23 Te ni cahān yā jíin i:

Jíní vāha rí jeē cájeni ní rō cahān rō jnúhun yátá yáha jíin

rí: Tēe tájné, sátájné ró maá ró núu súcuan. Te jnúhun yáha cúni cahān jeē nájnūhun ni nasávāha rí cuehē ñayuu cácuñu ini ñuu Capernaum ni canihīn rō jnúhun, suni súcuan na sáha rí ñuu yō yáhá návāha candíje ró cájeni ní rō. Achí yá jíin i.

24 Te ni cahān gā yā:

Jendaá cahán rí jíin ró, ni ñn tēe nácani jnúhun Yaā Dios, tu cájetáhú ñayuu ñuu maá de nuū de.

25 Te suni jendaá cahán rí jíin ró jeē ní íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnúhun Yaā Dios. Te tiempo un tu ní cúun cuiti saū uní cuiyā yosáva, te ní íyo ñn jnamā xeēn ní cáhnu nación.

26 Te tu ní tájí Yaā Dios Elías quihīn de nuū ni ñn ñahan viuda nación yō Israel, chi nuū máá ñn-ni ñahan viuda jeē ndeé ñuu Sarepta ndañū Sidón, ni jehēn de ni jito de jeē ní yeji ña.

27 Te ini nación yō Israel suni ní íyo cuehē tēe ni cándoho cuehyī stehyú, tiempo jeē ní cotecu Eliseo, tēe ni nacani jnúhun Yaā Dios. Te ní ñn de tu ní cándíje jeē ndúvāha de sáha Eliseo, chí sa suhva máñúhún-ni Naamán, tēe nación Siria ni nduvāha. Achí yá.

28 Yūcuán na te tāca ñáyuu cáhīn ini sinagoga, yōhyo ní caquiti ní i jnúhun ní cahān yā.

29 Te ni candocuñī i, te ní caquenehen i ya yatā ñūú ún,

cuahān i jíin yá xinī yúcu íne ñuu ún, chí cáculi i chundahá i ya ñinga ya cava ún.

³⁰ Te tu ní cúu sáha i, chí ni yāha-ni ya mēhñū i cuahān yā.

Jeē ní quenehen ya tachī ini ñn tēe

(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jñuhun nuū ñáyuu.

³² Te ni canaa ni i cájini i jñuhun stéén yā. Chí ni steén vāha ya nuū i, chí jíni vāha máá yá.

³³ Te ini vehe sinagoga un íne ñn tēe jeē ññuhun tachī xeén ini de. Te tēe un ní cana cóhó de:

³⁴ Cuijiyo ní. ¿Naun vēji ní núu na jíināhan ná, Jesús ñuu Nazaret? ¿A véji ní jēē snāā ni sáña, chí naún? Je jíni na ndé ñn cúu ní, chí Sēhe í Yaā Dios cúu ní. Achí de.

³⁵ Te Jesús ni cahān xeén yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núu tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de.

³⁶ Te ndihí ñayuu un ní cayūhú i, te ni cacahān i jíin jñáhan i:

¿Na jñuhun cúu yāha jēē ní cuu súcuan? Chí cújénu tēe yáha jēē ndácu ñihin de jniñu nuū tachí, te quéndacoo-ni, áchí i.

³⁷ Te jñuhun ya ni jíitē núu cuahān ní cáhnu región yūcuán.

Jeē ní nasávāha ya naná chīsó Simón Pedro

(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe íi sinagoga, te cuahān yā te ni jíin yā vehe Simón. Te naná chīsó Simón, yíhi xeén quíji ña, te ni cacahān ndahú de jíin yá jehē ña.

³⁹ Te ni jíta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuiñi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

⁴⁰ Te jeē ni quée niāndii, te tāca ñáyuu jeē iyó jñáhan i cáculhū ndinuū cuehyi, ni caquindeca i jñáhan i un núu yā. Te ni soó yá ndaha ya síquī ñn ñn i, te súcuan ni nasávāha ya i.

⁴¹ Te suni cuehē ñayuu ni quendacoo tachī ini i, te cácana cóhó táchí ún:

Máá ní cúu Sēhe Yaā Dios, achí.

Te ni cahān xeén yā nuū, te tu ní jéhe ya jñuhun jeē cahán gā súcuan, chí cájini jeē maá yá cúu Cristo, Yaā ní tají Yaā Dios.

Jeē ní nacani ya jñuhun región Galilea

(Mr. 1.35-39)

⁴² Te nuū ní cundijin, te ni quenda ya cuahān sñn ya yatā ññū nuū tú ñayuu. Te tāca ñáyuu cánanducú i ya, te ni jíinúcoo i nuū íne ya. Te cástétu i ya jeē tú cuijiyo ya nuū i.

⁴³ Te ni cahān yā jíin i:

Suni cánuú jéē nacani ri jnūhun vāha nuū tāca gá ñuu siquī ndese ndácu Yaā Dios jniñu, chi jeē yúcuan ní tají yá ruhū vēji ri. Achí yá.

⁴⁴Te ni jica cuu ya ní región Galilea, nácani ya jnūhun ini tācá vehe iī sinagoga.

Jeē ní canihīn de cuehē chācá ní sáha ya
(Mt. 4.18-22; Mr. 1.16-20)

5

¹Te ñn quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chi cácuñi i cuni nahín i jnūhun Yaā Dios.

²Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cánacate de ñunu de.

³Te ni quivī ya ini ñn barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñayuu cuehē jeē yúcu i yundúte un.

⁴Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jñi ró cháca, achí yá.

⁵Te ni cahān Simón:

Maestro, ní niñu ni casínga ná ñunu jeē jñi ná tí, te tu ní níhín cuítí ná ni ñn tí. Te jeē cahán maá ní súcuan, te na sínga tucu ná ñunu, achí de.

⁶Te ni casínga de, te ni quivicoo cuehē ndasí cháca, nde nducú táhndē ñunu de.

⁷Te ni cacaja ndahá de nuū jnáhan de cáhīn ini ñnga barco, na quíjicoo chindéé ñájnáhan jíin de. Te ni quecoo de, te ni cascútú ndí de tí ndindúú barco, te nde je yajni queē barco.

⁸Te ni jito Simón Pedro jeē súcuan ní cuu. Te ni jecuiñi yití de nuū Jesús, te ni cahān de:

Cujiyo ní núu ná, chi tēe íyó cuéchi cúu ná, achí de.

⁹Chi máá de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya.

¹⁰Te suni ni cayūhú Jacobo jíin Juan, ndindúú séhe Zebedeo, chi tēe chindéé ñájnáhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ní nihīn rō cuehē chācá. Achí yá.

¹¹Yūcuán na te nuū ni jíincoo de jíin barco nuū ñūhun íchi, te ni castóo de ndíhi ndajniñu de, te ni candiquñ de ya cuango de.

Jeē ní nasávāha ya ñn tēe ndóho cuehyī stehyú

(Mt. 8.1-4; Mr. 1.40-45)

¹²Yūcuán na te íne Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñi yití de ni jecuñ de nuū de nde nuū ñūhun, te ni cahān ndahú de jíin yá:

Jíní na jéē cuu sáha ní jéē nduvāha ná, te núu cúní ní, achí de.

13 Yūcuán na te ni soó yá ndaha ya siquī de, te ni cahān yā:

Cúni rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

14 Te ni ndacu ya jniñu nuū de jeē ma cáchi cuiti de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájñuhun ni ndacu Moisés jniñu jehahán. Te súcuan te cuni ñayuu jeē ní nduvāha ró. Achí yá.

15 Te víhyá gā ni jitē núu jñuhun ya cuahān. Te ni cataca cuehē ñayuu jeē cúni nahín i jñuhun stéén yā, jíin jēē nasávāha ya i nuū tāca cuéhyī cándoho í.

16 Te máá yá cuahān sñn ya nuū tú ñayuu, te ni jicān tahú yā.

Jeē ní nasávāha ya ñn tēe ndóho cuehyī ní íjin

(Mt. 9.1-8; Mr. 2.1-12)

17 Te ñn quivī te stéén yā jñuhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de táca ndañúu Galilea, jíin ndañúu Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñu.

18 Yūcuán na te ni quecoo jecu tēe, cándiso de ñn tēe ndóho cuehyī ní íjin, cátu de nuū ñn camilla. Te cánducú

de squívī de tēe ún ini vehe, te caquín de nuū íne ya.

19 Te tu ní cániñn de modo quívicoo de jíin tēe un, chí cáyucú chitú ñáyuu. Te ni cacoo de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēññu ñáyuu.

20 Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

21 Yūcuán na te tēe cástéén tutu ley Yaā Dios jíin tēe grupo fariseo, ni quejé de cájeni ni de siquī yā: ¿Ndé ñn cúu tēe yáha jēē cahán de jñuhun ndevāha jeē quití ni Yaā Dios? Chí nasūu Yáā Dios cúu de jeē cóne cáhnu ni de nuū cuéchi.

22 Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rí?

23 Jeē uú jñuhun yáha, ¿ndé ñn yí gá cáa? ¿A jēē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuññi te caca ró, chí je ni nduvāha ró, achi rī?

24 Te vijna te na stéén rī jeē maá rí, Yaā ní nduu tēe, ndíso jniñu rí ini ñayívī yáha jēē cóne cáhnu ni rī nuū cuéchi.

Yūcuán na te ni cahān yā jíin tēe ní íjin ún:

Cáhán rī jíin ró, ndocuññi te naquihñn ró camilla rō, te quinuhun rō vehe ró, áchí yá jíin de.

25 Te ni ndocuiñi-ni tēe ún, jito jínū ñayuu. Te ni naquihin de camilla nuū ni cátu de, te cuanuhun de vehe de. Te nácuatáhú de nuū Yaā Dios.

26 Te yōhyo ni canaa ni tāca ñayuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyūhú i, te cacahān i:

Vijna te ni cajito yó jniñu jēhnu téyí, áchí i.

Jeē ní cana ya Leví
(Mt. 9.9-13; Mr. 2.13-17)

27 Yūcuán na te ni quenda ya cuahān yā, te ni jito ya nuū ñin tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiquin ruhū na quihín yō.

28 Te ni ndocuiñi de, te ni stóo de ndihi ndajniñu de, te cuahān de jín yá.

29 Yūcuán na te ni sáha Leví ñin vico cáhnu vehe de, jeē cúsi ni de jín Jesús. Te cuehē tēe cástútú xúhun renta jín sava ga tēe, cáyūcú de mesa cáyeji de staā jín yá.

30 Te tēe grupo fariseo jín tēe cástéén tutu ley Yaā Dios, ni quejé de cacahān de siquī tēe cáscuáha jín yá, te ni cacajñuhún de:

¿Najehē cáyeji rō cájihu ró jín tēe cástútú xúhun renta jín tēe cása cuēchi? áchí de.

31 Te ni cahān Jesús:

Ñayuu cáhīyo vāha, tu jini ñuhún i tēe tájna, chi ñayuu cácuñu cúu jeē jini ñuhún.

32 Te ruhū nasūu jéé véji ri cana ri ñayuu tú cuēchi, jeē cúu i nájnūhun ñayuu cáhīyo

vāha. Chi sa suhva vēji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquī jeē cóndite ni

(Mt. 9.14-17; Mr. 2.18-22)

33 Yūcuán na te ni cacahān de jín yá:

Tēe cáscuáha jín Juan, jín tēe cáscuáha jín grupo fariseo, cuehē jinu cáhīyo ndite ni de te cájicān tahu de. Te tēe cáscuáha jín máá ní, ¿naun tu cása de súcuan? Chi cáyeji de cájihu de.

34 Te ni cahān yā jín de:

¿A cuu condite ni de níni jéé iyó rí jín de? ¿A cuu sáha ró jéé condite ni ñayuu cáhīn vico nándaaha, te núu níni néne tēe nándaaha?

35 Te quee quivī jeē cújiyo tēe ni nandaaha, te quivī ún chi condite ni i. Achí yá.

36 Te suni ni cahān yā uū jñūhun yátá síquī jeē tu quíjnahan jñūhun jeé jéé steén yā jín táca jñūhun jenahán. Achí yá:

Ni ñin ñayuu tu jēhnde i ñin pedazo sahma jéé i, te nachuhun i nuū ñin sahma túhú i. Chi núu súcuan te stívi i sahma jéé i, te suni tu quíjnahan jeé jeé un jín jéé tuhú.

37 Te tú ni ñin chūhun vino jeé ini ñin túhú. Chi núu súcuan, te vino jeé un ndatá ñin, te naa vino jín ñin.

38 Chi cánuú jéé chūhun vino jeé ini ñin jéé, te súcuan te quéndōo vāha ndindúú.

39 Te ñayuu cájihu vino áva, tu cúní i coho i jeé jeé, chi

jeē áva cúu jeē váha ga, achí i.
Achí yá.

*Jeē ní cataxín de yoco trigo
quívī ndétátú
(Mt. 12.1-8; Mr. 2.23-28)*

6

¹ Te ñin quívī ndétātu ní yāha Jesús cuahān yā mēhñū nuū cáa trigo. Te tēe cáscuāha jíin yá ní cataxín de yoco trigo, te ni caquñ de ini ndaha de, te ni cayejí de.

² Te sava tēe grupo fariseo ni cacajnūhún de:

¿Najehē casáha ró jniñu jeē tu íyó váha sáha ró quívī ndétátú?

³ Te ni cahān Jesús jíin de:

¿A tu ní cácahu cuítī rō tutu ndese ni sáha David, ñin quívī jeē ni jíi de sōco jíin tēe cáhīn jíin de?

⁴ Te ni quívī de ini vehe Yaā Dios, te ni quihin de pan íi jeē yosó ndijin nuū Yaā Dios. Te ni yejí de, te suni ni jēhe de ni cayejí tēe cáhīn jíin de. Te tú na ley jeē cáji ni ñin tēe, chí máá-ni sutū cuu cají. Te vēsú súcuan te tú na cuēchi ní íyo siquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quívī ndétátú, achí yá.

Jeē ní nduvāha tēe ni ichī ndaha

(Mt. 12.9-14; Mr. 3.1-6)

⁶ Te ñnga quívī ndétátú, suni ni quívī ya ini vehe íi sinagoga, te ni steén yā jñūhun. Te yūcuan íne ñin tēe ni ichī ndaha váha de.

⁷ Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quívī ndétátú, návāha nihīn de cuēchi siquī yā.

⁸ Te máá yá je jíin yā ndese cájeni ni de. Te ni cahān yā jíin tēe ni ichī ndaha ún:

Ndocuñī, te condichi rō mēhñu yáha, achí yá.

Te ni ndocuñī de, te ni jecondichi de mēhñū.

⁹ Yūcuán na te ni cahān yā jíin de jíināhan de:

Na cájnūhun rí rohó ñin jñūhun: ¿Ndese cáhán ley siquī quívī ndétátú? ¿A jēe sáha váha yó, chí sáha néé yó? ¿A jēe nasávāha yó ñáyuu je yajni cuu, chí sáha yó jēe cúu í? Achí yá.

¹⁰ Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scáá ndaha ró.

Te ni scaá de, te ni nduvāha-ni ndaha de.

¹¹ Te yōhyo ni caquitī ni tāca tēe un, te ni quejé de cándajnūhún de siquī Jesús, ndese cahni de ya.

Jeē ní nacāji ya uxī uū tēe apóstol

(Mt. 10.1-4; Mr. 3.13-19)

¹² Te ni cuu jecu quívī, te ni quenda ya cuacacān tahu yā nde yucu. Te ní niñu ni jicān tahu yā nuū Yaā Dios.

¹³ Te nuū ní cundijin, te ni cana ya tāca tēe cáscuāha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñūhun ya.

¹⁴ Te yāha cúu síhví de jíināhan de: Simón jeē ní

nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé,

¹⁵ Mateo, Tomás, Jacobo sēhe Alfeo, Simón tēe grupo cananista,

¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē

(Mt. 4.23-25)

¹⁷ Te ni nanuu ya yucu jíin táca tēe un jéē cascuáha jíin yá, te ni jecuiñī yā ñin nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jéē ndúvāha i cuehyī cándoho i.

¹⁸ Te ñayuu jeē ñúhun tachī ini i, suni ni canduvāha i ni sáha ya.

¹⁹ Te ndivii ñayuu cáconi i quehé i ya, chi súcuan ndúvāha i sáha ya jíin poder yā.

Jnūhun ñayuu yōhyo ndetū jíin ñáyuu jeē xeēn ndoho

(Mt. 5.1-12)

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jéē cándoho ndáhú, chi quivī ró ñuu nuū ndácu Yaā Dios jniñu.

²¹ Yōhyo ndetū rohó jéē cájī sōco vijna, chi quiji quivī jeē ndutú chīji ró.

Yōhyo ndetū rohó jéē cándahyū ró vijna, chi quiji quivī jeē cuecú ró.

²² Yōhyo ndetū ró te núu cáquitī ni ñayuu nuū ró jeē siquí ruhū, Yaā ní nduu tēe, te cásquéhichī i rōhó, te cácahān neé i nuū ró, te cácahān i jeē ñáyuu casáha jniñu neé cácuu ró.

²³ Te na cóo sīi ni ró quivī sáha i súcuan, te víhyá gā na cúsi ni ró, chi cáhnu téyí coo tahū ró nde andivī. Chi suni súcuan ni casáha uhū táca jíi i jíin tēe ni canacani jnūhun Yaā Dios nde jenahán.

²⁴ Te nacā jeē xeēn ndoho rōhó ñáyuu cucá, chi vijna-ni cúu jeē cáhīyo sīi ni ró.

²⁵ Nacā jeē xeēn ndoho rōhó ñáyuu jeē víjna cáhīyo vetū chīji ró, chi quiji quivī jeē cuu ró sōco.

Nacā jeē xeēn ndoho rōhó ñáyuu jeē víjna cájecū ró, chi quiji quivī jeē nducuíhyá ni ró te ndahyū ró.

²⁶ Nacā jeē xeēn ndoho táca ró núu cájejnúhún ñáyuu rohó, chi suni súcuan ni cajejnúhún jíi i táca tēe ni canacani jnūhun stáhú ndé jenahán.

Jnūhun jeē cundáhú ni yō ñayuu cájito uhū yohó

(Mt. 5.38-48; 7.12)

²⁷ Te cáhán rī jíin rōhó jeē cájini sōho: Cundáhú ni ró ñayuu cájito uhū rohó. Te sáha vāha ró jíin ñáyuu cáquitī ni nuū ró.

²⁸ Te cacān ró jeē váha coo ñayuu cácahān ndevāha síquí ró. Te cacān tahú ró jehē ñáyuu cácahān neé núu ró.

²⁹ Te núu ndé tēe canī de ñin lado yiqui núu ró, te vāha ga suni cuāha ró ñnga lado canī de, vēsú jeē nácuāha ró jéē

ndútahū de. Te núu ndé tée cúní de quende de ticāchi ró, suni cuāha ró jnúhun jeē na quíhín de jíin ndé camisa ró.

³⁰ Te na-ni ñayuu jicán nuū rō, te cuāha ró núu i. Te ñayuu quíhin ndajníñu ró, ma nándacān rō.

³¹ Te nájnūhun cáncuni rō jeē sáha vāha ñayuu jíin ró, suni súcuan na sáha vāha ró jíin i.

³² 'Chi núu íyó manī rō jíin máa-ni ñayuu jeē manī jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni manī de jíin tēe manī jíin máa de.

³³ Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni súcuan cásáha de.

³⁴ Te núu cuāha núu ró núu maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de.

³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuáha ró máa síquī jeē canī ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máa yá vāha ni yā jíin ñayuu tu nácuatáhú núu yā jíin ñayuu casáha néé.

³⁶ Núu súcuan te cundáhú ni rō ñayuu, nájnūhun máa Tátá rō cundáhú ni yā i.

jnáhan yó

(Mt. 7.1-5)

³⁷ 'Ma cahán rō síquī cuéchi ñayuu ndese sáha i, návāha suni ma cahán Yaā Dios cuéchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō.

³⁸ Cuāha ró núu ñayuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sánīhin ya, te nde scáa ya cuāha ya nuū rō. Chi cūhva jeē cájēhe ró núu ñayuu, suni cūhva un cuáha ya nuū rō. Achí yá.

³⁹ Te ni cahān yā ñin jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ñingava ndíndúú de ini xehvā?

⁴⁰ ñin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹ 'Te cuéchi jnáhan ró cúu nájnūhun jeē íne ñin yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuéchi máa ró jeē cúu nájnūhun jeē íne ñin nduhu tinūu máa ró?

⁴² ¿Te naun cacāhan rō jíin jnáhan ró: Condetu, na táva rī yāca íne tinūu ró, te tu cánacani ni rō jeē íne ñin nduhu tinūu máa ró? Tēe stáhú-ni cácuu

Ma cahán yō síquī cuéchi

ró núu súcuan. Xihna gā tīnūu máá ró tava rō nduhu, te yūcuán na te cuu condēhe váha ró jēē táva rō yāca tīnūu jnāhan ró.

Jíin jniñu cásáha ñayuu te nácuni yō ndese ñayuu cácuu i
(Mt. 7.17-20; 12.34-35)

⁴³ Tu íyó yujnu váha jeē jēhe ndehē neé, te ni tu íyó yujnu neé jēē jēhe ndehē váha.

⁴⁴ Chi jíin ndéhē jeē jēhe ññ ññ yujnu, te jíni yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza.

⁴⁵ Te suni súcuan tēe vāha, cáhán de jñūhun vāha, chí vāha ánuá de. Te tēe sáha neé cáhán de jñūhun neé, chí cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquī uú vehe
(Mt. 7.24-27)

⁴⁶ ¿Najehē cácahān yíñūhún ró jíin rí: Jitoho ná, áchí ró, te tu cásquícu ró jniñu ndácu rí?

⁴⁷ Tāca ñáyuu vēji nuū rī te jíni sōho jñūhun cáhán rī te squícu, na stéén rī nuū rō ndese cúu i.

⁴⁸ Cúu i nájñūhun ññ tēe jeē ní jeni de vehe de, te ni jete cúnú de nde ni nihīn de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáha, chí siquī toto ín.

⁴⁹ Te tāca ñáyuu jíni sōho jñūhun cáhán rī, te tu squícu i, cúu i nájñūhun ññ tēe ni jeni de vehe de nuū ññūhun, te tu yítuu jehē. Te nuū ní ndaa yūte, te ni chundahá vehe ún,

te ni cotúú-ni, te ni naa íi-ni. Achí yá jíin i jíjnáhan i.

Jeē ní nasávāha ya mozo capitán
(Mt. 8.5-13)

7

¹ Te nuū ni jínu ni cahān yā ni cajini nahín ñáyuu ún, te cuahān yā ñuu Capernaum.

² Te ññ tēe naciōn Roma jeē cúu capitán, íyó ññ mozo de jeē manī ndasí de jíin. Te mozo un cūhú i te je yajni cuu i.

³ Te ni jini capitán jñūhun Jesús. Te ni tají de jecu tēe jéhnū cándacu jniñu nuū ñáyuu hebreo, cuango de nuū yā jeē cahán ndahú de jíin yá jeē na quíji ya sávāha ya mozo de.

⁴ Te ni jinūcoo tēe un núū Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chí tēe vāha cúu de.

⁵ Chi manī de jíin naciōn yō, te máá de ni ndacu jniñu ni cuvāha ññ vehe sinagoga cuu yó. Achí de.

⁶ Yūcuán na te cuahān Jesús jíin de jíjnáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhín, chí tu cújéhnū de jeē quihín ni quívi ní vehe de.

⁷ Jeē yúcuan tu ní sájéhnū de máá de jeē quíji de nuū ní, áchí de. Te máá jēē cahān-ni ní, te na ndúvāha-ni mozo de, áchí de.

8 Chi máá de suni ndíso jniñu de ni casáha tēe cácujuhnu ga. Te cújéhnú de nuū tācá soldado de, áchí de. Te núu cáhán de jíin ñn tēe jeē na quíhín de, te cuahán de. Te núu cáhán de jíin inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jíin yá.

9 Te jeē ní jini Jesús jnūhun yáha, te ni naa ni yá. Te ni ndió cóto ya ni cahán yá jíin ñáyuu cuehē cándiquín yatá yá:

Jendaá cahán rī jíin ró jeē ni nación yō Israel tu ní níhín rī ni ñn ñayuu candíje ñhin súcuan, nájñūhun cándíje tēe ún, vésú tēe nación tu jíin jnūhun Yaā Dios cúu de. Achí yá.

10 Te tēe ni tají capitán nuū yá, ni najinūcoo de vehe, te ni cajito de jeē jé ni nduváha mozó un.

Jeē ní nastécu yá sēhe yíí ñahan viuda

11 Yūcuán na te cuahán yá ñn ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá.

12 Te ná ni cuyajni ya yuñúú ún, te yūcuan ní quendacoo ñayuu jeē quíchindūji i ñn tēe suchí jēē ni jíhī. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña.

13 Te ná ni jito máá Jítóho yō nuū ña, te ni cundáhú ni yá ña, te ni cahán yá jíin ña:

Ma ndahyú ni, áchí yá.

14 Yūcuán na te ni jinū yá nde nuū ndíyi ún, te ni jniñ

ya yejnū, te ni cajecuiñī tēe cándiso ún. Te ni cahán yá jíin súchi ní jíhī:

Cáhán rī jíin ró, ndocuiñī, achí yá.

15 Yūcuán na te ni nucōo súchi ní jíhī ún, te ni quejéé i nácahán i. Te ni nacuáha ya i nuū naná i.

16 Te ndivii ñayuu ni cayūhú i jeē ní cajito i, te ni cacahán i jeē yóhoyo váha Yaā cúu Yaā Dios. Te cácahán i:

Mēhñu yó ni quee ñn tēe cújéhnú nácani jnūhun Yaā Dios.

Te suni cácahán i:

Máá Yaā Dios ni quejéé yá chindéé ñáhán yá ñayuu yá. Achí i.

17 Te ni jitē núu jnūhun ya ní cáhnu región Judea jíin táca región yajni yūcuán.

Jeē ní tají Juan uū tēe nuū yá

(Mt. 11.2-19)

18 Te íne Juan vecāa, te tēe cáscuáha jíin de ni cacastūhun núu de jeē súcuan ni cuu tācá jniñu yáha.

19 Te ni cana Juan uū tēe ún, te ni tají de cuango nuū Jesús, náváha cajñūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga.

20 Te ni jinūcoo tēe un núu yá, te ni cacahán de:

Juan tēe scuándute ni tají de sãña véjicoo ná cajñūhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

21 Te máá hora un ní nasáváha ya cuehē ñayuu

cácuḥū, jín ñáyuú cándoho cuehyī xeēn, jín ñáyuú ñúhun tachī ini. Te suni cuehē ñayuu cuaá ní ndundijin tinūú i ni sáha ya.

22 Te ni cahān yā jín de:

Cuángoo te castūhun ró nuū Juan tācá jniñu ni cajito ró jín jnúhun ni cajini ró. Te cachi rō nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnúhun nuū ñayuu ndahú jēe jnama Yaā Dios i.

23 Te yōhyo ndetū tēe jeē ma nácani yátá ni de jeē ruhū cúu Cristo. Súcuān cachi rō nuū Juan. Achí yā jín de.

24 Te ná cuanuhun ndindúú tēe ún, te ni quejéé Jesús cahán yā jnúhun Juan jín ñayuu:

¿Na vé ni jécondēhe ró jijnáhan ró ndé nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachī?

25 Te núu tuú, ¿te na vé ni jécondēhe ró núu súcuān? ¿A ñn tēe cúní cujénu jeē ñúhun sahma lúu? Tuú chí cájini rō jeē tēe cáñuhun sahma lúu te cánducú tāca jēe cúsiñ ni, máni ini vehe rey cáyūcú de.

26 ¿Te na vé ni jécondēhe ró núu súcuān? ¿A ñn tēe nácani jnúhun Yaā Dios? Cahán rī jín ró jeē suu ni jécondēhe ró. Te cújénu ga Juan yáha vēsú tāca gá tēe ni canacani jnúhun Yaā Dios.

27 Chi jnúhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnúhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu.

28 Te cáhān rī jín ró jeē ini ñayīvi yáha cújénu ga Juan tēe scuándute vēsú tāca gá tēe jeē ni íyo ini ñayīvi. Te vēsú súcuān te tāca tēe núu ga ini ñuu nuū ndácu Yaā Dios jniñu, cújénu ga de vēsú Juan. Achí yá.

29 Te tāca ñayuu jín táca tēe cástútú xúhun renta, ni cajini i jnúhun cáhān yā, te ni cajetáhú i jeē Yaā ndaā cúu Yaā Dios, chí je ni cajendute i nuū Juan.

30 Te tēe grupo fariseo jín tēe cástéén tutu ley, ni casquéhichī de jnúhun jeē cuní Yaā Dios sáha ya jeē váha de, chí tu ní cájendute de nuū Juan.

31 Te ni cahān gā maá Jítóho yō:

Yāhá cachi rī ñn jnúhun yátá návāha na cúní rō ndese cúu ñayuu tiempo vijna.

32 Cúu i nájnūhun sūchi lúli cáhīn nuū yáhu cácasíquí i. Te cácana ndee i xinī jnáhan i: Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúli un jēe tu ní núnjahan ni i ni ñn, suni súcuān cándāa ró.

33 Chi ni quiji Juan tēe scuándute, te cuehē jínu ni

īyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñūhun tachī ini de.

³⁴ Yūcuán na te ni quee máá rí, Yaā ní nduu tēe, te yéji rī jíhi rī, te tu cánujnahan ni rō, te chísoó jnūhun ró cácahān rō jeē máni máá jēe yéji rī jíhi rī vino. Te quíjnahan rī jíin tēe cástútú xūhun renta jíin táca gá tēe cásaha cuēchi, áchí ró.

³⁵ Te núu cúndíchí ñn tēe jíin jnūhun Yaā Dios, te jíin jniñu sáha de te cájini táca gá tēe ndíchí jeē ndichí de. Achí yá.

Jeē íne Jesús vehe Simón tēe fariseo

³⁶ Te ñn tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā.

³⁷ Yūcuán na te ñn ñahan sáha cuēchi, ndéé ña ñuu yúcuán, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ñn frasco yuū luu jeē ñūhun chitú aceite perfume.

³⁸ Te íin yítí ña nuū jehé yā, te ndáhyú ña. Te ni quejéé ña stáji ña jehē yā jíin ndute tínúú ña, te ni nasíchí ña jíin íxi xíní ña. Te ni techūhú ña jehē yā, te ni chuhun ña perfume un.

³⁹ Te tēe fariseo un jeē ní cana de ya, ni jito de jeē súcuán ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jéni ni de.

⁴⁰ Yūcuán na te ni cahān Jesús jíin de:

Simón, cúni rī cahān rī jíin ró ñn jnūhun.

Te ni cahān maá de:
Cahān ní, Maestro.

⁴¹ Te ni cahān Jesús:

Ñn tēe jéhe núu xūhún, ni īyo uū tēe táu nuū de. ñn de ni cotaū uhūn ciento denario, te inga de ni cotaū uū xico uxí denario.

⁴² Te tú na vé cánevāha tēe un jēe náchunaa de. Te tēe jéhe núu xūhun ní ine cáhnu ni de nuū ndíndúú tēe ún. Núu súcuán te cachí ró: Jeē ndíndúú tēe ún, ¿ndé ñn de coo maní gā jíin de? Achí yá.

⁴³ Te ni cahān Simón:

Jéni ni na jēe tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájnūhun íyó costumbre. Te ñahan yáha ní stáji ña jehē rī jíin ndute tínúú ña, te ni nasíchí ña jíin íxi xíní ña.

⁴⁵ Te tu ní téchūhu ró ruhū nájnūhun íyó costumbre. Te ñahan yáha, nde jeē ni quívi rī vehe ró, tu jécuiñí ña jeē téchūhú ña jehē rī.

⁴⁶ Te tu ní chūhun ró aceite xiní rī nájnūhun íyó costumbre. Te ñahan yáha ní chuhun ña aceite perfume jehē rī.

⁴⁷ Núu súcuán te cáhán rī jíin ró jeē ní stéén ña jeē yóhyo maní ña jíin rí siquí jeē íne cáhnu ni rī nuū táca cuēchi ña,

vēsú cuehē cúu. Te núu cone cáhnu ni rī nuū ñn ñayuu iyó jecu-ni cuēchi, te jecu-ni stéén i jeē maní i jín rí, achí yá.

48 Te ni cahān yā jín ña:

Je íne cáhnu ni rī nuū tāca cuēchi ró, achí yá.

49 Yūcuán na te ñayuu cáyeji staā jín yá, ni quejéé i cácahān maá i:

¿Ndé ñn ga cúu tēe yáha jéé cahán jeē íne cáhnu ni nuū cuēchi? achí i.

50 Te Jesús ni cahān gā yā jín ñahan ún:

Ni candíje ró rúhū, te jeē yúcuan ní jnama rí rohó. Cuáhán te na ndúsñ ni rō. Achí yá.

Jnūhun ñahan ní cajejnīñu nuū yā

8

1 Yūcuán na te ni cuu jecu quivī, te ni jica cuu Jesús tācā ñuu náhnu jín ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jín yá.

2 Te suni iyó jecu ñahan cájica jín yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī.

3 Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jín cuéhē gā ñahan jeē cáchindéé ñáhán ña, jéhe ña tāca jéé jini ñúhún yá jín de jijnáhan de.

Jnūhun yátá síquī tēe jéte trigo

(Mt. 13.1-9; Mr. 4.1-9)

4 Te cuehē ñayuu tācā ñuu yūcuan ní jinūcoo i nuū Jesús. Te ni cacutútú cuéhē ndasí ñayuu, te ni cahān yā ñn jnūhun yátá jín i:

5 ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jitē yuhíchi. Te ni cajeñū ñayuu síquī, te ni cayeji saa.

6 Te jecu gā ni jitē nuū ñúhun yuū. Te ni cane, te ni ichī-ni, chí tú cuehē cajin.

7 Te jecu gā ni jitē nuū náne iñu. Te ñnuú-ni ni canecoo iñu jín, te ni jesi nuū.

8 Te jecu ni jitē nuū ñúhun váha. Te nuū ní jehnu, te ni jēhe cuehē nunī, chí jeē ñn ñn ni jēhe nde ciento. Achí yá.

Yūcuán na te ni cahān jee ya:

Tāca rōhó jéé jini sōho, na chúsóhó ró, achí yá.

Najehē cahán yā máni jnūhun yátá

(Mt. 13.10-17; Mr. 10-12)

9 Te tēe cáscuáha jín yá ni cacajnūhún de ya na vé cuní cahán jnūhun yátá yáha.

10 Te ni cahān yā:

Róhó jijnáhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jín jnúhun yátá cáhán rī jín sava ga i, návāha vēsú cájito i, te quéndō i nájñūhun jeē tú na vé ni cájito i. Te vēsú cájini sōho i, te ma jécūhun ni i.

*Jeē ní castūhun cáji yá
jnūhun yátá téé jéte trigo*

(Mt. 13.18-23; Mr. 4.13-20)

11 'Jnūhun yátá yáha cúní cahān: Trigo un cúu jnūhun Yaā Dios.

12 Te trigo jeē ni jítē yuhíchi cúu nájnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i.

13 Te trigo jeē ni jítē nuū ñúhun yuū cúu nájnūhun ñayuu cájini jnūhun, te cájetáhú i te cácusī ni i jín. Te tu cúcutú jnúhun ún ini anuá i. Te jecu-ni quivī cá candíje i, te núu ni quejéé jnúndóho, te cájica yátá i.

14 Te trigo jeē ni jítē nuū náne iñu cúu nájnūhun ñayuu cájini jnūhun, te cuangoo i te cácuñéñu i jín jniñu i jín jéé cuní i cucúca i te coo sī ni i. Te tu ije i jín jnúhun ya.

15 Te trigo jeē ni jítē nuū ñúhun váha cúu nájnūhun ñayuu cájini nahín jnúhun ya, te cájnií vāha i, chí íyó váha íyó ndáa anuá i. Te cáhije i jín jnúhun ya, chí cá candíje vāha i.

*Jnūhun yátá síquī lámpara
(Mr. 4.21-25)*

16 'Núu nástīn ñayuu iñ lámpara, te tu jési i ni iñ síquī, ni tu jéni i chíji jito. Chí sa suhva jéni i nuū sucún, návāha cundijin nuū ñayuu quívicoo vehe.

17 Te suni súcuan tu íyó ni iñ jnūhun sāhi jéé ma cúní ñayuu, chí ndihi táca jnúhun cácahān i nane ndijin te cuni ñayuu.

18 'Núu súcuan te na cúní sōho vāha ró, chí ñayuu je jécūhun ni, stéén gā yā nuū i. Te ñayuu tu cándíje, máá jecu jeē jéni ni i jeē jiní i, sa suhva naa. Achí yá.

Náná yā jín ñani yā

(Mt. 12.46-50; Mr. 3.31-35)

19 Yūcuán na te ni quee naná yā jín táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu.

20 Te iñ ñayuu ni castūhun nuū yā:

Náná ni jín táca ñani ni cáhīn nuū quéhe, te cá cuni cahān jín ní, áchí i.

21 Te ni cahān maá yá:

Suni náná rī jín ñani rī cácuu ñayuu cájini sōho jnūhun Yaā Dios te cáscúcu i, áchí yá jín i.

*Jeē ní jecuñī tachī níhin jín
mar ni sáha ya*

(Mt. 8.23-27; Mr. 4.35-41)

22 Te iñ quivī ni quivī ya iñ barco jín téé cáscuáha jín yá, te ni cahān yā jín de:

Na yáha yó quíhīn yō inga lado mar.

Te ni cascáca de barco cuangoo de.

23 Te níni cáscáca de barco, te ni quixī yā. Te ni jequīhi iñ tachī níhin nuū mar, te je yajni chitú ndute ini barco, te ndúcú quée barco.

24 Te ni castónda de ya, te ni cacahān de:

Maestro, Maestro, vijna te quée yó chíji ndute te naa yō, achí de.

Te ni ndocuñī-ni ya, te ni cahān yā nuū tachī níhin jín

nuū mar. Te ni cajecuiñi-ni, te ni cuu nayúu lí-ni.

²⁵ Te ni cahān yā jín tée cáscuáha jín yá:

¿Naun tu cácañdije ró?

Te máa de yōhyo ni cayūhú de, te cánaa ni de, te cácahān de jín jnáhan de:

¿Ndé ñn ga cúu tēe yáha jēe nde nuū tachí ñihin jín nuū ndúte ndácu de jniñu te cájetáhú jēe cahán de? Achí de.

Tēe Gadara jeē ndóho tachī (Mt. 8.28-34; Mr. 5.1-20)

²⁶ Yūcuán na te ni cane ya jín de región Galilea, te cuahān yā región Gadara jeē íne inga lado mar Galilea.

²⁷ Te nuū ní nanuu ya nuū ñúhun íchi, te ñn tēe ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiñi de sahma, ni tu ndéé de vehe, chí sa suhva nuū cáyindūji ndīyi ndeé de.

²⁸ Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní nuū ná, Jesús Sēhe Yaā kujéñnu téyí? Cáhan ndahú ná jín ní jeē ma stóho ní sáña, áchí de.

²⁹ Súcuān ni cahān de, chí je ni ndacu ya jniñu nuū tachí un jēe na quéndacoo ini de. Te ni cuu cuehē jínu sáha xeēn tachī jín de. Te cájihni ñayuu ndaha de jehē de jín cadena, návāha tú na vé sáha de. Te ndíhi-ni jéhnde de, te jínu de jéhén de nde nuū ñúhun téhé sáha tachī ún.

³⁰ Te Jesús ni cajñuhun yá de:

¿Na vé naní ró?

Te ni cahān de:

Legión naní ná.

Súcuān ni cahān de jeē naní de, chí ñúhun cuehē tachī ini de.

³¹ Te ni cacahān ndahú tachī un jín yá jeē ma tají yá quihñi ini tūhnchi cúnú.

³² Te yucu yúcuān cáhñi cuehē quñi cájitu ti. Te tachí jeē cáñuhun ini tēe un ní cacahān ndahú jín yá jeē na cuáha ya jñuhun quñivicoo ini quñi ún. Te ni jēhe ya jñuhun.

³³ Te ni quendacoo tachī ún ini tēe ún, te ni quñivicoo ini quñi. Te quñi un ní cajinu ti ni ñingoo ti ñn yucáva, ni quñivicoo ti nuū mar, te ni ndaquñi ti ndute, ni cajihñi ti.

³⁴ Te tēe cándito ti ni cajito de jeē súcuān ni cuu, te ni cayūhú de. Te ni cajinu de cuacastūhún de nuū ñáyuu ñuu un jín ñáyuu tāca rancho.

³⁵ Te cuango ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachī ini, néne de nuū jehé Jesús, te ñúhun de sahma, te je ni nducájí xíní de. Te ni cayūhu ñáyuu ún.

³⁶ Te tēe ní cajito ni canacani de jñuhun nuū ñáyuu, ndese ni nduvāha tēe ni ñuhun tachī ini.

³⁷ Yūcuán na te tāca ñáyuu ní región Gadara, ni caquejéé i cácahān ndahú i jín yá jeē na cújiyo ya quihñi yā, chí yōhyo cáyūhú i. Te ni ndīvi ya ini barco jeē quñuhun yā.

³⁸ Te tēe jeē ní quendacoo tachī ini, ni cahān ndahú de

jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

³⁹ Cuánuhun vehe ró, te nacani ró jnūhun ndese yōhyo jéhnū jniñu ni sáha Yaā Dios jíin ró, achí yá jíin de.

Te cuahān de, te ni nacani de jnūhun ní ñuu ún, ndese yōhyo jéhnū jniñu ni sáha Jesús jíin de.

Jnūhun sēhe síhí Jairo jíin ñahan ní quehé yusáhma ya (Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chí ndihí i cándetu i ya.

⁴¹ Te ni quee ñin tēe cújéhnū ini vehe ñi sinagoga, naní de Jairo. Te ni jecuiñi yití de nuū jehé yā, te ni cahān ndahú de jíin yá jeē na quihín yā jíin de vehe de.

⁴² Chí íyó ñin sēhe síhí de jeē mañuhún-ni i nuū de, te íyó i nájnūhun uxí uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuangoo i.

⁴³ Te mēhñu ñayuu un cuahān ñin ñahan cúhú jeē ní cuu uxí uū cuiyā ndóho ña cuehyiñiñi. Te ni jexin ña taca jéē névāha ña jíin tēe tájñá, te tu ní ndúvāha ña sáha ni ñin de.

⁴⁴ Te ni quee ña ichi yátá yā, te ni quehé ña yusáhma ya. Te ni jecuiñiñi ni ñiñi ña.

⁴⁵ Yūcuán na te ni cahān Jesús:

¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhīn jíin de, ni cacahān de:

Maestro, jíto ní jéē ñayuu cuehē yāha ní chitú níhin i xiin ní, te cáquihí i níhín, te cájnūhun ní ndé ñin ni quehé sahma ní.

⁴⁶ Te ni cahān Jesús:

Tuú chí ñin ñayuu ni quehé sahma ri, chí ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jéē tu ní cúu coo yuhu jeē ní sáha ña. Te quisi i ña ni quee ña, te ni jecuiñi yití ña nuū jehé yā. Te jíto jíinúu taca ñayuu, te ni cachi cají ña najehē ni quehé ña yusáhma ya, jíin jéē ní nduvāha-ni ña.

⁴⁸ Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuahán te na ndúsñi ni rō, achí yá.

⁴⁹ Te níni cáhán gā yā súcuan, te ni quee ñin tēe vēji vehe Jairo, tēe cújéhnū ini sinagoga, te ni cachi nuū de:

Je ni jihí sēhe síhí ní. Te ma sájnēñu ga ní Maestro, achí de.

⁵⁰ Te ni jini Jesús jnūhun yáha, te ni cahān yā jíin Jairo:

Ma yūhu ró, chí candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jéhe ya jnūhun quiví ñayuu jíin yá, chí máá-ni Pedro jíin Juan jíin Jacobo jíin tátá naná sūchi síhí un.

52 Te cácuuñhyá ni ndihi ñayuu cáyucú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan rō. Tu ní jhí i, chí quixí-ni i, áchí yá.

53 Te ni cajecū catá i jeē ni cáhān yā, chí cájini i jeē ni jhí sūchi sñhí un.

54 Yūcuán na te ni jñi ya ndaha i, te ni cahān jee ya jín i:

Sñhí, ndocuññí, achí yá.

55 Te ni natecu i, te ni ndocuññí-ni i. Te ni ndacu ya jñiñu jeē na cuáha ña jeē cáji i.

56 Te tátá i náná i yōhyo ni canaa ni de cájito de. Te ni ndacu ñihin ya jñiñu nuū de jeē ma cáchi de nuū ni ñn jeē súcuán ni cuu.

Jeē ní tají yá ndihúxí uū de cuanacani de jñuhun
(Mt. 10.5-15; Mr. 6.7-13)

9

1 Te ni nastútú yá ndihúxí uū tēe cáscuáha jín yá, te ni sáha ya jeē cóndiso jñiñu de te coo poder de jeē quénehen de tachí ini ñayuu, jín jé nasávāha de ñayuu cácuñhū.

2 Te ni tají yá de quingoo de jeē nácani de jñuhun ndese ndácu Yaā Dios jñiñu, jín jé nasávāha de ñayuu cácuñhū.

3 Te ni cahān yā jín de:

Ma cóndiso rō jé cuajniñu rō ichi, ni vara, ni ñunu, ni staa, ni xūhún. Te quihñ rō jín ñn-ni camisa, te ma cóndiso rō inga.

4 Te na-ni vehe núu ni quívicoo rō, te yūcuán coyūcu

ró nde quenda tucu ró quihñ rō inga ñuu.

5 Te núu ñn ñuu tu cájetáhú i róhó, na quéndacoo ró yúcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Achí yá.

6 Te ni quendacoo de cuahān de, ni cajica nuu de taca ñuu, ni canacani de jñuhun jnáma Yaā Dios ñayuu. Te taca lado ni canasávāha de ñayuu cácuñhū.

Jeē ni jhí Juan tēe scuándute
(Mt. 14.1-12; Mr. 6.14-29)

7 Te Herodes, tēe cúu gobernador, ni jini jñuhun de taca jñiñu sáha Jesús. Te ni cuné ni de, chí cájeni ni sava ñayuu cácahān i jeē Juan ni natecu de.

8 Te sava ga i cácahān jeē ní nane Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya nde jenahán, ní natecu de.

9 Te ni cahān Herodes:

Juan chí ni ndacu ri jñiñu ni tahndē xiní. Núu súcuán ¿te ndé tēe cúu tēe yáha jeē jini jñuhun ri jeē sáha de jñiñu jéñu? Achí de.

Te ni nducú Herodes modo coto de nuū Jesús.

Jeē ni scáji yā uhñ mil tēe
(Mt. 14.13-21; Mr. 6.30-44; Jn. 6.1-14)

10 Te ni ndecoo tēe cácuu apóstol jeē ní tají yá ni canacani jñuhun. Te ni cacachi de nuū yā taca jñiñu ni casáha de. Te ni jeca ya de cuahān sñn ya jín de ñn lugar nuū tú ñayuu, yajni ñuu Betsaida.

11 Te ni cajini ñayuu, te suni cuango i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñu.

12 Te nuū cuáhini, te ni que-coo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācá ñuu jíin táca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, áchí de.

13 Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chí uhūn-ni staā jíin úū-ni chācá. Te vēsú núu quicuaan ná stāa caji ndihi ñayuu cuehē yáha, te ni ma cúu, áchí de.

14 Chí iyó nájñūhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo sīn cincuenta cincuenta i, áchí yá.

15 Te súcuan ni casáha de, te ni cacucōo ndihi ñayuu.

16 Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē.

17 Te ndivii i ni cayejí, te ni candutú chíji i. Te ni canastútú de pedazo staā jeē ní quendōo, te ni chítú úxí uū jíca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

18 Te ñin quiví ni cusīn Jesús, jícan tahú yā, te máa-ni tēe cáscuáha un cáhīn de jíin yá. Te ni cajñūhun yá de:

Ruhū, ¿ndé ñin cúu ri cácahān ñayuu? áchí yá.

19 Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya ni natecu de.

20 Yūcuán na te ni cajñūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, áchí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

21 Yūcuán na te ni ndacu nīhin ya jniñu nuū de jeē ma cáchi de jñūhun yáha núu ní ñin ñayuu.

22 Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéhnú jíin sūtū cácujuhūn jíin tēe cástéén tutu ley, squéhichí de ruhū. Te cahni de ruhū, te nuū uní quiví te natecu rī, áchí yá.

23 Yūcuán na te ni cahān yā jíin ndihi de:

Na-ni ñayuu núu cúní i condiquīn i ruhū, na cási i jeē cúní máá i, te na cóndiquīn i ruhū tāca quiví, te cuāha i jñūhun ndoho i jñúndóho jeē siquí rī, vēsú na cúu i.

24 Chí núu ndé ñayuu cúní i cácu i nuū jñúndóho quiji nuū

i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni.

²⁵ ¿Chi ndé cuajniñu vēsú na cúndeyí ñayuu nihin i ní ñáyiví, te núu squívi i máa i nuū jnahnú ndetū i ní cáni?

²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jín siquí jnúhun cáhán rī, suni súcuan cucanu rī jeē siquí máa i, quiví ndíji ri. Te quiví ún chi yōhoyo luu kujéhu ri, nájnūhun cújéhu Tátá rī, te suni cácujuhnu ndajéhé ndoo ya sáha ya.

²⁷ Te jendaá cahán rī jín ró jeē sava tēe cáhīn yáha, ma cúu de chi nde cuni de jeē ndácu Yaā Dios jniñu jín poder yā. Achí yá.

*Jeē tucu ni nduu ya
(Mt. 17.1-8; Mr. 9.2-8)*

²⁸ Yūcuán na te nájnūhun nuū uná quiví jeē ní cáhān yā jnūhun yáha, te ni caa ya ñn yucu, cuacacān tahu yā. Te Pedro jín Jacobo jín Juan cuango de jín yá.

²⁹ Te ní jícán tahu yā, te tucu ni nduu nuū yā, te sahma ya ni nducujín quiyi, te ndíndéé.

³⁰ Yūcuán na te ni canecoo uū tēe, cándajnúhún de jín yá. Te cúu de Moisés jín Elías, tēe ni cahīyo jenahán.

³¹ Te luu ndíndéé de cáhīn de, te ni cacahān de jín yá siquí jeē ní cuyajni cuu yā ñuu Jerusalén.

³² Te Pedro jín tēe cáyūcu jín de, yōhoyo cájī de máhná, te vēsú súcuan te tu ní cáquixī

de. Te ni cajito de jeē lúu ndíndéé yá jín ndíndúú tēe cáhīn jín yá.

³³ Te nuū ní cacujiyo tēe un nuū yā, te ni cahān Pedro jín yá:

Maestro, nacā jeē váha jeē cáhīn ná yáha. Te na sáha ná únī vehe ramada, ñn cuu máa ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de.

³⁴ Te ní cáhān de súcuan, te ni quee vicō nūhun ní jesi nuū de jínáhan de. Te ni cayūhú de jeē cáhīn de chíji vicō ún.

³⁵ Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jín. Te na cúni nahín ró jnūhun cáhán yā, achí.

³⁶ Te nuū ni jínu ni cahān jnūhun ún, te máa ñn na Jesús ín ya nuū de. Te máa de tu ní cácahān cuiti de, te tāca quiví ún tu ní cácachi de nuū ni ñn jeē súcuan ni cajito de.

*Jeē ní nasávāha ya ñn sūchi
ñúhun tachī ini
(Mt. 17.14-21; Mr. 9.14-29)*

³⁷ Te inga quiví un ní nanuu ya yucu jín de. Te cuehē ñayuu ni jejnahan i ya.

³⁸ Te mēhñu ñáyuu cuehē un ní cana jee ñn tēe:

Maestro, jícán tahu na núu ni jēe condēhe ní sēhe yí ná, chí máñúhún i nuū ná.

³⁹ Te máni jeē sáha xeēn tachī jín i, te cána cóhó i sáha, te jéhi yíhí, te jēe tiñū yuhu i. Te yōhoyo stóho i, te yōhoyo uhū siaá i.

⁴⁰ Te ni cahān ndahú ná jín tēe cácuáha jín ní jeē na

quénehen te tachī ún, te tu ní cúu sáha de, áchí de.

41 Te ni cahān yā jín de jínáhan de:

Ñayuu yōhyo nihni ni cácuu ró, chí tu cácañdije ró jéē cuu nduvāha i. ¿Nasaa ga quivī condee rī jín ró jeē cuáñdeyí ni rī jín ró? Cuáquihin sēhe ró na quíji i, áchí yá.

42 Te níni véji i nuū yā, te ni cotúú i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

43 Te ndívii ñayuu nahán ní canaa ni i cájito i jeē yóhyo jéhnu jniñu sáha Yaā Dios.

Jeē ni cáhān tucu ya jeē cúu yā

(Mt. 17.22-23; Mr. 9.30-32)

Te níni cánaa ni i cájito i tācá jniñu ni sáha Jesús, te ni cahān yā jín tēe cáscuáha jín yá:

44 Chuhun vāha ni rō jñuhun cáhān rī yāhá, te ma náa ni rō, chí ruhū, Yaā ní nduu tēe, nastúu i ruhū quivī ri ndaha tāca tēe xeēn, áchí yá.

45 Te tu ní cájecūhun ni de jñuhun cáhān yā, chí tu ní cúu cuiti jecūhun ni de. Te ni cayūhú de cajñuhún de ya siquī jñuhun ni cahān yā.

Ndé ñáyuu cúu jeē cujéhnu ga

(Mt. 18.1-5; Mr. 9.33-37)

46 Yūcuán na te tēe cáscuáha jín yá ni caquejéé de cácahān de siquī núu ndé ñin de cújéhnu ga.

47 Te Jesús ni jini yā jeē súcuan cájeni ni de. Te ni jñi

ya ndaha ñin sūchi lúlí, te ni jeni ya i xiin ya.

48 Te ni cahān yā jín de:

Na-ni ñayuu núu jeē siquī ruhū jetáhú i sūchilúlí yáha, te ruhū jetáhú i. Te ñayuu jetáhú ruhū, suni jétáhú i Yaā ní tají ruhū véji ri. Te ñayuu núu ga mēhñu ró, máa i cújéhnu ga, achí yá.

Ñayuu tu cáhān siquī yā, ñin i jín yá

(Mr. 9.38-40)

49 Yūcuán na te ni cahān Juan:

Maestro, ni cajito ná ñin tēe jeē jín síhví ní quénehen de tachī ini ñayuu. Te ni cajesi na jeē sáha de, chí tu jíca de jín yó, achí de.

50 Te ni cahān Jesús jín de:

Ma cási rō jeē sáha de, chí tēe tu cáhān siquī yō, ñin de jín yó, achí yá.

Jeē ni cáhān yā nuū Jacobo jín Juan

51 Te ni cuyajni quivī jeē quínuhun yā andiví, te ni tee téyí ni yā jeē quihín yā ñuu Jerusalén.

52 Te ni tají yá sava tēe yósnúu de jín jñuhun jeē jinú yā. Te cuango de ñin ñuu Samaria návāha nducú de nuū ndóo ya.

53 Te ñayuu Samaria un tu ní cájēhe i vehe ndōo ya, chí ni cajini i jeē ndé Jerusalén quihín yā.

54 Te Jacobo jín Juan, tēe cáscuáha jín yá, ni cajini de jeē súcuan cúu, te ni cacahān de jín yá:

¿A cúni ni jéē ndácu yó jniñu quiji ñuhūn nde andiví,

nájnūhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō.

⁵⁶ Chi ruhū, Yaā ní nduu tēe, tú vēji ri jeē snāā rī ñayuu, chí sa suhva jeē jnáma rī ñayuu, achí yá.

Yūcuán na te cuahān yā jíin de inga ñuu.

Siquī ñáyuu jeē cáconi i condiquīn i ya

(Mt. 8.19-22)

⁵⁷ Te níni jíca ya ichi jíin de, te ni cahān ñn tēe jíin yá:

Condiquīn na níhín quihīn yō ndé-ni cúu-ni nuū quihín ni, achí de.

⁵⁸ Te ni cahān Jesús jíin de:

Tāca ñūcuii, iyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jíin inga de:

Condiquīn ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquīn na níhín, achí de.

⁶⁰ Te ni cahān Jesús jíin de:

Stóo tāca ndíyi na chindūji jnáhan ndíyi, chí ndíyi cácuu ñayuu tu cácañdíje. Te rōhó, cuáhán te nacani ró jnúhun ndese ndácu Yaā Dios jniñu, achí yá.

⁶¹ Yūcuán na te suni ni cahān inga de:

Cúni na condiquīn na níhín, te cuāha ní jnúhun jeē xihna

gā quicahān na jíin ñáyuu cáyūcú vehe ná, achí de.

⁶² Te ni cahān Jesús jíin de:

Núu na-ni tēe quėjéé de condiquīn de ruhū, te núu máni jeē nácani cuihyá ni de siquī tāca jeē ni stóo de, núu súcuan te cúu de nájnūhun ñn tēe jítu jíin yátá, te jícó cóto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítoho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin tāca lugar nuū jé yajni quihīn maá yá.

² Te ni cahān yā jíin de:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. Núu súcuan te cacān tahú rō nuū maá Jítoho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jnūhun ya nuū ñáyuu.

³ Te cuángoo jíjnáhan ró, te na cástūhun rí nuū rō jeē tají rí rohó quingoo ró nájnūhun londe mēhñu yihī.

⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jíin ni ñn.

⁵ Te na-ni vehe núu ni quiví ró, te xihna gā cahān rō: Na quíji jnūhun ndeyí jnūhun sīñ

ni nuū rohó, ñáyuu vehe yáha, achi rō.

⁶ Te núu vehe yúcuán iyó ñáyuu vāha, te jnūhun ndeyí ní cahān rō jinū siquī i. Te núu tuú, te jnūhun ndeyí ní cahān rō ma jinū siquī i.

⁷ Te suni vehe yúcuán coyūcu ró, te caji rō coho ró jéē cuáha ñayuu nuū rō. Chi siquī jniñu jeē nácani ró jnúhun nuū ñáyuu, te cánuú coto i róhó. Ma quéndōo ró tijni vehe, chi ñin-ni vehe.

⁸ Te na-ni ñuu núu ni quivicoo ró, te núu cuatáhú i róhó, te caji rō tāca jéē cuáha i nuū rō.

⁹ Te nasávāha ró ñáyuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō.

¹⁰ Te na-ni ñuu núu ni quivicoo ró, te núu tuú ní cájetáhú i róhó, te quendacoo ró ini calle yūcuán, te cahān rō:

¹¹ Nde ticachā ñuu rō yāha jéē ni jnū jehē rī, na náscóyo ri jeē cúu seña jeē iyó cuéchi ró jéē tuú ní cájetáhú ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú.

¹² Te cáhán rī jín ró jeē quiví juicio te xeēn gā coo castigo siquī ñuu casáha súcuán vésú siquī ñuu Sodoma nuū ní casáha ndasí ñáyuu cuéchi.

Jeē ní cuxeēn yā nuū sava ñuu ñihni ní
(Mt. 11.20-24)

¹³ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu

Betsaida. Chi núu ini ñuu Tiro jín ñuu Sidón ni sáha ri jniñu jéñu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuéchi i núu. Te sáha i seña jeē steén jeē nácani ni i siquī cuéchi i, chi chuhun i sahma jnúu te chuhun i yaā xinī i núu.

¹⁴ Núu súcuán te quiví coo juicio te xeēn gā coo castigo siquī rō jijnáhan ró vésú jeē ni iyó siquī ñuu Tiro jín ñuu Sidón.

¹⁵ Te róhó ñáyuu ñuu Capernaum, ¿á cájeni ni rō jeē cujéñu ró nájñūhun ñin jeē cáca cuahān ichi ándiví? Tuú chí sa nanuu ró ndé lugar nuū cáyūcu ánuá ndīyi. Achí yá.

¹⁶ Te ni cahān gā yā jín téé jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají ruhū vėjí rí. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxí tēe un, cácusí ni de te cácahān de jín Jesús:

Nde tachī cájetáhú núu na jéē jín síhví ní, chí quéndacoo ini ñayuu, achí de.

¹⁸ Te ni cahān yā jín de:

Súcuán cúu, chí ni jito ri jeē nájñūhun ñin taja ni ñingava Satanás ichi ándiví, chí ni quende rí ndihí poder un.

¹⁹ Te vijna te je ni jēhe ri fuerza nuū rō jeē cueñū rō nájñūhun siquī tāca cóo jín tísuhma, te cundeyí ró siquī

tāca fuerza maá jéē jító uhū yohó, te tú na vé sáha ga jíin ró.

²⁰ Te ma cúsiñ ni rō maá-ni jeē cájetáhú táchi nuū rō, chí sa cusñ gā ni rō jeē yosó síhví ró nde andiví. Achí yá.

*Jeē ní cusñ ni Jesús
(Mt. 11.25-27; 13.16-17)*

²¹ Te suni hora un ní cusñ ni Jesús, ni sáha Espíritu Santo, te ni cahān yā:

Na cútahū na núū ni Tátā, Jitoho andiví jíin ñáyiví. Chí ni jesi ni táca jnúhun ndichí ní, jeē ma cúní ñayuu ndichí jíin ñáyuu tūhva cuenta ñayiví yáha. Te ni steén ni núū ñayuu cácuu nájnūhun sūchi lúlí. Chí súcuan ni nujnahan ni ni Tátā, achí yá.

²² Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñin cúu ruhū, Séhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Séhe cúu jeē jiní. Te iyó ñayuu jeē cuní maá Séhe steén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jító ya nuū téé cáscuáha ún, te ni cahān yā jíin máá-ni de:

Yōhoyo ndetū ñayuu cájito jniñu jéhu jeē cájito máá ró.

²⁴ Chí cáhán rī jíin ró jeē cuehē tēe ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnúhun ñin tēe vāha ni nación Samaria

²⁵ Yūcuán na te ñin tēe steén tutu ley Yaā Dios, ni ndocuiñ de ni jecahān de jíin Jesús, chí cúní de coto ndee de ya. Te ni cajnúhún de:

Maestro, ¿na vé sáha ná te ñihñn tahú na cotecu na ní cáni andiví? áchí de.

²⁶ Te ni cahān yā jíin de:

¿Ndese yósó núū tútu ley? ¿Ndese cáhán cáhu ró? Achí yá.

²⁷ Te máá téé un ní cahān de jeē cáhán nuū tútu:

Coo manī ndasí ró jíin máá Jitoho rō Yaā Dios, nde jnáā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ní fuerza rō, jíin ní jéē níjnūní rō. Te cundáhú ni rō jnáhan ró nájnūhun cundáhú ni rō máá ró, achí. Achí de.

²⁸ Te ni cahān yā jíin de:

Vāha ni cahān rō. Te núu cuu sáha ró súcuan te ñihñn tahú rō cotecu rō ní cáni, áchí yá.

²⁹ Te máá téé un cúní de jeē quéndōo ndaā de nuū yā jíin jnúhun ni cajnúhún de, te ni cahān de:

¿Te ndé ñáyuu cácuu jnáhan ná? áchí de.

³⁰ Te ni cahān Jesús:

Ñin tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuñna núū de, te ni caquende ndihí ndajniñu de, te nde sahma ñúhun de. Te ni cacani ndevāha ún de jeē jé yajni cuu de núú. Te ni castóo ún de, te cuango.

³¹ Te ni cuu jeē ichi un yáha ñin sutū quihñn de, te ni jito

de nuū tēe ún, te ni síyo-ni de cuahān de.

³² Te suni súcuan ñn tēe grupo levita jeē cájejniñu ini templo, vēji de ichi ún, te ni jito de nuū tēe ún, te ni yāha jícá-ni de cuahān de.

³³ Te ñn tēe nación Samaria, suni vēji de ichi ún, te nuū ní jito de, te ni cundáhú ni de tēe ún.

³⁴ Te ni quee de nde nuū catú tēe ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quití de, te cuahān de jíin tēe un ndé ñn mesón, te ni condito de.

³⁵ Te ñnga quivī ún, hora jeē quihín de, te ni tava de uū xūhun cáa, ni jēhe de nuū tēe chíi mesón. Te ni cahān de: Coto ní tēe yāha, te núu caxīn gā ni xūhun ní jíin de, te nuū nándicó ná te nachunaa ná núu ní, áchí de.

³⁶ Núu súcuan ¿te ndese jéni ni rō? Jeē ndinúni tēe ún, ¿ndé ñn de ni chihi cuenta jeē jñahan de cúu tēe ni canecoo ñacuīhna núu? Achí yá jíin tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tují, vēsú tēe ñuu jicá cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihin tucu ya ichi cuahān yā, te ni jinū yā ñn ñuu lulí. Te ñn

ñahan nání Marta, ni cana ña ya ni jehēn yā vehe ña.

³⁹ Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jñuhun cáhán yā.

⁴⁰ Te Marta chi cúnée máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sãña núu jniñu? Te cahān ni jíin ña na chíndée ñáhán ña sãñá, áchí ña.

⁴¹ Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin.

⁴² Te íyó ñn-ni jniñu cánuú. Te María chi ni nacāji ña jniñu cánuú, suu jeē ndíhví ni ña síquī jñuhun Yaā Dios, te ma quénehen yó ña nuū ún. Achí yá.

Jeē ni stéén yā ndese cacān tahú yō

(Mt. 6.9-15; 7.7-11)

11

¹ Te ñn quivī íne Jesús ñn lugar jicán tahú yā. Te nuū ní ndíhi ni jicān tahú yā, te ñn tēe scuáha jíin yá, ni cahān de:

Stéén ni núu ná ndese cacān tahú na jíjñahan ná, nájñuhun ni steén Juan nuū tēe ni cascuáha jíin de, áchí de.

² Te ni cahān yā jíin de:

Jeē cacán tahú rō, te suhva cahān rō:

Tátá maá ná jíjñahan ná jéé ndeé ní andiví,
níní na cóo yíñúhún ná nuū ní,
chi Yaā íi cúu ní.

Te ñúhun ni na jéē yachī quiji
quivī ndacu ní jniñu nñ
ñáyiví yáha.

Te na cóo tācá jniñu nújnahan
ni ní,

nájnūhun íyó ini andiví,
súcuan na cóo ini
ñáyiví.

³ Staā jeē cátecu na táca quiví,
cuāha ní núū ná vijna.

⁴ Te cone cáhnu ni ni núū tāca
cuéchi cásáha ná núū
ní,

nájnūhun cáhine cáhnu ni
na núū ñayuu casáha
cuéchi nuū ná.

Te ma cuáha ní jnúhun jeē
coto ndee jexeén sãñá,
chi sa suhva jnama ní sãña
nuū tāca jéē neé.

Achi rō jijnáhan rō. Achí yá.

⁵ Te ni cahān gā yā:

Núū ndé ñin rōhó íyó ñin
amigo rō, te núū quihīn rō
vehe de sava ñuū te cahān rō
jijn de: Amigo, cuāha núū unī
staā nuū rī.

⁶ Chi ñin amigo rī jeē jíca de
viaje, ni quee de vehe rī, te
tú na vé névaha rī jeē cuáha rī
caji de. Achi rō.

⁷ Te núū cahān tēe íne ini
vehe: Ma stáhān rō ruhū,
chi ndíhyú yehyí rí, te je
cáquixī sēhe rī jijn rí, te ma cúu
ndonda rī jeē cuáha rī nuū rō,
achi de.

⁸ Te cáhān rī jijn rō, vēsú
ma ndónnda de cuāha de nuū
rō siquī jeē cúu de amigo rō,
te jeē yóhyo stáhān rō de, jeē
yúcuan ndonda de cuāha de
ndihi jeē jini ñúhún rō.

⁹ Núū súcuan te cáhān rī
jijn rō jijnáhan rō jeē suni
súcuan cacān tahú rō nuū Yaa
Dios, te cuāha ya nuū rō. Te
nducú rō tāca jéē váha íyó

núū yā, te nihīn rō sáha ya.
Te cacān tahú rō nde nihīn
rō, nájnūhun sáha ñayuu cahān
yehyí ndé nune quiví i.

¹⁰ Chi tāca ñayuu jicán,
cuāha ya nuū i. Te ñayuu
nducú, suni nihīn i. Te ñayuu
cahān, nune ya ichi nihīn i jeē
cuní i.

¹¹ ¿Te ndé ñin rō cúu tátá, te
núū sēhe rō jícan i staā nuū rō,
te á cuáha rō ñin yuū nuū i? Te
núū jícan i chācá, ¿te á cuáha
rō ñin coō nuū i?

¹² Chí núū jícan i ñin ndiví,
¿te á cuáha rō ñin tisuhma nuū
i? Tú cuiti súcuan.

¹³ Núū súcuan te máá rō
jijnáhan rō, vēsú ñayuu iyó
cuéchi cácuu rō, te cájini rō
cuāha rō jéē váha nuū sēhe
rō. Te nagā ni cuu máá
Tátá rō andiví jéē ma cuáha
ya Espíritu Santo nuū ñayuu
jicán nuū yā. Achí yá.

*Jeē ní cacahān de jeē jijnūnu
ya fuerza Satanás*

(Mt. 12.22-30; Mr. 3.19-27)

¹⁴ Te quénehen ya ñin tachī
ini ñin tēe, jeē ní cuñhín de ni
sáha. Te nuū ní quenda tachī,
te ni nacahān tēe ni cuñhín
un. Te ni canaa ni ñayuu cájito
i.

¹⁵ Te sava ñayuu ún chi ni
cacahān i:

Jijn fuerza Satanás jeē
cujéhnu nuū tachí, quénehen
tēe yáha táca táchī ini ñayuu,
achí i.

¹⁶ Te sava ga i cuní i coto
ndee i ya, te ni cajicān i jeē
sáha ya jeē coo ñin seña ichi
ándiví.

¹⁷ Te máá yá jiní yā jeē
súcuan cájini ni i, te ni cahān
yā:

Tācá nación jeē sasín máá te cuajnáhan máá, núu súcuan te snáa jeē iyó váha máá. Te núu ñayuu ìn vehe sásín máá te cuajnáhan máá, núu súcuan te ma cúu ga coyūcu cáhnu.

18 Te suni súcuan Satanás, núu sásín máá jíin jnáhan tachī, ¿te ndese cuiñi nihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu.

19 Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás.

20 Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jēē ndácu ya jniñu.

21 Te núu ìn tēe ndacuī, ndíto de vehe de jíin nújijí de, núu súcuan te tú ni ìn ndajniñu de ndoñuhún.

22 Te núu quiji inga tēe ndacuī gā, te cundeyí jíin tēe ún, núu súcuan te quende nujijí de jeē ndíto de vehe de, te sáha de ndese cúní máá de jíin ndajniñu jeē quēnde de. Te nájnūhun tēe ndacuī gā ún, súcuan cúu máá rí nuū Satanás.

23 Te ñayuu tu iyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

Tachī jeē nastútú jnáhan

ndávi ini ñayuu

(Mt. 12.43-45)

24 'Núu ni quenda ìn tachī ini ìn tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: Na quínuhun rī vehe nuū ní quenda rī.

25 Te núu ni ndee tucu, te jíto jeē tēe tu cándíje un cúu de nájnūhun ìn vehe jeē ní ndundoo.

26 Yūcuán na te jéquihin uxā gā tachī xeén gā vēsú máá. Te quívicoo ini tēe un jēē cóyūcu yúcuan. Núu súcuan te xeén gā ndoho tēe un jēē sándihí vēsú jeē xíhna ñūhún. Achí yá.

Yōhyo ndetū ñayuu cájini nahín jnúhun ya

27 Te níni cáhán yā jnūhun yáha, te ìn ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

28 Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquicu i, áchí yá.

Jeē ní cajicān ñayuu tu cácañdíje ìn jniñu jéhnu

(Mt. 12.38-42; Mr. 8.12)

29 Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna mání cásáha néé i. Te cájicān i ìn jniñu jéhnu jeē steén núu Yaā ní tají Yaā Dios cúu rī. Te tú na inga jniñu jéhnu stéén rī nuū i, chi máá-ni jniñu jéhnu nájnūhun ni cuu jíin Jonás, tēe ni nacani jnūhun Yaā Dios nde jenahán.

30 Chi nájnūhun ni cajini ñayuu ñuu Nínive jeē ní cuu ñin jniñu jéhnū jíin Jonás, suni súcuan cuni ñayuu tiempo yáha jeē coo ñin jniñu jéhnū jíin ruhū, Yaā ní nduu tēe, jeē quijnáhan jíin modo ni ndoho Jonás.

31 Te reina jeē ní cujéhnū nación ichi sur, natecu ña jíin ñayuu tiempo yáha, quiv̄ juicio jeē sándaā yā cuēchi, te cahān ña cuēchi siqū i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnū ga ruhū, Yaā íne yáhá vēsú Salomón, te tu cá candíje ró ruhū.

32 Te tāca ñayuu ñuu Nínive nuū ní nacani Jonás jnūhun, natecu i jíin ñayuu tiempo yáha, quiv̄ juicio jeē sándaā yā cuēchi, te cahān i cuēchi siqū ñayuu yáha. Chi máá i ni canacani ni i ni castóo i cuēchi i quiv̄ ní nacani Jonás jnūhun nuū i. Te vijna chi cújéhnū ga ruhū, Yaā íne yáhá vēsú Jonás, te tu cá candíje ró ruhū.

Jnūhun yátá siqū lámpara
(Mt. 5.15; 6.22-23)

33 'Núu nást̄in ñayuu ñin lámpara, tu chísahí i, ni tu chúne i chíji ñin cajón. Chi sa suhva jéni i nuū sucún, návāha cundijin nuū ñayuu quiv̄icoo vehe.

34 Te tinūu ró cúu nájnūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cundijin. Te núu tinūu ró tu íyó ndijin, te ní-ni yiqui cúñu rō iyó nee.

35 Te suni súcuan cúu ánuá rō, te coto ró jeē ma cáni néé ni rō, návāha tú coo nee ini anuá rō.

36 Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin váha ini anuá rō, nájnūhun ñin lámpara jeē sáha jeē cundijin váha. Achí yá.

Jeē ni cáhānyā jeē iyó cuéchi de jijnáhan de

(Mt. 23.1-36; Mr. 12.38-40; Lc. 20.45-47)

37 Te nuū ní cuu ni cahān yā, te ñin tēe grupo fariseo ni cana de ya jeē caji yā staā vehe de. Te ni quiv̄i ya, te ni cucōo ya mesa jeē caji yā staā.

38 Te tēe fariseo un náā ni de jíto de jeē tu squicu ya costumbre jeē nandahá yá te caji yā staā.

39 Te ni cahān maá Jítoho yō jíin de:

Róhó tēe fariseo jijnáhan ró, chi nájnūhun jeē cánacate ró yátā vaso jíin yátā cohó cúu jeē nandahá ró. Te ichi ini rō chi ñūhun máni máá jnūhun cuíhná jíin jnūhun néé.

40 Tēe cánéé cácuu ró. ¿A tu cājini rō jeē Yaā ni sáha yiqui cúñu rō, suni ni sáha ya anuá rō?

41 Te jeē cájēhe ró caridad nuū ñayuu ndahú, na sáha ró siqū jeē cundáhú ndije ni rō i. Te súcuan te coo ndaā anuá rō.

42 'Nacā xeēn ndoho róhó tēe fariseo, chi cásquicu ró tācá jniñu lúlí, te tu cásquicu ró jniñu cánuú. Chi cásáha ró úxī uxī nuhnī tamīnu jíin ruda jíin tāca yucū, te cásocō rō ñin ñin siqū tāca úxī un núu

Yaā Dios. Te tu cásáha cuiti rō jniñu ndaā, ni tu cáhīyo manī rō jíin Yaā Dios. Tāca jéē yáha cánuú sáha ró núú, te suni ma stóo ró jéē socó rō tāca yúcū ún.

⁴³ 'Nacā xeēn ndoho róhó téé fariseo, chi máni cánujnahān ni rō cucōo ró núú silla yíñúhún gá ini vehe īi sinagoga. Te cánujnahān ni rō jeē cahān yíñúhún ñáyuu jíin ró nuū calle.

⁴⁴ Te nacā xeēn ndoho róhó téé cástéén tutu ley Yaā Dios, jíin róhó téé fariseo, chi téé stáhú-ni cácuu ró. Chi cándāa ró nájñuhun yaū ndīyi jeē tú ndijin, chi cásnāa rō anuá ñayuu, te tu jíní i jeē súcuan cásáha ró jíin i. Achí yá jíin de.

⁴⁵ Yūcuán na te ni cahān ĩn tēe stéén tutu ley:

Maestro, jeē ni cahān ni tāca jñuhun yáha, suni nde siquī maá ná jíjnáhan ná ní cahān ní, áchí de jíin yá.

⁴⁶ Te ni cahān yā:

Suni nacā xeēn ndoho róhó téé cástéén tutu ley. Chi suni cástéén rō tāca ley ni catava maá ró jeē yí sáha, te tu cácuñdeyí ñáyuu squícu i. Te máá ró, chi ni ĩn xinī ndáha ró tu cáscānda ró jéē squícu ró.

⁴⁷ 'Nacā xeēn ndoho ró jíjnáhan ró. Chi cásáha ró vehe siquī nuū yíndūji ndīyi jíi rō, téé ni canacani jñuhun Yaā Dios nde jenahán. Te suni tāca jíi rō ni cajehni de tēe ún.

⁴⁸ Te jeē casáha ró súcuan cúu jeē cáquiñáhan ró jíin de siquī jniñu ní casáha de. Chi máá de ni cajehni tēe ún, te máá ró cásáha ró vehe ndīyi ún.

⁴⁹ 'Jeē yúcuan nde jenahán ní cahān Yaā Dios ĩn jñuhun ndíchí: Tají rí tāca téé nacani jñuhun ri jíin tāca téé apóstol quingoo de nuū i. Te sava de cahni i, te sava ga de coto xeēn i, áchí Yaā Dios.

⁵⁰ Te súcuan te siquī ñáyuu tiempo yáha na cóndee cuéchi jeē ní cajehni jíi i tēe ni canacani jñuhun Yaā Dios, nde quivī ni jécōo ñayīví te nde vijna,

⁵¹ nde Abel xīhna gā te nde Zacarías, téé ni cajehni de ini templo sava mēhñu cuarto īi jíin altar. Núu súcuan te cahān rī jíin ró jeē siquī ñáyuu tiempo yáha condee tāca cuéchi ún.

⁵² 'Nacā xeēn ndoho róhó jéē cástéén tutu ley, chi cájesi rō ichi jeē jécūhun ni ñayuu jñuhun ya. Chi ni máá ró tu cácuñi rō jecūhun ni rō, ni tu cájēhe ró jñuhun jeē jecūhun ni ñayuu cácuñi. Achí yá.

⁵³ Te jeē ni cahān yā jñuhun yáha, te tēe cástéén tutu ley Yaā Dios jíin téé fariseo, yōhyo ni caquīti ni de nuū yā. Te ni caquejéé de cástíchí de ya siquī cuehē gā jñuhun.

⁵⁴ Chi yuhu-ni cánducú de núu sanaa te stívi yá jñuhun cahān yā, návāha nihīn de cuéchi siquī yā.

Siquī jñuhun stáhú cácahān tēe fariseo

12

¹ Te níní súcuan cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xīhna gā ni quejéé yá

cahán yā jín tée cáscuáha jín yá:

Coto má candíje ró levadura tē grupo fariseo, chi suu cúu jñūhun stáhú cácahān de. Chi jíté núu nuū ñáyuu, nájñūhun ndécava levadura nuū ñújen pan.

² Chi jñūhun stáhú un má quéndōo sáhi cuiti, chi ndihi natūu ndijin, te cuni ñayuu.

³ Núu súcuan te suni máá ró, tāca jñūhun ni cacahān rō jeē tu ní jíní ñayuu, ñn quivī te cuni vāha i. Te tāca jñūhun ni cacahān sáhi ró jeē ndihyú yehyí, ñn quivī te cahān jee ñayuu yatā tācá vehe.

Jeē ní cachi yā ndé ñn cúu jeē yūhu yó

(Mt. 10.28-31)

⁴ Cáhán rī jín ró jijnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i rōhó, te tuá na vé cúu sáha ga i.

⁵ Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó ñfierno. Suu máá yá cúu jeē yūhu ró jeē ma stívī ró nuū yā.

⁶ Te tācá saa chi tú yahu ndéé tī, chi nde uhūn tī jeē uú centavo lulí. Te ni ñn ti tu náa ni Yaā Dios jeē tu ndíto ya.

⁷ Te nagā ni cuu rōhó jijnáhan ró, chi nde ndihi ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

Ñayuu jejnūhún Jesucristo nuū inga ñayuu

(Mt. 10.32-33; 12.32; 10.19-20)

⁸ Te cáhán rī jín ró, tāca ñáyuu jeē cuajñūhún rúhū nuū inga ñayuu, suni súcuan ruhū, Yaā ní nduu tē, cuajñūhún rí i nuū tācá ndajéhé Yaā Dios.

⁹ Te tāca ñáyuu jeē ma cuajñūhún rúhū nuū inga ñayuu, suni súcuan ma cuajñūhún rí i nuū tācá ndajéhé Yaā Dios.

¹⁰ Te núu ndé ñáyuu cahān i siquī ruhū, Yaā ní nduu tē, cone cáhnu ni Yaā Dios nuū i. Te núu ndé ñáyuu cahān ndevāha i siquī Espíritu Santo, ma cone cáhnu ni Yaā Dios nuū i.

¹¹ Te núu cuandeca i rōhó tāca vehe ñi sinagoga nuū tēe cásañdaā cuēchi, jín núu tēe cácuu tohō, te ma nácani ndasí ni rō ndese stíó cuñí rō jñūhun nuū de.

¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajñūhún cúcá

¹³ Yūcuán na te ñn tēe íne nuū ñáyuu cuehē un ní cahān de jín Jesús:

Maestro, cahān ni jín ñani na jéē na táhú sáva de tahū na jín de, áchí de.

¹⁴ Te ni cahān yā jín de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnáhan ró jéē ma ndíyo ni rō xūhun jín táca gá. Chi vēsú cuehē

ndasí ndajníñu névāha ñin tēe, te nasūu jēe yúcuān sáha jeē quéndōo ndetū de, achí yá.

16 Yūcuán na te ni cahān yā ñin jñūhun yátá jíin i:

Ni ñyo ñin tēe cúcá jeē névāha ñūhun jeē cúu vāha ndasí itu.

17 Te tēe cúcá un ní nacani ni de: ¿Ndese sáha ri? Chi tuá ndé cuhun ñiñi ri. Achí de.

18 Te ni jeni ni de: Suhva na sáha ri. Na cánu rī tāca yácā rī, te nasáha ri jeē náhnu ga. Te yūcuán chuvāha ndiñi ri ñiñi ri jíin tāca ndajníñu ri.

19 Yūcuán na te cahān rī jíin ánuá rī: Vijna te cuehē teyí névāha yó jēe canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de.

20 Te ni cahān Yaā Dios jíin de: Tēe cánéé cúu ró. Chi jecuáa vijna cuu ró, te tāca jēe ní chuvāha ró, ¿ndé tēe cuu? Achí Yaā Dios jíin de.

21 Te súcuān ndoño tāca tēe jeē sacúcá de máá de, te tu ndúcú de jeē quendōo ndetū de sáha Yaā Dios. Achí yá.

*Yaā Dios ndíto ya yohó
(Mt. 6.25-34)*

22 Te ni cahān yā jíin tēe cáscuáha jíin yá:

Núu súcuān te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró.

23 Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jēe cúhun ró.

24 Condēhe ró ndese cátecu quiti cácuu nájnūhun calú, chi tu cátaji ti, ni tu cánastútú tí jeē

chúvāha ti, ni tú yacā tí. Te vēsú súcuān te máá Yaā Dios scáji yā tí. Te cánuú ndasí gá rō jijnáhan ró vēsú tācá quiti ún.

25 ¿Te ndé ñin ró, á cuu scuéhnu ró máá ró sava metro gā, vēsú na nácani ndasí ni rō?

26 Te núu ma cúu sáha ró vēsú ñin jniñu lúli súcuān, ¿te najehē cánacani ndasí ni rō siquī jeē caji rō jíin jēe cuhun ró?

27 'Condēhe jijnáhan ró ndese jēe ita tāca yúcū. Chi tu sájniñu, ni tu táu. Te cáhán rī jíin ró jeē ni rey Salomón, quiví ní ñūhun de sahma váha ndasí, tu ní ñūhun de sahma lúu súcuān nájnūhun ita ún.

28 Te núu súcuān jéhe Yaā Dios sahma lúu ita un jēe jēe vijna te sajnē cayū nuū ñūhún, te nagā ni cuu róhó jijnáhan ró jēe ma sáha ya jeē nihín rō sahma. ¿Te naun tu cácandíje ñihin ró jēe ndíto ya rohó?

29 Núu súcuān te ma nácani cuíhyá ni rō ndese caji rō ndese coho ró.

30 Chi tāca ñáyuu ñayiví jēe tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jíiní yā jeē cájini ñūhún ró tāca jēe yáha.

31 Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jēe yáha.

*Ndese coo cúcá yó nde andiví
(Mt. 6.19-21)*

32 'Ma yūhu ró jijnáhan ró chi cácuu ró nájñūhun lanchi ri. Chi vēsú jecu-ni cácuu ró, te máá Tátá rō cūsī ni yā jeē quívicoo ró ñuu nuū ndácu ya jniñu.

33 Xīco ró jeē cánevāha ró, te cuāha ró xūhun un núū ñáyuu ndahú. Te súcuan caya rō tahū rō nde andiví núū ma cútúhú, nájñūhun jeē chívāha ró xūhun ini yijni. Chi nde andiví te ma náā jeē váha conevāha ró. Chi yūcuan má quívi ñacuīhná, ni ma cúu stíví tiquíxin.

34 Chi nde nuū nihín rō tahū váha ró, yūcuan cúu nuū cóndihvī ni rō siquī.

Jeē na cóo tūhva yó jéē ndéē yā

35 'Coo tūhva ró jijnáhan ró jeē ndéē Jitoho rō, te coo ró nájñūhun mozo jeē nastīn i lámpara i.

36 Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahān de, te nune-ni i yéhyí jijnáhan i.

37 Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jīn ró jeē má patrón sātūhva de máá de, te scúcōo de i mesa te cani de cohō i.

38 Te vēsú cucuéé de ndee de nde sava ñuú, chí jéē néē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan.

39 Te na jécūhun ni rō jeē cahán jñūhun yátá yáha: Tēe chíí vehe, núu ni jini de na

hora quiji ñacuīhná, te condito de, te ma cuáha de jñūhun jeē sacuíhná vehe de núú.

40 Te suni súcuan coo tūhva ró jijnáhan ró, chí núu tuú, te máá hora jeē tú na vé cájeni ni rō, te ndee ruhū, Yāā ní nduu tēe. Achí yá jīn de.

Jñūhun mozo vāhajīn mozo tu squícu

(Mt. 24.45-51)

41 Yūcuán na te Pedro ni ca-jñūhún de ya:

¿A jīn máá-ni ná jijnáhan ná cáhán ni jñūhun yátá yáha, chí suni cáhán ni jīn ndihī ga ñayuu? achí de.

42 Te ni cahān máá Jítoho yō:

Cáhán rī jīn ndé-ni ñayuu cúu nájñūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora.

43 Te yōhyo ndetū mozo un jeē núu ni ndee patrón, te cuni de jeē súcuan squícu vāha i.

44 Jendaá cahán rī jīn ró jeē cani de mozo un jéē cóto i ndihī ndajníñu de.

45 Te núu jéni ni i jeē ma ndíji yachī patrón i, te quejéé i cani i tēe jīn ñahan cácuu jnáhan mozo i, te caji i cohō i te najīni i,

46 núu súcuan te ndee-ni patrón quívi jeē tu ndétu i jīn hora jeē tú na vé jéni ni i. Te stóho xeēn de i, te squívi de i ndoho i jīn ñáyuu tu cásquícu.

47 'Te mozo jeē jiní i ndese núnjahan ni patrón i, te núu tu sātūhva i ni tu squícu i jeē cuní de, ndoho xeēn i jīn yujnu xíi.

48 Te mozo jeē tu jín i ndese núnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

Jeē siquí Jesús te cusín ini ñayuu

(Mt. 10.34-36)

49 'Ni quee rī jeē nájñuhun jeē scuiquín rī ñuhūn ini ñayiví, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quivicoo ñayuu ndaha Yaā Dios.

50 Te iyó ñin jñūdóho cánuú ndoho rī, te cúcuíhyá ndasí ni rī chi nde jñu ndoho rī, te ndusí ni rī.

51 ¿A cájeni ni rō jeē véji rī jeē cóyūcu mání ñayuu ñayiví? Cáhán rī jín ró jeē tuú, chi sa suhva jeē cusín ini ñayuu jeē siquí ruhū.

52 Chi nde vijna te quejéé jéé uhūn ñayuu ñin vehe, sásín máá jínáhan, uní siquí uú, te uú siquí uní.

53 Chi tátá cusín ini jín séhe yí, te séhe yí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

Jeē ni cáhān yā siquí seña andiví

(Mt. 16.1-4; Mr. 8.11-13)

54 Te suni ni cahān yā jín ñayuu cuehē ún:

Núu cájito ró jeē náne vicó ichi núu cáne niāndii, te

cácahān rō jeē cuun saū, te súcuan cúu.

55 Te núu quéé tachī vēji ichi sur te cácahān rō jeē nandii, te súcuan cúu.

56 Tēe stáhú-ni cácuu ró. Chi cájecūhun ni rō ndese steén seña andiví jín ini ñayiví, ¿te naun tu cájecūhun ni rō ndé ñin cúu ruhū jeē sáha rī táca jniñu jéhnú tiempo yáha?

Jeē cóndihvī ni yō jeē ma cóndee cuēchi siquí yō

(Mt. 5.25-26)

57 '¿Te najehē tu cánacani ni maá ró ndé ñin cúu jniñu ndaā sáha ró?

58 Te núu ñin ñayuu quihīn i jín ró nuū tohó jeē cacán i cuēchi siquí rō, núu súcuan te níní cuáhān rō jín i ichi te condihvī ni rō sándaā rō jín i. Chi núu tuú, te squíví i róhó núu juez, te juez siáha de róhó núu policia, te policia chune de róhó vecāa.

59 Te jendaá cahán rī jín ró jeē ma quénda cuiti rō yūcuán chi nde chunaa rō ndihí cuiti xūhun cájicān de. Te suni súcuan condihvī ni rō cahān ndahú ró jín Yaā Dios, návāha ma ndácunehen ya cuēchi siquí rō. Achí yá jín de.

Jeē cánuú nacani ni yō jeē stóoyó cuēchi yó

13

1 Te ñin quiví yúcuán ní que-coo jecu tēe, ni canacani de jñuhun nuū yā ndese ni candoho jecu tēe Galilea. Chi ná cájehni de quití jeē socó de, te ni quecoo mozo Pilato ni cajehni tēe ún.

² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gá ñayuu Galilea?

³ Cáhán rī jín rō jeē tuú. Te rōhó jijnáhan rō suni jnahnū ndetū rō núu tú nacani ni rō jeē stóo rō cuēchi rō.

⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén?

⁵ Cáhán rī jín rō jeē tuú. Te máá rō jijnáhan rō, suni jnahnū ndetū rō núu tú nacani ni rō jeē stóo rō cuēchi rō.

Jnūhun yátá núndēhe higo

⁶ Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájñūhun iñ nundēhe higo jeē iñ nuū ñúhun iñ tēe. Te ni jecondēhé de núu iñ ndehē xinī, te tú na vé iñ.

⁷ Te ni cahān de jín mozo sájniñu nuū ñúhun de: Vigna te je iyó únī cuiyā jeē quíji rī nducú rī ndehē xinī yújnu higo yáha, te tú na vé cúun xinī. Núu súcuan te cahnde rō, chí máá jéē sajneñu nuū ñúhun, áchí de.

⁸ Te ni cahān mozo un jín de: Stóo ní na cuiñi iñ na cuiyā, te na nástáyā ná jéhē te chuhun ná jéhen.

⁹ Te na cóndēhe yó núu tú cuun ndehē inga cuiyā. Te núu tuú, te tahndē, áchí mozo. Achí yá.

Jeē ní nasávāha ya iñ ñahan quivī ndétátú

¹⁰ Te iñ quivī ndétátú te stéén Jesús jñūhun ini vehe iī sinagoga.

¹¹ Te iyó iñ ñahan jeē ní cuu xahūn unī cuiyā cuhú ña. Chí iñ tachī ni sáha jeē jíca tíhí ña, te tuá cúu cuiñi caca jnuu ña.

¹² Te ni jito Jesús nuū ña, te ni cana ya ña, te ni cahān yā jín ña:

Vigna te nduvāha ní jéē cuhú ni.

¹³ Te ni soó yá ndaha ya siquī ña, te ni nucuiñi jnuu-ni ña, te ni nacuatáhú ña nuū Yaā Dios.

¹⁴ Te tēe cújéñu ini vehe iī sinagoga, ni quiti ni de nuū Jesús jeē ní nasávāha ya ñahan un quivī ndétátú. Te ni cahān de jín ñayuu:

Iñ quivī iyó jéē sájniñu yó, te tāca quivī ún quijicoo rō nduvāha rō. Te quivī ndétátú chí ma cúu, áchí de.

¹⁵ Yūcuán na te ni cahān maá Jítoho yō jín de:

Tēe stáhú-ni cácuu rō. Quivī ndétátu ¿á tu cándají rō stiquī rō burro rō jéē quíscóho rō tí ndute?

¹⁶ Te ñahan yáha jéē cúu ña iñ sēhe yucūn Abraham, chí nájñūhun ni conuhñi ña xahūn unī cuiyā ni sáha Satanás. ¿Te á tu iyó váha jeē nájñūhun nandají rí ña nuū cuehyī ndóho ña quivī ndétátú? Achí yá.

¹⁷ Te jeē ni cahān yā súcuan, te tāca tēe cájito uhū de ya, ni cacucanu de. Te ndihí ñayuu ún chí ni cacusiñi ni i jito i táca jniñu jéñu sáha ya.

Jñūhun yátá síquī ndiquin mostaza

(Mt. 13.31-32; Mr. 4.30-32)

18 Te ni cahān yā:

Na cáhán rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū.

19 Ndúcuehē i nájñūhun jénu ñn ndiquin mostaza jeē jéquin ñn tēe nuū ññūhun de, te ndúu nájñūhun ñn yujnu. Te cúu cáhnu, te tēcá saa chí cásáha ti tacā tī chíji ndaha ún. Achí yá.

Jñūhun yátá síquī levadura

(Mt. 13.33)

20 Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū:

21 Cúu nájñūhun levadura jeē ní quihñ ñn ñahan, te ni saca ña jíin únī kilo harina, te ni ndaa ndihí ñujen ni sáha. Achí yá.

Siquí jeē quívī yó yéhyí túū

(Mt. 7.13-14, 21-23)

22 Te jíca Jesús jeē cuahán yā ichi ñúū Jerusalén, te yáha ya tēcá ñuu náhnu jíin ñuu lulí, te stéén yā jñūhun.

23 Te ñn ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

24 Condihvī ni rō quívīcoo ró ndaha Yaā Dios. Chí cúu nájñūhun ñn yéhyí túū. Te cáhán rī jíin ró jeē ñn quívī te cuehē ñayuu nducú i quívīcoo i, te ma cúu ga.

25 Te quívī ún te sáha ri nájñūhun ñn tēe chíí vehe

jeē ndocuiñī de te nacasi de yéhyí. Te ichi yátá véhe cuiñī ró jíinahan ró, te scáján ró yehyí, te cahān rō: Nune ní yéhyí na quívīcoo ná. Te cahān de jíin ró: ¿Ndé nuū véjīcoo ró? Chí tu jíiní rī rohó, achi de.

26 Yūcuán na te quejéé ró cahān rō jíin de: Ní cayeji ná ni cajihí ná jíin ní, te ini calle ñuu na ní steén ni jñūhun, achi rō.

27 Te cahān maá de: Cáhán rī jíin ró jeē tu jíiní rī rohó ndé chí véjīcoo ró. Cujiyo quingoo ró, chí ñayuu casáha jniñu néé cácuu ró. Achi de.

28 Te quívīcoo ró núū ndahyú rō, te nacayihí yuhu ró jéé ndoho xeēn rō. Te coto ró núū Abraham jíin Isaac jíin Jacob jíin ndihí tēe ni canacani jñūhun Yaā Dios, cáyūcú de ñuu nuū ndácu ya jniñu. Te rohó, vēsú cácuu ró yúcūn de, te quívīcoo ró núū ndoho ró.

29 Te cuehē ñayuu, vēsú tu cácuu i yucūn de, te quijīcoo i ichi núū cáne niāndii jíin ichi núū quee niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu.

30 Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

Jeē ní cucúhyá ni yā síquī ñáyuu ñuu Jerusalén

(Mt. 23.37-39)

31 Te maá quívī un ní que-coo jecu tēe fariseo, te ni cacahān de jíin yá:

Cujiyo ní quihīn ní inga lado, chí cúní Herodes cahni de níhín, áchí de.

³² Te ni cahān yā:

Cuāngoo te castūhun ró nuū tēe mañoso un jēē ná tu jinū quivī cuu rī, chí vijna jīn sājnē quenehen ri tachī ini ñayuu, te nasávāha ri ñayuu cácuḥū. Te isá te jīnu jniñu sáha ri, achi rō.

³³ Chí cánuú jēē cáca ri quihīn rī vijna jīn sājnē jīn isá, te jinū rī Jerusalén. Chí tēe cánacani jnūhun Yaā Dios, tu cájihī de inga lado, chí máá-ni ini ñuu Jerusalén cájehni i de. Achí yá.

³⁴ Róhó ñuu Jerusalén, jéhni rō tēe cánacani jnūhun Yaā Dios, te jéhe ró yūū xinī tēe tájí Yaā Dios vējicoo nuū rō. Te cuehē jīnu ni cuni rī nastútú rí sēhe ró, nájnūhun ndují jēē nastútú tí sēhe tí chīji ndijēn tí, te tu ní cúní rō.

³⁵ Núu súcuan te vijna te stóo uun na ri rohó jīn sēhe ró. Te cáhán rī jīn ró jēē ndé vijna te ma cóto cuiti gā rō nuū rī, chí nde quiji quivī jēē cahán sēhe ró: Yōhyo vāha Yaā cúu Yaā véndiji jīn jniñu máá Jítóho yō Yaā Dios, achi i. Achí yá.

Jeē ní nasávāha ya ñn tēe cúhú cuehyī cuiñi

14

¹ Te ñn quivī ndétātu ní jehēn yā vehe ñn tēe fariseo cujéhnu, ni jecaji yā staā jīn de. Te táca gá tēe fariseo cájito yuhu de ya núu stívi yá.

² Te yūcuan íne ñn tēe cúhú de cuehyī cuiñi, índichi de nuū yá.

³ Te ni cajnūhun yá tēe cástéén tutu ley Yaā Dios jīn táca tēe fariseo:

¿A íyó ley jeē nasávāha ri ñayuu cácuḥū quivī ndétātu, chí tuú? áchí yá.

⁴ Te máá de tu ní cácahān cuiti de. Te ni jniñi ya tēe cúhú un, te ni nasávāha ya de, te ni cahān yā jeē na núhun de vehe de.

⁵ Te ni cahān yā jīn de jijnáhan de:

¿Ndé ñn róhó núu burro ró chí stíquī rō ñingava tí ini pozo, te á tu yachī natava rō tí vēsú quivī ndétātu cúu, chí naún? Achí yá.

⁶ Te tu ní cúu stío cuiñi de ni ñn jnūhun nuū yā jeē súcuan ni cahān yā.

Jnūhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jnūhun yáha jīn de:

⁸ Núu ñn tēe cana de jeē quihín rō ñn vico nándāha, te ma cucōo ró lugar nuū yíñúhún gá. Chí núu súcuan te sanaa te je ni cana de ñn tēe cújéhnu ga vēsú rohó.

⁹ Te quee tēe ni cana róhó, te cahān de jīn ró: Ndonga, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandihí na.

¹⁰ Chí sa suhva núu ni cana ñn tēe róhó, te cucōo ró ndé lugar sandihí na. Te núu quee tēe ni cana róhó, te cahān de

jíin ró: Amigo, nehen cucōo ró ñn lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajeñnu de róhó.

11 Súcuan ni cahān rī jñūhun yáha návāha cuni rō jeē tāca ñáyuu jeē sajeñnu i máá i, nuu i sáha Yaā Dios. Te ñayuu jeē snūū i máá i, ndujéñnu i sáha ya. Achí yá.

12 Te suni ni cahān yā jíin tēe ni cana ya yéji yā staā:

Núu sáha ró ñn vico cúsamá chí jēē cuxíni, te ma cána ró ñáyuu cácuu amigo rō, jíin ñani rō, jíin jnáhan ró, jíin ñáyuu cucá. Chi núu súcuan te suni máá i nacana i róhó, te súcuan nanihīn rō jeē ni jéhe ró.

13 Chi sa suhva núu sáha ró vico, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá.

14 Te súcuan te quendōo ndetū rō, chi ma cúu nacuāha i nuū rō. Te nihīn rō tahū rō quíivī nátecu ñayuu ndaā, achí yá.

Jñūhun yátá síquī vico cúxíni

15 Te ñn tēe yéji staā jíin yá, ni jini de jñūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

16 Yūcuán na te ni cahān Jesús ñn jñūhun yátá jēē steén yā jeē cána Yaā Dios ñayuu quíivicoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu.

17 Te máá quíivī cuxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je íyó túhva ndihī, achí mozo.

18 Te ndihī i ni cacahān i jeē na cóne cáhnu ni de chi ma quíngoo i. ñn tēe ni cahān de: Sáá ní jeen ri ñn ñūhun te cánuú quícondēhe rí, te na cóne cáhnu ni de chi ma jeé rī. Achí de.

19 Te inga de ni cahān: Ni jeen ri uhūn yunta stiquī, te quihīn rī coto ndee rī tī, te na cóne cáhnu ni de nuū rī chi ma jeé rī, achí de.

20 Te inga de ni cahān de: Sáá ní quíjnáhan ri, te jeē yúcuan ma cúu jeē rī, achí de.

21 Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quíitī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá, na quíjicoo i vico, achí de.

22 Te ni jehēn mozo, te ni ndee de, te ni cahān de jíin patrón de: Je ni sáha ná jēē ni cáhān ní, te cúmanī gā ñayuu te chitú vehe ní, achí de.

23 Te ni cahān tucu patrón: Quihīn tucu ró tāca calle jíin ichi, te cana fuerza rō ñayuu na quíjicoo i, návāha chitú vehe rī.

24 Chi cáhān rī jíin ró jeē ní ñn tēe ni cana ri xīhna ñúhún, ma cuáha cuítī rī jñūhun jeē cuxíni de vehe ri, achí de. Achí yá.

Jñūhun jeē cánuú nacani

vāha ni yō te condiquīn yō Cristo

25 Te cuehē ndasí ñayuu cándiquīn i Jesús cuango i jíin yá, te ni ndió cóto ya nuū i, te ni cahān yā jíin i:

26 Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin rúhū, ma cúu cuu i ñayuu scuáha jíin rí. Te núu ndíhví gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu.

27 Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquī jeē cóndiquīn i ruhū, te ma cúu cuu i ñayuu scuáha jíin rí.

28 Chi núu ndé ñin ró cúní rō sáha ró ñin vehe cáhnu, ¿á tu cánuú jéē xíhna gā cucōo ró te tava rō cuenta núu canda xūhun jéē sínu ró?

29 Chi núu tuú, te núu je ni jequin rō cimientu, te tu canda xūhun ró sínu ró, yūcuán na te tāca ñayuu sácatā i coto i róhó.

30 Te cahān i: Tēe yáha ní quejéé de sáha de vehe, te tu ní canda de sínu de, achi i.

31 Te suni súcuan núu ñin rey quihīn de cuajnáhan de jíin inga rey jeē véji síquī de, ¿á tu cánuú jéē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji síquī de jíin ócō mil soldado?

32 Chi núu tú canda de, te níní jíicá gá véji inga rey, te tají de tēe cándiso jníñu, cajnūhún de na vé cuní inga rey jeē cuáha de nuū, te jecuññi-ni.

33 Te máá ró jijnáhan ró, suni súcuan cánuú jéē xíhna gā nacani ni rō cahnde ni rō stóo ró ndíhi jeē névāha ró, chi núu tuú te ma cúu cuu ró ñayuu scuáha jíin rí.

Jnūhun yátá síquī ññ
(Mt. 5.13; Mr. 9.50)

34 Te ñayuu cácañje cácuu i nájnūhun ññ. Vāha íyó ññ, te núu ññ ún na náā jeē uhvuá, ¿te ndese nduu uhvuā tucu?

35 Tuá cuajníñu cuiti, ni jeē chūhun ñayuu nuū ítu, ni jeē ndúu jēhen, chi máá cate ññ-ni i. Tāca róhó jéē jíni sōho, na chúsóhó ró. Achí yá.

Jnūhun yátá síquī lanchi ní sana
(Mt. 18.10-14)

15

1 Te tāca tēe cástútú xūhun renta jíin táca gá tēe casáha cuēchi, ni quecoo de nuū Jesús jeē cuní sōho de jnūhun cáhán yā.

2 Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yáha jétáhú de tāca tēe casáha cuēchi te yéji de jíin, áchí de.

3 Te ni cahān yā jnūhun yátá yáha jíin de:

4 ¿Ndé ñin ró núu névāha ró ñin ciento lanchi, te núu scuíta ró ñin tí, te á tu stóo ró cúñ xico xahūn cuñ gā tí yucu, te quinanducú ró quití ní sana ún ndé nanihīn rō tí?

5 Te núu ni nanihīn rō tí, te coso súcun ró tí, te cusñ ni rō.

6 Te núu ni ndee rō vehe ró, te nastútú ró táca amigo rō jíin ñayuu yúcu yajni jíin ró, te

cahān rō jīn i: Na cúsi ni yō, chi ni nanihīn rī lanchi ri jeē ní sana. Achi rō.

⁷ Te cáhān rī jīn ró jeē suni súcuan cúu nde andiví. Chi cúsi gā ni yā jīn ĩn ñayuu iyó cuéchi núu nacani ni i jeē stóo i cuēchi i, vēsú jīn cúūn xico xahūn cuūn ñayuu iyó ndáā jeē tuá jíni ñúhún nacani ni i.

Jñūhun yátá síquē ñahan ní scuíta xūhún

⁸ Te núu ĩn ñahan névāha ña uxí peso cāa, te núu scuíta ña ĩn, ¿á tu nastūn ña lámpara te nastāa ña vehe, te nanducú yúcun ña nde nanihīn ña?

⁹ Te núu ni nanihīn ña, te nastútú ña tācá amiga ña jīn ñáyuu yúcu yajni jīn ña, te cahān ña jīn i: Na cúsi ni yō, chi ni nanihīn rī xūhun jeē ní scuíta ri. Achí ña.

¹⁰ Te cáhān rī jīn ró jeē suni súcuan cúsi ni tācá ndajéhe Yaā Dios síquē ĩn ñayuu iyó cuéchi núu nacani ni i jeē stóo i cuēchi i. Achí yá.

Jñūhun yátá síquē sūchi ní jéhēn jecó

¹¹ Te ni cahān gā yā:

ĩn tēe ni Iyo uū sēhe yí de.

¹² Te tēe suchí gá ni cahān i jīn tátá i: Tátā, tahu sáva ní ndajníñu ní, te cuāha ní sava cuu tahū ná, áchí i. Te ni tahu sáva de tahū ndindúú i.

¹³ Te ni cuu jecu-ni quiví, te tēe suchí gá un ní stutú ndihi i ndajníñu i. Te ni quenda i cuahān i ĩn ñuu jicá. Te yūcuan ní snāā i tahū i, chi ni jexīn cāhá i.

¹⁴ Te ná ni ndihi ni jexīn i, te ni quee ĩn jnamā xeén ini ñuu

ún, te ni quejéé cúmanī jeē cáji i.

¹⁵ Yūcuán na te cuanducú jníñu i nuū ĩn tēe ñuu ún. Te ni tají de i cuahān i rancho de jeē cóto i quini de.

¹⁶ Te cúní i caji i vēsú soō ndúchi jeē cáyeji quini ún, návāha ndutú chíji i. Te ni ĩn ñayuu tú na vé jéhe nuū i.

¹⁷ Yūcuán na te ni quejéé i nācani ni i: Tāca mozo casájniñu vehe tátá rī, iyó cuéhē staā cáyeji i. Te ruhū chi jí rī sōco yāhá.

¹⁸ Na quínuhun rī nuū tatá rī, te cahān rī jīn de: Tátā, ni sáha ná cuéchi nuū Yaā Dios jīn núu maá ní.

¹⁹ Vijna te nasūu gá tēe vāha cúu ná jéé cónaní ná sēhe ní. Te cuāha ní jñūhun cuu ná nájnūhun ĩn mozo ni, achi rī.

²⁰ Yūcuán na te ni naquihin i ichi cuanuhun i vehe tátá i.

Te ní ní jicá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i.

²¹ Yūcuán na te ni cahān i jīn de: Tátā, ni sáha ná cuéchi nuū Yaā Dios jīn núu maá ní. Vijna te nasūu gá tēe vāha cúu ná jéé cónaní ná sēhe ní. Achí i.

²² Te máá tátá i chi sa ni cahān de jīn táca mozo de: Cuáquihin sahma váha ga te chuhun ró i. Te chuhun ró ĩn xehyu ndaha i, te chihi ró ndíjēn jehē i.

²³ Te quiquihin ró becerro xéhen, te cahni rō tī na cáji yō, chi sáha yó vico.

²⁴ Chi sēhe yí rí yáha, nájnūhun je ni jihī i, te ni

natecu i. Chi tu ní jíní rī ndé chi ní jéhēn i, te ni ndee i, áchí de. Te ni caquejéé de cásáha de vico.

²⁵ Te sūchi jévāha, íne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cájita jéhé ñáyuu.

²⁶ Te ni cana i ñin mozo, te ni cajñuhún i na vé cúu jeē cúu.

²⁷ Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo.

²⁸ Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíní i jeē na ndívi i.

²⁹ Te ni cahān i jíní tátá i: Níní sáha ná jniñu ndácu ní, te tu cúnihni cuítí ni na núu ní. Te tu jéhe ní vēsú ñin lítú núu ná, jeē sáha ná vico caji na jíní táca amigo na.

³⁰ Te ni ndee sēhe ní yáha jeē ni jéxīn cāhá i xūhun ní jíní táca ñahan. Te ni jehni ní becerro xéhen caji i, áchí i jíní tátá i.

³¹ Yūcuán na te ni cahān de jíní i: Séhē, róhó chi níní ndéé ró jíní rí, te ndihí jeē névāha rí chi suni cuenta maá ró cúu.

³² Te vijna chí íyó váha jeē sáha yó vico te cusī ni yō. Chí ñani rō yāhá, nájnūhun ni jihī i, te ni natecu i. Chi tu ní jíní yō ndé chi ní jéhēn i, te ni ndee i, áchí de. Achí yá.

Jñūhun yátá síquī mozo jeē ni stáhú de patrón de

16

¹ Te suni ni cahān Jesús jíní téé cáscuáha jíní yá:

Ín tēe cúcá ní ñyo ñin mozo de jeē ndíso jniñu nuū tāca gá mozo. Te ni cacahān jíní patrón un jeē mozo un snáá cāhá ndajniñu de.

² Te ni cana de mozo un, te ni cahān de jíní: ¿Na jñūhun cúu yāha jeē nihín rī síquī rō? Nacuāha cuenta jniñu ndíso ró, chí ma cóndiso jniñu ga rō nuū mozo rī. Achí de.

³ Yūcuán na te jéni ni maá de: ¿Ndese sáha rí vijna? Chí patrón rī quenehen de jniñu rí. Te tú ndacuī rī jeē cáte rí ñūhun, te jeē cacán rī caridad chí cúcanu rī.

⁴ Núu súcuan te jíní rī ñin jeē sáha rí, návāha ñayuu cájeen nuū patrón rī, cuāha i vehe condee rī núu na quée quiví jeē quenehen de jniñu rí.

⁵ Te ni cana de ná ñin ná ñin tēe jeē cátaū nuū patrón de. Te ni cajñuhún de ñin: ¿Nasaa táu rō nuū patrón rī?

⁶ Te ni cahān tēe ún: Ín ciento barril aceite, achí de. Te ni cahān mozo un: Yāhá na cuáha rí lista rō, te cucōo yachī rō, te na sáha ró inga lista jeē uú xico uxí na, achí de.

⁷ Yūcuán na te ni cajñuhún de inga tēe: Te róhó, ¿nasaa táu rō? Te tēe un ní cahān de: Ín ciento cajón trigo, achí de. Te ni cahān de jíní tēe ún: Yāhá na cuáha rí lista rō, te na sáha ró inga lista jeē cuún xico na, achí de.

⁸ Yūcuán na te patrón ni cahān de: Nacā jeē ndichí ní sáha tēe cúnéé un, achí de. Te cáhán rī jíní ró jeē ñáyuu ñayiví yáha, ndichí gá casáha i jeē quendōo vāha i nuū

jnáhan i, vēsú ñayuu cá candíje nuū Yaā Dios.

9 'Núu súcuan te cáhán rī jín ró jeē ndichí gá na sáha ró vēsú jeē ní sáha mozo ndichí un. Chi ini ñayívi yáha nuū yíhi cuēchi, na sáha ró jniñu váha jín xúhun ró, cuāha ró núu ñayuu ndahú, návāha vēsú núu ní ndíhi xúhun ró ñayívi yáha, te quívicoo ró andívi núu coo vehe ró ní cáni.

10 'Tēe jeē squícu vāha jín ñn jniñu lúlí-ni, suni squícu vāha de jín jniñu cáhnu. Te tēe jeē stahú jín ñn jniñu lúlí-ni, suni stahú de jín jniñu cáhnu.

11 Núu súcuan te núu tu squícu vāha ró jín xúhun jeē iyó ñayívi yáha nuū yíhi cuēchi, te ma cuáha ya jeē váha cuu ró ní cáni andívi.

12 Te núu tu squícu vāha ró jín ndajniñu jeē ní jéhe núu ya nuū rō ñayívi yáha, te ma cuáha ya tahū cuu ró ní cáni.

13 'Ní ñn mozo ma cúu cuajniñu de nuū uū patrón. Chi quíti ní de nuū ñn te coo maní de jín inga, chí squícu vāha de nuū ñn te sájēe ní de nuū inga. Te suni súcuan ma cúu cuajniñu ró núu Yaā Dios te núu máni síquī xúhun ndíhví ní rō, achí yá.

14 Te tēe fariseo ní casácatā de nuū yā jeē ní cajini de tāca jnúhun cáhán yā, chí tēe cútóo xúhun cácuu de.

15 Te ní cahān yā jín de:

Máá ró casáha ró jēe tēe ndaā cácuu ró núu ñayuu. Te Yaā Dios chí jíní yā ndese cáa ini anuá rō. Chí jniñu cájeni ní ñayuu jeē jniñu jéhu cúu,

te nuū Yaā Dios chí jniñu néé cúu.

Siquī ley Yaā Dios jín síquī jeē ndácu ya jniñu

16 'Nde ná tu quiji Juan tēe scuándute, te ní iyo ley jeē ní jéhe Yaā Dios nuū Moisés, te suni ní castéén tāca tēe cánacani jnúhun ya. Yūcuán na te ná ní quiji Juan, te ní quejéé jítē núu jnúhun váha ndese ndácu Yaā Dios jniñu. Te tāca ñayuu nducú ndéyí i quívicoo i ndaha ya.

17 'Te yí gá cúu jeē náā ñn letra nuū tútu ley yā vēsú jeē náā andívi jín ñayívi, chí squícu ndíhi jnúhun cáhán.

Siquī jeē ma stóo jnáhan tēe jín ñahan

(Mt. 19.1-12; Mr. 10.1-12)

18 'Núu ñn tēe stóo de ñasihí de te quijnáhan de jín inga ñahan, núu súcuan te casíquí ndéē de ña. Te núu ñn tēe condeca de ñahan ní ndusín, suni casíquí ndéē de ña, achí yá.

Jnúhun tēe cúcá jín Lázaro

19 Te ní cahān gā yā:

Ní iyo ñn tēe cúcá, ní ñuhun de sahma lúu váha ndasí. Te ndíquíví ní iyo vāha ndasí jēe ní yeji de.

20 Te suni ní iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de lín ndíhyi.

21 Te máni cúní de jeē ndutú chíji de jín stāā cuēchi jeē stívi tēe cúcá un. Te quécoo ina te cányuu ti nuū ndíhyi de.

22 Te ní jihí tēe ndáhú un, te tācá ndajéhé Yaā Dios cuango ya jín anuá de nde andívi

nuū néne Abraham. Te suni ni jihī tēe cúcá un, te ni quindūji de.

²³ Te tēe cúcá un xeēn ndóho de íne de lugar nuū cáyūcu ndíyī tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de.

²⁴ Yūcuán na te ni cana cóhó de: Tātā Abraham, cundáhú ni ní sáña, te tají ní Lázaro, na quíchundaji de xinī ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de.

²⁵ Te ni cahān Abraham jíin de: Séhē, nucūhun ni rō jeē ni nihīn rō ndihī jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusī ni de yāhá, te róhó chi ndóho ró jíñā.

²⁶ Te suni íyó iin jeē cunú téyí, íne mēhñu yó jijnáhan yó. Te ñayuu cáhīn yāhá, vēsú cáconi i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham.

²⁷ Yūcuán na te ni cahān tēe cúcá: Núu súcuan te cáhán ndahú ná jíin ní, Tātā Abraham, tají ní Lázaro na quihín de vehe tátá na.

²⁸ Chi íyó úhūn gā ñani ná, te na quíacachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, achí de.

²⁹ Te ni cahān Abraham jíin de: Je cánevāha i tutu jeē ní tee Moisés jíin táca tée ni canacani jnūhun Yaā Dios. Suu yūcuán na chūhun ni i, achí Abraham.

³⁰ Te ni cahān tucu tēe cúcá: Vēsú súcuan, Tātā Abraham, te núu iin ñayuu ni jihī quihīn nuū i, yūcuán na te nacani ni i jeē stóo i cuēchi i, achí de.

³¹ Te ni cahān Abraham jíin de: Núu tu chūhun ni i jnūhun ni nacani Moisés jíin táca tée ni canacani jnūhun Yaā Dios, suni ma cándíje cuiti i núu natecu iin ndíyī quihīn nuū i, achí de.

Xeēn coo siquī ñáyuu squívi jnáhan nuū cuéchi
(Mt. 18.6-7, 21-22; Mr. 9.42)

17

¹ Te ni cahān Jesús jíin tée cáscuáha jíin yá:

Máni íyó jēe nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi.

² Vāha ga núu ni conuhnī iin yōso cáhnu sucūn i te quēe i chíji ndute mar, vēsú jeē squívi i iin sūchi lúli yāha núu cuéchi.

³ Coto ma sáha ró súcuan jíjnáhan ró.

"Te núu jnáhan ró sáha de cuéchi siquī rō, te cahān rō nuū de. Te núu nacani ni de, te cone cáhnu ni rō nuū de.

⁴ Te núu uxā jínu jeē iin quivī sáha de cuéchi siquī rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánúú cone cáhnu ni rō nuū de. Achí yá.

Jeē yóhoyo cújéhnu jnūhun cándíje

⁵ Te tēe cácuu apóstol ni cacahān de jíin Jítóho yō:

Sáha ní jéē nīhin ga candíje ná jéē sáha Yaā Dios jeē cájicān na núu yā, achí de.

⁶ Te ni cahān maá Jítoho yō jíin de:

Núu cácandíje ró vēsú ñn tihlí-ni, nájnūhun ñn ndiquin mostaza jeē tihlí-ni cáa, te cuu cahān rō jeē núyūhndu yáha na quénda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ Ndé ñn ró íyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhán rō jíin de jeē cúcōo de caji de staā.

⁸ Chi sa suhva cáhán rō: Sáha ró ndeyu cuxini ri, te cani ró cóhō rī. Te núu ni cuu ni yeji rī ni jihi ri, yūcuán na te caji maá ró coho ró, cácahān rō.

⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chi jeē cánuú sáha de cúu.

¹⁰ Te suni súcuán máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chi ni sáha ri máá-ni jeē cánuú sáha ri, achí rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñnu Jerusalén, te ni yāha ya cuahān yā mēhñú región Samaria jíin Galilea.

¹² Te ni jinū yā ñn ñnu, te uxī tēe ndóho cuehyī stehyú

ni quendacoo de vejnahan de ya, te jíca ní cajecuñī de.

¹³ Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sūtū jeē ní canduvāha ró, áchí yá.

Te níni cuángoo de te ni canduvāha-ni de.

¹⁵ Yūcuán na te ñn-ni de ni nandío coo de nuū Jesús, te cáhán jee de, nácuatáhú de nuū Yaā Dios jeē ní nduvāha de.

¹⁶ Te ni jecuñī yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de.

¹⁷ Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de?

¹⁸ ¿A máñúhún-ni tēe ñnu jíca yáha cúu jeē ní nandicó de nacuatáhú de nuū Yaā Dios?

¹⁹ Te ni cahān yā jíin tēe ún:

Ndocuñī quinhun rō. Chi ni candíje ró jéē cuu nasávāha ri rohó, te jeē yúcuán ní nduvāha ró, áchí yá.

Ndese coo quivī jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni caca-jnūhún de Jesús ndé quivī quejéé jéē ndácu Yaā Dios jniñu ini ñayiví. Te ni cahān yā jíin de:

Ma quéē ndijin jeē ndácu Yaā Dios jniñu.

21 Ni ma cúu cahān ñayuu: Yāha íne ya ndácu ya jniñu, chí: Yūcuan íne ya, achi i. Chi je ndácu Yaā Dios jniñu mehñu ró jijnáhan ró. Achí yá.

22 Yūcuán na te ni cahān yā jín tée cáscuáha jín yá:

Quee tiempo jeē yóhyo cúu ni rō coto ró jéē ndiji ruhū, Yaā ní nduu tēe, te ma cóto ró jijnáhan ró.

23 Te cahān ñayuu jín ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquīn rō i.

24 Chi nájnūhun sáha taja jeē ndíndēé ñn lado andiví te cúndijin nde inga lado, suni súcuan cuu quiví ndíji ruhū, Yaā ní nduu tēe, chi ndihi ñayuu coto.

25 Te jíní ñúhún jéē xíhna gā ndoho xeēn rī, te ñayuu iyó vijna, squéhichí i ruhū.

26 Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe.

27 Chi quiví un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndihi i.

28 Te suni súcuan ni cuu quiví ni íyo Lot. Ni cayejí i, ni cajihí i, ni cajeen i, ni caxícó i, ni catajé i itu, ni cajeni i vehe.

29 Te quiví jeē ní quenda Lot ini ñuu Sodoma cuahān de, te ni cuun ñuhūn jín azufre ichi andiví, te ni snāa ndihi ñayuu.

30 Te suni súcuan coo quiví jeē ndíji ruhū, Yaā ní nduu tēe.

31 Te quiví ún te ñayuu cáhīn yatā véhe, te ndajniñu i ñúhun ini vehe, cáhán rī jín i jeē ma ndiví i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quhin i ndajniñu i.

32 Te nucūhun ni rō ndese ni ndoho ñasihí Lot jeē ni jíhí ña.

33 Te núu ndé ñáyuu cuní i cácu i nuū jnúndóho quiji nuū i jeē síquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē síquí ruhū, te cotecu i ní cáni.

34 Te cáhán rī jín ró jeē quiví ndíji rí te quixí uū tēe ñn jito jecuāā, te ñn de naquihin rí, te inga de ndōo, chí tu ní cándíje de.

35 Te coo uū ñahan jeē ndíco cáhnu, te ñn ña naquihin rí, te inga ña ndōo.

36 Te uū tēe sájniñu de nuū ítu, te ñn de naquihin rí, te inga de ndōo. Achí yá.

37 Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájñūhun jeē cutútú téji ndé-ni cúu nuū catú quiti ní jíhí, suni súcuan coo tāca jéē ni cáhán rī ndé-ni cúu-ni nuū cáhīyo ñayuu.

Jñūhun yátá síquí juez jín ñahan viuda

18

¹ Te ni cahān yā ñn jnūhun yátá jíin de jeē cánuú jeē niní cácan tahu de, te ma ndínuu ni de jíin.

² Te ni cahān yā:

Ni iyo ñn juez ini ñn ñuu. Te ni tu ndíso iyo de nuū Yaā Dios, ni tu yúhú de nuū ní ñn ñayuu.

³ Te suni ñuu un iyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de siquī ñn ñayuu jeē jíto uhū i ña.

⁴ Te cuehē quivī tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú ri nuū ní ñn ñayuu,

⁵ te ñahan viuda yáha, yōhyo stáhān ña ruhū, te jeē yúcuán na sándaā rī siquī ñayuu jeē jíto uhū i ña. Chi núu tuú, te quejéé rī jnanīnī ni rī jeē quíji quíji ña. Achí de. Achí máá Jítoho yō.

⁶ Te ni cahān gā yā:

Súcuán cúu jeē ni cáhān juez, tēe tú ndaā.

⁷ Te Yaā Dios, nasūu súcuán cúu ya, chi sándaā yā siquī jnīñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéé cájito uhū i. ¿Te á cuéé jnama ya i?

⁸ Cáhān rī jíin ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañje níhin ini ñayiví? Achí yá.

Jnūhun yátá siquī tēe fariseo jíin tēe stútú xúhun renta

⁹ Te suni ni cahān yā jnūhun yátá yáha jíin jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñn tēe fariseo cuahān de templo jeē cacān tahu de. Te ñn tēe stútú xúhun renta suni cuacacān tahu de templo.

¹¹ Te tēe fariseo, índichi de, te súcuán ni jícan tahu de: Tátā Yaā Dios, na cútahū na núu ní, chi tu cúu ná nájnūhun cándāa sava ga tēe, tēe cuíhná, tēe néé, tēe cásiquí ndéé jnáhan cácuu de. Ni tu cúu ná nájnūhun cáa tēe yúcuán jéé stutú xúhun renta jeē scáa ga de jícan de nuū ñáyuu.

¹² Te uū jínu jeē semana iyó ndite ni na núu ní, te jéhe ná nuū ní ñn ñn siquī tāca úxī ndajníñu níhīn na, achí de.

¹³ Te tēe stútú xúhun renta, ni jecuiñī jicá de nuū templo, ni tu ní chūndeyí ni de jeē ndonehen de nuū de, chi sa suhva ni caní de yīqui jíca de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chi tēe iyó cuéchi cúu ná, achí de.

¹⁴ Te cáhān rī jíin ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajéhnū i máá i, sa ndululí i. Te ñayuu jeē sálulí i máá i, sa ndujéhnū i. Achí yá.

Jeē ni jícan tahu Jesús jehé sūchi lúli

(Mt. 19.13-15; Mr. 10.13-16)

¹⁵ Te ni quecoo ñayuu jíin sūchi lúli núu Jesús, jeē na sóo yá ndaha ya xinī i. Te tēe

cáscuáha un ní cajini de jeē súcuan cúu, te ni cacahān de nuū ñáyuu vējicoo jíin i.

16 Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíinā nuū rī, te ma cási rō jeē quíjicoo i. Chi ñáyuu jeē ndió cóo ni i cani ni i nájnūhun sūchi yáha, suu i quívi ndaha Yaā Dios jeē ndacu ya jniñu nuū i.

17 Te jendaá cahán rī jíin ró, núu ñn ñáyuu tú cuatáhú i jeē ndácu Yaā Dios jniñu nuū i, nájnūhun jétáhú ñn sūchi lúlí, ma quívi cuiti i ndaha ya, achí yá.

Jnūhun tēe cúca

(Mt. 19.16-30; Mr. 10.17-31)

18 Te ñn tēe cújéhnú ni canjūhún de ya:

Tēe vāha cúu ní Maestro. ¿Te na jniñu váha sáha ná te nihín tahú na cotecu na ní cáni andívi? Achí de.

19 Te ni cahān Jesús jíin de:

¿Naun cáhán rō jeē tēe vāha cúu rī? Tú ni ñn tēe vāha íyó, chí máá ñn-ni Yaā Dios.

20 Je jíiní rō táca jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnūhún ró. Cuatáhú ró nuū tatá rō nuū naná rō. Achí yá.

21 Te ni cahān maá de:

Táca jniñu yáha je ni squícu ná ndé ná lulí ná, achí de.

22 Te Jesús ni jini ya jnūhun yáha, te ni cahān yā jíin de:

Ñn na jniñu cúmaní sáha ró núu súcuan. Xíco ndihi jeē névāha ró, te cuāha ró núu ñáyuu ndahú. Te nde andívi cuāha ya jeē váha ndasí núu

rō. Yūcuán na te quiji ró condiquín rō ruhū, achí yá.

23 Te ná ni jini sōho de jnūhun yáha, te yōhyo ni cucuíhyá ni de, chí cúca ndasí de.

24 Te jíto Jesús jeē súcuan cúcuíhyá ni de, te ni cahān yā:

Tēe cúca chí yōhyo yí quívicoo de ndaha Yaā Dios jeē ndacu ya jniñu nuū de.

25 Yachí gā yāha ñn camello yaū yutícuí vésú jeē quívi ñn ñáyuu cúca ndaha Yaā Dios jeē ndacu ya jniñu nuū i, achí yá.

26 Te tēe ní cajini jnūhun yáha, ní cacahān de:

¿Ndé ñáyuu cúu jeē cácu núu súcuan? Achí de.

27 Te ni cahān yā jíin de:

Ñáyuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

28 Yūcuán na te ni cahān Pedro:

Sāña jíjnáhan ná ní castóo ná ndihi jeē cánevāha ná, te cándiquín na nihín, achí de.

29 Te máá yá ni cahān yā jíin de:

Jendaá cahán rī jíin ró jijnáhan ró, núu na-ni ñáyuu stóo i vehe, chí tátá, chí ñani, chí ñasihí, chí séhe, jeē síquí jeē scáca i jnūhun jeē ndácu Yaā Dios jniñu nuū ñáyuu,

30 núu súcuan te nanihín cuehē gā i ini ñayívi yáha, te tiempo quiji te cotecu i ní cáni, achí yá.

Jeē ni cáhān tucu ya jeē cúu yā

(Mt. 20.17-19; Mr. 10.32-34)

31 Te ni cana s̄in ya ndihúxi uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndihí jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán.

32 Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácata de nuū rī, te cahān neé de nuū rī, te tesihí de nuū rī.

33 Te caní de ruhū, te sáá te cahni de ruhū. Te nuū uní quiví te natecu rī. Achí yá.

34 Te máá de tu ní cájecūhun cuiti ni de tāca jnūhun yáha. Chi jnūhun yí cúu, te tu ní cúu jecūhun ni de jeē cahán yā.

Jeē ní nasávāha ya ñn tēe cuáá ñuu Jericó

(Mt. 20.29-34; Mr. 10.46-52)

35 Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícan de caridad.

36 Te ni jini sōho de jeē yáha cuehē ñayuu cuangoo i, te ni cajnūhún de naun cuángoo i.

37 Te ni cacahān i jíin de jeē Jesús, tēe ñuu Nazaret, yáha ya cuahān yā.

38 Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

39 Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

40 Yūcuán na te ni jecuiñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnūhun yá de:

41 ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

42 Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

43 Te ni ndundijin-ni tinūu de, te ni ndiquín de ya, te nácuatáhú de nuū Yaā Dios. Te ndihí ñayuu jeē ní cajito i, suni ni cacahān i jeē yóhoyo vāha Yaā cúu Yaā Dios.

Jnūhun Zaqueo

19

1 Te ni quiví Jesús ini ñuu Jericó, te ni yāha-ni ya cuahān yā.

2 Te yūcuan íyó ñn tēe cúca nání de Zaqueo, te cújéhu de nuū tēe cástútú xūhun renta.

3 Te cuní de coto de návāha cuni de ndé ñn cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de.

4 Te jínu de ni cosnūú de. Te ni caa de xiní ñn nuyūhdú návāha coto de nuū yā, chi yūcuan yáha ya quihīn yā.

5 Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chi jini ñuhún jéē ndóo ri vehe ró vijna, áchí yá.

⁶ Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de.

⁷ Te ni cajito ñayuu jeē súcuan ni cuu, te ni cacahān i síquī yá jeē cuahán yá ndóo ya vehe ñn tēe sáha cuēchi.

⁸ Yūcuán na te ni ndocuiñī Zaqueo, te ni cahān de jíin máá Jítoho yō:

Vijna te sava ndihi ndajniñu ná chi cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná únī gā síquī naquihín i, áchí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chi ni candíje de nájnūhun ni candíje jí de Abraham.

¹⁰ Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

Jnūhun yátá síquī uxī mozo jíin xúhun

¹¹ Te nuū ñáyuu ní cajini tāca jnúhun yáha, ní cahān gā Jesús ñn jnūhun yátá jéē steén yá ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñuhún quejéé jéē ndácu ya jniñu sáha Yaā Dios.

¹² Te ni cahān yā:

Ñn tēe cújéhu cuahān jicá de inga nación, návāha nihín jniñu de cuu de rey, te ndiji de ndacu de jniñu.

¹³ Te nde ná tu quihín de, te ni cana de uxī mozo de, te nuū ñn ñn i ni jēhe de ñn xūhun jéē ndeé yahu ndasí. Te ni cahān de jíin i: Sájniñu ró jéē na ndúcuehē xūhun yáha jíinahan ró níni jéē quihín rī te ndee rī, áchí de.

¹⁴ Te ñayuu nación de cáquitiñi ni i nuū de, te ni catají i jecu tēe cándiso jniñu cuango yatā de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, áchí.

¹⁵ Te vēsú súcuan te ni nihín jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ni jēhe de xūhun núu, návāha na cúni de nasaa ni canihín ñn ñn i síquī.

¹⁶ Te ni quee ñn mozo un núu de, te ni cahān i: ñn xūhun jéē ni jēhe ní núu ná, ni nduu uxī, áchí i.

¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíin ñn jniñu lúlí-ni, te vijna te sáha rī jeē cújéhu ró ndacu ró jniñu nuū uxí ñuu jnā rī, áchí de.

¹⁸ Te ni quee inga mozo, te ni cahān i: ñn xūhun jéē ni jēhe ní núu ná, ni nduu uhūn, áchí i.

¹⁹ Te suni ni cahān de jíin mozo un: Róhó, cújéhu ró ndacu ró jniñu nuū uhún ñuu jnā rī, áchí de.

²⁰ Te ni quee inga mozo, ni cahān i: Yāha návāha ná xūhun ní, chi ni chuvāha ná ñni ñn pañuelo.

²¹ Chi ni yūhu ná nihín, chi tēe xeēn cúu ní. Chi cuehē gā

nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, áchí de.

²² Yūcuán na te ni cahān rey: Mozo neé cúu ró núu súcuan, te jíin jnúhun ni cahān rō te sándaā rī jeē iyó cuéchi ró jēē tu ní sájniñu ró jíin xúhun rí. Chi jéni ni rō jeē téē xeēn cúu ri, te cuehē gā nándacān rī vēsú jeē ni jéhe ri, te cuehē gā cuní rī vēsú jeē cúu sáha mozo rī.

²³ Núu súcuan ζte naun tu ní chúne ró xúhun rí vēsú nuū banco? Te jeē ní ndee rī te naquihin ri xúhun rí nde jíin séhe xúhun núu. Achí de.

²⁴ Te ni cahān de jíin ñayuu cáhiin yūcuán: Quende xúhun jíinā nuū i, te cuāha ró núu mozo jeē névāha uxī, achí de.

²⁵ Te ñayuu un ní cacahān i jíin de: Te ndese, chi je névāha de uxī, achí i.

²⁶ Te ni cahān tucu rey: Cáhán rī jíin ró jeē ñayuu je névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i.

²⁷ Te téē jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihí ni cahān yā jnúhun yáha, te ni jica ga yā cuahān yā ñuu Jerusalén.

²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū téē cáscuáha jíin yá jeē quíngoo de.

³⁰ Te áchí yá jíin de:

Cuáhán ñuu lulí íne ichi núu. Te núu ni quívi ró, te nihīn rō ñin burro núhni tī, jeē ní ñin téē ná tu coso de ti. Te ndají ró tī quiji ró jíin tí.

³¹ Te núu ndé ñin cajnúhún naun cándají ró tī, te cahān rō jíin: Máá Jítóho yō jíni ñúhún yá tī, achi rō. Achí yá.

³² Te cuangoo téē ni tají yá, te ni canihīn de ti nájnúhun ni cahān yā jíin de.

³³ Te jeē cándají de ti, te ni cacahān jítóho tī jíin de:

¿Naun cándají ró burro ri? achí.

³⁴ Te ni cacahān de:

Máá Jítóho yō jíni ñúhún yá tī.

³⁵ Te ni ndecoo de jíin tí nuū Jesús. Te ni casoó de sahma de siquī tī, te ni casáha de jeē ní jecosō yā siquī tī.

³⁶ Te ná-ni cuahān yā, sáá cáscáá ñayuu sahma i ini ichi.

³⁷ Te nuū ní cuyajni ya nuū cúun ichi yucu Olivos, te ndihí ñayuu cácdíje jeē cándiquīn i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios siquī tācá jniñu jéhnú ni sáha ya ni cajito i.

³⁸ Te áchí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhnú Yaā Dios, achí i jíināhan i.

39 Yūcuán na te jecu tēe fariseo cáhīn mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquīn nihín jēe na cási i yuhu i, áchí de.

40 Te ni cahān Jesús:

Cáhán rī jíin ró jeē núu ñáyuu yáha na cási i yuhu i, te táca yūu chi cana jee, áchí yá.

41 Te nuū ní cuyajni ya Jerusalén, te ni jito ya ñuu ún, te ni ndahyū yā siquī.

42 Te ni cahān yā:

Róhó ñáyuu Jerusalén, yōhyo ni cuu ni rī jeē na jécūhun ni rō jeē cuu ndu-manī rō jíin Yaā Dios sáha ri. Te siquī jeē tu cácandíje ró, te vijna chi ma cúu ga jecūhun ni rō.

43 Chi quee quivī jeē coo jnūndóho, te ñáyuu cájito uhū rohó, cuicó ndūu i ñuu rō, te casi cutú i jíin yūu, te táca lado ndonda i siquī rō.

44 Te ndihī vehe scótúú i, te cahni i róhó jíinahan ró. Te ma stóo i ni ñn vehe jeē cóso jnahan ga yūu. Chi ní quiji ri nde nuū Yaā Dios jeē jnáma ri rohó, te tu ní cácandíje ró. Achí yá.

Jeē ní quenehen ya ñáyuu ini templo

(Mt. 21.12-17; Mr. 11.15-19; Jn. 2.13-22)

45 Te ni quivī ya ini templo cáhnu, te ni quejéé yá quēnehen ya táca ñáyuu cájeen quiti te cánaxīco núu ñáyuu jeē socō i.

46 Te ni cahān yā jíin i:

Yósó núu tútu iī jeē cahán Yaā Dios: Vehe ri chi vehe

nuū cájicān tahú cúu, áchí Yaā Dios. Te máá ró jíinahan ró, chi nájnūhun yaū cava ñacuīhna ní canasáha ró, áchí yá.

47 Te ndiquivī ni steén yā jnūhun ini templo. Te sutū cácujeñnu jíin tēe cástéén tutu ley Yaā Dios jíin tēe cácujeñnu nuū ñáyuu ñuu ún, cánducú de modo ndese cahni de ya.

48 Te tu cánihīn de modo sáha de, chi ndivii ñáyuu yōhyo cájetáhú i cájini nahín i jnūhun cáhán yā.

Siquī jeē ndiso jniñu Jesús
(Mt. 21.23-27; Mr. 11.27-33)

20

1 Te ñn quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñáyuu. Te ni quecoo sutū cácujeñnu jíin tēe cástéén tutu ley Yaā Dios jíin táca tēe jéñnu cándacu jniñu.

2 Te ni cacahān de:

Castūhún, ¿ndé ní nihīn jniñu ró jéé sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? Achí de.

3 Te ni cahān Jesús jíin de:

Suni ruhū cajnūhun rī rohó ñn jnūhun jíinahan ró. Castūhun núu rī:

4 ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca tēe? Achí yá.

5 Yūcuán na te ni canda-jnūhun máá de:

¿Ndesese cahān yō? Núu cahān yō jeē Yaā Dios ni tee ya jniñu un siquī Juan, te cahān de jíin yó: ¿Najehē tu ní cácandíje ró de núu súcuan?

⁶ Te núu cahān yō jeē ñayuu ni catee jniñu un síquī de, te ndivii ñayuu cahni i yóhó jíin yúu, chi cácañdije i jeē tée ni nacani jnūhun Yaā Dios ni cuu ndije Juan, achí de cácahān maá de.

⁷ Te ni cacahān de jeē tu cájini de ndé ñn ni tee jniñu síquī Juan jeē ni scuándute de.

⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

Jnūhun yátá síquī tēe néé cáśájniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jnūhun yátá yáha jíin ñayuu ún:

Ñn tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu.

¹⁰ Te maá tiempo ndutútú uva, te ni tají de ñn mozo cuahān nuū tée cáśájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i sūcuan-ni.

¹¹ Te tēe chíí uva ni tají tucu de inga mozo cuahān. Te tēe cáśájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i sūcuan-ni.

¹² Te tēe chíí uva ni tají tucu de inga mozo cuahān. Te tēe cáśájniñu ún, suni ni castújé de mozo un, te ni cascúnu de i.

¹³ Yūcuán na te ni cahān tēe chíí uva: ¿Ndeśe sáha rí? Na

tájí rí sēhe ri jeē maní rī jíin, chi sanaa te núu ni cajito de i te coo yíñuhún de nuū i. Achí de.

¹⁴ Te tēe cáśájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu maá yó, achí.

¹⁵ Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu sūcuan ¿te ndese sáha tēe chíí uva jíin tée cáśájniñu ún?

¹⁶ Ndiñi de te cahni de tēe un jíjnáhan, te cuāha de ñūhun cáá uva un núu inga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aí, núu ma cóo cuiñi sūcuan víi, achí i.

¹⁷ Te ndéhé yá nuū i jíjnáhan i, te ni cahān yá:

Núu sūcuan ¿te á cájecūhun ni rō jnūhun yáha jéé yosó núu tútu ñi jeē cúu ri nájnūhun ñn yuū? Chi achí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Achí.

¹⁸ Te ñayuu tu cácañdije, ndoho i nájnūhun ndóho ñayuu jeē cotúú síquī yuū te jnánhú i. Te quiví sándaā Yaā Dios cuēchi, te ñayuu tu cácañdije, ndoho i nájnūhun ndóho ñayuu jeē nínga yuū síquī i te cundihí i sáha. Achí yá.

Siquī xúhun renta

(Mt. 21.45-46; 22.15-22;
Mr. 12.12-17)

¹⁹ Yūcuán na te sutū cácujeñhu jíin tée cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquī maá de cúu jñūhun yátá ní cahān yā siquī tée cásájniñu nuū uva jíin tée cájeni vehe. Te tu ní cúu, chi cáyūhú de jeē quitī ni ñayuu.

²⁰ Yūcuán na te ni catají de jecu tēe cuacoto yuhu de ya, te tēe un cásáha-ni de jeē tée ndaā cácuu de. Te cánducú de sáha de jeē cahán yā iin jñūhun jeē nihín de cuēchi siquī yā, te quindeca de ya nuū tēe cúu gobernador.

²¹ Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu iin iin ñayuu, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios.

²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñi nación yō, chí tuú? áchí de.

²³ Te ni jini yā jeē cáculi de stáhú de ya, te ni cahān yā jíin de:

¿Najehē cájito ndee rō ruhū?

²⁴ Stéén iin xūhún na cóto ri. ¿Ndé iin nuū cúu jeē ndeé nuū xúhun yáha, te ndé sñhví cúu jeē ndeé yāhá? áchí yá.

Te ni cacahān de jíin yá:

Nuū jíin sñhví rey un cúu, áchí de.

²⁵ Yūcuán na te ni cahān yā jíin de:

Núu súcuan te nacuaāha ró núu rey un jēe yñi cuenta

nuū de, te nacuaāha ró núu Yaā Dios táca jēe yñi cuenta nuū maá yá, achí yá.

²⁶ Te táca tēe ún tu ní cúu nihín de cuēchi siquī yā jíin ni iin jñūhun cáhán yā, cájito jíinú ñayuu. Chi sa ni canaa ni de jeē ndichí ní stió cuñí yā jñūhun nuū de, te tuá na vé ni cácahān de.

Jeē ní cacajñūhún de siquī jeē nátecu ndīyi

(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndīyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñí i nuū ndīyi ñani de, áchí tutu.

²⁹ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo.

³⁰ Te tēe uū ni naquihin de ña, te suni ni jihí de, te tú na sēhe de ní íyo.

³¹ Te tēe unī ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni iin de tú sēhe de ní íyo.

³² Te jeē sándihí te suni ni jihí ñahan ún.

³³ Núu súcuan te núu na nátecu de jíináhan de quiví nátecu ndīyi, ¿te ndé iin de cuu ña ñasihí de? Chi ndihúxá de ni condeca de ña. Achí de jíináhan de.

³⁴ Yūcuán na te ni cahān yā jín de:

Ñayīvi yáha chi cáquijnáhan tēe jín ñahan.

³⁵ Te ñayuu vāha jeē natecu i quīvicoo i andiví, ma quijnáhan ga i yūcuán, chi tuá na jnūhun quijnáhan tēe jín ñahan coo.

³⁶ Ni ma cúu cuiti gā i, chi coo i nájnūhun ndajéhé Yāa Dios. Te sēhe Yāa Dios cuu i, chi je ni canatecu i.

³⁷ Te suni máá Moisés cáhān de jeē nátecu ndīyi, chi ni tee de nuū tútu ndese ni cahān yā jín de mēhñu yúcū jeē cayú yáñuhūn. Chi ni cahān de jeē cúu ya Yāa Dios Abraham jín Isaac jín Jacob.

³⁸ Te jeē ni cáhān de súcuan cúu jeē ní cachi de jeē cátecu táca ndīyi. Chi vēsú je ni cajihī i, te cátecu i nuū iyó máá yá, chi cúu ya Yāa sáha jeē técu ñayuu ní cáni. Achí yá jín de.

³⁹ Te jecu tēe cástéén tutu ley Yāa Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de cajnūhún de ya.

Siquī jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahān yā jín de jijnáhan de:

¿Ndese cúu jeē cácahān ñayuu jeē Cristo cúu sēhe yucūn David?

⁴² Chi máá David suhva ni cahān de jnūhun ya nuū tútu Salmo:

Máá Jítoho yō Yāa Dios suhva ni cahān yā jín Jítoho rī, Yāa quiji:

Cucōo ró lado váha ri nuū kujéhnú ró,

⁴³ te na sáha ri jeē quende rō poder táca jeē cájito uhū rohó.

Achí Yāa Dios. Achí David.

⁴⁴ Te núu sēhe yucūn David cúu Cristo, ¿te ndese cúu jeē ni cáhān de jeē Jítoho de cúu ya? achí yá.

Jeē ni cáhānyā jeē iyó cuéchi de jijnáhan de

(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jín tēe cáscuáha jín yá, te suni ni cajini sōho ndihi ñayuu:

⁴⁶ Coto má cándije ró táca tēe cástéén tutu ley. Chi cácusī ni de cáñuhun de sahma cáni jeē steén jeē kujéhnú de, cájica cuu de jín. Te cánujnahān ni de jeē cáhān yīñúhún ñayuu jín de nuū yáhu. Te cánujnahān ni de cucōo de nuū silla yīñúhún gá ini vehe iī sinagoga, jín silla yīñúhún gá nuū víco cáyeji ñayuu.

⁴⁷ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñayuu jeē tú na cuéchi de. Tēe yáha jijnáhan de chi xeēn gā ndoho de castigo. Achí yá.

Jeē ni sócō ñahan viuda xūhún

(Mr. 12.41-44)

21

¹ Te ná ni Iyo ya ini templo, te jito ya nuū ñayuu cucá jéé cáchuhun i cuehē xūhún ini táca yéjñū nuū cásocō i.

² Te suni ni jito ya nuū ñn ñahan viuda jeē ndóho ndáhú, te ni chuhun ña uū centavo lulí ini yejnū ún.

³ Te ni cahān yā:

Jendaá cahān rī jín ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gā ñayuu.

⁴ Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihi ña jeē cótecu ña. Achí yá jín de.

Jeē ní cachi yā jeē náā templo

(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chí ni cuvāha jín táca yúu luu jín táca jéē ní casocō ñayuu. Yūcuán na te ni cahān yā:

⁶ Ndihi jeē cájito ró yáha, quee quivī jeē ma cóso jnāhan ga ni ñn yuū, chí ndihi jnanū, achí yá.

Na seña coo nuū cuácuyajni ndihi ñayiví

(Mt. 24.3-28; Mr. 13.3-23)

⁷ Te ni cacajñuhún de ya:

Maestro, ¿ndé quivī coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cahān ní? áchí de.

⁸ Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jín síhví rí, te cahān de: Máá rí cúu Cristo. Te suni cahān de: Je ni quee quivī ndihi ñayiví, achi de. Te ma cóndiquín rō de.

⁹ Te núu nihīn rō jñuhun jeē tāca lado iyó guerra te

cándonda ñayuu siquī tohō, te ma yūhu ró, chí cánuú jéē xíhna gā coo súcuan, te ni ma jinú yachī quivī ndihi ñayiví. Achí yá.

¹⁰ Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajñahan.

¹¹ Te cháha chúcuan jñāa téyí, te coo jnamā jín cuéhýi xeēn. Te coo seña jéhnú ichi ándiví jéē yūhú ndasí ñayuu coto i.

¹² Te nde ná tu coo tācá jñiñu yáha, te coto xeēn i róhó, te jñi i róhó. Te quindecá i sava ró tāca vehe ñi sinagoga jeē cahān i cuēchi siquī rō. Te chune i sava ró vecāa. Te quindecá i sava ró núu tāca rey jín núu tācá gobernador, te cahān i cuēchi siquī rō jeē siquí jeē cácandíje ró rúhū.

¹³ Te jeē súcuan coo, te cuitē núu ga jñuhun rí, chí nacani ndaā rō nuū de jijnāhan de.

¹⁴ Núu súcuan te cundaā ni rō jeē ma nacani ni rō xíhna gā ndese stío cuiñí rō nuū de te cácu rō.

¹⁵ Chi ruhū cuāha ri jñuhun ndíchí cahān rō, návāha ñayuu jeē cájito uhū rohó, ma cúndeyí i jín ró ni ma cúu cahān i siquī rō.

¹⁶ Te nde tatá rō, naná rō, ñani rō, jnāhan ró, jín amigo rō, nastúu i róhó núu ñayuu xeēn. Te cahni i sava ró.

¹⁷ Te tāca ñayuu chí quití ni i nuū rō jeē siquí ruhū.

¹⁸ Te ni ñn ixi xíní rō jijnāhan ró ma náā, chí coto ya rohó.

¹⁹ Te núu cuiñí nihīn ró jín jñuhun rí, te cotecu rō ní cáni.

20 'Te núu ni cajito ró jéē ní cajicó ndúū soldado ñuu Jerusalén, te na jécūhun ni rō jeē jé yajni naa ñuu ún.

21 Yūcuán na te ñayuu cáyūcú región Judea, na cūnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún.

22 Chi tāca quivī un cuáha Yaā Dios castigo nuū ñayuu jeē siquí cuéchi i, návāha squícu tāca jnúhun jeē yosó núū tútu.

23 Te quivī ún nacā jeē ndahú ñahan cáñuhun sēhe jín ñahan cándeca yiquín, chi ma cúnihīn ña cunu yachī ña. Chi yōhyo xeēn coo jnúndóho ini ñayiví, te quiji castigo xeēn siquí ñayuu yáha.

24 Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nīhin i jniñu nuū ñayuu ñuu Jerusalén, nde jīnu tiempo jeē jéhe Yaā Dios jnúhun ndacu i jniñu.

Ndese coo quivī ndiji Yaā ní nduu tēe
(Mt. 24.29-35, 42-44;
Mr. 13.24-37)

25 'Yūcuán na te coo seña nuū níandii jín núū yoó jín núū quími. Te ini ñayiví te quiji jnúndóho xeēn siquí ñayuu tācá nación. Te cunéé ni i, te yūhú i jeē nīhin xeēn mar te ndóna xeēn ndute mar vēji nuū ñúhun.

26 Te cuu sōó sava ñayuu jeē cáyūhú i cándetu i tāca

jnúndóho quiji siquí ñayiví. Te tāca jéē ín andiví chi quisí i.

27 Yūcuán na te coto ñayuu nuū maá rí, Yaā ní nduu tēe, ndiji rí jín vícō, te condiso rí cuehē poder, te yōhyo luu kujéhu rí.

28 Te núu ni quejéé tāca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jín de jijnáhan de.

29 Te suni ni cahān yā jnúhun yátá yáha:

Condēhe jijnáhan ró ndese sáha nundēhe higo jín tāca gá yujnu.

30 Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní.

31 Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

32 'Jendaá cahán rī jín ró jeē ma cúū ndihí ñayuu tiempo un, chi nde squícu ndihí jniñu ún.

33 Andiví jín ñáyiví chi naa, te tāca jnúhun cáhān rī chi ma náā, chi ndihí squícu.

34 'Te coto ma stíví ró maá ró jijnáhan ró jéē sáha ró tāca cuéchi, jín jéē najīni ró, jín jéē kujnéñu ró jín tāca ndajniñu cotecu rō, návāha tú sanaa ni rō te quee quivī un siquí rō.

35 Chi nájnūhun jeē núu iin trampa, súcuan quee jnúndóho siquí ñayuu cáyūcu ní cáhnu ñayiví.

36 Núu súcuan te ndito coo ni rō, te níni cácan tahu rō,

návāha cuu cācu ró núū tāca jnūndóho jeē quíji ún, te cuu cuiñi ró núū ruhū, Yaā ní nduu tēe. Achí yá.

37 Te ndiquivī steén yā jnūhun ini templo, te ndijnahan jecuāā jéndōo ya nde yucu jeē naní Olivos.

38 Te tāca jénéhen quécoo ñayuu nuū yā ini templo jeē cúni sōho i jnūhun stéén yā.

Jeē ní casquínáhan de jnūhun jñi de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22

1 Yūcuán na te ni cuya- jni vico pascua jeē cáyeji ñayuu hebreo pan jeē tú na levadura yíhi.

2 Te sutū cácujuhnu jíin téee cástéén tutu ley, ni canducú yuhu de modo cahni de Jesús, chí cáyūhú de jeē quitī ni ñayuu.

3 Te ni quivī Satanás ini anuá Judas jeē nastúu de ya. Te suni naní de Iscariote, te cúu de ñn jnáhan jeē ndihúxí uū tēe apóstol.

4 Te ni jehēn de ni candajnūhún de jíin táca sūtū cácujuhnu jíin téee cándiso jñiñu ini templo, núu ndese nastúu de ya nuū téee un jíjnáhan.

5 Te tēe un ní cacusiñi ni de, te ni cajejnūhun de jeē cuáha de xūhun núū Judas.

6 Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

7 Te ni quee maá quivī vico jeē cáyeji ñayuu pan jeē tú na levadura yíhi, te suni quivī un cájehni i londe nájñūhun ni ndacu Yaā Dios jniñu jeē sáha i vico pascua un.

8 Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéé cuxíni yó vico pascua, achí yá.

9 Te ni cacajnūhún de ya:

¿Ndé nuū cuní ni jéé quisátūhva ná? áchí de.

10 Te ni cahān yā jíin de:

Cuángoo ñuu yūcuán, te núu ni quivicoo ró te najnáhan ró jíin ñn tēe ndíso quiyi ndute. Te condiquīn rō de quihīn rō jíin de nde vehe nuū ndívi de.

11 Te cahān rō jíin téee chí vehe ún: Achí máá Maestro; ¿Ndé ñn cúu cuarto vehe ní cuáha núú ní núu cuxíni ya vico pascua jíin téee cáscuáha jíin yá, achi rō.

12 Yūcuán na te stéén de ñn cuarto cáhnu nde xinī véhe jeē je iyó tūhva, te yūcuán sátūhva ró jéé cuxíni yó, áchí yá.

13 Te cuangoo de, te ni canihīn de nájñūhun ni cahān yā. Te ni casátūhva de jeé cuxíni ya vico pascua.

14 Yūcuán na te ni jinū hora jeé cuxíni, te ni quee Jesús, te ni cucōo ya mesa jíin téee cácuu apóstol.

15 Te ni cahān yā jíin de:

Yōhoyo ni cuu ni rī cuxíni ri jíin ró jíjnáhan ró vico pascua yáha, vijna nde ná tu cuu rī.

16 Chí cáhán rī jíin ró jeé ma cáji cuiti gā rī vico pascua, chí nde quiji quivī ndacu Yaā

Dios jniñu ní ñayīví, te sáa te caji tucu ri, achí yá.

17 Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró.

18 Chi cáhān rī jíin ró jeē ndé vijna te ma cóho ga rī ndūxi uva, chi nde quiji quivī ndacu Yaā Dios jniñu ní ñayīví, te sáa te coho tucu ri. Achí yá.

19 Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū de jíjnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuéchi ró jíjnáhan ró. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

20 Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuéchi ró jíjnáhan ró.

21 Te vijna chi tēe nastúu ruhū, néne de jíin rí nuū mesa yáha.

22 Chi ruhū, Yaā ní nduu tēe, jendaá cúu jeē quihín rī cuu rī nájnūhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

23 Yūcuán na te ni caquejé de cácajnūhun jnáhan de ndé ñn de cúu jeē nastúu de ya.

Jeē ní cacahān de siquī ndé ñn de cújéhu ga

24 Yūcuán na te yōhyo ni cacahān de siquī ndé ñn de cújéhu ga nuū jnáhan de.

25 Te ni cahān Jesús jíin de:

Rey tācá nación chí cándacu nīhin de jniñu nuū ñayuu cájni de, te cácahān i jeē tēe cásáha vāha cúu jeē cácujeñu nuū i.

26 Te rōhó jíjnáhan ró, ma cóo ró súcuan. Chi núu ndé ñn ró cújéhu ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máá ró tēe jéjniñu nuū jnáhan.

27 ¿Te ndé ñn cúu jeē cujéhu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cujéhu ga? Te ruhū nasūu súcuan cúu ri, chi ni nasáha ri maá rí nájnūhun tēe jéjniñu nuū rō, chi vēji ri sáha ri jeē nihín tahú rō.

28 Te máá ró cácuu tēe jeē níni cáhīn jíin rí tāca quivī jeē ndóho ri jñūndóho.

29 Núu súcuan te nájnūhun ni sáha Tātá rī jeē ndácu ri jniñu, suni súcuan sáha ri jeē ndacu ró jniñu jíjnáhan ró.

30 Te caji rō coho ró jíin rí ini ñuu nuū ndacu ri jniñu. Te cucōo ró ñn ñn mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jíni de ya (Mt. 26.31-35; Mr. 14.27-31; Jn. 13.36-38)

31 Te suni ni cahān maá Jítho yō jíin Simón Pedro:

Simón, cuni sōho ró, chi ni jíicān Satanás rohó jíjnáhan ró jéē coto ndee rohó nájnūhun jeē síjin trigo, te stúu ndé ñn

ró cácuu nájnūhun paja jeē nayūhu ró, te ndé ñn ró cácuu nájnūhun trigo jeē candíje nīhin ró.

³² Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jēē íje tāca jnáhan ró jíin jnúhun rī. Achí yá.

³³ Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhān rī jíin ró jeē nde ná tu cana líhli vijna, te yūhu ró jeē jñī ñayuu rohó, te unī jínu cahān rō jeē tu jíiní rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnūhun yá de jíināhan de:

Ná ni tají rí rohó ní jengoo ró jēē tu ní cóndiso ró ñunu ni yijni xūhún ni ndijēn, ¿te á ní íyo ñn jeē ní cumanī nuū rō? Achí yá.

Te ni cacahān de:

Tú ni ñn ní cumanī.

³⁶ Te ni cahān yā:

Nde vijna sa cáhān rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuáan de.

³⁷ Chī cáhān rī jíin ró jeē quee quivī ndoho yó jnūndóho, chí cánuú squícu jnūhun yáha jēē cahān nuū tútu siquī rī: Sáha ñayuu jíin yá nájnūhun cásáha i jíin tēe sáha cuēchi xeēn, achí tutu. Chī tāca

jnūhun un jēē yosó cáhān siquī rī, chí squícu nahín, achí yá.

³⁸ Yūcuán na te ni cacahān de:

Yāha íyó úū espada, achí de.

Te ni cahān yā jíin de:

Jíin jēē yáha-ni, achí yá.

Jeē ni jicān tahú yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquīn de ya cuango de jíin yá.

⁴⁰ Te nuū ni jíinū yā yūcuán, te ni cahān yā jíin de:

Cacān tahú rō jíināhan ró jēē chindéē ñáhán yá rohó jēē ma sáha ró cuēchi núu coto ndee jeneé rohó, achí yá.

⁴¹ Te ni jica ya jecu, cūhva jeē jicá jíinú yuū jeē squíin. Te ni jecuñī yití yá, te suhva ni jicān tahú yā:

⁴² Tātā, núu cúní ni te tejiyo ní jnūndóho yáha jēē ma quíji siquī ná. Te nasūu jēē cuní maá ná, chí jeē cuní maá ní na cóo, achí yá.

⁴³ Te ni cane ñn ndajéhe andiví núu yā, te ni jēhe fuerza nuū yā.

⁴⁴ Te cúcuíhyá ndasí ni yā jeē quíji jnūndóho siquī yā, te ni nducú ndeyí gá yā ni jicān tahú yā. Te ni cane jnañū yā, te tóo nuū ñūhun nájnūhun yúyú náhnu niñī.

⁴⁵ Te ná ni ndocuñī yā jeē ni jicān tahú yā, te ni ndee yā nuū tēe cáscuáha jíin yá. Te ni jito ya jeē cáquixī de, chí tuá cáhīyo ndeyí ni de cacān tahú de jeē cácuíhyá ndasí ni de.

46 Te ni cahān yā jín de:

¿Naun cáquixī rō? Ndonga te cacān tahú rō jeē chindéé ñáhán yá rohó jéē ma sáha ró cuéchi jeē cóto ndee jeneé rōhó. Achí yá.

Jeē ní cajñi de Jesús

(Mt. 26.47-56; Mr. 14.43-50; Jn. 18.2-11)

47 Te sá cáhán gā yā súcuan, te ni quecoo cuehē ñayuu. Te tēe nání Judas, ñin jñáhan jeē uxí uū tēe scuáha jín yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya.

48 Te ni cahān Jesús jín de:

Judas, ¿á jín jéē téchūhu ró ruhū cúu jeē nastúu ró rúhū, Yaā ní nduu tēe? Achí yá.

49 Te tēe cáhān jín yá, ni cajito de jeē ní quejéé cúu, te ni cacajñūhún de ya:

¿A ndonga ná jíjñáhan ná síquī de jín espada? áchí de.

50 Te ñin de ni stují de mozo sutū cujéhnū ga, chí ni jehnde de sōho lado váha.

51 Te ni cahān Jesús:

Siáá, na jécuiñi, achí yá.

Te ni tee ya ndaha ya sōho mozo un, te ni nasávaha ya de.

52 Te ni cahān yā jín sutū cácujehnū jín tēe cándiso jñiñū ini templo jín táca tēe jéhnū jeē ní quecoo de jeē jñi de ya:

¿Te va tēe cuihná cúu ri jeē véjicoo ró jín espada jín yu-jnu jeē jñi ró rúhū jeē súcuan?

53 Táca quívrī ni ine ri jín ró jíjñáhan ró ini templo cáhnu, te tu ní cajñi ró rúhū. Te vijna te ni quee hora jeē jñi ró rúhū

jín jéē sáha ró táca jniñū jeē ndácu jeneé jéē ndeé núū néē. Achí yá.

Jeē ní cachi Pedro jeē tu jini de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Te ni cajñi de ya cuangoo de jín yá vehe sutū cujéhnū ga. Te Pedro chí jíca-ni ndíquín de ya.

55 Te táca policía ni cascáyú de ñuhūn ini patio, te ni condúu de yuñúhún un cáyucú de. Te suni ni cucōo Pedro jín de.

56 Te ñin ñáhan jéjñiñū ini vehe un, ní jito ña nuū de jeē néne de yuñúhún. Te ní jito váha ña nuū de, te ni cahān ña: Tēe yáha suni ní jica de jín tēe ún, áchí ña.

57 Te máá de tu ní cáchi de, chí ni cahān de:

Tu jini rī tēe ún, áchí de.

58 Te ni cunúu jecu gā, te ní jito tucu inga ñayuu nuū Pedro, te ni cahān:

Róhó, suni jñáhan táca tēe un cúu ró, áchí.

Te ni cahān Pedro:

Nasúu cúu rī, hombre, achí de.

59 Te ni cuu nájnūhun ñin hora gā, te ni cahān ñihin inga de:

Jendaá ndije jeē tēe yáha ní jica de jín tēe ún, chí suni tēe región Galilea cúu de, áchí de.

60 Te ni cahān Pedro:

Hombre, tu jini rī na jñūhun cáhán rō.

Te sá súcuan cáhán gā de, te ni cana-ni líhli.

61 Yūcuán na te ni ndió cóto máá Jítoho yō, te ní jito ya

nuū Pedro. Te ni nucūhun ni de jnūhun ni cahān yā jín de: Nde ná tu cana líhli, te yūhu ró te cahān rō unī jínu jeē tu jíní rō ruhū.

⁶² Te ni quenda de cuahān de, te yōhyō ni ndahyū de jeē ní cachi de jeē tu jíní de ya.

*Jeē ní casacatā de nuū yā
(Mt. 26.67-68; Mr. 14.65)*

⁶³ Te tāca tēe cándito Jesús, ni casacatā de nuū yā, te ni cacani de ya.

⁶⁴ Te ni cajesi de sahma nuū yā, te ni cacani de nuū yā, te ni cacahān de:

Cachi ndé ĩn cúu jeē ní cani rōhó, áchí de.

⁶⁵ Te cuehē gā jnūhun súcuan ni cacahān neé de jín yá.

*Jeē ní indichi Jesús nuū
junta tēe cácujuhnu ga
(Mt. 26.59-66; Mr. 14.55-64;
Jn. 18.19-24)*

⁶⁶ Te jeē ní cundijin, te ni candutútú táca tēe jéhu cándacu jniñu nuū ñayuu hebreo, jín sūtū cácujuhnu, jín tēe cástéén tutu ley Yaā Dios. Te cuangoo de jín yá nuū junta tēe cácujuhnu ga, te yūcuan ní cacajñuhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jín de:

Vēsú na cáhán rī jeē suu ri cúu, te ni ma candíje cuĩti rō.

⁶⁸ Te suni núu cajñuhun máá rí rohó jijnáhan ró, te suni ma stió cuĩñí rō nuū rī, ni ma siaá rō ruhū.

⁶⁹ Te ruhū, Yaā ní nduu tēe, táca quĩvi jeē quĩji conene ri

lado váha máá Yaā iyó poder, achí yá.

⁷⁰ Yūcuán na te ndihi de ni cacajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jín de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíní ñuhún yó núu súcuan? Chi ni cajini sōho yó jín yuhu máá de jeē cahán ndevāha de jeē cúu de Sēhe Yaā Dios. Achí de jijnáhan de.

*Jeē ní indichi Jesús nuū Pi-
lato*

*(Mt. 27.1-2, 11-14; Mr. 15.1-5;
Jn. 18.28-38)*

23

¹ Yūcuán na te ni canducuiñí ndihi de, te cuangoo de jín yá nuū Pilato.

² Te yūcuan ní caquejéé de cácahān de cuēchi siquĩ yā:

Ni canihīn na tēe yáha jéé stóna de ñayuu siquĩ tohō. Te cáhán de jeē tú vāha jeē cuāha ná xūhun renta nuū rey nación Roma jeē ndácu jniñu nuū nación na. Te suni cáhán de jeē maá de cúu Cristo, Rey jeē ní tají Yaā Dios. Achí de jijnáhan de.

³ Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

⁴ Te ni cahān Pilato jín sūtū cácujuhnu jín ñayuu cuehē ún:

Tú ni ñn jñuhun stívi cáhán tēe yáha jēē nihín rī cuēchi siquī de, áchí de.

⁵ Te máá de víhyá gā ni cacahān de:

Tēe yáha stóna ndasí de ñayuu siquī tohō jín jñuhun stéén de ní Judea. Chi ni quejé de stéén de nde Galilea, te vijna te nde yáha, áchí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajñuhún de ñayuu núu tēe región Galilea cúu ya.

⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jín yá nuū Herodes, tēe cúu gobernador Galilea. Chi quívi ún suni íne Herodes ñuu Jerusalén.

⁸ Te nuū ní jito de nuū Jesús, te yōhyo ni cusñi de, chi je ni cuu cuehē tiempo jeē cuní de coto de nuū yā. Chi ni nihín de jñuhun ya, te ñuhun ni de jeē sáha ya ñn jniñu jéhu coto de.

⁹ Te ni cajñuhún de ya cuehē jñuhun, te tu ní stío cuíñi yā ni ñn jñuhun nuū de.

¹⁰ Te suni cáhīn táca sūtū cácujuhnu jín tēe cástéén tutu ley, te nihín ni cacahān de cuēchi siquī yā.

¹¹ Yūcuán na te Herodes jín táca soldado de ni cacahān neé de jín yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato.

¹² Te máá quívi un ní candumanī jnáhan Pilato jín Herodes, chi ichi yátá ni caquiti jnáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato táca sūtū cácujuhnu jín táca tēe cándiso jniñu jín táca gá ñayuu, ni candutútū.

¹⁴ Te ni cahān de:

Ni caquindeca ró tēe yáha núu rī, jeē cácahān rō jeē stóna de ñayuu siquī tohō. Te je ni stichí rī de, ni cajito jínúu rō. Te tu ní nihín rī ni ñn cuēchi siquī de nájñuhun jeē cácahān rō.

¹⁵ Te ni Herodes, tu ní nihín de, chi ni natají tucu de tēe yáha núu rī. Te tú cuiti ni ñn cuēchi ní sáha de jeē cúu de.

¹⁶ Núu sūcuan te na cuáha ri castigo de, te siáá rī de quihín de, áchí Pilato.

¹⁷ Te íyó costumbre jeē táca vico pascua siaá Pilato ñn preso jeē cuní ñayuu.

¹⁸ Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

¹⁹ Te Barrabás íne de vecāa siquī jeē ni stóna de ñayuu siquī tohō ini ñuu ún, te ni jehni de ndīyi.

²⁰ Te Pilato cuní de siáá de Jesús, te ni cahān tucu de jín ñayuu.

²¹ Te máá i víhyá gā ni cacana jee i:

Cata caa ní de jicā cruz, na cúu de, áchí i.

²² Te ni cahān tucu de jín i vuelta unī:

¿Na cuēchi ni sáha de núu súcuan? Tu ní níhín cuiti rī ni ñn cuēchi síquī de jeē cúu de. Núu súcuan te na cuáha ri castigo de, te siaá rī de quihīn de, áhí Pilato.

23 Te víhyá gā ni cacana jee ñayuu un, ní cacahān nīhin i jeē na cúu yā jicā cruz. Te máa i jíin táca sūtū cácujuhnu, ni cacana jee ndasí i. Te ni cacundeyí i ni cascáhān i Pilato jeē na cúu yā.

24 Yūcuán na te ni ndacu Pilato jniñu jeē na cóo nájñuhun cácuñi i.

25 Te ni siaá de tēe jeē ní cajicān i, tēe jeē íne vecāa jeē ní stónnda de ñayuu síquī tohō te ni jehni de ndīyi. Te ni jēhe de jñuhun jeē na cúu Jesús nájñuhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

26 Te cuango tácá soldado jíin yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendiji de jeē ní jéhēn de rancho. Te ni catejniñu de tēe un jēe cóndiso de cruz yā quihīn de yatā yā.

27 Te cuehē ndasí ñayuu ndíquín i yatā yā cuango i. Te suni cuehē ñahan cuango ña, te cándahyū cohó ña jeē cácuñihyá ni ña jehē yā.

28 Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyū rō jehē maá ró jíin jéhē sēhe ró jíináhan i.

29 Chi quee quivī jeē coo jññndóho xeēn síquī rō, te cahān rō: Yōhyo ndetū tácá ñahan númá, jíin jēe tu ní scácu sēhe, jíin jēe tu ní cóndeca yiquín, chí tú sēhe ña jeē jnahuhū ni ña jeē ndóho i, achi rō jijnáhan ró.

30 Quivī ún te quejéé ñayuu cahān i jíin táca yucu: Cotúú síquī rī jijnáhan ri návāha cuu rī. Te suni jíin táca loma: Casi síquī rī jijnáhan ri, achi i.

31 Chi núu cásáha xeēn i jíin rúhū jeē tú na cuēchi ri, te nagā ni cuu jeē ma cóo xeēn síquī ndihi ñayuu chí íyó cuéchi i. Achí yá.

32 Te suni cuango de jíin úū tēe ni casáha cuēchi xeēn, jeē suni cuu de jíin yá.

33 Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndindúú tēe ni casáha cuēchi xeēn un núu uū gā cruz, ñn de lado váha ya, te inga de lado jecó yá.

34 Te níiní jēe súcuan cúu, te ni cahān Jesús:

Tátā, cone cáhnu ni ní núu de jíináhan de, chí tu cájini de na vé casáha de, áhí yá.

Te soldado un ní casáha de sorteo jeē síquí ndese nihīn ñn ñn de sahma ya.

35 Te cáhīin ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnama de máa de vijna, te núu ndaā jeē Cristo jeē ní nacāji Yaā Dios cúu de, áhí.

36 Te tãcã soldado suni ni casãcatã de nuũ yã, chi ni quecoo de nde nuũ yã, te ni cajêhe de vinagre iyã coho ya.

37 Te cácahãn de jíin yá:

Núu máá ró cúu Rey ñayuu hebreo, te na jnáma ró máá ró, achí de.

38 Te suni ni iyo jnũhun jeē ndeé xinī cruz yã jeē cahán na siquī ni jíhī yã, te suhva yósó jíin yuhu griego jíin latín jíin hebreo: Yãha cúu Rey ñayuu hebreo, achí.

39 Te ñn jeē ndĩndúú tée ni casáha cuēchi xeēn, jeē cándita caa, ni cahãn neé de nuũ yã:

Núu máá ró cúu Cristo, te na jnáma ró máá ró te suni jnama ró ndĩndúú rí, achí de.

40 Te inga de ni cahãn de nuũ jnáhan de:

¿A tu yúhú ró Yaã Dios naún? Chi ñnuú cándoho yó jíin Yaã yãha.

41 Te máá yó chi vetũ-ni cándoho yó, chi yãha cánihĩn yō castigo siquī jniñu neé ní casáha yó. Te Yaã yãha chi tú ni ñn cuēchi ní sáha ya, achí de.

42 Te ni cahãn de jíin yá:

Jesús, nucũhun ni ní sãña jeē quéjéé ní ndacu ní jniñu, achí de.

43 Yũcuán na te ni cahãn Jesús jíin de:

Jendaá cahán rī jíin ró jeē víjna te condee rō jíin rí nuũ jardín andiví, achí yá.

Jeē ni jíhī Jesús

(Mt. 27.45-56; Mr. 15.33-41; Jn. 19.28-30)

44 Te nuũ ní cuu nájnũhun cahuxī uũ, te ni cuñee ní cáhnu nde cahunī.

45 Te ni cujnúú níãndii. Te sahma ndíta caa jeē ndihyú cuarto ñni ini templo cáhnu, ni ndatã-ni sava sava.

46 Yũcuán na te ni cana jee Jesús:

Tátã, naquihin ní ánuá na, achí yá.

Te súcuan ni cahãn yã, te ni jíhī-ni ya.

47 Te tēe nación Roma jeē cúu capitán ni jito de jeē súcuan ni cuu, te ni cahãn de jeē yóhoyo cújéhnu Yaã Dios, te achí de:

Jendaá ndije jeē tēe tú na cuēchi cúu tēe yãha, achí de.

48 Te ndivii ñayuu cáhĩn yũcuan ní cajito i tãca jéé ní cuu, te cácani i yĩqui jíicã i jeē cájnahuhũ ni i, te ni nandió cóo i cuanungoo i.

49 Te tãca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhĩn jíicã ña cájito ña tãca jéé ní cuu.

Jeē ní quĩndũji Jesús

(Mt. 27.57-61; Mr. 15.42-47; Jn. 19.38-42)

50 Te ni iyo ñn tēe vãha tēe ndaã, nání de José. Te tēe ñuu Arimatea ndañũ Judea cúu de. Te cúu de jnáhan tãca tēe hebreo cácujuhnu ga jeē casáha junta.

51 Te ñũhun ni de jeē quiji quiví jeē ndacu Yaã Dios jniñu, te suni tu ní nújnahan ni de jeē ní casãndaã junta un jéé cúu Jesús.

52 Te tēe un ní jehēn de nuũ Pilato, ni jíicã de yĩqui cúñu Jesús.

53 Te ni snúu de ya jíicã cruz, te ni chusúcun de ya ñn

sahma cuitá. Te ni chindūji de ya ini ñn yaū jeē ní caan jicā ñn cava, nuū ná tu quindūji ndīyi.

⁵⁴ Te quivī un cúu quivī casátūhva ñayuu, chi jehíni un quéjéé quivī ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya.

⁵⁶ Te cuanungoo ña vehe ña, te ni casátūhva ña tācá perfume jíin aceite yucū jeén asīn. Te ni candetátú ña quivī ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quivī domingo, te ni jinūcoo tucu ñahan un núū ní yindūji Jesús, te cándahá ña tācá perfume jíin aceite ni casátūhva ña. Te suni cuangoo sava ga ñahan jíin ña.

² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi.

³ Te ni quivīcoo ña yaū ún, te tuá yiqui cúñu Jitoho yō Jesús ni cájito ña.

⁴ Te ni cacunéé ni ña cájito ña jeē tuá ndīyi. Sáa te ni cajito ña uū ndajéhé Yaā Dios jeē cáa nájnūhun tēe, cáhīn ya xiin ña, te cáñūhun ya sahma ndíndéé.

⁵ Te yōhyo ni cayūhú ña, te ni cajexin ña nuū ña nde nuū

ñūhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu?

⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea.

⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tée cáhīyo cuēchi, jeē jñi de ya cahni de ya jicā cruz, te nuū uní quivī te natecu yā. Achí ndajéhé un.

⁸ Yūcuán na te ni canucūhun ni ña tāca jnūhun ni cahān Jesús.

⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnūhun yáha núū ndihúxí ñn apóstol jíin núū tāca gá de.

¹⁰ Te ñahan ní canacani jnūhun yáha núū tée cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña.

¹¹ Te tācá apóstol chi cájeni ni de jeē jnūhun cánéé cáñúú cácahān ña, te tu ní cácandíje de.

¹² Te vēsú súcuan, te Pedro ni quenda de, te jínu de cuacandéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náa ni de jeē ní jito de jeē tuá yā.

Jeē ní ndajñūhun yá jíin úū de ichi cuáhán Emaús
(Mr. 16.12-13)

¹³ Te suu quivī un cuángoo uū jñahan de ñn ñuu naní

Emaús, jeē jicá nájñuhun uxī ñn kilómetro jíñ ñuu Jerusalén.

14 Te cándajñuhún de siquī tācá jñiñu jeē ní cuu ún.

15 Te níñi cándajñuhún de te cácajñuhun jñáhan de, te máá Jesús ni cuyajni ya yatā de, te jica ya cuahān yā jíñ de.

16 Te ni sáha jíñ de jeē tu ní cánacuni de ya, vēsú cájito de nuū yā.

17 Te ni cajñuhun yá de:

¿Na jñuhun cándajñuhun ró cájica ró? ¿Te najehē cácuquíhyá ni rō? Achí yá.

18 Te ñn de jeē naní Cleofas ni cahān de jíñ yá:

Ndihi cuiti ñayuu cájini i tācá jñiñu ní cuu ini ñuu Jerusalén tāca quivī yáha. ¿Te á máñuhún-ni níhín cúu jeē ní quee ní ñuu un jéē tu jíñi ni na vé ni cuu? Achí de.

19 Te ni cajñuhun yá de:

¿Te na vé ni cuu? Achí yá.

Te ni cacahān de jíñ yá:

Jeē ní ndoho Jesús ñuu Nazaret, Yaā ní nacani jñuhun Yaā Dios. Te jíñ poder Yaā Dios ni sáha ya tācá jñiñu jéñu te ni nacani ya jñuhun, jito jínū Yaā Dios jíñ tāca ñáyuu.

20 Te sutū cácujuhnu jíñ tēe cándiso jñiñu nuū ná, ni canastúu de ya nuū tāca tēe Roma, te tēe un ní casándaā de jeē cúu yā jicā cruz.

21 Te máá ná ní cañuhun ni na jéē máá yá jnama ya nación na Israel nuū ñáyuu Roma nuú. Te siquī tācá jñiñu yáha, te ni cane inga jñuhun. Chi vijna je íyó únī quivī jeē ní cuu ún.

22 Te sava ñahan cájini jñáhan ná jíñ, ni canacani ña ñn jñuhun jeē yóhyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyī ún.

23 Te tuá ni cájito ña yiqui cúñu yā. Te ni ndecoo ña nuū na jíñáhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús.

24 Te ni jengoo sava jñáhan ná ndé yaū ndīyī ún, te ni cajito de jeē súcuan íyó, nájñuhun ni cacahān ñahan ún, te tu ní cájito cuiti de nuū yā.

25 Yūcuán na te ni cahān máá yá jíñ de:

Tēe tu cájecūhun cuiti ni cácuu ró. Yōhyo uhū cácandíje ró tāca jñuhun Cristo ni cacahān tēe ni canacani jñuhun Yaā Dios nde jenahán.

26 ¿Te á tu súcuan ní jíñi ñuhún ndoho Cristo tāca jñúndóho yáha, te sáá te quinhun yā nuū lúu cujéñu ya? Achí yá.

27 Te ni nacani cájī yá tāca jñuhun jeē yosó núu tútu ñi jeē cahán siquī máá yá. Te ni quejéé yá jíñ jñuhun ni tee Moisés, te ni cahān gā yā tāca jñuhun jeē ní catee tēe ni canacani jñuhun ya nde jenahán.

28 Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā.

29 Te máá de ni castétu de ya, ni cacahān de jíñ yá:

Ndōo ní vehe ná, chi je ni ini te je yajni cuaa, achí de.

Yūcuán na te ni quiví ya jeē quéndōo ya jíin de.

30 Te nuū ní cucōo ya mesa jeē cáji yā jíin de jíjnáhan de, te ni quihin ya staā, te ni jicān tahu yā, te ni tahu cuéchí yá, te ni jēhe ya nuū de.

31 Te jeē sáha ya súcuan, te nájñūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā.

32 Te ni cacahān maá de:

Jendaá jeē yóhoyo ni cacusiñ ni yō ná ni nacani ya jñūhun nuū yō ichi ún te ni castūhun cáji yá jñūhun cáhán tutu iñ. Achí de.

33 Yūcuán na te yachí ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí iñ ga apóstol, cáyūcu tútú de jíin sava ga jnáhan de.

34 Te ni cacahān tēe cáyūcu tútú un:

Jendaá ndije jeē ní natecu maá Jítoho yō, te ni nane ndi-jin yā nuū Simón, achí de jíjnáhan de.

35 Yūcuán na te ndindúú tēe un ní canacani de jñūhun ndese ni najnáhan ya jíin de ichi, jíin ndese ni canacuni de ya ná ni tahu cuéchí yá staā.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Jn. 20.19-23)

36 Te sá cácahān gā de tāca jnúhun yáha, te ni jecuiñi-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jijnáhan rō, achí yá.

37 Te ni candacoto iyo de, ni cayūhú ndasí de, chi ni cajeni ni de jeē iñ ánuá cúu ya.

38 Te ni cahān yā jíin de:

¿Naun cáyūhu ró, te naun cájeni siquí ni rō súcuan?

39 Condēhé ndaha ri jíin jēhē rī, te cuni rō jeē maá rí cúu. Jññ ruhū te cuni rō, chi iñ ánuá tu névāha cūñu ni yiqui nájñūhun cájito ró jēe névāha máá rí, achí yá.

40 Te jeē ni cáhān yā súcuan, te ni steén yā ndaha ya jēhe yā nuū ni yñi ndūyu cāa.

41 Te yóhoyo ni cacusiñ ni de, te cánaa ni de. Te vēsú súcuan te ná tu candije vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? achí yá.

42 Yūcuán na te ni cajēhe de iñ pedazo chācá ní tau nuū yā, jíin iñ pedazo ñahmā ndūxi yocō.

43 Te ni quihin ya, te ni yeji yā nuū de jíjnáhan de.

44 Te ni cahān yā jíin de:

Tāca jēe ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnúhun ri jeē yosó núu tátu ley Moisés, jíin núu tācá tutu tēe ni canacani jñūhun Yaā Dios, jíin núu tátu salmo, achí yá.

45 Te ni nune ya jeē níjnūni de, návāha cuu jecūhun ni de tāca jēe cahán tutu iñ.

46 Te ni cahān yā:

Súcuan cáhán nuū tátu jeē ruhū Cristo, cánuú cuu rī, te nuū uní quiví natecu rī.

47 Te cuitē núu jñūhun ri jeē cánuú nacani ni ñayuu jeē

stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuítē núu jnūhun yáha, te quihīn nuū ñáyuu tācá naciōn.

⁴⁸ Te máá ró cácuu tēe nacani jnūhun tācá jniñu ní cajito ró.

⁴⁹ Te tají rí Espíritu Santo quiji ya nuū rō jijnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quíji nde andiví. Achí yá.

Jeē ní ndaaya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jín de jijnáhan de. Te ni ndonehen ya ndindúú ndaha ya, te ni jicān tahu yā jehē de.

⁵¹ Te ní ní jícán tahu yā jehē de, te ni cujiyo-ni ya nuū de, ni ndaa ya cuanuhun yā andiví.

⁵² Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusī ni de.

⁵³ Te ní ní cáhīn de ini templo cáhnu, cánacuatáhú de nuū Yaā Dios. Te ni cuu. Amén.

JNUHUN VAHA NI TEE SAN JUAN

*Yaā naní Jnúhun Yaā Dios
ni nduu ya tēe*

1 Nde xīhna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi steén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya.

2 Máá yá ndeé yá nde jeē xīhna ñúhún jíin Yaā Dios.

3 Te ni sáha Yaā Dios jeē jíin máá yá ni jecōo ndihi tāca jéē iyó. Te ma jécōo ni ñin jeē iyó núu tu ní sáha máá yá.

4 Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios.

5 Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

6 Te ni ĩyo ñin tēe jeē ní tají Yaā Dios, naní de Juan.

7 Tēe un ní quiji de jeē nácani cájī de jnúhun máá Yaā cúu luz, návāha candíje tāca ñayuu jeē jíin jnúhun cáhán de.

8 Nasūu máá Juan cúu luz ún, chi cúu de ñin jeē ní nacani cájī jnúhun máá luz un.

9 Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayīví.

10 Te Yaā cúu Jnúhun Yaā Dios ni condee yā ini ñayīví,

te vēsú jeē jíin máá yá ni sáha Yaā Dios ñayīví, te ñayuu ñayīví tu ní cácuni i cuatáhú i jeē máá yá cúu.

11 Ni quiji ya nuū ñayuu máá yá nación hebreo, te ñayuu ún tu ní cájetáhú i ya.

12 Te vēsú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū máá i ni jēhe ya jnúhun jeē ndúu i sēhe Yaā Dios.

13 Te jeē ndúu i sēhe Yaā Dios, nasūu jíin modo jeē cácacu ñayuu ini ñayīví, ni nasūu síquī jeē cácuni tēe, chi máá Yaā Dios sáha ya jeē ndúu i sēhe ya.

14 Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéē yóhoyo luu cújéhnu ya, chi máñúhún-ni ya cúu Sēhe Tátá yā, Yaā cújéhnu súcuan. Te máni máá jéē sáha ya jeē váha yóhó, te máni máá jnúhun ndaā cahán yā.

15 Te Juan ni nacani de jnúhun ya, te ni cahán de:

Yaā yáha cúu jeē ni cáhán rī náa áchí rí jeē Yaā quiji chi cújéhnu ga yā vēsú ruhū, chi je iyó yá nde ná tu cacu ri, achí de.

16 Te ndihi yó ní canihīn yó cuehē ndasí jeē váha iyó núu yā, chi máni jeē váha sáha sáha ya jíin yó.

17 Moisés ni steén de ley Yaā Dios nuū ñayuu jenahán, te Jesucristo chí sáha ya jeē váha yóhó te steén yā tāca jnúhun ndaā Yaā Dios nuū yó.

18 Tú ni ñin ñayuu ni jíto cuiti nuū Yaā Dios. Te máñúhún-ni Sēhe ya jeē ndeé yá jíin Tátá

yā, suu ya ni steén nuū yō ndese Yaā cúu Yaā Dios.

Jnūhun Jesús jeē ni cáhān Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajǎ i jecu sutū jǎn tēe grupo levita jeē cájejnǎnu ini templo, ni jengoo de nuū Juan, návāha cajnūhún de ndé ñn cúu Juan te na jniñu ndíso de.

²⁰ Te Juan cájǎ ní cachi de:

Nasūu rúhū cúu Cristo, achí de.

²¹ Te ni cacajnūhún tucu de:

Núu súcuan ¿te ndé ñn cúu ró? ¿A cúu ró Elías, tēe ni nacani jnūhun Yaā Dios nde jenahán, chí naún?

Te ni cahān Juan:

Nasūú de cúu ri.

Te ni cacajnūhún tucu de:

Núu súcuan ¿te á cúu ró tēe nacani jnūhun Yaā Dios jeē achí tutu ñi jeē quǎji?

Tuú, achí tucu Juan.

²² Te ni cacahān tucu jǎn de:

¿Te ndé ñn cúu ró núu súcuan? Cachi nuū rǎ jǎnahan ri, chí jǎni ñúhún castūhun rǎ nuū tāca tēe ni catajǎ rúhū vējicoo ri. Cachi na jniñu ndíso ró ví.

²³ Te ni cahān Juan:

Máá rǎ cúu tēe jeē ni cáhān Isaías, tēe ni nacani jnūhun Yaā Dios nde jenahán, jeē quǎji ri cana jee ri nde nuū ñúhun téhé. Te cáhān rǎ jǎn ñáyuu jeē na sátūhva i máá i, chí quǎji máá Jítóho yō. Achí Juan.

²⁴ Te tēe grupo fariseo cácuu jeē ní catajǎ tēe ni quǎjicoo ún.

²⁵ Te ni cacajnūhún de Juan: Núu súcuan ¿te naun scuándute ró te núu nasūu Cristo ni Elías ni máá tēe quǎji nacani jnūhun Yaā Dios cúu ró?

²⁶ Te ni cahān Juan:

Ruhū chí jǎn ndute scuándute rǎ. Te mēñu ró jǎnahan ró ñe ñn Yaā jeē tu cájini rō.

²⁷ Te Yaā un cúu jeē ni cáhān rǎ jeē quǎji ya te cújéhu ga yā vēsú ruhū. Chí tú na vé jéhu cuiti cúu ri nuū yā, ni jeē cuajniñu ri nuū yā vēsú ñn jniñu lúli gá nájñuhun jeē ndajǎ rǎ correa ndijēn yā. Achí de.

²⁸ Súcuan ni cuu jeē ní candajnūhún de jǎn Juan nde Betábara jeē ñe ichi núu cáne niāndii yūte Jordán, nuū scuándute Juan.

Siquǎ jeē cúu ya Londe Yaā Dios

²⁹ Te ñnga quǎvǎ un ní jito Juan nuū Jesús jeē véji ya nuū de. Te ni cahān de jǎn ñáyuu:

Condēhe jǎnahan ró, chí yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayǎví.

³⁰ Yaā yáha cúu jeē ni cáhān rǎ jeē quǎji ñn Yaā cujéhu ndasǎ, chí je íyó yá nde ná tu cacu ri.

³¹ Te nde saá te tu ní jǎni rǎ jeē yāha cúu Yaā ní tajǎ Yaā Dios. Te ni quǎji ri jeē scuándute rǎ ñayuu ñuu yō Israael jǎn ndute, návāha stéén rǎ nuū i jeē suu ya cúu, achí Juan.

³² Te suni ni cahān gā de jnūhun ya:

Ni jito ri Espiritu Santo, ni cuun ya ichi ándiví, cáa ya nájnūhun paloma, te ni quee ya xiní Jesús.

³³ Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jēe cúun Espiritu Santo te quendōo xiní in tēe, yūcuan cúu Yaā jeē cuáha Espiritu Santo condee ini anuá ñayuu, achí Yaā Dios.

³⁴ Te je ni jito ri ún, te nácani cájí rí jnūhun jeē maá yá cúu Sēhe Yaā Dios. Achí Juan.

Uū tēe jeē ní cana ya xīhna gā

³⁵ Te inga quiví ún te Juan íne tucu de yūcuan jíin uū tēe cájica jíin de.

³⁶ Te ni jito de nuū Jesús jeē jíca ya yūcuán. Te ni cahān de: Condēhe jíjnáhan ró, chí yūcuan cúu Yaā cúu Londe jeē ní tají Yaā Dios.

³⁷ Te ndindúú tēe cájica jíin Juan ni cajini sōho de jnūhun yáha, te ni candiquīn de Jesús.

³⁸ Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánducú ró?

Te ni cacahān de jíin yá:

Maestro, ¿ndé nuū ndeé ní?

³⁹ Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caque-ndōo de jíin yá quiví ún, chí nájnūhun cacuūn jehíni cúu.

⁴⁰ Te Andrés, ñani Simón Pedro, cúu in jeē ndindúú tēe un jēe ní cajini sōho jnūhun

ni cahān Juan, te ni candiquīn Jesús.

⁴¹ Te Andrés, yachí ni jenanducú de ñani de Simón, te ni cahān de jíin:

Ni caquiñáhan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conani ró Cefas, achí yá. Te jnūhun un cúní cahān Pedro, jeē cuni cahān yuū.

Jeē ní cana ya Felipe jíin Natanael

⁴³ Te inga quiví un cúní Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquīn ruhū na quihín yō.

⁴⁴ Te Felipe cúu tēe ñuu Bet-saida, jeē cúu ñuu Andrés jíin Pedro.

⁴⁵ Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jnūhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

⁴⁶ Te ni cahān Natanael jíin de:

¿Te ndese cúu cujéhnu in tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

47 Te ni jito Jesús jeē véji Natanael, te ni cahān yā:

Yāha véji iin tēe ndaā jeē cúu ndije yucūn Israel, chí tu stáhú cuiti de, áchí yá.

48 Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

49 Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

50 Te ni cahān Jesús:

¿A máá jēē ni cahān rī jeē ní jito ri rohó ná íne ró jéhē nundéhe higo, te jeē yūcuan cándije ró rúhū naún? Tuú chí coo jniñu jéhnu ga coto ró vēsú jeē yáha, áchí yá jíin de.

51 Te ni cahān gā yā:

Jendaá cahán rī jíin ró jijnáhan ró jēē nde vijna te coto ró jēē núne andiví, te tǎcá ndajéhé Yaā Dios cándaa cánuu nuū ruhū, Yaā ní nduu tēe, áchí yá.

Jeē ni jéhēn yā iin vico nándāha ñuu Caná

2

1 Te ni yāha unī quivī, te ni iyo iin vico nándāha ñuu Caná ndañūū Galilea. Te yūcuan íne náná Jesús.

2 Te suni ni cacana i Jesús jíin tēe cáscuáha jíin yá, ni jehēn yā vico un jíin de.

3 Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

4 Te ni cahān Jesús jíin ña:

¿Naun cáhán ni súcuan jíin ná nánā? Chí ná tu quēe quivī jeē sáha ná jniñu jéhnu, áchí yá.

5 Te náná yā chí ni cahān ña jíin ñáyuu cájeni cohō:

Sáha ró jijnáhan ró táca jēē cahān yā jíin ró. Achí ña.

6 Te yūcuan íyó iñū tenéjā yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te iin iin tenéjā un cánda cuhun cuūn xico chí ciento litro ndute.

7 Te ni cahān Jesús jíin ñáyuu cájeni cohō:

Scútú ndī rō tǎcá tenéjā yáha.

Te ni cascútú ndī i.

8 Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, áchí yá.

Te ni cajendeca i nuū de.

9 Te ni séyūhú de ndute jeē ní nduu vino, te tu jíiní de ndé ní canihīn i. Chí máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha.

10 Te ni cahān de jíin:

Tǎca ñáyuu chí xīhna gā vino váha cájēhe i, te núu je ni cajihí vāha ñayuu cáhīn vico, yūcuán na te jēhe de vino ndahú na. Te máá ró tucu ni sáha ró, chí nde jeē sándihí te jēhe ró vino jeē yóhoyo vāha ga jíhi, áchí de.

11 Jniñu yáha jēē ni sáha Jesús ini ñuu Caná ndañūū Galilea cúu jniñu jéhnu xīhna ñúhún jēē ni sáha ya jeē steén yā poder yā. Te súcuan ni steén yā jeē yóhoyo cújéhnu ya.

Te tēe cáscuáha jíin yá ni ca-candíje de ya.

12 Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tée cáscuáha jíin yá. Te ni coyūcu yá yūcuán jecu quivī.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

13 Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén.

14 Te ini templo cáhnu ni jito ya ñayuu cáxícó stiquī jíin lanchi jíin paloma, jíin ñáyuu castáyī xūhun, cáyūcú i nuū mesa i.

15 Te jeē súcuan ni jito ya, te ni sáha ya ñn cuarta ññ. Te ni scúnu ya tǎcá i ini templo, nde jíin lanchi jíin stiquī i. Te ni jete yā xūhun ñáyuu castáyī. Te ni scotúú yá tǎca mesa i.

16 Te ni cahān yā jíin ñáyuu cáxícó paloma:

Tava tǎcá quiti yáha. Te ma sáha ró yáhu ini vehe Tátá rī. Achí yá.

17 Yūcuán na te tēe cáscuáha jíin yá, ni canucūhun ni de jnūhun yósó núū tútu ñ: Je yajni cuu na jéē yóhyo ndíhví ni na síquī vehe ní, achí yá jíin Tátá yā, achí tutu.

18 Te tēe ñuu yā hebreo ni cacajñūhún de ya:

¿Na jniñu jéhnu sáha ró jéē steén rō poder rō, te cucáhnu ni rī jeē ndíso jniñu ró sáha ró súcuan? achí de jíin yá.

19 Te ni cahān yatá Jesús:

Canu rō templo yáha, te nuū uní quivī te nucondichi sáha rī, achí yá.

20 Yūcuán na te ni cacahān tēe hebreo un:

Uū xico iñū cuiyā te ni jínu ni cuvāha templo yáha. Te róhó, ¿á núū uní-ni quivī te nucondichi sáha ró naún? Achí de.

21 Te templo jeē cahán Jesús cúu máá yiqui cúñu yā, chi cahni ñayuu yā te natecu yā nuū uní quivī.

22 Jeē yúcuan cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cáhān yā jnūhun yáha. Te ni cacandíje de jnūhun jeē yosó núū tútu ñ, jíin jnūhun yáha jéē ni cáhān Jesús.

Jeē jini Jesús ndese cáa ini anuá ñayuu

23 Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chi ni cajito i tǎcá jniñu jéhnu sáha ya jeē steén yā poder yā.

24 Te máá Jesús chi tu ní jétáhú yá i, chi je jíiní yā ndese cáa ini anuá i jíinánhan i.

25 Te tu jíiní ñúhún yá jeē cáchi ni ñn ñayuu nuū yā ndese íyó táca ñáyuu, chi máá yá je jíiní yā ndese cáa ini anuá i.

Jeē ní candajñūhún Jesús jíin Nicodemo

3

1 Te ni íyo ñn tēe grupo fariseo, naní de Nicodemo, te cújéhnu de nuū ñáyuu ñuu de hebreo.

² Tēe yáha ní quiji de nuū Jesús ñn jecuáa, te ni cahān de jíin yá:

Maestro, je cájini na jēe maá Yaā Dios ni tají yá nihín jēe steén ni jnūhun ya nuū na jíjnáhan ná. Chi núu tu iyó Yaā Dios jíin ní, te ma cúu sáha ní ni ñn jniñu jéhu nájnūhun sáha máá ní jeē steén ni poder ní, áhí de.

³ Te ni cahān Jesús:

Jendaá cahán rī jíin ró jeē núu tu nacacu jeé ñn ñayuu, te ma cúu quívi i ndaha Yaā Dios jeē ndacu ya jniñu nuū i, áhí yá jíin de.

⁴ Te ni cahān Nicodemo jíin yá:

¿Te ndese cuu nacacu ñn tēe te núu je ni jehnu de? ¿A cuu nucūhun tucu de chíji náná de te nacacu tucu de? áhí de.

⁵ Te ni cahān Jesús:

Jendaá cahán rī jíin ró jeē núu tú nacacu ñn ñayuu, te ma cúu quívi i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnūhun jíin ndute, te condee Espíritu Santo iní anuá i.

⁶ Jeē cácu sáha ñayuu, chi sēhe ñayuu cúu. Te jeē cácu sáha Espíritu yā, chi sēhe ya cúu.

⁷ Ma náā ni rō cani ni rō ndese cúu jnūhun ni cahān rī jíin ró jeē cánuú jēe nacacu jeé ró jíjnáhan ró.

⁸ Te tachī chi quée cuahān ndé-ni cúu nuū cuní maá, te jíni sōho ró jēe cáyu, te tu jíni rō ndé nuū véji ni ndé nuū quihín. Te suni súcuan cúu táca ñayuu jeē nácacu sáha

Espíritu, chi tu jíni rō ndese sáha ya jniñu ún, áhí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máá ró cúu ñn maestro jeē kujéhu nuū ñayuu ñuu yō Israel, te ¿á tu jécūhun ni rō jnūhun yáha naún?

¹¹ Jendaá cahán rī jíin ró jeē jnūhun cájecūhun ni rī cúu jeē cácahān rī jíin ró. Te cánacani cáji rí jnūhun jniñu ní cajito rí. Te tu cácañdije ró jnūhun cácahān rī.

¹² Chi ni cahān rī jnūhun ndese sáha Yaā Dios iní ñayívi, te tu cácañdije ró. Núu súcuan ¿te ndese candije ró núu cahān rī jnūhun táca ndese sáha ya nde andiví?

¹³ 'Chi ni ñn tu ní cáa andiví jeē cúni ndese iyó yúcuan, chi mañúhún-ni ruhū, Yaā ní nduu tēe. Chi andiví ndéé rí, te ni cuun rí véji rí.

¹⁴ Te nájnūhun ni cata caa Moisés ñn coō cāa nuū ñn yujnu, ná ni cajica ñayuu nuū ñūhun téhé, suni súcuan máá rí, Yaā ní nduu tēe, cánuú jéé cóndita caa rí jicā cruz.

¹⁵ Te súcuan cánuú návāha táca ñayuu jeē candije i jeē jnáma rí i, ma jnahnú ndetū i, chi sa suhva cotecu i ní cáni andiví.

Yōhyo ni cundáhú ni yā ñayuu ñayívi

¹⁶ 'Chi Yaā Dios yōhyo ni cundáhú ni yā ñayuu ñayívi. Jeē yúcuan ní tají yá Sēhe ya ni quiji, vésú mañúhún-ni ya iyó, návāha táca ñayuu jeē candije i jeē jnáma ya i, ma

jnahnú ndetū, chi sa suhva cotecu i ní cáni andiví.

17 Chi tu ní tájí Yaā Dios Sēhe ya ini ñayiví jeē snahnú ndetū yā ñayuu, chi sa suhva jeē jnáma ya ñayuu.

18 Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chi tu ní cándíje i máá Sēhe Yaā Dios, te máá ñin-ni ya iyó.

19 Máá Yaā jeē stíndēē ini anuá ñayuu, je ni quee ya ini ñayiví. Te cánujnahan gā ni ñayuu caca i nájnūhun nuū néē vésú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cáncandíje ún.

20 Chi tāca ñayuu casáha jniñu néé, tu nújnahan cuiti ni i luz yā. Te tu jéhe i jnūhun jeē stíndēē yá ini anuá i, chi tu cúní i jeē natūu jniñu néé cásáha i.

21 Te ñayuu jeē cájica jíin jniñu ndaā, jéhe i jnūhun jeē stíndēē yá ini anuá i, návāha natūu ndijin jeē tācá jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jnūhun Jesús

22 Yūcuán na te Jesús jíin téē cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu.

23 Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñayuu nuū de, te ni scuándute de i.

24 Súcuan ni sáha Juan nde ná tu quiví de vecāa.

25 Yūcuán na te sava tēē cáscuáha jíin Juan yōhyo ni cacahān de jíin sava jnáhan de hebreo siquī núu ndé ñin cúu modo vāha ga jeē cúchi ñayuu ndundoo i nuū Yaā Dios.

26 Te ni quecoo de nuū Juan, te ni cacahān de:

Maestro, tēē ní ine jíin ní yūte Jordán ichi núu cáne niāndii, jeē ní nacani ní jnúhun de nuū ná, vijna te scuándute máá de, te ndivii ñayuu cuangoo i nuū de.

27 Te ni cahān Juan:

Ni ñin tēē ma cúu sáha de jniñu Yaā Dios te núu ma tejniñu ya de.

28 Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu rí ñin jeē ní tají Yaā Dios jeē cósnúu nacani jnūhun jeē quíji ya.

29 Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jíin de, te jíni sōho jnūhun cáhān de. Te yōhyo cúshí ni jíni sōho jnūhun cáhān yíi ún. Te suni súcuan ruhū, chi cúu rí nájnūhun amigo yíi, chi ni quee máá Cristo, te yōhyo cúshí ni rí jíni sōho rí jnūhun cáhān yā.

30 Te jíni ñúhún jéē ndujéhnū ga máá yá te ndululí gá máá rí, achí Juan.

Jeē ní quiji ya nde nuū sucún

31 Te Yaā jeē véji nde andiví, cújéhnū ya nuū ndihí. Chi tāca jéē ní cacu ini ñayiví yáha, sēhe ñayiví cúu, te máni

jnūhun ñayīvī cáhán. Te Yaā jeē véji ichi ándiví, chi cújéhnū ya nuū ndihi ñayuu.

³² Te nácani ya jnūhun jeē ní jito ya jíin jéē ní jini sōho ya. Te ñayuu chi tu cácdíje i jnūhun cáhán yā.

³³ Te núu ñin ñayuu candíje i jnūhun cáhán yā, suu cúu jeē jejnūhún i jeē Yaā ndaā cúu Yaā Dios.

³⁴ Chi Yaā ní tají Yaā Dios vēji, máni máá jnúhun Yaā Dios cahán yā. Chi Yaā Dios tu yícuāha jéhe ya Espíritu yā nuū Yaā ní tají yá.

³⁵ Máá yá jeē cúu ya Tatá, yōhyo maní yā jíin Séhe ya, te ndivii ní jéhe ya ndaha Séhe ya jeē ndacu ya jniñu nuū.

³⁶ Ñayuu jeē candíje máá Séhe ya jeē jnáma ya i, cotecu i nń cáni andiví. Te ñayuu tu cúní candíje Sēhe ya, ma cótecu i nń cáni andiví, chi sa suhva cuāha Yaā Dios castigo jeē ndoho i nń cáni.

Jeē ni cáhān Jesús jíin ñahan ñáuu Samaria

4

¹ Te tēe grupo fariseo, ni canihīn de jnūhun jeē iyó cuéhē gā tēe cáscuáha jíin Jesús vēsú jíin Juan, jíin jéē cuéhē gā ñayuu scuándute ya vēsú Juan.

² Te nasūu jéē scuándute máá yá, chi tēe cáscuáha jíin yá cúu jeē cascuándute.

³ Te ná ni jini Jesús jeē súcuan ni canihīn de jnūhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria.

⁵ Te ní jinū yā ñin ñuu región Samaria jeē naní Sicar, yajni ñuhun jeē ní jéhe Jacob nuū séhe de José nde jenahán.

⁶ Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuīta yá jeē cuahán yā ichi. Te nájñūhun cahuxī uū cúu.

⁷ Te ni quee ñin ñahan Samaria, vēji ña vequihin ña ndute. Te ní cahān Jesús jíin ña:

Cuāha ní ndute coho ná, áchí yá.

⁸ Te tēe cáscuáha jíin yá, chi je cuango de nde ñuu, cuacuaan de jeē cáji de jíin yá.

⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñáyuu Samaria.

¹⁰ Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ñin cúu sáña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni nń cáni sáha, áchí yá.

¹¹ Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha?

¹² ¿Te á cújéhnū ga máá ní vēsú jíi yō Jacob, chí naún? Chi máá de ni stóo de pozo

yáha nuū yō. Te yāha ní cajihí máá de ndute, jíin táca séhe de, jíin quití ndéca de. Achí ña.

13 Te ni cahān Jesús:

Tāca ñáyuu jeē jíhi ndute yáha, chí jichī tucu i.

14 Te ñayuu coho ndute jeē cuáha na núū i, chí ma jichí cuiti gā i. Chí ndute jeē cuáha ná un, cane ini i nájnūhun ndute jeē cáne ñuhún, te sáha jeē cotecu i ní cáni, áchí yá jíin ña.

15 Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ñūhun quiquihin ná ndute pozo yáha, áchí ña.

16 Te ni cahān Jesús jíin ña:

Cuácana ní yī ní te quiji ní jíin de, áchí yá.

17 Te ni cahān ña:

Tú yī ná íyó.

Te ni cahān Jesús:

Ndaā cahán ni jēé tú yī ní íyó.

18 Chí je ni cuu uhūn yī ní, te tēe ndéca ní vijna chí nasūú yī ní cúu de. Yāha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñin tēe nácani jnūhun Yāa Dios cúu ní, jéni ni ná.

20 Tāca jíi na ñáyuu Samaria, yucu yáha ní cachiñúhún i Yāa Dios. Te máá ní ñayuu hebreo, cácahān ni jēé ñuu Jerusalén cúu nuū cánuú chiñúhún yó yā, achí ña.

21 Te ni cahān Jesús jíin ña:

Nánā, candíje ní jnúhun cáhán na, chí quee quiivī

jeē ni nasūú yucu yáha ni nasūú ñuu Jerusalén cúu nuū chiñúhún ní maá Yāa cúu Tátá, chí ndihí-ni lugar te cuu chiñúhún ní yá.

22 Máá ní ñáyuu Samaria tu cájini ni ndé ñin cúu jeē cáchiñúhún ní. Te máá ná jijnáhan ná chí cájini na ndé ñin cúu jeē cáchiñúhún ná. Chí nde nuū maá ná jijnáhan ná ñáyuu hebreo cúu nuū véji Yāa jnama ñayuu.

23 Te je ni quee quiivī jeē ñáyuu cáchiñúhún ndaā, vijna te chiñúhún ndije i Yāa cúu Tátá nde jíin ini jíin ánuá i. Chí máá Tátá cúni yā jeē súcuan chiñúhún ñáyuu yā.

24 Yāa Dios cúu Espiritu, te ñayuu jeē cuní i chiñúhún i ya, cánuú jēé chiñúhún ndije i ya jíin ini jíin ánuá i, áchí yá.

25 Te ni cahān ñahan ún:

Jíni na jēé quiji Mesías jeē cúu Cristo, Yāa jeē tají Yāa Dios. Te núu ni quee maá yá, te stéen cají yá tāca jnúhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yāa ún.

27 Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña.

28 Yūcuán na te ñahan un ní stóo ña quiyī ña, te cuahān ña nde ñuu. Te ni cahān ña jíin ñáyuu ún:

29 Nehen na quíngoo yó te coto ró ñin tēe jeē ní cachi

ndihi tāca jēē ni sāha ri. Sanaa te máá yá cúu Cristo, jeē cándetu yó quiji, áchí ña.

³⁰ Yūcuán na te ni quenda-coo i ñuu ún, te cuangoo i nuū íne Jesús.

³¹ Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stāā víi, achí de.

³² Te ni cahān yā jíin de:

Iyó stāā caji rī jeē tu cājini rō ndese cúu.

³³ Yūcuán na te tēe cáscuáha jíin yá, ni cacajñuhun jñahan de:

¿A ní quindeca ñin ñayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jēē caji rī cúu jeē cúsi ni rī sāha ri jniñu cúní Yaā ní tají rúhū vēji ri, jíin jēē sínu ri jniñu ún.

³⁵ Te cácahān rō jeē cúmanī cuūn gā yoō te tahndē trigo. Te ruhū chi cáhán rī jíin ró: Condēhe jíjnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chi je cáhīyo tūhva i candíje i ruhū.

³⁶ Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i nñí cáni andiví. Te tēe cáscuíté núu jñuhun ri, inuú-ni cusī ni de jíin tēe cástéén gā jñuhun ri.

³⁷ Chi ndaā cúu jñuhun jeē cahán: ñin tēe jéte, te inga tēe nástútú, áchí.

³⁸ Te suu cúu jeē ní tají rí rohó jíjnáhan ró jēē scándíje ró ñayuu jeē jé ni canihīn jñuhun

ya ni casáha inga tēe. Chi inga tēe je ni canacani de jñuhun nuū ñáyuu, te máá ró chi nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyúcú ñuu ún, ni candíje i Jesús jeē ní jini sōho i jñuhun ni cahān ñahan ún. Chi ni cahān ña: Ni cachi ya ndihi tāca jēē ni sāha ri.

⁴⁰ Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quiví.

⁴¹ Te cuehē gā i ni cacandíje i ya jíin jñuhun cáhán maá yá.

⁴² Te ni cacahān i jíin ñahan ún:

Tuá niní jēē cahán maá ró te candíje ri yā, chi je ni cajini sōho ri jñuhun cáhán maá yá. Te cājini yō jeē maá yá cúu ndíje Cristo, Yaā jnama ñayuu ñayiví. Achí i.

Jeē ní nasávāha ya sēhe tēe ndíso jniñu nuū rey

⁴³ Te nuū ni yáha uū quiví ún, te Jesús ni quenda ya Samaria, te ni quihin tucu ya ichi cuanuhun yā región Galilea.

⁴⁴ Chi je ni cahān maá yá jeē tēe canacani jñuhun Yaā Dios, tu cáhīyo yíñúhún ñáyuu ñuu de jíin de, te suni súcuu ni cuu jíin máá yá.

⁴⁵ Te ná ni najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñuu Jerusalén, te ni cajito i tācá jniñu ní sāha ya quiví ni iyo vico ún.

46 Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni iyo ñn tēe cújēhnu jeē ndíso jníñu nuū rey. Te cūhú sēhe de.

47 Tēe un ní jini jnūhun de jeē ní najinū Jesús región Galilea jeē ní jēhēn yā región Judea. Te ni jecondēhé de ya, te ni cahān ndahú de jíin yá jeē na quíhín yā jíin de vehe de, te nasávāha ya sēhe de, chi je yajni cuu i.

48 Te ni cahān Jesús jíin de:

Núu tú coto ró jniñu jēhnu jeē náa ni rō sáha, te ma candíje cuiti rō jijnáhan rō, áchí yá.

49 Te tēe ndíso jníñu nuū rey, ni cahān de:

Cava vāha ni ní na quíhín yō, chi núu cucuéé ní te cuu sēhe ná, áchí de.

50 Yūcuán na te ni cahān Jesús:

Cuanuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ñi de.

51 Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

52 Te ni cajnūhún de na hora ni quejéé ndúvāha i. Te ni cacahān i jíin de:

Cahñn jeē ícu ni quenda quíji i.

53 Yūcuán na te máá tátá i ni sáha de cuenta jeē hora un cúu jeē ní cahān Jesús jíin de jeē cótecu sēhe de. Te ni

candíje de jíin ní vehe de jeē cúu ya Yaā ní tají Yaā Dios.

54 Yāha cúu vuelta uū jeē ni sáha Jesús jniñu jēhnu jeē ni stéén yā poder yā región Galilea, jeē ní najinū yā jeē ní jēhēn yā región Judea.

Jeē ní nasávāha ya ñn tēe catú yuhu pila Betesda

5

1 Yūcuán na te cuahān tucu Jesús ñuu Jerusalén, chi iyó tucu vico cásáha jnáhan ñuu yā hebreo.

2 Te Jerusalén iyó ñn pila ndute yajni yéhyí jēe naní yéhyí lanchi. Te yuhu hebreo naní Betesda. Te nuū íne pila un iyó úhūn corredor.

3 Te ini tēcá corredor un cācāa cuehē ñayuu cācuhū, jeē cuaá, jeē chacuá, jeē ní íjin. Te cāndetu i jeē canda ndute ún.

4 Chi iyó quívi jeē cúun ñn ndajéhé yā ini pila un, te scānda ya ndute. Te ñayuu quívi xīhna gā ini pila un ná scānda ya ndute, te ndúvāha i na-ni cuehyí ndóho i.

5 Te yūcuan iyó ñn tēe jeē ní cuu ocō xahūn unī cuiyā cūhú de.

6 Te ni jito Jesús jeē catú de, te ni jini yā jeē ní cuu cuehē cuiyā cūhú de. Te ni cahān yā jíin de:

¿A cúni rō nduvāha ró? áchí yá.

7 Te ni cahān tēe cūhú un jíin yá:

Tu níhín na ni ñn tēe squívi sāñá ini pila hora jeē cānda ndute. Chi tēcá jínu jeē cuní na quívi ná, te quívi-ni inga ñayuu xīhna gā. Achí de.

⁸ Te ni cahān Jesús:

Ndocuñī te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quivī ndétātu cúu quivī ún.

¹⁰ Yūcuán na te jnáhan de tēe hebreo un ní cacahān jíin de:

Quivī ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin ri camilla rī te caca ri, áchí de.

¹² Yūcuán na te ni caca-nūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíin de ndé in cúu jeē ní nasávāha de. Chi cáhiin cuehē ñayuu yūcuán, te Jesús je cuahān yā.

¹⁴ Te cúcuéé gá te ni najáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiji in jnūndóho xeēn gā siquī rō, áchí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jēe Jesús cúu jeē ní nasávāha ya de.

¹⁶ Te siquī jeē ní sáha Jesús jniñu yáha quivī ndétátú, jeē yúcuán cúu jeē tēe hebreo un cájito xeēn de ya, te cácuni de cahni de ya.

¹⁷ Te ni cahān Jesús jíin de:

Maá Tátá rī chi ní cáni te nde vijna sáha ya jniñu váha,

te suni súcuán ruhū sáha ri jniñu váha.

¹⁸ Te siquī jeē ni cáhān yā súcuán, te tēe hebreo un víhyá gā cácuni de cahni de ya. Chi nasūu maá in-ni jeē tu squícu ya jeē cahán ley siquī quivī ndétátú, chi suni jeē ni cáhān yā jeē Tátá yā cúu Yaā Dios, te súcuán sáha inuú yá maá yá jíin Yaā Dios.

Siquī jeē ndiso jniñu Sēhe Yaā Dios

¹⁹ Te ni cahān Jesús:

Jendaá cahán rī jíin ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jito ri sáha Tátá rī. Chi tāca jēe sáha Tátá rī, suni sáha ruhū jeē cúu ri Sēhe ya.

²⁰ Chi maá Tátá rī, manī yā jíin ruhū jeē cúu ri Sēhe ya, te stéén yā nuū rī ndihi jeē sáha ya. Te jéhnu ga jniñu stéén yā vésú jeē ní cuu vijna, jeē naa ni rō coto ró jíináhan ró.

²¹ Te najnūhun jeē nastécu maá Tátá rī ndiyi te cotecu tucu i, suni súcuán ruhū jeē cúu ri Sēhe ya, nastécu rī ndé-ni cúu jeē cuní maá rí.

²² Te maá Tátá rī, tu sándaā yā siquī ni in ñayuu, chi ni jēhe ya jnūhun jeē sándaā maá rí siquī tāca ñayuu, chi Sēhe ya cúu ri.

²³ Te súcuán te coo yíñuhún ndihi ñayuu nuū rī, najnūhun yíñuhún i nuū Tátá rī. Te ñayuu tu íyó yíñuhún núu rī, núu súcuán te suni tu yíñuhún i nuū maá Tátá rī jeē ní tají yá ruhū vēji ri.

²⁴ Jendaá cahán rī jíin ró: Núu in ñayuu chuhun ni i

jnūhun cáhán rī, te candíje i jeē Yaā ndaā cúu Yaā ní tají rúhū vēji ri, ñayuu ún cotecu i ní cáni andiví, te ma jnahnú ndetū i. Chí ma cúu ga i nájñūhun ndīyi, chí sa suhva cotecu i ní cáni.

²⁵ Jendaá cahán rī jín ró jeē quiji quivī, te vijna je ni quejéé, jeē tāca ñayuu cácuu nájñūhun ndīyi, cuni nahín i jnūhun cáhán ruhū, Sēhe Yaā Dios. Te ñayuu cuatáhú, chí cotecu i ní cáni.

²⁶ Chí nájñūhun íyó poder maá Tátá rī jeē sáha ya jeē técu ndihí-ni, suni súcuan ni jēhe ya poder nuū ruhū jeē sáha ri jeē cotecu ndihí-ni.

²⁷ Te suni ni sáha ya jeē ndíso jniñu ri sándaā rī siquī ñayuu, chí cúu ri Yaā ní nduu tēe.

²⁸ Ma náā ni rō cani ni rō siquī jnūhun cáhán rī. Chí quee quivī jeē tāca ndīyi cuni sōho i jnūhun cahán rī,

²⁹ te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i ní cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ Tú na vé cúu sáha ri jeē maá rí. Chí nájñūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chí tu sáha ri jeē cuní maá rí, chí sáha ri jeē cuní maá Tátá rī, Yaā ní tají rúhū vēji ri.

³¹ Núu ruhū cahán rī jeē cúu ri Sēhe Yaā Dios, te cachí

ñayuu jeē tu jéjñiñu jnūhun cáhán rī.

³² Te íyó inga jeē cahán jeē cúu ri Sēhe ya. Te jíní rī jeē jnūhun un jéē cahán yā, chí níhín jniñu.

³³ Máá ró ni catajé ró tēe ni cacajñūhún de Juan. Te Juan chí ndaā ni cahán de jnūhun ri.

³⁴ Te vēsú súcuan te nasūu rúhū cúu jeē jini ñūhún jeē steén ñn tēe jeē Sēhe Yaā Dios cúu ri. Chí máá ró cúu jeē jini ñūhún návāha candíje ró te cācu ró jíjñahan ró. Jeē yúcuan ní cahán rī jeē iyó ndáā jnūhun ri jeē ní nacani Juan.

³⁵ Máá Juan ni cuu de nájñūhun ñn lámpara jeē cayú te cúndijin, cúu jeē ní nacani de jnūhun ri. Te máá ró, jecu-ni quivī ni canujnahan ni rō jeē ni steén de nuū rō.

³⁶ Te íyó jéē steén cají gá jeē cujéhnu ri vēsú jeē ní cahán Juan. Suu jniñu sáha ri, jniñu jeē ní tejñiñu Tátá rī ruhū jeē sáha ri, jniñu un steén ndije jeē maá yá ni tají rúhū vēji ri.

³⁷ Te Tátá rī jeē ní tají yá ruhū vēji ri, suni máá yá cahán nuū tútu ñn jeē cujéhnu ri, vēsú tu ní cájini sōho cuiti rō jeē cahán yā, ni tu ní cájito ró yá.

³⁸ Te tu ní cáchuhun ni rō jnūhun un jéē ní cahán Tátá rī, chí tu cácandíje ró rúhū, Yaā ní tají yá vēji.

³⁹ Cánanducú vii rō tāca jnūhun cáhán tutu ñn, chí cájeni ni rō jeē yúcuan níhín rō jnūhun jeē cótecu rō ní cáni sáha. Te jnūhun siquī maá rí

cúu jeē cahán tutu ún.

⁴⁰ Te vēsú súcuan te tu cáconi rō cuatáhú ró ruhū quivicoo ró ndaha ri návaha cotecu rō ní cáni.

⁴¹ Tu chíhi ri cuenta jnūhun jeē cácahān ñayuu jeē cujéhu ri.

⁴² Chi je jíni rī ndese cándāa ánuá rō jeē tu cáhiyo manī rō jíin Yaā Dios.

⁴³ Ruhū vēji ri jíin jniñu cúní Tatá rī, te tu cájetáhú ró ruhū. Te núu inga tēe quee de jíin jniñu cúní maá de, sa tēe un yáchí cuatáhú ró de.

⁴⁴ ¿Ndeese cuu candíje ró jíjnáhan ró? Chi máni cáconi rō jeē cujéhu ró sáha jnáhan ró, te tu cánducú ró jeē cujéhu ró sáha Yaā Dios, jeē maá ñin-ni ya iyó.

⁴⁵ Ma cáni ni rō jeē cáquin rī cuēchi siquī rō nuū Tatá rī. Chi iyó ñin jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndāa rō jíin ley jeē ní tee de.

⁴⁶ Chi núu ní cáncandíje ró jéé ní tee Moisés, te suni candíje ró rúhū nuú, chi jnūhun máa rí ni tee de.

⁴⁷ Te núu tu cáncandíje ró jnúhun ri jeē ní tee de, ¿te ndese candíje ró jnúhun cáhān maá rí núu súcuan? Achí yá jíin de.

Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias.

² Te yōhyo cuehē ñayuu ni candiquīn i ya, chí ni cajito i

tācá jniñu jéhu jeē steén yā poder yā jeē ní nasávāha ya ñayuu cácuñu.

³ Te ni caa ya ñin yucu, te ni cucōo ya yūcuan jíin tēe cáscuáha jíin yá.

⁴ Te je ni cuyajni vico pas-cua jeē cáncūhun ni jnáhan ñuu yā hebreo jeē ní cacācu i nuū ñáyuu nación Egipto.

⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jíin Felipe:

¿Ndé nuū cuaan yó jéé cáji ñayuu yáha jíjnáhan i?

⁶ Te súcuan ni cahān yā jeē jíto ndee yā de núu ndese cahān de. Chi je jíni maá yá ndese sáha ya.

⁷ Te ni cahān Felipe jíin yá:

Te ni ma cánda uū ciento denario staā, ni vēsú jeē cáji i jecu jecu jíjnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yāha íne ñin sūchi yí jéé ndíso i uhūn staā cebada jíin úu chācá. ¿Te ndé canda cuiti ún, chí ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñáyuu na cúcōo i, áchí yá.

Te yūcuan cáa cuehē ite, te ni cacucōo i, te nájnūhun uhūn mil tēe cúu.

¹¹ Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jíin yá, te maá de ni casaja de nuū ñáyuu ní cacucōo ún. Te suni súcuan ni

sáha ya jíin cháca, te ni cayeji i nasaa cáconi maá i.

¹² Te nuū ní candutú chíji i, te ni cahān yā jíin tée cáscuáha ún:

Nastútú ró tāca pedazo jeē ni ndóo, návāha tu stívi cuiti yō.

¹³ Te ni canastútú de, te ni chitú úxī uū jīca pedazo jeē ni ndóo siquī ndihúhún staā cebada un jeē tuá ni ndíhi caji ñayuu.

¹⁴ Te ñayuu un ní cajito i jniñu jéhnú ni sáha Jesús jeē ni stéén yā poder yā. Te ni cacahān i:

Jendaá ndije jeē tée yáha cúu jeē cahán tutu jeē quíji ini ñayívi jéē nácani jñuhun Yaa Dios. Achí i.

¹⁵ Te ni jini Jesús jeē cáconi i sáfuerza i ya jeē cuu ya rey i núú. Te ni cujiyo tucu máa ñn-ni ya, ni caa ya cuahān yā nuū sucún gá yucu.

*Jeē ní jica jéhé yá nuū mar
(Mt. 14.22-27; Mr. 6.45-52)*

¹⁶ Te nuū cuácuaa, te tēe cáscuáha jíin yá ni nanuu de cuango de nde mar.

¹⁷ Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de.

¹⁸ Yūcuán na te ni jequíhi ñn tachí níhin, te sáha jeē ndónnda ndute mar un.

¹⁹ Te jeē ní cuu nájnūhun uhūn chí íñū kilómetro cájica de jíin barco, te ni cajito de jeē jīca Jesús nuū mar, te ni cuyajni ya vēji ya nuū barco. Te ni cayúhú de.

²⁰ Te máá yá ni cahān yā jíin de:

Máá rí cúu. Ma yūhu ró jíináhan ró.

²¹ Te ni cacusī ni de jeē na quívi ya ini barco. Te ni sáha ya jeē yachī-ni ni jinūcoo-ni de ñuhun íchi núu cuángoo de ún.

Jeē cánanducú ñayuu Jesús

²² Te inga quívi ún, te ñayuu jeē ní caquendōo inga lado mar, ni cajini i jeē tée cáscuáha jíin yá cuango de jíin máñuhún-ni barco ni íne yūcuán, jíin jéē tu ní quívi Jesús quihīn yā jíin de jíináhan de.

²³ Te sava ga barco jeē véjicoo ichi ñūu Tiberias, ni quecoo yajni lugar nuū ní cayeji i staā jeē ní nacuatáhu máá Jítoho yō jehē.

²⁴ Te jeē ní cajito ñayuu un jéē tuá Jesús íne ya yūcuán, ni tēe cáscuáha jíin yá, te ni quívicoo i tāca barco un, te cuango i ñuu Capernaum cuananducú i ya.

Jesús cúu staā jeē cótecu yō ní cáni

²⁵ Te nuū ni jínūcoo i nde inga lado mar, te ni nanihīn jnáhan i jíin Jesús. Te ni caca-jnūhún i ya:

Maestro, ¿na hora ni quee ni yáha?

²⁶ Te ni cahān Jesús:

Jendaá cahán rī jíin ró jeē cánanducú ró ruhū siquī jeē ní cayeji rō nde ni candutú chíji ró, te nasūu síquī jeē ní cajito ró táca jniñu jéhnú jeē steén rī poder rī.

27 Ma cóndihvī ni rō maá síquī jeē caji rō jeē yachī natakīn, chí sa suhva condihvī ni rō síquī jeē nihín rō jeē cótecu rō ní cáni sáha. Te máá rí, Yaā ní nduu tēe, cuáha ri nájñuhun staā jeē cótecu rō ní cáni sáha. Chí Tátá rī Yaā Dios ni jeni ya ruhū jeē sáha ri súcuan. Achí yá jíin i.

28 Yūcuán na te ni cacañuhún i ya:

¿Ndese sáha ná návāha squícu ná jñiñu cúní Yaā Dios?

29 Te ni cahān Jesús:

Jñiñu jeē cuní Yaā Dios cúu jeē candíje ró rúhū, Yaā ní tají yá vēji.

30 Yūcuán na te ni cacahān i:

Núu súcuan ¿te na jñiñu jénu sáha ní coto ná jíjnáhan ná te candíje ná jéē ní tají yá nihín? ¿Na jñiñu cúu jeē sáha ní?

31 Chí tāca jíi yō jenahán ni cayejí de maná jeē ní cuun ichi ándiví ndé nuū ñuhun téhé, nájñuhun yósó nuū tútu: Yaā Dios ni jéhe ya staā ni cuun ichi ándiví, ni cayejí i, achí tutu. Achí i jíin yá.

32 Te ni cahān Jesús:

Jendaá cahán rī jíin ró: Nasūú Moisés ni jéhe staā un núu de jíjnáhan de jeē ní cuun ichi ándiví, chí máá Tátá rī ni jéhe. Te máá yá jéhe staā andiví jéē cótecu rō ní cáni sáha.

33 Chí staā jéhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i ní cáni andiví. Achí yá.

34 Te ni cacahān i jíin yá:

Níní cuáha ni stāā ún caji na núu súcuan.

35 Te ni cahān Jesús:

Máá rí cúu máá stāā jeē cótecu rō ní cáni sáha. Ndé vé quívi ndaha ri, ma cúu cuiti gā sōco. Te ndé vé candíje ruhū, ma jichí cuiti gā.

36 Te nájñuhun je ni cahān rī jíin ró, tu cáncandíje ró rúhū, vēsú ni cajito ró núu rī.

37 Tāca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhú rí tāca jéē cuní quívi ndaha ri, chí ma squéhichí cuiti rī quihín.

38 Chí ni quiji ri ichi ándiví návāha sáha ri jñiñu jeē cuní Yaā ní tají rúhū, te nasūu jéē sáha ri jeē cuní máá rí.

39 Te jñiñu jeē cuní Tátá rī, Yaā ní tají rúhū, cúu jeē ma scuíta ri ni ññ ñáyuu ni jéhe ya nuū rī, chí condito ri i te nastécu rī i quívi jínu ñayiví.

40 Te Yaā ní tají rúhū, cuní yá jeē tāca ñáyuu jeē nihín i jñuhun ruhū, Sēhe Yaā Dios, te candíje i ruhū, cotecu i ní cáni andiví. Chí nastécu rī i quívi jínu ñayiví. Achí yá.

41 Yūcuán na te ni caquejéé jñáhan ñuu yá hebreo cácahān de síquī yá, chí ni cahān yá jeē máá yá cúu staā ní quiji ichi ándiví.

42 Te ni cacahān de:

¿A násūu tée yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quíji de ichi ándiví núu súcuan?

43 Te ni cahān Jesús jíin de:

Ma cahán rō síquī rī jíjnáhan ró.

44 Ni ñn ñayuu ma cúu quiví i ndaha ri núu ma sáha Tátá rī jeē cúu ni i quiví i, chí máá yá ni tají ruhū vēji ri. Te nastécu rī i quiví jínu ñayiví.

45 Te suhva yósó núu tútu ni catee tēe ni canacani jñuhun Yaā Dios: Tācá i chí stéén Yaā Dios nuū i, áchí. Núu súcuan te tāca ñáyuu jini sōho jñuhun cáhán Tátá rī, te jétáhú i jeē steén yā nuū i, ñayuu ún chí quivícoo i ndaha ri.

46 Te tu ní jito ni ñn ñayuu nuū maá Tátá rī. Chí máñuhún-ni ruhū ni jito ri nuū yā, chí nde nuū maá yá vēji ri.

47 Jendaá cahán rī jín ró jijnáhan ró jéē ñayuu jeē candíje i jeē jnáma ri i, máá i cotecu i ní cáni.

48 Máá rí cúu staā jeē cótecu rō ní cáni sáha.

49 Tāca jí rō jenahán, ni cayejí de staā maná jeē ní cuun ichi ándiví ndé nuū ñuhun téhé, te tu ní sáha jeē cótecu de ní cáni andiví.

50 Te staā jeē cahán rī jeē véji ichi ándiví, chí na-ni ñayuu caji, te cotecu i ní cáni andiví.

51 Te suu máá rí cúu staā un jéé ní quiji ichi ándiví jéé sáha jeē cótecu rō ní cáni. Te ñayuu jeē cáji staā yáha, cotecu i ní cáni andiví. Te staā jeē cuáha ri un cúu yiqui cúñu rī, te cuáha ri návāha ñayuu ñayiví cotecu i ní cáni andiví. Achí yá.

52 Yūcuán na te jnáhan ñuu yā hebreo ni cacahán de jín táca jnáhan de:

¿Ndese cuu cuáha tēe yáha yiqui cúñu de caji yō? achí de.

53 Te ni cahán Jesús jín de:

Jendaá cahán rī jín ró: Núu tú candíje ró jéé yiqui cúñu ruhū, Yaā ní nduu tēe, cúu nájnūhun staā, te ññī rī cúu nájnūhun ndute, núu súcuan te ma cótecu rō ní cáni andiví.

54 Chí ñayuu cáncandíje jeē yiqui cúñu rī cúu nájnūhun staā te ññī rī cúu nájnūhun ndute, máá i cotecu i ní cáni. Te nastécu rī i quiví jínu ñayiví.

55 Chí yiqui cúñu rī jín níñī rī cúu ndíje jeē sáha jeē cótecu i ní cáni.

56 Te ñayuu cáncandíje jeē yiqui cúñu rī jín níñī rī cúu nájnūhun staā jín ndute jeē cótecu i ní cáni sáha, máá i ní ní ndúú i jín rí, te ndúú rí jín i.

57 Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñayuu cáncandíje jeē cúu ri nájnūhun staā i ndute i, suni súcuan cotecu i ní cáni sáha ri.

58 Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayejí tāca jí rō jenahán, chí tu ní sáha jeē cótecu de ní cáni. Te staā jeē cahán rī, chí ñayuu caji, cotecu i ní cáni sáha, áchí yá.

59 Tāca jñuhun yáha ní steén Jesús nuū ñáyuu ní candutútú ini vehe i sinagoga ñuu Capernaum.

Jñuhun cotecu yō ní cáni

60 Te cuehē ñayuu cascuáha jín yá, ni cajini sōho i jñuhun yáha jéé ní steén yā. Te ni cacahán máá i:

Yōhyo yí jñuhun cáhán yá yáhá. ¿Ndese cuu cuatáhú yó?

61 Te ni jini Jesús jeē cácahān i jeē yí cū jnūhun yāhá, te ni cahān yā jín i:

¿A yí sáha jnūhun yáha jín ró jijnáhan ró?

62 ¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee rī xīhna ñúhún?

63 Máá ánuá ñayuu cū jeē sáha jeē técu i. Chi yiqui cúñu i tu jéjníñu cuiti súcuan. Te táca jnūhun ni cahān rī jín ró cūu jeē quéndōo vāha ánuá rō, te cotecu rō ní cáni sáha.

64 Te sava ró chi tu cácaandíje ró. Achí yá.

Chi nde xīhna ñúhún je jín Jesús ndé-ni cūu ñayuu jeē ma cándíje, jín ndé ñn de cūu jeē nastúu de ya.

65 Te ni cahān gā yā:

Jeē yúcuan ní cahān rī jín ró jeē ma cūu quívi ni ñn ñayuu ndaha ri, te núu tu sáha Tátá rī jeē cūu ni i quívi i, áchí yá.

66 Te nde quívi ún te cuehē ñayuu cascuáha jín yá, ni castóo i ya, te tuá ni cájica i jín yá.

67 Yūcuán na te ni cahān yā jín máá ndihúxí uū tēe cáscuáha jín yá:

¿A suni cácuni máá ró quingoo ró, chí naún?

68 Te ni cahān Simón Pedro:

¿Ndé núu gā quingoo ná? Chi máá ní cūu jeē nácani jnūhun jeē cótecu na ní cáni sáha.

69 Te ni cacandíje ná te cájini na jéē máá ní cūu Cristo, Sēhe Yaā Dios, Yaā técu, achí de.

70 Te ni cahān Jesús:

Te vésú ni nacāji ri ndihúxí uū rō, te íyó ñn ró jeē ní quívi jexeén ini. Achí yá.

71 Te súcuan ni cahān yā siquí Judas Iscariote, sēhe Simón. Chi máá de nastúu de ya, vésú ñn jnāhan jeē uxí uū tēe cáscuáha jín yá cūu de.

Jeē tu ní cácaandíje ñani Jesús

7

1 Yūcuán na te jíca cuu Jesús región Galilea. Chi tu cúní yā caca cuu ya región Judea, chi jnāhan ñuu yā hebreo jeē cáyūcu yúcuan, cácuni de cahni de ya.

2 Te cuacuyajni vico jeē casáha ñayuu yā hebreo vehe ramadá, cáyūcú i chíji.

3 Te ñani yā ni cacahān de jín yá:

¿Naun máá yáha-ni íne ró? ¿Naun tú quihín rō región Judea, návāha tēe yūcuan jéē cácaandíje de róhó, suni coto de jniñu jéhnu sáha ró.

4 Chi núu cúní ñn tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéhnu, vāha ga na sáha ró jéē cūni ndivii ñayuu.

5 Súcuan ni cacahān ñani yā jín yá, chí ni máá de tu cácaandíje de ya.

6 Yūcuán na te ni cahān Jesús:

Ná tu quee maá quívi jeē quihín rī. Te máá ró jijnáhan ró chí na-ni quívi-ni te cuu quingoo ró.

7 Chi ma quití ni ñayuu ñayívi núu rō, te máá rí chí quítí ni i jító i ruhū, chí cáhán

rī jeē jíní rī jeē máni jniñu néé cásáha i.

⁸ Cuángoo máá ró vico ún. Te máá rí chi ma quihín rī vijna, chi ná tu quee maá quívī cánuú quihín rī. Achí yá.

⁹ Súcuan ni cahān yā jnūhun yáha jíin de, te ni quendōo ya Galilea.

Jeē ni jéhēn Jesús vico vehe ramadá

¹⁰ Te nuū ni yáha ñani yā cuangoo de vico ún, te sáá te suni cuahān maá yá. Te tú cuahān ndijin yā, chi tu ní stéén yā maá yá.

¹¹ Te jnáhan ñuu yā hebreo cánanducú i ya nuū víco ún, te cacahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chi sava i cacahān: Tēe vāha cúu de. Te sava ga i cacahān: Tuú chi stáhú de ñayuu.

¹³ Te yuhu-ni ni cacahān i jnūhun ya, chi cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quívī ya templo cáhnu, te ni quejéé yá steén yā jnūhun.

¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíni tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéén rī chi nasūu jnūhun máá rí cúu, chi jnūhun jeē ni jéhe máá Yaā ní tají ruhū cúu.

¹⁷ Núu ñn ñayuu cuní i sáha i jniñu cuní Yaā Dios, ñayuu ún

chi jecūhun ni i núu nde nuū Yaā Dios vēji jnūhun stéén rī, chí jnūhun jeē jéni ni maá-ni rí cúu.

¹⁸ Tēe cáhán jnūhun jéni ni maá de, tēe un ndúcú de jeē na sájéhnu ñayuu de. Te núu ñn tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú iyó jíin de.

¹⁹ ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chi sa jeē cécuni rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachí ndóho ró. ¿Ndé ñn cuní cahni rohó?

²¹ Te ni cahān Jesús:

Ni nasávāha rí ñn tēe quívī ndétátú, te ndivii rō ni canaa ni rō ni cajito ró jéē quíví ndétátú ni sáha rí jniñu ún.

²² Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yí núu uná quívī jeē ní cacu i, vésú quívī ndétātu cúu. (Te nasūu máá Moisés ní jéquin ley un, chi je ni iyo nuū tāca jíi de.)

²³ Núu súcuan te núu cásáha ró circuncidar vésú quívī ndétātu cúu, návāha squícu ró ley Moisés, ¿te najehē cáquití ní rō jeē ní nasávāha ndihí rí ñn tēe quívī ndétátú?

²⁴ Ma yachí cani ni rō jeē cuéchi cúu jeē sáha rí. Chi sa cani vāha ni rō siquī tēcá jniñu vāha. Achí yá.

Jeē ní cachi Jesús ndé nuū véji ya

25 Yūcuán na te sava ñayuu ñuu Jerusalén ni cacajñuhun jñáhan i:

¿A násūu tēe yáha cúu jeē cánanducú tēe cácujuhnu jeē cáhni de, chí naún?

26 Te yáha cáhán ndijin de nuū chitú, te tú na jñuhun cácahán jín de. ¿A sanaa te ni cacundaā ni tēe cácujuhnu jeē tēe yáha cúu Cristo jeē achí tutu jeē quiji, chí naún?

27 Te tuú chi je cájini yō nuū vēji tēe yáha. Te jeē quíji Cristo, chi ni ñn yó má cūni ndé chi quíji ya. Achí i.

28 Yūcuán na te ni cahān jee Jesús jeē steén yā jñuhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máa Yaā ndaā cúu jeē ní tají rúhū vēji ri, te tú vēji ri jeē cuní maá rí. Te tu cájini rō ndese Yaā cúu ya.

29 Te máa rí chí jíní rī yā, chí nde nuū maá yá vēji ri, te máa yá ni tají rúhū, achí yá.

30 Yūcuán na te ni canducú de jñá de ya. Te ni ñn de tu ní cúu jñá de ya, chí ná tu quee maá quívī jeē jñá de ya.

31 Te cuehē ñayuu chi ni candíje i ya, te ni cacahān i:

¿A násūu tēe yáha cúu Cristo, Yaā ndétu yó jēe quiji? Chi cuehē ndasí jniñu jéhu sáha ya jeē steén yā poder yā. Achí i.

Jeē ní catají de policia jeē jñá de Jesús

32 Te ni cajini tēe fariseo jeē súcuan cácahán ñayuu jñuhun ya. Te máa de jín sūtū

cácujuhnu, ni catají de policia cándito templo jeē jñá de ya.

33 Te ni cahān Jesús:

Jecu na quívī condee rī jín ró jijnáhan ró. Yūcuán na te nuhun rī nuū Yaā ní tají rúhū vēji ri.

34 Te nanducú ró ruhū, te ma nánihīn rō ruhū. Chi ma cúu jinūcoo ró núū cóndee rī. Achí yá.

35 Yūcuán na te máa tēe un ní cacajñuhun jñáhan de:

¿Te ndé nuū quihín tēe yáha jeē ma nánihīn yō de? ¿A quihín de nuū jñáhan yó hebreo jeē ní cajitē núu cáyūcu ndé nación Grecia? ¿Te á steén de jñuhun nuū ñayuu Grecia, chí naún?

36 ¿Te na jñuhun cúu jeē ní cáhán de jín yó jeē nanducú yó de te ma nánihīn yō de, chí ma cúu jinūcoo yó núū cóndee de? Achí tēe un jijnáhan de.

Siquí ndute jeē cótecu yō ní cáni sáha

37 Te quívī sándihí vico ún te cúu vico cáhnu ga. Te quívī un ní ndocuiñi Jesús, te ni cahān jee ya:

Núu ndé ñayuu jnáa ndasí i tāca jēe váha jeē sáha ri jehē i, nájñuhun jeē jichí i ndute, núu súcuan te na quívī i ndaha ri te coho i ndute, cúu jeē nihín i jeē váha ún.

38 Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájñuhun yūte cáne ñuhún jeē sáha ya jeē cótecu i ní cáni, nájñuhun cáhán tutu i. Achí yá.

39 Te súcuan ni cahān yā jeē ñayuu candíje jeē jnáma ya i, nihīn i Espíritu Santo. Chi ná tu quee Espíritu ún, chi ná tu ndaa Jesús quinhun yā nuū ndujéhnua ya.

Jeē ní cacusññ ñayuu siquī yā

40 Te sava ñayuu cuehē ún, ná ni cajini sōho i jñūhun yáha, te ni cacahān i:

Jendaá jeē tée yáha cúu jeē achí tutu jeē quiji de nacani de jñūhun Yaā Dios, achí i.

41 Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasūú Galilea quiji Cristo.

42 Chi cáhán tutu ñi jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

43 Te súcuan te ni cacusññ ñayuu jeē siquī yā.

44 Te sava i cácuni i jññ i ya, te ni ññ i tu ní jññ i ya.

Jeē tu ní cá candíje tée cácujehnua

45 Yūcuán na te policia cándito templo tu ní cájnñi de Jesús, te cuanungoo de nuū taca tée fariseo jññ nuū sutú cácujehnua. Te tée ún ni cacajnñhún de policia:

¿Najehē tu ní quécoo ró jññ de? achí.

46 Te ni cacahān policia un:

Tú cuiti ni ññ tée cáhán váha ndasí nájññhun cáhán tée yúcuan, achí.

47 Te ni cacahān tée fariseo:

¿Te á suni nde máá ró jññhan ró ní stáhú de naún?

48 Ni ññ jññhan ruhū tée cácujehnua jññ tée fariseo, tu cá candíje ri jññhun cáhán tée ún, ¿te naun cá candíje máá ró?

49 Te ñayuu cuehē yáha jeē tu cájecūhun ni i ley Moisés, chi jnahnū ndetū i jeē cá candíje i tée ún, achí de jññhan de.

50 Te ni cahān Nicodemo, tée ni jéhēn nuū yā ññ jecuáa, te suni ññ tée fariseo cúu de:

51 Cáhán ley yō jeē ma cúu tee yó cuéchi siquī ññ tée, te núu tú xīhna gā cuni sōho yó ndese cáhán de, návaha cucáhnua ni yō na cuéchi ni sáha de. Achí de.

52 Te ni cacahān jññ de:

Te róhó, ¿á suni nde Galilea véji ró jéé cahán rō jehē tée ún? Nanducú váha ró nuū tutu ññ te cuni ró jeē ndé Galilea tu quénda cuiti ni ññ tée nacani jññhun Yaā Dios. Achí jññ de.

53 Te cuanungoo de ná vehe ná vehe de.

Jññhun ññhan ní casiquí ndéé jññhan

8

1 Te ni caa Jesús cuahān yā yucu Olivos.

2 Te jeē cuácundijin inga quiví, te ni ndee tucu ya templo. Te ndihí ñayuu ni quecoo i nuū yā. Te ni cucōo ya, te ni steén yā jññhun nuū i.

3 Yūcuán na te tée cástéén tutu ley Yaā Dios jññ tée grupo fariseo, ni quecoo de jññ ññ ññhan jeē ní canihñ de ña jeē casiquí ndéé ña. Te ni cajeni de ña mēhñú.

4 Te ni cacahān de jín yá:

Maestro, ni canihīn ná ñahan yáha jéē casiquí ndéē ña.

5 Te ley Moisés ndácu jniñu nuū yō jeē cuáha yó yūū xinī ñahan cásáha súcuan návāha cuu ña. Te máá ní, ¿ndese cáhán ni?

6 Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi ya, te ni tee ya nuū ñūhun jín xinī ndáha ya.

7 Te jeē cácajnūhun cácajnūhún de ya, te ni ndonehen ya maá yá, te ni cahán yā jín de:

Núu ndé ñn máá ró tú na cuēchi ró, te xīhna gā maá ró cuáha yuū xinī ña núu súcuan, áchí yá.

8 Te ni jīta ndeyi tucu ya, te ni tee tucu ya nuū ñūhun.

9 Te nuū ní cajini de jeē súcuan ni cahán yā, te ni cacajcūhun ni de jeē suni cáhīyo cuēchi de. Te ná ñn ná ñn de ni quendacoo de cuahān de, xīhna gā tēe jéhnū ga te nde nuū ní ndihí na. Te ni ndōo máá ñn na Jesús jín ñahan índichi mēhñú un.

10 Te ni ndonehen tucu ya maá yá, te tuá ni ñn tēe un ní jīto ya, chi máá na ñahan ún. Te ni cahán yā jín ña:

¿Ndé chi cuángoo tēe cájequin cuēchi siquī rō? ¿A tú ni ñn de ní ndónda cahán gā cuēchi siquī rō?

11 Te ni cahán ña:

Tú ni ñn de, áchí ña.

Yūcuán na te ni cahán Jesús jín ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

12 Te ñnga jín ni cahán Jesús jín ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yā Dios. Ñayuu candíje ruhū chi ma cáca i nájnūhun nuū néē, chi sa suhva conevāha i luz ini anuá i jeē sáha jeē cótecu i ní cáni.

13 Yūcuán na te ni cacahān tēe fariseo jín yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

14 Te ni cahán Jesús jín de jijnáhan de:

Vēsú cáhán rī jehē maá rí, te íyó ndáa jnūhun cáhán rī. Chi jíní rī ndé nuū véji rí jín ndé nuū quihín rī. Te róhó tu cájini rō ndé nuū véji rí ni ndé nuū quihín rī.

15 Máá ró chi cuenta ñayuu ñayiví cásandaā rō siquī jnūhun cáhán rī. Te ruhū chi tu sándaā mañúhún rí siquī ni ñn ñayuu.

16 Te núu sándaā rī siquī i, te ndaā sáha rí, chi tu sáha máñúhún rí, chi sándaā rī nde jín máá Tátá rī, Yā ní tají rúhū véji rí.

17 Te yósó núu tútu ley cánevāha ró jéē núu inuū cácahān uū testigo, te jíní ñúhún cuatáhú ró jeē cácahān, chi íyó ndáa jnūhun ún.

18 Núu súcuan te ruhū cúu ñn jeē cahán ndaā rī jehē rī.

Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

¹⁹ Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī.

Te núu jeē cájini rō ruhū, suni cuni rō Tátá rī nuū.

²⁰ Tāca jnúhun yáha ní cahān Jesús jeē steén yā ini templo nuū cáyūcu yéjñū jeē cásocō i xūhún. Te tú ni ñn de ní jñí de ya, chí ná tu quee máá quívī jeē jñí de ya.

Jeē ni cahān yā jeē ma cúu jinūcoo de nuū cóndee yā

²¹ Te ni cahān tucu Jesús jíin de:

Ruhū chí quihīn rī, te nanducú ró rúhū, te ma nánihīn rō ruhū, chí quendōo cuēchi ró siquī rō quívī cúu rō. Te jeē yúcuán má cúu jinūcoo ró núu quihín rī, achí yá.

²² Yūcuán na te tēe hebreo un ní cacahān máá de:

¿A cahni tēe yáha máá de, te jeē yúcuán cahán de jeē ma cúu jinūcoo yó núu quihín de, chí naún? Achí de.

²³ Te ni cahān yā:

Máá ró jijnáhan ró chí ñayīvi yáha véjicoo ró, te ruhū chí nde andiví véji rī. Máá ró cácuu ñayuu ñayīvi yáha, te ruhū chí nasūu tēe ñayīvi yáha cúu rī.

²⁴ Jeē yúcuán ní cahān rī jeē quendōo cuēchi ró siquī rō quívī cúu rō. Chí núu ma candíje ró jéē máá rí cúu Cristo, te quendōo nahín cuēchi ró siquī rō quívī cúu rō. Achí yá.

²⁵ Te ni cacajñuhún de ya:

Núu súcuán ¿te ndé ñn cúu ró?

Te ni cahān yā:

Je ni cachi ri nuū rō nde xīhna ñuhún ndé ñn cúu rī.

²⁶ Te íyó cuéhē gā jñūhun cuu cahān rī jíin ró te sándaā rī siquī rō. Te ma cahán rī, chí ini ñayīvi yáha cahán rī maá-ni jñūhun jeē ní jini ri ni cahān Yaā ní tají rúhū véji rī. Te máni jñūhun ndaā cahán yā. Achí yá.

²⁷ Te tu ní cájecūhun ni de jeē cahán yā jñūhun Tátá yā andiví jíin de.

²⁸ Jeē yúcuán ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñn cúu rī. Te cuni rō jeē tú na vé sáha ri jeē máá rí, chí cahán rī maá-ni jñūhun ni steén Tátá rī nuū rī.

²⁹ Chí máá Tátá rī, Yaā ní tají rúhū, ndeé yá jíin rí. Te tu stóo máñuhún yá ruhū, chí níní sáha ri jniñu jeē núnjahan ni máá yá. Achí yá.

³⁰ Te jeē ni cahān yā jñūhun yáha, te cuéhē ñayuu ni candíje i ya.

Siquī ndé-ni cúu sēhe Yaā Dios jíin sēhe jexeén

³¹ Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi nihin ró jíin jnúhun stéén rī nuū rō, te cuu ndije ró ñayuu scuáha jíin rí.

³² Te jecūhun ni rō jñūhun ndaā, te jñūhun ndaā un sáha jeē nduu libre rō nuū jeē yíhi ró ndaha.

³³ Te ni cacahān i jíin yá:

Sēhe yucūn Abraham cácuu ri, te tu cáyihī cuiti rī ndaha ni iin. ¿Te ndese cúu jeē cahán rō jeē nduu libre rī núu súcuan?

34 Te ni cahán Jesús:

Jendaá cahán rī jíin ró jeē tāca ñáyuu casáha cuēchi, tu íyó libre i, chi yíhi i chīji cuēchi jeē jejniñu cāhá i nuū.

35 Te ñayuu jejniñu cāhá, chi tu cúu i iin jnáhan ñayuu vehe nuū jejniñu i. Te iin sēhe chi sa suhva cúu ndije i jnáhan ñayuu vehe ún.

36 Núu súcuan te máá rí jeē cúu Sēhe Yaā Dios, núu sáha rí jeē tuá cuajniñu cāhá ró nuū cuēchi, núu súcuan te nduu libre ndije ró jíjnáhan ró, te cuu ró séhe ya.

37 Te jíni rī jeē séhe yucūn Abraham cácuu ró, te vēsú súcuan te cácuni rō cahni rō ruhū, chi tu cájetáhú ró jnūhun cáhán rī.

38 Ruhū chi cáhán rī jnūhun jeē ni stéen Tatá rī nuū rī. Te máá ró chi casáha ró jniñu jeē ni cahán tatá máá ró jíjnáhan ró. Achí yá.

39 Te ni cacahān i:

Sēhe yucūn Abraham cácuu ri.

Te ni cahán Jesús:

Núu jeē candíje ró nájnūhun ni candíje Abraham návāha cuu ndije ró yúcūn de, yūcuán na te jniñu váha ni sáha de suni sáha máá ró nuū.

40 Te vijna chi cácuni rō cahni rō ruhū, vēsú ni cahán rī jíin ró tāca jnúhun ndaā ni steén Tatá rī nuū rī. Te Abraham chi tu ní sáha cuiti de súcuan.

41 Máá ró chi inuú casáha ró jíin tatá máá ró. Achí yá jíin i.

Yūcuán na te ni cacahān i:

Máá rí chi tu cácuu ri sēhe ndáhú jēē tu tátá. Chi íyó iin-ni tátá rī, te Yaā Dios cúu ya.

42 Te ni cahán Jesús:

Núu Yaā Dios cúu ndije tátá rō, te coo manī rō jíin rí nuú. Chi nde nuū Yaā Dios ni quenda ri vēji ri. Te tú vēji ri jeē cuní máá rí, chi máá yá ni tají rúhū.

43 ¿Te najehē tu cájecūhun ni rō jnūhun cáhán rī núu súcuan? Suu siquī jeē tu cácuni rō chusóhó ró jnúhun nácani ri.

44 Máá ró jíjnáhan ró chi tátá rō cúu jexeén. Te cácuni rō sáha ró máá jēē cuní tátá rō ún. Máá jexeén ni jehni ndīyi nde jeē xíhna ñúhún. Te tu ní iin cuiti jíin jnúhun ndaā, te tú cuiti na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní squéjéé ndihi jnūhun stáhú.

45 Te ruhū chi cáhán rī jnūhun ndaā, te jeē yúcuan cúu jeē tu cácandíje ró rúhū.

46 Te ni iin ró ma nihín rō cuēchi siquī rī, chi tú cuiti na cuēchi ri. Te máni jnūhun ndaā cahán rī, ¿te naun tu cácandíje ró rúhū?

47 Ñayuu cácuu sēhe Yaā Dios, chi cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cácuni rō chusóhó ró. Achí yá jíin de.

Iyó Jesús nde ná tu coo Abraham

48 Yūcuán na te ni cacahān jnāhan ñuu yā hebreo un:

Ndaā cácahān rī jeē canéé ró nájñuhun ñayuu Samaria, te ñuhun tachī ini rō.

49 Te ni cahān Jesús:

Tu ñuhun tachī ini rī, chí yíñúhún rí jíin Tátá rī. Te máá ró jíināhan ró chí tu cáhīyo yíñúhún ró jíin rí.

50 Máá rí tu ndúcú rí jeē kujéhnú rī. Iyó ñin jeē sáha jeē kujéhnú rī, te máá yá sándaā síquī jñuhun cácahān rō.

51 Jendaá cahán rī jíin ró, núu ndé ñayuu squícu jñuhun cáhán rī, ma cúu cuíti i. Achí yá.

52 Te tēe hebreo un tu ní cájecūhun ní de, te ni cacahān de:

Vijna te ni cacucáhnu ni rī jeē ñuhun ndije tachī ini rō. Chí Abraham jíin táca tēe ni canacani jñuhun Yaā Dios nde jenahán, ni cajihī de. Te rōhó cáhán rō, núu ndé vé squícu jñuhun cáhán rō, te ma cúu cuíti i, achí ró.

53 ¿Te chí jéhnú ga rō vēsú jíi yō Abraham naún? Chí ni jihī de, te suni ni cajihī táca tēe ni canacani jñuhun ya. ¿Te ndé ñin ga sáha ró máá ró núu súcuan? Achí de.

54 Te ni cahān Jesús:

Núu ruhū sajehnú rī maá rí, te tu níhín jñíñu. Máá Tátá rī cúu jeē sajehnú ruhū. Te cácahān rō jeē maá yá cúu Yaā Dios maá ró.

55 Te vēsú súcuan te tu cájini rō ndese Yaā cúu ya. Te ruhū chí jíiní rī yā. Te núu cahān rī jeē tu jíiní rī yā, te cuu rī tēe stáhú nájñuhun máá ró jíināhan ró. Te tuú chí jíiní ndije

rī yā, te squícu rī jñuhun cáhán yā.

56 Te jíi rō Abraham ni cusíñ ni de jeē coto de quiví quéē rī. Te je ni jito de, te ni jito rī jeē ní cusíñ ndasí ni de. Achí yá.

57 Yūcuán na te ni cacahān tēe hebreo un jíin yá:

Ni ná tu coo ró uū xico uxí cuiyā, ¿te ndese cúu jeē cahán rō jeē ní jito ró núu Abraham? achí de.

58 Te ni cahān Jesús:

Jendaá cahán rī jíin ró jeē nde ná tu cacu Abraham te je iyó rí, achí yá.

59 Yūcuán na te ni caquihin de yuū jeē cuáha de xinī yā. Te Jesús chí ni quenda sāhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñin tēe ni cacu cuáá

9

1 Te jeē jíca Jesús cuahān yā, te ni jito ya nuū ñin tēe ni cacu cuáá.

2 Te tēe cáscuáha jíin yá ni cacajñuhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

3 Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jñíñu jéhnú sáha Yaā Dios jíin de.

4 Níní jéē cúu nájñuhun nduú ini ñayiví, te cánuú sáha rī jñíñu Yaā ní tají rúhū. Chí quee tiempo jeē coo nájñuhun jecuáa, jeē tuá cuu sájñíñu ni ñin.

⁵ Níní jéē iyó rí ini ñayīví te cúu ri luz jeē cúndijin ini anuá ñayuu ñayīví, návāha jecūhun ni i siquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ñúhun, te ni sáha ya ndehyū jín tésīhi yá un, te ni tee ya siquī tīnūu tée cuáá un.

⁷ Te ni cahān yā jín de:

Cuáhán núu pila Siloé te nacate ró tīnūu ró, achí yá. Te jnūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tīnūú de, te ni ndundijin-ni, te ni nandicó de vēji de.

⁸ Yūcuán na te ñayuu yúcu yajni jín de, jín ñayuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yāhá te jícán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cuní coto de.

Te máá de chi ni cahān de:

Suu ri cúu.

¹⁰ Yūcuán na te ni cacajnūhún i de:

¿Te ndese cúu jeē ní nanune tīnūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tīnūu rí, te ni cahān de jín rí: Cuáhán núu pila Siloé te nacate ró tīnūu ró. Te ni jehēn rī, te ni nacate ri, te ni nanune-ni tīnūu rí, achí de.

¹² Yūcuán na te ni cacajnūhún i de:

¿Ndé nuū íne tēe ún? áchí i.

Tu jíní rī, achí de.

Jeē ní castíchí tēe fariseo tēe ni cacu cuáá

¹³ Yūcuán na te ni cajendeca i tēe ni iyo cuáá un núu tēe grupo fariseo.

¹⁴ Te quivī ndétātu cúu jeē ni sáha Jesús ndehyū jeē ní nanune ya tīnūú de.

¹⁵ Te tēe fariseo un ní cacajnūhún tucu de tēe ún ndese ni nanune tīnūú de. Te ni cahān de:

Ni tee de ndehyū siquī tīnūu ná, te ni nacate ná, te ni ndundijin-ni tīnūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu nēe íi de quivī ndétātu.

Te sava ga de chi ni cacahān:

¿Ndese cuu sáha tēe un táca jniñu jéhu yáha te núu tēe íyo cuéchi cúu de?

Te ni cacusín de siquī yā.

¹⁷ Te ni cacajnūhún tucu de tēe ni iyo cuáá un:

Róhó, ¿ndese cáhán rō siquī tēe ni nanune tīnūu ró núu súcuan?

Te máá de ni cahān de:

Ín tēe nácani jnūhun Yaā Dios cúu de, achí de.

¹⁸ Te tēe hebreo un chi tu ní cá candíje de jeē ní iyo cuáá tēe ún te ni ndundijin tīnūú de. Te ni cacana xinī tatá de náná de.

¹⁹ Te ni cacajnūhún de:

¿A yáha cúu sēhe ro jéē ní cacu cuáá cácahān rō? Núu súcuan ¿te ndese ni ndundijin tīnūú de vijna? áchí.

²⁰ Te ni cacahān tatá de náná de:

Suu sēhe ri cúu tēe yáha jéē ní cacu cuáá.

21 Te tu cájini rī ndese ni ndundijin tinūú de vijna, ni tu cájini rī ndé tée ni nanune tinūú de. Cajnūhun ró maá de, chi je jéhnú de, te na cáchi máá de.

22 Súcuan ni cacahān tatá de náná de, chí cáyūhú de cájito de jnāhan de tēe hebreo. Chi je ni casándaā tēe un jēe núu ndé ñáyuu cachí i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quīvi i ini vehe iī sinagoga.

23 Jeē yúcuan ní cacahān tatá de náná de: Cajnūhun ró maá de, chi je jéhnú de.

24 Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachí cají ró nuū rī, jito jíinúu Yaā Dios. Chí cájini rī jeē tēe íyó cuéchi cúu tēe ni nanune tinūu ró.

25 Yūcuán na te ni cahān de: Tu jíiní na núu íyó cuéchi de, chí naún. Te íyó ñn jeē jíiní ná, cúu jeē tēe cuáá ní cuu ná, te vijna chí ni ndundijin tinūu ná. Achí de.

26 Te ni cacajnūhún tucu de: ¿Ndese ni sáha de jíin ró? ¿Ndese ni nanune de tinūu ró núu súcuan?

27 Te ni cahān de: Je ni cuu ni castūhun ná nuū ní, te tu ní cácu ni ní cuatáhú ní. ¿Te najehē cácu ni ní jēe cáchi tucu ná núu ní? ¿Te chí suni cácu ni ní jijnāhan ní candíje ní yá naún?

28 Yūcuán na te ni cacahān neé jíin de, te achí:

Máá ró chí cándíje ró tēe ún, te máá rí chí cácuandíje rí Moisés.

29 Te cájini rī jeē ni cáhān Yaā Dios jíin Moisés. Te tēe yúcuan, ni tu cájini rī ndé nuū véji de.

30 Te ni cahān tēe ni iyo cuáá:

Nāā ni na jēe cácuahān ni jēe tu cájini ní jeē véji de nuū Yaā Dios, vēsú ni nanune de tinūu ná.

31 Te cájini yō jeē Yaā Dios tu jíiní nahín yá jeē cájicān ñayuu iyó cuéchi. Chí jíiní nahín yá nuū maá-ni ñayuu jeē cáchiñúhún i ya te casáha i jeē cuní yā.

32 Te ñí véji yó te tu ní jíiní sōho cuítí yō jeē ñn tēe nanune de tinūú inga tēe ni cacu cuáá.

33 Te núu nasūu ndé nuū Yaā Dios vēji tēe ún, te ma cúu cuítí sáha de ñn jniñu súcuan. Achí de.

34 Te ni cacahān tēe hebreo un:

Róhó chí íyó ndasí cuéchi ró ndé quīvi ní cacu ró, ¿te á máá ró steén nuū rī naún? achí.

Te ni caquenehen tēe un yátā vehe iī sinagoga.

Siquī ñayuu cáhīyo cuáá ánuá

35 Te ni jíiní jnūhun Jesús jeē ní caquenehen de tēe ún. Te ni nihīn jnāhan ya jíin de, te ni cahān yā jíin de:

¿A cándíje ró Séhe Yaā Dios?

36 Te ni cahān de: ¿Ndé ñn cúu ya návāha candíje ná yá?

37 Te ni cahān Jesús: Je ni jito ró núu yā, te suu cúu ruhū jeē cahān jíin ró, achí yá.

38 Yūcuán na te ni jecuiñí yití de nuū yā, te ni cahān de:

Cándije ná jēē nihín cúu Ji-toho ná.

³⁹ Te ni cahān Jesús:

Vēji ri ini ñayīvi yáha jēē sándaā rī siquī ñáyuu. Chi ñáyuu jeē nájñūhun cácuáá ánuá, ndundijin ini anuá i jeē jécūhun ni i siquī rī. Te ñáyuu jeē jéni ni i jeē cájecūhun ni i, nájñūhun nducuáá ánuá i. Achí yá.

⁴⁰ Te sava tēe fariseo jeē cáhīn jīn yá, ná ni cajini de jñūhun yáha, te ni cacahān de jīn yá:

¿Te chí jéni ni rō jeē suni tēe tu cájecūhun ni cácuu máá rí naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuēchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuan condee cuēchi siquī rō.

Jñūhun yátá siquī lanchi

10

¹ Jendaá cahán rī jīn ró, núu yīhi lanchi ini corral cánevāha cáhnu ñáyuu, te núu ndé tēe tu quívī de ichi yéhyí corral un, chi sa suhva inga lado cáa de quívī de, tēe un cúu ñacuīhná, chi vēji jeē sacuíhná.

² Te tēe quívī ichi yéhyí, chi tēe un cúu pastor ndíto lanchi.

³ Te tēe ndíto yéhyí, núne de te quívī tēe ún. Te lanchi de cánacuni tī tachī de. Te cána de síhvī lanchi máá de, te táva de tī.

⁴ Te núu ni tava de ndihi lanchi máá de, te yósnúu de nuū tī cuahān de. Te lanchi

un cándiquīn tī de, chi nácuni tī tachī de.

⁵ Te ma cóndiquīn tī yatā inga tēe, chi sa suhva cunu tī coto tī de, chi nácuni tī jeē nasūu jítoho tī cúu.

⁶ Jñūhun yátá yáha ní cahān Jesús jīn ñáyuu, te tu ní cájecūhun ni i na jñūhun cúu jeē ni cáhān yā.

Jesús cúu máá pastor vāha

⁷ Yūcuán na te ni cahān gā Jesús jīn i:

Jendaá cahán rī jīn ró: Máá rí cúu nájñūhun yéhyí corral nuū quívīcoo ñáyuu cácuu nájñūhun lanchi rī.

⁸ Tāca tēe jeē tu ní tájí Yāā Dios, jeē ní quijicoo de nde ná tu quee rī, cácuu de nájñūhun ñacuīhná, chi tu ní cástéén de jñūhun ndaā. Te ñáyuu cácuu nájñūhun lanchi rī, tu ní cájetáhú i de.

⁹ Máá rí cúu nájñūhun yéhyí. Te ñáyuu jeē jīn máá rí quívīcoo, jnama rī i. Te cuu i nájñūhun lanchi jeē ndívīcoo tī nuū yīhi vāha tī, te quéndacoo tī nuū cáji vāha tī.

¹⁰ Tēe cuīhná chi máni vēji de jeē sacuíhná de lanchi, te cahni de, te snáā de. Te ruhū chi vēji rī návāha cotecu ñáyuu cácuu lanchi rī, te nde yōhyo vāha ndetū coo i.

¹¹ Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquī tī.

¹² Te ĩn tēe yíyāhu, nasūú pastor tī cúu de, chi nasūú lanchi máá de cúu tī. Te núu jíto de jeē vēji yīhī, te stóo de lanchi, te jīnu de cuahān de.

Te yihī chi jnā ti lanchi, te sáha ti jeē jitē núu lanchi.

13 Te tēe yíyāhu ún chi jínu de cuahān de siquī jeē lanchi tátú cúu jeē ndíto de, te jeē yúcuān tu cúndáhú ni de ti.

14 'Máá rí cúu máá pastor vāha. Te jíní rī tāca ñāyuu cácuu nájñūhun lanchi rī, te máá i cájini i ruhū.

15 Te yāha cúu nájñūhun jeē Tatá rī jíní yā ruhū, te máá rí jíní rī Tatá rī. Te cuu rī jeē siquī ñāyuu cácuu lanchi rī.

16 Te suni íyó gá ñāyuu jeē cácuu lanchi rī, te sñn sñn ñāyuu cácuu i. Te cánuú jéē suni condeca rī ñāyuu ún. Te cuatáhú i jñūhun cáhán rī. Te coyūcu cáhnu-ni ndihī ñāyuu candíje, te coo ñn-ni pastor i.

17 'Te Tatá rī manī ndasí yá jíin rí siquī jeē jéhe rī máá rí jeē cúu rī jehē ñāyuu, te natecu tucu rī.

18 Ni ñn ma cúu cahni ruhū, chi máá rí cúu jeē jéhe jñūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuān íyó poder rī. Súcuān ni cahān Tatá rī jeē sáha rī. Achí yá.

19 Te jeē ní cajini jnāhan ñuu yā hebreo jñūhun yáha, te ni cacusñn tucu i.

20 Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tñvi xínī de.

21 Te sava ga i ni cacahān:

Tu súcuān cáhán tēe ñūhun tachī ini, nájñūhun cáhán tēe yáha. Te tēe ñūhun tachī ini, ¿á cuu nanune de tinūu tée cuáá naún? Achí.

Jeē ní casquéhichī i Jesús

22 Te tiempo míjin cúu, te ñuu Jerusalén cánasáha ñāyuu vico jeē cánucūhun ni i quiivī ní cuhīi templo cáhnu.

23 Te jíca cuu Jesús ini templo, ini corredor jeē naní Salomón.

24 Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quiivī sáha ró jéē ma cucáhnu ni rī? Cachi cají núu rī jijnāhan rī núu máá ró cúu Cristo.

25 Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejniñu Tatá rī ruhū sáha rī, yúcuān stéén cají jéē maá yá ni tají rúhū.

26 Te tu cá candíje ró, chi nasūú lanchi rī cácuu ró, nájñūhun je ni cahān rī jíin ró.

27 Ñāyuu cácuu lanchi rī, chi nácuni i jeē máá rí cúu jeē cahán jíin i. Te jíní rī i, te cándiquñ i ruhū.

28 Te cotecu i nñ cáni sáha rī, te ma jnahnú ndetū cuiti i. Te ni ñn ma cúu quende i ndaha rī.

29 Máá Tatá rī ni squívi ya i ndaha rī. Te cújéhnu ga maá yá vésú tāca gá. Te ni ñn ma cúu quende i ndaha ya.

30 Máá rí jíin Tatá rī, chi ñn-ni cúu rī, achí yá.

31 Yūcuán na te jnāhan ñuu yā hebreo ni caquihin tucu de yuū jeē cuáha de xíní yā.

32 Te ni cahān yā jíin de:

Ni steén rī cuehē jniñu váha nuū rō jeē ni sáha rī jíin poder Tatá rī. ¿Te á síquī jeē ni sáha rī jniñu váha cúu jeē cuáha ró

yuū xinī rī núu súcuan? Achí yá.

33 Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xinī rō, chí síquī jeē cahán ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

34 Te ni cahān Jesús:

Yósó núu tútu ley cánevāha ró jéē ni cáhān Yaā Dios: Nájñuhun yaā cácuu ró, áchí Yaā Dios, achí tutu.

35 Chi ñayuu jeē ní cajetáhú jñuhun ya, ni cahān yā jeē cácuu i nájñuhun yaā. Te cájini yō jeē ma cúu cahān yō jeē tú ndaā jñuhun cáhán tutu iī.

36 Núu súcuan ¿te naun cácahān rō jeē jñuhun ndevāha cúu jeē ni cáhān rī jeē Séhe Yaā Dios cúu rí? Chí máá Yaā Dios ni jeni ya ruhū síquī jniñu iī, te ni tají yá ruhū vēji ri ini ñayīví.

37 Núu tu sáha ri jniñu sáha Tátá rī, núu súcuan te ma candíje ró rúhū.

38 Te núu sáha ri, te vēsú tu cácaandíje ró rúhū, te na cándíje ró síquī jniñu sáha ri ún. Te súcuan te cucáhnu ni rō jeē ñn-ni cúu Tátá rī jíin rí, te ñn-ni cúu ri jíin Tátá rī. Achí yá.

39 Yūcuán ña te cánducú tucu de jñi de ya. Te ni ndoñúhún-ni ya cuahān yā.

40 Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán.

41 Te ni quiijicoo cuehē ñayuu nuū yā, te ni cacahān i jíin táca jñáhan i:

Ndaā chi vēsú tu ní sáha Juan ni ñn jniñu jéhnú, te ni cundaā ndihi jñuhun ni cahān de síquī ndese sáha tēe yáha. Achí i.

42 Te cuehē ñayuu jeē ni jéngoo nuū yā yūcuán, ni ca-candíje i ya.

Jeē ni jñi Lázaro

11

1 Te ni Iyo ñn tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania.

2 Te María un jéē cúu cuāha Lázaro, suu ña cúu jeē ní chihi aceite perfume jehē Jitoho yō, te ni nasíchí ña jíin ixi xíní ña.

3 Te ndindúú cuáha de un ní catají ña jñuhun cuahān nuū Jesús:

Tēe jeē maní ni jíin, cúhú de, áchí ña, áchí mozo.

4 Te ná ni jini Jesús jñuhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnú ya. Chi ruhū, Séhe Yaā Dios, jíin cuéhyī yáha te stéén rī jeē suni cújéhnú máá rí. Achí yá.

5 Te maní Jesús jíin Marta jíin cúhú ña jíin Lázaro.

6 Te vēsú súcuan te nuū ni níhn yā jñuhun jeē cuhú de, te ni quendōo ya uū gā quiví nuū ndeé yá un.

7 Yūcuán na te ni cahān yā jíin tēe cáscuáha jíin yá:

Na quíhín tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xinī ní. ¿Te cúní ní quíhín tucu ní yúcuau naún? Achí de.

⁹ Te ní cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájnūhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájnūhun tēe jeē jíca nduú, te tu cáchihi de jehē de, chí cúndijin nuū de ñayivī yáha.

¹⁰ Te tēe jeē tu sáha jeē cuní Yaā Dios, chí nájnūhun jíca de jecuáa, te nájnūhun cáchihi de jehē de, chí tu cúndijin ini anuá de. Achí yá.

¹¹ Yūcuán na te ní cahān tucu ya:

Amigo yō Lázaro quixí de, te quihīn rī sáha ri jeē nátahū ní de. Achí yá.

¹² Yūcuán na te tēe cáscuáha un ní cacahān de:

Núu quixí de te jíin yō jeē nduvāha de.

¹³ Te Jesús chí súcuau ní cahān yā jeē jé ní jihī de. Te cájeni ní tēe cáscuáha jeē quixí ndije de.

¹⁴ Yūcuán na te ní cahān cají yá:

Je ní jihī Lázaro.

¹⁵ Te cúsiñ ní rī jeē tu ní cóyūcu yó yūcuán, návāha vāha ga candíje ró jēe coto ró jniñu jénu sáha ri. Núu súcuau te na quíngoo yó núu ndíyi ún. Achí yá.

¹⁶ Yūcuán na te Tomás, tēe cúu cuatí, ní cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

¹⁷ Te nuū ní quee Jesús, te jíin yā jeē ní cuu cuūn quivī yíndūji Lázaro.

¹⁸ Te yajni-ni íne ñuu Betania jíin ñuu Jerusalén, nájnūhun uū kilómetro yosáva.

¹⁹ Te Marta jíin María, ní quecoo cuehē jnáhan ña hebreo jeē cahán i jnūhun ndeyí ní jíin ña jeē siquí jeē ní jihī cuāha ña.

²⁰ Te nuū ní jini Marta jeē véji Jesús, te ní quenda ña cuajnahān ña ya. Te María chí ní ndōo ña vehe.

²¹ Te ní cahān Marta jíin Jesús:

Núu ní íyo ní yáha, te ma cúu cuāha ná núu.

²² Te vēsú súcuau te jíin na jēe tāca jēe cacán ní núu Yaā Dios, te sáha ya, achí ña.

²³ Te ní cahān Jesús jíin ña:

Natecu cuāha ró.

²⁴ Te ní cahān Marta:

Jíin na jēe nátecu de quivī nátecu tāca ndíyi nde quivī jínu ñayiví.

²⁵ Te ní cahān Jesús:

Máá rí cúu Yaā sáha jeē nátecu jíin jēe cótecu ní cáni. Ñayuu candíje jeē jnáma ri i, vēsú na cúu i, te natecu i.

²⁶ Te ñayuu cátecu te cándíje i ruhū, cotecu i ní cáni andiví. ¿A cándíje ró jnūhun yáha? Achí yá.

²⁷ Te ní cahān ña:

Cándije ná jéē maá ní cúu Cristo, Sēhe Yaā Dios, jeē achí tutu jeē quíji ini ñayīvi, áchí ña.

Jeē ni ndáhyū Jesús nuū yíndūji Lázaro

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, áchí ña.

29 Te jeē ní jini María jnūhun yáha, te yachí ni ndocuīñī ña, cuahān ña nuū yā.

30 Te ná tu quīvi Jesús ñuu, chi ni ndōo-ni ya nuū ni jéjnahan Marta yā.

31 Te ñayuu hebreo un jéē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuīñī ña cuahān ña. Te ni candiquīn i ña cuango i, chí cájeni ni i jeē cuándahyū ña nde nuū yíndūji ndīyi.

32 Yūcuán na te ni jinū María nuū íne Jesús, te ni jecuiñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núú, áchí ña.

33 Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuihyá ni yā, te ni jnahuhū ni yā jeē cundáhú ni yā i.

34 Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

35 Te ni ndahyū Jesús.

36 Yūcuán na te ni cacahān ñayuu hebreo un:

Condēhe náa yōhyo manī de jíin ndīyi ún.

37 Te sava i chi ni cacahān i: Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? áchí i.

Jeē ní natecu Lázaro

38 Te yōhyo ni jnahuhū ni tucu Jesús, te ni quee yā nde nuū yíndūji ndīyi. Te ñin yaū cava cúu, te yuyáú un ndīhyú ñin yuū.

39 Te ni cahān yā:

Tejiyo yuū un jíinahan ró, áchí yá.

Te Marta, cuāha ndīyi un, ní cahān ña:

Je jéén xicō de, chi je ni cuu cuūn quīvi yíndūji de.

40 Te ni cahān Jesús jíin ña:

¿A násūú je ni cahān rī jíin ró jeē núu candíje ró te coto ró jéē yóhyo cújéhnū Yaā Dios jíin poder yā? achí yá.

41 Yūcuán na te ni catejiyo i yuū jeē ndési yuyáú ndīyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ní jéē sáha ní jéē jicán na.

42 Te jíin na jéē niní sáha ní jéē jicán na. Te jeē váha ñayuu cáhīin yáha cúu jeē súcuan cáhán na, návāha na cándíje i jeē maá ní ni tají sáña.

43 Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

44 Te ni quenda-ni tēe ni jihī ún, te ñúsúcún ndaha de sīhīn de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

45 Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chí ni cajito i jniñu ni sáha ya.

46 Te sava i chi cuangoo i nuū tée grupo fariseo, te ni cacastūhún i ndese ni sáha Jesús.

47 Yūcuán na te tée fariseo un jíin sūtū cácujeñhu ni candutútú de junta jíin táca gá tée cácujeñhu. Te ni cacahān de:

¿Ndesa sáha yó? Chi tée ún yōhyo cuehē jniñu jéñhu sáha de.

48 Te núu condēhé-ni yó, te ndivii ñayuu candíje i de. Te quijicoo táca tée nación Roma jeē cácujeñhu, te canu de templo cáhnu yó, te scuíté núu de ñayuu nación yō, achí de jíjñáhan de.

49 Te ñin jnáhan de jeē naní Caifás, jeē cúu máá sūtū cujeñhu ga cuiyā ún, ni cahān de:

Róhó chi tu cájini cuiti rō,

50 ni tu cájecūhun ni rō jeē váha ga jeē cúu ñin tée jehē ñayuu nación yō vēsú jeē náa ndivii i, áchí de.

51 Te tu ní cáhán de jnūhun yáha jēé jéni ni maá de. Chi siquī jeē cúu de sūtū cujeñhu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo.

52 Te nasūu máá ñin-ni jehē nación hebreo, chí suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíjñáhan i.

53 Yūcuán na te nde quivī ún te táca tée hebreo cácujeñhu un, ní casquijnáhan de jnūhun jeē cáhni de Jesús.

54 Jeē yúcuan tuá ní jíca ndijin yā nuū jnáhan ñuu yā hebreo un, chí ni quenda ya región Judea, te cuahān yā ñin ñuu naní Efraín, nuū iyó yajni ñuhun téhé. Te ni condee yā yūcuan jíin tée cáscuáha jíin yá.

55 Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua.

56 Te cánanducú i Jesús, te cácajnūhun jnáhan i ini templo:

¿Ndesa cájeni ni rō? ¿A quiiji de vico, chí tuú? Achí i.

57 Te sūtū cácujeñhu jíin tée fariseo ni candacu de jniñu jeē núu ndé ñin ñayuu jiní ndé nuū íne ya, te na cástūhún i, návāha jñi de ya.

Jeē ní chuhun María perfume jehē Jesús

(Mt. 26.6-13; Mr. 14.3-9)

12

1 Te cúmani iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tée ni jihí te ni nastécu yā de.

² Te ni casáha i ñn vico xíni jeē yíñuhún i jín yá. Te Marta ni jeni ña cohō. Te Lázaro véji de staā jín yá nuū mesa jín táca gá ñayuu.

³ Yūcuán na te María ni quee ña jín nájñuhun sava litro aceite perfume jeē máni ita nardo cúu, te yōhyo yahu ndéé. Te ni chuhun ña jehē Jesús, te ni nasíchí ña jín ixi ña. Te ní ini vehe un ní chitú xícō perfume un.

⁴ Yūcuán na te ni cahān Judas Iscariote sēhe Simón, ñn tēe scuáha jín yá un, te suu de cúu jeē nastúu de ya:

⁵ ¿Najehē tu ní cýāhu perfume yáha jéē uní ciento denario, te cuāha yó núū ñáyuu ndahú núú. Achí de.

⁶ Súcuan ni cahān de, nasūu jéē cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quíhin cuíhná de jeē cájequin tāca tēe ún.

⁷ Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sātūhva ña ruhū nde quivī jeē quíndūji ri.

⁸ Chi níní cáyūcu ñáyuu ndahú jín ró, te ruhū chi tuá condee rī jín ró. Achí yá.

Jeē ní casquínáhan de jñuhun jeē cahni de Lázaro

⁹ Te cuehē ñayuu hebreo ni cajini jñuhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā.

¹⁰ Yūcuán na te sutū cácujeñnu ni casquínáhan de jñuhun jeē suni cahni de Lázaro.

¹¹ Chi jeē siquí Lázaro te ni cujiyo cuehē jñáhan ñuu de hebreo nuū de, te cá candíje i Jesús.

Jeē ní quivī Jesús Jerusalén (Mt. 21.1-11; Mr. 11.1-11; Lc. 19.28-40)

¹² Te inga quivī ún, te ñayuu cuehē jeē ní quecoo vico pas-cua un, ní cajini jñuhun i jeē véji Jesús ñuu Jerusalén.

¹³ Te ni cajehnde i ndaha ñúú, te ni quendacoo i cuaj-nahan i ya. Te cácana jee i:

Yōhyo cújehnu Yaā Dios. Yōhyo vāha Yaā cúu Yaā jeē véji jín jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihīn Jesús ñn burro, te ni jecosō yā tī, nájñuhun cáhān tutu i:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō,

te yósó yá ñn burro.

Achí tutu.

¹⁶ Te quivī ún te tēe cáscuáha jín yá, tu ní cájecūhun ni de jeē súcuan squícu tāca jéē yosó núú tutu i. Te nde ná ni ndujehnu Jesús jeē cuánuhun yā andiví, te sáá te ni canucūhun ni de tāca jñuhun yósó síquī yā, jín jéē ní casáha de súcuan jín yá.

¹⁷ Te ñayuu ní cahīn jín yá ná ni cana ya xinī Lázaro nuū ní yindūji de, te ni nastécu

yā de, ni canacani i jnūhun ndese ni sāha ya.

¹⁸ Jeē yúcuán ní quendacoo ñayuu cuehē un, ní jejnahan i ya, chi ni cajini jnūhun i jeē ni sāha ya jniñu jéhu un jéē ni steén yā poder yā.

¹⁹ Yūcuán na te ni cacahān maá tēe fariseo:

Vijna te je ni cajito yó jéē ma cúu cuiti gā casi yō. Chi jito yó jéē ndivii cuiti ñayuu cuango i jíin de. Achí de jíinahan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pascua un jéē chĩñuhún i Yaā Dios.

²¹ Te ni quecoo i nuū Felipe, tēe ñuu Betsaida ndañū Galilea. Te ni cacahān i jíin de:

Tátā, cáconi ná cahān na jíin Jesús, achí i.

²² Te ni jehēn Felipe, ni castūhún de nuū Andrés. Te ndĩndúú de cuacastūhún de nuū Jesús.

²³ Te ni cahān Jesús jíin de:

Je ni quee quiví jeē ndujéhu Yaā ní nduu tēe.

²⁴ Te jendaá cahán rī jíin ró, ĩn nunī trigo núu tú ningava nuū ñūhun te quindūji, núu súcuan te quendōo máá ĩn-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios.

²⁵ Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho

i jeē siquí ruhū ini ñayiví yáha, cotecu i ní cáni andiví.

²⁶ Núu ndé ñáyuu cuní i cuajniñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chi sāha Tátá rī jeē cujéhu i.

Jeē ni cáhān Jesús jeē cuuyā

²⁷ Te vijna te cúcuíhyá ndasí ni rī sāha jnūndóho quiji siquí rī. ¿Te ndese cahān rī? ¿A cáhān rī jíin Tátá rī: Jnama ní sáña núu jnūndóho jeē quíji siquí ná, achí rī? Ma cúu, chi jeē siquí yúcuán cúu jeē véji rī.

²⁸ Tátā, steén ni jéē cujéhu ndasí ní jíin poder ni, achí yá.

Yūcuán na te ichi andiví ní cahān ĩn jnūhun:

Je ni steén rī jeē cujéhu rī, te sāha tucu rī inga jíinu, achí yá.

²⁹ Te ni cajini ñayuu cáhān yūcuán, te ni cacahān i jeē taja cáhān. Te sava ga i ni cacahān:

ĩn ndajéhé Yaā Dios ni cahān jíin yá.

³⁰ Te ni cahān Jesús jíin i:

Tu ní cáhān jnūhun yáha jeē siquí ruhū, chi sa suhva návāha cuni rō siquí jnūhun jeē ni cáhān yā jíin rī.

³¹ Vijna cúu jeē sándaā Yaā Dios siquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha.

³² Te ruhū, núu na jíinu condita caa rī cuu rī ini ñayiví, te sāha rī jeē jnāā tāca ñayuu quivicoo i ndaha rī, achí yá.

³³ Súcuan ni cahān yā jeē steén yā ndese modo cuu yā.

34 Te ni cacahān ñayuu jín yá:

Ni cajini sōho ná jēe cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jēe Yaā ní nduu tēe, cánuú condita caa ya cuu yā? ¿Ndé ñn cúu máa Yāā ní nduu tēe núu súcuan? Achí i.

35 Yūcuán na te ni cahān Jesús:

Máa jecu na quivī condee rī jín ró jeē cúu ri luz cundijin ini anuá rō. Núu súcuan te vijna jeē iyó gá luz rī jín ró, te caca ró jín, chi sanaa ni rō te cuahān rī, te nájñuhun quendōo ró núu néē. Chi ñayuu cájica nájñuhun nuū néē, tu cájini i ndé nuū cuángoo i.

36 Núu súcuan te níni ndéé gá rī jín ró, te candíje ró rúhū jeē cúu ri luz, návāha nduu ró ñayuu cájica jín luz, achí yá.

Súcuan ni cahān Jesús tāca jñuhun yáha, te cuahān-ni ya, te tuá ni stéén yā maá yá nuū i.

Jeē tu ní cá candíje ñayuu hebreo jeē cúu ya Cristo

37 Te vēsú cuehē jniñu jéhnú ni sáha Jesús jeē steén yā poder yā nuū i, te tu ní cá candíje i ya.

38 Chi squícu nahín jñuhun ni cahān Isaías, tēe ni nacani jñuhun Yaā Dios nde jenahán: Tátā Yaā Dios, tu ní cá candíje ñayuu jñuhun ni canacani ná,

te tu ní cá candíje i jniñu jéhnú jeē ni stéén ni poder ni núu i.

Achí Isaías.

39 Jeē yúcuan tu ní cúu candíje i, chi ni cahān tucu Isaías:

40 Ni sáha ya jeē nájñuhun cáhīyo cuáá ánuá i,

jín jēe cá cunīhni ni i, návāha coo nájñuhun jeē tu cájito i,

te ni ma jécūhun ni i, ni ma násāma ini i quivīcoo i nuū rī,

jeē nasávāha ri anuá i nuū cuéchi i.

Achí Cristo, achí tutu.

41 Jñuhun yáha ní cahān Isaías, chi je ni jito de ndese yōhýo cújéhnú Jesús, te ni cahān de ndese coo quivī jeē quíji ya.

42 Te vēsú súcuan te cuehē ñayuu hebreo chi ni cacandíje i ya, te suni nde jín sava tēe cándacu jniñu. Te tu ní cá cachi de jeē cá candíje de ya, chi siquī jeē cá yūhú de tāca tēe fariseo. Chi núu súcuan te quenehen ún de ini vehe ī sinagoga jeē ma cuáha ga jñuhun quivīcoo de.

43 Chi cá cusī gā ni de jeē cújéhnú de sáha ñayuu, vēsú jeē cújéhnú de sáha Yaā Dios.

Jñuhun cáhán Jesús cúu jeē sándaā siquī ñayuu

44 Te ni cahān jee Jesús:

Ñayuu cá candíje ruhū, nasūu máñúhún-ni ruhū cá candíje i, chi suni cá candíje i nde maá Tátā rī, Yaā ní tají rúhū.

45 Te ñayuu cájito nuū rī, suni cájito i nuū Yaā ní tají rúhū.

46 Máa rí jeē cúu ri luz cúndijin ini anuá ñayuu, ni quíji ri ini ñayivī návāha tāca ñayuu cá candíje ruhū, ma cáca i nájñuhun nuū néē.

47 Te núu ñn ñayuu jíni sōho i jñūhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen ri cuēchi siquī ñayuu ñayīví, chi sa suhva jeē jnáma ri i.

48 Te ñayuu jeē casquéhichī i ruhū te tu cájetáhú i jñūhun cáhán rī, íyó ñn jeē sándaā siquī i. Suu tāca jñūhun jeē ní cáhán rī, jñūhun un cúu jeē ndenehen cuēchi siquī i quivī jínu ñayīví.

49 Chi tu cáhán rī jeē cúu ní maá rí, chi Tátá rī, Yaā ní tají rúhū, maá yá ní ndacu jniñu nuū rī ndese cahán rī jíin ndese stéén rī.

50 Te jíni rī jeē jniñu ndácu Tátá rī sáha jeē cótecu ñayuu ní cáni. Núu súcuan te jñūhun cáhán rī, chi máni jñūhun jeē ní cachí Tátá rī cúu, áchí yá.

Jeē ní nacate ya jehē tēe cáscuáha

13

1 Te jehíni inga quivī te quejéé vico pascua. Te je jíni Jesús jeē ní quee quivī jeē quénda ya ñayīví yáha quínuhun yā nuū Tatá yā. Te níni cundáhú ni yā ñayuu maá yá jeē cáyūcú ini ñayīví. Te vijna jeē jínu jeē íne ya ñayīví, te sáha ya ñn jniñu jeē steén cají yá jeē cundáhú ni yā i.

2 Te jexeén je ni squívī ini anuá Judas Iscariote sēhe Simón, jeē vijna nastúu de ya.

3 Te jíni Jesús jeē véji ya nuū Yaā Dios, te nuhūn yā nuū Yaā Dios, jíin jéé ní sáha Tátá yā jeē cujéhnu ya siquī ndihi-ni.

4 Te cúxíni ya jíin tēe cáscuáha jíin yá, te ni ndocuiñī yā. Te ní stáa ya sahma ndíi ya, te ni jihni yā ñn toalla chíji ya.

5 Te ni chuhun ya ndute ini ñn tijehēn. Te ní quejéé yá nácate ya jehē tēe cáscuáha. Te násíchí yā jíin toalla jeē nuhní chíji ya.

6 Te ni jinū yā nuū Simón Pedro. Te ní cahán Pedro jíin yá:

¿Sa maá ní nacate jehē ná naún?

7 Te ní cahán Jesús:

Tu jécūhun ní rō jeē sáha ri vijna, te cúcuéé gá te jecūhun ní rō.

8 Te ní cahán Pedro jíin yá:

Ma nácate cuiti ní jehē ná.

Te ní cahán Jesús:

Núu tú nacate ri jehē rō, te ma cúu cundúú ró jíin rí.

9 Te ní cahán Simón Pedro:

Núu súcuan cúu te nasūu maá jehē-ni ná, chí suni nacate ní ndaha ná jíin xíní ná, áchí de.

10 Te ní cahán Jesús jíin de:

Tēe jeē sa ní jichi, tu jíni ñúhún ndundoo ní cáhnu de, chí maá jehē-ni de, chí je íyó ndoo ní cáhnu de. Te maá ró chí je ní candundoo ró. Te tú ndihi ró cáhīyo ndoo.

11 Chi je jíni yā ndé ñn de cúu jeē nastúu de ya, te jeē yúcuan ní cahán yā: Tú ndihi ró cáhīyo ndoo.

12 Te nuū ní jínu ní nacate ya jehē de jíináhan de, te ní naquihin ya sahma ndíi ya, te ní nucōo tucu ya nuū mesa. Te ní cahán yā:

¿A cájecūhun ni rō na vé cuní cahān jeē ni sāha ri jīn ró?

¹³ Cácahān rō jeē Maestro jīn Jítóho rō cúu ri, te ndaā cácahān rō, chi suu ndije cúu ri.

¹⁴ Núu súcuan te vēsú Maestro rō jīn Jítóho rō cúu ri, te ni nacate ri jehē rō jijnáhan ró, te suni súcuan cánuú jéē nacate máá ró jehē jnáhan ró.

¹⁵ Chi jniñu yáha ni sāha ri jeē steén rī nuū rō jeē suni súcuan sa cuajniñu ró núu jnáhan ró, nájñūhun sa máá rī ni jejniñu ri nuū rō.

¹⁶ Jendaá cahán rī jīn ró jeē ñn mozo tu cújéhnū de nuū patrón de, te tēe jíca jniñu táhū nuū de, te cújéhnū de nuū tēe ni tají de. Te máá ró cácuu mozo rī, te na cuájniñu ró núu jnáhan ró nájñūhun ni steén rī nuū rō.

¹⁷ Te núu ni cajecūhun ni rō jñūhun yáha, te yōhyo ndetū rō te núu squícu ró.

¹⁸ Te nasūu jéē cahán rī jeē ndihī ró ndétū, chi je jíní rī tāca rōhó jéē ní nacāji ri. Te cánuú squícu jñūhun yáha jeē cahán tutu iī: Tēe yéji staā jīn rī, ni ndió cuñí de siquī rī, achí tutu.

¹⁹ Te vijna te je cástūhun rī tāca jéē yáha núu rō nde ná tu coo, návāha núu na cóo, te candíje ró jéē maá rī cúu Yaā ní tají Yaā Dios.

²⁰ Jendaá cahán rī jīn ró jeē na-ni ñayuu jeē cuatáhú i tāca jéē tají rī, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahān Jesús tāca jñūhun yáha, te ni cucuíhyá ndasí ni yā. Te ni cahān cají yá:

Jendaá cahán rī jīn ró jijnáhan ró jéē ñn máá ró nastúu ruhū, achí yá.

²² Yūcuán na te tēe cáscuáha jīn yá, ni candacoto de nuū jnáhan de, cájeni ni de ndé ñn de cúu jeē ni cáhān yā.

²³ Te ñn máá tēe scuáha jeē maní gā yā jīn, néne de xiin ya mesa jeē cácuixíni de jīn yá.

²⁴ Te ni sāha Simón Pedro seña nuū de jeē na cájnūhún de ya ndé ñn de cúu jeē ni cáhān yā.

²⁵ Yūcuán na te tēe un ní scáyi de máá de nuū Jesús, te ni cajñūhún de ya:

¿Ndé ñn de cúu? achí de jīn yá.

²⁶ Te ni cahān Jesús:

Na chūndaji ri staā te cuāha ri nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sehe Simón.

²⁷ Te jeē ní quihin de staā ún, te ni quívi-ni Satanás ini anuá de. Yūcuán na te ni cahān Jesús jīn de:

Jniñu jeē sāha ró, na sāha yachī rō.

²⁸ Te ni ñn tēe cáyeji staā jīn yá, tu ní cájecūhun ni de naun ni cahān yā súcuan jīn de.

²⁹ Chi sava de cájeni ni de jeē ni cáhān Jesús jīn Judas jeē cuán de jeē jíni ñūhún yá

vico ún, chí jéē cuáha de jecu xūhun núū ñayuu ndahú. Chi máá de ndíso yijni xūhún.

³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jéé

³¹ Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū ri, te suni jíin rúhū te cuni ñayuu ndese cújéhnū Yaā Dios.

³² Te núu jíin rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu ri Sēhe ya. Te yachī-ni stéén yā.

³³ Séhē, tuá nahán condee rī jíin ró jijnáhan ró. Te nanducú ró ruhū, te nájnūhun ni cahān rī jíin táca jnáhan yó hebreo, suni súcuan cáhán rī jíin ró vijna, jeē ma cúu jinūcoo ró núū quihín rī.

³⁴ Te vijna te ndácu ri ñin jniñu jéé núū rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró.

³⁵ Te núu cúndáhú ni rō jnáhan ró, súcuan te cuni táca ñayuu jeē cácuu ró tée cáscuáha jíin rí, achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jíin yá:

¿Ndé nuū quihín ni núu súcuan?

Te ni cahān Jesús:

Nuū quihín rī chi ma cúu condiquīn rō ruhū vijna, te cúcuéé gá te jinū rō.

³⁷ Te ni cahān Pedro:

¿Najehē ma cúu condiquīn na níhín vijna? Tu yúhú ná cuu na jéē siquí ni.

³⁸ Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahān rī jíin ró jeē nde ná tu cana líhli, te unī jínu yūhu ró te cahān rō jeē tu jíin rō ruhū. Achí yá.

Jesús cúu ichi jeē jinú yō nuū Tatá yá

14

¹ Te ni cahān gā yā:

Ma cucuíhyá ni rō siquí táca jnūndóho. Na cándíje ró jéé sáha Yaā Dios jehē rō, te suni na cándíje ró jéé sáha ri jehē rō.

² Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuū. Núu súcuan te quihín rī quisátūhva ri nuū cóyūcu ró.

³ Te jeē quihín rī sátūhva ri nuū cóyūcu ró, te ndiji ri quinaquihin ri rohó quihín yō, návāha suni coyūcu ró nuū cóndee maá rí.

⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jíin yūcuán núu súcuan?

⁶ Te ni cahān Jesús jíin de:

Máá rí cúu ichi jinū rō andiví, te máá rí cúu jnūhun

ndaā jīn jnúhun cotecu rō ní cáni. Te ni ñn ma jinú nuū Tatá rī te núu tú ruhū.

⁷Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito rō núu rī, achí yá.

⁸Te ni cahān Felipe jīn yá:

Stéén ni Tátá ni núu ná, te na cúvaha ni na jínáhan ná, achí de.

⁹Te ni cahān Jesús:

Felipe, je ni cuu cuehē quivī jīca rī jīn ró jijnáhan ró, ¿te á ná tu cuni rō ndé ñn cúu rī naún? Tēe jeē jito ruhū, suu Tátá rī jito de. Núu súcuan ¿te najehē cahán rō jeē steén rī Tatá rī nuū rō?

¹⁰¿A tu cándije ró jéē ñn-ni cúu rī jīn Tátá rī, te Tátá rī ñn-ni cúu ya jīn rí? Tāca jnúhun cáhán rī jīn ró, nasūu jnúhun máá rí cúu. Chi Tátá rī jeē ñn-ni cúu ya jīn rí, máá yá sáha tācá jniñu jeē sáha rī.

¹¹Candije ró jijnáhan ró jéē ñn-ni cúu rī jīn máá Tátá rī, te Tátá rī ñn-ni cúu ya jīn rí. Te núu tu cájecūhun ni rō, te candije ró rúhū siquī tācá jniñu sáha rī.

¹²Jendaá cahán rī jīn ró, núu ndé ñayuu candije ruhū, jniñu jéhnu jeē sáha rī yāhá, suni sáha i. Te jéhnu ga jniñu sáha i vēsú yāhá, chi quinuhun rī nuū ndeé Tatá rī.

¹³Te tācá na-ni vé cacán rō nuū Tatá rī siquī jeē cáncandije ró jéē cúu rī Sēhe ya, te sáha rī jeē cacán rō, te súcuan steén rī jeē yóhho cújéhnu Tátá rī.

¹⁴Chi tācá na-ni vé cacán rō siquī jeē cáncandije ró rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵Te núu manī rō jīn rī jijnáhan ró, te na squícu ró jniñu ndácu rī nuū rō.

¹⁶Te cacán tahú rī nuū Tatá rī, te tají yá inga Yaā chindéé ñáhán rōhó, te sáha ya jeē cóo siñ ni rō jijnáhan ró. Te Yaā un cúu máá Espíritu jeē steén jnúhun ndaā, te condee yā jīn ró ní cáni.

¹⁷Te ñayuu ñayīvi má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndeé yá jīn ró, te condee yā ini anuá rō ní cáni.

¹⁸Ma stóo uun rī rohó, chi ndiji rī nuū rō.

¹⁹Jecu na quivī te ma cóto ga ñayuu ñayīvi núu rī. Te máá ró jijnáhan ró chi coto ró núu rī, chi cotecu rī ní cáni, te jeē yúcuan suni cotecu máá ró.

²⁰Te quivī ún te cuni rō jeē ñn-ni cúu rī jīn Tátá rī, te máá ró ñn-ni cúu ró jīn rí jeē ndeé rí ini anuá rō jijnáhan ró.

²¹Te na-ni ñayuu núu ñúhun ni i jniñu ní ndacu rī, te squícu i, ñayuu un cúu jeē maní ndije jīn rí. Te ñayuu jeē maní jīn rí, suni coo maní Tatá rī jīn i. Te suni ruhū coo maní rī jīn i, te steén rī nuū i jeē nduú rí jīn i. Achí yá.

²²Te ni cahān Judas jīn yá (te nasūu téé cúu Iscariote):

Najehē cúu jeē steén ni máá ní nuū ná, te nuū ñayuu ñayīvi chi tuú?

²³Te ni cahān Jesús:

Ñayuu jeē maní jīn rí, chi cásquícu i jeē cahán rī. Te coo

manī Tatá rī jín i. Te Tatá rī jín máá rí quijicoo ri cundúú rí jín i.

24 Te ñayuu jeē tú manī jín rí, tu cásquicu i jeē cahán rī. Te jnūhun cájini sōho ró cáhán rī, nasūu jnúhun máá rí cúu, chí jnūhun máá Tatá rī jeē ní tají rúhū cúu.

25 Tāca jnúhun yáha cáhán rī jín ró níni íne ga rī jín ró.

26 Te Tatá rī chí tají yá Espíritu Santo, quiji nucuíñi nuū rī. Te máá yá chindéé ñáhán yá rohó, te sáha ya jeē cóo sñ ni rō. Te steén yā tāca jnúhun nuū rō, te nacachí tucu ya tāca jéé ni cáhán rī jín ró.

27 Te jeē quihín rī, te sáha ri jeē cóo ndeyí coo sñ ni rō. Nájñūhun íyó ndeyí sñ ni máá rí, suni súcuan coo ndeyí sñ ni rō sáha ri. Te jeē sáha ri jeē cóo ndeyí sñ ni rō, tu quínáhan jín jnúhun ndeyí cácahán ñayuu ñayívi. Ma cucuíhyá ni rō siquī tāca jnúndóho, te ni ma yūhu ró.

28 Je ni cajini sōho ró jéé ni cáhán rī jeē quihín rī, te ndiji ri cundúú rí jín ró. Te núu cáhīyo manī vāha ró jín rí, te cusñ ni rō jeē ni cáhán rī jeē nuhún rī nuū Tatá rī. Chí cújéñu ga Tatá rī vijna vésú ruhū.

29 Je ni castūhun rí nuū rō tāca jnúhun yáha nde ná tu coo, návāha núu je ni cuu, te candíje ró rúhū jijnáhan ró.

30 Ma cahán rī cuehē gā jnūhun jín ró, chí je vēji jexeén jeē ndácu jniñu iní ñayívi yáha. Te tú na vé cúu sáha siquī rī nuú.

31 Te na cóo nájñūhun ni ndacu Tatá rī jniñu nuū rī, návāha cuni ñayuu ñayívi jéé maní rī jín Tatá rī, te sáha ri jniñu ní ndacu ya. Ndocuíñi jijnáhan ró na quíngoo yó. Achí yá.

Jesús cúu nájñūhun yoyúcu uva

15

1 'Máá rí cúu nájñūhun yoyúcu uva váha ndaā, te Tatá rī cúu nájñūhun tēe ndíto yoyúcu uva un.

2 Te máá ró chí cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacañde yā rohó nájñūhun jeē cúu ró ndaha ún, návāha cuāha ró cuéhē gā ndehē.

3 Te máá ró chí je ni candundoo ánuá rō jín jnúhun ni steén rī nuū rō, nájñūhun ndúndoo ndaha uva.

4 Na cundúú ró jín rí, te suni máá rí cundúú rí jín ró. In ndaha uva ma cúu cuāha ndehē jeē máá, te núu tu yijnñi jicā yóho. Te suni súcuan máá ró, ma cúu sáha ró jniñu váha te núu tu cundúú ró jín rí.

5 'Máá rí cúu yoyúcu un, te máá ró cácuu ndaha ri. Ñayuu jeē nduú jín rí, te ruhū ndúú rí jín i, máá i cúu nájñūhun ndaha jeē jéhe cuehē ndehē. Chí núu tú cundúú ró jín rí, te tú cuiti na jniñu váha cuu sáha ró.

6 Ñayuu jeē tu cundúú jín rí, quende yā i nájñūhun in ndaha uva, te ichí. Te ndoho

i nájnūhun ndaha uva un jēē ndutútú te cayū nuū ñuhún.

⁷ 'Núu ndúú ró jín rí, te cáñuhun ni rō jnūhun cáhān rī, yūcuán na te cacān rō na-ni vé cācuni rō, te sáha ri jeē cácahān rō.

⁸ Te núu cásáha ró cuéhē jniñu váha, súcuan cástéén rō jeē cúu ndije ró ñáyuu cascuáha jín rí, te súcuan nācuni ñayuu jeē yóhoyo cújéhu Tátá rī.

⁹ Nájnūhun manī Tátá rī jín rí, suni súcuan manī rī jín ró jijnáhan ró. Núu súcuan te ma siaá rō jnūhun manī rī jín ró.

¹⁰ Núu squícu ró jniñu ní ndacu ri nuū rō, te níni coo manī rī jín ró, nájnūhun máá rí squícu ri jniñu ní ndacu Tátá rī nuū rī, te níni íyó mánī yā jín rí.

¹¹ 'Súcuan ni cahān rī jín ró návāha coo sī ni rō nájnūhun íyó sī ni rī, chi nde cusī teyí ni rō.

¹² Te yāha cúu jniñu ndácu ri nuū rō jijnáhan ró: jeē na cúndáhú ni rō jnáhan ró nájnūhun cúndáhú ni rī rohó.

¹³ Núu ñn tēe cuu de jehé amigo de, te tuá na vé cúmanī gā sáha de jeē cundáhú ni de amigo de.

¹⁴ Te máá ró cácuu amigo rī núu squícu ró jniñu ndácu ri nuū rō.

¹⁵ Ma cahān gā rī mozo jín ró, chí ñn mozo tu cástūhún patrón nuū i ndese jéni ní de sáha de. Chí sa suhva amigo cahān rī jín ró, chí je ní castūhun rí nuū rō tāca jnúhun ni cahān Tátá rī jín rí.

¹⁶ Máá rí ni nacāji rōhó jēē jnáma ri rohó, te nasūu máá

ró ni cānacani ni xīhna gā jeē cóndiquín rō ruhū. Te ni jeni ri rohó jēē caca ndaā rō te scándije ró cuéhē ñayuu jeē cuu i sēhe ri ní cāni. Te súcuan te ndihi jeē cacān rō nuū Tátá rī siquí jeē cácañdije ró rúhū, sáha ya jeē jicān rō.

¹⁷ Te yāha cúu jniñu ndácu ri nuū rō: jeē na cúndáhú ni rō jnáhan ró.

Jeē cáquitī ni ñayuu ñayīvi núu Jesús jín núu ñáyuu cácañdije

¹⁸ 'Te núu cáquitī ni ñayuu ñayīvi núu rō jijnáhan ró, te je cájini rō jeē xīhna gā nuū maá rí ni caquitī ni i.

¹⁹ Te núu jeē iyó gá rō jín modo ñayuu ñayīví, te coo manī ñayuu ñayīvi jín ró nuú, nájnūhun manī i jín jnáhan i. Te ni nacāji ri rohó jēē tuá coo ró jín modo ñayuu ñayīví. Te jeē yúcuan cáquitī ni i nuū rō, chí tuá cácuu ró cuenta ñayīvi.

²⁰ Nucūhun ni rō jnūhun ni cahān rī jín ró: Núu tu íyó yíñuhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jēē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō.

²¹ Te tācá jniñu yāha sáha i jín ró jeē siquí ruhū, chí tu cájini i Yāa ní tají rúhū vēji ri.

²² 'Núu jeē tu ní quíji ri nacani ri jnūhun nuū i, te ma cóo cuēchi i núu. Te vijna chí ma cúu ga cahān i jeē tu jíní i jeē iyó cuēchi i.

23 Ñayuu jeē cáquitī ni nuū rī, suni nuū Tatá rī cáquitī ni i.

24 Núu jeē tu ní sáha ri jniñu jéhu nuū i jeē ní ñn tēe tu ní sáha de súcuan, te ma cóo cuēchi i núú. Te vijna je ni cajito i jniñu ún, te vēsú súcuan te cáquitī ni i nuū rī jín nū Tatá rī.

25 Te súcuan cáśáha i návāha squícu jñūhun yósó nūú tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

26 "Te taji rí maá Yaā chindéé ñáhán róhó te sáha ya jeē cóo sñ ni rō. Te Yaā un cúu maá Espíritu jeē steén jñūhun ndaā, te quiji ya nde nuū Tatá rī, te nacani cáji yá jñūhun rī.

27 Te suni máá ró nacani ró jñūhun rī, chí je cáhñn rō jín rí nde ná ni quejéé rí nacani ri jñūhun.

16

1 "Tāca jñūhun yáha ní cahān rī jín ró návāha ma náyūhu ró jeē quiji jñūdóho.

2 Chí quenehen i róhó jéé ma cuáha ga i jñūhun cone ró táca vehe ñi sinagoga. Te quee quiṽi jeē cahni i róhó, te cani ni i jeē ñn jniñu váha ni sáha i nuū Yaā Dios.

3 Te súcuan sáha i jín ró, chí tu cájini cuiṽi i máá Tátá rī ni máá rí.

4 Te ni cahān rī jñūhun yáha jín ró návāha núu je ni quee quiṽi jeē súcuan coo, te nucūhun ni rō jeē jé ni cahān rī jín ró.

"Te tu ní cáhán rī jñūhun yáha jín ró nde xihna ñúhún, chí íne máá rí jín ró jijnáhan ró.

5 Te vijna chí nuhūn rī condee rī jín Yaā ní taji rúhū vēji ri. Te ni ñn ró tu cájnūhun ró ndé nuū quihín rī.

6 Chí máá jéé cácuquíhyá ndasí ni rō jeē ni cáhán rī súcuan jín ró.

7 Jendaá cahán rī jín ró: Jeē váha máá ró jijnáhan ró cúu jeē quihín rī. Chí núu tú quihín rī, te ma quiji Yaā chindéé ñáhán róhó te sáha ya jeē cóo sñ ni rō. Te núu cuahān rī, te taji rí yá quiji ya nuū rō.

8 Te jeē quéé yā, te stéén yā nuū ñáyuu ñayṽi jéé iyó cuéchi i, jín ndese quiṽicoo i ichi ndaā, jín jéé sándaā Yaā Dios siquṽi cuéchi i.

9 Stéén yā jeē iyó cuéchi i, chí tu cácandíje i ruhū.

10 Te stéén yā siquṽi ichi ndaā, chí máá rí nuhūn rī nuū Tatá rī, te ma cóto ga rō nuū rī.

11 Te stéén yā siquṽi jeē sándaā Yaā Dios cuéchi ñayuu, chí je ni cundaā jeē jnahnú ndetū máá jéxeén jeē cujéhu ini ñayṽi yáha.

12 "Te iyó cuéhē gā jñūhun cúní rī cahān rī jín ró, te ma cúu jecūhun ni rō vijna.

13 Te jeē quéé máá Espíritu jeē steén jñūhun ndaā, te máá yá steén tāca jñūhun ndaā un núu rō. Chí ma cahán yā jeē máá yá, chí cahān yā tāca jéé jñi sōho ya cahán Yaā Dios. Te stéén yā siquṽi tācá jniñu jeē coo.

14 Te stéén yā jeē cujéhu ri, chí nacastūhun yá nuū rō tāca

jnúhun jeē jé ni cahān rī, te sáha ya jeē jécūhun ni rō.

¹⁵ Ndihi ndese cújéhnú Tátá rī, suni súcuan cújéhnú máá rí. Jeē yúcuan ní cahān rī jeē Espíritu Santo nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuuíhyá ni rō, te ndusī ni rō

¹⁶ Jecu na te ma cóto ga rō nuū rī. Te jecu tucu quivī te coto tucu ró núū rī, chí quínuhun rī nuū ndeé Tátá rī. Achí yá.

¹⁷ Yūcuán na te sava tēe cáscuáha jíin yá, ní caca-jnúhun jnáhan de:

¿Na jnúhun cúu jeē yáha jeē cahán yā jíin yó? Chí áchí yá jeē jecu na te ma cóto ga yō nuū yā, te jecu tucu quivī te coto tucu yó núū yā, chí siquī jeē quínuhun yā nuū ndeé Tátá yā.

¹⁸ ¿Na jnúhun cúu jeē yáha jeē cahán yā, jecu na? Tu cájécūhun ni yō na vé cúu jeē cahán yā. Achí de.

¹⁹ Te ni jini Jesús jeē cácuni de cajnúhún de ya. Te ni cahán yā jíin de:

¿A cácajnúhun jnáhan ró na vé cúu jeē ní cahán rī jíin ró jeē jecu na te ma cóto ga rō nuū rī, te jecu tucu quivī te coto tucu ró núū rī?

²⁰ Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayiví chí sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núū rī.

²¹ ĩn ñahan núu cuacuyajni scácu ña, te jéhnde chíjī ña, chí

je ni quee hora jeē scácu ña. Te núu je ni scácu ña sūchi lúlí, te tuá nahán ña jeē ní ndoho ña, chí cusī ni ña jeē ní cacu sēhe ña.

²² Te suni súcuan cúu jeē cándoho ró vijna, chí cácuuíhyá ni rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni ĩn ma cúu casi jeē cusī ni rō.

²³ Te quivī ún chí tú na vé cacān gā rō nuū rī. Chí jendaá cahán rī jíin ró jeē nuū máá Tátá rī cacān rō, te sáha ya ndihi jeē cájicān rō, siquī jeē cácañdije ró rúhū.

²⁴ Nde vijna te ná tu cacān rō nuū Tátá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusī ndasí ni rō.

Je ni quende yā poder ndihi jeneé cáhīyo ini ñayiví

²⁵ Tāca jnúhun yáha ní cahán yatá rí jíin ró. Te quee quivī jeē ma cahán yatá gá rī jíin ró, chí sa suhva castūhun cájī rí nuū rō siquī Tátá rī.

²⁶ Te quivī ún chí cacān rō nuū Tátá rī siquī jeē cácañdije ró rúhū. Te tu cáhán rī jíin ró jeē cacán tahu rī jehē rō nuū Tátá rī.

²⁷ Chí máá Tátá rī je cúndáhú ni yā rohó siquī jeē cáhīyo manī rō jíin rí, te ni cacandije ró jéē ndé nuū máá yá vēji rí.

²⁸ Ni quenda ri nde nuū Tátá rī, te ni quee rī ini ñayiví. Te vijna te quenda ri ini ñayiví, te nuhūn tucu rī nuū Tátá rī. Achí yá.

29 Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní.

30 Vijna te cájini na jéē jíni ni ndivii cuiti, te tuá jíni ñúhún jéē cájnúhún ni ñn ná níhín. Jeē yúcuan cáchandíje ná jéē véji ní ndé nuū Yaā Dios. Achí de.

31 Te ni cahān Jesús jíin de:

¿A ndé vijna te cáchandíje ró nauñ?

32 Te quiji quiví, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chí Tátá rī íne ya jíin rí.

33 Tāca jnúhun yáha ní cahān rī jíin ró návāha coo ndeyí coo sī ni rō síquī jeē cáchandíje ró rúhū. Ini ñayiví chí cánuú coto ró jnúndóho. Te vēsú súcuan te na cóo sī ni rō, chí je ni quende rī poder tāca jéneé cáhīyo ini ñayiví. Achí yá.

Jeē ni jícān tahu Jesús jehē ñayuu cáchandíje

17

1 Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiví jeē ndóho ná. Vijna te stéén ni jéē kujéhu máá ná jeē cúu ná Séhe ní, návāha suni máá ná steén na jéē kujéhu máá ní.

2 Chí ni sáha ní jéē ndíso jníñu ná síquī tāca ñayuu, návāha tāca ñayuu jeē ni jéhe ní núu ná, cotecu i ní cáni sáha ná.

3 Te suhva cúu jnúhun cotecu i ní cáni: suu jeē na cúni i níhín jéē mañúhún-ni ní cúu Yaā ndaā, jíin jéē cúni i sáñá jeē cúu ná Jesucristo, Yaā ní tají ní.

4 'Je ni steén na núu ñayuu ñayiví jéē kujéhu ní, te je sínu ná jniñu ní ndacu ní núu ná.

5 Te vijna, Tátā, sáha ní jéē ndujéhu tucu ná ndé nuū néne ní, nájnúhun kujéhu ná jíin ní nde ná tu jecōo ñayiví.

6 'Ñayuu jeē ní nacāji ní ini ñayiví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i.

7 Te vijna te cájini i jeē ndé nuū maá ní véji tāca jéē iyó jíin ná.

8 Chí tāca jnúhun ni cahān ni jíin ná, ní castúhun ná núu i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sáña.

9 'Te jícān tahu na jéhē maá i jíjnáhan i. Tu jícān tahu na jéhē ñayuu ñayiví jéē tu cáchandíje, chí sa jehē maá ñayuu ni jéhe ni núu ná, chí cuenta maá ní cácuu i.

10 Te tācá i jeē yáhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese kujéhu ná.

11 'Te tuá condee ná ini ñayiví. Te maá i chí quéndōo i ini ñayiví, te maá ná chí najeē ná condee na jíin ní. Yaā i Yaā ndoo cúu ní, Tátā. Te jíin

poder ní condito ní táca ñáyuu ni jéhe ni núū ná, návāha inuú na cóo ni i jínáhan i, nájñūhun cúu máá yó.

12 Te jeē ní condee na jín i ini ñayīví, te jín poder ní ní condito ná i. Táca ñáyuu ni jéhe ni núū ná, ni condito yúcún ná i. Te tu ní jéhe na jñūhun naa i jínáhan i, chi máá ñn-ni tēe jeē je cúu de tēe jñahnū ndetū, návāha squícu jñūhun yósó núū tútu īi.

13 Te vijna te najeē na núū ní, te cáhán na táca jñūhun yáha jín i ní ní jéē íne ga ná ini ñayīví, návāha na cóo sīñ ndasí ni i nájñūhun cúsiñ ni máá ná.

14 Ni castūhun ná jñūhun ní núū i. Te ni caquitiñ ni ñayuu ñayīví núū i, chi tuá cácuu i cuenta ñayīví, nájñūhun máá ná tu cúu ná cuenta ñayīví.

15 Te tu jícán tahú na jéē quénehen ní i ini ñayīví, chi sa suhva jeē cóndito ní i nuū jexeén.

16 Nasūu cuenta ñayīví cácuu i, nájñūhun máá ná jéē násūu cuenta ñayīví cúu ná.

17 Jín jñūhun ndaā ní te sáha ní jéē coo ndoo coo īi i nuū ní. Táca jñūhun cáhán máá ní cúu jñūhun ndaā.

18 Te nájñūhun ni tají ní sáña ní quiji ná ini ñayīví, suni súcuan tají ná i nacani i jñūhun ní núū ñáyuu ñayīví.

19 Te jehē máá i cúu jeē jéhe ná máá ná cuu ná, návāha suni máá i coo ndoo coo īi i nuū ni jéē jín jñūhun ndaā.

20 Te nasūu máá ñn-ni jehē ñáyuu yáha jícán tahú na, chi suni jehē táca gá ñáyuu jeē

candíje i sáña núu na cúni sōho i jñūhun jeē nácani máá i jínáhan i.

21 Te jícán tahú na jéē inuú na cóo ni i jínáhan i. Nájñūhun ñn-ni cúu ní jín ná, Tátā, te ñn-ni cúu ná jín máá ní, suni súcuan na cóo inuú i jín yó. Te cúni na jéē inuú na cóo ni i, návāha na cándíje ñayuu ñayīví jéē máá ní ni tají ní sáña.

22 Ni sajeñnu ná i nájñūhun ni sajeñnu ní sáña, návāha inuú na cóo ni i, nájñūhun inuú-ni cúu yó.

23 Te ndúú ná jín i, te ndúú ní jín ná, te súcuan te inuú cuiti coo ni i jínáhan i. Yūcuán na te cuni ñayuu ñayīví jéē máá ní ni tají ní sáña, jín jéē maní ndasí ní jín i nájñūhun maní ni jín ná.

24 Tátā, máá ní ni jéhe ní i nuū ná. Te cúni na jéē cóyūcú i jín ná nuū cóndee ná, návāha coto i ndese luu cújéñnu ná ni sáha ní. Chi íyó maní ndasí ní jín ná nde ná tu jecōo ñayīví te nde vijna.

25 Yaā ndaā cúu ní, Tátā, te ñayuu ñayīví tu jín i níhín, te máá ná chi jín na níhín. Te ñayuu yáha chi cájini i jeē máá ní ni tají sáña.

26 Ni steén na núū i jínáhan i ndese Yaā cúu ní. Te stéén gā na súcuan nuū i, návāha na cóo maní ndasí i jín jñáhan i, nájñūhun íyó maní ndasí ní jín ná, te návāha condee ná ini anuá i. Achí yá.

Jeē ní cajñi de Jesús
(Mt. 26.47-56; Mr. 14.43-50;
Lc. 22.47-53)

18

1 Te nuū ní cuu ni cahān Jesús tāca jnúhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan íyó ñn huerto nuū ní quívi ya jíin tēe cáscuáha jíin yá.

2 Te Judas, tēe jeē nastúu de ya, suni jíiní de lugar un, chí cuehē jíinu ni nataca Jesús yūcuan jíin tēe cáscuáha jíin yá.

3 Te ni jinū de yūcuan jíin ñn grupo soldado jíin jecu policía cándito templo, jeē ní catajéi sutū cácujeñnu jíin tēe grupo fariseo. Te cándiso de machete, te cájni de linterna jíin yiti.

4 Te Jesús je jíiní yā tāca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñn cámanducú ró?

5 Te ni cacahān de jíin yá:

Jesús tēe ñuu Nazaret cámanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíin tēe ún.

6 Te jeē súcuan ni cahān yā, máá rí cúu, te ni cajica yátá de, te ni cacotúu-ni de.

7 Yūcuán na te ni cajnúhún tucu ya de:

¿Ndé ñn cámanducú ró?

Te ni cacahān de:

Jesús tēe ñuu Nazaret.

8 Te ni cahān Jesús:

Je ni cachi rí jeē máá rí cúu. Te núu ruhū cámanducú ró, te máá-ni rí jñí ró, te tēe yáha na quíngoo de. Achí yá.

9 Súcuan ni cuu návāha na squícu jnúhun jeē ni cáhān yā jíin Tátá yā: Tu ní jéhe na

jnúhun naa ni ñn tēe jeē ni jéhe ni núu na, áchí yá.

10 Te Simón Pedro ndíso de ñn espada. Te ni tava de, te ni jehnde de sōho lado váha ñn tēe nání Malco. Te tēe un cúu de mozo máá sūtū cujéñnu.

11 Te ni cahān Jesús jíin Pedro:

Nachuvāha espada rō ini cubierta. ¿A tu cánuú jéé ndóho ri jnúndóho yáha jeē ni sándaā Tátá rí jeē ndóho rí? Achí yá.

Jeē ní indichi Jesús nuū sutū cujéñnu

(Mt. 26.57-58; Mr. 14.53-54; Lc. 22.54)

12 Yūcuán na te tācá soldado un, jíin capitán de, jíin tāca policía tēe hebreo un, ni cajñni de Jesús, te ni cajihni de ya.

13 Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máá sūtū cujéñnu ga cuiyā ún.

14 Te suu de ni cachi nuū jnáhan de hebreo jeē cánuú jéé cúu ñn tēe jehē nación de.

Jeē ní cachi Pedro jeē tu jíin de ya

(Mt. 26.69-70; Mr. 14.66-68; Lc. 22.55-57)

15 Te Simón Pedro jíin inga tēe scuáha, cándiquín de Jesús cuangoo de yatā yā. Te inga tēe scuáha ún chí jíiní jnáhan de jíin sūtū cujéñnu. Jeē yūcuan ní quívi de jíin Jesús ñni patio vehe sutū cujéñnu ún.

16 Te Pedro ni quendōo de yatā yehyí. Te máá tēe scuáha jéé jíiní jnáhan jíin sūtū cujéñnu ún, ni quenda de

ni cahān de jíin ñahan ndító yéhyí, te ni squávi de Pedro ini patio.

¹⁷ Yūcuán na te ñahan ndító yéhyí un ní cajnūhún ña Pedro:

¿A násūú ñn tēe scuáha jíin tēe índichi nuū sutū un cúu ró? Te ni cahān de:

Nasūu cúu ri, achí de.

¹⁸ Te tāca mozo jíin policía un ní cascáyú de ñuhūn jíin tícāyi, chí mījin sáha. Te cáhiin de cánasaā de. Te suni índichi Pedro, násaā de jíin tāca tēe ún.

Jeē ni stíchí sutū cujéhnu ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sutū cujéhnu un ní stíchí de Jesús ndé-ni cúu tēe cáscuáha jíin yá, jíin na jnūhun cúu jeē steén yā.

²⁰ Te ni cahān Jesús:

Níní ní cahān rī nuū chitú ñáyuu, ni cajini sōho ndihi ñayuu. Te níní ní steén rī jnūhun ini tācá vehe iī sinagoga jíin ini templo cáhnu nuū ndutútú ndivii jnáhan yó hebreo. Te tú ni ñn jnūhun ní cáhán sāhi rí.

²¹ ¿Te naun cájnūhun ró ruhū? Cajnūhun ñáyuu ní cajini sōho jnūhun ni cahān rī, te máá i cachi ndese ni cahān rī. Chí cajini i ndese ni cahān rī.

²² Te jeē ni cáhán Jesús súcuan, te ñn policía ndító templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū cujéhnu naún?

²³ Te ni cahān Jesús:

Núu ni cahān rī ñn jnūhun néé, cachi na jnūhun néé ní cahān rī. Te núu tu ní cáhán rī ñn jnūhun néé, ¿te naun cáni ró ruhū? achí yá.

²⁴ Yūcuán na te Anás, sutū cujéhnu un, ní tají de ya, núhni yā cuahān yā nuū Caifás, tēe cúu máá sūtū cujéhnu ga.

Jeē ní cachi tucu Pedro jeē tu jíin de ya

(Mt. 26.71-75; Mr. 14.69-72; Lc. 22.58-62)

²⁵ Te níní jeē súcuan cúu, te índichi-ni Pedro, násaā de yuñuhún. Te ni cacahān jíin de:

¿A násūú ñn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶ Yūcuán na te ñn mozo sutū cujéhnu, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quenda-coo de jíin Jesús vehe Caifás, cuango de jíin yá nde palacio tēe nación Roma jeē cúu gobernador. Te je cuacundi-jin. Te ñayuu hebreo tu ní quáviico i ini palacio, návāha tu stívi i ley i jeē cáhán jeē ma quávi i ini vehe ñn ñayuu jeē násūú hebreo cúu. Chí núu súcuan te ma cúu cuxini i vico pascua jeē cóo inga quivī ún.

29 Yūcuán na te ni quenda Pilato, tēe cúu gobernador, ni cahān de jíin i jíináhan i:

¿Na cuēchi cájicān rō siquī tēe yáha?

30 Te ni cacahān i:

Núu jeē násūu tēe cúnée cúu tēe yáha, te ma jnái ná de jeē quíndeca ná de nuū ni núu, áchí i.

31 Te ni cahān Pilato:

Cuángoo jíináhan rō, te sándaā rō siquī de jíin ley cánevāha máá rō.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ni ñin ñayuu.

32 Súcuau ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz.

33 Te ni ndívi Pilato ini palacio, te ni cana de jeē na quíji Jesús. Te ni cajnūhún de ya:

¿A máá rō cúu Rey ñayuu hebreo naún?

34 Te ni cahān Jesús jíin de:

¿A cájnūhun rō ruhū jeē súcuau jéni ni maá rō, chí jéé ní cacastūhun ñayuu hebreo nuū rō?

35 Te ni cahān Pilato:

¿Chí tēe hebreo cúu ri jeē cúni rī? Ñayuu nación maá rō jíin sūtū cácujuhnu ni cachihi róhó ndaha ri. ¿Na vé ni sáha rō núu súcuau? Achí de.

36 Te ni cahān Jesús:

Nasūu jéé ndácu ri jniñu nájnūhun cándacu tāca rey ñayívi yáha. Chi núu jeē ñayuu ñayívi ní casáha jeē cúu ri rey, yūcuán na te tēe cándiquin ruhū, cuajnáhan de návāha

ma quívi ri ndaha jnáhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

37 Yūcuán na te ni cahān Pilato jíin yá:

¿Te á ñin rey cúu rō jéé súcuau?

Te ni cahān Jesús:

Rey cúu ri, nájnūhun cáhán rō. Ni quíji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhu jnūhun ndaā, cájini nahín i jnūhun cáhán rī. Achí yá.

38 Te ni cahān Pilato:

¿Ndese cuni yō ndé ñin cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhán de jnūhun yáha, te ni quenda tucu de nuū ñayuu hebreo. Te ni cahān de jíin i:

Tú cuíti na cuēchi níhín rī siquī de.

39 Te íyó costumbre maá rō jíináhan rō jéé vico pascua te siaá rī ñin tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

40 Yūcuán na te ndívi i ni cacana jee tucu i:

Ma siaá ni tēe jíiná, chi Barrabás siaá ni, áchí i.

Te tēe cuíhná cúu Barrabás.

19

1 Yūcuán na te ni cahān Pilato jeē na jnái soldado Jesús, te cani de ya jíin cuarta ñin.

2 Te ni casáha de ñin corona iñu, ni cachuhun de xiní yā. Te ni cachuhun de ya ñin

sahma cuehé ndíhí jeē cúu sahma rey.

³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ñuhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíjnáhan rō.

⁶ Te nuū ní cajito sutū cácujuhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najni máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná iin ley, te jeē siquí ley un cánuú jeē cúu de, chí sáha de máá de jeē Séhe Yāá Dios cúu de.

⁸ Te jeē ní jini sōho Pilato jnūhun yáha, te víhyá gā ni yūhú de.

⁹ Te ni ndīvícoo tucu de ini palacio, te ni cajnūhún de Jesús:

¿Ndé nuū véji ró?

Te tu ní cáhán cuiti Jesús jíin de.

¹⁰ Yūcuán na te ni cahān de jíin yá:

¿Naun tu cáhán rō jeē cáhán rī? ¿A tu jíin rō jeē ndiso jniñu

ri jeē cáhni rī rohó jicā cruz, te suni ndiso jniñu ri jeē siaá rī rohó quihīn rō?

¹¹ Te ni cahān Jesús:

Núu tu ní sáha Yāá Dios jeē ndiso jniñu ró, te tú na vé cúu sáha ró síquī rī. Jeē yúcuan tēe jeē ní nacuāha ruhū ndaha ró, cuēchi xeēn gā condee siquī de vésú maá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chi cácana jee i:

Núu siaá ni tēe jíinā, te tu cúu ní amigo rey Roma jeē cujéhnu ndácu jniñu núu súcuan. Chi tāca tēe jeē sáha de rey maá de, núu súcuan te cúu de enemigo siquī rey un. Achí i.

¹³ Te jeē ní jini sōho Pilato jnūhun yáha, te ni ndacu de jniñu jeē na quenda Jesús ini vehe quiji ya. Te ni cucōo de silla nuū cūndaā jniñu, nuū máni máá yūu ni jecāva, te lugar un nání Gabata nuū yūhu hebreo.

¹⁴ Te cuacuu cahuxī uū, te jehíni quivī ún quejéé víco pascua. Te ni cahān Pilato jíin ñáyuu hebreo:

Yāha índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéé cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnáhan ná, chí máá-ni rey Roma jeē cujéhnu ndácu jniñu nuū ná.

16 Yūcuán na te Pilato ni nacuaña de ya nuū i jeē na cúu yā jicā cruz. Te ni cajñi i ya cuango i jín yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

17 Te ni quenda Jesús, ndíso ya cruz yā, cuango de jín yá ñn lugar nuū naní Yiqui Xíní, te nuū yúhu hebreo naní Gólgota.

18 Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn de ñn lado yā, te máá Jesús mēhñú.

19 Te suni ni ndacu Pilato jniñu jeē na cóndee jñuhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí.

20 Te cuehē ñayuu hebreo ni cacahu i jñuhun yáha, chí máá yajni yuñúú cúu nuū ní cacata caa de ya. Te jñuhun un yósó jín yuhu hebreo jín griego jín latín.

21 Te tāca sūtū cácujuhnu nuū ñayuu hebreo, ni cacahān de jín Pilato:

Ma tēe ní jēe cúu de Rey ñayuu hebreo, chí sa suhva tee ní jēe maá de ni cahān jeē cúu de Rey ñayuu hebreo.

22 Te ni cahān Pilato:

Ma násama ri jeē jé ni ndacu ri jniñu ni jecondee.

23 Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñ parte, te ñn ñn parte ni cuu ñn ñn soldado un. Te suni ni caquihin de camisa yā. Te

camisa un tu ní quícu, chí ni cunu ní.

24 Te ni cacahān maá de:

Ma cáhnde yō, chí vāha ga na sāha yó sorteo, te na cóndēhe yó ndé ñn yó níhñ, achí de.

Te súcuan ni squícu jñuhun yósó nuū tútu ñi nde jenahán jeē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

25 Te yajni cruz nuū ndíta caa Jesús íne náná yā, jín cúhū ña María ñasihí Cleofas, jín María ñuu Magdala.

26 Te ni jito Jesús nuū naná yā jín nuū tēe scuáha jeē maní gā yā jín, suni índichi de yūcuán. Te ni cahān yā jín náná yā:

Nánā, nde vijna te máá de nucuñiñ de cuu de sēhe ní.

27 Yūcuán na te ni cahān yā jín tēe scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jñi Jesús

(Mt. 27.45-56; Mr. 15.33-41; Lc. 23.44-49)

28 Yūcuán na te ni jini Jesús jeē jé ni jñu tācá jniñu jeē cánuú ndoho ya. Te návāha squícu jñuhun cáhán tutu ñi, te ni cahān yā:

Jíchí rī ndute, áchí yá.

29 Te yūcuan íñ ñn tñdohō ñuhun chitú vinagre iyá. Te ni cachundaji de ñn cachí nuū vinagre un, te ni catee de xiní ñn ndaha yújnu hisopo, te ni catee de yuhu ya jeē cóho ya.

30 Te ná ni jihi ya vinagre un, te ni cahān yā:

Je ni jīnu, áchí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

31 Te inga quivī ún coo vico pascua. Te tēe hebreo tu cácu ni de jeē cóndita caa ndīyī ún jicā cruz quivī ndétátú un. Chi quivī ndétátú jeē cúu vico pascua, iī ndasí gá vēsú tāca gá quivī ndétátú. Te ni cacahān de jín Pilato jeē na ndácu de jniñu jeē jnahnú sīhin tēe cándita caa, te na cújiyo de jicā cruz.

32 Te ni quecoo soldado, te ni cajehnū de sīhin iin tēe jeē ndíta caa jín yá, te suni súcuan inga de.

33 Te nuū ní quecoo de nuū Jesús, te ni cajito de jeē jé ni jihī yā. Jeē yúcuan tu ní cájehnū de sīhin ya.

34 Te iin soldado chi ni cují de lanza xiin ya, te ni cane-ni niñī jín ndute.

35 Te máá rí jeē tēe tutu yáha, ni jito rí jeē súcuan ni cuu, te nácani ndaā rí jnūhun ndese ni cuu. Te jín rí jeē iyó ndáa jnūhun cáhán rī, návāha suni candíje máá ró jijnáhan ró.

36 Chi súcuan ni cuu návāha squícu jnūhun cáhán tutu iī: Ma cahnú de ni iin yiqui ya, achí.

37 Te suni inga jnūhun cáhán tutu iī: iin quivī te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

38 Te ni cuu tāca jēe yáha. Te iyó iin tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chí yúhú de jnáhan de hebreo. Te ni cahān ndahú de jín Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús.

39 Te suni ni jinū Nicodemo, tēe ni quiji nuū Jesús iin jecuáa. Te ndíso de nájnūhun ocō uxī kilo sūje uvuā jeē ní saca jnáhan jín yúcū áloe.

40 Te ndindúú de ni caquihin de yiqui cúñu Jesús, te ni cachusúcun de jín tira sahama jeē ni quivī yucū jeē jeén asīn ún, nájnūhun iyó costume maá ñayuu hebreo jeē cáchindūji i ndīyī.

41 Te yajni nuū ni jihī Jesús iyó iin huerto. Te nuū huerto un ndéé iin yaū jeē ní caan jeé jicā iin cava, nuū ná tu quindūji ndīyī.

42 Te yúcuan ní cachindūji de Jesús, chí íne yajni yaū ndīyī ún. Chi je yajni quejéé quivī ndétátú de jeē cácuu de ñayuu hebreo, te tú na ley chindūji de ndīyī núu je ni quejéé quivī ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

1 Te jenéhen quivī domingo ni jinū María ñuu Magdala nuū ní yindūji Jesús, te yínee

gā cúu. Te ni jito ña jeē ní cu-
jiyo yuū ndihyú yuyáú ndīyi.

² Yūcuán na te jínu ña
cuahān ña nuū Simón Pedro
jín núu inga tēe scuáha ún jeē
maní gā Jesús jín. Te ni cahān
ña jín de:

Ni catava de Jitoho yō nuū
ní yindūji ya, te tu cájini yō
ndé nuū ní cachune de ya,
achí ña.

³ Te ni quendacoo Pedro
jín inga tēe scuáha ún,
cuácondēhé de yaū ndīyi.

⁴ Te cájini tayí ndindúú de.
Te inga tēe scuáha ún, nihin
ga ni jinu de vēsú Pedro. Te
xīhna gā de ni jinū yaū ndīyi.

⁵ Te ni scáyí de máá de, te ni
jito nihni de ini yaū. Te ni jito
de jeē tira sahma un cáyūcu
máá na. Te tu ní quívi de.

⁶ Te sáá te ni jinū Simón Pe-
dro jeē ndiquín jnāhan de vēji
de jín inga tēe ún. Te ni quívi
de nuū ní yindūji Jesús. Te
suni ni jito de jeē tira sahma
cáyūcu máá na.

⁷ Te ni jito de sahma jeē ni
ñúsúcún xíní Jesús, tu cátu jín
tira sahma, chi ni natuu te
cátú sīn.

⁸ Yūcuán na te suni ni quívi
inga tēe scuáha jeē ni jínū
xīhna gā nuū ní yindūji ya.
Te ni jito de ndese íyó, te ni
candíje de jeē ní natecu yā.

⁹ Chi nde ná tu jinūcoo de
yaū ndīyi, te tu ní jécūhun ni
de jnūhun cáhán tutu iī, jeē jíní
ñúhún natecu yā núu je ni jihī
yā.

¹⁰ Yūcuán na te ndindúú
tēe cáscuáha ún cuanungoo de
vehe de.

*Jeē ní nane ya nuū María
ñuu Magdala*

(Mr. 16.9-11)

¹¹ Te María índichi ña
ndáhyú ña nuū ní yindūji ya.
Te níni ndáhyú ña, te ni scáyí
ña máá ña, ni jito nihni ña ini
yaū ún.

¹² Te ni jito ña uū ndajéhé
andiví, cáñuhun ya sahma
cuijín. Te ñn ya néne ichi xíní,
te inga ya néne ichi núu jehé
nuū ni cátu yíqui cúñu Jesús.

¹³ Te ni cacahān yā jín ña:
¿Najehē ndahyú ró?

Te ni cahān ña:

Ni catava de Jitoho ná, te tu
jíní na ndé nuū ní cachune de
ya.

¹⁴ Te jeē ni cáhān ña súcuan,
te ni ndió cóto ña, te ni jito
ña nuū Jesús jeē índichi yā
yūcuán. Te tu ní nácuni ña jeē
maá yá cúu.

¹⁵ Te ni cahān yā jín ña:

¿Najehē ndahyú ró? ¿Ndé ñn
nánducú ró? achí yá.

Te máá ña jéni ni ña jeē tée
ndíto huerto cúu ya. Te ni
cahān ña jín yá:

Núu máá ní ni quenehen
ní yá, te cachi ní ndé nuū
ni jéchune ní yá, te na
quínuquihin ná yá, achí ña.

¹⁶ Te ni cahān Jesús jín ña:

María, achí yá.

Te jeē ni cáhān yā súcuan,
te ni nacuni ña ya, te ni ndió
cóto ña, te ni cahān ña jín
yuhu hebreo:

Raboni, achí ña. Te jnūhun
un cúní cahān, Maestro.

¹⁷ Te ni cahān Jesús jín ña:

Ma quehé ró rúhū, chí ná tu
ndaa rí quinuhun rī nuū Tatá

rī. Te cuáhán núū tācá hermano rī, tēe ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tatá maá ró jijnáhan ró cúu. Te cúu ya Yaā Dios maá rí jíin Yaā Dios maá ró jijnáhan ró. Achí yá.

18 Yūcuán na te María ñuu Magdala un, cuáhán ña, te ni castūhún ña nuū tée cáscuáha un jéē ní jito ña nuū maá Jítoho yō jíin jéē ni cáhán yā jnūhun yáha jíin ña.

Jeē ní nane ya nuū tée cáscuáha jíin yá

(Mt. 28.16-20; Mr. 16.14-18; Lc. 24.36-49)

19 Te jeē ní cuaa máa quívī domingo un, te cáhīin tūtú tée cáscuáha ún ini ñn vehe. Te cándihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahán yā jíin de:

Ndeyí sñ coo ni rō jijnáhan ró, áchí yá.

20 Te ná ni cahán yā súcuan, te ni steén yā ndaha ya jíin xiin ya nuū de. Te ni cacusiñ ni tée cáscuáha un jéē ní cajito de nuū maá Jítoho yō.

21 Yūcuán na te ni cahán tucu Jesús:

Ndeyí sñ coo ni rō jijnáhan ró. Te nájnūhun ni tají Tatá rī ruhū ini ñayīvī, suni súcuan tájí rí rohó nacani ró jnúhun ri nuū ñáyuu. Achí yá.

22 Yūcuán na te ni tivī tachī yā nuū de jíijnáhan de. Te ni cahán yā:

Vijna te ni canihīn rō Espíritu Santo.

23 Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

24 Te Tomás, tēe ni cacu cuatí, ñn jnáhan jeē uxí uū tée cáscuáha jíin yá, tu ní íne de quivī jeē ní nane Jesús nuū tāca gá tēe cáscuáha.

25 Yūcuán na te sava ga tēe cáscuáha un, ní cacahán de jíin Tomás:

Ni cajito ri nuū maá Jítoho yō.

Te ni cahán Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

26 Te nuū uná quivī, te tēe cáscuáha un cáhīin tūtú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahán yā jíin de:

Ndeyí sñ coo ni rō jijnáhan ró.

27 Te ni cahán-ni ya jíin Tomás:

Chune xinī ndáha ró ini ndaha ri yáhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje ró.

28 Yūcuán na te ni cahán Tomás jíin yá:

Aí, Jítoho maá ná jíin Yaā Dios maá ná cúu ní, áchí de.

29 Te ni cahán Jesús jíin de:

Tomás, nde ni jito ró nuū rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhu jeē ni stéén yā poder yā nuū téé cáscuáha jíin yá, jeē tu yósó nuū tútu yáha.

³¹ Te tācá jniñu yáha ní tee ri návāha candíje ró jijnáhan ró jéé Jesús cúu Cristo, maá Séhe Yaā Dios. Chi jeē candíje ró yá, te cotecu rō ní cāni sáha ya.

Jeē ní nane ya nuū uxá tē cáscuáha jíin yá

21

¹ Te ni cuu jecu quivī, te inga jíinu ni nane Jesús nuū téé cáscuáha jíin yá, jeē cáhiin de yumar Tiberias. Te suhva ni steén yā maá yá nuū de:

² Cáhiin tútu Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañū Galilea, jíin ndindúú séhe Zebedeo, jíin úu gā tēe cáscuáha.

³ Te ni cahān Simón Pedro jíin de jíjnáhan de:

Quíjnī ri chācá.

Te ni cacahān de:

Suni quingoo ri jíin ró.

Te cuangoo de, te ni quivicoo de ñn barco. Te tu ní cānihīn cuiti de ti jecuáa yúcuān.

⁴ Te jeē cuácundijin, te íne Jesús yumar. Te tēe cáscuáha

ún, tu ní cānacuni de jeē maá yá cúu.

⁵ Yūcuān na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiti, achí de.

⁶ Yūcuān na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiti natava de, jeē ni quivicoo cuehē ndasí cháca.

⁷ Yūcuān na te tēe scuáha jeē maní gā Jesús jíin, ní cahān de jíin Pedro:

Máá Jítoho yō cúu, achí de.

Te jeē ní jini sōho Simón Pedro jeē maá Jítoho yō cúu, te ni nachuhun de sahma de, chi ni tava de jeē sājniñu de. Te ni ndava-ni de nuū mar cuahān de nuū yā.

⁸ Te tāca gā tēe cáscuáha ún, vendicoo de jíin barco yundúte, cástaa de ñunu ñuhun chitú cháca. Chi tu jíca cáhiin de jíin ñuhun íchi, chi nájñuhun ciento-ni metro cúu.

⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñn chācá chíhyó.

¹⁰ Te ni cahān Jesús jíin de:

Cuáquihin jecu chācá jéē na ní cajñī ró, na táu yó, achí yá.

¹¹ Te ni quivī Simón Pedro ini barco, te ni stāa de ñunu, ni quee de jíin ndé nuū ñuhun íchi. Te ñuhun chitú cháca náhnu, ñn ciento uū xico uxī unī tī cúu. Te vēsú ñn súcuān ti ñuhun, te tu ní táhndé ñunu.

12 Te ni cahān Jesús jiin de:
Nehen jijnáhan ró na cási ni
yō.

Te ni iin tēe cáscuáha ún tu
ní cūndeyí ni de cajnūhún de
ya núu ndé iin cúu ya. Chi je
cájini de jeē maá Jítóho yō cúu
yā.

13 Te ni quindēhe Jesús
yuñūhún, te ni quihín ya staā
ún, te ni jēhe ya nuū de, te
suni súcuan chācá un.

14 Yāha cúu vuelta unī jeē ní
nane Jesús nuū tēe cáscuáha
jiiin yá, ná ni natecu yā.

*Jeē ní ndajnūhún Jesús jiin
Simón Pedro*

15 Te nuū ní cuu ni cajesi
ni de, te Jesús ni cajnūhun yá
Simón Pedro:

Simón sēhe Jonás, ¿á mánī
gā rō jiiin rí vēsú tāca gá tēe
yáha?

Te ni cahān de:
Je jiiin ní jeē maní na jiiin ní,
achí de.

Te ni cahān yā jiiin de:
Núu súcuan te stéén rō
jnūhun ri nuū ñáyuu cácuu
nájñūhun londe ri.

16 Te ni cajnūhun yá de
vuelta uū:

Simón sēhe Jonás, ¿á mánī
rō jiiin rí?

Te ni cahān de jiiin yá:
Je jiiin ní jeē maní na jiiin ní,
achí de.

Te ni cahān yā:
Condito rō ñáyuu cácuu
nájñūhun lanchi ri núu
súcuan.

17 Te ni cajnūhún tucu ya de
vuelta unī:

Simón sēhe Jonás, ¿á mánī
rō jiiin rí?

Te ni cucuíhyá ni Pedro jeē
ní cajnūhun yá de vuelta unī

núu maní de jiiin yá. Te ni
cahān de:

Máá ní jiiin ní ndihí, te jiiin ní
jeē maní na jiiin ní.

Te ni cahān yā:
Núu súcuan te stéén rō
jnūhun ri nuū ñáyuu cácuu
nájñūhun lanchi ri.

18 Te jendaá cahán rī jiiin
ró jeē nde ná suchí ró, te ni
quihín máá ró sahma ró, te ni
jica ró ndé nuū cuní maá ró.
Te núu na yí ró, te nasūu jeē
cuní maá ró, chí inga ñáyuu
quindēca i rōhó nuū tu cuní rō
quihín rō. Te scáá rō ndindúu
ndaha ró jeē cuu rō.

19 Jnūhun yáha ní cahān yā
jeē ni stéén yā jeē cóndita
caa de jicā cruz cuu de, te
jeē súcuan cuatáhú de cúu jeē
steén de jeē yóhoyo cújéhnu Yāa
Dios. Yūcuán na te ni cahān gā
yā:

Condiquín rō ruhū jeē sáha
ró jniñu ní ndacu ri nuū rō,
achí yá.

*Jnūhun tēe scuáha jeē maní
gā yā jiiin*

20 Te ni ndió cóto Pedro, te
ni jito de tēe scuáha jeē maní
gā Jesús jiiin, ndíquín de vēji de
yatā. Tēe un cúu jeē ní conene
xiin Jesús ná ni cacuxíni de
jiiin yá, te ni cajnūhún de ya:
¿Ndé iin de cúu jeē nastúu
níhín?

21 Te jeē ní jito Pedro nuū
tēe ún, te ni cajnūhún de Jesús:
Te tēe yáha, ¿ndese coo jiiin
de?

22 Te ni cahān Jesús:
Núu cuní rī jeē cótecu de
nde quiví ndíji ri, ¿te naun
ndíhví ni rō? Máá ró chí
condiquín rō ruhū jeē sáha ró

jniñu ní ndacu ri nuū rō, achí yá.

²³ Yūcuán na te jnūhun yáha ní jitē núu nuū tācá hermano, jeē tée scuáha un má cúū de. Te tu ní cáhán Jesús jeē ma cúū de, chi sa suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

²⁴ Te tée scuáha un jéē maní gā Jesús jíin, suu cúu ruhū jeē nácani jnūhun tācá jniñu yáha, te suu ri tée tāca jnúhun yáha. Te cájini rō jijnáhan ró jéē iyó ndáā jnūhun nácani ri.

²⁵ Te suni íyó cuéhē ndasí gá jniñu ní sáha Jesús. Te núu tee yó ná ñn ná ñn, te ma cánda ní ñáyīví cuhun tutu jeē cóso jnūhun ún, jéni ni rī. Te ni cuu. Amén.

JNIÑU JEHNU JEE NI CASAHA TEE APOSTOL

*Jeē ni jéjnūhun ya quiji
Espíritu Santo*

¹ Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya

² te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tē ni nacāji ya.

³ Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū téé un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴ Te ná cáhīn tútú de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun maá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo.

⁵ Chí Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quivī te nájnūhun cuandute ró jíin Espíritu Santo, cúu jeē condee yā ini anuá rō, áchí yá.

*Jeē ní ndaa Jesús cuanuhun
yā andiví*

⁶ Yūcuán na te tēe cáhīn tútú jíin yá, ni cacajnúhún de ya:

¿A vijna te nasáha ní jéē ñáyuu ñuu yō Israel ndujéhu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quivī chí cuiyā jeē cóo jeē ní sándaā maá Tátá rī, chí máá in-ni máá yá jiní yā na quivī sáha ya.

⁸ Te jeē cúni rō cúu jeē quée Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹ Te ni ndihī ni cahān yā táca jnúhun yáha. Te níiní cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya.

¹⁰ Te níiní cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jíjnáhan de, te cájito ya nájnūhun tēe.

¹¹ Te ni cacahān yā jíin de:

Róhó téé Galilea, ¿najehé cájito ndaa ró ichi ándiví? Chí máá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

Jeē ní canacāji de Matías jeē nucuĩñĩ de nuū Judas

12 Yūcuán ña te ni nanungoo de yucu jeē naní Olivos, cuanungoo de ñuu Jerusalén. Te yajni-ni ine yucu un jíin ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quivĩ ndétātú.

13 Te ni ndivicoo de ini ñuu. Te ni ndacoo de cuarto xinĩ véhe nuū cáyūcu núu de. Te tācá de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo.

14 Tāca tée yáha, níni cándutútú inuú de cájicān tahu de jíin tāca ñani Jesús jíin náná yā María jíin sava ga ñahan.

15 Te ñn quivĩ te ni jcondichi Pedro nuū tācá hermano cácandíje. Te cáhñn nájnūhun ciento ocō ñayuu. Te ni cahān de:

16 Hermano jijnáhan ní, ni squícu nahín jnúhun cáhān tutu ñi jeē ni cáhān David nde jenahán ní sáha Espíritu Santo. Te jnūhun un ní cuu síquĩ Judas jeē ní yosnúu núu tée ni cajññi Jitoho yō Jesús.

17 Te suu tée un ní jica de jíin yó, te ni chindéé ñáhán jnáhan de jíin yó síquĩ jññu ní jeni ya yohó.

18 Te ni cajeen ñn ñuhun jíin xúhun ní nihñn tée un síquĩ jññu neé ní sáha de. Te ni ñinga ndeyĩ de, te ni ndatā sáva chĩji de, te ndihĩ yiti de ni jite.

19 Te ni jite jnūhun yáha núu tāca ñáyuu cáyūcú ñuu Jerusalén, te jeē yúcuán cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta ñññ.

20 Chi súcuán je yósó núu tútu Salmo síquĩ Judas:

Vehe de na quéndōo iyú, te ma cóndee ni ñn ga ñayuu ini vehe ún.

Te suni cáhān:
Jññu ní condiso de na cóndiso inga tēe.

Achí.

21 'Núu súcuán te jíni ññhún jeē nucuĩñĩ ñn tēe lugar maá de jíin yó. Te tēe nucuĩñĩ jíin yó un, nacāji yó de mēhñu tāca tée ni cajica jíin yó tāca quivĩ jeē ní jica máá Jitoho yō Jesús jíin yó.

22 Te tēe nacāji yó un cúu tēe jeē ni íyo de jíin yó nde quivĩ ní jendute ya ni sáha Juan, te nde quivĩ ní ndaa ya cuanuhun yā andiví. Te tēe nucuĩñĩ jíin yó na cúu de tés-tigo jíin yó jeē jé ni natecu yā, achí de.

23 Te ni catee nuū de uñ jnáhan tēe: Matías jíin José jeē naní de Barsabás te suni nání de Justo.

24 Te ni cajicān tahu de:

Tátā Yā Dios, máá ní chi jññi ní ndese cáa ánuá tāca ñáyuu. Núu súcuán te jeē ndindúú tée yáha, stéén ni ndé ñn de cúu jeē ní nacāji ní.

25 Te condiso jññu de cuu de apóstol. Te naquihin de jññu ní stóo Judas, chi ní sáha de cuēchi te cuahān de lugar xeēn nuū cánuú quihñ de, achí de.

26 Yūcuán na te ni casáha de ñn sorteo te ni jinū Matías, te ni nucuiñī de ni nduu de jnáhan ndihúxí ñn apóstol.

Jeē ní quee Espíritu Santo

2

1 Te máá quívī víco Pentecostés ni cahīn tūtú ñayuu cácañdije ñuu Jerusalén.

2 Te sanaa-ni te ni quejéé níhin vēji nde andiví nájnūhun tachī níhin quée, te tāca ñayuu jeē cáyūcú ñni vehe un ní cajini sōho i jeē níhin ún.

3 Te ni cajito i nájnūhun yáñuhūn jeē ní cajitē núu te ni cacucōo xinī ná ñn ná ñn i.

4 Te ndihī i, ni cunuú Espíritu Santo jíin i, te ni quejéé i cácahān i sīn sīn yuhu, ndese ni steén maá Espíritu nuū ná ñn ná ñn i cahān i.

5 Te ñuu Jerusalén, suni cáhīn ñayuu hebreo, yíñuhún núu Yaā Dios, jeē ní quijicoo i nde tācá nación ní cáhnu ñayiví.

6 Te jeē ni níhin súcuan te ni cacutútú cuéhē ñayuu ún. Te ni cunéé íni i jíjnáhan i, chí ná ñn ná ñn i ni cajini sōho i jeē téé ni canihīn Espíritu Santo cácahān de jnūhun yuhu ñúu jicá nuū vēji i.

7 Te ni canaa ni i cájito i te ni cacahān i:

¿A násūu téé Galilea cácuu tāca téé yáha jéé cácahān de tācá yuhu ñúu nuū véjicoo yó?

8 ¿Na vé ni cuu yáha núu súcuan? Chí ná ñn ná ñn yó cájini sōho yó cácahān de jnūhun yuhu ñúu nuū ní cacacu yó.

9 Chi vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia.

10 Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē véjicoo ñuu Roma, sava yó cácuu máá ñayuu hebreo te sava ga yō cácuu ñayuu sīn ñuu, ni cacandije yó ndíquín yō ley ñayuu hebreo.

11 Suni nde Creta jíin Arabia vējicoo sava yó. Te cájini sōho yó jéé jíin jnūhun yuhu ñúu ná ñn ná ñn máá yó cácahān de tācá jniñu jéhnu ní sáha Yaā Dios, achí i.

12 Te ndihī i chí ni canaa íni i cájini nahín i. Te ni candajñuhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yō? achí i.

13 Te sava i ni cacahān catá i:

Tuú chí jeē cánajīni de, achí i.

Jeē ní nacani Pedro jnūhun nuū ñayuu

14 Yūcuán na te ni candocuiñī Pedro jíin ndihúxí ñn ga apóstol, te ni cahān jee Pedro jíin ñayuu ún:

Níhín jnáhan ñuu yō hebreo, jíin ndihī níhín jéé cáyūcu ní Jerusalén, jnūhun yáha na chúhun ni ní jíjnáhan ní, chí cuni nahín ní cahān na jíin ní.

15 Chi máá ná jijnáhan ná, nasūu jeē cájīni ná nájñūhun cájeni ni ní, chi sáá cahñ jenéhen cúu, te nasūu hora cánajīni ñayuu cúu.

16 Chi sa suhva squícu jniñu yáha nájñūhun ni cahñ Joel, tēe ni nacani jñūhun Yaā Dios nde jenahán, chi súcuan ni cahñ de:

17 Achí Yáā Dios: Quiṽí sándīhí na

te taji rí Espíritu rī cunuú yá jíin táca ñayuu,

te sēhe yí ró jíin séhe sñhí ró, nacani i jñūhun rí,

te táca tēe lulí chi coto ndijin de jeē steén rī nuū de,

te táca tēe jéñu chi sáha rí jeē scóto jēni de.

18 Te quiṽí ún chi taji rí Espíritu rī cunuú yá jíin táca mozo rī, cúu tēe cúu ñahan,

te nacani i jñūhun rí.

19 Te ichi ándiví sáha rí jniñu jéñu jeē náā ni ñayuu coto i,

te sáha rí jniñu jéñu ini ñayiví jēe steén jeē cujéñu rí, chi coo niñí jíin ñúhūn jíin ñúhmā nájñūhun vicō.

Yūcuan cúu jeē sáha rí jeē cóo jñūndóho xeēn.

20 Te nduu jnúú níandii te ma cúndijin gā,

te yoō coto cuéhé nájñūhun niñí.

Yūcuán na te quee quiṽí jeē ndíji máá Jítóho rō Jesús.

Quiṽí ún coo cuehē jniñu jéñu, te cuni ndíhi ñayuu jeē quiṽí máá Jítóho rō cúu.

21 Te táca ñayuu jeē cahñ ndahú i jíin yá te jnama ya i, áchí Yáā Dios.

Achí Joel ni nacani de jñūhun ya.

22 Jeē yúcuán níhín tēe ñuu yō Israel, cuni nahín gá ni jñūhun yáha jijnáhan ní. Ni steén Yaā Dios jeē ní taji yá máá Jesús, Yaā ní jéñu ñuu Nazaret, chi máá Yáā Dios ni jēhe ya jeē ni sáha Jesús jniñu jéñu mēñū máá ní, jíin jniñu jeē steén jeē cujéñu ya, te jniñu un ní canaa ni ní ní cajito ní. Te je cájimi vāha ní jēe súcuan ni cuu.

23 Te máá ní ni cajniñí ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jijnáhan ní, chi súcuan je ni sándaā yā.

24 Te ni nastécu Yaā Dios Jesús te tuá ni cúu ya ndīyi, chi jñūhun xeēn jeē jihí ñayuu, tuá na vé cúu ga sáha jíin yá.

25 Chi nde jenahán suhva ni tee David jñūhun ndese ni cahñ Jesús jíin Yáā Dios:

Jíní na núū máá ní jeē cúu ní Jítóho ná, chi ní cáni ndéé ní jíin ná,

chi ndéé ní ichi ndáváha ná, cúu jeē chindéé ñahán ní sáña náváha coo ndeyí ni ná.

26 Jeē yúcuán cúsiñí ni ná te cáhan na jñūhun siñí ni.

Jeē yúcuán ma nácani uhū ni na síquī jñūhun cuu ná.

27 Chi ma cuáha ni jñūhun quendōo ánuá na lugar nuū cáyūcu ánuá ndīyi,

ni ma cuáha ni jnúhun tehyū
ná, chi jéjniñu ná núū
ní te manī ni jíin ná.

28 Te ni steén ni núū na jéē
nátecu ná,

te sáha ní jéē cusñ teyí ni ná
condee na jíin ní ní
cáni.

Achí Jesús, ni achi David.

29 'Tāca níhín jíjnáhan ní,
na cástūhun cájí ná nuū ni
jnúhun jíi yō David, chi tu ní
cáhán de jnúhun yáha síquī
maá de. Chi ni jihī de te
ni quindūji de, te jíin yō nuū
yíndūji de nde vijna.

30 Chi ni cuu de tēe ni
nacani jnúhun Yaā Dios nde
jenahán. Te ni jini de jeē váha
ni jejnūhun ya nuū de jeē chíji
yucūn maá de quiji Cristo, te
condee yā mesa de ndacu ya
jniñu nájnūhun ni ndacu de
jniñu jeē ní cuu de rey.

31 Te nde jíin tiempo ni jini
de jeē nátecu Cristo, te ni
cahān de jeē anuá yā, ma
ndóo lugar nuū cáyūcu ánuá
ndīyí, ni yiqui cúñu yā ma
tehyū.

32 Chi Yaā Dios ni nastécu
yā Jesús, te máá ná cácuu ná
testigo jeē ní natecu yā.

33 Te ni ndujéhnu tucu ya
ni sáha Yaā Dios jíin poder
yā. Te nde nuū maá Yāā Dios,
Yaā cúu Tátá yā, ni nihīn Jesús
Espíritu Santo, chi súcuan ni
jejnūhun ya. Te ni tají Jesús
Espíritu Santo, te suu ya sáha
jniñu jeē cájito ní te cájini sōho
ní vijna.

34 Te David, nasūu síquī
maá de ní cáhán de tāca
jnúhun yáha, chi tu ní ndáa
yiqui cúñu de andiví. Chí

siquī Cristo cúu jeē ni cáhān
de suhva:

Maá Yāā Dios ni cahān yā jíin
Jítoho rī Cristo:

Cucōo ró ichi ndáváha ri jeē
steén jeē cujéhnu ró.

35 Te na sáha ri jeē quende
rō poder tāca jéē cájito
uhū rohó, áchí yá.

Achí David.

36 'Núū súcuan te ndihí ní jéē
cácuu yó ñayuu Israel, na cúni
vāha ní jéē vēsú ni cajehni ni
yá jicā cruz, te Yaā Dios ni jeni
ya maá Jesús jeē cúu ya Jítoho
yō te suni cúu ya Cristo, Yaā
jnáma yóhó, áchí Pedro jíin i.

37 Te jeē súcuan ni cajini
sōho i jnúhun yáha, te ni caj-
nahuhū ni anuá i. Te ni ca-
cajnūhūn i Pedro jíin tāca gá
apóstol:

¿Te ndese sáha ná jíjnáhan
ná núū súcuan? áchí i.

38 Te ni cahān Pedro jíin i:

Nacani ni ní jéē stóo ni
cuéchi ní jíjnáhan ní, te cuan-
dute ní jéē ní cacandíje ní Je-
sucristo, návāha cone cáhnu
ni Yaā Dios nuū cuéchi ní, te
cuāha Yaā Dios Espíritu Santo
yā condee yā ini anuá ni.

39 Chi súcuan ni jejnūhun
maá Tátá yō Yaā Dios nuū yō
jíin núū séhe yó, te suni súcuan
ni jejnūhun ya nuū ñayuu tāca
gá nación, tācá i jeē cána ya i
candíje i.

40 Te jíin cuéhē gā jnúhun
súcuan ni cahān cají Pedro, te
ni stihví ni de i:

Nducú ndéyí ní jeē na cácu
ní, chi jnahnū ndetū ñayuu
casáha jniñu néé, áchí de.

41 Yūcuán na te tācá i jeē ní
cajetáhú jnúhun ni cahān de,

ni cajendute i. Te quivī un ní nducuehē gā ñayuu cá candíje, nájnūhun unī mīl gā ñayuu.

⁴² Te ni cahīin nīhin i siquī jnúhun cástéén apóstol. Te inuú-ni cándajnúhun mánī i te cájicān tahu i, te in cáhnu-ni cáyeji i pan, nájnūhun ni steén maá Jítoho yō jeē núcūhun ni yō siquī yā.

Ndese ni coyūcu ñáyuu jeē ní cacandíje jeē xíhna ñúhún

⁴³ Te ndíhi ñayuu ni cayūhú i ni cajito i, chí cuehē jniñu jéhnú jeē steén jeē cujéhnú ya ni casáha tēe apóstol.

⁴⁴ Te inuú ní cahīyo ni ñayuu cá candíje, te ni cacuu inuú i tāca jéē cánevāha i.

⁴⁵ Te ni caxícó i na-ni na vé cánevāha i, te ni casaja i xūhún un nūū tāca jnáhan i, nūū ndese jíni ñúhún in in i.

⁴⁶ Te ndijnahan quivī ni candutútú i ini templo. Te manī ni cayeji cáhnu i pan tācá vehe jnáhan i nájnūhun ni steén yā, te ni cahīyo sīh ni i.

⁴⁷ Te ni cacahān i jeē yóhýo cújéhnú Yaā Dios. Te ndíhi ñayuu ñuu un ní cajejnúhún i ñayuu cá candíje. Te ndijnahan quivī ni jnama Jitoho yō sava ga ñayuu, te ni nduu inuú i jíin ñáyuu cá candíje.

Jeē ní nduvāha tēe ríngo

3

¹ Te in quivī te máá cáhunī jehíni ni caa Pedro jíin Juan cuango de templo, chí hora un cájicān tahu jnáhan de hebreo.

² Te cájendēca ñayuu in tēe cáringo nde quivī ní cacu de.

Te tēe un ndéé de ndijnahan quivī yehyí templo jeē naní Hermosa, jícān de caridad nuū tāca ñáyuu quivícoo ini templo.

³ Te tēe un ní jito de nuū Pedro jíin Juan jeē véji de quivícoo de ini templo, te ni jícān de caridad nuū Pedro jíin Juan.

⁴ Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núū rī jijnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núū de.

⁶ Te ni cahān Pedro:

Tú na xūhun plata ni xūhun oro cánevāha rī. Te íyó in jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhán rī jíin ró, ndocuiñī te caca ró, achí de.

⁷ Te ni jni de ndaváha tēe ún, te ni ndonehen de. Te jehē de jíin súcūn jehé de ni nduvāha-ni.

⁸ Te in ni scánda de máá de ni ndocuiñī de, te ni quejéé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios.

⁹ Te ni cajini tāca ñáyuu jeē jíca de te nácuatáhú de nuū yā.

¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jícān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jñūhun ini corredor jeē nani Salomón

11 Te tēe ni nduvāha ún, tu siaá de Pedro jín Juan. Te ni cacutútú-ni cuehē ñayuu nuū de ini corredor jeē nani Salomón, te ni canaa ni i cájito i.

12 Te ni jito Pedro jeē ní cutútú ñayuu ún, te ni cahān de jín i:

Níhín tēe ñuu yō Israel jijnáhan ní, ¿najehe cánaa ni ni cájito ní jniñu yáha? ¿Najehe cájito ní núu ná te cájeni ni ni jēe maá ná jijnáhan ná iyó poder na jēe sáha ná jēe nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní?

13 Tuú chi máá Yāa Dios jíi yō Abraham jín Isaac jín Jacob jín táca gá jíi yō, ni sáha ya jniñu yáha návāha cuni ñayuu jeē cujéhu Sēhe ya Jesús, Yāa jeē ní cajendēca ní núu tēe cácujuhnu. Te ná ni cuni Pilato jeē siaá de ya, te tu ní cájēhe ni jñūhun.

14 Te ni casquéhichī ni yá vēsú cúu ya Yāa ndaā, Yāa iī. Te sa suhva ñn tēe jéhu ndīyi ni cacahān ni jín Pilato jeē na siaá de.

15 Te ni cacahān ni jēe na cúu Yāa jeē sáha jeē técu ndihī-ni. Te Yāa Dios ni nastécu yā Jesús jeē ní cuu ya ndīyi, te máá ná cácuu testigo jeē ní natecu yā.

16 Te tēe yáha jēe cájito ní te cánacuni ní de, ni candíje de jín ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha

vāha de nájñūhun cájito ndihī ní.

17 Te na cástūhun ná nuū ni jijnáhan ní, je jíi na jēe maá ní jijnáhan ní jín tēe cácujuhnu nuū yō, tu ní cájecūhun ni ní, te jeē yúcuan ní cajehni ni yá.

18 Te súcuan ni squícu jñūhun ni cahān Yāa Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jñūhun ya nde jenahán.

19 Te na nácani ni ni jēe stóo ni cuéchi ní, te nasāma ini ní, te quivicoo ní ndaha Yāa Dios návāha ndahva yā cuéchi ní. Te quee quivī jeē ndúsī ni ni sáha máá Jítoho yō.

20 Te natají yá Jesús ndiji ya, chi cúu ya Cristo, Yāa ní jeni Yāa Dios jeē jnáma ya yohó.

21 Te jíi ñúhún jēe cóo ya andiví ndé nasájeé yá táca jēe iyó, nájñūhun ni cacahān tēe ndoo ni canacani jñūhun nde jenahán ní sáha Yāa Dios.

22 Chi suhva ni nacani jíi yō Moisés jñūhun nuū táca jíi yō: Máá Jítoho yō Yāa Dios cani ya Yāa nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chúhun ni rō táca jñūhun jeē nácani ya ún.

23 Te núu ndé tēe tú chuhun ni de jñūhun cahān yā, jnahnú ndetū de, te ma cúu ga de jnáhan ñayuu yā Israel, áchí Moisés.

24 Te táca tēe ni canacani jñūhun nde jenahán, nde tiempo ni quií Samuel te ní gá nde vijna, suni ni canacani de jñūhun siquī táca jniñu cúu

quívī yáha.

²⁵ Yucūn maá téé ni canacani jnūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū tāca ñáyuu ní cáhnu ñayīvi, áchí yá.

²⁶ Te jeē ní nastécu Yaā Dios Sēhe ya, te ni quiyi ya nuū maá yó xihna gā, návāha quendōo ndetū yō sáha ya, chí sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jíin Juan nuū tēe cácujuhnu

4

¹ Te Pedro jíin Juan níni cácahān gā de jíin ñáyuu ún te ni quecoo tāca sūtū jíin tēe grupo saduceo, jíin tēe cácujuhnu nuū tēe cándito templo.

² Te yōhyo ni caquiti ni de siquī jeē castéén Pedro jíin Juan nuū ñáyuu, jíin jéé cánacani de jnūhun jeē nátecu ndīyi chí je ni natecu Jesús.

³ Te ni cajni ún de, te ni cachuhun ún de vecāa cone de nde cundijin inga quívī, chí je ni ini.

⁴ Te cuehē ñayuu jeē ní cajini sōho jnūhun ní cacahān Pedro jíin Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quívī ún, te tēe cácujuhnu nuū ñáyuu hebreo jíin tēe jéhnu cándiso jniñu jíin tēe cástéén

jnūhun tutu ley yā, ni candutútú de ini ñuu Jerusalén.

⁶ Te suni ni candutútú de jíin Anás jeē cúu sutū cujéhnu ga, jíin Caifás jíin Juan jíin Alejandro jíin táca gá jeē cácuu jnáhan sutū cujéhnu ga ún.

⁷ Te ni candacu jniñu jeē na quíjicoo Pedro jíin Juan condichi de mēhñú, te ni cajnūhún de:

¿Ndé ñn ni tejniñu róhó te ndese ni nihīn jniñu ró ní sáha ró jéé nduvāha tēe yáha? áchí.

⁸ Yūcuán na te Pedro chí ni cunuú maá Espíritu Santo jíin de, te jíin poder yā ni cahān de jíin táca tēe ún:

Tāca níhín tēe cácujuhnu nuū ñūū yō Israel jíin táca níhín tēe jéhnu cándiso jniñu,

⁹ vijna te cástíchí ní sáha siquī ñn jniñu váha ní casáha ná jéé ní nduvāha tēe cúhú yāhá.

¹⁰ Te na cástūhun ná nuū níhín jéé cácujuhnu ní, návāha suni cuni ndihi jnáhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ní yáha. Te suu ya cúu Yaā jeē ní cajehni ní jíicā cruz, te ni sáha Yaā Dios jeē ní natecu yā.

¹¹ Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ni casquéhichí ní yá nájnūhun jeē cátejiyo ní yūū, chí tu ní cacandíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe.

¹² Te tú cuiti inga jeē cúu jnama yóhó, chí tuá na inga

jeē cujéhnū ní jéni Yaā Dios ini ñayīvi yáha jéē cúu jnama yóhó, áchí Pedro.

13 Yūcuán na te ni cajini un jeē Pedro jíin Juan jéhnū-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús.

14 Te cándēhe núū tēe ni nduvāha un, índichi de jíin Pedro jíin Juan, te tu ní cánihīn gā modo ndese ga cahān.

15 Yūcuán na te ni candacu jniñū jeē na quéndacoo sīn de yatā véhe juzgado te nda-jnūhun máá jíjnāhan.

16 Te ni cacahān:

¿Nde se sáha yó jíin tēe yáha núu súcuan? Chi ní jitē jnūhun yáha núū táca ñáyuu ñuu Jerusalén jeē súcuan ní casáha de in jniñū jéhnū, te ma cúu cahān yō jeē tu iyó ndāā.

17 Te návāha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní in ñayuu, áchí.

18 Te ni cacana ún de, te ni cacahān nīhin jíin de jeē ma cahán cuiti gā de jnūhun Jesús ní ma steén gā de jnūhun un núū ní in ñayuu.

19 Yūcuán na te ni cacahān Pedro jíin Juan:

Cani vāha ni ní te núu nújnahan ní Yaā Dios jeē stóo ná jniñū ní ndacu ya jeē sáha ná te cuandije ná máá na jniñū nándacu ní.

20 Chi ma cúu stóo ná jniñū jeē nácani ná jnúhun ní cajini sōho ná jíin jniñū ní cajito ná, áchí de.

21 Yūcuán na te tēe ni cacutútú un ní cacuxeēn tucu de nuū Pedro jíin Juan. Te ní casiáá de cuango de, chi tú cuiti na modo stóho de chi cáyūhu cájito ñayuu, chi siquī jniñū jéhnū ni cuu ún te ndihi i cácahān i jeē yóhyo cújéhnū Yaā Dios.

22 Chi tēe jeē ní sáha ya jniñū jéhnū jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cácañdije

23 Te ná ni casiáá un Pedro jíin Juan cuango de, te ní najinūcoo de nuū táca gá jnāhan de, te ni cacachi de ndese ní cacahān sutū cácujehnū jíin tēe jéhnū cándiso jniñū.

24 Te jeē ní cajini sōho de jnūhun yúcuán, te inuú-ni ní cajicān tahú de nuū Yaā Dios:

Tátā Yaā Dios jeē cujéhnū ní núū ndihi, máá ní cúu Yaā Dios ní sáha andiví jíin ñáyīvi jíin mar jíin táca ndihi jeē iyó.

25 Te jeē jíin Espíritu Santo te ní sáha ní jéē ní cáhān mozo ní David nde jenahán:

¿Najehē cáquitī ndevāha ní ñayuu sīn nación?

¿Te najehē cájeni sáá ni i jeē ndónnda i siquī ní?

26 Ni cacutútú jeē cácuu rey ñayīvi jíjnāhan,

te tēe cácujehnū ní cacutútú de,

te inuú-ni ní candonda de siquī maá ní jeē cúu ní Jitoho ná,

jíin siquī Cristo, Yaā jeē ní jeni ní.

Achí David.

27 Te jendaá chi Herodes jíin Poncio Pilato jíin táca tēe

ñuu yō Israel jiín tée tāca gá nación, ni cacutútú de ini ñuu yáha ní candonda de siquī Séhe iī ní Jesús, Yaā ní jeni ní.

28 Te súcuan ni cuu návāha squícu tācá jniñu jeē jiín poder ni ní cundaā ni ni ndé jenahán jeē súcuan coo.

29 Te vijna, Tātā, coto ní ndese cácahān xeēn de nuū na jijnáhan ná, te cuāha ni fuerza ni núu na jeē cácuu ná mozo ni, návāha jéhnun-ni nacani ná jnúhun máá ní.

30 Te jiín poder ní nasávāha ni ñayuu cácuu, te sáha ní jniñu jéhnun jeē steén jeē cujéhnun ní. Te tāca jeē yáha sáha ní jiín poder Séhe iī ní Jesús, áchí i jijnáhan i.

31 Te nuū ní ndihi ni cajicān tahu i, te nuū cáyūcu tútú i un ní sáha ya jeē ni jnáa. Te ndihi i ni cunuú Espíritu Santo jiín i, te ni jēhe ya fuerza te jéhnun-ni ni canacani i jnúhun Yaā Dios.

Jeē ní canevāha cáhnun i ndajniñu

32 Te ñayuu cuehē jeē ní candíje chi inuú cáhīyo ni i jijnáhan i. Te tú ni i i ní cáhān jeē ndajniñu jeē névāha máá i cuu máá-ni i, chi tācá ndajniñu ni canevāha cáhnun i.

33 Te nihin canacani apóstol jnúhun jeē ní cajito de jeē ní natecu Jitoho yō Jesús. Te yōhyo ni chindéé ñáhān yá ñayuu cácadíje.

34 Chi tú cuiti ni i i ní ndóho jeē cumani nuū i, chi tāca ñayuu canevāha cuehē ñuhun chí vehe, ni caxícó i sava te ni caquindeca i xūhún un.

35 Te ni cajēhe i xūhún un núu tée apóstol, te ni casaja tēe apóstol nuū ñayuu cácadíje núu ndese jini ñúhún i i i.

36 Te iyó i i tēe nání José jeē cúu yucūn Leví, ni cacu de Chipre, ñuhun jeē íne sūn nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jnúhun ndeyí ni.

37 Te ni xícó de i i ñuhun de, te ndáhá de xūhún un ní jēhe de nuū tēe apóstol.

Siquī cuēchi jeē ní casáha Ananías jiín Safira

5

1 Te suni inga tēe nání Ananías jiín ñasihí de Safira, ni caxícó de i i ñuhun de.

2 Te ni chuvāha de sava xūhún un cuu máá de jiín ña, chi súcuan ni candajnúhún de jiín ña, te ndáhá de inga sava nájnúhun jeē ndíhi cúu, te ni jēhe de nuū tēe cácuu apóstol.

3 Te ni cahān Pedro: Ananías, ¿naun ni jēhe ro jnúhun jeē quivi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxíco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajniñu máá ró, chi ni sáha ró nájnúhun jeē ndihi xūhun ní jēhe ró.

4 ¿Te á násūu cuenta maá ró cúu ñuhun un ndé ná tu xíco ró? Te ná ni xíco ró ¿te á násūu cuenta maá ró cúu xūhun jéē cuajniñu ró ndé nuū cuní maá ró? ¿Te naun ni jeni ni rō jeē stáhú ró súcuan?

Te nasūu máni máá tée cúu jeē jícu ró stáhú ró, chi suni Yaā Dios, áchí Pedro.

⁵ Te ná ni jini sōho Ananías tāca jnūhun yáha, te ni cotúú-ni de ni jihī de. Te tāca ñáyuu ní canihīn jnūhun ún, yōhyo ni cayūhú i.

⁶ Te ni candocuiñi tēe suchí, te ni cachusúcun de ndiꝑi un cuáchindūji de.

⁷ Te ni cunúu nájnūhun unī hora. Te ni jinū ñasihí ndíꝑi un ní quíꝑi ña ini vehe ún, te tú na vé jiní cuiñi ña.

⁸ Te Pedro ni cajnūhún de ña:

Cachi nuū rī, ¿á ñn súcuan-ni ni caxīco ró ñuhun ró chí tuú? áchí de.

Te ni cachi ña:

Suu súcuan-ni ni caxīco ná, áchí ña.

⁹ Te ni cahān Pedro jíin ña:

¿Naun ni casquíjnáhan jnūhun ró jēe cóto ndee rō Espíritu Santo maá Jítoho yō? Chi ni nducú ró stáhú ró yā. Cuni nahín jēe cáhma nanecoo tēe cuachindūji yī ró, te suni súcuan quichindūji de rōhó, áchí de.

¹⁰ Te ni cotúú-ni ña nuū jehé Pedro te ni jihī-ni ña. Te ni ndiꝑiꝑico tēe suchí un te ni cajito de jeē jé ni jihī ña, te ni caquenehen de ña, te ni jechindūji de ña xiin yí ña.

¹¹ Te yōhyo ni cayūhú ndiꝑi ñáyuu cácanđije jíin táca gá ñáyuu jeē ní cajini jnūhun jeē súcuan ni cuu.

Cuehē jniñu jéhnú ni casáha apóstol

¹² Te cuehē jniñu jéhnú jeē steén jeē cujéhnú Yaā Dios ni casáha tēe apóstol nuū

ñáyuu. Te tāca ñáyuu cácanđije, ñnuú-ni cándutútú i ini correddor jeē naní Salomón.

¹³ Te tu ní cáchundeyí ni ñga ñáyuu quijnáhan jíin i. Te cájejnūhún i ñáyuu cácanđije.

¹⁴ Te ni nducuehē gā i, chi cúu tēe cúu ñahan ni cacandíje i máá Jítoho yō.

¹⁵ Te cáquindecá ñáyuu jnáhan i jeē cácuñú, te cájequin i ini calle cáca i nuū camilla jíin nuū yúu, chi cácuñi i vésú ste cuándahū Pedro na yáha siquí i te nduvāha i.

¹⁶ Te suni cuehē ñáyuu tācá ñuu cáhīyo yajni yūcuan ní quijicoo i ñuu Jerusalén ni caquindecá i jnáhan i jeē cácuñú jíin jēe cándoho tachī, te ndihi i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū cujéhnú ga jíin táca gá jnáhan jeē cácanđije sahān saduceo, ni cacucuésún ni jeē siquí tēe cácuu apóstol.

¹⁸ Te ni cajni de tēe cácuu apóstol ni cachuhun de vecā.

¹⁹ Te ñn ndajéhé maá Jítoho yō ni nune ya yehyí vecā ún jecuā, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cájí ró jnūhun nuū ñáyuu siquí ndese nihīn tahú i cotecu i ní cáni, áchí ndajéhé yā.

²¹ Te ni cajini sōho de jnūhun yáha. Te nuū ní cundijin te nehen ni quíꝑicoo de ini templo, te cásteén de jnūhun ya nuū ñáyuu.

Te níni cástéén de te sutū cujéhnū ga jíin táca jnáhan de ni canastútú de tēe junta cujéhnū ga, jeē cúu ndihi tēe jéhnū cándiso jniñū nuū ñáyuu nación Israel. Te ni catajé de policía cuaquenehen tēe apóstol ini vecāa.

22 Te nuū ni jínūcoo te tuá gā tēe apóstol. Te ni canandió cóo te ni cacachi:

23 Jendaá cúu jeē ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuítī gā tēe un cáhiin ini vecāa ún, áchí de.

24 Te sutū cujéhnū ga jíin tēe cujéhnū nuū tēe cándito templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan.

25 Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñáyuu, áchí de.

26 Yūcuán na te tēe cácujehnū nuū tēe cándito templo, jíin tēe cácuu policía de, ni jengoo de, te yúcún ní nacueca de táca tēe apóstol vendicoo de jíin, chi cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol.

27 Te nuū ní najinūcoo de jíin tēe apóstol, te ni cajecuiñī de nuū tēe casáha junta. Te sutū cujéhnū ga ni cahān:

28 Ni cacahān ñihin ri jíin ró jeē ma steén cuítī gā rō jnūhun tēe nání Jesús. ¿Te naun ni casáha ró jeē ní ndecāva jnūhun un ní ñuu Jerusalén

yāhá? Te cácuu rō staú yáhu ró rúhū jijnáhan ri siquī jeē ni jíhī tēe ún, áchí.

29 Te Pedro jíin táca gā apóstol ni cacahān de:

Cánuú jeē squícu ná jniñū ní ndacu Yaā Dios nuū ná te nasūú jniñū nāndacu tēe.

30 Máá Yáa Dios jíi yō ni nastécu yā Jesús, Yaā ní cahjni maá ní jeē ní cata caa ní yá jicā cruz.

31 Te ni sáha Yaā Dios jeē ní ndujéhnū tucu Jesús néne ya ichi ndávāha Yaā Dios, te cúu ya Yaā ndácu jniñū, Yaā jnáma ñayuu. Te súcuan ni sáha Yaā Dios návāha yóhó, jeē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó.

32 Te máá ná ni cajito ná táca jniñū yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá táca ñáyuu jeē cájendetū nuū yā, achí de.

33 Te ná ni cajini sōho un jnūhun yáha, te yōhyo ni caquitī ni, te cahni de cácuu nuū.

34 Te mēhñú un jíjnáhan néne ñin tēe grupo fariseo nání de Gamaliel, te cúu de maestro jeē steén ley yā, te táca ñáyuu cájejnúhún i de. Te ni ndocuiñī de, te ni ndacu de jniñū jeē na cújiyo núu tēe apóstol.

35 Te ni cahān de:

Róhó jnáhan ñuu yō Israel, caní vāha ni rō núu na vé cácuu rō sáha ró jíin táca tēe yáha.

36 Chi nucūhun ni rō jeē ñn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te tāca jēē ní caquiñáhan jíin de ni cajitē núu cuangoo sáá-ni, te ni jecuiñī-ni jniñu ún.

37 Yūcuán na te quivī ni íyo censo te Judas, ñn tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquiñáhan jíin de ni cajitē núu cuangoo.

38 Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squeejé jniñu yáha, te jecuiñī ii.

39 Te núu Yaā Dios ni squeejé, te ma cúu casi rō, chi sanaa te siquī Yaā Dios cándonda ró, áchí de.

40 Te ni cachusóhó jéē ni cáhān Gamaliel. Te ni canacana tēe cácuu apóstol, te ni cacani de jíin cuarta ñii te ni cacahān xeēn jíin de jeē ma cahán gā de jnūhun Jesús, te ni casiáá de cuangoo de.

41 Te máá apóstol ni quendacoo de nuū junta cuangoo de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácdíje de ya.

42 Te ndiquivī castéén de jnūhun vāha Jesucristo, te cánacani de jnūhun ún ini templo jíin tāca-ni vehe.

Jeē ní cajeni de uxā tēe cuajniñu mēhñu ñáyuu cácdíje

6

1 Te ni cucuehē ñayuu cácdíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cánihñ vāha ña staā jeē cása de tāca quivī cuu ña.

2 Yūcuán na te máá ndihúxí uū apóstol ni canastútú de tāca ñáyuu cácdíje, te ni cacahān de:

Tú vāha jeē jecuiñī jniñu jeē cánacani ri jnūhun Yaā Dios siquī jeē cása rī staā.

3 Núu súcuan te rohó, hermano, nacāji ró úxā jnáhan máá yó, te na cóndiso jniñu de saja de staā. Te nacāji ró tēe jeē cájejnūhún ñáyuu de, tēe ndíchí jēē ní cunuú Espíritu Santo jíin de.

4 Te ruhū jijnáhan ri, máni cacān tahú rī jíin jéē nácani ri jnūhun ya, áchí de.

5 Te ndihī ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo.

6 Te ni cajeni i tāca tēe yáha núu tēe cácuu apóstol, te tēe apóstol un ní casoó de ndaha

de xinī tāca tēe un ní cajicān tahu de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñáyuu cácañdije i jnūhun ya ini ñuu Jerusalén. Te suni cuehē sutū ni cacandije de jnūhun ya.

Jeē ní cajni de Esteban

⁸ Te ni chindéé ñáhán yá Esteban ni jēhe ya poder nuū de, te ni sáha de táca jniñu jéhu nuū ñáyuu, jniñu jeē steén jeē kujéhu Yaā Dios.

⁹ Te ñáyuu hebreo jeē ní cacuyāhu i te ni canduu libre i, iyó vehe iī sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnáhan de jíin Esteban.

¹⁰ Te tu ní cácuñdeyí jíin de, chi ndichí ní cahān de ni sáha máá Espíritu Santo.

¹¹ Yūcuán na te ni cascáhān sava tēe jeē na cáhān jnūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jíin siquī Yaā Dios.

¹² Te jeē súcuan ni cacahān te ni caquitī ni tāca ñáyuu jíin tēe jéhu cándiso jniñu jíin tēe cástéén jnūhun tutu ley yā. Te ndihi de ni candonda siquī Esteban, te ni cajni de cuango jíin de nde nuū junta kujéhu ga.

¹³ Te ni cajeni de tēe cahān jnūhun yáá siquī Esteban, te suhva ni cacahān:

Tēe yáha tu ndé jécuiñi de jeē cahān ndevāha de siquī templo iī yáha jíin siquī ley yā.

¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jēhe Moisés nuū yō, áchí.

¹⁵ Yūcuán na te ndihi tēe cáyūcu núū junta un ní candacoto vāha nuū Esteban, te ni cajini jeē jito nuū de ná jito nuū iin ndajéhé Yaā Dios.

Jnūhun ni nacani Esteban

7

¹ Te máá sūtū kujéhu ga ni cajnūhūn Esteban:

¿A ndāa jeē súcuan ni sáha ró nájnūhun cácahān de yáhá? áchí.

² Te ni cahān Esteban:

Ndihí níhín jēe cácuu ní jnáhan ñuu yō, jíin ndihí níhín jēe cácuñéhu ní núū ñúū yō, cuni nahín ní jnūhun cahān ná: Máá Yáa Dios jeē yóhyo kujéhu ya, ni steén yā máá yá nuū jíi yō Abraham nde na néne ga de región Mesopotamia, nde ná tu quihīn de condee de ñuu Harán.

³ Te ni cahān yā jíin de: Stóo ñuu rō jíin táca jnáhan ró te quihīn rō nuū cuáha ri condee rō, chi máá rí steén ichi nuū quihín rō, achí yá.

⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuán ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna.

⁵ Te tu ní jēhe ya ni iin tíhli ñuhun yáha cuu tahu de. Te vésú súcuan te ni jejnūhun ya

jeē cuáha ya ñuhun un núu de nde jíin núu tāca séhe de, vēsú ná tu coo sēhe de sáá.

⁶ Te súcuan ni cahān Yaā Dios jíin de: Sēhe ró coyūcu jíca i inga ñuu, te cuūn ciento cuiyā sájniñu sáá-ni i te stóho ñayuu yúcuan i.

⁷ Te siquī jeē súcuan sáha i jíin séhe ró, te máá rí chi stóho ri ñayuu ñuu ún. Te sáá te quendacoo sēhe ró yúcuan, te nucoyúcú i yāhá chiñúhún i ruhū, achí yá.

⁸ Te ni cahān yā jíin Abraham jeē na cúu de circuncidar, jeē cúu ñn jnunī jeē ni sáha ya contrato jíin de. Te ná ni cacu sēhe de Isaac te ni sáha de circuncidar i nuū uná quivī. Te suni súcuan ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

⁹ Te tāca séhe Jacob ni cacu-cuésún ni de jíin ñani maá de José, te ni caxícó de i nuū tée jeē ní cajendēca i nde nación Egipto. Te Yaā Dios chi ni ndito ya José.

¹⁰ Te ni jnama ya i nuū tāca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núu ñáyuu cáyúcú vehe Faraón.

¹¹ Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te tāca jíi yō ún, tuá ni cániñn de jeē cáji

de.

¹² Te ni nihīn Jacob jnūhun jeē iyó trigo nde nación Egipto, te ni tají de sēhe de ni jengoo de ni cajeen de trigo vuelta ñn.

¹³ Te jeē cuángoo de vuelta uū te ni nastúu José jeē maá de cúu ñani de jíináhan de. Yūcuán na te ni jini rey Faraón ndé ñn jnáhan cúu José.

¹⁴ Te ni cahān José jíin táca ñani de jeē na cóndeca de tátá de Jacob jíin ndihī jnáhan vehe de. Te ni íyo unī xico xahūn i.

¹⁵ Te súcuan ni cuu jeē ni jínū Jacob ni condee de nación Egipto nde ni jihī de. Te suni yúcuan ní coyūcu séhe de jeē cácuu jíi yō un ndé ni cajihī maá de.

¹⁶ Te ná ni quee quivī jeē ndénehen ya tāca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndīyī jíi un jēe ndíji ñuu Siquem, te ni cachindūji de ini yaū ndīyī ndeé jíca cáva jeē ní jeen jíi yō Abraham nuū tāca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíin Abraham jeē quendacoo sēhe de nucoyúcú i ñuu ni jéjnūhun ya nuū i, te ñayuu un ní tahū cuehē i ini nación Egipto.

¹⁸ Yūcuán na te ni nucuiñī inga rey ñuu Egipto jeē tu ní jíni de jeē váha ni sáha ndīyī José.

¹⁹ Te rey un ní stahú de tāca

jíi yō te ni sáha ndevāha de jíin i, chi ni sáha fuerza de i jeē ma cóto ga i sēhe yiquín i te na cúu.

²⁰ Te tiempo un ní cacu Moisés, te ni cusī ni Yaā Dios jíin i. Te unī yoō ni condito sāhi náná i tátá i.

²¹ Te tuá ni cúu condito sāhí de i, te ni cachune de i nuū nanihīn sēhe síhí Faraón i, te ni naquihīn sēhe ña i ni scuéhnu ña i nájnuhun sēhe máá ña.

²² Te ni cutūhva Moisés tāca jnúhun ndíchí ñuu Egipto, te ni kujénu de jíin jnúhun cáhan de jíin jniñu sáha de.

²³ Te nuū uú xico cuiyā de te ni jecondéhé de jnáhan de jeē cácuu ñayuu Israel.

²⁴ Te ni jito de nuū ñin tēe nación Egipto jeē sáha ndevāha jíin ñin tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndu-tahū jeē ni sáha ndevāha jíin jnáhan de ún.

²⁵ Te máá Moisés jéni ni de jeē jécūhun ni tāca jnáhan de jeē Yáā Dios ni tají yá de jeē jnáma de jnáhan de ún ñin nación Egipto nuú, te tu ní cájecūhun cuiñi ni jnáhan de ún.

²⁶ Te ñnga quivī suni ni jito de nuū uú tēe Israel jeē cácejnáhan, te cúni de jeē na jécuiñī. Te jeē yúcuan ní cahān de jíin: ¿Najehē casáha ndevāha ró jíin jnáhan ró? Chi nájnuhun ñin ñani-ni cácuu ró, áhí de.

²⁷ Te máá tēe cáni tahū jnáhan un ní chundahá de Moisés te ni cahān de: ¿Ndé ñin

ni jeni róhó jeē kujénu ró núu rī te sándaā rō jniñu ri jijnáhan ri?

²⁸ ¿Chí suni cúni rō cahni rō ruhū nájnuhun ni jehni rō tēe Egipto icu chí naún? áhí de jíin Moisés.

²⁹ Te nuū ní jini sōho Moisés jnúhun yáha, te ni yūhú de jeē cáhni rey de, te ni jinu de cuahān de ñnga nación. Te ni condee de ñuu jicá Madián, te yúcuan ní scácu ñasihí de uū sēhe yí de.

³⁰ Te ni jinu uū xico cuiyā jeē néne de yūcuán. Yūcuán na te ñin ndajéhé Yaā Dios ni quenda ya nuū de nde nuū ñúhun téhé nuū ñin yucu súcún Sinaí. Te ni quenda ya nuū de xinī ñin yucū cui cáhnu cándahá yáñuhūn, te tu ní cáyú yucū ún.

³¹ Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahān maá Jítoho yō jíin de:

³² Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuan tuá ni cúndeyí ni de coto de nuū.

³³ Te máá Jítoho yō ni cahān yā jíin de: Quenehen ndijēn rō chi nuū ñin ró, ñuhun íi cúu.

³⁴ Je ni jini rī ñayuu maá rí jeē yóhyo cándoho i nación Egipto, te suni jini sōho ri jeē cájnana uhū i, te ni cuun ri vēji ri jeē jnáma ri i jíjnáhan i. Núu súcuan te vijna chi tají rí rohó ndicó ró quihīn rō nde nación Egipto, achí yá jíin de.

³⁵ Te nde ná tu quenda

Moisés Egipto, te tāca jnáhan de ni casquéhichī i de jeē ní cacahān i jín de: ¿Ndé ñn ni jeni róhó jéē cujéhnū ró núū rī te sándaā rō jniñu ri? ni cacahān i jín de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuí ún. Te súcuan ni cuu jeē ní natajáyá de cuanuhun de nde Egipto jeē ndácu de jniñu nuū i te jnama de i.

³⁶ Te máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te nái tiempo un ní sáha de cuehē jniñu jéhnū jeē steén jeē cujéhnū Yaā Dios.

³⁷ Te máá Moisés cúu jeē suhva ni cahān de jñūhun yáha jín jnáhan ñuu yō Israel: Máá Yáā Dios canī ya Yaā nacani jñūhun nuū rō jijnáhan ró nájñūhun ni jeni ya ruhū. Te cuu ya ñn jnáhan ñuu yō. Te na chūhun ni rō jñūhun cahān Yaā ún, achí.

³⁸ Te suni nde ná ni cajica cuu jí yō nde nuū ñūhun téhé, te ni cahān ndajéhé yā jín Moisés xinī yúcu súcún Sinaí, te ni nihīn de jñūhun jeē cahān ndese nihīn tahú yō cotecu yō, te ni nacani de jñūhun un núū tāca jí yō, te ni quendōo jñūhun un núū yō.

³⁹ Te tāca jí yō ún tu ní cácu ni de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nun-goo de Egipto nuú.

⁴⁰ Te ni cacahān de jín

Aarón: Sáha ní tijni yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahān de xinī yucu Sinaí, achí.

⁴¹ Yūcuán na te ni cajēhe de oro ni cuvāha ñn becerro oro, te nuū becerro ídolo un ní casocō de quitī, te ni cacusī ni de jín ídolo ni casáha de ún.

⁴² Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jíto yó ín andiví, nájñūhun yósó núū tútu tēe ni canacani jñūhun Yaā Dios nde jenahān: Ni cahān yā: Róhó ñáyuu Israel,

¿á cájini ni rō jeē nuū ruhū ni casocō rō quitī

ná ni cajica cuu ró úū xico cuiyā nde nuū ñūhun téhé?

⁴³ Tuú, chi sa suhva ni candiso ró nicho jeē íne ídolo jeē naní Moloc jín figura quīmi jeē naní Renfán,

ídolo jeē ní casáha máá ró ni cachiñúhún ró.

Jeē yúcuan cúu jeē síaha ri rohó quíhīn jicá ró nde yatā ñūū Babilonia, achí yá.

⁴⁴ Te ni ndacu ya jniñu nuū Moisés jeē na sáha de vehe ññ nuū chíñúhún de ya, nájñūhun cáa jeē ní steén yā nuū de. Te tāca jí yō, nde nuū ñūhun téhé ní canevāha de vehe ññ un núū ní cachuyāha de tabla yuū jeē yosó jñūhun ley yā.

⁴⁵ Te ni castóo de vehe un núū ndihī sēhe de jeē cúu jí

yō. Te ni quiv̄i Josué jín jíi yō ini nación yáha, te ni sáha ya jeē ní cacundeyí de jín táca ñayuu jeē ní cacoyūcu yáha ní cajinu i cuango i. Te ni quiv̄icoo de táca ñuu i jín vehe i ún, te ni quendōo nde quiv̄i ní cuu David rey.

46 Te ni cus̄i ni Yaā Dios jín rey David. Te ni jicān de nuū yā jeē sáha de ñn vehe i yā nuú, chi máá yá cúu Yaā Dios jíi de Jacob.

47 Te ni cuu jeē nde sēhe yíi de Salomón ni sáha vehe i yā.

48 Te vēsú súcuan ni cuu te Yaā kujéhu téyí, tu ndéé yá maá vehe jeē casáha ñayuu, nájñuhun ni cahān tēe ni nacani jñuhun ya nde jenahán:

49 Ni cahān yā:

Andiví cúu nájñuhun mesa nuū ndácu ri jniñu te ñayiv̄i cúu nájñuhun ñn nuū yítuu jehē rī.

Núu súcuan ¿te ndese cuu sáha ró vehe jeē cóndee rī, te ndese cuu sáha ró núu ndétātu rí?

50 ¿A násūu máá rí ní sáha ndihi jeē iyó?

áchí máá Jítoho yō Yaā Dios.

51 Te cáhán gā Esteban:

Yōhyo cáacunihni ni ní, te tu cácuni ní chusóhó ní, te cácuu ní nájñuhun ñayuu táca nación jeē tu cájini i jñuhun ya ni tu cácandíje i ya. Chi níni cájesi ni núu Espíritu Santo, te nájñuhun ni casáha jíi yō jenahán, suni súcuan casáha ní vijna.

52 ¿A ní Iyo tēe nácani jñuhun ya nde jenahán jeē tu ní sáha ndeváha jíi yō jín de? Chi

jíi yō ni cajehni de tēe ni canacani jñuhun jeē quíji máá Yāā ndaā. Te je ni quíji Yaā ún, te máá ní ni canastúu ni yá nuū tēe ni cajehni de ya.

53 Te vēsú nde jín táca ndajéhé yā ni jēhe ya ley yā nuū yō, te máá ní chi tu cásquicu ní, áchí Esteban.

Jeē ní cajehni de Esteban

54 Táca jñuhun yáha ní cajini sōho, te yōhyo ni caquit̄i ni, te cánacayih̄i yuhu cájito nuū Esteban.

55 Te máá Esteban chi ni cunuú Espíritu Santo jín de. Te ni jito de ichi ándiví, te ni jini de jeē ndíndēe núu néne Yaā Dios, te índichi Jesús ichi ndáváha ya.

56 Te ni cahān de:

Vijna te jito ri jeē núne andiví, te jito ri nuū maá Yāā ní nduu tēe, índichi yā nuū kujéhu ya lado váha Yaā Dios, áchí de.

57 Yūcuán na te ni cajesi un sóho, te ni cacana cóhó, te inuú-ni ni candonda siqūi Esteban.

58 Te ni caquenehen Esteban cuango jín de nde yatā ñúu. Te tēe ni cacahān yaá un jín ndih̄i jñahan de ni cachucú de ticāchí de ndíto ñn tēe suchí nání Saulo, te ni cacani de yuū xiní Esteban.

59 Te níni jēe cácani táca tēe un yúu xiní de te ni jicān tahú de nuū yā:

Tátā Jesús jeē cúu ní Jítoho ná, naquihin ní ánuá na vijna, áchí de.

60 Te ni jecuiñ̄i yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cácanđje

8

¹ Te Saulo, ni nujnahan ni de jeē ni jíhī Esteban.

Te quívī un ní caquejéé de cájito xeēn ndasí de ñayuu cácanđje Jesús ini ñuu Jerusalén, te jeē yúcuan cúu jeē ní cajitē núu ñayuu cácanđje cuango i ní Judea jíin ní Samaria. Te tēe apóstol chí tu ní cajitē núu de.

² Te sava tēe yíñúhún núu Yaā Dios, ni cachindūji de Esteban. Te yōhyo ni candahyū de jeē ni jíhī Esteban.

³ Te Saulo chí jito xeēn de ñayuu cácanđje, te quívī de ndijnahan vehe te jnī de tēe, ñahan, chūhun de i vecāa.

Jeē ní canacani i jñūhun Yaā Dios ndañū Samaria

⁴ Te tācá ñuu nuū cuángoo tāca ñáyuu ní cajitē núu un ní canacani i jñūhun ndese jnáma Yaā Dios ñayuu.

⁵ Te ni jinū Felipe ñn ñuu ndañū Samaria, te nuū ñáyuu yúcuan ní nacani de jñūhun Cristo, Yaā ní jeni Yaā Dios jeē jnáma ya yohó.

⁶ Te tāca ñáyuu ní cacutútú un ní cajini nahín váha i tāca jñūhun ni nacani Felipe, te ni cajito i tācá jniñu jéhnú ni sáha de.

⁷ Chí cuehē ñayuu cándoho tachī ni canduvāha i, te cácana

cóhó táchī un ní caquenda-coo. Te cuehē ñayuu ní íjin jíin ñáyuu ríngo ni canduvāha.

⁸ Te jeē yúcuan ní cacusī teyí ni ñayuu ñuu ún.

⁹ Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhnú téyí cúu máá de.

¹⁰ Te nde tēe cácujehnú jíin ndivii cuiti ñayuu, cájetáhú ndasí i jñūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jñūhun cáhán de, chí cuehē tiempo ni sáha de jniñu stáhú ní canaa ni i ni cajito i.

¹² Te nuū ni jinū Felipe, ni nacani de jñūhun váha ndese ndácu Yaā Dios jniñu, jíin jñūhun Jesucristo, te ni cacandíje i te ni cajendute i, cúu tēe cúu ñahan.

¹³ Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jito de tācá jniñu jéhnú jeē sáha Felipe jeē steén jeē cujehnú Yaā Dios.

¹⁴ Te cáyūcu tēe apóstol ñuu Jerusalén, te ni canihīn de jñūhun jeē ñáyuu Samaria ni cacandíje i jñūhun Yaā Dios. Te ni catajī de Pedro jíin Juan cuango de yūcuán.

¹⁵ Te ni jinūcoo de, te ni cajicān tahú de jehē ñáyuu un návāha na quívī Espíritu Santo ini anuá i jíjnáhan i.

16 Chi ná tu quívi ya ini anuá ni ñn i, chi máá-ni jeē ní cajendute i jeē ní cacandíje i Jítoho yō Jesús.

17 Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

18 Te ni jito Simón jeē súcuan casoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuāha de xūhun núū tēe apóstol návāha nihīn de poder un núú.

19 Chi ni cahān de:

Cúní na jēe cuāha ní poder yáha núū na, návāha núū ndé ñáyuu soó ná ndaha ná xinī i te quívi Espíritu Santo ini anuá i, áchí de.

20 Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios.

21 Ma nihín tahu rō jeē sáha ró jniñu yáha, chi tu íyó ndáā anuá rō nuū Yaā Dios.

22 Núū súcuan te jini ñúhún jeē stóo rō jnúhun jeē jéni néé ni rō súcuan te cahān ndahú ró jíin Yáā Dios, te máá yá sanaa te cone cáhnu ni yá siquī jeē jéni néé ni rō súcuan.

23 Chi jíni rī jeē cucuésún ni rō siquī jeē sáha ri jniñu yáha. Te tāca jēe neé jéni ni rō ni cunuú un jíin ró, achí Pedro jíin de.

24 Yūcuán na te ni cahān Simón jíin de:

Cacān tahu ni jéhē na jíjnáhan ní núū máá Jítoho yō

návāha tú jnahnū ndetū na nájnūhun ni cahān ní, áchí de.

25 Te Pedro jíin Juan ni cacahān cají de ndese cáacandíje de jnúhun Yaā Dios. Te jeē cuánungoo de ichi ñúū Jerusalén, te tijni ndañúū Samaria ni canacani de jnúhun jeē jnáma ya ñayuu.

Felipe jíin tēe nación Etiopía

26 Yūcuán na te ni cahān ndajéhé máá Jítoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde ñuu Gaza, áchí yá.

Te ichi chúcuan chi máá ñuhun téhé cúu.

27 Te ni quihin Felipe ichi cuahān de. Te nde nación Etiopía ni quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén.

28 Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnúhun Yaā Dios nde jenahán.

29 Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

30 Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnúhún de tēe ún:

¿A jécūhun ni ni jnúhun jeē cáhu ní chí tuú? áchí de.

31 Te ni cahān máá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jín Felipe jeē na cáa de conēne ndúú de jín de ini carreta.

³² Te jnūhun cáhu de tutu iī un cáhán suhva:

Nájnūhun lanchi jeē cuahán tī nuū cúu tī, súcuan ni casáha ñayuu jín yá.

Te nájnūhun iīn londe quiti sáte jeē tu ndáhyú tī, súcuan ni sáha ya,

chi tú na vé ni cáhán cuiti yā ná ni cajicān i cuēchi siquī yā.

³³ Te hora jeē ní cajēhe i jnūhun canu yā, tu ní casáha ndaā i siquī yā jín jnúhun ndaā,

te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni iīn ñayuu cahu i ñayuu ún.

Achí.

³⁴ Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé siquī cahán tēe ni nacani jnūhun yáha? ¿A siquī maá de chí siquī űnga tēe? áchí de jín Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chi ni quejéé de ni castūhún de jnūhun jeē ní cahu tēe ún, jín táca gá jnūhun jeē yosó núū tútu yā.

³⁶ Te níní cuángoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje nīhin ni ndé jín ini jín ánuá ni táca jéē ni sáha Jitoho yō Jesús jehē yō, achí de.

Te ni cahān tēe Etiopía:

Cándíje ná jéē Jesucristo cúu máá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñūhun ndute ún, te ni scuándute Felipe tēe Etiopía.

³⁹ Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñúhún-ni Felipe. Te tēe Etiopía vēsú tuá ni jito de nuū Felipe, te cúsiī ni de cuahān de.

⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo

(Hch. 22.6-16; 26.12-18)

9

¹ Te Saulo chi máni cáhán de jeē cáhni de táca ñayuu cá candíje i máá Jítoho yō, te jeē yúcuan ní jehēn de nuū sutú cujéhnu ga.

² Te ni jicān de carta jeē cahán jeē quihín de táca vehe iī sinagoga ñuu Damasco te cuhni de tēe ñahan jeē cá candíje i Jesús, quiiji de jín i ñuu Jerusalén nuú.

³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndéé iīn luz nuū de.

4 Te ni cotúú-ni de nuū ñúhun, te ni jini sōho de ñn jñuhun cáhán jíin de:

Saulo, Saulo, ¿najehē jíto xeēn rō ruhū? achí.

5 Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cá candíje i ruhū cúu jeē jíto xeēn rō ruhū. Te jeē sáha ró súcuan cúu nájñuhun sti quí jeē tu jéndíje ti te jéñú yatá tí xinī pulla, te súcuan stóho ti maá tí, achí yá.

6 Te máá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān maá Jítoho yō jíin de:

Ndocuñī, quívi ró ini ñuu, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá.

7 Te tēe cuango jíin Saulo, ni canaa ndasí ni de cájini sōho de ndusu jeē cahán, te tu ní cájito cuíti de nuū jeē cahán un.

8 Yūcuán na te ni ndocuñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco.

9 Te yūcuan ní condee de uní quívi. Te tu ní cúu cuíti coto de, ni tú na vé ni yéji de, ni tú na vé ni jíhi de.

10 Te ñuu Damasco néne ñn tēe cándíje, nání de Ananías. Te máá Jítoho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, achí de.

11 Te ni cahān maá Jítoho yō jíin de:

Quihin ichi te quihīn rō calle jeē naní Calle Derecha, te vehe Judas cajñuhun ró ñn tēe nání Saulo ñuu Tarso, chi jícán tahu de.

12 Te nájñuhun ni jito ndijin de jeē maá ró, Ananías, ni jinū rō, te ni soó ró ndaha ró xinī de, te ni nanune tinūú de, achí yá.

13 Yūcuán na te ni cahān Ananías:

Tátā, cuehē ñayuu cácahān jeē tēe yūcuan yōhyo jíto xeēn de ñayuu cá candíje i níhín ñuu Jerusalén.

14 Te vijna ni quee de yāhá, chi sutū cácujeñnu ni catejñiñu de véji de jñi de táca ñayuu cácahān ndahú i jíin ní, achí de.

15 Te ni cahān maá Jítoho yō jíin de:

Cuáhán, chi máá rí ni nacāji tēe un jéē quihīn de nacani de jñuhun rí nuū táca ñayuu nación Israel jíin núu ñayuu táca gá nación nde jíin núu táca rey.

16 Chi stéén rí nuū de jeē cánuú ndoho de cuehē jñūdóho jeē siquí rí, achí yá.

17 Yūcuán na te cuahān Ananías. Te ni quívi de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítoho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núu ni návāha na nánune tinūu ní, te návāha na

cúnuú Espíritu Santo yā jín ní, áchí de.

¹⁸ Te ni nanune-ni tinū Saulo, chi ni nungoo-ni nájnūhun soō chācá ní condihyū tinūú de ún. Te ni ndocuñī de ni jendute de.

¹⁹ Yūcuán na te ni nacaji de staā, te ni nanihīn ni de. Te ni condee de jecu quivī jín tée cá candíje jeē cáyūcú ini ñuu Damasco.

Jeē ní nacani Saulo jnūhun ini ñuu Damasco

²⁰ Te ni quejée-ni de nacani de jnūhun Jesús ini tācá vehe īi sinagoga, áchí de jeē Jesús cúu Sēhe Yaā Dios.

²¹ Te tāca ñayuu ni cajini sōho jnūhun cáhān de ni canaa ni i, te ni cacahān i:

¿A násūu tée yāha cúu jeē yóhyo jito xeēn de tāca ñayuu Jerusalén jeē cájicān tahu nuū Jesús? Te siquī yūcuan ní quee de yāha jéē cúhni de ñayuu cá candíje, te quihīn de jín i nuū sutú cácu jéhnu núú, áchí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihīn de modo cahān de jeē tu iyó ndāā jeē cahān Saulo.

Jeē ni cácu Saulo nuū jnáhan de hebreo

²³ Te ni yāha cuehē quivī. Te jnáhan de hebreo ni casquijnáhan jnūhun de jeē cáhni de Saulo.

²⁴ Te ni nihīn Saulo jnūhun jeē cándito de nduú ñuú táca

yéhyí pared jeē ní condúū ndihyū ñuu ún.

²⁵ Yūcuán na te īin jecuáā te tēe cá candíje ni caquihin de Saulo, te ini īin jīca cáhnu ni cascúun de Saulo jicā pared ún, te súcuan ni cácu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najnáhan de jín tée cá candíje. Te ni cayūhu tée un ní cajito de Saulo, chi tu ní cá candíje de jeē ní nduu Saulo tēe cándíje nuū Jesús.

²⁷ Te Bernabé cuahān de jín Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū máá Jítoho yō ichi nuū cuahān de, jín jéē ní cáhān yā jín de, jín jéē jéhnu-ni ni nacani de jnūhun Jesús ini ñuu Damasco.

²⁸ Te ni condee Saulo ñuu Jerusalén ni jica de jín táca tēe apóstol.

²⁹ Te jéhnu-ni ni nacani de jnūhun máá Jítoho yō. Te jnáhan ñuu de hebreo jeē cácahān yuhu griego, ni castáhān jnáhan jín de, te máá tēe un cácumí de cahni de Saulo.

³⁰ Te ni cajini tācá hermano cá candíje, te ni cajendēca de Saulo nde ñuu Cesarea. Te yūcuan ní canatajī de Saulo cuanuhun de nde ñuu de Tarso.

³¹ Te ñayuu cá candíje Jesús jeē cáyūcú Judea jín Galilea jín Samaria, tuá ní cájito xeēn ñayuu i. Te ni ije ga i jín jnúhun ya, te cándiso īyo i nuū

maá Jítóho yō. Te Espíritu Santo ni chindéé ñáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cácadíje, te suni ni jécondéhé de ñayuu cácadíje cáyūcú ñuu Lida.

³³ Te yūcuan ní jini de nuū ñin tēe nání Eneas jeē ní cuu unā cuiyā cáa de chi ni ñjin de.

³⁴ Te ni cahān Pedro jíin de: Eneas, Jesucristo cúu Yaā nasāvāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún.

³⁵ Te tāca ñáyuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnūhun jeē tu íyó ndáā te ni cacandíje i máá Jítóho yō.

Jeē ní natecu Dorcas

³⁶ Te nde ñuu Jope ni ñyo ñin ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū.

³⁷ Te tiempo yúcuán ní quejéé cuéhyī jíin ña, te ni jihī ña. Te ni cascúchi i ndīyī ún, te ni cajequin i ndīyī un ndé ini cuarto xinī véhe.

³⁸ Te yajni íne ñuu Lida jíin ñuu Jope, te tēe cácadíje ñuu Jope ni cajini jnūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

³⁹ Yūcuán na te ni quihin Pedro ichi cuahān de jíin tēe

ún. Te nuū ni jíin de, te ni cacao tēe un jíin de nde xinī véhe nuū catú ndīyī ún. Te tācá ñahan viuda ni cándicó ndūū ña de cándahyū ña, te cástéén ña tācá sahma jíin tícāchi jeē ni sáha Dorcas te ni saja ña nde na técu ña.

⁴⁰ Yūcuán na te ni ndacu Pedro jniñu jeē na quéndacoo ndihi ñayuu ún quingoo i nde yatā véhe. Te ni jecuiñī yití de ni jicān tahu de, te ni nandió cóto de nuū catú ndīyī ún, te ni cahān de:

Tabita, ndocuiñī ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña.

⁴¹ Te ni jni de ndaha ña, te ni ndonehen de ña. Yūcuán na te ni nacana de xinī ñáyuu cácadíje nde jíin ñahan viuda ni ndīvicoo i, te ni steén de ña nuū i jeē ní natecu ña.

⁴² Te ni jitē jnūhun jniñu yáha ní ñuu Jope cuahān, te cuehē ñayuu ni cacandíje i jnūhun máá Jítóho yō.

⁴³ Te cuehē quivī ni ndōo Pedro ini ñuu Jope, néne de vehe ñin tēe sáha curtir ñi, nání de Simón.

Pedro jíin Cornelio

10

¹ Te ini ñuu Cesarea ni ñyo ñin tēe nání Cornelio, ni cuu de capitán grupo soldado jeē naní Italiano.

² Te cúu de tēe ndíso ñyo nuū Yaā Dios nde jíin ndihi ñayuu vehe de, te yōhyo caridad ni tēe cúu de, chi jéhe de xūhun núū ñáyuu hebreo cándoho ndáhú, vēsú nasūu

tée hebreo cúu de. Te níni jicán tahu de nuū Yaā Dios.

³ Te ñn quivī ni steén ndijin yā nuū tēe yáha nájnūhun cahunī jehíni, te ni jito de jeē ñn ndajéhé maá Yāā Dios ni quivī ya nuū néne de. Te ni cahān yā jín de:

Cornelio, achí yá.

⁴ Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jín de:

Je chíhi Yaā Dios cuenta jeē jicán tahu rō jín jēe sáha ró caridad.

⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

⁶ Chi néne núu de vehe to-cayo de Simón, tēe sáha curtir ñi, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhé yā.

⁷ Te ndajéhé yā jeē ni cáhān jín Cornelio, cuahān-ni ya. Te ni cana de uū mozo de jín ñn soldado jeē yñúhún núu Yaā Dios, chí cúcáhnú ni de jeē squícu vāha tēe ún.

⁸ Te ni nacani ndihi de jnūhun nuū tāca tēe ún, te ni tají de cuangoo nde ñuu Jope.

⁹ Te inga quivī un cájica de ichi cuangoo de, te cuacuya-ñi de ñuu Jope. Te je yajni cahuxī uū cúu, te suu hora un ní caa Pedro siquī véhe chí cándaā, te yūcuan cácan tahu de.

¹⁰ Te ni quee sōco chíji de, te ni cuni de caji de staā. Te sáa

cásáha ña ndeyu te ni steén ndijin yā nuū de.

¹¹ Te ni jito de jeē núne andiví. Te ni jito de nájnūhun ñn sahma manta jité cáhnú te núhni jnáhan ndicúún punta, te ni cuun vēji nuū de.

¹² Te chíji un cáñūhun ndinuū quití, tācá quití cúún ndaha jín táca cóo jín táca quití cándava.

¹³ Te ni jini sōho de ñn jnūhun ni cahān:

Pedro, ndocuiñi te cahni rō tācá quití jñā, te caji rō tí, achí.

¹⁴ Te ni cahān Pedro:

Ma cáji na, Tátā, chí tu yéji cuiti na táca quití jeē cahán ley ni jēe tú vāha caji na tí, chí nájnūhun jeē tu cáhīyo ndoo ti nuū ní, achí de.

¹⁵ Te ni cahān tucu jnūhun un jín de:

Achí rí jeē iyó vāha caji rō tācá quití jñā, chí ni sándoo rí, te ma cahán maá ró jeē tu cáhīyo ndoo ti, achí. Te súcuan ni steén caji yá nuū de jeē cúu quihīn de nuū ñáyuu vēsú násūu jnáhan ñuu de hebreo cúu.

¹⁶ Te unī jínu ni cahān súcuan jín de. Te sahma un ní ndaa cuanuhun andiví.

¹⁷ Te níni nacani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún.

¹⁸ Te cácahān jee de cácajnūhún de núu yūcuan ndéé Simón jeē suni nání de Pedro.

¹⁹ Te níni nacani ga ni Pedro siquī jeē ní jito ndijin de ún, te

Espíritu Santo ni cahān yā jín de:

Ni quecoo unī tēe cānanducú róhó.

²⁰ Ndocuiñī te nanuu ró, te ma cáni ni rō jeē tú vāha quihīn rō jín de, vēsú nasūu jnāhan ñuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cānanducú ní. ¿Te na siquī vējicoo ní núu na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sãñá. Te tēe ndaā, tēe ndíso ĩyo nuū Yaā Dios cúu de, te tāca ñáyuu hebreo suni cácahān i jeē tēe vāha cúu de. Te ni cahān ĩn ndajéhé yā jín de jeē na cána de níhín jeē ní vehe de te chusóhó de jnūhun cahān ni jín de.

²³ Yūcuán na te ni cahān Pedro jín mozo un jeē na cúcōo de ini vehe ún, te ni candōo de yūcuán. Te nuū ní cundi-jin, te ni quihīn Pedro ichi cuahān de jín mozo un. Te suni cuangoo jecu hermano cácañdije ñuu Jope jín de.

²⁴ Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jín táca amigo de jeē quijnāhan vāha ga de jín.

²⁵ Te nuū ni jínū Pedro jijnāhan de, te ni quenda Cornelio ni cahān de jín Pedro, te ni jecuiñī yití de jeē chiñúhún de Pedro nuú.

²⁶ Te Pedro ni ndonehen de Cornelio, te ni cahān de:

Ndocuiñī ní, chi sãñá suni ĩn tēe-ni cúu ná, áchí de.

²⁷ Te cándajnūhún de ni quivicoo de ini vehe. Te ni jito Pedro jeē cáyūcu cuéhē ñayuu ini vehe de.

²⁸ Te ni cahān Pedro jín ñáyuu ún:

Je cájini vāha ni jijnāhan ní jēe ley jeē cánevāha sãña ñáyuu hebreo, cáhán jeē tú vāha jeē quijnāhan ná jín ní quivicoo ná vehe ní siquī jeē cúu ní ñáyuu sín nación. Te Yaā Dios chi ni steén yā nuū na jēe ma cujēe ni na núu ní ĩn ñayuu.

²⁹ Jeē yúcuan cúu jeē vēji-ni ná, chi ni cana ní sãña, te tu ní sájēe ni ná. Te na cájnūhun ná nihín, ¿na siquī ni cana ní sãña? áchí Pedro.

³⁰ Yūcuán na te ni cahān Cornelio:

Vijna íyó cúun quivī nájnūhun máá hora yáha jēe cúu cahunī jehíni, te ndite ni ná chi súcuan chíñúhún ná nuū yā, te jicán tahu na ini vehe ná. Te ni quiji ĩn ndajéhé yā nuú ná, te ndíndēe sahma ñúhun ya.

³¹ Te ni cahān yā jín ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad.

³² Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñi, te yajni yumar ndeé vehe de. Te quee tēe ún te castūhún de nuū rō jnūhun cánuú, áchí yá jín ná.

³³ Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jēē véji ní. Te vijna ni candutútú ná yāha návāha tāca ná cuni sōho ná ndihí jnūhun Jitoho yō Yaā Dios jeē ni jēhe ya cahān ní, áhí de.

Jeē ní nacani Pedro jnūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jēē Yaā Dios inuú-ni sáha ya jíin tāca ñayuu, cúu ñayuu hebreo jíin ñayuu tāca gá nación.

³⁵ Chi cúsī ni yā jíin ñayuu tācá-ni nación núu cándiso Iyo i nuū ya te cásáha i jniñu ndaā.

³⁶ Chi ni cahān yā jíin ñayuu Israel jeē ndívicoo tāca ñayuu nuū jnūhun manī yā jíin i sáha Jesucristo. Te máá yá cúu Jitoho tāca yóhó.

³⁷ Máá ní je cájini ní ndese ni cuu. Chi ná ni jíinu ni nacani Juan jnūhun jíin jēē ni scuándute de ñayuu, te ni quejéé Jesús nacani ya jnūhun nde Galilea, te ni jitē jnūhun un ní cáhnu Judea.

³⁸ Te cájini ni jēē Yaā Dios ni jēhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ni jēē ní jica cuu ya ni sáha ya jniñu váha, te ni nasávāha ya tāca ñayuu jeē cándoho i sáha jexeén, chi Yaā Dios ni chindéé ñáhán yá Jesús.

³⁹ Chi máá ná cánacani cájí ná jnūhun tācá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán

na te ni cajehni i ya, chi ni cata caa i ya jicā cruz.

⁴⁰ Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios.

⁴¹ Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jēē nacani ná jnūhun tācá jniñu jeē ní cajito ná. Chi ni cayejí na stāā ni cajihí ná ndute jíin yá ná ni nane ya jeē ní natecu yā.

⁴² Te ni ndacu ya jniñu nuū na jíināhan ná jēē na nacani ná jnūhun ya nuū tāca ñayuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñayuu ní cajihí.

⁴³ Chi jnūhun Jesús cúu jeē ní cacahān tāca téē ni canacani jnūhun Yaā Dios nde jenahán. Chi ni cacahān de jeē tāca ñayuu jeē candíje i Jesús, cone cáhnu ni yā nuū cuéchi i, áhí Pedro.

Jeē ni quiví Espíritu Santo ini anuá ñayuu jeē násuú hebreo cácuu

⁴⁴ Te níni cáhán gā Pedro tāca jnūhun yáha te ni quiví-ni Espíritu Santo ini anuá tāca ñayuu cájini nahín jnūhun ya jeē cahán de.

⁴⁵ Te téē hebreo jeē ni jínūcoo jíin Pedro jeē suni cáccandíje de Jesús, nahán ní canaa ni de ni cajito de jeē suni ni quiví Espíritu Santo ini anuá ñayuu jeē násuú hebreo cácuu.

⁴⁶ Chi ni cajini sōho de cácahān ñayuu un sín yuhu,

te cácahān i jeē yōhyo cújéhnū Yaā Dios.

⁴⁷ Yūcuān na te ni cahān Pedro:

¿Ndé ñin casi jeē ma cuándute ñayuu yáha? Chi ni quívi Espíritu Santo ini anuá maá i, nájnūhun ni quívi ya ini anuá maá yó, áchí de.

⁴⁸ Te ni cahān de jíin i jeē na cuándute i síquī jeē ní cacandíje i Jesucristo. Yūcuān na te ni cacahān ndahú i jíin Pedro jeē na quéndōo de jecu quívi jíin i.

Jeē ní nacuāha Pedro cuenta nuū ñáyuu cácaandíje ini ñuu Jerusalén

11

¹ Te tēe apóstol jíin táca hermano cáyūcú Judea, ni canihīn de jnūhun jeē sūni ñayuu sīn nación ni cacandíje i jnūhun Yaā Dios.

² Te cuanuhun Pedro ñuu Jerusalén. Te sava tēe hebreo jeē cácaandíje de ya ni cacahān de nuū Pedro:

³ ¿Najehē ni condee ní vehe ñayuu jeē násūu ñáyuu nación yō cúu? Te ni yeji ní jíin i, áchí.

⁴ Yūcuān na te ni nacani cájí Pedro jnūhun nuū tēe ún ndihī ndese ni cuu síquī tēe sīn nación:

⁵ Néne ná ñuu Jope. Te níni jícan tahu na, te ni steén ndijin yā nuū ná, te ni jito ná nájnūhun ñin sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná.

⁶ Te ni jito vāha ná, te ni jini na jeē chíji un cáñūhun quítī

cúún ndaha jíin quítī xéén jíin cóō jíin quítī cándava.

⁷ Te ni jini sōho ná ñin jnūhun ni cahān jíin ná: Pedro, ndocuiñī te cahni rō táca quítī jiñā, te caji rō tī, áchí jíni ná.

⁸ Te ni cahān ná: Ma cáji na, Tātā, chí tu yéji cuítī na táca quítī jeē cahán ley ni jéē tu cáhīyo ndoo tī nuū ní, áchí ná.

⁹ Yūcuān na te jnūhun jeē véji nde ándiví ní cahān tucu jíin ná: Ni sándoo máá rí tī, te ma cahán gā rō jeē tu cáhīyo ndoo tī, áchí jíni ná.

¹⁰ Te unī jínu ni cahān súcuan. Yūcuān na te ni ndaa sahma un cuánuhun ándiví.

¹¹ Te hora un ní jinūcoo unī tēe vehe nuū ni cóndee ná un, cánauducú de sñá, te ñin jnáhan ñuu de Cesarea ni tají de vejicoo de.

¹² Te máá Espíritu ni cahān yā jíin ná jeē ma cáni ni na jéē tú vāha quihīn na jíin de. Te suni iñū hermano yáha ní jengoo jíin ná, te ni quívicoo ná ini vehe tēe nání Cornelio.

¹³ Te tēe un ní nacani de jnūhun nuū na jíjnáhan ná jéē ní jito de ñin ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de.

¹⁴ Te tēe ún cachí de nuū rō ndese jnama Yaā Dios rohó jíin ndihī ñayuu cáyūcú vehe ró, áchí yá. Achí Cornelio jíin ná.

¹⁵ Te nuū ní quejéé ná cahán na, te ni quívi-ni Espíritu Santo ini anuá i jíjnáhan i, nájnūhun ni quívi

ya ini anuá maá yó xīhna gā.

16 Yūcuán na te ni nucūhun ni na jnúhun ni cahān maá Jítóho yō: Jendaá jeē maá ndute-ni ni scuándute Juan ñayuu. Te rōhó jijnáhan ró chi nájñūhun cuandute ró jín Espíritu Santo, cúu jeē cóndee yā ini anuá rō, achí yá.

17 Te suni ni jēhe Yaā Dios Espíritu yā nuū maá i nájñūhun ni jēhe ya nuū maá yó jeē cá candíje yó Jítóho yō Jesucristo. Núu súcuan ¿te ndé ñn cúu ná jéē cásí ná jñiñu jeē sáha Yaā Dios? áchí Pedro.

18 Súcuan ni cajini sōho de jñūhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéñu Yaā Dios. Te ni cacahān de:

Suni ni jēhe Yaā Dios jñūhun jeē na nácani ni ñayuu táca gá nación jeē stóo i cuēchi i návāha cotecu i ní cáni núu súcuan, áchí de.

Ñayuu cá candíje ini ñuu Antioquía

19 Te quivī ní cajehni de Esteban ni quejéé de cájito xeēn de ñayuu cá candíje, te jeē yúcuan ní cajitē núu ñayuu un táca ñuu cuango i, te ni jinūcoo i Fenicia jín Chipre jín ñuu Antioquía. Te ni canacani i jñūhun vāha ya nuū máni jnáhan hebreo i jeē cáyūcu yúcuan, te tu ní cánacani i jñūhun ya nuū ínga ñayuu.

20 Te jecu tēe cá candíje jeē cáyūcu Chipre jín ñuu Cirene ni jinūcoo de ñuu Antioquía, te suni nuū ñáyuu táca nación jeē tu cájini i jñūhun ya ni canacani de jñūhun máa

Jítóho yō Jesús jeē jnáma ya i.

21 Te máa Jítóho yō ni chindéé ñáhán yá de, te cuehē ñayuu ni castóo i jñiñu jeē tu íyó ndāā te ni cacandíje i máa Jítóho yō.

22 Te ñayuu cá candíje ini ñuu Jerusalén ni cajini jñūhun i, te ni catajī i Bernabé cuahān de nde ñuu Antioquía.

23 Te nuū ni jínū Bernabé yūcuán, te ni jini de jeē yóhoyo vāha ni sáha Yaā Dios jín i, te ni cusī ndasí ni de. Te ni stihví ni de táca ñayuu un jéē jín ini jín ánuá i na cóndihvī ni i squícu vāha i nuū maá Jítóho yō, te ma náyūhú i.

24 Chi tēe vāha cúu Bernabé, te ni cunuú Espíritu Santo jín de, te cándíje ñihin de. Te ni cacandíje cuehē ñayuu nuū maá Jítóho yō ni sáha de.

25 Yūcuán na te cuahān de nde ñuu Tarso cuananducú de Saulo. Te ni nanihīn jnáhan de jín Saulo, te ndéca de tēe un ní ndee de ñuu Antioquía.

26 Te ní ñn cuiyā ni candutútú de jín ñáyuu cá candíje yūcuán, te ni castéén de jñūhun ya nuū cuehē ñayuu. Te ñuu Antioquía cúu nuū xīhna ñúhún gá ni caconaní ñayuu cristiano siquī jeē ní cacandíje i Cristo.

27 Te suni tiempo un ní quendacoo tēe cánacani jñūhun Yaā Dios ñuu Jerusalén cuango de nde ñuu Antioquía.

28 Te ñn jnáhan de jeē naní Agabo ni ndocuiñi nuū hermano cá candíje. Te ni steén

Espíritu Santo nuū de, te ni castūhún de jeē cóo ñn jnamā xeēn ñí cáhnu. Te ni cuu jnamā ún ñn parte tiempo jeē ní ndacu Claudio jniñu jeē ní cuu de rey.

²⁹ Yūcuán na te ni candajnūhun tée cávandíje ñuu Antioquía jeē cuáha ñn ñn de nasaa canda de cuāha de te tají de quihīn cotecu hermano cáyūcú Judea.

³⁰ Te súcuan ni casáha de. Te ni catají de Bernabé jiín Saulo ni cajendēca de nuū tée jēhnu cándiso jniñu nuū ñáyuu cávandíje cáyūcú Judea.

Jeē ní jehni Herodes Jacobo, te ni chune de Pedro vecāa

12

¹ Te suu tiempo un ní quejéé rey Herodes jito xeēn de sava ñáyuu cávandíje.

² Te ni ndacu de jniñu jeē jiín espada na cáhni i Jacobo ñani Juan.

³ Te ni jini de jeē ní cacusī ni tée hebreo jeē ní sáha de súcuan, te jeē yúcuan suni ní jni de Pedro. Te máá quívī un ní cuu vico jeē yéji ñáyuu pan jeē tu yíhi levadura.

⁴ Te nuū ní jni de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ñn ñn grupo. Chi cúni Herodes jeē na yáha vico un jéé cúu vico pascua te quenehen de Pedro vecāa un stéén de nuū ñáyuu cuehē.

⁵ Te súcuan íne Pedro vecāa, te cándito soldado un de. Te

ñáyuu cávandíje chi ñihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cúndijin inga quívī te quenehen de Pedro vecāa, te stéén de nuū ñáyuu un núu. Te núhni Pedro jiín úu cadena, cáttú de quixí de mēhñu úu soldado jecuáa ún, te suni cáhīn ga soldado cándito yéhyí vecāa ún.

⁷ Te suu jecuáa ún te sanaa-ni te ni jinū ñn ndajéhé maá Jítoho yō, te ni ndindēé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhni ndaha de un ní canandaji-ni.

⁸ Te ni cahān ndajéhé yā jiín de:

Nacuhni ñihin chīji ró, te nuquíhi ró ndjēn rō, achí yá.

Te súcuan ni sáha de. Te ni cahān tucu ndajéhé yā jiín de:

Condii ticāchi ró, te condiquīn rō ruhū na quíhīn yō, achí yá.

⁹ Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jiín de, chi jéni ni de jeē ñn jeē ni stéén yā jito ndijin de cúu.

¹⁰ Te ni yāha ya jiín de uū nuū cándito soldado. Te ni jinū yā jiín de yéhyí cáa nuū quénda de caca de calle, te yéhyí un ní nune ii-ni máá. Te ni quenda ya jiín de, te ni yāha de ñn calle cuahān de. Yūcuán

na te ni cujiyo-ni ndajéhé yā nuū de cuahān yā.

¹¹ Te ni nducájí ni Pedro te ni cahān maá ní cahān ìin de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jín nūū tāca ñáyuu hebreo jeē cáconi i sáha xeēn i jín rí nuū, áchí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhiin tútú cuéhē ñayuu cájicān tahu i jehē Pedro.

¹³ Te cáhán Pedro ni jinū de yéhyí fuera, te ìin sūchi shí nání Rode cuahān i jeē cúni i núu ndé ìin cúu jeē cahán.

¹⁴ Te ni nacuni i tachī Pedro, te jeē ní cusī ni i te tu ní núne i yéhyí un, chi ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera.

¹⁵ Te ni cacahān jín i:

Jeē cahán neé ró, achí.

Te máá i ñihin cáhán i jeē maá de cúu. Yūcuán na te ni cacahān:

Ndajéhé yā jeē ndító Pedro cúu núu súcuan, áchí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i.

¹⁷ Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jín núu tāca gā hermano jeē ní

quenehen ya ruhū vecāa, áchí de.

Te ni quenda de cuahān de inga luar.

¹⁸ Te nuū ní cundijin, te ni cacuvaā teyí soldado jeē tuá Pedro.

¹⁹ Te ni ndacu Herodes jniñu jeē na nānducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jhī Herodes

²⁰ Te yōhyo ni quītī ni rey Herodes nuū ñáyuu ñuu Tiro jín ñuu Sidón. Te ñayuu un ní candajnūhún i jeē inuú-ni quivicoo ndihi i nuū rey un. Te ni casáha i amigo i jín Blasto, tēe cújéhnū jéjníñu nuū rey un. Te ni cacahān ndahú i jín de jeē na cáhán ndahú de jín rey un jēe na ndéē ni de jín i. Chi nde ñuu maá rey un cájeen i jeē cáyeji i.

²¹ Te ni jeni Herodes ìin quivī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de ìin jnūhun jehū ni cajini sōho i.

²² Te ñayuu un ní caquejéé i cacahān jee i jnūhun yíñúhún jín de:

Nasūu tēe-ni cúu ní, chi ìin yaā cúu ní, áchí i jijnáhan i.

²³ Te máá hora un ní sáha-ni ìin ndajéhé maá Jítóho yō jeē ní jñi ìin cuehyī xeēn rey Herodes, te ni cayeji tindácú de, te ni jihī de, chi

ni sandúxí-ni de máá de te tu ní cáhán de jeē Yaā Dios cúu jeē cujéhnú.

²⁴ Te ni jitē gā jnūhun máá Jítóho yō, te cuehē ndasí ñáyuu ni cacandíje i tǎcá-ni lugar.

²⁵ Te ni jīnu jniñu jeē ní quindeca Bernabé jíin Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ní caquejeé Bernabé jíin Saulo caca cuu de nacani de jnūhun ya

13

¹ Te mēhñu grupo ñáyuu cácandíje ini ñuu Antioquía ni cahíyo tēe cástéén jíin tēe cánacani jnūhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea.

² Te ñin quiví jeē cáhíyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúní rī jeē sasñn ró Bernabé jíin Saulo na quíngoo de jniñu jeē ní jeni ri de, áchí yá.

³ Yūcuán na te ni cajicān tahu ndite ni de, te ni casoó de ndaha de xinī Bernabé jíin Saulo, te súcuan ni catajī de ndíndúú tēe ún cuanacani de jnūhun nuū tǎca ñáyuu.

Jeē ní canacani Bernabé jíin Saulo jnūhun ya nde Chipre

⁴ Te ni sáha Espíritu Santo jeē íchi ñúū Seleucia cuangoo

de. Te yūcuan ní quivícoo de ñin barco cuangoo de nde Chipre, ñuhun jeē íne sñn nuū ndúte.

⁵ Te ni jinūcoo de ñuu Salamina nuū cájecuññi barco, te ni canacani de jnūhun Yaā Dios ini tǎcá vehe íi sinagoga jnáhan hebreo de. Te suni cuahān Juan chindéé ñáhán jíin de.

⁶ Te ni cajica nuu de nǎ-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñin tēe hebreo nání Barjesús. Te tēe tásí cúu de, te cáhán stahú de jeē ñin tēe nǎcani jnūhun Yaā Dios cúu de.

⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios.

⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún.

⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un.

¹⁰ Te ni cahān de:

Tēe sáha jniñu néé stahú ñáhán cúu ró, chi sēhe jexeén cúu ró te jési rō nuū tǎcá jniñu ndaā. Te tu jécuiññi rō jeē sáca núu ró síquī jnúhun ndaā maá Jítóho yō návāha ma candíje ñáyuu nuū yā.

¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quiví, achí Pablo.

Te ni cunee-ni nuū tēe tásí un, te quéndāha quéhiyú de

cuahān de ndúcú de ndé vé jñí ndaha de stéen ichi nuū de quinhun de.

12 Yūcuán na te ni jini gobernador jeē súcuan ni cuu, te ni candíje de jñūhun máá Jítóho yō, te náā ni de jini sōho de jñūhun ya.

Jeē ní coyūcu Pablo jín Bernabé Antioquía ndañū Pisidia

13 Yūcuán na te ni quendacoo Pablo jín Bernabé jín Juan ñuu Pafos, te ni quivícoo de barco te cuangoo de ñuu Perge ndañū Panfilia. Te yūcuan ní cusín Juan, te cuanuhun de ñuu Jerusalén.

14 Te ni quendacoo Pablo jín Bernabé ñuu Perge cuangoo de, te ni jinūcoo de ñuu Antioquía ndañū Pisidia. Te quiví ndétātu ní quivícoo de ini vehe iī sinagoga, te ni cacucōo de.

15 Te ni cahu tutu ley yā jín tutu ní catee tēe ni canacani jñūhun ya nde jenahān. Yūcuán na te tēe cácujuhnu ini vehe iī sinagoga, vii-ni ni catají de tēe cahān jín Pablo jín Bernabé:

Amigo, núu íyó jñūhun cahān ni jeē stihví ni ni ñáyuu yáha, te cahān ní na cúni nahín i núu súcuan, achí de.

16 Yūcuán na te ni ndocuiñí Pablo te ni sáha de seña jín ndaha de jeē nahín-ni coo ñáyuu ún, te ni cahān de:

Nihín jnáhan ñuu yō Israel jín nihín tēe jeē suni cáchiñhún ní Yaā Dios, cuni nahín ní jijnáhan ní.

17 Máá Yáā Dios yohó ñáyuu Israel, ni nacāji ya jí yō

jijnáhan de. Te níni jeē cáyūcu tátú de ñuu Egipto, te ni sáha ya jeē ní nducuehē de. Yūcuán na te jín poder maá yá ni quenehen ya de naciōn Egipto.

18 Te uū xico cuiyā ni cajica de nuū ñūhun téhé, te ni jendeyí ni yā jín de jeē ní castívi de.

19 Te ni snáā yā uxā naciōn Canaán, te ni jēhe ya ñuhun un núu tāca jí yō cúu tahū de.

20 Yūcuán na te ni jeni ya tāca tēe ni candacu jniñu nuū de nájñūhun cuūn ciento uū xico uxí cuiyā, nde quiví ní cotecu Samuel, tēe ni nacani jñūhun ya.

21 Yūcuán na te máá ñáyuu un ní cajicān i ñn rey, te ni jeni Yaā Dios Saúl ní ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl.

22 Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñūhun de: Cúsī ni rī jín David sēhe Isaí, chí sáha de tāca jeē cuní rī, achí yá.

23 Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chí súcuan ni jejnūhun ya.

24 Te nde ná tu quejéé Jesús nacani ya jñūhun nuū ñáyuu, te ni nacani Juan jñūhun nuū tāca jnáhan ñuu yō Israel jeē na nacani ni i jeē stóo i cuēchi i, te cuandute i.

25 Te nuū cuácuyajni jeē cúu Juan, te ni cahān de: Cándētu ró jeē quíji Cristo, te jeni ni rō jeē ruhū cúu, te nasūu rí cúu.

Chi quiji ya, te cújéhnú ndasí yá jeē ní ndijēn yā tu cújéhnú ri tava rī, achí de.

26 'Amigo jijnáhan ní, táca níhín jéē cácuu yó séhe yucūn Abraham jín táca níhín jéē suni cándiso Iyo ní núu Yaā Dios, chí cúní Yaā Dios jeē na cúní yō jnūhun yáha jeē cáhán ndese jnáma ya yohó.

27 Chi táca ñáyuu ñuu Jerusalén jín táca téé cácujehnú nuū i, tu ní cájecūhun ní i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní cateé téé ni canacani jnūhun Yaā Dios nde jenahán. Te vēsú súcuan te tu ní cájecūhun ní i, te ni candonda i ni cacahán i jeē na cúu yā. Te súcuan ni casquícu i siquī táca jnúhun jeē ní cacahán téé ni canacani jnūhun ya nde jenahán.

28 Vēsú tu ní cánihín i ní ñn cuēchi siquī yá jeē cúu yā, te ni cacahán níhín i jín Pilato jeē na cúu yā.

29 Te ná ni jīnu ni squícu siquī yā táca jnúhun cáhán nuū tútu íi, te ni casnúu de ya jicā cruz, te ni cachindūji de ya ñn yaū ní jete jicā cáva.

30 Te ni sáha Yaā Dios jeē ní natecu yā.

31 Te ñayuu Galilea jeē ní jéngoo jín yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cáji jnúhun ya nuū táca gá jnáhan yó hebreo vijna.

32 'Te máá ná jijnáhan ná cánacani ná jnúhun vāha yáha núu ní jijnáhan ní jéē súcuan ni jejnūhun ya nuū táca jí yō.

33 Te jnūhun yáha ní squícu Yaā Dios nuū maá yó jeē cácuu yó séhe yucūn de, chí ni nastécu yā Jesús. Chí suhva cáhán salmo uū jeē cahán yā jín Séhe ya Jesús: Máá ró cúu Sēhe ri, te vijna ni sajehnú ri rohó jéē cúu ri Tatá rō, achí yá.

34 Te ni nastécu yā Sēhe ya Jesús návāha ma tehyú cuiti yā, chí suhva cáhán tutu íi jeē ní cáhán Yaā Dios nde jenahán; Te níhín maá ró táca jéé váha ni jejnūhun ri nuū David, achí.

35 Te suni súcuan cáhán inga salmo jeē ní tee David jnūhun jeē cahán Jesús jín Yáā Dios: Ma cuáha ni jnúhun tehyū ná, chí jéjniñu ná núu ní te maní ni jín ná, achí.

36 Te David chí jíní yō jeē ní jejniñu de nuū ñáyuu ní cotecu de jín, nájnūhun ni cuni Yaā Dios. Te ni jihí de, te ni quindūji de nájnūhun ni quindūji táca jí yō, te ni tehyū de.

37 Te Jesús, Yaā ní nastécu Yaā Dios, chí tu ní téhyú cuiti yā.

38 Jeē yúcuan jíní ñúhún jecūhun ní, amigo, jeē Jesús cúu Yaā cóne cáhnu ni nuū táca cuéchi yó.

39 Chí ni canducú ní ndahva ni cuéchi ní jéé squícu ní ley jeē ní jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndihí cuéchi ñayuu

jeē cá candíje i tāca jēē ni sāha ya jehē i.

40 Nūu sūcuan te coto ní jijnáhan ní jēē ma ndóho ní táca castigo jeē ní cacahān tēē ni canacani jnūhun Yaā Dios nde jenahán, chi suhva ni cahān Yaā Dios:

41 Tāca rōhó ñáyuu jeē casacatā, na coto ró na castigo xeēn quiji siquī rō,

te naa ni rō coto ró, te cuu rō. Chi tiempo maá ró te sāha ri jniñu xeēn

jeē ma cándíje cuiṭi rō jeē sūcuan sāha ri vēsú nacani ñáyuu jnūhun un nūu rō, achí yá.

Achí Pablo.

42 Te ni quendacoo Pablo jijn táca jnāhan de vehe iī sinagoga jnāhan hebreo de. Te ñáyuu sīn nación ni cacahān ndahú i jijn de jeē inga quivī ndétātú nacani tucu de jnūhun yáha nūu i.

43 Te ni jitē ñáyuu un cuángoo i. Te cuehē ñáyuu hebreo jijn ñáyuu sīn nación jeē ní cacandíje sahān hebreo te cáchiñúhún i nuū Yaā Dios, cuangoo i jijn Pablo jijn Bernabé. Te ni cacahān nihin de jijn i jeē na cuñi nihin i jijn jnūhun jeē maní Yaā Dios jijn i.

44 Te quivī ndétātú inga semana te je yajni ndihi ñáyuu ñuu un ní candutútú i jeē cūni nahín i jnūhun Yaā Dios.

45 Te nuū ní cajini tēē hebreo jeē ní candutútú cuehē ñáyuu, te ni cacucuésun ni de, te ni cacahān de jeē násūu jnūhun vāha cúu jeē

steén Pablo, te ni cacahān neé de nuū Pablo.

46 Yūcuán na te jéhnū-ni ni cacahān Pablo jijn Bernabé, áchí de:

Cánuú jēē xihna gā nuū maá ní jeē cácuu ní jnāhan ñuu yō hebreo nacani ná jnūhun Yaā Dios, te tu ní cájetáhú ní. Nūu sūcuan te cuēchi máá ní cúu jeē ma nihín tahu ní cotecu ni ní cáni. Te vijna te quinacani ná jnūhun ya nuū ñáyuu táca nación jeē tu cájini i jnūhun ya.

47 Chi suhva ni ndacu máá Jítóho yō jniñu nuū na jijnáhan ná:

Ni jeni ri rohó jēē cúu ró nájñūhun luz jeē steén ini anuá ñáyuu táca nación,

chi ní ñayivi steén rō jnūhun ri nuū ñáyuu jeē jnáma ri i, achí yá.

Achí de.

48 Te ñáyuu sīn nación, nuū ní cajini sōho i jnūhun yáha te ni cacusiḥ teyí ni i. Te ni cacahān i jeē yōhyo vāha jnūhun cúu jnūhun máá Jítóho yō, te táca ñáyuu jeē ní nacāji Yaā Dios i jeē cótecu i ní cáni, ni cacandíje i.

49 Te ni jitē jnūhun máá Jítóho yō cuahān ní región yūcuán.

50 Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēē hebreo ni cascáhan de ña, te suni ni cascáhan de tēē cácujehnū ñuu ún, te ni cajito xeēn i Pablo jijn Bernabé te nde ni cascúnu i de cuangoo de.

⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio.

⁵² Te vēsū súcuan te ñayuu cácanđije un ní cunuú Espíritu Santo jíin i, te cácusī teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quīvicoo Pablo jíin Bernabé ini vehe i sinagoga jnáhan de hebreo. Te jíin jnūhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sīn nación ni cacandíje i.

² Te jnáhan de hebreo jeē tu ní cácanđije, ni cascáhán de ñayuu sīn nación, te ni caji ni i jeē násūu ñáyuu váha cácuu ñayuu cácanđije.

³ Te ni caquendōo Pablo jíin Bernabé yūcuan cuéhē gā quīvī. Te jéhnū-ni ni canacani de jnūhun Jitoho yō, chi cácuahnu ni de ya jeē váha quihīn jniñu un sáha ya. Te máá yá chi ni steén yā jeē iyó ndáa jnūhun jeē yóhyo váha ni yā jíin i jeē cánacani de, chi ni jēhe ya jeē sáha de jniñu jéhnū jeē steén jeē cujéhnū ya.

⁴ Te ñayuu ñuu un ní cacusīn ni i jíjnáhan i, sava i jíin tée hebreo jeē tu cácanđije de Jesús, te sava ga i jíin tée apóstol.

⁵ Te ñayuu hebreo jíin ñáyuu sīn nación jíin tée cácuu tohō ni casquijnáhan jnūhun jeē sáha xeēn jíin Pablo jíin

Bernabé, jíin jéē cuáha yuū xinī de núú.

⁶ Te ni cajini de jeē súcuan cácani sáha, te ni cajinu de cuangoo de nde ñuu Litra jíin ñuu Derbe ndañūū Licaonia jíin táca ñuu yajni yūcuán.

⁷ Te yūcuan ní canacani de jnūhun jeē jnáma ya yohó.

Jeē ní cajēhe i yuū xinī Pablo ini ñuu Litra

⁸ Te ñuu Litra néne iin tēe jeē tu cúu caca, te tu jíca cuiti de chi nde quīvī ní cacu de cácójó de.

⁹ Tēe un ní jini sōho de jnūhun jeē cahán Pablo, te ni jito váha Pablo nuū de, te ni jini de jeē candíje váha tēe un jéē ndúvāha de.

¹⁰ Te ni cahān jee Pablo jíin de:

Ndocuñī, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de.

¹¹ Te ni cajini ñayuu ún jniñu jéhnū jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájjnūhun cájica tēe, áchí i.

¹² Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun.

¹³ Te yajni yuñūū un néne veñūhun yaā Júpiter. Te máá sūtū jejníñu ini veñūhun un ní quihīn de stiquī jijnáhan ti te ni scutú de ti ita te vēji de nde nuū quívī i yuñūū, te máá de jíin ñáyuu ñuu un cácani de

cahni de stiquī un sócō de nuū Bernabé jíin Pablo nuú.

14 Te Bernabé jíin Pablo, tēe cácuu apóstol, ní cajito de jeē súcuan cácuu ní ñayuu un sáha i, te ni candatá de sahma de jeē steén de jeē castívi ndasí i jeē casáha i súcuan. Te ni quenendava de ni quívicoo de mēhñu ñáyuu cuehē ún, te ni cacana jee de:

15 Tátā jijnáhan ní, ma sáha cuiti ni súcuan, chi sãñá suni tēe-ni cácuu ná nájñuhun máa ní jijnáhan ní. Te vējicoo ná nacani ná jnúhun vāha Yaā Dios nuū ní, chi cahān na jíin ní jeē ma sáha ga ni táca jniñu yáha jēe tu ndé jéjñiñu cuiti, chi sa suhva na chíñúhún ní maá Yáa Dios, Yaā técu, Yaā ni sáha andívi jíin ñáyívi jíin ndute mar jíin táca gá jeē iyó ní cáhnu.

16 Te nde jenahán ní jēhe ya jñuhun jeē na sáha táca ñáyuu modo cácuu maá i.

17 Te vēsú súcuan te níni stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo sīi ni yō, achí ndíndúu de.

18 Te vēsú súcuan ni cacahān de, te yōhyo uhū ni cajesi de nuū ñáyuu un návāha tú socō i stiquī un núu de jeē chíñúhún i ndíndúu de.

19 Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā

ñúu ún, chi ni cajeni ni i jeē jé ni jihí de.

20 Te tēe cácuu de Pablo, te ni ndonda Pablo, te ni ndívi de ini ñuu. Te inga quívi ni quihin de ichi cuahān de jíin Bernabé nde ñuu Derbe.

21 Te ini ñuu un ní canacani de jñuhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía.

22 Te ni cahije ga ni ñayuu cácuu de yūcuan ní casáha de. Te ni castíhví ni de i jeē na cuíñi níhin i jíin jnúhun ya, chi ni cacahān de jeē níni quiji cuehē jñúndóho siquī yō te yūcuán na te jinū yō ñuu nuū ndácu Yaā Dios jniñu.

23 Te táca ñuu ni cajeni de tēe jéhnú cándiso jniñu condito de ñayuu cácuu de. Te ni cahíyo ndite ni Pablo jíin Bernabé nuū yā, te ni cajicān tahu de, te ni cacahān de jíin máa Jítoho yō jeē na cóto ya ñayuu ún chi cácuu de i máa yá.

Jeē cuánuhun tucu Pablo jíin Bernabé ñuu Antioquía ndañúu Siria

24 Te ni cayāha de cuangoo de región Pisidia, te ni najinūcoo de región Panfilia.

25 Te ni canacani de jñuhun ya ini ñuu Perge región Panfilia, te sáa te cuangoo de ñuu Atalia.

26 Te yūcuan ní quívicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē

na chíndéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún.

27 Te nuū ní najinūcoo de yūcuán, te ni casáha de junta jíin ñáyuu cácadíje, te ni canacani de jnūhun tǎcá ndese cuehē jeē váha ni sáha Yaā Dios jíin de, chi ni jēhe ya jnūhun jeē suni candíje ñayuu tǎcá nación jeē tu ní cájini i jnūhun ya.

28 Te ni caquendōo de yūcuan cuéhē quivī jíin ñáyuu cácadíje.

Siquī junta ñuu Jerusalén

15

1 Yūcuán na te jecu tēe Judea ni quijicoo de ñuu Antioquía, te ni castéén de nuū tǎcá hermano jeē núu tu sáha i circuncidar, nájnūhun cáhán ley jeē ni jēhe ya nuū Moisés, te tú na modo cācu i.

2 Te Pablo jíin Bernabé ni catejnáhan de jíin tēe ún, te tu ní cūndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cácadíje un ndé ñuu Jerusalén, te yūcuán ndajnūhún de siquī jnūhun yáha jíin tēe cácuu apóstol jíin tēe jéhnu cándiso jniñu nuū ñáyuu cácadíje yūcuán.

3 Te ñayuu cácadíje un ní canachuhun íchí i de. Te ni cayáha de ichi Fenicia jíin Samaria, te canacani de jnūhun jeē suni ñayuu tǎca gá nación jeē tu ní cájini i jnūhun ya, ni castóo i jniñu jeē tu iyó ndāā te ni cacandíje

i Yaā Dios. Te yōhyo ni cacusiñi ni tǎcá hermano jeē ní canihīn de jnūhun jeē súcuan ni cacandíje ñayuu ún.

4 Te ni najinūcoo de ñuu Jerusalén, te ñayuu cácadíje yūcuan jíin tēe apóstol jíin tēe jéhnu cándiso jniñu nuū ñáyuu un, ní cacusiñi ni de jeē ní najinūcoo jnáhan de ún. Te Pablo jíin Bernabé ni canacani de tǎca jnūhun ndese cuehē jeē váha ni sáha ya siquī jniñu jeē ní canacani de jnūhun ya.

5 Te sava tēe grupo fariseo jeē cácadíje ni candocuiñi te ni cacahān:

Ñayuu sñn nación jeē cácadíje i Jesús, jíini ñúhún jéé sáha i circuncidar nájnūhun cásáha máá yó, te cánuú ndacu yó jniñu nuū i jeē na squícu i ley jeē ni jēhe ya nuū Moisés, áchí.

6 Te tǎca tēe apóstol jíin tǎca tēe jéhnu cándiso jniñu nuū ñáyuu cácadíje, ni candutútú de junta náváha ndajnūhún de te sándaā de siquī jnūhun yáha.

7 Te tǎcá de ni cacahān de ndese cájeni ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini váha ni jéé je iyó tiempo jeē ní nacāji Yaā Dios sáña jéé quihín na núu ñáyuu sñn nación te nacani ná jnūhun nuū i jeē jnáma ya i, náváha candíje i Jesucristo.

8 Te Yaā Dios chi jíiní yá ndese cáa ánuá ndihi ñayuu, te ni steén yá jeē jetáhú yá i, chi suni ni jēhe ya Espíritu Santo

nuū i jínáhan i, nájñuhun ni jēhe ya nuū maá yó.

⁹ Te inuú-ni sáha ya jíin yó jíin máá i, chí síquī jeē suni ni cacandíje i jñuhun jeē jnáma ya i, te jeē yúcuan ní sándoo ya anuá i nuū tāca cuéchi i.

¹⁰ Te vijna ¿naun cáconi ní ndacu ní jniñu jeē na squícu i ley un? Chí tu nújnahan ni Yaā Dios jeē súcuan. Chí cáconi ní tee ní jniñu yí yáha síquī ñáyuu cacandíje ún, te ni tāca jíí yō tu ní cácondeyí de squícu de, te ni máá yó.

¹¹ Chí sa suhva cacandíje yó jēē jnáma ya yohó súcuan-ni síquī jeē yóhyo vāha ni maá Jítóho yō Jesús jíin yó, te suni súcuan-ni jnáma ya maá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúú de, te ni cajini nahín de jñuhun cácahān Bernabé jíin Pablo. Chí ni cacastūhún de jeē ni jēhe ya poder jeē ní casáha de tācá jniñu jéhnu jeē steén jeē cujéhnu ya, ni cajito ñayuu tācá nación jeē tu cájini i jñuhun ya.

¹³ Te nuū ni jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhān na.

¹⁴ Ni nacani Simón Pedro jñuhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jñuhun ya, chí suni mēhñu máá i nácāji ya ñayuu jeē ndúu i ñayuu maá yá.

¹⁵ Te quíjnáhan jñuhun ni cahān de yáha jíin jñuhun ni

catee tēe ni canacani jñuhun Yaā Dios nde jenahán jeē yosó nuú tutu ií:

¹⁶ Achí Yáā Dios:

Nájñuhun ni cotúú vehe David cúu jeē tuá ndácu sēhe yucūn de jniñu,

nájñuhun ni ndacu máá de jniñu nde jenahán.

Te ñn quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuan sáha ri návāha tāca gá ñayuu na nánducú i ruhū

nde jíin ñáyuu tācá nación jeē tu cájini jñuhun ri, tācá i jeē cána ri i candíje i ruhū.

¹⁸ Súcuan cáhān maá Jítóho yō, te nde jenahán ní steén yā jñuhun yáha núu ñáyuu.

Achí tutu ií.

¹⁹ Jeē yúcuan jéni ni na jéē ñáyuu tāca gá nación jeē ní castóo i jniñu jeē tu íyó ndáa te ni cacandíje i máá Yáā Dios, ma stáhān yō i jeē ndácu yó jniñu jeē squícu i ley Moisés.

²⁰ Chí sa suhva na tēe yó carta quihīn nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quitī jeē jihí jeē tu jéti niñī tī, te ni ma cáji i niñī.

²¹ Jñuhun yáha-ni tee yó quihīn nuū i nájñuhun je cástéén nde jenahán. Chí nde jenahán je íyó tēe cástéén jñuhun ley jeē ni jēhe ya nuū Moisés, te ndijnahan quivī ndétātu cácahu de ley un ini

vehe iī sinagoga tācá ñuu, áchí Jacobo.

22 Yūcuán na te tēe apóstol, jín tēe jéhu cándiso jniñu, jín ndivii ñayuu cácadíje, ni cundaā ni de jeē nácāji de tēe quingoo jín Pablo jín Bernabé nde ñuu Antioquía. Te tēe ni canacāji de un cácuu Silas jín Judas, te inga sihví de cúu Barsabás. Te cándiso jniñu de nuū tācá hermano cácadíje.

23 Te ni cajendēca de carta jeē cahán suhva:

Máá ná cácuu tēe apóstol, jín táca tēe jéhu cándiso jniñu nuū ñayuu cácadíje, jín táca gá hermano yō. Te cátee ná carta yáha cuájeē nuū ni jínáhan ní, hermano, jeē cácuu ní ñayuu sín nación jeē cáyūcu ní ñuu Antioquía jín Siria jín Cilicia. Cuandeyí ni ni jínáhan ní.

24 Ni cajini jnūhun ná jéē ní quendacoo sava jnáhan ná yáha ní jengoo nuū ní, te jín jnúhun jeē ní cacahán de te ni casáha jeē ní canacani ndasí ni ní, te ni cacuxí ni ní, chí cándacu de jniñu jeē sáha ní circuncidar jín jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají tēe un jéē jeé de nuū ní.

25 Jeē yúcuán ní cajeni ni ná, te inuú-ni ni cundaā ni ná, te ni nacāji ná tēe cuajēcoo nuū ni jín úu hermano yō jeē maní yō jín, cúu Bernabé jín Pablo.

26 Te ndindúú de je ni catana de máá de nuū jnúndóho vēsú na cúu de

jeē siquí jnūhun Jitoho yō Jesucristo.

27 Núu súcuán te cátají ná Judas jín Silas jeē nuū ní, te suni nájñūhun cáhán carta yáha suni súcuán castūhún de nuū ni jínáhan ní.

28 Chí máá Espíritu Santo ni steén yā in modo jeē ní cundaā ni na jéē ma tēe ná táca jniñu yí ley Moisés siquí ní, chí máá-ni jniñu yáha jéē cánuú gá:

29 Ma cáji ni táca jéē ní casocō nuū ídolo, ni ma cáji ni níñi ni quití jeē jihí jeē tu jéti níñi tí, te ma cáca jnéni ní. Te vāha squícu ní núu tuá sáha ní táca jéē yáha. Súcuán na cóo te sándeýí ni ní, áchí carta.

30 Yūcuán na te tēe quingoo un cuángoo de nde ñuu Antioquía. Te ni cacana de xiní ñayuu cácadíje ni candutútú de junta, te ni cajēhe de carta un núu í.

31 Te ni cacahu i, te ni candusí ni i jeē ni níñi i jnūhun ndeyí ni nuū carta ún.

32 Te suni tēe cánacani jnūhun Yaā Dios cácuu Judas jín Silas, te jín cuéhē jnūhun ni cacahán de te ni candundeyí ni tācá hermano un, te ni cahije ga ni i jín jnúhun ya.

33 Te ni coyūcú de yūcuán jecu quiví. Yūcuán na te hermano yúcuán ní canacuatáhu i nuū de jeē quinhun de nuū tēe jeē ní catajé de.

34 Te Silas ni nujnahan ni de ni quendōo de yūcuán.

35 Te suni ni caquendōo Pablo jín Bernabé ñuu Antioquía, te máá de jín sava ga tēe

ni castéén de te ni canacani de jñuhun vāha máá Jítóho yō.

Jeē quihín Pablo inga jínu nacani de jñuhun ya

³⁶ Te ni cuu ga quivī, te ni cahān Pablo jín Bernabé:

Vijna te na quícondēhe yó tǎcá hermano yō ndijnahan ñuu nuū ní nacani yó jnúhun máá Jítóho yō, na cóndēhe yó ndese cáhiyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jín de.

³⁸ Te tu ní cúní Pablo jeē quihín tēe un jín de, chi nde Panfilia ni cusín Marcos nuū Pablo jín Bernabé, chi tuá ni chindéé ñáhán de ndindúú tēe un síquī jñíñu ya nde saá.

³⁹ Te nahán ní candajnūhun Pablo jín Bernabé, te tu ní cácondaā ni de síquī Marcos, te ni cacusín de. Te Bernabé ni jeca de Marcos, te ni quivícoo de barco cuango de nde Chipre, ñuhun jeē íne sín nuū ndúte.

⁴⁰ Te Pablo ni nacāji de Silas quihín jín de. Te tǎcá hermano cácandije ni cajicān tahu de nuū máá Jítóho yō jeē síquī jeē vāha ni yā te na chindéé ñáhán yá Pablo. Te cuahān Silas jín Pablo.

⁴¹ Te ni cajica cuu de ní Siria jín Cilicia. Te tǎca grupo ñayuu cácandije ni cahije ga ni i jín jnúhun ya ni casáha de.

Jeē cuahán Timoteo jín Pablo jín Silas

16

¹ Yūcuán na te saá te ni jinū Pablo jín Silas ñuu Derbe jín ñuu Litra. Te yūcuán néne ññ

tēe suchí cándije, nání i Timoteo. Sēhe yí ññ ñahan hebrea cúu i, te ñahan cándije cúu ña. Te tátá i chi tēe griego cúu de.

² Te tǎcá hermano ñuu Litra jín ñuu Iconio cácejnūhún de Timoteo.

³ Te cúní Pablo condeca de Timoteo quihín de jín i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndihí ñayuu cájini i jeē tēe griego cúu tátá i.

⁴ Te tǎcá ñuu nuū cuángoo de te ni cacastūhún de nuū ñayuu cácandije jeē na squícu i máá jñíñu jeē ní casándaā tēe apóstol jín tǎca tēe jéhu cáyūcú ñuu Jerusalén jeē cándiso jñíñu nuū ñayuu cácandije.

⁵ Te ñayuu cácandije ni cahije ga ni i. Te ndijnahan quivī ni cacandije cuehē gā ñayuu.

Jeē ní jito ndijin Pablo ññ tēe ñuu Macedonia

⁶ Te tu ní jéhe Espíritu Santo yā jñuhun jeē nácani de jñuhun ya ní Asia. Jeē yúcuán ní cayāha de ichi Frigia jín Galacia cuango de.

⁷ Te ni jinūcoo de nuū jináhan Misia jín Bitinia. Te cácuni de quingoo de Bitinia, te máá Espíritu Jesús tu ní jéhe ya jñuhun quingoo de.

⁸ Te ni cayāha de ññ lado Misia cuango de ñuu Troas jeē íne yajni yumar.

⁹ Te ññ jecuāā te nájñuhun ññ jēni ní jito ndijin Pablo, te ni jito de jeē índichi ññ tēe ñuu Macedonia nuū de

cáhán ndahú jíin de: Nehen ní ñuu ná Macedonia te chindéé ñáhán ní sãña jíjnáhan ná, áchí.

¹⁰ Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quíngoo ná Macedonia, chí ni cajini cají ná jeē maá Yáa Dios tájí yá sãña jíjnáhan ná jeē castūhun ná nuū ñáyuu yūcuan jnúhun jnama ya i.

Jeē ní coyūcu Pablo jíin Silas ñuu Filipos

¹¹ Te jíin barco ni quenda-coo ná ñuu Troas, te cuangoo ndaā-ni ná ndé Samotracia, ñuhun jeē íne sín nuū ndúte. Te inga quivī ni jinūcoo ná ñuu Neápolis.

¹² Te yūcuan ní quendacoo ná, te ni jinūcoo ná ñuu Filipos jeē cúu ñuu cujéhnua ga íne Macedonia, chí maá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī.

¹³ Te ñin quivī ndétātu ní quendacoo ná ñuu ún, te ni jengoo ná ñin yuyúte, chí yūcuan cúu ñin lugar nuū cájicān tahuñ ñáyuu. Te ni cacucōo ná, te ni canacani ná jnúhun ya nuū tãcá ñahan ní canataca yūcuán.

¹⁴ Te ñin ña nání Lidia jeē véji ña ñuu Tiatira, xíco ña sahma ndihí jeē yáhu ga ndeé. Te maá ña níni chíñúhún ña Yáa Dios. Te ni jini sōho ña jnúhun cánacani ná, te maá Jítóho yō Jesús ni sáha ya jeē ní candíje ña jnúhun jnama ya ña jeē ní cahān Pablo.

¹⁵ Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cáducáhnua ni ni jéē candíje ndije ná maá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶ Te ñin quivī te cuangoo tucu ná suu lugar nuū jéngoo ñáyuu cájicān tahuñ. Te ni canajnáhan ná jíin ñin sūchi síhí jeē ñúhun tachí ini i, te maá un sáha jeē cahán i tãcá ndese coo te cúndaā jeē cahán i. Te sūchí un ní cajeen patrón i, návāha nihín de cuehē xūhun síquī jeē cástūhún i nuū ñin ñin ñáyuu ndese coo ichi núú.

¹⁷ Te sūchí un ndíquín i sãña jíjnáhan ná cána jee í:

Tēe yáha cájejníñu de nuū Yáa Dios, Yáa cujéhnua téyí, te cácastūhún de ndese cácu ní núú cuéchi ní jíjnáhan ní, áchí i.

¹⁸ Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihín rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yūcuan ní cajni de Pablo jíin Silas cuangoo jíin de nde vehe juzgado nuū cáyūcu tóhō.

²⁰ Te ni cajeni ún de nuū juez, tēe casándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i.

²¹ Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnūhun, chí ñayuu nación Roma cácuu yó, áchí.

²² Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quénda sahma ndíndúú de te cani yujnu siquī de.

²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tée ndíto vecāa jeē na cóndito ndasí de jeē ma cácu ndíndúú tée ún.

²⁴ Te jeē súcuan ni tahū jniñu nuū tée ndíto vecāa te ni squíví de Pablo jíin Silas nde ichi íni gā, te ni squíví jehē de t̄sin yujnu ndéé yaū te ni cajihni de.

²⁵ Te nuū ní cuu sava ñuú, te cájicān tahú Pablo jíin Silas, te cájita de yaa íi nuū maá Yáā Dios. Te ñayuu cáhīn jíin de vecāa un ní cajini nahín i.

²⁶ Te sanaa-ni te ni jnāa nīhin téyí, te nde nuū cimientto vecāa un ní canda. Te ni canune-ni yéhyí vécāa ún, te ni canandajī-ní cadena jeē cánuhnī tāca ñáyuu ún.

²⁷ Te ni natahū ni tēe ndíto vecāa, te ni jito de jeē núne yéhyí vécāa ún. Te ni tava de espada jeē cáhni de máá de núú, chí ni jeni ni de jeē ndívií cuiti ñayuu cáhīn vecāa un cuángoo i.

²⁸ Te ni cana jee Pablo:

Ma cáhni ni máá ní, chí cáhīn ndihí ná, áchí de.

²⁹ Yūcuán na te máá tée ndíto vecāa ni cana de jeē na quíndeca i ñuhūn, te yachī ni quíví de ini vecāa. Te ni jecuñī yití de nuū Pablo jíin Silas, te quísi i de jeē yūhú de.

³⁰ Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sañá? áchí de.

³¹ Te ni cacahān de jíin tée ún:

Candíje ní táca jéē ni sáha Jitoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, áchí de.

³² Te ni canacani de jnūhun máá Jitoho yō nuū tée un jíin núu táca ñáyuu cáyūcú vehe de.

³³ Te suu máá jecuáa yúcuán ní nacate tēe ndíto vecāa un núu ní catujī Pablo jíin Silas jeē ní cacani yujnu siquī de. Yūcuán na te ni jendute de jíin ndihí ñayuu cáyūcú vehe de.

³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndihí de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catají de policía cuangoo jíin jnūhun jeē na siáá tēe ndíto vecāa un Pablo jíin Silas quíngoo de.

³⁶ Te tēe ndíto vecāa un ní castūhún de jnūhun yáha núu Pablo:

Tēe cácuu juez ni catají de jnūhun vējí jeē na siáá na níhín quíngoo ní. Núu súcuan te quendacoo ní quíhīn ní, te cuandeyí ni ní, áchí de.

37 Te ni cahān Pablo jín policía:

Cuehē ñayuu ni cajito i jeē ní cacani de sãñá, te ni tu ní cásandaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jín ñayuu cácuu séhe nación Roma. Te vijna ¿á quenehen sãhí de sãña cácuni de naún? Ma cúu cuíti. Na quícoo máa de quenehen de sãña jíjnáhan ná, áchí Pablo.

38 Te ni canandió cóo policía ni castühún de jñuhun yáha núu tée cácuu juez, te ni cayūhú de jeē ní cajini sōho de jñuhun jeē séhe nación Roma cácuu Pablo jín Silas.

39 Te ni quecoo tēe cácuu juez ún, te yōhyo ni cacahān ndahú jín Pablo jín Silas jeē na cóne cáhnu ní de. Te ni caquenehen de vecāa ún, te ni cacahān ndahú jín de jeē na quéndacoo de ñuu un quíngoo de.

40 Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ni jín táca hermano. Te ni caquihin de ichi cuangoo de.

*Jeē ní cacuvaā ñayuu
Tesalónica*

17

1 Te Pablo jín Silas ni cayāha de ñuu Anfípolis jín ñuu Apolonia cuangoo de, te ni jinūcoo de ñuu Tesalónica nuū iyó in vehe i sinagoga jnáhan de hebreo.

2 Te ni coyūcú de yūcuan únī semana, te tāca quívī ndétātu jéhén Pablo vehe i sinagoga, nájñuhun sáha sáha de, te ni nacani de jñuhun ya nuū tée un.

3 Te jín jñuhun cáhán tutu i ni steén de jeē súcuan ni jini ñuhún ndoho Cristo jeē cúu yā te natecu yā. Te ní cahān de:

Jñuhun nácani ná núu ni cúu jñuhun Jesús, te máa yá cúu Cristo, Yaā ní jeni Yaā Dios jeē jnáma ya yohó, áchí de.

4 Te ni cacandíje sava jnáhan de hebreo jín cuéhē ñayuu griego jeē cáchiñuhún i Yaā Dios, jín cuéhē ñahan cácuu nuū, te ni nduu inuú ni i jín Pablo jín Silas.

5 Yūcuán na te yōhyo ni cacucuésún ni jnáhan de hebreo jeē tu cacandíje, te ni castútú tée cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xinī ñayuu ñuu ún. Te ni jengoo de vehe Jasón cánanducú de Pablo jín Silas jeē jní de tēe un quíndēca de nuū ñayuu cuehē.

6 Te tu ní cánanihīn de, te ni cañuhun de Jasón jín sava ga hermano cuangoo de jín núu tohó ñuu ún. Te jeē siquí Pablo jín Silas ni cacana jee de:

Tēe jeē castívī xínī ñayuu ní ñáyiví, je ni quecoo de nde yāhá.

7 Te máa Jasón ni jēhe núu vehe cáyūcu tée ún. Te tēe ún tu cájetáhú de ley máa rey yohó ñayuu Roma, chi sa suhva cácahān de jeē cájetáhú

de nuū inga rey jeē naní Jesús, achí de jínáhan de.

8 Te ñayuu jiín tée cácuu tohō ni cajini sōho i jnūhun yáha, te ni cacuvaā i siquī.

9 Te Jasón jiín táca gá hermano ni castóo de xūhún de, chi ni cacahān tohō un jiín de jeē nde núu tají de Pablo jiín Silas quingoo de inga ñuu, yūcuán na te nacuaāha tohō un xūhun de. Te súcuan te ni casiáá de Jasón jiín táca gá hermano cuangoo de.

Jeē ní coyūcu Pablo jiín Silas ñuu Berea

10 Yūcuán na te tǎcá hermano un, yachī-ni ni cascáca de Pablo jiín Silas jecuáā un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe iī sinagoga jnáhan ñuu de hebreo.

11 Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusī ni de jiín jnūhun ni cacahān Pablo jiín Silas. Te ndijnahān quivī cánanducú yúcún de nuū tútu iī núu súcuan cáhán chí tuú.

12 Jeē yúcuan ní cacandíje cuehē jnáhan ñuu de hebreo te suni nde jiín cuéhē ñayuu griego, cúu tēe cúu ñahan cácuu nuū.

13 Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yúcuan ní castónda de ñayuu siquī Pablo.

14 Yūcuán na te tǎcá hermano ni catajī-ni de Pablo cuahān de nde yumar. Te ni ndōo Silas jiín Timoteo ñuu Berea.

15 Te jecu hermano ni cajendēca de Pablo nde ñuu Atenas. Te ni cahān Pablo jiín de jeē cahān de jiín Silas jiín Timoteo jeē na quíngoo yachī de nuū Pablo. Te vendicoo de ñuu Berea.

Jeē ní íne Pablo ñuu Atenas

16 Te níni ndétu Pablo jeē jinúcoo Silas jiín Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de.

17 Te ini vehe iī sinagoga ni cahān de jnūhun ya jiín jnáhan ñuu de hebreo jiín táca gá tēe cáchiñúhún Yaā Dios. Te suni táca quivī ni nacani de jnūhun ya nuū táca ñáyuu cáhīn nuū yáhu.

18 Te sava tēe cáscuáha jnūhun jeē castéén grupo epicúreo, jiín inga sava tēe cáscuáha jnūhun jeē castéén grupo estoico, ni caquejéé cácahān jiín Pablo. Te sava ni cacahān:

¿Na jnūhun cáhán tēe tǎlólhé yáha? áchí.

Te sava ga de ni cacahān:

Tēe nácani jnūhun táca yáá jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyi.

19 Te ni cajeca de Pablo cuangoo de, te ni jinúcoo de nde lugar nuū naní Areópago

nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéē steén ni.

20 Chi cáhán ni jnúhun jeē ná tu cuni cuiti na jíjnáhan ná, te jeē yúcuan cácuni ná jecūhun ni na síquī tāca jnúhun yáha, áchí jíjn de.

21 Chi tāca ñáyuu ñuu Atenas jíjn tāca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jíjn chi máá-ni jeē cuni nahín i jnúhun jeé chí jéē cahán i jnúhun jeé.

22 Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jijnáhan ní, jito ná jéē yóhoyo cáchiñúhún ní yaā maá ní.

23 Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñn altar jeē yosó jnúhun yáha: Yáha cúu altar yaā jeē ná tu cuni yō jnúhun ya, achí. Te máá Yáa un jéē cáchiñúhún ní, vēsú ná tu cuni ni jnúhun ya, suu jnúhun Yaā un cúu jeē nácani ná núu ní vijna.

24 'Chi Yaā un cúu Yaā jeē ni sáha ñayīví jíjn táca ndihi jeē iyó, te máá yá cúu Jitoho andīví jíjn ñayīví, te tu ndéé yá ini veñūhun cásáha ñayuu.

25 Te ni tu cúmanī ni ñn nuū yā jeē cuáha ñayuu nuū yā, chi máá yá sáha jeē técu ñayuu, jíjn jéē stáa i tachī i, jíjn jéē nihín i ndihi jeē jíni ñúhún i.

26 'Te ni sáha ya jeē chíji ñn-ni yucūn ni tahū tāca ñáyuu jeē ní nduu tācá nación, návāha coyūcú i ní cáhnu

ñayīví, te ni tana yā cuiyā cotecu ñayuu jíjn lugar coyūcú i jíjnáhan i.

27 Te súcuan ni sáha ya chi cúní yā jeē nanducú yó yā, chi núu nanducú yó yā te cuni yō jeē iyó yá, chi yajni-ni cúu ya jíjn ñn ñn yó.

28 Chi máá yá sáha jeē iyó yó jíjn jéē cátecu yō jíjn jéē cáanda yō. Chi suni súcuan ni cacahān sava tēe ñuu ni jéē cātava yaa: Suni nde yucūn maá yá cácuu yó, áchí.

29 Te núu yucūn Yaā Dios cácuu yó, te ma cáni ni yō jeē ídolo oro chí plata chí yúu cúu ya, chi cájeni ni ñayuu jeē súcuan cáa ya, te súcuan cásávāha i ídolo.

30 Te ni jendeyí ni yā síquī jeē tu ní cájecūhun ni i ní ndé saá, te vijna chi ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i.

31 Chi Yaā Dios, je ni jeni ya quivī jeē ndaā sándaā yā síquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñáyuu jeē maá yá ni jeni Jesús, chi ni nastécu yā Jesús, achí Pablo.

32 Te jeē ní cajini sōho i jnúhun jeē nátecu ndīyí te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

33 Te ni quenda Pablo mēhñu ñáyuu un cuáhān de.

34 Te cuahān jecu ñayuu jíjn Pablo, te ni cacandíje. Te ñn de cúu Dionisio, tēe ndútútú

jíin tée cácujéhnu cásáha junta nuū naní Areópago, jíin ñin ñahan nání Dámaris, jíin jecu gā i.

Jeē ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto.

² Te yūcuan ní jito de nuū ñin jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyucú de ñuu Corinto.

³ Te suni jniñu sáha tēe un sáha Pablo, chi cáquicu de ñin cuu vehe. Te ni quendōo Pablo jíin tée ún, te ni casájniñu de.

⁴ Te tāca quívī ndétātu ní jehēn Pablo vehe ñi sinagoga ni nacani de jnūhun ya, te ni nducú ndéyí de jeē na cándije ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nacani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñuhun ni i quiji ya.

⁶ Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stōo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihñ na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe ñi sinagoga, te ni jinū de vehe ñin tēe nání Justo ni condee de. Te chíñuhún tée un Yāā Dios, te vehe tēe un néne yajni xiin véhe ñi sinagoga.

⁸ Te Crispo, tēe cújehnu ini vehe ñi sinagoga, ni cándije de máá Jítoho yō nde jíin ndihi ñayuu vehe de. Te cuehē ñayuu ñuu Corinto ni cajini nahín i jnūhun nacani Pablo, te ni cacándije i, te ni cajendute i.

⁹ Te ñin jecuáā ni sáha máá Jítoho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níni nacani ró jnūhun ri.

¹⁰ Chi ndíto ri rohó, te ma cúu sáha xeēn ni ñin ñayuu jíin ró. Nacani ró jnūhun ri, chi coo cuehē ñayuu cándije jnūhun ri ñuu yáha, áchí yá.

¹¹ Te ni condee Pablo yūcuán ñin cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñin cáhnu-ni ni candonda i siquī

Pablo. Te ni cajeca i de cuango i jín de nde vehe juzgado.

13 Te ni cacahān i jín Galión:

Tēe yáha yōhyo scáhán de tāca ñáyuu jeē inga modo chiñúhún i Yaā Dios, suu ñn modo jeē cúu contra siquī ley, achí i.

14 Te quejéé Pablo cahān de núu, te ni cahān-ni Galión jín ñáyuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín rí jñuhun cácahān rō núu.

15 Te tuú, chi máni siquī jñuhun-ni jín siquī ley maá ró jín siquī tée cástéén cúu. Te na sándaā maá ró siquī jñíñu yáha, chi tu sándaā rí siquī maá ñn jeē súcuan-ni, achí de.

16 Te ni cahān de nuū i jeē na quíngo i fuera.

17 Yūcuán na te ñayuu griego ni cajñi i Sóstenes, tēe cújéñu ini vehe ñn sinagoga, te maá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jñuhun ya

18 Te cuehē gā quivī ni condee Pablo ñuu Corinto. Yūcuán na te ni nacuatáhu de nuū tācá hermano yúcuán, te Aquila jín ñasihí de Priscila cuango de jín Pablo, te ni jinūcoo de ñuu Cencrea. Te yūcuán ní saté li Pablo xinī de, te súcuan stéén de jeē squícu de nuū Yaā Dios jeē ni jéjñuhun de. Te ni quivicoo de barco jín Aquila jín Priscila quihīn de región Siria.

19 Te ni jinūcoo de ñuu Efeso, te yūcuán ní caquendōo Aquila jín Priscila. Te ni jehēn-ni Pablo vehe ñn sinagoga, te ni cahān de jñuhun ya jín jnáhan ñuu de hebreo jeē cándutútú yúcuán.

20 Te ni cacahān ndahú i jín de jeē na cōnēne de jecu gā quivī jín i, te tu ní jéhe de jñuhun.

21 Chi ni nacuatáhu de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, achí de.

Te ni quenda de ñuu Efeso, te ni quivī de barco cuahān de.

22 Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jín grupo ñayuu cácañdije yūcuán, te cuanhun de ñuu Antioquía.

23 Te ni coyūcú de yūcuán jecu quivī, te sáa te ni quenda tucu de cuahān de ni jica cuu de ní Galacia jín Frigia. Te ñayuu cácañdije ni cahije ga ni i jín jñuhun ya ni sáha de.

Jeē ní nacani Apolos jñuhun Jesús ñuu Efeso

24 Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jñuhun ya, chi vāha jíní de jñuhun jeē cahán tutu ñn.

25 Te je ni cutūhva vāha tēe un jín jñuhun maá Jítoho yō Jesús, vēsú jíní de máni maá jñuhun ya jeē ni stéén Juan ná ni scuándute de ñayuu, te

ndíhví ni de stéén cají de jnūhun ya nuū ñáyuu.

²⁶ Te jéhnū-ni ni nacani de jnūhun ya ini vehe iī sinagoga. Te ni cajini sōho Aquila jíin Priscila jnūhun nácani de, te ni cajeca de Apolos cuango sín de, te ni cacastūhun yúcún ndíndúú de jnūhun ya jeē ná tu cuni Apolos.

²⁷ Te cúní Apolos quihīn de nde región Acaya. Te je cácañdije sava ñáyuu yúcuan ní sáha Yaā Dios síquī jeē váha ni yā. Te tǎcá hermano ñuu Efeso ni cachíndéé ñáhán i de, chi ni catee i carta quihīn de jíin núū ñáyuu cácañdije cáyūcú Acaya jeē na cuátáhú i Apolos. Te nuū ni jínū de yūcuán, te vāha ni chindéé ñáhán de táca ñáyuu cácañdije un jíin jnúhun ya.

²⁸ Te nuū táca ñáyuu ñuu un ndé jíin jnáhan ñuu de hebreo jeē cáyūcu yúcuan, ní stéén cají de ndese cástívi táca jnáhan hebreo de síquī jnúhun ya. Te tu ní cánihīn jnáhan de un jnúhun cahān síquī jeē ni stéén de, chi jíin jéē cahán tutu iī ni stéén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yāha Pablo ichi síquí ñuu Efeso, te ni nanuu de ni jinū de máá ñuu ún. Te yūcuán ní nijnáhan de jíin tijni tēe cácañdije.

² Te ni cajñūhún de tēe ún:

¿A ní canihīn ní Espíritu Santo ná ni cacañdije ní, chí ná tuú? áchí de.

Te ni cacahān de jíin Pablo:

Tuú, chí ni ná tu nihīn na jnúhun jeē iyó Espíritu Santo, achí de.

³ Yūcuán na te ni cahān Pablo:

¿Na síquī ni cajendute ní núu súcuan? áchí de.

Te ni cacahān de:

Ni cajendute ná síquī jnúhun ní stéén Juan, achí de.

⁴ Te ni cahān Pablo:

Jeē ní scuándute Juan ñáyuu cúu jeē ni stéén de jeē na nácani ni i jeē stóo i cuēchi i, te ni cahān de jeē na cándije i máá Yáa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnúhun yáha, te ni cajendute de jeē ní cacañdije de máá Jítóho yō Jesús.

⁶ Te ni soó Pablo ndíndúú ndaha de xinī táca tēe ún, te ni quívi ní Espíritu Santo ini anuá de jíjnáhan de, te ni cacahān de sín sín yuhu te ni canacani de jnúhun ya.

⁷ Te ni iyo nájnūhun uxī uū jnahán tēe.

⁸ Te unī yoō ni jehēn jehēn Pablo vehe iī sinagoga. Te jéhnū ni nacani de jnūhun ya, te ni nducú ndéyí de jeē na cándije ñáyuu jnūhun ndese ndácu Yaā Dios jniñū.

⁹ Yūcuán na te sava i ni cacunihni ni i te tu ní cácañdije i, chí sa ni cacahān neé i síquī jnúhun vāha Yaā Dios jíin ñáyuu cánataca. Jeē yúcuan ní cujiyo-ni Pablo nuū ñáyuu ún, te ñáyuu cácañdije cuango i jíin de. Te ndijnahan quívi

ni steén de nuū ñáyuu ún ini escuela ñn tēe nání Tiranno.

¹⁰ Te súcuán ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnūhun máá Jítóho yō Jesús.

¹¹ Te ni jēhe Yaā Dios poder nuū Pablo jeē sáha de cuehē jniñu jéhnú téyí.

¹² Te nde pañū jín sahna jeē ní jni de ni cajengoo jín núu ñáyuu cácuñū, te ni canduvāha-ni i cuehyī cándoho i, te ni quendacoo tachī ini i cuangoo.

¹³ Te jecu tēe hebreo cájica cuu de jeē quénehen de tachī ini ñayuu, te ni cajeni siquí ni de jeē suni jín poder maá Jítóho yō Jesús quenehen de tachī, te suhva ni cacahān de jín táca táchī:

Jín poder Jesús jeē nácani Pablo jnūhun ya, cáhán ñihin ri jín ró jeē na quénda ró quihīn rō, achí de.

¹⁴ Te súcuán ni casáha uxā sēhe yí ñn tēe hebreo nání Esceva, cúu de ñn sutū cujéhnú.

¹⁵ Te ná ni casáha de, te ni cahān-ni tachī ún:

Je jíní rī Jesús, te suni jíní rī Pablo. Te róhó jínáhan ró ¿ndé téé cácuu ró jéé cuatáhú rí rohó? áchí jín de.

¹⁶ Te tēe ndóho tachī un ní ndonda de, te ni cundeyí de siquí ndihúxá tēe ún. Te ni sáha xeēn ndasí de jín ndé ni catujī te ni cacuvichí lí ni quendacoo vehe un ní cajinu cuangoo.

¹⁷ Te jnūhun yáha ní cajini tāca ñáyuu cáyūcú ini ñuu Efeso, cúu ñayuu hebreo cúu

ñayuu tāca gá nación, te yōhyo ni cayūhú i, te ni cacahān i jeē yōhyo cújéhnú máá Jítóho yō Jesús.

¹⁸ Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tāca jniñu neé ní casáha i.

¹⁹ Te cuehē i jeē ní casáha jniñu tásí ní jinūcoco i cándiso i tutu i, te ni cajehmu i tutu un jító nuū tāca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu.

²⁰ Te ni jitē jnūhun máá Jítóho yō cuahān, te ndihí ñayuu ni cajini i jeē cujéhnú ndasí jnūhun ya.

²¹ Te nuū ní ndihí táca jniñu yáha, te jéni téyí ni Pablo jeē quihīn de Macedonia jín Acaya, te sáa te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jíní ñúhún quihīn de nde ñuu Roma.

²² Te uū tēe jeē cáchindéé ñáhán jín Pablo cúu Timoteo jín Erasto, te ni scándu de ndindúú téé yáhá cuángoo de nde Macedonia, te ni quendōo máá de Asia jecu gá quiví.

Jeē ní cacuvaā ñayuu ñuu Efeso

²³ Te suu quiví ún yōhyo ni candonda ñayuu siquí jnūhun ya.

²⁴ Chi ni ñyo ñn tēe sájniñu siquí plata, nání de Demetrio. Te máá de jín ndihí tēe casájniñu jín de, cánihīn de cuehē xūhún, chí jín plata

casáha de vehe lulí jéē modo veñūhun ídolo i jeē cúu yaā Diana.

²⁵ Te Demetrio ni nastútú de tēe casájniñu jíin de jíin táca gá tēe jeē suni jniñu yúcuan casáha, te ni cahān de:

Tátā, cájini ni jéē siquí jniñu casáha yó yáha vāha cániñiñ yō xūhún.

²⁶ Te cájito ní te cájini sōho ní jéē ñn tēe nání Pablo chi cáhān de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máá ñn-ni ñuu Efeso yāhá chi ní cáhnu Asia.

²⁷ Te quíyūhú ni na jéē cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máá veñūhun yaā sihí Diana jeē kujéñnu, te suni sájéē ni i nuū yaā Diana, te ma cúu ga kujéñnu ya vēsú ndivii ñayuu Asia jíin ñáyuu ní cáhnu ñayiví cáchiñūhún i ya vijna, áchí de.

²⁸ Súcuan ni cajini sōho de jñūhun yáha te yōhyo ni caquiti ni de, te ni cacana jee de:

Cujéñnu téyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ñn cáhnu-ni ni candonda i ni cajñi i Gayo jíin Aristarco cuangoo i jíin de nde vehe nuū cándutútú ñáyuu casáha i junta. Te ndíndúú tēe un cácuu tēe Macedonia, te cájica de jíin Pablo.

³⁰ Te cúni Pablo quívi de nuū ñáyuu cuehē un cáhān de jíin i, te ñayuu cácadíje tu ní cájēhe i jñūhun quihñ de.

³¹ Te suni sava tohō jeē cácuu amigo de cáyūcu Asia, ni catají jñūhun cuahān nuū de, cácahān ndahú jíin de jeē ma quihñ de nuū ní cacutútú ñáyuu ún.

³² Te ñayuu ní cacutútú un, sava i ni cacana jee i ñn jñūhun te sava ga i inga jñūhun, te súcuan ni cacuvaā teyí i, te cuehē i ni tu cájini cuiti i na siquí cúu jeē ní cacutútú i.

³³ Te sava tēe hebreo ni cajeni de ñn jñāhan de jeē naní Alejandro nuū ñáyuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chi cúni de cahān de jíin i jeē násūu cuéchi táca ñáyuu hebreo cúu.

³⁴ Te ni canacuni ñayuu un jéē tēe hebreo cúu de, te jeē yúcuan ní cacana jee téyí gá i nájnūhun uū hora:

Cujéñnu téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunañín ñáyuu ni sáha tēe cúu secretario ñuu ún, te ni cahān de:

Nihín ñáyuu ñuu yō Efeso, ndíhi ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví.

³⁶ Te ni ñn chi ma cúu cahān jeē tú ndaā jñūhun yáha. Núu súcuan te vāha ga na cási ní yuhu ní, te ma sáha yachí ní ñn jeē tu ní nácani vāha ni ni síquí.

³⁷ Chi tēe yáha ní caquin-deca ní de yāhá vēsú tu ní

cásáha de ni ñn cuēchi siquī Diana yō, ni tu ní cácahān ndevāha de ni ñn jñuhun siquī.

³⁸ Te Demetrio jíin táca gá tēe jeē ñn-ni jñiñu cásáha jíin de, núu cácuñi de cahān de cuēchi siquī ñn tēe, te na quíngoo de nde vehe juzgado nuū cáyūcu juez, tēe cásandaā jñiñu, te yūcuán cundaā siquī de jíjnáhan de.

³⁹ Te núu íyó jñuhun jeē ma cúu cundaā yūcuán, te jíni ñúhún cundaā nuū ñn junta nájnñuhun tájnúní ley.

⁴⁰ Chi yúhú ná jeē sanaa te cahān táca tóhō Roma jeē siquí gobierno de ni candonda yó, chi ma nihín yō jñuhun castūhun yó na siquī cúu jeē ní cacutútú yó ni cacuvaā yō vijna, áchí de.

⁴¹ Te nuū ní ndihi ni cahān secretario jñuhun yáha, te ni cajitē ñayuu un cuángoo.

Jeē ni jēhēn Pablo Macedonia jíin Grecia

20

¹ Te ná ni yáha jēe ní cacuvaā ñayuu, te ni cana Pablo ñayuu cácañdije, te ni jeni ichí de i. Te ni cañunundee jñáhan de jíin Pablo jeē ní nacuatáhú de, te cuahān de Macedonia.

² Te ni jica cuu de tācá ñuu yúcuán. Te jíin cuéhē jñuhun ni stihví ni de tācá hermano cácañdije. Te ni jinū de Grecia.

³ Te ni condee de yúcuán úní yoō. Te je yajni quihīn de jíin barco nde Siria nuú, te máá quivī ún te ni nihīn de jñuhun jeē jñáhan ñuu de hebreo ni casquijnáhan jñuhun

jeē ndonda siquī de ichi nuū quihīn de, te jeē yúcuán ní nacani ni de te cuahān tucu de ichi Macedonia.

⁴ Te ni cahīyo sava tēe cájica jíin Pablo, te cánani de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo.

⁵ Te ni cacandu tēe yáha, te cándētu de Pablo jíin sáña, Lucas, nde ñuu Troas.

⁶ Te nuū ni yáha vico jeē cáyeji i pan jeē tu yñi levadura, te jíin barco ni quendacoo ná ñuu Filipos, te nde nuū uhún quivī te ni canajnáhan ná jíin de nde ñuu Troas. Te ñuu yúcuán ní coyūcu ná uxā quivī.

Jeē ni íne Pablo ñuu Troas

⁷ Te máá quivī domingo ni candutútú ñayuu cácañdije jeē cáji i pan, nájnñuhun ni steén máá Jítoho yō jeē núcūhun ni yō siquī yā. Te ni steén Pablo jñuhun nuū ñayuu ún. Te siquī jeē inga quivī un jíni ñúhún quenda de quihīn de, te nahán ní nacani de jñuhun nde ni cuñuú.

⁸ Te vehe yósó jñáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin.

⁹ Te ñn sūchi yñi nání i Eutico, néne i yuhu ventana. Te jeē ní cunahán nácani Pablo jñuhun, te yōhoyo jíi i máhná, te ni quixī-ni i. Te nde piso unī un ní ñinga i nde nuū ñúhún. Te je ni jihī i ni candonehen de i.

10 Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jijnáhan ní, chi ni natecu i, áchí de.

11 Te ni ndaa Pablo, te ni yeji de pan jín i jijnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de.

12 Te Eutico chi íyó váha i cuanuhun i jín de jijnáhan de, te ndivii ñayuu ún yōhyo cácusī ni i.

Jeē ní quenda Pablo ñuu Troas cuahān de ñuu Mileto

13 Te ni quivicoo ná ini barco cuango ná. Te Pablo chi cúní de caca jéhé de, te ni cundaā jeē najnáhan ná jín de nde ñuu Asón.

14 Te nuū ní canajnáhan ná jín de ñuu Asón, te ni quivi de barco te cuango ná jín de nde ñuu Mitilene.

15 Te yūcuan ní quendacoo tucu ná jín barco te inga quiví ni jinūcoo ná xiin Quío, ñuhun jeē íne sín nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná ñuu Mileto.

16 Te tu ní jéngoo ná ñuu Efeso, chi jení ni Pablo jeē yáha-ni de ñuu un quihīn de, návāha ma cucuéé de Asia te naa tiempo nuú, chi núú de jinū yachī de ñuu Jerusalén cone de máá quiví Pentecostés núu na cúu.

Jeē ní jeni ichí Pablo tēe jéhnū cándiso jniñū nuū ñáyuu cácaandije ñuu Efeso

17 Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tēe jéhnū cándiso jniñū nuū ñáyuu cácaandije yūcuán.

18 Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna.

19 Chi ní tiempo jeē ni íne ná jín ní te nde vijna, jéjniñū vāha na síquī jnūhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i síquí ná.

20 Te cájini ni jéē tu ní táñúhún ná ni ñin, vēsú ndese ga cácahān ñayuu síquí ná, chi ni nacani ná ndihi jnūhun ya jeē quéndōo vāha ní sáha. Te ni steén na jnúhun ya nuū ni jijnáhan ní, cúu nuū chitú cúu tēcá vehe ní.

21 Te ñnuú-ni jnūhun ni nacani ná núu ndihi ní, cúu jnáhan ñuu ná hebreo cúu ñayuu tēcá gá nación, chi ni cahān na jéē na nácani ni ni jéē stóo ni cuéchi ní te na cándije ní máá Jítóho yō Jesucristo.

22 Te vijna chi ñúhun ichí ná quihīn ná ñuu Jerusalén, chi stíhví ni Espíritu Santo sáña quihīn ná. Te tu jíní ná ndese ga coo jín ná yūcuán.

23 Te íyó ñn jeē jiní na, cúu jeē chune i sañá vecāa te quiji jnūndóho siquī ná, chi Espíritu Santo súcuan cáhán jín ná ndijnahan ñuu nuū jica ná.

24 Te ni tu sáha ná cuenta vésú na cáhni i sañá, chi jeē cuní na cúu jeē na sínu vāha ná jniñu jeē ní tee máá Jítoho yō Jesús siquī ná, te súcuan cusī ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jín yó.

25 "Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jín na jéē ni ñn ní ma najnáhan ga yō nuū ñáyivi yáha.

26 Jeē yúcuan cástūhun cáji ná nuū ni jínáhan ní vijna jeē násūu cuéchi ná cúu núu ndé ñn ní stívi.

27 Chi ni nacani ná núu ní ndihi jnúhun Yaā Dios jeē ní sándaā yā ndese coo, te tu ní quéndōo ni ñn jnúhun.

28 Núu súcuan te coto vāha ní máá ní jín ndihi ñayuu cácadíje, chi Espíritu Santo ni jeni ya nihín jéē cóndito ní ñáyuu maá Jítoho yō, chi ni nacuaan ya i jín níñi yā.

29 Chi jeē quihín na te jín na jéē quijicoo tēe cástáhú quívicoo mēhñu ní, te nducú de snāa de jnúhun ni cajetáhú ñáyuu cácadíje, te xeēn sáha jnúhun stáhú de nájnūhun xeēn sáha yihī jeē cájehni tī lanchi.

30 Te suni nuū grupo maá ní quejéé sava de cahān de jnúhun stáhú, te stáhú de sava ñayuu cácadíje jeē na

cóndiquīn i jnúhun stáhú stéén de.

31 Jeē yúcuan condito ní jéē ma cóo súcuan. Te ma náā ni ní jéē uní cuiyā ndiquivī ndíñuu ni condihvī ndasí ni na ndé ndahyú na jéē ni, ní jeni ichí ná ñn ñn ní jínáhan ní.

32 "Te vijna, hermano, jícán tahú na núu Yaā Dios jeē coto ya nihín. Chi jnúhun jeē vāha ni yā ndíso poder sáha jeē íje ga ni jín, te suu sáha jeē ñn quivī te cuāha ya tahū jeē ndujéhnu luu ní ndé jín ndihi ñayuu ní nacāji ya jeē cóo ndoo coo íi i nuū yā.

33 Tu ní ndúcú ná jeē nihín na xúhun chí sahma nuū ní ñn í.

34 Chi je cájini vāha ni jéē sa suhva ni sájniñu nihín ná návāha nihín na jéē cótecu na ndé jín táca tēe cájica jín ná.

35 Te níni ní steén na núu ni jéē súcuan jini ñúhún sájniñu yó návāha nihín yō jeē cuáha yó núu ñayuu cúmanī nuū. Te ma náā ni ní jnúhun jeē ni cáhān maá Jítoho yō Jesús, chi suhva ni cahān yā: Ndetū gā quendōo yó jéē cuáha yó vésú jeē nihín yō, achí yá. Achí Pablo.

36 Te ni ndihi ni cahān de tāca jnúhun yáha, te ni jecuññi yití de, te ni jicān tahú de jín ndihi tēe ún.

37 Yūcuán na te ndihi de ni cajecunundee jnáhan de jín Pablo ni catechūhú de jeē cánacuatáhú de, te ni candahyū de.

38 Chi cácuuíhyá ndasí ni de jín jnúhun ni cahān Pablo jeē ma ndácoto jnáhan ga de.

Te cuangoo-ni de jín Pablo nde núū ñin barco.

Jeē cuánuhun Pablo ñuu Jerusalén

21

¹ Yūcuán na te ni caquendōo tǎcá hermano ñuu Efeso, te ni quívicoo ná barco, te cuangoo ndaā-ni ná ndé Cos. Te inga quivī ni jinūcoo ná Rodas, te yūcuan ní quendacoo ná te ni jinūcoo ná ñuu Pátara.

² Te ni cane ñin barco jeē quihín Fenicia, te ni quívicoo ná cuángoo ná.

³ Te nuū ní cajito ná núū Chipre jeē íne sñin nuū ndúte, te ni quendōo ichi lado jecó barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún.

⁴ Te ni jenanducú ná ñayuu cácandíje, te ni caquendōo ná jín i uxā quivī. Te máá Espíritu Santo ni steén nuū i jeē quíji jnūndóho siquī Pablo ñuu Jerusalén, te jeē yūcuan ní cacahān i jín de jeē ma quihín de.

⁵ Te ni yāha uxā quivī ún, te ni quendacoo ná. Te tǎca tée cácandíje jín ñasihí de jín séhe de ni cachuhun ichí de sǎña ní jengoo de jín ná nde yatā ñúū, te ni cajecuiñi yití ná jín de yumar te ni cajicān tahu ná.

⁶ Te ni cañunundee jnáhan ná ní canacuatáhú ná yūcuán, te ni quívicoo ná barco cuangoo ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín tǎca hermano, te ni caquendōo ná jín de ñin quivī.

⁸ Te inga quivī un ní cǎjica jéhé ná jín Pablo, te ni jinūcoo ná ñuu Cesarea, te ni quívicoo ná vehe Felipe, tēe nácani jnūhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jín de.

⁹ Te tēe un íyó cúun sēhe síhí de jeē cáhíyo máá i, te cǎnacani i jnūhun Yaā Dios.

¹⁰ Te ni coyūcu ná yūcuán tijni quivī. Te ichi Judea ni quíji ñin tēe nácani jnūhun Yaā Dios, nání de Agabo.

¹¹ Te ni quee de nuū ná. Te ni quihin de sanchíi Pablo, te ni jihni de ndaha de jín jéhé de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñáyuu sñin nación, áchí de.

¹² Te jeē ní cajini sōho na jnūhun yáha te máá ná jín tǎca tée cácandíje cáyucú ñuu Cesarea ni cacahān ndahú ná jín Pablo jeē ma quihín de ñuu Jerusalén.

¹³ Yūcuán na te ni cahān Pablo:

¿Najehē cándahyū ni jínjáhan ní, te cásáha ní jēe cucuíhyá ni ná? Chi sǎñá je íyó túhva ná jēe násūu máá jēe cónuhñi ná

ini ñuu Jerusalén, chi suni jeē vēsú na cúu na jéē siquí maá Jítoho yō Jesús, áchí de.

14 Te jeē tu ní cúu cuiṭi casicoo ná, yūcuán na te sa suhva ni cacahān ná:

Na cóo ndese cúní maá Jítoho yō nuu súcuan, áchí ná.

15 Yūcuan na te sáá te ni casátūhva ná, te cuangoo ná ñuu Jerusalén.

16 Te suni jecu tēe ñuu Cesarea jeē cácaṇḍíje cuangoo de jíin ná. Suni cuahān ĩn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

17 Te nuū ni jínūcoo ná ñuu Jerusalén, te hermano cáyūcú ñuu ún yōhvo ni cacusiñi de jeē ni jínūcoo ná.

18 Te inga quivī un ní cajengoo ná jíināhan ná jíin Pablo vehe Jacobo, te yūcuan ní candutútú táca tēe jéhnv cándiso jniñu nuū ñáyuu cácaṇḍíje.

19 Te Pablo ni sáha de saludar tēe ún jíināhan de. Yūcuán na te ni castūhún de ndihí jniñu ní sáha Yaā Dios ná ni nacani de jnūhun ya nuū ñáyuu táca nación jeē tu cájini i jnūhun ya.

20 Te ni cajini sōho de jnūhun yáha, te ni cacahān de jeē yóhvo cújéhnv Yaā Dios. Te ni cacahān de jíin Pablo:

Hermano, vijna te jíní ni náa cuehē mil jnāhan ñuu yō hebreo ni cacandíje i Jesús, te cácahān nīhin i jeē cánuú

squícu yó ley jeē ni jéhe ya nuū Moisés.

21 Te ni canihīn i jnūhun cácahān jeē stívi ní steén ni nuū táca jnāhan yó ñáyuu hebreo cáyūcu jíca i táca gá nación, chi ni steén ni nuū i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i táca gá jeē tajnúní jenahān.

22 ¿Ndesa sáha ní nuū súcuan? Chi cuni ñáyuu un jéē ní ndee ní te cutútú cuehē i.

23 Suhva sáha ní nuū súcuan. Yáha íyó cúun tēe jeē ní cajejnūhun de ĩn jeē squícu de nuū Yaā Dios.

24 Cueva ní tēe yáha quihīn ni jíin de templo, te cuchi ní nasándoo ní máá ní jíin de nuū yā, te cuan ní jeē socó de nuū Yaā Dios jíināhan de. Yūcuán na te cuu sātē de xinī de, te suu stéén jeē ní casquícu de ndihí jeē ní cajejnūhun de nuū yā. Yūcuán na te cuni ndihí ñáyuu jeē tú ndaā táca jnūhun ni cajini sōho i siquí ní, chi coto i jeē suni máá ní sa squícu ní ley yā.

25 Te ñáyuu táca nación jeē násūu ñáyuu hebreo cácuu i te ni cacandíje i ya, je ni catea ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni niñiñi ni quiti jeē jihí jeē tu jéti niñiñi tī, te ni ma cáca jnéni i, áchí de.

Jeē ní cajniñi de Pablo ini templo

26 Yūcuán na te ni jeca Pablo tēe ún, te inga quivī un ní cajichi de ni canasándoo de

máa de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máa de nuū yā, te quindecas de quitī jeē socó de nuū yā.

²⁷ Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhan de ndihī ñayuu, te ni cajni i Pablo.

²⁸ Te ni cacana jee i:

Tēe ñuu yō Israel, cuāha núú ní ndaha jínáhan ní na jni yó tēe yáha. Chi máa de cúu tēe jica cuu ní cáhnu stéén de nuū tāca ñáyuu, te cáhán de siquī nación yō jín siquī ley jeē ni jéhe ya nuū Moisés jín siquī templo yáha. Te suni je ni quivicoo de jín jecu tēe griego ini templo i yāhá, te súcuan stivi de jnūhun i jeē cahán jeē ma cúu quivi ñayuu ini templo te núu nasūu ñáyuu hebreo cúu i, áchí.

²⁹ Chi nde na íne Pablo ini ñuu un ní cajini tēe hebreo jeē jica de jín Trófimo, tēe ñuu Efeso jeē násūu hebreo cúu de, te cájeni ni de jeē ni quivi tēe un jín Pablo ini templo.

³⁰ Te ndihī ñayuu ñuu un ní cuvaā, te ni cacutútú-ni i, te ni cajni i Pablo, te ni castaa i de ni quenehen i de ini templo un, te ni canacasi-ni i yéhyí.

³¹ Te ni cacuni i cahni i de núu. Te general, tēe cújéhnu nuū ndihī soldado, ni nihīn de jnūhun jeē ndihī ñayuu

ñuu Jerusalén ni candonda i cácuvaā i.

³² Te ni jeca general tācá soldado jín capitán, te cájnu de cuango de nde nuū cáhīn ñayuu cuehē ún. Te ná ni cajito ñayuu jeē ni jínūcoo general jín soldado, te ni cajecuiñi i jeē cácani i Pablo.

³³ Yūcuán na te ni quivī general mēhñu ñáyuu, te ni jni de Pablo, te ni ndacu de jniñu jeē conuhnī de jín úu cadena. Yūcuán na te ni cajnūhún general ndé tēe cúu Pablo te na cuēchi ni sáha de.

³⁴ Te ni cacana ñayuu cuehē ún, sava i ñn jnūhun te sava ga i ñga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel.

³⁵ Te nuū ni jínū Pablo escalera cuartel ún, te soldado ni cajni de Pablo cándiso de siquī jeē cácuni ñayuu ún jni i Pablo sáha xeēn i jín de.

³⁶ Chi ndihī i véjicoo i ichi yátá soldado, te cacana jee i: Cahni ni tēe jíná, achí i.

Jeē ni cáhān Pablo jehē maá de nuū ñáyuu

³⁷ Te cásquivi de Pablo ini cuartel núu, te jín jnūhun griego ni cahān Pablo jín general:

¿A cuáha ni jnūhun cahān ná ñn jnūhun jín ní? achí de.

Te ni cahān general jín de:

Te jíní rō cahán rō yuhu griego jeē súcuan.

³⁸ Núu súcuan te nasūu róhó cúu tēe Egipto jeē jé ni cuu quivī ni ndonda siquī gobierno te ni quenehen cuūn

mil tēe jéhni ndīyī cuangoo jíin de nde nuū ñúhun téhé, áchí.

³⁹ Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ññ ñuu jeē cujéhnū ndañúū Cilicia. Te quiñūhun ni ni cuáha ní jnúhun na cáhán na jíin ñáyuu yáha jíjnáhan i, áchí de.

⁴⁰ Te general ni jēhe de jnúhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnúhun yuhu ñúū de hebreo ni cahān de:

22

¹ Ndihi níhín jeē cácuu ní jnáhan ñuu yō jíin ndihi níhín jeē cácujehnū ní nuū ñúū yō, cuni sōho ní jnúhun cahān na jēhē maá ná, áchí de.

² Te ni cajini sōho i jeē cahán Pablo yuhu hebreo jeē cúu yuhu ñúū i, te víhyá gā ni cacunahín i. Te ni cahān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúū Cilicia. Te ini ñuu Jerusalén yáha ní jehnu ná, te ni cutúhva ná nuū Gamaliel, te ni steén de nuū ná ndihi siquī ley jeē ni jēhe ya nuū jíí yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájñūhun cásáha máá ní vijna.

⁴ Te ni jito xeēn na ñáyuu cácuandíje i jnúhun Jesús te nde cuní na jēe na cúu ndihi i núú.

Chi cúu tēe cúu ñahan ni jññ ná ni chuhun ná vecāa.

⁵ Te sutū cujéhnū ga jíin táca tēe jéhnū cándīso jññū nuū ñúū yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíin jēe cuáha na núū táca jnáhan yó cáyūcú ñuu Damasco. Chi cuahān ná ñuu un jēe jññ ná ñáyuu cácuandíje i Jesús te quindecá ná i ñuu Jerusalén yáha, návāha ndoho i núú.

Jeē ní cachi Pablo ndese ni sama ya de

(Hch. 9.1-19; 26.12-18)

⁶ Te ni quihin ná ichi cuahān ná, te cuacuyajni ná ñuu Damasco, te nájñūhun caxū cúu. Te ichi ándiví ní quiji ññ nduva ní ndindēe ndaxín núú ná.

⁷ Te ni cotúú-ni ná núū ñúhun, te ni jini sōho ná ññ jnúhun cáhán jíin ná: Saulo, Saulo, ¿najahē jíto xeēn rō ruhū? áchí.

⁸ Yūcuán na te ni cahān ná: ¿Na níhín cúu jeē cahán, Tátā? áchí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jíto xeēn rō ñáyuu cácuandíje i ruhū cúu jeē jíto xeēn rō ruhū, áchí yá.

⁹ Te tēe cuangoo jíin ná ni cajini ndije de jeē ndíndēe, te ni cayūhú de, te tu ní cájini sōho de ndese ni cahān yā jíin ná.

¹⁰ Yūcuán na te ni cahān ná: Tátā, ¿na vé cuní ni jēe sáha ná? áchí ná. Te ni cahān maá Jítoho yō jíin ná: Ndocuññi te quihñ rō ñuu Damasco, te yūcuan íyó ññ tēe jeē cachi

nuū rō na vé cúu jeē cánuú sáha ró, áchí yá jíin ná.

11 Te jeē ní ndindēé un ní sacuaá núu ná, te tēe cuango jíin ná un ní cajni de ndaha ná cuango de jíin ná ní jinūcoo ná ndé űuu Damasco.

12 Te yūcuan ní condee ĩn tēe nání Ananías, te tāca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés.

13 Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núu de.

14 Te ni cahān Ananías: Máa Yāa Dios tāca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núu maá Cristo, Yāa ndaā, te cuni sōho ni jnúhun jeē cahān yā.

15 Te nacani ní jnúhun ya nuū ndivii űayuu tāca jēe ní jito ní jíin jēe ní jini sōho ní.

16 Ma cúhuun ni ní núu súcuan. Ndocuiñi ní, te cuandute ní te cahān ndahú ní jíin máa Jítóho yō, návāha nacate ya anuá ni núu cuéchi, áchí de jíin ná.

Jeē ní cachi Pablo ndese ni tají Yāa Dios de nuū űáyuu tāca gá nación

17 Te ni nandió cóo na ní ndee ná űuu Jerusalén. Te jícán tahu na ini templo, te ni sáha máa Jítóho yō jeē ní jito ndijin ná.

18 Te ni jini na núu yā ni cahān yā jíin ná: Yachī quenda ró űuu Jerusalén

yāhá, chi ma cuatáhú űáyuu yáha jēe nacani ró jnúhun ri nuū i, áchí yá.

19 Te ni cahān na jíin yá: Tuú, chi cuatáhú i, Tātā, chi je cájini i jeē ni quívi ná ndijnahan vehe ĩi sinagoga ni jni ná tāca űáyuu cácañije i nihín, te ni cani ná i, te ni chuhun ná i vecāa.

20 Te je cájini i jeē quívi ní cajehni i Esteban, tēe ni nacani cáji jnúhun ní, suni ni indichi na yūcuan, te ni jé-jnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá.

21 Te ni cahān yā jíin ná: Cuáhán, chi máa rí tají rí rohó quíhīn jicá ró nde nuū űáyuu tāca nación jeē tu cájini i jnúhun ri, achí yá jíin ná. Achí Pablo.

Jeē ni íne Pablo nuū general

22 Te tāca űáyuu ún vāha-ni ni cajini sōho i te nde jnúhun sandīhi yáha jēe ní tají yá de nuū űáyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíiñá, chi tú vāha jeē cótecu gā de, áchí i.

23 Te súcuan cácana jee i, te ni cascádoó i ticāchí i, te ni cascánda i ticachā. Te súcuan cástéén i jeē cáquiñi xeēn ni i.

24 Te ni ndacu general jniñu jeē na quívi Pablo ini cuartel, te ni cahān de jeē na stíchi soldado Pablo nde jíin cuarta ñi, návāha cujnúní ni general na siquí cúu jeē ní candonda űáyuu un síquī de.

25 Te ni cajihni de Pablo návāha súcuan te cani de. Te

ni cahān Pablo jín capitán jeē índichi tūhva:

¿A jéhe ley jnūhun jeē cani ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

26 Te ni jini sōho capitán jnūhun yáha, te ni jecahān jín general:

Coto vāha ní jēe ma stívi ní sáha ní jín tēe yáha, chí cúu de sēhe nación Roma, achí.

27 Yūcuán na te ni jinū general nuū Pablo, te ni cajnūhún de:

Cachi núu jendaá cúu jeē séhe nación Roma cúu ró, áchí.

Te ni cahān Pablo:

Suu cúu ndije ná, áchí de.

28 Te ni cahān general:

Ruhū chí nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sāná chí nde quiṽ ní cacu ná cúu ná séhe nación yō Roma, achí de.

29 Yūcuán na te tāca tēe jeē cácu ni cani Pablo nuú, ní cacujiyo-ni cuango, te suni nde general ni yūhú de, chí ní stívi de jeē ní jhni de Pablo, chí tu íyó váha sáha súcuan jín séhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

30 Te inga quiṽ un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhní Pablo, te ni ndacu de jniñu ní cacutútú táca sūtū cácujeñnu jín táca tēe cásáha junta cujéhnu ga, te ni quenehen

de Pablo, te ni jeni de nuū tēe ni candutútú un.

23

1 Yūcuán na te ni ndacoto Pablo nuū tēe ní candutútú junta un, te ni cahān de:

Tátā jijnáhan ní, ní ndé vija váha íyó ní anuá na jéé tú na cuéchi ná, jito jínú Yaa Dios, áchí de.

2 Yūcuán na te Ananías, sutū cujéhnu ga, ní cahān jín tēe cáhīn yajni nuū de jeē na cátu maá yuhu de.

3 Te ni cahān Pablo jín sūtū cujéhnu ga ún:

Yaa Dios stóho ya nihín chí tēe stáhú-ni cúu ní, chí néne ní jēe sándaā ní núu ní stívi ná ley yā, ¿te naun stívi máá ní ley jeē ndácu ní jniñu jeē cáni de sāná? áchí de.

4 Te ni cacahān tēe cáhīn nuū de ún:

¿Naun cáhán rō súcuan jín sūtū cujéhnu ga? Chí nuū Yaa Dios jejniñu de, áchí jín de.

5 Te ni cahān Pablo:

Tátā jijnáhan ní, tu ní jíní na jēe sutú cujéhnu ga cúu de, chí núu ní jíní na te ma cahán na súcuan núu, chí yósó núu tútu íi jeē ní cahān yā jeē ma cahán neé yó coto yó táca tēe cácujeñnu nuū yō, áchí Pablo.

6 Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñi jnáhan grupo fariseo, te suni súcuan ní ñyo tátá na. Chí suni máá ná ñūhun ní na jēe nastécu yā ndíyí, te siquī yúcuan cúu jeē cacahān ní cuéchi siquī ná, áchí de.

7 Te jeē súcuan ni cahān de te ni cacusīn ni tēe junta jeē cácuu grupo fariseo jíin grupo saduceo, te ni cacahān nīhin.

8 Chi cácahān tēe grupo saduceo jeē ma nátecu ndīyī, ni tu cáhīyo ndajéhé yā ni ánuá, te tēe grupo fariseo cácejnūhún de ndinúni jnūhun yáha.

9 Te yōhyo ni cuvaā. Te sava tēe cástéén jnūhun cáhán tutu ley yā jeē cácuu jnāhan grupo fariseo, ni candocuiñī de, te ni cacahān de:

Tú ni ĩn cuēchi cánihīn na síquī tēe yáha. Sanaa te ni cahān ndije ĩn ánuá jíin de chí ĩn ndajéhé yā. Ma sáníhni ni yō nuū Yaā Dios nuu súcuan, áchí.

10 Te yōhyo ni catejnéhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

11 Te jecuāā un ní quee-ni máá Jítóho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnūhun ri ini ñuu Jerusalén yāhá, suni súcuan nacani nahín ró jnūhun ri ini ñuu Roma, achí yá.

Jeē ní casquíjnāhan jnūhun cahni Pablo

12 Te nuū ní cundijin te ni cacutútú sava ñayuu hebreo, te ni casquíjnāhan jnūhun, te ni cacahān teyí i jeē ma cáji cuiṭi i ni ĩn ni ma cóho cuiṭi i nde núu tu cahni i Pablo.

13 Te víhyá gā uū xico tēe hebreo ni cacahān teyí jnūhun yáha.

14 Te ni jengoo nuū sutú cácujeñnu jíin núu tēe jéñnu cándiso jniñu nuū ñáyuu hebreo, te ni cacahān jíin tēe ún:

Ni cacahān teyí ná jeē ma cáji cuiṭi ná ni ĩn níni nde ná tu cahni na Pablo.

15 Núu súcuan te máá ní jijnāhan ní jíin táca gā tēe cásaḥa junta cujeñnu ga, cuacáhān ni jíin general jeē quenehen de Pablo na jéé de nuū junta sajnē, chi cachi ni jéé cácuu ni stíchí vāha ga ní de. Te máá ná jijnāhan ná cotūhva ná cahni ná de nde ná tu quee de nuū cáhīn tutú ní, achí.

16 Te sēhe yí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo.

17 Te ni çana Pablo xini ĩn jnāhan capitán, te ni cahān de:

Condeca ní súchi yáha quíhīn ni jíin i nuū general, chí íyó ĩn jnūhun castūhún i nuū de, áchí de.

18 Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jeē quíndeca ná súchi yáha núu ní, chí íyó ĩn jnūhun cahān i jíin ní, áchí de.

19 Te ni jni general ndaha i cuahān de jíin i ĩn lado, te yuhu-ni ni cajnūhún de i:

Na jnūhun cúní rō cahān rō jíin rí, áchí de.

20 Te ni cahān i:

Tēe hebreo ni casquíjnāhan jnūhun de jeē cahān ndahú

de jíin ní quenehen ní Pablo sajnē quihīn de nuū tāca tēe cásaha junta cujéhnu ga, chi cahān-ni de jíin ní jeē cācuni de jeē stichí vāha ga de Pablo.

²¹ Te ma cuáha ni jnúhun, chi víhyá gā uū xico de cándētu sáhi de ichi, te ni cacahān teyí de jeē ma cáji cuiṭi de ni ĩn ni ma cóho cuiṭi de nde núu tú cahni de Pablo, te vijna je cándētu tūhva de jeē cuáha ni jnúhun quihīn Pablo nuū junta, áchí i.

²² Te ni cahān general jíin i jeē ma cáchi i nuū ní ĩn ñayuu jeē ni cáhān i jnúhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jíin únī xico uxī jeē cáyōsó caballo jíin úu ciento jeē cándāha lanza, chi cahān jecuáā ún quendacoo de jíin Pablo quingoo de nde ñuu Cesarea.

²⁴ Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador.

²⁵ Te ni tee de ĩn carta jeē cahán jnúhun yáha:

²⁶ Máá ná cúu Claudio Lisias, te tēe ná carta yáha cuájeē nuū ní, señor Félix, gobernador cujéhnu. Ndese tahū cúu ní.

²⁷ Ñayuu hebreo ni cajni i tēe yáha, te je yajni cahni i de

núu, te ni jnama ná de jíin soldado, chi ni jini na jēe séhe nación Roma cúu de.

²⁸ Te ni jendeca ná de nuū junta maá i jíināhan i jeē sándaā i núu na cuēchi ni sáha de.

²⁹ Te ni jini na jēe siquí ley maá i cúu cuēchi cácahān i siquí de, te tu níhīn na ni ĩn cuēchi siquí de jeē cúu de ni jeē cóne de vecāa.

³⁰ Te ni nihīn na jnúhun jeē sava tēe hebreo ni casquijnāhan jnúhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquí de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuu-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de.

³² Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jíin Pablo.

³³ Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de.

³⁴ Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañúu Cilicia cúu Pablo.

³⁵ Te ni cahān de: Nde na quécoo tēe cájequin cuēchi siquí rō te cuni nahín rí jnúhun cahān rō, áchí de.

Te ni cahān de jeē na quíndihyū Pablo ini palacio

ndīyi Herodes.

Jeē ni cáhān Pablo jehē maá de nuū Félix

24

1 Te nuū uhún quivī te Ananías, sutū cujéhu ga, ni quee de űuu ún. Te suni ni quecoo sava tēe jéhu cándiso jniñu nuū jnáhan űuu de hebreo jín ĩn tēe cúu abogado, nání de Tértulo. Te ni quivicoo de nuū gobernador jeē cahān de cuēchi siquī Pablo.

2 Te ni cana gobernador Pablo ni quee de. Te ni quejé Tértulo cahán de cuēchi siquī Pablo, chi suhva ni cahān de jín Félix:

Tátā gobernador, siquī jeē cúu ní tóhō jeē váha ndichí ndácu ní jniñu, te jeē yúcuan tú na jñuhun cájejnáhan iyó, chi cáyūcu váha yó.

3 Te na cútahū ná, chi táca quivī vāha cúu táca núū ndácu ní jniñu jeē váha sáha ní, tátā Félix.

4 Te tu cúní na snáa na cuéhē tiempo ni, te cáhán ndahú ná jín ní cuni nahín ní jecu-ni jñuhun cahān na jín ní.

5 Chi ni cajini na tēe yáha jéē cúu de ĩn tēe tíxín, te sáha de jeē canacuajnáhan máá jnáhan űuu ná hebreo ní cáhnu-ni táca lado, te cúu de tēe cújéhu nuū űayuu cascuáha jñuhun tēe nání Jesús jeē ní jehnu űuu Nazaret.

6 Te suni je ndúcú de jeē stívi de táca jniñu ini templo ĩ, te ni cajni ná de. Te cácuni na sándaā na siquī de núú, nájnuhun cáhán ley űuu ná.

7 Te ni jinū-ni general Lisias, te ni quende fuerza de tēe yáha núū na jínáhan ná.

8 Te ni ndacu de jniñu jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jín jnúhun cahān maá de te cuni ni jéē ni sáha de cuēchi jeē cácahān na jín ní, áchí Tértulo.

9 Te suni ni cacahān tēe hebreo jeē ni jínūcoo jín de jeē iyó ndáa jeē súcuan cúu cuēchi Pablo.

10 Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíní na jéē cuehē cuiyā cúu ní gobernador űuu yáha, te jeē yúcuan nújnahan ni na jéē sándaā ni siquī ná.

11 Chi máá ní cuu nanducú ní te cuni ni jéē sáá máá úxī uū quivī ni cuu jeē ni jéhēn ná űuu Jerusalén jeē chiñúhún ná Yaā Dios.

12 Te tu ní stáhān jnáhan ná jín ní ĩn űayuu, ni tu ní stónda ná űayuu ini templo ni ini vehe ĩ sinagoga ni ini maá űuu.

13 Ni tú na jín stéen de jeē iyó ndáa jñuhun cácahān de siquī ná.

14 Te jñuhun cáhán cají ná jín ní cúu jeē chiñúhún ná Yaā Dios táca jíí na, te suu cúu jeē chiñúhún ná maá Jesucristo, te máá jnúhun yáha-ni cúu jeē cácahān de jeē stívi ná. Te cándije ná táca jnúhun yósó núú tútu ley yā jín núú tútu jeē ní catee tēe ni canacani jñuhun ya nde jenahán.

15 Te inuú ñúhun ni na jíin de jeē sáha Yaā Dios jeē nátecu tāca ndíyi, cúu ñayuu ní casáha vāha jíin ñáyuu ní casáha néé.

16 Te jeē yúcuan máni jeē vāha ndíhvi ní na sáha ná. Súcuán te vāha íyó ni anuá na jéē tú na cuēchi ndéé siquī na nuū Yaā Dios ni nuū ñáyuu.

17 Te ni jica cuu ná táca ñuu jicá jecu cuiyā, te sáa te ni ndee na jíin xúhun jéē ní cajēhe tāca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéē socó na quiti nuū Yaā Dios.

18 Te íne ná ini templo siquī jeē cuchi ná ndundoo ná nuū Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sañá ini templo, te tú na ñayuu cuehē ni cóyūcu jíin ná jeē sávaā i.

19 Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná?

20 Chí tēe ni quecoo yāhá na cáhán maá de núu na cuēchi ni canihīn de siquī na ná ni indichi na nuū junta tēe cácujuhnu ini ñuu ná.

21 ¿Te chí cájequin de cuēchi siquī na jéē ni cáhān jee ná suhva ná ni íyo ná nuū junta naún? Chí ni achí na jéē cándíje ná jéē nátecu tāca ndíyi, te jeē yúcuan cájequin ni cuēchi siquī ná, ni achí na jíin de. Achí Pablo.

22 Te Félix chi je jíni vāha de ndese cácuandíje ñayuu Cristo. Te jeē ní jini sōho de jnúhun yáha te ni stétu de un jíináhan, te ni cahān de:

Nde na quée general Lisias te cajnúhun gá rī siquī jníñu yáha, áchí de.

23 Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé ñáhán i de.

24 Te ni cuu jecu quivī, te ni quiji tucu Félix jíin ñasihí de Drusila, te ñahan hebreo cúu ña. Te ni ndacu de jniñu jeē na quíji Pablo návāha nacani de jnúhun ndese candíje yó Jesucristo.

25 Te ni cahān Pablo jíin de jeē cánuú sáha yó jniñu ndaā, te cánuú coto yó máa yó jeē ma sáha yó jniñu stívi, chí quivī sándihí te sándaā Yaā Dios jniñu ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne rí te cana rí rohó quiji ró, áchí de.

26 Te ñúhun ni de jeē cuāha Pablo xúhun núu de te siáa de quenda de vecāa. Jeē yúcuan tijni jínu ni cana de Pablo ni candajnühún de.

27 Te súcuán ni cuu uū cuiyā, te sáa te ni nucuiñi Porcio Festo nuū Félix. Te cúní Félix jeē na cúsiñi ní ñayuu hebreo jíin de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25

1 Te sáa úní quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén.

² Te tāca sūtū cácujuhnu jín tée cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo.

³ Te ni cacahān ndahú jín Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquijnáhan jnūhun jeē cahni Pablo ichi.

⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea.

⁵ Te jeē yúcuan ní cahān de jín táca tée ún:

Tāca níhín jeē cándiso jniñu, na quíngo yó nde Cesarea, te yúcuan cácan ni cuéchi siquī de te núu iyó cuéchi de, áchí de.

⁶ Te ni ine de yúcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo.

⁷ Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūū nuū de, te ni caquejéé-ni cásjnúhún téyí siquī de, te tú na jín ní cástéén jeē iyó ndāā jnūhun cácahān.

⁸ Te ni cahān Pablo jehē maá de:

Tu ní sáha ná ni ñn cuéchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chi cúní de jeē cusī ni ñayuu hebreo jín de, te ni cajnúhún de Pablo:

¿A tu cúní rō quinuhun rō Jerusalén te yúcuan sándaā rī siquī rō? achí de.

¹⁰ Te ni cahān Pablo:

Je índichi na núu cúndaā jniñu jeē ndácu máá tée cúu rey nación Roma, te yāha cúu nuū cánuú cundaā jniñu ná. Máá ní je jíní vāha ni jéē tú na cuéchi ní sáha ná siquī tāca jnáhan ñuu ná hebreo.

¹¹ Chi núu ní sáha ná ñn cuéchi xeēn jeē jíní ñúhún cuu ná, te iyó vāha jeē cúu na núu súcuan. Te núu tu iyó ndāā jnūhun jeē casajnúhún tēe yāha siquī ná, te ni ñn tēe ma cúu chíhi de sáñá ndaha tēe yāha jijnáhan de. Núu súcuan te cúní na quíhīn na núu maá rey nación Roma sándaā de siquī na, áchí de.

¹² Te ni cajnúhun Festo ndese cájeni ni tēe cándiso jniñu jín de. Yūcuán na te ni cahān de jín Pablo:

Je ni cahān rō jeē cúní rō quíhīn rō nuū maá rey nación Roma sándaā de siquī rō. Núu súcuan te quíhīn nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivī, te rey Agripa jín Berenice ni jecondēhé de Festo nde ñuu Cesarea.

¹⁴ Te tijni quivī ni coyúcú de yūcuán. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñn tēe íne vecāa yāhá.

¹⁵ Te ná ni jehēn ná ñuu Jerusalén, te sūtū cácujuhnu

jiín ñáyuu jéhnū cándīso jniñū nuū ñáyuu hebreo ni jinūcoo i nuū na cájequin i cuēchi siquī tēe ún, te cácuni i jeē na cúu de.

16 Te ni cahān na jiín i jeē tu iyó costumbre tāca tóhō Roma jeē cahni de ñn tēe súcuan-ni, chi jini ñúhún condichi de jiín ñáyuu cájequin cuēchi siquī de, návāha cahān de jehē maá de te cundaā núu iyó cuēchi de.

17 Yūcuán na te ni quecoo tūtú i yāhá. Te ñnga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñū jeē na quíji tēe ún.

18 Te cáhīn ñáyuu cájequin cuēchi siquī de. Te ni jeni ni na jēe iyó cuēchi xeēn cahān de siquī tēe un núu, te tú cuiti.

19 Chi jeē cácahān de cúu máni siquī jnúhun cácañdije-ni máá de, jiín síquī ñn tēe nání Jesús jeē jé ni jihī de, te Pablo cahán ñhin de jeē ní natecu ndije tēe ún.

20 Te tu ní cújnúni cuiti ni ná ndese sándaā ná, te ni cajñūhun ná de núu cúni de quihīn de ñuu Jerusalén te yūcuán cundaā siquī de.

21 Te máá Pablo ni cahān de jeē cúni de quihīn de nuū Augusto, rey yō nación Roma, te yūcuan sándaā rey cuēchi de, ni achi de. Te ni cahān na jēe na cóne de vecāa nde tají ná de quihīn de nuū rey un, áchí Festo.

22 Yūcuán na te ni cahān Agripa jiín Festo:

Suni cúni máá ná cuni sōho ná jēe cahán tēe un, áchí de.

Te ni cahān Festo:

Sajnē te cuni sōho ní jēe cahán de núu súcuan, áchí de.

23 Te ñnga quivī un ní quecoo Agripa jiín Berenice. Te cáñūhun de sahma cújéhnū de, ni quivīcoo de ini vehe juzgado jiín táca general jiín tēe cácujehnū ini ñuu ún. Te ni ndacu Festo jniñū jeē na quíji Pablo.

24 Te ni cahān Festo:

Cáhán na jiín ní, tátā rey Agripa, jiín ndihī níhín jēe cáyūcu jiín yó yāhá vijna. Yāha cúu tēe jeē siquī de ni candonda ndivii jnáhan de hebreo ñuu Jerusalén jiín ndé ñuu Cesarea yāhá, te máni cácahān i jeē tú vāha jeē cótecu gā de.

25 Te jeni ni máá ná jēe tú na cuēchi xeēn ni sáha de jeē cúu de. Te je ni cahān de jeē cuni de quihīn de nuū rey Augusto jeē sándaā rey un síquī de, te jeē yūcuan ní cahān na jēe tají ná de quihīn de nuū rey un.

26 Te tu cúcáhnū ni ná na jñūhun tee ná núu tūtu quihīn jiín de nuū rey yō. Jeē yūcuan ní ndacu ná jniñū ní quee de nuū yō jijnáhan yó, te cánuú gá nuū maá ní, tátā rey Agripa. Te stíchí ni de návāha nihīn na jnúhun tee ná síquī de, te quihīn jñūhun un jiín de nuū rey.

27 Chi tu jéjníñū cuiti jeē tají ná ñn preso quihīn te núu tú castūhun ná nuū tūtu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhān de, te suhva ni cahān de:

² Tātā rey Agripa, cúsi ni ná vijna jeē cúu cahān na jíin ní siquī ndihi jeē casájnúhún ñayuu ñuu yō hebreo siquī ná.

³ Chi je jíni vāha maá ní táca jéé ní tajnúni ñayuu ñuu yō hebreo jíin táca jnūhun jeē tu cáhīn inuú i jíin. Jeē yúcuan cáhān ndahú ná jíin ní jeē coo paciencia ni cuni sōho ní jnūhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ Je cájini táca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná.

⁵ Te núu cácuni maá de cahān ndaā de, te je cájini de sãña jéé ndé lulí ná ni quívi ná nuū grupo fariseo, te grupo un nihin ga cánducú ndéyi de squícu de ley yā vésú táca gá grupo tēe nación yō.

⁶ Te ñúhun ni na jnūhun ni jejnūhun Yaā Dios nuū táca jíi yō jeē nastécu yā ndíyi, te maá siquī táca jnūhun yáha-ni cúu jeē cájequin de cuēchi siquī ná.

⁷ Chi maá yó jeē cácuu yó jnáhan ndihúxi uū yucūn ñayuu Israel, cáñuhun ni yō jnūhun ni jejnūhun ya jeē nastécu yā ndíyi, te jeē yúcuan nduú ñuú cáchiñúhún yó Yaā Dios te cájejniñu yó núu yā. Te suni súcuan ñúhun ni maá ná,

tātā rey Agripa, te siquī jeē nácani ná jnūhun jeē natecu ndíyi cúu jeē cájicān jnáhan ñuu yō hebreo cuēchi siquī ná.

⁸ ¿Te chí má nastécu Yaā Dios táca ndíyi cájeni ni ní naum?

Jeē ní cachi Pablo ndese ni jito xeēn de ñayuu cácdáje

⁹ Te maá ná chi ni jeni ni na jéé jíni ñúhún ndonda ná siquī ñayuu cácdáje i Jesús, Yaā ní jehnu ñuu Nazaret.

¹⁰ Te súcuan ni sáha ná ini ñuu Jerusalén, chí táca sūtū cácujeñhu ni cajēhe de jnūhun jeē cóndiso jníñu ná chuhun ná cuéhē ñayuu vecāa siquī jeē cácdáje i Jesús, te íyó váha ni na núu cájehni de i.

¹¹ Te tijni jínu ni sáha ndevāha na jíin i ini táca vehe i sinagoga jeē ni sáha fuerza na i jeē na stóo i jnūhun cácdáje i. Te xeēn ni quitī ni na núu i, chí nde ñuu jíca ní jehēn ná ni sáha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sutū cácujeñhu ni cajēhe de jnūhun jeē cóndiso jníñu ná quíhīn na sáha xeēn na jíin ñayuu cácdáje cáyūcú ñuu Damasco nuú.

¹³ Te cuahān ná ichi ún, tātā rey, te caxū cúu, te ichi ándiví ní quiji ñn nduva ni ndindéé ndaxín núu na jíin núu téé cuangoo jíin ná, te víhyá gá ndíi vésú niāndii.

¹⁴ Te ndihi ná ní cacotúú ná nuū ñúhun. Te ni jíni sōho ná ñn jnūhun ni cahān jíin ná jíin jnūhun yuhu yó hebreo:

Saulo, Saulo, ¿najehe jito xeēn rō ruhū? Chi jeē sāha ró súcuan cúu nájñuhun stiquī jeē tu jéndije ti, te jéñú yatá tí xinī pulla, te súcuan stóho ti maá tí, áchí.

¹⁵ Yūcuán na te ni cahān ná: ¿Na nihín cúu jeē cahán, Tātā? achí ná. Te máá Jítoho na ní cahān yā jíin ná: Máá rí cúu Jesús, te jeē jito xeēn rō ñayuu cácuandije i ruhū cúu jeē jito xeēn rō ruhū.

¹⁶ Ndonga condichi rō, chi vēji ri nuū rō jeē tejñiñu ri rohó sāha ró jñiñu cúní rī, te nacani cájí ró jñuhun tāca jéē ní jito ró vijna, jíin jéē steén gā rī nuū rō tāca quívi quíji.

¹⁷ Te jnama ri rohó núu tāca jñahan ñuu rō jíin núu ñayuu tāca gā nación, chi nuū ñayuu un tájí rí rohó quíhīn rō.

¹⁸ Te tájí rí rohó quíhīn rō nuū i, chi nájñuhun nanune ró tñnúú i cúu jeē steén rō jñuhun ri nuū i te jecūhun ni i. Chi ñayuu ná tu candije i ruhū, nájñuhun cájica i nuū néē. Te jeē candije i ruhū, quívi i nuū luz rī, te tuá quíhi i chíji jñiñu jeē cuní jexeén jeē cúu Satanás, chi sa suhva quíhi i chíji jñiñu cúní maá rí. Te tájí rí rohó quíhīn rō nuū i, návaha candije i ruhū te cone cáhnu ni rī nuū cuéchi i. Yūcuán na te inuú níhīn tahu i jíin táca gā ñayuu jeē ní sándoo ri anuá i, áchí yá jíin ná.

Jeē ní cachi Pablo ndese ni jetáhú de jñuhun ni cahān yā

¹⁹ Jeē yúcuán tu ní sánihni ni na núu jñuhun ni cahān yā ichi ándiví jíin ná, tátā rey Agripa.

²⁰ Chi ni jetáhú ná, te ni nacani ná jñuhun ya xīhna gā nuū ñayuu ñuu Damasco, te sáa te ni nacani ná jñuhun ya nuū ñayuu ñuu Jerusalén jíin ní región Judea jíin núu ñayuu tāca gā nación. Te jñuhun ni nacani ná núu i cúu jeē na nacani ni i jeē stóo i cuéchi i te nasāma ini i sāha Yāā Dios, te na sāha i jñiñu váha jeē steén jeē ní nasāma ini i.

²¹ Te siquī jeē súcuan ni nacani ná jñuhun te ni cajñi jñahan ñuu yō hebreo sñáá ini templo, te ni cacuni i cahni i sñáa núu.

²² Te ni chindéé ñáhán Yāā Dios sñáá, te jeē yúcuán índichi níhin na ndé vijna nacani cájí ná jñuhun ya nuū ñayuu cácujeñnu jíin núu tāca-ni ñayuu. Chi tu chíso gā na jñuhun siquī jñuhun jeē ní nacani Moisés jíin táca gā tēe ni canacani jñuhun Yāā Dios nde jenahán.

²³ Te ni cundaā jñuhun ni canacani de un jéē cánuú ndoho Cristo nde cuu yā, te xīhna gā maá yá natecu vēsú tāca gā ndīyi, te súcuan stéén cají yá nuū ñayuu jeē jñama ya i, cúu ñayuu nación yō Israel jíin ñayuu tāca gā nación, áchí Pablo.

Jeē ní nducú ndéyí Pablo scandije de Agripa jñuhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tīvi xínī rō, áchí de.

²⁵ Te ni cahān Pablo:

27

Tu ní tívi xínī na, tátā Festo, chí sa suhva íyó cájí ndáá jnūhun cáhán na.

26 Te máá rey Agripa je jínī vāha de tācá jniñu ní íyo jeē ní nacani ná, te tu yúhú ná cahān na táca jnūhun yáha, chí je jínī vāha na jéē jini de tāca jnūhun yáha, chí tú sāhi ní cúu tācá jniñu yáha.

27 Tátā rey Agripa, ¿á cándíje ní jnūhun jeē ní cacahān tēe ni canacani jnūhun ya nde jenahán? Jéni ni na jéē cándíje ní, áchí Pablo.

28 Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sāha ró jeē cándíje ri Cristo, achí de.

29 Te ni cahān Pablo:

Vēsú jíin jecu-ni jnūhun chí jíin cuéhē, te jícán tahu na jéē maá ní jíin táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúni na jéē cónuhni ní nájñūhun núhni na.

30 Te ni ndíhi ni cahān Pablo táca jnūhun yáha. Te ni ndocuñī rey jíin gobernador jíin Berenice jíin táca gá tēe cácujuhnu cáyūcu jíin de.

31 Te ni cacujiyo de, te ni candajñūhun sín máá de:

Tú ni ññ cuēchi ní sāha tēe yáha jéē cúu de ni jeē cóne ga de vecāa.

32 Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catajī de Pablo cuahān de ñuu Roma

1 Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quivicoo de ndaha ññ capitán naní Julio jeē quíndēca de tēe un ndé Italia. Te Julio cúu ññ jnáhan grupo soldado naní Augusto.

2 Te nde ñuu Adramitio nuū cájecuñī barco ni quenda ññ barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia.

3 Te inga quivī ni jinūcoo ná ñuu Sidón nuū cájecuñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo táca amigo de, te ni cachindéé ñhán i de.

4 Te ñuu yúcuán ní quenda barco cuahān jíin ná. Te siquī jeē níhin yíhi tachī te tu ní cúu quihín yohó barco, te ni tee xín barco cuahān jíin ná xiin isla Chipre, ññhun jeē íne sín nuū ndúte, te lado jecó barco ni quendōo Chipre.

5 Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañū Licia.

6 Te ñuu yúcuán ní nihīn capitán ññ barco jeē véji ñuu Alejandría te quihín ichi Italia, te ni cahān de jíin ná ni quivicoo ná barco un.

7 Te cuéhē quivī ni cahīn na núu ndúte jíin barco, chí cuéé ní jica, te fuerza-ni ni jinūcoo

ná yuñú Gnido. Te tuá ni jéhe tachī un jnúhun quihīn yohó barco, te ni cayāha ná núu jnúhma tachī xiin ñúu Salmón jeē íne nuū isla Creta.

⁸ Te yōhyo ni canducú ndéyí tée cáscáca barco un, ní yāha jíin ná ní yumar xiin Creta. Te ni jinūcoo ná ñin lugar naní Buenos Puertos nuū cájecuñī barco, te yajni un íne ñuu Lasea.

⁹ Te je ni cuu cuehē quivī ni cajica ná jíin barco. Te je yajni quejéé vico míjin, te yūcuan cúu tiempo jeē yí jíca barco te sanaa te coo jnúndóho nuū mar. Te ni cahān ñihin Pablo jíin de:

¹⁰ Tātā jijnáhan ní, jíiní na jéé yōhyo yí coo viaje yāha, te quiji jnúndóho siquī barco, te naa barco jíin ndajníñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chi sa suhva jeē cahán tée scáca barco un jíin tée chíi barco.

¹² Te siquī jeē tu íyó váha lugar nuū ni jécuiñī barco un jéé cóyucú de ní vico míjin, te ni cajeni ni cuehē gā de jeē vāha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyucú de vico míjin. Chi Fenice suni íne yundúte isla Creta nuū cájecuñī barco, te ndijin ichi noroeste jíin suroeste.

Jeē ni jécuiñī ñin tachī ñihin jeē stónda ndute mar

¹³ Te ni jécuiñī vīta táchī ichi sur, te ni cajeni ni de

jeē jinú de Fenice nuú, te ni cascáca ga de barco jíca jíin de xiin Creta.

¹⁴ Te ni cunúu jecu gā, te ni quejéé-ni ñin tachī ñihin ndasí jeē naní táchī nordeste.

¹⁵ Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chúcuan cuahān barco jíin ndihí ná sáha tachī.

¹⁶ Te ni yāha jíin ná xiin isla lulí jéé naní Clauda, nuū jnúhma tachī. Te vésú súcuan te yōhyo uhū ni cascáca ná barco lulí jeē ndiquín yatā barco cáhnu.

¹⁷ Te ni casquívī ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jñī nuū ñítī, te jeē yūcuan ní casnúu de sahma cóquin jeē stechí te jíca barco. Te ni casiáá de jeē na quihín ndé chi chundahá táchī.

¹⁸ Te tu jécuiñī cuítī jeē yíhi tachī ñihin. Te inga quivī un ní caquejéé de cájete de ndajníñu ndíso barco, návāha nduñama gā barco te ma quéé chíji ndute.

¹⁹ Te quivī uní ni cajēhe núu ná ndaha ni cajete ná máá ndajníñu jéjníñu barco.

²⁰ Te cuehē quivī tu ní cájito ná níandii ni quīmī siquī jeē íin vicō, ni tu jécuiñī cuítī tachī ñihin ún, te tuá cáñūhun ni na cácu ná.

²¹ Te ni cuu quivī jeē tuá cáyeji cuítī na stáa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájétáhú ní jnūhun jeē ní cáhān ná te ma quéndacoo yó Creta nuú, te ní ma cóto yó jnúndóho yáha ni ma náā ndajníñu núu.

22 Te vijna cáhān nihin na jíin ní jeē cuandeyí ni ní jijnáhan ní, chi ni ñn ní má cúu ní, vēsú naa barco.

23 Chi jeē cúni ni quiji ñn ndajéhé jeē ní tají máá Yáā Dios nuū ná. Chi máá yá cúu Jitoho ná, te jéjníñu ná núu yā.

24 Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yaā Dios jeē cácu ndihi tēe cáhīn jíin ró ini barco yāhá, áchí yá jíin ná.

25 Tátā jijnáhan ní, ma yūhu ní núu súcuan, chi máá ná cúcáhnu ni na Yáā Dios jeē coo nájnūhun ni cahān ndajéhé yā jíin ná.

26 Te jinū nahín yó ñn isla, te ma jinú yachī yō nuū quíngoo yó, áchí de.

27 Te ni cuu uxī cuūn jecuáā nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáā ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi.

28 Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jíca barco jecu gā te ni casínga tucu de, te ni cajini de jeē iyó ócō uxā na metro.

29 Te cáyūhú de jeē

jécujnáhan barco jíin toto, te ni cajihni de cuūn cāa gancho náhnu yatā barco un, te ni cascāne de nde jehē ndúte návāha chituu te jecuiñī barco. Te yōhyo jnáā de jeē na cúndijin yachī.

30 Te tēe cáscáca barco un ní canducú de cunu de quíngoo de jíin barco lulí te cácu de nuū jnúndóho quiji siquí barco cáhnu núu. Jeē yúcuan ní casnúu de barco lulí un núu ndúte, te cása-ha-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de.

31 Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiti maá ní jijnáhan ní, áchí de.

32 Yūcuán na te soldado ni cajehnde de yoho núhni barco lulí, te ni jneni-ni cuahān.

33 Te nuū cuácundijin te ni cahān Pablo jíin táca tēe un jéē na cáji de staā. Te suhva ni cahān de:

Vijna íyó úxī cuūn quivī jeē cándīto ní te tu cáyeji cuiti ni stáā.

34 Te cáhān ndahú ná jíin ní jeē na cáji ni stáā, návāha nanihīn ni ní te cácu ní, chi ni ñn yó má cúu, ni ma tují cuiti yō, achí de.

35 Te ni ndihi ni cahān de jnūhun yáha, te ni quihin de ñn staā, te mēhñu táca ñayuu un ní nacuatáhú de nuū Yaā Dios, te ni tahú sáva de staā ún, te ni quejéé de yéji de.

³⁶ Yūcuán na te ni candusiñi ni ndihi de, te suni ni cayejí de staã.

³⁷ Te ndivii na jéẽ cáñuhun ná ini barco cúu uũ ciento unĩ xico xahũn ñn ná.

³⁸ Te ni cayejí vāha ndihi ná. Yūcuán na te ni cajete de trigo cuahān nuũ ndúte un, návāha na ndũñama gā barco.

Jeẽ ni quéẽ barco chĩji ndute

³⁹ Te nuũ ní cundijin te ni cajito de ñuhun, te tu ní cánacuni de ndé nuũ cúu. Te ni cajito de nuũ íne cuiñi ndute, te suni máá ñĩti cúu, te cájeni ni de jinũ de yūcuan jíin barco núu na cúu núu.

⁴⁰ Te ni cajehnde de yoho núhni cāa gancho yūcuan, te ni caquendõo cāa un núu mar. Te ni canandají de yujnu jeẽ scotú chíi barco, te ni nacata caa de sahma cóquin ichi núu návāha chundahá táchi barco, te ni quejéẽ caca quihĩn jíin de ichi núu iyó ñĩti.

⁴¹ Te ni jinũ barco nuú níhin náquijnáhan ndute. Te ni quẽẽ barco nuũ ñĩti ñuhun chĩji ndute, te ni jnĩ-ni ichi núu te tuá ni jíca cuiiti, te yatā barco un ní cahya-ni jeẽ níhin ni cani suhmā ndute mar.

⁴² Yūcuán na te ni canda-jnũhũn soldado jeẽ cáhni de tãca preso návāha ma sũte i te cunu i quingoo i.

⁴³ Te cúni capitán un jéẽ cācu Pablo, te ni jesicoo de. Chi sa ni cahān de núu ndé ñáyuu jiní sũté te xĩhna gā i na nũngoo i sũté i nuũ ndúte, te na quẽnda-ni i quihĩn i nuũ ñuhun íchi.

⁴⁴ Te suni sũcuan na quẽcoo ndihi i quihĩn i, sava i coso

candá i jíin yujnu cúnu te sava ga i jíin pedazo yujnu barco. Te sũcuan ni cacācu ndihi ná ní jinũcoo ná ñuhun íchi.

Jeẽ ni íne Pablo isla Malta

28

¹ Te nuũ ní cacācu ná te ñáyuu cáyũcu yūcuan ní cacachi i nuũ na jéẽ isla un nání Malta.

² Te ñáyuu un ní cacundáhú ni i sãña jíjnáhan ná, te ni cascáyú i ñn ñuhũn cáhnu, te ni cacahān i jíin ná jeẽ nasaã ná, chi mĩjin sáha jeẽ cúun saũ.

³ Te ni stutú Pablo jecu tujnu íchi. Te jeẽ jnāa de tujnu un núu ñuhũn te ñn coõ xeén jínu tí ni quenda tí tujnu un jéẽ ní cujihni, te ni chiyuhú-ni tí ndaha de.

⁴ Te ñáyuu cáyũcu yūcuan ní cajito i jeẽ ndíta caa coõ un yíyuhú tí ndaha de, te ni cacahān i:

Tẽe yáha vā sanaa te ni jehni de ndĩyi núu sũcuan, te vēsú je ni cācu de nuũ mar, te máá yāa sãndaã jniñu ñáyuu tu jéhe ga yā jnũhun jeẽ cótecu de, áchí i.

⁵ Te ni caja Pablo ndaha de, te ni ñinga coõ un núu ñuhũn, te tú na vé ni ndóho de.

⁶ Te cándẽtu tãca ñáyuu jeẽ chúhun i cuiñi de chí cotúú-ni de te cuu de. Te ni cunahán téyi cándẽtu i, te ni cajito i jeẽ tú na vé ni ndóho de. Yūcuán na te ni nasāma cájeni ni i, te ni cacahān i jeẽ ñn yaã cúu Pablo.

⁷ Te yajni yūcuan íyó ñuhun tẽe cújehnu ga Malta un, nání de Publio. Te ni cana tẽe un sãña jíjnáhan ná, te ni jéhe núu

de vehe de ni coyūcu ná jíin de unī quivī, te ni jito yúcún de saña.

⁸ Te tátá Publio cáa de, chi ndóho de cuehyī quīji jíin cuéhyī niñī. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de.

⁹ Yūcuán na te ni quiji-coo ndihi ga ñayuu cácuñu yūcuán, te suni súcuan ni canduvāha-ni i.

¹⁰ Te ñayuu un ní cajēhe i cuehē ndajniñu ni cacutahū ná. Te nuū ni jíin quivī jeē quíngoo tucu ná jíin barco, te ni cajēhe i taca ndajniñu cuu ná ichi.

Jeē ni jíin Pablo ñuu Roma

¹¹ Te unī yoō ni coyūcu ná Malta. Te in barco jeē véji ñuu Alejandría ni ine Malta ní vico míjin, te ichi núu barco un ndéé uū figura ídolo ñuu de nání Cástor jíin Pólux. Te ni quivicoo ná barco un cuángoo ná.

¹² Te ni jinūcoo ná ñuu Siracusa, te yūcuan ní coyūcu ná unī quivī.

¹³ Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli.

¹⁴ Te yūcuan ní caqui-jnáhan ná jíin jecu hermano cácandije, te ni cacana de saña ní coyūcu ná jíin de in semana. Yūcuán na te ni quendacoo ná jēe quihīn ná ñuu Roma.

¹⁵ Te hermano cáyūcú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquiñahan de saña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíinahan de, te ni nacuatáhú de nuū Yaā Dios, te ni ndundeyí ni de.

¹⁶ Te sáa te ni jinūcoo ná ini ñuu Roma, te capitán ni squivī de taca preso ndaha tēe cújēhnu nuū taca soldado ñuu Roma. Te ni cajēhe de jnūhun jeē cone sán Pablo te condito in soldado de.

Jeē ní nacani Pablo jnūhun ya ini ñuu Roma

¹⁷ Te nuū unī quivī te ni cana Pablo taca tēe cácuñu nuū jnáhan ñuu de hebreo cáyūcú ini ñuu Roma. Te ni cacutúte de, te ni cahān Pablo jíin de:

Tátá jíinahan ní, tú cuiti na vé ni sáha ná siquī jnáhan yó hebreo ni siquī taca jniñu ní catajnumí jíi yō. Te vésú súcuan te ni cajni i saña ndé ñuu Jerusalén ni casquivī i saña ndaha tēe ñuu Roma jijnáhan de.

¹⁸ Te tēe ñuu Roma jeē cácuñu cáyūcú Cesarea ni castichí de saña, te cácuni de siáa de saña núu, chi ni cajini de jeē tú na cuēchi ná jēe cúu ná.

¹⁹ Te jnáhan ñuu yó hebreo tu ní cajēhe de jnūhun. Jeē yūcuan ní cahān na jēe quiji ná núu maá rey cujēhnu ga nde ñuu Roma yāhá te sandaā maá de siquī ná. Te tú véji

ná jéē cáquin na cuéchi siquī ñayuu nacióon yō.

²⁰ Jeē yúcuan ní cana ná níhín jínáhan ní, návāha cuni na táca ní te ndajnūhun yó. Chi yóhó ñayuu Israel cáñūhun ni yō jeē nátecu ndīyi, te suu jnūhun un nácani ná, te jeē yúcuan cúu jeē nuhní na jín cadena yáha, áchí de.

²¹ Te ni cacahān tēe un jín Pablo:

Tú ni ñin carta ni cátaji ñayuu cáyūcú Judea nuū na jéē cástūhún de jnūhun ní, te táca jnáhan yó Judea jeē ní quijicoo yāhá, tú ni ñin jnūhun néé ní cacahān de siquī ní.

²² Te cánujnahan ni ná cuni sōho ná ndese cúu jnūhun jeē cahán ni, chi je cájini na jéē tēcá-ni lado cacahān ñayuu contra siquī jnúhun jeé jéē steén ni, áchí de.

²³ Te ni cajeni de ñin quiví, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ñini. Te súcuan ni nducú ndéyí de scándíje de táca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jín jnúhun jeē ní catee tēe ni canacani jnūhun Yaā Dios nde jenahán.

²⁴ Te ni cacandíje sava de jnūhun ni cahān Pablo, te sava ga de tu ní cájetáhú de.

²⁵ Chi tú ñinuú cáhīyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhān Isaías, tēe ni nacani jnūhun Yaā Dios nde jenahán,

chi suhva ni cahān de jín táca jíí yō ni sáha Espíritu Santo:

²⁶ Ni cahān Yaā Dios: Cuáhán nuū jnáhan ñuu rō yāhá te cahān rō jín i: Vēsú cuni nahín váha ró te ma jécūhun ni rō, te vēsú coto vāha ró te ma cúni rō.

²⁷ Chi yōhoyo ñihni ni rō, chi tu cácuni rō cuatáhú ró. Te yōhoyo uhū cájini sōho ró, chi tu cánujnahan ni rō cuni sōho ró jnúhun ri.

Te nájnūhun cájesi rō tinūu ró cúu jeē tu cácuni rō nanducú ró ndese cúu, te tu cácuni rō jeē násāma ñini rō návāha nasávāha ri anuá rō nuū cuéchi ró, ní achi Yaā Dios.

Achí tutu.

²⁸ Núu súcuan te na cástūhun ná nuū ni jéē jnúhun ni taji Yāā Dios jeē jnáma ya yohó, nde vijna te tájí yá jnūhun yáha quíhīn nuū ñayuu tēcá nacióon jeē tu cájini i jnūhun ya, te máá i chi cuni sōho i, áchí de.

²⁹ Te ni jīnu ni cahān de jnūhun yáha, te cuangoo jnáhan de hebreo, te yōhoyo ni cacahān de siquī jnúhun yáha jínáhan de.

³⁰ Te ni condee Pablo uū cuiyā vehe jeē ní quíhīn núu de ún. Te ni cusī ñi de cahān de jín táca ñayuu ní quijicoo nuū de.

³¹ Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máá Jítoho yō Jesucristo, te tú ni ñin ní jési jeē nácani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

1 Máá rí cúu Pablo, mozo Jesucristo, chi ni cana Yaā Dios ruhū cúu rí apóstol yā, ni jeni ya ruhū te ni taji yá ruhū jeē nácani rí jnūhun jeē jnáma ya ñayuu.

2 Te jnūhun un ní jejnūhun ya nde jenahán ndasí, te yósó núu tútu iī jeē ní catee tēe ni canacani jnūhun ya.

3 Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David.

4 Te ni natecu yā mēhñu ndíyi ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder.

5 Te jeē jíin Jesucristo ni jēhe Yaā Dios jniñu luu yáha jeē cácuu rí apóstol, cájica rí jíin jnúhun Cristo, návāha coo ñayuu tācá naciōn jeē candíje i jeē sáha ya jehē i, te cuatáhú i nuū yā.

6 Te suni máá ró jijnáhan ró, suni ni cana ya rohó ní quívicoo ró ndaha Jesucristo.

7 Te tēe rí carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī rō nuū yā. Te ñūhun ni rí jeē máá Tátá yō Yaā Dios jíin Jitoho yō Jesucristo sáha ga yā jeē váha

rohó, te sáha ya jeē coo ndeyí coo siī ni rō.

Jeē cuní Pablo quihīn de ñuu Roma

8 Te xīhna gā cástūhun rí nuū rō jeē nácuatáhú rí nuū Yaā Dios jeē siquī rohó jijnáhan ró, chi ni sáha Jesucristo jeē váha rohó. Chi ní ñáyivi jité núu jnūhun cuahān ndese váha cácadíje ró yá.

9 Te máá Yaā Dios jiní yā jeē niní jícán tahu rí jehē rō jijnáhan ró nuū jícán tahu rí. Chi yōhyo ndíhvī ni rí jejniñu rí nuū yā jeē nácani rí jnūhun Sēhe ya.

10 Te niní jícán tahu rí nuū yā jeē núu cúní yā te nde vijna te cuu jecondēhe rí rohó.

11 Chí cúu ni rí coto rí nuū rō jijnáhan ró, te steén gā rí jnūhun ya nuū rō, návāha quendōo váha ga anuá rō te cuiñi nīhin ga rō jíin.

12 Súcuan cúní rí návāha sáha yó jéē ínuú coo ndeyí ni yō jijnáhan yó siquī jeē ínuú cácadíje yó yá.

13 Hermano jijnáhan ró, cúní rí jeē na jécūhun ni rō jeē tíjni jínu ni cuu ni rí jecondēhe rí rohó, te nde vijna ná tu cuu. Chi cúní rí scuité núu ga rí jnūhun ya mēhñu ró, nájnūhun ni sáha rí mēhñu ñayuu tāca gá naciōn.

14 Chí cúu rí tēe táu siquī jnúhun ya, chí táu rí nacuāha rí jnūhun ya nuū ndihí ñayuu, cúu ñayuu jiní gā siquī ndihí jeē iyó ñáyivi jíin jéē tu jíin cuiñi, cúu ñayuu túhva jíin jéē tú túhva.

15 Jeē yúcuan cúu jeē ndihví ni rí jeē suni nuū rohó ñayuu

ñuu Roma nacani ri jñuhun jñama ya yohó.

Jeē ndíso jñuhun vāha ya poder

16 Chi tu cúcanu rī síquī jñuhun vāha ya, chi yúcuan cúu poder Yaā Dios jeē jñama ya tāca ñayuu cácanđije, xīhna gā ñayuu hebreo te suni tāca gā ñayuu.

17 Chi jñuhun vāha ya un steén nuū yō jeē ndáhva Yaā Dios cuēchi yó síquī jeē candíje yó jéē sáha ya jehē yō, te máá jéē candíje yó ní cuáhān yō. Chi súcuan cáhān nuū tútu iī: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

Siquī jeē iyó ndasí cuēchi ñayuu

18 Chi jíní vāha yó jéē Yaā Dios andiví, cuāha ya castigo xeēn nuū tāca ñayuu tu cácanđije te máni cuēchi casáha. Chi jín jñiñu néé casáha i te cájesi i nuū jñuhun ndaā.

19 Te ma cúu cahān i jeē tu jécūhun ni i síquī ndese Yaā cúu Yaā Dios, chi máá yá ni steén nuū i.

20 Chi jín táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñayiví jín ndé vijna te cúu jécūhun vāha ni i jeē máá yá cúu Yaā Dios te iyó poder yā ní cáni. Te jeē yúcuan má cúu cuíti cahān i jeē tu jíní i jeē iyó yá.

21 Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā

Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendōo nee ini anuá i.

22 Cácahān i jeē ndichí i, te sa suhva cáacunéé i.

23 Chi ni castóo i Yaā Dios jeē yóhoyó luu cújéhnú, jeē ma cúu cuíti. Te ni cajetáhú i táca imagen jeē casáha i, jeē cáca nájñuhun tēe cájihí, te suni nde imagen saa jíin cóo jíin quíti cájica ndicúún ndaha.

24 Te jeē yúcuan ní siaá Yaā Dios i jeē na sáha i táca jñiñu jñéhén jñiñu néé jéē cuní i. Te casáha i jñiñu néé jíin jñáhan i jeē cúu máá jñuhun canu.

25 Chi tu ní cácanđije i jñuhun ndaā Yaā Dios, chi sa ni cacandíje i jñuhun stáhú. Te cáhīyo yíñúhún i te cáchiñúhún i nuū táca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cujéhnú ya ní cáni. Amén.

26 Jeē yúcuan ní siaá Yaā Dios i jeē na sáha i táca jñiñu néé jéē cándiyo ni i jeē cúu máá jñuhun canu. Chi nde ñahan ni casama ña modo síhí, te ni quiví ña jíin modo neé.

27 Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jñáhan yí de, te tēe jíin tēe ni casáha de jñiñu jñuhun canu. Te cándoho de castigo síquī jñiñu néé ní casáha de.

28 Te jeē tu ní cácani i cua-jñuhún i Yaā Dios, jeē yúcuan ní siaá yā i jeē na cáni néé ni

i, te sáha i tǎcǎ jniñu jeē tu íyó váha.

²⁹ Te máni máá na jniñu jeē tu íyó ndǎá cándihvī ni, te cájica jnéni, cásáha jniñu néé, cándiyo ni, cájito uhū jnáhan. Te máni jeē cáccuésún ni, cájehni ndīyi, cájejnáhan, cástáhú, cásáhuhū jnáhan, cásájnūhún siquī jnáhan.

³⁰ Cácahān jnūhun néé siquī jnáhan, cájito uhū Yaā Dios, cáccujéē ni, cásándúxi máá, cásátéyi máá, cájequin costumbre neé, tu cájendetū nuū tatá nuū naná.

³¹ Te tu cájecūhun cuiṭi ni, tu squícu jnūhun jéjnūhun, tu íyó mǎni jíin jnáhan, tu íne cáhnu ni nuū jnáhan, tu cúndáhú ni jnáhan.

³² Te je cájini váha i jeē ni sándaā Yaā Dios jeē ñáyuu casáha súcuan, cánuú jnahnū ndetū i. Te vēsú súcuan cájini i, te níni cásáha i jniñu néé un, te suni cánujnahān ni i jeē casáha jnáhan i súcuan.

Ndaā sándaā Yaā Dios siquī cuéchi

2

¹ Núu súcuan te róhó jéē cahán cuēchi siquī jnáhan, núu na-ni ñáyuu cúu ró, ma cúu cahān rō jeē tú na cuēchi máá ró. Chi jeē cahán rō cuēchi siquī jnáhan ró cúu jeē ndénehen ró cuéchi siquī máá ró. Chi róhó jéē cahán cuēchi, suni súcuan sáha máá ró cuēchi.

² Chi jíni yō jeē Yaā Dios, ndaā sáha ya jeē ndóna ya siquī cuéchi ñáyuu casáha súcuan.

³ Te róhó jéē cahán cuēchi siquī ñáyuu casáha cuēchi, te suni súcuan sáha máá ró, ¿te á jéni ni rō jeē cácu máá ró quiṽi ndóna Yaā Dios siquī cuéchi, chí naún?

⁴ ¿A cújéē ni rō nuū jnūhun jeē yóhoyo váha ni Yaā Dios jíin ró, jíin jéē íyó paciencia yā jeē tú yachī cuāha ya castigo nuū rō? ¿Te á tu jécūhun ni rō jeē jnūhun jeē yóhoyo váha ni yā sáha jeē nácani ni rō siquī cuéchi ró?

⁵ Chi níhni ni rō te tu nácani ni rō siquī cuéchi ró. Te jeē yúcuan cáyā gā rō castigo siquī rō quiṽi sáha Yaā Dios juicio, máá quiṽi jeē cóo ndi-jin jeē ndaā sándaā yā siquī cuéchi.

⁶ Chi chunaa yā nuū ná ĩn ná ĩn ñáyuu núu ndese jniñu ni casáha i.

⁷ Te ñáyuu jeē tu jécuiñī i jeē sáha i jniñu váha, cuāha ya jnūhun jeē cótecu i ní cáni. Chi ndúcú i quiṽi i nuū ndujéhnu yíñúhún i, nuū ní cáni cotecu i.

⁸ Te quiṭi ni yā te cuāha ya castigo nuū ñáyuu cújéē ni nuū yā, te cúniñni ni nuū jnūhun ndaā, chí sa nuū jnūhun yacuá yóho jetáhú i.

⁹ Te tǎca ñáyuu casáha jniñu néé, chí níhni i jnūndóho xeēn te cucuíhyá ndasí ni i, xīhna gā ñáyuu hebreo te suni súcuan ñáyuu tǎca gá nación.

¹⁰ Te sa suhva tǎca ñáyuu casáha jniñu váha, chí quiṽi i nuū ndujéhnu yíñúhún i, te coo ndeyí coo sí ni i, xīhna gā ñáyuu hebreo te suni súcuan ñáyuu tǎca gá nación.

11 Chi Yaā Dios tu sāha ya cuenta ndese cúu ññ ññ ñayuu, chi inuú sāha ya jíin i.

12 Chi tāca ñáyuu jeē casáha cuēchi, vēsú tu cáyihí i chíji ley jeē ní jéhe ya nuū Moisés, te tu níní ley un te jnahnū ndetū i. Te tāca ñáyuu cáyihí chíji ley Moisés te cásáha cuēchi, jíin ley un sándaā yā cuēchi i.

13 Chi tu ndáhva Yaā Dios cuēchi ñayuu jeē maá jéē cúni nahín-ni i jñūhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i.

14 Chi ñayuu tēcá nación jeē tu cánevāha tutu ley jeē ní jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un.

15 Te súcuan cástéén i jeē jñūhun ndácu ley un chí ññūhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ní sāha i cuēchi chí váha ni sāha i.

16 Te súcuan coo máá quívī jeē jíin Jesucristo sándaā Yaā Dios síquī tāca jéē tu íyó váha jeē ní cajeni sáhí ní tāca ñáyuu. Súcuan cáhán jñūhun váha ya jeē nácani ri.

Síquī jeē tu cásquícu ñayuu hebreo ley Moisés

17 Te róhó cácahān rō jeē téé hebreo cácuu rō, te cátenū rō maá ley Moisés, te cácutéyí rō jeē síquí Yaā Dios.

18 Te cájeni ni rō jeē jiní rō ndese nújnahan ni yā, jíin jéē cúu nácāji váha rō ndé-ni cúu

jññū váha, chí ni cacutūhva rō ley un.

19 Te cájeni ni rō jeē maá rō cácuu tēe stéén íchi Yaā Dios nuū ñáyuu tu cájini cuítí, jíin jeē cúu sāha rō jéē cúndijin ini anuá ñayuu cájica nájnūhun nuū nēē.

20 Te cájeni ni rō jeē cúu stéén rō nuū ñáyuu tú tūhva jñūhun ya, jíin jéē maá rō cácuu maestro nuū ñáyuu tu jécūhun ní. Chí jíin tutu ley yā te cájini rō ndese cúu jñūhun ndíchí jñūhun ndaā, cájeni ni rō.

21 Núu súcuan te máá rō jeē castéén nuū ñáyuu, ¿te naun tu cástéén rō nuū maá rō? Te máá rō jeē cácahān jeē ma sácúíhná i, ¿te naun cásácúíhná máá rō?

22 Te máá rō jeē cácahān jeē ma cósiquí ndéē i, ¿te naun cásiquí ndéē maá rō? Te máá rō jeē cácahān jeē cácuquini ní rō ídolo, ¿te naun cásácúíhná rō ndajññū jeē yúcu ini vehe ídolo?

23 Te cácutéyí rō jíin ley Yaā Dios, te vēsú súcuan te cásáha rō jéē cácahān ñayuu síquí yā, chí tu cásquícu máá rō jñūhun ndácu ley yā ún.

24 Chi súcuan yósó núu tútu íi: Ñayuu tāca gá nación, máni cácahān ndevāha i síquí Yaā Dios, jeē síquí cuéchi róhó ñáyuu hebreo.

25 Te núu cásquícu rō ley Moisés, yúcuán na te níhín jññū ndije jeē ní canihín rō jñunī circuncidar. Te núu tu cásquícu rō ley un, te vēsú ní cuu rō circuncidar, te nájnūhun jeē tu ní cúu rō.

26 Te tēe t̄acá naci3n, núu cásquicu de jniñu ndácu ley un, v̄esú tu ní cániñiñ de jnuni circuncidar, núu súcuan te nájnũhun ní canihĩn de jnuni circuncidar.

27 Te tēe jeē tu ní cúu circuncidar yiqui cúñu de, te cásquicu de ley yā, máa de cahān cuēchi siquĩ rō. Chi tu cásquicu ró, v̄esú cánevāha ró tutu ley un, te ni cuu ró circuncidar.

28 Chi nasūu jēē cáa ichi siquĩ iñ tēe sáha jeē cúu ndije de tēe hebreo. Te ni nasūu jēē cúu circuncidar yiqui cúñu iñ tēe sáha jeē cúu de tēe ndaā.

29 Chi sa suhva tēe cúu hebreo ndije, cúu jeē ini anuá de ñũhun jnũhun ndaā. Te tēe cúu circuncidar ndije, chi nde jíin ini jíin ánuá de sáha de jniñu ndaā te nasūu jēē ndíso de jnuni circuncidar jeē cahán ley un cúu. Tēe cándāa súcuan, nasūu ñayuu cánejnúhún i de, chi máa Yaā Dios.

3

1 ¿Núu súcuan te na vé iyó gá nuū ñayuu hebreo jeē quéndōo vāha ga i? ¿Te ndé níhín jniñu jeē casáha i circuncidar?

2 Vāha ndasí níhín jniñu. Xihna gā nihín jniñu jeē ni jéhe Yaā Dios jnũhun ya nuū maá i.

3 Te v̄esú sava i tu ní cá candíje, ¿te á suu sáha jeē ma squícu ga Yaā Dios jnũhun ni jejnũhun ya, chí naún?

4 Tú cuiti jeē súcuan, chi v̄esú núu ndihi ñayuu castáhú i, te Yaā Dios chí iyó ndaā yā.

Chi suhva yósó nuū tutu iñ jeē ni cáhān iñ tēe jíin yá:

Cahān ñayuu jeē iyó ndaā ni jíin táca jnúhun cáhán ni,

te cuni i jeē iyó ndaā ní v̄esú núu cácahān i siquĩ ní.

Achí tutu.

5 Te cácahān sava ñayuu jeē iyó váha jeē sáha yó cuēchi, chí cuēchi yó jéjniñu stéén jeē iyó ndaā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjniñu cuēchi yó súcuan? (Va cáhán-ni nde ri nájnũhun cácahān ñayuu ñayiví.)

6 Tú cuiti jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuēchi ñayuu ñayiví?

7 Te núu jnũhun stáhú cácahān ñayuu jéjniñu stéén jeē yóhyo cújéñu Yaā Dios siquĩ jeē máni cáhán ndaā yā, ¿te á cuu cahān yō jeē tú vāha jeē cahán yā jeē cuēchi cúu jeē castáhú i?

8 Tuú, chí núu jeē súcuan cúu, te cuu cahān yō jeē vetū-ni sáha yó jēē neé návāha quee jeē váha núu. Te sava ñayuu cácahān ndevāha i siquĩ rī jeē súcuan cástéén rī, te tú ndaā. Ñayuu ún chí iyó váha jeē ndénehen ya cuēchi siquĩ i.

Ndivii yō iyó cuēchi

9 Núu súcuan ¿te á váha ga ñayuu cácuu yóhó ñayuu hebreo v̄esú inga ñayuu naún? Tú cuiti jeē súcuan. Chi je ni cacahān yō jeē v̄esú ñayuu hebreo chí ñayuu táca gá naci3n, ndivii yō yñi chíji cuēchi.

10 Chi suhva cáhán tutu i:
Tú cuíti na ñayuu ndaā iyó, ni
iñ i.

11 Te tú cuíti ñayuu jécūhun ni
iyó,

te tú ni iñ i nánducú i Yaā
Dios.

12 Ndihi i ni cascuíta i jñūhun
ya,

te inuú-ni ni castívi ndihi i
máa i.

Te tú cuíti ñayuu sáha jniñu
váha iyó, ni iñ i.

13 Yaū sucūn i cúu nájnūhun
yaū ndīyi jeē núne,

chi máni jñūhun stáhú
cácahān i.

Te nájnūhun veneno coō yñhi
yuhu i,

14 chi máni máa jnúhun
ndevāha jñūhun uvuā
cácahān i.

15 Te yóhyo ñama jehē i jeē
cáhi i ndīyi.

16 Te ndé-ni cúu-ni nuū cájica i
te squívi i jñūndóho jeē
jnahnú ndetū ñayuu.

17 Te tu cájica cuíti i jín jnúhun
coyūcu mánī i,

18 te ni tu cánacani ni i jeē
cónso iyo i nuū Yaā
Dios.

Achí tutu.

19 Te jínī yō jeē tāca jnúhun
cáhán ley jenahán, chí cáhán
nuū ñáyuu yñhi chíji ley un,
návāha ndihi i ma cúu cahān i
jehē i. Chi ndenehen Yaā Dios
cuēchi siquī i nde jín ñáyuu ní
ñáyīví.

20 Chi tú ni iñ ñayuu
quendōo ndaā i nuū yā jeē
nducú i squícu i jniñu ndácu
ley un. Chí ley un jéníñu máni
návāha cuni yō jeē iyó cuēchi
yó.

*Jeē jnáma ya yohó siquī jeē
candíje yó jéē sáha ya jehē yō*

21 Te vijna te je cájini vāha
yó ndese ndáhva Yaā Dios
cuēchi yó. Te nasūu ley un
sáha jeē quéndōo ndaā yō,
vēsú maá tutu ley jín téé ni
canacani jñūhun ya, ni cac-
ahān ndese ndáhva yā cuēchi
ñayuu.

22 Chi tāca ñáyuu jeē
cácaandíje i jeē ni jíhi Jesucristo
jeē chúnaa yā cuēchi i, chi
ndahva Yaā Dios cuēchi i siquī
jeē súcuan cácaandíje i. Chi
inuú-ni cúu táca ndihi ñayuu.

23 Chi ndihi yó ni casáha
cuēchi, te jeē yúcuan tu ní cúu
quendōo ndaā yō nuū Yaā
Dios.

24 Te siquī jeē yóhyo vāha ni
Yaā Dios, jeē yúcuan ndáhva
yā cuēchi yó súcuan-ni. Chi
siquī jeē ni jíhi Cristo Jesús
cúu jeē jnáma ya yohó.

25 Chi Yaā Dios ni jeni ya
Cristo návāha socō yā maá yá
chunaa yā cuēchi yó jéē ni jíhi
yā. Te jnáma ya yohó núu
súcuan cácaandíje yó. Te súcuan
ni sáha Yaā Dios návāha stéén
yā jeē Yaā ndaā cúu ya. Chí
ichí yátá ni iyo paciencia yā,
te tu ní chíhi ya cuenta cuēchi
ñayuu.

26 Te tiempo yáha stéén yā
jeē Yaā ndaā cúu ya, chí ndaā
sáha ya jeē squéndōo ndaā yā
ñayuu candíje vēsú iyó cuēchi
i, chí cácaandíje i jeē ní chunaa
Jesús cuēchi i ni ndahva yā.

27 Núu súcuan ¿te á cuu
cutéyí gá yō siquī maá yó? Ma
cúu cuíti, chí ma cúu cutéyí yó
cani ni yō jeē vāha squícu yó
ley yā. Chí jnáma ya yohó máa

síquī jeē candíje yó jéē sáha ya jehē yō.

²⁸ Núu súcuan te je jíní yō jeē ndáhva Yaā Dios cuēchi yó síquī jeē súcuan cándíje yó, te nasūu jéē nducú yó squícu yó jéē ndácu ley.

²⁹ ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación.

³⁰ Chi ñn-ni Yaā Dios iyó, te ndáhva yā cuēchi ñayuu cácdíje jeē ní sáha ya jehē i, cúu ñayuu ndíso jnunī circuncidar, cúu ñayuu jeē tuú.

³¹ Te jeē candíje yó jéē jnáma ya yohó, ¿á sáha jeē tuá jíní ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

Abraham cúu ñn ejemplo nuū yō

4

¹ Núu súcuan ¿te ndese cahān yō síquī tāca jéē ní cuu jín jí yō Abraham? ¿Ndese ni ndahvā cuēchi de?

² Nasūu jéē ní sáha máá de cúu jeē ní ndahva Yaā Dios cuēchi de. Chi núu jeē súcuan cúu núú, te cuu cutéyí de jeē váha ní sáha de. Te tu ní cutéyí de, chi nasūu síquī jeē ní sáha máá de cúu jeē ní ndahva Yaā Dios cuēchi de.

³ ¿Chi ndese cáhán tutu íi? Cáhán jeē ní candíje Abraham jeē sáha ya jeē ní jéjnūhun ya nuū de, te jeē yúcuan ní ndahva yā cuēchi de.

⁴ Te ñn ñayuu sájniñu, te yāhu i chí nasūu jéē cútahū i

cúu, chi jeē chúnaa yō nuū i cúu.

⁵ Te jeē jnáma Yaā Dios ñayuu, chi jeē cútahū i cúu. Chí vésú tu cúu squícu i tāca jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i.

⁶ Te David suni ní cahān de ndese yōhyo ndetū ñayuu jeē ndáhva Yaā Dios cuēchi i, vésú tu cúu sáha i ní ñn jniñu jeē quéndōo ndaā i nuū yā.

⁷ Chi ní cahān de:
Nacā ndetū ñayuu jeē íne cáhnu ní yā nuū jniñu néé ní sáha i,
te tu ndénehen ya cuēchi síquī i.

⁸ Te nacā ndetū tēe jeē tuá chíhi máá Jítoho yō cuenta cuēchi de.

Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chí je ní cahān yō jeē ní candíje Abraham jeē sáha ya jeē ní jéjnūhun ya, te jeē yúcuan ní ndahva yā cuēchi de.

¹⁰ Te ná ní ndahva yā cuēchi de, ¿á je ní cuu de circuncidar, chí ndé ná tuú? Nasūu jéē jé ní cuu de circuncidar, chí nde ná tuú.

¹¹ Te cuéé gá te ní nihīn de jnunī circuncidar. Te suu ní cuu ñn seña, nájñūhun ñn sello jeē ní ndahva yā cuēchi de síquī jeē súcuan ní candíje de. Te jeē yúcuan ní cahān yā jeē cuu de jí nuū tāca ñayuu jeē candíje i jeē sáha ya jehē

i, suni nuū ñáyuu tu ní cúu circuncidar, chí suni ndahva yā cuēchi máá i.

¹² Te suni cúu de jíi nuū ñáyuu ní cuu circuncidar, te nasūu máni jeē ní cuu i circuncidar, chí suni jeē ní jñii i ejemplo de. Chí cácdíje i jeē sáha ya jehē i, nájnūhun ni candíje máá de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chí ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chí sa suhva síquī jeē ní candíje de jeē ni jéjnūhun ya, te ni ndahva yā cuēchi de.

¹⁴ Chí núu jeē máni máá ñáyuu nducú squícu ley cúu jeē nihín jeē ni jéjnūhun ya, núu súcuan te cácdíje cāha yó nuú, te ma nihín jñíñu jeē ni jéjnūhun ya ún.

¹⁵ Te ley chí sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jñūhun stívi ñayuu síquī ley coo núu.

¹⁶ Núu súcuan te ni jejnūhun ya jeē sáha ya jeē váha jíin ñáyuu síquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chí suni nuū táca ñáyuu cácdíje nájnūhun ni candíje

Abraham. Te súcuan cúu de jíi nuū tāca yó jeē cácdíje yó.

¹⁷ Súcuan ni sáha Yaā Dios chí ni candíje de jeē sáha ya. Chí súcuan cāhán tutu íi: Ni jeni ri rohó cuu ró jíi nuū cuehē ndasí ñáyuu. Súcuan ni cahān maá Yaā jeē nastécu ndīyi te cāhán yā ndese coo tāca jéē ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñáyuu, nájnūhun ni cahān Yaā Dios: Súcuan nducuehē yucūn rō, achí yá jíin de.

¹⁹ Te je yajni jinū de ciento cuiyā, te vēsú súcuan te tu ní quēnda de nuū jñūhun cácdíje de, vēsú jiní de jeē maá de jíin ñasihí de Sara je jéhnū ndasí ndíndúu de jeē ma cúu ga coo sēhe de.

²⁰ Te tu ní nácani síquí ni de jeē ma cácdíje ga de jñūhun ní jejnūhun Yaā Dios jeē coo sēhe de. Chí sa suhva ni candíje nīhin ga de, te ni nacuatáhú de nuū Yaā Dios.

²¹ Chí ni cucáhnu vāha ni de jeē cúu squícu Yaā Dios ndihí jeē ni jéjnūhun ya.

²² Te jeē yúcuan ní ndahva yā cuēchi de síquī jeē súcuan ni candíje de.

²³ Te nasūu máá-ni síquí Abraham cúu jeē yosó núu tútu jeē ní ndahva yā cuēchi de jeē ní candíje de.

²⁴ Chí suni yósó jéē síquí yohó jíjnáhan yó. Chí suni ndáhva yā cuēchi máá yó jéē

candíje yó jéē cúu ya Yaā ní nastécu Jitoho yō Jesús.

²⁵ Chi ni jihī Jesús jeē chúnaa yā cuēchi yó, te ni natecu yā návaha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuan te je ni ndahva Yaā Dios cuēchi yó síquī jeē ní candíje yó jéē sáha ya jehē yō. Te jeē yúcuan ní sáha ya jeē ní ndívi yó núu jnúhun manī yā jíin yó, síquī jeē ni jihī Jitoho yō Jesucristo jehē yō.

² Chi máá Cristo ni sáha jeē ni quívicoo yó núu Yaā Dios, chí ni sáha ya jeē váha yóhó síquī jeē súcuan cándíje yó. Te cáhīin nihin yó jíin jnúhun jeē sáha ya jeē váha yóhó. Te cúsī ni yō chí ñúhun ni yō jeē jinú yō nuū lúu kujénu yó jíin Yaā Dios.

³ Te nasūu máá yáha-ni, chí suni cúsī ni yō jeē ndóho yó jnúndóho. Chí jíin yō jeē máá jnúndóho sáha jeē jéndeýí ni yō.

⁴ Te jeē jéndeýí ni yō sáha jeē íje váha yó cuu yó ñayuu ndaā. Te jeē íje váha yó sáha jeē ñúhun ni yō táca jéē váha jeē cóo.

⁵ Te táca jéē ñúhun ni yō, chí nihīn nahín yó. Chí jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuiti jnama yó máá yó, te ni jihī Cristo jehē yohó jéē cúu

yó ñayuu íyó cuéchi. Te ni jihī yā maá quívī jeē jé ni jeni Yaā Dios.

⁷ Te yíí cúu jeē cúu ñin ñayuu jehē inga ñayuu, vésú jehē ñin ñayuu ndaā. Chí sanaa te íyó jínu jeē chúndeýí ni ñin tēe cuu de jehē ñin tēe ndaā váha.

⁸ Te máá Cristo chí ni jihī yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó.

⁹ Te vijna je ni ndahva Yaā Dios cuēchi yó síquī jeē ni jihī Cristo jehē yō. Núu súcuan te suni jíin váha yó jéē jnama Cristo yohó núu castigo quiji quívī sáha Yaā Dios juicio.

¹⁰ Chi náa cúu ga yō enemigo Yaā Dios, te síquī jeē ni jihī Sēhe ya jehē yō, te ni sáha ya jeē ndívi yó núu jnúhun manī yā jíin yó. Te jeē súcuan ní ndívi yó nuū jnúhun manī yā jíin yó, te suni jíin váha yó jéē cācu yó síquī jeē técu Cristo, nduú yá jíin yó.

¹¹ Te nasūu máá yáha-ni, chí suni cúsī ndasí ni yō jíin Yaā Dios síquī jeē ni sáha Jitoho yō Jesucristo jehē yō, chí máá yá ni sáha jeē ní ndívi yó núu jnúhun manī Yaā Dios jíin yó.

Jnúhun Adán jíin jnúhun Cristo

¹² Núu súcuan te jíin yō jeē ni quívī cuēchi ini ñayívi ní sáha máá ñin-ni tēe Adán. Te jeē síquí cuéchi yúcuan te ni jecōo cuehyī jéni ñayuu. Te jeē yúcuan cúu jeē jihí ndíhi ñayuu, chí ndíhi í yíhi cuēchi.

¹³ Te nde ná tu cuāha ya ley nuū Moisés, te je íyó cuéchi ini

ñayiví. Te siquī jeē ná tu coo ley yā, te tu ní chíhi ya cuenta jeē castívi i.

14 Te vésú súcuan te nde tiempo Adán te nde tiempo Moisés ni yihí ñayuu chíji cuehyī jeē jéhni i siquī jeē iyó cuéchi i. Chi ni jihí i siquī cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cunīhni ni de nuū ñn jniñu ní ndacu ya. Te Adán ni cuu de ñn muestra maá Yaā ní quiji cuéé gá.

15 Te jnūhun jeē ni sáha Adán cuéchi, tu quíjnáhan cuiti jíin táhū jeē jnáma Yaā Dios yohó. Chi jeē ni stívi máá ñn-ni tēe ún, jeē yúcuan cúu jeē jihí ndihí yó. Te jnūhun jeē jnáma Yaā Dios yohó cújéhnun ndasí gá, chi siquī jeē ni sáha máá ñn-ni tēe Jesucristo cúu jeē súcuan-ni jnáma ya ndihí ñayuu candíje.

16 Te cuéchi jeē ni sáha máá ñn-ni Adán, tu quíjnáhan cuiti jíin jnūhun jeē jnáma Yaā Dios yohó. Chi siquī máá ñn-ni cuéchi ún te ni quívicoo ñayuu chíji jnūhun jnahnū ndetū i. Te jnūhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vésú yōhyo cuehē cuéchi ni casáha i.

17 Chi siquī jeē ni sáha máá ñn-ni tēe Adán cuéchi, te ni nihīn poder cuehyī jéhni ñayuu. Te sa suhva siquī jeē ni jihí maá ñn-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jíin yá. Chi ni ndahva yā cuéchi i siquī jeē yóhyo vāha ni yā.

18 Núu súcuan te siquī jeē

ni sáha máá ñn-ni tēe Adán cuéchi, te ni quívicoo ndihí ñayuu chíji jnūhun jnahnū ndetū i. Te sa suhva siquī jeē ni sáha máá ñn-ni tēe Jesucristo ñn jniñu váha ndasí, te ndáhva Yaā Dios cuéchi ndihí ñayuu te cotecu i ní cáni.

19 Chi siquī jeē tu ní jéndije máá ñn-ni tēe, te ni quívicoo cuehē ndasí ñayuu chíji cuéchi. Te suni súcuan siquī jeē ní jéndije máá ñn-ni tēe Jesucristo, te ndáhva Yaā Dios cuéchi cuehē ndasí ñayuu.

20 Te ni jēhe ya ley yā návāha cuní yō jeē cuéhē cuéchi casáha yó. Te jeē ní nducuehē cuéchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō.

21 Núu súcuan te nájnūhun ni nihīn poder cuehyī jéhni ñayuu siquī jeē iyó cuéchi i, suni súcuan iyó poder jnūhun jeē váha ni yā jíin yó. Chi ndáhva yā cuéchi yó te cotecu yō ní cáni siquī jeē ni jihí Jitoho yō Jesucristo jehē yō.

Jeē tuá yihí yó chíji cuéchi chi yihí yó ndaha Cristo

6

1 Núu súcuan ¿te ndese cahān yō? ¿A caca ga yō jíin cuéchi návāha víhyá gā sáha ya jeē váha yóhó jéé cóne cáhnu ni yā nuū yō?

2 Ma cúu cuiti. Chi nájnūhun je ni jihí yō jeē tuá yihí yó chíji cuéchi, te ma cúu ga caca yó jíin cuéchi núu súcuan.

3 ¿A tu cájecūhun ni rō jeē taca yó jeē ní jendute yó siquī

jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jīhī yō jín yá?

4 Chi jeē ní jendute yó cúu nájñūhun ni quindūji yó jēē ni jīhī yō jín yá. Te vijna te cuu caca yó jín vida jeē jeē ni jéhe ya nuū yō, chi nájñūhun suni ni natecu yō jín yá. Chi ni natecu yā ni sáha Tátá yā jín poder jeē cujéhu ndasí yá.

5 Chi núu ni cundúú yó jín yá síquī jnūhun jeē ni jīhī yō jín yá, te suni súcuan cundúú yó jín yá síquī jnūhun jeē ní natecu yō jín yá.

6 Chi jíní yō jeē ní naa modo maá yó jeē ni jíca yó jín ichi yátá, chi ni quívi yó núu jnūhun jeē ni jīhī yō jín Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajniñu yó núu taca jniñu jeē máni cuéchi cúu.

7 Chi ñayuu jeē jé ni cajihī, je ni quendacoo i chíji táca cuéchi.

8 Te núu je ni jīhī yō jín Cristo, te cándije yó jēē suni súcuan ni natecu yō jín yá.

9 Chi jíní yō jeē ní natecu Cristo, te ma cúu cuiti ga yā, chi cuehyī jéhu yóhó, tuá na vé cúu sáha jín yá.

10 Chi jeē ni jīhī yā, te ññ jínu-ni ni jīhī yā jeē síquī cuéchi ñayuu. Te jeē técu yā vijna, chi sáha ya jeē cuní Yā Dios.

11 Te suni súcuan róhó jínánan ró, sáha ró cuenta jeē nájñūhun ni cajihī ró jeē ní quendacoo ró chíji cuéchi. Te cátecu ró návāha sáha ró jēē

cuní Yā Dios, chi ndúú ró jín Jítoho yō Cristo Jesús.

12 Núu súcuan te ma cuáha ga ró jnūhun quíhi ró chíji cuéchi jín yíqui cúñu ró jeē cúu. Chi cuéchi ún stíhvī ni rohó jēē na sáha ró táca jēē ndíyo néé ni ró.

13 Te ma cuáha ró máá ró cuajniñu ró núu cuéchi jeē cócuu ró jín jniñu néé. Chí sa suhva cuáha ró máá ró nuū Yā Dios, te sáha ró cuenta jeē nájñūhun je ni cajihī ró te ni canatecu ró nuū yā. Te cuáha ndíhi ró máá ró nuū yā jeē cuajniñu ró núu jniñu ndaā.

14 Chi tuá na poder cuéchi jeē cundeyí jín ró, chi tuá cáyihī ró chíji ley jenahán, chi sa cáyihī ró chíji jnūhun jeē váha ni yā jín ró.

Jnūhun mozo jeē steén ndese quéndō ñayuu cácañde

15 ¿Ntese sáha yó núu súcuan? ¿A caca ga yō jín cuéchi síquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jín yó? Ma cúu cuiti.

16 Chi cájini ró jeē núu cuáha ró máá ró jeē cuatáhú ró sáñniñu ró núu ññ tēe, núu súcuan te cácuu ró mozo nuū tēe ún, te cánuú cuandije ró núu de. Te suni súcuan núu cuáha ró máá ró jeē sáha ró cuéchi, te mozo cuéchi cácuu ró, te cuu ró. Te núu cuatáhú ró nuū maá yá, te mozo yā cácuu ró jēē cáca ndaā ró.

17 Te na cútahū yō nuū Yā Dios, chi vésú ni cacuu ró mozo nuū cuéchi, te vijna chi

nde jín ini jín ánuá rō ni ca-
jetáhú ró nuū jnúhun ya jeē ni
quívicoo ró núū.

18 Te vijna te je ni nduu li-
bre rō jeē tuá cácuu ró mozo
nuū cuéchi, te cájejniñu ró núū
jniñu ndaā.

19 (Ni cahān rī ñn jnúhun
ndese cúu siquī mozo ini
ñayīvi yáha, chí tu cájecūhun
yachī ni rō siquī jnúhun ya.)
Núu súcuan te nájnūhun ni
cajēhe ró máá ró nde saá jeē
ní cajejniñu ró núū tācá jniñu
jnehén jniñu néé, suni súcuan
cuāha ró máá ró vijna jeē
cuajniñu ró núū jniñu ndaā,
návāha coo ndoo coo īī rō nuū
Yaā Dios.

20 Chi nde náa cácuu ró
mozo nuū cuéchi, te tu ní
cájejniñu ró núū jniñu ndaā.

21 ¿Te na vé ni canihīn rō
siquī cuéchi ni casáha ró un
jēé cácuuanu rō vijna sáha?
Tú cuīti, chí máá jēé jnahnú
ndetū rō ní cáni sáha.

22 Te vijna te je ni canduu
libre rō jeē tuá cácuu ró mozo
nuū cuéchi, te cájejniñu ró núū
Yaā Dios. Te suu sáha jeē
quéndōo vāha ró, chí cáhīyo
ndoo cáhīyo īī rō nuū yā, te
nde sandīhī te cotecu rō ní
cáni.

23 Chi yāhu jeē nihín ñayuu
siquī cuéchi cúu jeē jnahnú
ndetū i. Te sa tahū jeē jéhe
Yaā Dios cúu jeē cótecu yō ní
cáni andīví, siquī jeē nduú yó
jín Jítoho yō Cristo Jesús.

*Jnúhun ñasihí jín yū jeē
steēn ndese quéndōo ñayuu
cácanđje*

7

1 Hermano, je cájini rō
ndese cáhán ley yā, te cájini rō
jeē yíhi ñayuu chíji ley maá-ni
núu técu i ñayīvi yáha.

2 Te yāha cúu nájnūhun ñn
ñahan jeē ní quijnáhan, chí
cáhán ley jeē yíhi ña ndaha yū
ñā maá-ni núu técu de. Te núu
ni jihī yū ña, te je ni quenda
ñā chíji ley jeē ní quijnáhan ña
jín de.

3 Núu súcuan te núu qui-
jnáhan ña jín inga tēe níni técu
gā yū ña, te cásiquí ndēē ña de.
Te núu je ni jihī yū ña, te je ni
quenda ña chíji ley un. Te cuu
quijnáhan ña jín inga tēe, chí
nasūu jēé casíquí ndēē ña núu
súcuan.

4 Te suni súcuan rōhó
jínáhan ró, ñánī mánī, chí
ndúú ró jín Cristo. Chí
nájnūhun ni cajihī rō jín
Cristo, te ni quendacoo ró
chíji ley jenahán. Te vijna chí
nájnūhun ni quijnáhan ró jín
inga, cúu jeē ní quívicoo ró
ndaha Cristo, Yaā ni natecu
mēhñu ndīyi, návāha cuu sáha
ró jniñu váha jeē cuní Yaā
Dios.

5 Chí ná ni cajica yó jín
modo máá yó nde saá, te ley
un ní sáha jeē ní ndīyo néé ni
yō tāca jēé cuní yíqui cúñu yō
jeē sáha yó. Te yūcuan ní sáha
jeē jnahnú ndetū yō nuú.

6 Te vijna te je ni quenda
yó chíji ley jenahán, chí
nájnūhun je ni jihī yō jeē
ma nihín gā poder siquī yō.
Te súcuan te íyó libre yō jeē
cuajniñu yó núu Yaā Dios.
Te jica yó jín modo jeē jēé
cuní maá Espíritu, chí tuá yíhi

yó chíji ley jeē ní tee Moisés jenahán.

Siquī cuēchi jeē ñúhun ini anuá yō

7 ¿Ndese cahán yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cúni cuiti rī jeē iyó cuēchi ri. Chi ma cúni rī jeē cuēchi cúu jeē ndíyo ni rī ndajniñu jnáhan ri núu tu ní cáhán ley jeē ma ndíyo ni yō.

8 Te súcuan ni nihīn cuēchi modo cocuu jíin rí. Chi siquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha ri tāca jéé neé. Te núu jeē tu ley, te suni tú na jñūhun stívi yó siquī ley nuú.

9 Chi ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuēchi ri, te ni nduu ri nájnūhun ndīyi.

10 Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú.

11 Chi jíin jéé ndácu ley un jniñu, te ni nihīn cuēchi modo cocuu jíin rí, te ni stahú ruhū. Chi jíin jéé ndácu ley jniñu, te cuēchi ni sáha jeē ní quenda jñūhun jeē jnahnū ndetū rī.

12 Núu súcuan te iyó ndáā maá ley, te tācá jniñu ndácu chí iyó ndoo iyó ndáā vāha.

13 Núu súcuan te ley jeē iyó vāha ún, ¿á suu sáha jeē jnahnú ndetū rī naún? Tú cuiti. Chi sa suhva máá cuēchi cúu jeē sáha jeē jnahnú ndetū

rī, te súcuan stúu cuēchi ndese iyó máá. Chi jíin jniñu vāha jeē ndácu ley te ni natūu jniñu neé jéé cúu cuēchi.

14 Chi jíin yō jeē nuū maá Espíritu vēji ley. Te ruhū chi sa névāha ri ñin modo neé máá rí jeē ni squívi ruhū jejniñu cáha rí nuū cuēchi.

15 Chi tāca jéé sáha ri, tu jécūhun ni rī najehē cúu jeē sáha ri. Chi jniñu vāha jeē cuní rī sáha ri, tu ndé níhín rī fuerza sáha ri, chí sa suhva sáha ri jniñu neé jéé tu cuvāha ni rī sáha ri.

16 Te náa sáha ri jniñu neé jéé tu cuní rī sáha ri, núu súcuan te nácuni rī jeē iyó ndáā ley.

17 Núu súcuan te nasūu rúhū cúu jeē sáha jniñu neé un, chí modo neé jéé ñúhun ini anuá rī cúu jeē sáha cuēchi.

18 Chi jíin rī jeē modo maá rí jeē névāha ri ini anuá rī, tú cuiti na vé jeē vāha iyó. Chi cuní rī sáha ri jniñu vāha, te tu ndé níhín rī fuerza sáha ri.

19 Chi jniñu vāha jeē cuní rī sáha ri, tu sáha ri. Te jniñu neé jéé tu cuní rī, sa yūcuan sáha ri.

20 Te náa sáha ri jniñu jeē tu cuní rī sáha ri, te nasūu rúhū cúu jeē sáha, chí modo neé jéé ñúhun ini anuá rī cúu jeē sáha.

21 Núu súcuan te ni jini rī jeē súcuan cúu jíin rí: Vēsú cuní rī sáha ri jniñu vāha, te sa máni modo neé cúu jeē ñúhun ini anuá rī.

22 Chí cúsi ni rī jíin ley Yaa Dios nde jíin ini anuá rī.

23 Te ni nacuni rī jeē iyó ñnga modo neé máá rí jeē jési nuū jeē cuní rī sáha ri jeē vāha. Te cúu ri nájnūhun

preso nuū cuéchi jeē jícu jíin rí.

²⁴ Nacā jeē ndahú gá cúu ri núu súcuan. ¿Ndé ñn jnama ruhū nuū modo neé máá rí jeē jícu jíin rí jeē jnahnú ndetū rí?

²⁵ Na cútahū ndasí rí nuū Yaā Dios, chí máá yá cúu jeē jnama ruhū nuū modo neé rí siquī jeē ni jíhī Jitoho rí Jesucristo jehē rí. Núu súcuan te vésú cuní yō squícu yó ley Yaā Dios, te jeē jíin fuerza maá yó ma cúu, chí modo neé máá yó sáha jeē jejniñu cāha yó nuū cuéchi.

Siquī jeē jíca yó jíin modo cuní Espíritu Yaā Dios

8

¹ Núu súcuan te ma ndénehen Yaā Dios cuéchi siquī ñayuu cáyihī ndaha Cristo. Chí tuá cájica i jíin modo neé máá i, chí sa suhva cájica i nájnūhun cuní maá Espíritu yā.

² Chí modo jeē sáha Espíritu cúu jeē técu yō siquī jeē yíhī yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yíhī yó chíji cuéchi jeē jnahnú ndetū yō nuú.

³ Chí ni sáha Yaā Dios jeē quéndō vāha ñayuu jeē tu ní cúu quéndō vāha jíin ley Moisés, siquī jeē tú na fuerza i jíin modo maá i jeē squícu i ley un. Chí ni tají yá Sēhe ya ni quiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vésú tú na cuéchi ya. Te súcuan ni ndonda Yaā Dios

siquī cuéchi jeē ní casáha ñayuu jíin modo neé máá i.

⁴ Súcuan ni cuu návāha cuu squícu yó táca jniñu ndaā jeē ndácu ley, chí tuá jíca yó jíin modo neé máá yó, chí jíca yó nájnūhun cuní maá Espíritu.

⁵ Chí ñayuu jeē cájica jíin modo neé máá, chí máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chí máni ndíhví ni i siquī jniñu cuní maá Espíritu.

⁶ Te jeē ndíhví ni yō siquī modo cuní maá yó sáha jeē jnahnú ndetū yō. Te jeē ndíhví ni yō siquī jniñu cuní maá Espíritu, sa suhva sáha jeē cotecu yō ní cáni te coo ndeyí coo sīñ ni yō.

⁷ Chí ñayuu jeē ndíhví ni siquī modo neé cuní maá i, chí jíto uhū i Yaā Dios, chí tu cuní i cuatáhú i ley Yaā Dios, te ni ma cúu squícu i.

⁸ Jeē yūcuan, ñayuu jíca jíin modo cuní maá, tu cúu sáha i jeē cúsiñ ni Yaā Dios jíin i.

⁹ Te máá ró jijnáhan ró, chí tuá cájica ró jíin modo cuní maá ró, chí cájica ró nájnūhun cuní Espíritu, chí ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihī i ndaha ya.

¹⁰ Te núu ndéé Cristo ini rō, te vésú ñn quiví te cuu yiquí cúñu rō jeē siquí cuéchi, te cotecu anuá rō siquī jeē ní ndahva Yaā Dios cuéchi ró.

¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēñu ndíyí, yūcuán na te máá yá

suní sáha ya jeē natecu yiqui cúñu rō jeē cúū. Te sáha ya súcuan jeē jíin máá Espíritu yā jeē ndeé ini rō.

12 Núu súcuan, hermano jijnáhan rō, ndeé jniñu yó jéē caca ndaā yō, te nasūu jéē sáha yó modo neé cúni máá yó.

13 Chi núu caca rō jíin modo neé máá rō, te jnahnū ndetū rō. Te núu jíin fuerza maá Espíritu snáā rō taca jniñu casáha rō jíin modo neé máá rō, te cotecu rō ní cáni.

14 Chi taca ñayuu jeē cándiquin modo jeē steén Espíritu Yā Dios, máá i cácuu séhe Yā Dios.

15 Chi Espíritu jeē ní canihin rō, tu ní sáha ya rohó jéē cuu rō nájñuhun mozo nuū yā jeē yūhú tucu rō núu yā, chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá maá ná.

16 Te máá Espíritu steén yā ini anuá yō jeē cúu ndije yó séhe Yā Dios.

17 Te núu séhe ya cácuu yó, te suni nihin yō maá táhū jeē ní jéñuhun ya, te ñn cáhnu-ni coo tahū yō jíin Cristo. Chi núu ndóho yó jíin yá vijna, suni cujéñhu yó jíin yá andiví.

18 Núu súcuan te sáha ri cuenta jeē taca jnúndóho jeē ndóho yó vijna, lúli ndasí cúu nuū jnúhun jeē cujéñhu luu yó jíin yá cucuéé gá.

19 Chi ndihi jeē ni jécōo, yōhyo cándetu jeē na sáha Yā Dios jeē nduvāha, quiví quénda ndijin jeē cujéñhu séhe Yā Dios jijnáhan i.

20 Chi taca jéē ni jécōo, chi ni quiví chíji jñuhun jeē tu quéndō vāha. Te nasūu jéē ní castívi máá, chi ñayuu ni casáha cuéchi, te jeē yúcuan ní squéndō Yā Dios súcuan. Te máni cándetu jeē nduvāha.

21 Chi ñn quiví te taca jéē ni jécōo, chi quenda chíji jñuhun jeē tívi jíin jéē tehyú. Te nduluu ndasí nájñuhun coo taca séhe Yā Dios, chi cácuu nuū jnúhun jeē tu quéndō vāha.

22 Chi jíni yō jeē taca jéē ni jécōo, chi nde vijna te nájñuhun inuú-ni cándoho te cájitū ni jeē na nduvāha ndihi.

23 Te nasūu máá-ni taca jéē ni jécōo cúu jeē ndóho, chi suni nde maá yó ndóho yó, vésú je névāha yó Espíritu jeē cúu seña jeē ñn quiví te nihin yō ndihi tahū yō. Chi yōhyo ndóho yó jnúndóho, te ndétu yó jéē náquihin séhe ya yohó te jnama ya yiqui cúñu yō jeē tuá ndoho yó jíin.

24 Chi ni jnama ya yohó síquí jeē ñuhun ni yō jeē súcuan coo. Te núu je ni sáha ya nájñuhun ñuhun ni yō, yūcuán na te tuá ñuhun ni yō jeē sáha ya súcuan jíin yó. Chi tuá ndétu yó te núu je ni cuu súcuan.

25 Te núu ná tu coto yó jéē sáha ya jeē ñuhun ni yō, yūcuán na te jíin paciencia ndétu yó jéē sáha ya.

26 Te suni súcuan máá Espíritu chíndéé ñahán yá yohó jéē tú na fuerza ini yō. Chi tu jíni yō cacán tahú yō nájñuhun cánuú. Te máá Espíritu cahán ndahú yá jíin Yā Dios jehē yō síquí taca jéē

jitú ndasí ni yō te tu níhín yō jnūhun ndese cacān tahu yō.

27 Te máá Yaā Dios jeē jito ndee anuá yō, chí jíní yā tāca jēē cuní maá Espíritu cahān yā jehē yō. Chí ñayuu cáyihí ndaha Yaā Dios, cáhán ndahú Espíritu jehē i nájnūhun cuní Yaā Dios.

Vāha-ni cūndeyí yó síquī ndihí jeneé

28 Te jíní yō jeē tācá-ni jeē quíji nuū ñayuu maní jín Yaā Dios, jeē vāha chí jēē uhú, chí quéndōo vāha ga i nuū yā, sáha ya jín táca jēē yúcuan. Chí cácuu i ñayuu jeē ní cana ya i ní quívicoo i ndaha ya síquī jeē súcuan ni tee ni yā nde jenahán.

29 Chí nde ná tu coo i te je jíní yā i, te je ni jeni ya i jeē ndoo ndaā nduu ánuá i ndacu i máá Sēhe ya, návāha na cúu Sēhe ya ñani jéhnū nuū cuehē ñayuu cácuu ñani cáchandíje.

30 Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē kujéhnū i.

31 ¿Te ndese ga cahān yō síquī jnúhun jéhnū yáha núu súcuan? Chí núu íne Yaā Dios jín yó, ¿te ndé ñn cuu cahān síquī yō? Tú ni ñn.

32 Chí máá yá tu ní jnáma ya Sēhe ya jeē ma cúu yā, chí sa suhva ni jēhe ya Sēhe ya ni jihí yā jehē ndihí yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíní ñúhún yó.

33 ¿Te ndé ñn cuu cahān cuēchi síquī ñayuu jeē ní nacāji

Yaā Dios? Tú ni ñn. Chí máá yá ni ndahva yā cuēchi i.

34 ¿Te ndé ñn cuu ndenehen cuēchi síquī yō núu súcuan? Tú ni ñn. Chí máá Cristo cúu jeē ni jihí yā jehē yō, te suni ni natecu yā. Te vijna te ndéé yá lado váha Yaā Dios nuū kujéhnū ya, te cáhán ndahú yá jín Yaā Dios jehē yō.

35 ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jēē yí sáha, chí jēē cájito xeēn ñayuu yohó, chí jnáma, chí jēē cúmaní sahma, chí jnúhun yúhú, chí jēē cáhni i yóhó naún? Ni ñn táca jēē yáha.

36 Chí súcuan yósó núu tútu ñi jeē cácahān ñayuu cáchandíje jín Yaā Dios:

Jeē síquí maá ní te ndihí-ni hora cácuu i cahni i sañá.

Te casáha i jín ná nájnūhun casáha i jín lanchi, quití cúu.

Achí tutu.

37 Te tuú chí vésú cándoho yó táca jēē yáha, te vāha-ni cūndeyí yó síquī ndihí-ni, sáha máá Yaā jeē ní cundáhú ni yohó.

38 Jeē yúcuan cúcáhnū ni rí jeē tú ni ñn cuu quenehen yóhó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jēē neé jēē cácuujéhnū jñi poder, ni jeē iyó vijna, ni jeē cóo,

39 ni jeē iyó núu súcún, ni jeē iyó núu cúnú, ni tāca gá jeē ní jecōo, ma cúu cuítí quenehen yóhó núu Yaā Dios, jeē

jiín Jítóho yō Cristo Jesús ni cundáhú ni yā yohó.

Siquī ndese ni nacāji ya yucūn Israel

9

¹ Te cáhán ndaā rī chi cúu rī tēe cándije Cristo, te tu stáhú rí, te jíní rī ini anuá rī jeē cáhán ndaā rī sáha Espíritu Santo.

² Yóhyo cúcuíhyá ni rī, te níní jnáhuhū ni anuá rī

³ jeē siquí tāca jnáhan ri ñayuu nación hebreo, chi ñn-ni yucūn rī jijnáhan ri. Chi jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuán te cuu cācu ánuá máá i núu.

⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya tēcá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū maá i ni jejnūhun ya cuehē jnūhun.

⁵ Te máá i cácuu yucūn tāca jíí yō jeē ní cacujéhu, te suni yucūn máá i ni cacu Cristo jeē ní nduu ya tēe. Te máá yá cúu Yaā Dios jeē jnñi ndihí-ni, te ní cáni cáhán ñayuu jeē kujéhu ya. Amén.

⁶ Te nasūu jēē tu ní quée ndaā tāca jnúhun jeē ni jéjnūhun Yaā Dios nuū ñayuu Israel. Chi ni quee ndaā nahín núu vēsú jecu-ni i, chí tú ndihí-ni yucūn Israel cúu jeē cácañdije.

⁷ Chi nasūu ndihí yucūn Abraham cácuu ndije sēhe de jeē ni jéjnūhun ya. Chi ni cáhán Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō.

⁸ Te jnūhun yáha cúní cáhán jeē ni ñn ñayuu tu cúu i sēhe Yaā Dios siquí jeē ní cacu i ñn yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta.

⁹ Chi yáha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ñn sēhe yí ñasihí ró Sara, achí yá.

¹⁰ Te nasūu máá yáha-ni, chí suni Rebeca ni cacu uū sēhe yí ña, te ñn-ni tátá ndíndúu i, jeē ní cuu jíí yō Isaac.

¹¹⁻¹³ Te nde ná tu cacu ndíndúu i, te ná tu sáha i jeē váha jeē uhú, te je ni cáhán yā jíin Rebeca: Sūchi ní cacu xíhna gā cuajníñu i nuū sūchi sándihí, achí yá. Chi suni súcuán cáhán tutu i: Ni jito maní rī Jacob, te Esaú chí tuú, achí Yaā Dios. Te súcuán jíiní yō jeē máá Yaā Dios cuu nacāji ya ñayuu núu ndese tēe ni maá yá, te nasūu síquí jniñu jeē sáha i, chí sa suhva siquí ndese cúní máá yá nacāji ya i.

¹⁴ ¿Ndesé cáhán yō núu súcuán? ¿A jēē tu íyó ndaā Yaā Dios jeē sáha ya súcuán, chí naún? Tú cuíti.

¹⁵ Chi nde jenahán ní cáhán yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu

jeē cuní rī sáha ri jeē váha jíin, te sáha ri jíin, áchí yá.

16 Núu súcuan te nasūu síquī jeē cuní maá ñáyuu, ni nasūu jēē nducú ndéyí máá i cúu, chí síquī ndese cuní maá yá cundáhú ni yā i.

17 Chi suni súcuan yósó núu tútu i jeē ni cáhān yā jíin rey ñuu Egipto: Ni jeni ri rohó jēē cúu ró rey, návāha jíin rōhó te stéén rī poder rī, te návāha cuitē núu síhví rí ní ñáyíví, áchí yá.

18 Núu súcuan te núu ndé ñn cuní yā cundáhú ni yā, te cundáhú ni yā. Te núu ndé ñn cuní yā jeē cunīhni ni, te sáha ya jeē cunīhni ni.

19 Te sanaa te cahān ñn ró jíin rí: Núu súcuan cúu ¿te najehē cahán gā yā jeē cuēchi sáha yó? Chí ma cúu casi yō nuū yā jeē ndese cuní maá yá sáha ya. Achí rō.

20 Te sa suhva cáhān rī jíin ró: Rōhó, ¿ndé ñn cúu ró jēē jéni ni rō stió cuíñí rō nuū Yaā Dios? ¿A cuu cahān quísi ñuhun jíin téé ni sáha: Najehē ni sáha ró rúhū súcuan? achí.

21 Chi tēe sáha quísi, cuu sáha de ndese cuní maá de, chí ñn-ni ñuhun cuu sáha de ñn quísi fino te inga quísi coriente.

22 ¿Te á tu jétáhú ró jeē suni súcuan sáha Yaā Dios jíin ñáyuu? Chí cuní yā steén yā ndese sáha ya juicio síquī ñáyuu, te súcuan te cuní i poder yā. Te vésú súcuan te ni íyo paciencia ni yā jeē tu ní ndónda yachí yā síquī ñáyuu jeē jnahnú ndetū.

23 Te sáha ya súcuan návāha stéén yā ndese yōhyo luu cújéhnu ya síquī jniñu sáha ya jíin yóhó ñáyuu cundáhú ni yā. Chi nde jenahán je ni sátūhva ya yohó jēē luu cújéhnu yó jíin yá.

24 Chi ni cana ya yohó jēē candíje yó, te sava yó cúu ñáyuu hebreo te sava yó cúu ñáyuu tāca gá nación.

25 Chi suni súcuan ni cahān yā, yósó núu tútu Oseas:

Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñáyuu jeē tu ní íyo maní rī jíin, vijna te cahān rī jeē cácuu i ñáyuu jeē maní rī jíin.

26 Te máá lugar nuū ni cáhān rī jeē násūu ñáyuu rī cácuu i, suu yūcuan cáhān ñáyuu jeē cácuu i sēhe Yaā Dios, Yaā técu ní cáni.

Achí yá.

27 Te Isaías sa suhva ni cahān de jnūhun ñáyuu Israel: Vésú ni cayā yucūn Israel nájnūhun ñíí yumar, te jecu-ni i jnama ya.

28 Chi Jitoho yō Yaā Dios, yachí sínu ya jniñu jeē sándaā yā cuēchi ñáyuu ñáyíví. Achí tutu.

29 Chí nájnūhun ni cahān tucu Isaías:

Máá Yáa cúu Jitoho nuū tācá ndajéhé andiví, núu tu ní jnáma ya jecu yucūn yō nuú,

te je ni ndoho yó nájnūhun ñáyuu ñuu Sodoma jíin ñuu Gomorra, jeē ní naa ndíhi.

Achí tutu.

Jeē tu cájetáhú ñayuu hebreo jnūhun jnama ya i

³⁰ ¿Ndese cahān yō núu súcuan? Suu jeē ñayuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jhī Cristo jehē i cúu jeē ní ndahva yā cuēchi i.

³¹ Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i.

³² ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jhī Cristo jehē i, chi sa jéni ni i jeē squícu máá i ley te quendōo ndaā i. Te jeē stívi i súcuan cúu nájñūhun cácotúú i siquī maá yūu jeē cácachihí jehē, te suu cúu Cristo.

³³ Chi súcuan cáhán nuū tútu i:

Nde ñuu rī Sion sáha ri jeē cóne maá Yaā jeē cúu nájñūhun yuū jeē cácachihí i jehē i.

Te cúu ya nájñūhun toto jeē cotúú i sáha.

Te sa suhva ñayuu cáccandíje Yaā ún, chi jnama nahín yá i.

Achí Yaā Dios.

10

¹ Hermano jijnáhan ró, cúu ndasí ni rī te jícán tahu rī nuū Yaā Dios jehē ñayuu nación rī Israel, jeē na jnáma ya i jijnáhan i.

² Chi cáhán rī jeē vāha casáha i jeē ndihví ni i cáchiñúhún i Yaā Dios. Te vēsú súcuan te cáchiñúhún cáhá i.

³ Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i.

⁴ Chi siquī jeē ni sáha Cristo te cuu quenda ñayuu chīji ley Moisés. Te ndáhva Yaā Dios cuēchi tāca ñayuu jeē candíje i jeē ni sáha Cristo jehē i.

⁵ Chi súcuan ni tee Moisés jnūhun ñayuu jeē cánducú quendōo ndaā jín ley: Núu ññ ñayuu cuu squícu i tācá jniñu ndácu ley, te cotecu i núu, áchí.

⁶ Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró.

⁷ Ni ma cáni ni rō jeē jíni ñúhún cuun ró ndé nuū cúnú ndonehen ró Cristo mēhñu ndíyi, nájñūhun jeē tu ní nátecu yā.

⁸ ¿Te ndese cáhán jnūhun un núu súcuan? Yajni iyó jnúhun ya jín ró, chi ñúhun ini yuhu ró jín ini anuá rō, achí tutu. Te suu cúu jnūhun jeē na cándíje yó jéē jnáma ya yohó. Te jnūhun yáha cúu jeē cánacani rí.

⁹ Chi núu cahān rō jeē Jítoho rō cúu Jesús, te núu candíje ró jín ini jín ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó.

¹⁰ Chi jín ini jín ánuá yō cándíje yó jéē ni jhī yā jehē yō, te súcuan te ndáhva Yaā Dios cuēchi yó. Te jeē cáhán yō

jeē Jítóho yō cúu Jesucristo, te súcuan te jnama ya yohó.

11 Chi cáhán tutu iī: Tāca ñáyuu jeē candíje i ya, chi jnama nahín ya i, áchí.

12 Chi inuú-ni cúu ñáyuu hebreo jíin táca gá ñáyuu, chi máá yá cúu Jítóho nuū ndihi yó, te cuehē jeē váha sáha ya jíin ñáyuu cácahān ndahú jíin yá.

13 Chi súcuan cáhán jnūhun ya: Ndihi ñáyuu cácahān ndahú jíin máá Jítóho yō, chi jnama ya i, áchí.

14 ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñáyuu nacani jnūhun nuū i?

15 ¿Te ndese nacani ñáyuu jnūhun ya te núu jeē tu tájí yá i quihīn i? Chi nájnūhun cáhán tutu iī: Yōhyo luu jniñu cásáha ñáyuu cájica jíin jnúhun ndeyí sī ni jeē cánacani i jnūhun váha ya, achí.

16 Te nasūú ndihi i jétáhú nuū jnúhun jnama ya i. Chi ni cahān Isaías nde jenahán: Tátā Yaā Dios, ¿ndé ñáyuu ni candíje jnūhun jeē cánacani ná víi? áchí de.

17 Núu súcuan te núu cuni nahín ñáyuu te cuu candíje i. Te jnūhun cuni nahín i cúu jnūhun Cristo.

18 Te cájnūhun rí: ¿A tu ní cájini sōho i jnūhun un núu súcuan? Tuú chi ni cajini sōho i, chi cáhán tutu iī:

Ní ñáyiví ní cajini sōho ñáyuu jnūhun jeē ní canacani de.

Te nde nuū jicá gá tāca lado ni jinū jnūhun ún.

Achí tutu.

19 Te suni cájnūhun rí: ¿A tu ní cájecūhun ni ñáyuu Israel jnūhun ún? Tuú chi ni cájecūhun ni i, te tu ní cájetáhú i. Chi xīhna gā Moisés ni cachi de jeē ni cáhān Yaā Dios:

Cucuñí ró jijnáhan ró, chi cuáha ri jnūhun ri nuū inga ñáyuu jeē násūú ñn nación cúu.

Te quití ni rō coto ró jéē cuáha ri jnūhun ri nuū ñn nación jeē tu jécūhun ni.

20 Te suni Isaías ni chundeyí ni de ni cachi cájí de jeē ni cáhān Yaā Dios:

Ñáyuu jeē tu ní cánanducú rúhū, ni cajini i ruhū.

Te nuū ñáyuu jeē tu ní cácajnūhún, ni steén rī nuū i ndese Yaā cúu ri.

21 Te siquī ñáyuu Israel sa ni cahān de jeē ni cáhān yā: Ndiquiví ni cana ri i jeē quívicoo i nuū rī, te tu ní cáccuni i, chi ñáyuu níhni ni, ñáyuu jéē ni cáccu i. Achí yá, achí Isaías.

Jeē iyó jecu na ñáyuu Israel jeē jnáma ya

11

1 Núu súcuan te cájnūhun rí: ¿A ní stóo Yaā Dios ñáyuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán.

2 Tu ní stóo Yaā Dios ñáyuu maá yá, chi je ni nacāji ya i nde jenahán. ¿A tu cájini rō ndese cáhán tutu iī jnūhun

Elías, tēe ni nacani jnūhun ya jenahán? Chi náa jícán tahu de, te ni cahān de siquī ñayuu Israel:

³ Tātā Yaā Dios, ni cajehni i tāca tēe cānacani jnūhun ní, te ni cajenu i tācá altar ní. Te máñúhún na sãña ní quendōo, te vijna suni cācuni i cahni i sãña, áchí de.

⁴ Te Yaā Dios ni nastió cuñí yā: Iyó nahín úxā mil ñayuu cācandíje ruhū jeē tu ní cājecuiñí yití i nuū ídolo naní Baal, achí yá.

⁵ Te suni súcuan vijna, chi iyó jecu na ñayuu jeē ní nacāji ya siquī jeē váha ni yā jíin i.

⁶ Te núu ni nacāji ya i siquī jeē váha ni yā jíin i, te nasūu síquī jeē ni sáha i jniñu váha cúu. Chi núu síquī jeē ni sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñayuu Israel tu ní cūndeyí i quendōo ndaā i nájñūhun ní canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunihni ni i,

⁸ nájñūhun cáhán tutu íi: Ni sáha Yaā Dios jeē tu jécūhun cuiñi ni i siquī yā, ni tu jíin i jíin tñnūú i, ni tu jíin nahín i jnūhun ya, te súcuan cúu nde vijna. Achí tutu.

⁹ Te suni ni cahān David: Vico jeē casáha i, na cóo nájñūhun ñn trampa chí ñn xeyú,

návāha nihín i castigo xeēn siquī jeē castíví i casáha i cuēchi.

¹⁰ Te ánuá i na ndúnee, nájñūhun jeē tuá cúu

coto i,
te na jécosthí jnūndóho siquī i ní cání.

Achí tutu.

Siquī jeē jnámaya ñayuu tāca gá nación

¹¹ Núu súcuan te cājñūhun rí: ¿A tuá cúu cuiñi ndívi ñayuu Israel nuū Yaā Dios jeē súcuan ni castíví i? Tú cuiñi. Chi sa suhva jeē ní cacunihni ni i, te sa ñayuu tāca gá nación ni canihín tahu máá i jnūhun jeē jnáma ya i. Te yūcuan sáha tucu jeē ñayuu Israel condihví ni i jeē suni candíje máá i.

¹² Chi jeē ní castíví i, te sa ñayuu ní cáhnu ñayívi ní canihín maá i jnūhun ya. Te jeē ní cajica yátá i, suu ni sáha jeē ní canihín ñayuu tācá nación jnūhun ya. Núu súcuan te quiví jeē ndívicoo tucu ndíhi ñayuu Israel ndaha ya, te ñayuu ñayívi víhyá gá quendōo ndetú i sáha ún.

¹³ Te vijna te cáhán rí jíin róhó ñayuu tācá nación jeē tu ní jíin jnūhun ya. Chi ni tají Yaā Dios ruhū jeē scáca rí jnūhun nuū rohó ñayuu tācá nación. Te ndúcú rí jeē na cuájñúhún ró jijnáhan ró jniñu sáha rí jeē nácani rí jnūhun ya.

¹⁴ Chi cúní rí jeē jíin yúcuán te nacani ni sava jnáhan rí ñayuu Israel jeē suni candíje máá i, te jnama ya i.

¹⁵ Chi jeē ni stóo ya ñayuu Israel, jeē yúcuán cúu jeē sa ñayuu ñayívi ní sáha ya jeē ndívicoo i nuū jnūhun maní yā jíin i. Núu súcuan te quiví naquihin tucu ya ñayuu Israel, quiví ún suni váha ndasí

sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndīyi.

16 Te ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndihí un cúu cuenta yā. Te ñin yujnu, núu yíhi jeē cuenta yā cúu, te suu cúu nde yoho jíin ndé ndihí ndaha. Te suni súcuan ñayuu Israel, yíhi cuenta i nuū yā, siquī jeē jíi i xīhna ñúhún, ni quívicoo de ndaha ya.

17 Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te rōhó ñáyuu tēcá nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástaa ró ndúxi jíin cajin jeē véji nde yoho yújnu ún.

18 Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násūú jéē yoho stáa cajin nuū maá ró, chi sa máá ró stáa cajin jeē véji nde yoho.

19 Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō.

20 Ndaā, te ni quendē i siquī jeē tu ní cácandíje i Cristo. Te rōhó chi máni siquī jeē cácandíje ró, jeē yúcuan cúu jeē ni quívicoo ró lugar i. Te ma sándúxi ró maá ró núu súcuan,

chi sa suhva conso íyo ró núu Yaā Dios.

21 Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró,

22 Núu súcuan te sáha váha ro cuenta ndese váha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívi ún, te sa cúndáhú ni yā rohó. Te cánuú cuiñi nihin ro jíin jnūhun jeē váha ni yā jíin ró. Chi núu tuú, te suni quende yā rohó.

23 Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i.

24 Núu súcuan te rōhó ñáyuu tēcá nación jeē tu ní jíin jnūhun ya, ni quendē rō xinī yújnu olivo yucú, te ni nachuhun ya rohó xinī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

Íin quívī te jnama ya ndihí ñayuu nación Israel

25 Hermano, cúni rī jeē na jécūhun ni rō jijnáhan ró ndese íyó jnūhun yáha jéē ní yisāhí, návāha ma cutéyí ró cani ni rō jeē ndichí xinī maá ró: Chi sava ñayuu Israel ni ndunihni ni i, te súcuan coo máá-ni nde quívī jínu candíje ñayuu tēcá nación jeē tu jíin jnūhun ya.

26 Te sáa te jnama ya ndihí ñayuu nación Israel, chi cáhán tutu ii:

Ichi ñuu rī Sión quiji Yaā jnáma ñayuu, te sáha ya jeē tuá coo cuēchi nuū tāca yúcūn Jacob.

27 Te yāha cúu contrato jeē sándaā rī jín i, quivī jeē quénde ri cuēchi i jínáhan i, áchí Yaā Dios. Achí tutu.

28 Chi ñayuu hebreo un ní nduu i nájnūhun enemigo Yaā Dios siquī jeē tu ní cá candíje i jnūhun jnáma ya i. Te jeē yúcuan te cuu cuitē núu jnūhun un núu tāca rōhó. Te vēsú súcuan te siquī jeē ní nacāji ya tāca jíi i jenahán, te cundáhú gá ni yā i jeē ma stóo ya i ní cáni.

29 Chi tu nácani yátá ni yā jeē cána ya ñayuu jín jéē jēhe ya tahū i.

30 Te rōhó jínáhan ró, suni ni cahīyo nihni ni rō nuū Yaā Dios nde saá. Te vijna jeē ní cacunīhni ni maá ñayuu hebreo, te cundáhú ni yā rohó.

31 Te suni súcuan máá i, chi vēsú cáacunīhni ni i vijna, te cundáhú tucu ni yā i, nájnūhun cundáhú ni yā maá ró jínáhan ró.

32 Chi Yaā Dios ni sáha ya jeē ní quendōo ndivii ñayuu chíji jnūhun cúnīhni ni i, návāha suni cuu cundáhú ni yā ndivii i.

33 Núu súcuan te náhán náá ni yō jeē yóhoyo cuehē jnūhun ndíchí iyó jíin Yaā Dios, te ndihí cuiti jiní yā. Te ni ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá.

34 Chi cáhan tutu i: ¿Ndé ñin ni jecūhun ni ndese jéni ni maá Jítoho yō? ¿Chí ndé ñin ni steén nuū yā?

35 ¿Ndé ñin ni jēhe xīhna gā nuū maá yá, návāha nachu-naa yā nuū i?

36 Chi nde nuū maá yá vēji tāca jéē iyó, te máá yá ni sáha ndihí, te jeē cúu máá yá cúu. Te na cáhan yō jeē yóhoyo luu cújēhnu Yaā Dios ní cáni. Amén.

Jeē na cóo ndoo ánuá yō cuajniñu yó núu Yaā Dios

12

1 Núu súcuan te cáhan ndahú rí jíin ró jínáhan ró, hermano, jeē siquī jeē cundáhú ni Yaā Dios yohó. Na sócá ró maá ró núu yā, coo ndoo coo i rō cuajniñu ró núu yā, nájnūhun cúsi ni yā. Chi yāha cúu jeē chíñuhún ró yā nde jíin ini jíin ánuá rō.

2 Te ma cáca ró jíin táca modo casáha ñayuu ñayiví yáha, chí sa na sáma ró modo caní ni rō, te ndujeé jéē níjnūní rō. Te súcuan te cuu nacāji ró ndé-ni cúu jeē váha jeē nújnahan ni Yaā Dios, jeē cúsi ni yā, jíin jéē íje ni rō jíin jnūhun ya.

3 Te siquī jeē váha ni yā ni jēhe ya jniñu nácani ri jnūhun ya, jeē yúcuan cáhan rī jíin ndihí ró jéē ma cáni ni rō jeē váha ga ñayuu cúu ró núu cūhva jeē iyó ró. Chí ná ñin ná ñin ró na cáni ndaā ni rō siquī maá ró, te ma scáa ga rō caní ni rō jeē váha ga ñayuu cúu ró

vēsú nuū cūhva jeē ni jēhe Yaā Dios fuerza ini rō cándije rō.

4 Chi cácuu yó nájñuhun ñin yiqui cúñu jeē iyó cuéhē parte, te sñn sñn jéjñiñu ñin ñin.

5 Chi vēsú iyó cuéhē yō, te nájñuhun ñin-ni yiqui cúñu cúu yó jéē yíhi yó ndaha Cristo, chi ñin-ni ni nduu yó jijnáhan yó.

6 Te sñn sñn tahū ni jēhe Yaā Dios nuū yō jeē cuajniñu yó núu yā, núu ndese ni nujnahān ni yā ni jēhe ya nuū ñin ñin yó. Núu súcuan te na cuájñiñu vāha yó jijn táhū ún. Núu ni nihñn yō tahū jeē nácani yó jñuhun ya, te cánuú sáha yó ndé maá cūhva ni jēhe ya cándije yó.

7 Te núu ni nihñn yō tahū jeē chindéé ñáhán yó jñáhan yó, te na sáha yúcún yó. Te núu ni nihñn yō tahū jeē steén yō, te na cóndihvī ni yō steén yō.

8 Te ñayuu jeē stihvī ni inga ñayuu, suni na sáha yúcún i. Te ñayuu jēhe nuū jñáhan, na cuáha i súcuan-ni. Te ñayuu ndíso jñiñu, na ndácu vāha i jñiñu. Te ñayuu jito ndáhú ñayuu ndahú, na cúsñ ni i sáha i.

Ndese cánuú squícu ñayuu cándije

9 Te na cundáhú ndije ni rō jñáhan rō, nasūu máá jéē cahán-ni rō. Te coto uhū rō jñiñu néé, te condiquñ rō jñiñu vāha.

10 Te cánuú coo manī rō jijn jñáhan rō nájñuhun jéē manī rō jijn ñani rō. Te nducú rō jeē

quéndōo yíñuhún gá jñáhan rō vēsú maá rō.

11 Te ma cucúxi rō jijn jñiñu cásáha rō. Chi jijn ini jijn ánuá rō condihvī ni rō cuajniñu rō núu maá Jítoho yō.

12 Te na cúsñ ni rō jeē cáñuhun ni rō tāca jéē váha jeē cóo. Te na cuándeyí ni rō núu ndóho rō jñúndóho. Te níní na cacán tahú rō.

13 Te coto ndáhú rō ñayuu cándije núu cúmanī nuū i. Te cuáha núu rō vehe nuū ñayuu cájica.

14 Te cacān tahú rō jehē ñayuu cájito xeēn rohó. Ma cahán ndevāha ro síquē i, chi sa cacān tahú rō jehē i.

15 Te núu cúsñ ni ñayuu, te suni na cúsñ ni rō jijn i. Te núu cúcuíhyá ni ñayuu, te suni na cúcuíhyá ni rō jijn i.

16 Na cóo ñnuú ni rō jijn táca jñáhan rō. Te ma cundúxi rō, chi sa quijnáhan rō jijn ñayuu núu ga. Ma cáni ni rō jeē ndichí xínī rō.

17 Te ma nasáha ndevāha rō jijn ni ñin ñayuu, núu ni sáha ndevāha i jijn rō. Na cóndihvī ni rō sáha rō jñiñu vāha, jito jínúu tāca ñayuu.

18 Te na cóndihvī ni rō coyūcu manī rō jijn táca ñayuu, vēsú ndese cándāa máá i.

19 Nánī manī jijnáhan rō, ma nácuāha rō jéē ndútahū ñayuu casáha ndevāha jijn rō, chi sa cuáha rō jñuhun jeē maá Yaā Dios cuāha ya castigo i. Chi cahán tutu ñi: Máá rí cuāha castigo i, máá rí nacuāha yāhu i, áchí Jítoho yō.

20 Te suni cahán tutu: Tēe jito uhū rohó, núu jii de sōco, te cuāha rō jéē cáji de. Te núu

jíchí de, te cuāha ró jēē cóho de. Chi núu sáha ró súcuan, te cucanu de te nacani uhū ni de jeē ni jito uhū de róhó.

²¹ Ma cuāha ró jnúhun jeē cúndeyí jniñu neé jíin ró, chi sa jniñu váha na sáha ró návāha ndahvā jniñu neé.

13

¹ Tāca ñáyuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu siquī de.

² Te ñayuu jeē tu jétáhú núu tēe cándiso jniñu, núu súcuan te cúniñni ni i nuū jeē ní jeni Yaā Dios. Te ñayuu jeē cúniñni ni, chi cuēchi sáha i, te niñin i castigo.

³ Chi tāca tēe ndíso jniñu, nasūu jēē ndíso jniñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu neé. Te núu cúni ró jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de róhó.

⁴ Chi jéjniñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu neé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjniñu Yaā Dios de, návāha cuāha de castigo ñayuu casáha jniñu neé.

⁵ Jeē yúcuan cánuú jēē cuatáhú ró núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō.

⁶ Te jeē yúcuan cúu jeē suni cájēhe ró xúhun núu tēe cándiso jniñu cuu jniñu ñuu. Chi jéjniñu Yaā Dios de, te máni jniñu yúcuan casáha de.

⁷ Te chunaa rō ndihí jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñuhún ró nuū ñáyuu cánuú coo yíñuhún ró.

⁸ Ma cótaū rō nuū ní ñn. Te íyó ñn jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihí jeē ndácu ley yā.

⁹ Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndíyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin tāca gá jniñu ndácu ley, ndihí-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu.

¹⁰ Te núu cúndáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

¹¹ Súcuan sáha ró jíjnáhan ró, chi sáha ró cuenta jeē cuácuyajni quiví ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quiví jnáma ya yohó vésú quiví ní candíje yó jnúhun ya.

12 Chi nájñuhun je yajni yāha jecuāā, te cuacundijin quivī jnáma ya yohó. Nú súcuan te na stóo yó jniñu jeē ni sāha yó núū néē, te na cúcutú yó jín táca jniñu ndaā jeē caca yó jín luz yā.

13 Na cáca yíñúhún yó nájñuhun cánuú caca yó jín luz yā. Ma nájñi ró, ma sāha ró táca vico néé, ma cáca jnéni ró, ma sāha ró jniñu néé, ma cuajnáhan ró, ma cucuésún ni rō.

14 Chi sa suhva cuiñi cutú ró jín fuerza maá Jítoho yō Jesucristo, jeē ma cuáha ga rō jñuhun sāha ró jniñu cúní modo neé maá ró.

Ma cahán neé yó coto yó jnáhan yó

14

1 Cuatáhú ró ñayuu jeē ná tu ije jín jñuhun ya, te ma tejnáhan ró jín i siquī táca jñuhun jeē sán jéni ni i jín maá ró.

2 Chi íyó ñayuu jeē jéni ni i jeē cúcaji i ndinuū-ni. Te íyó ñayuu jeē ná tu ije jín jñuhun ya, te cájeni ni i jeē tú vāha caji i cūñu, chi jeē ní casocō ñayuu nuū ídolo cúu.

3 Te rōhó téee jeē yéji ndinuū-ni, ma cahán rō coto ró téee jeē tu yéji ndinuū. Te rōhó téee jeē tu yéji ndinuū, ma cahán rō coto ró téee jeē yéji ndinuū. Chi Yaā Dios ni jetáhú yá téee ún.

4 Te rōhó, ¿ndé ññ cúu ró jéee cahán neé ró jito ró mozo Yaā Dios? Chi núu vāha chí neé sāha de, te maá yá cúu jeē sándaā jín de, nasūu maá ró.

Te tuú chi cuiñi vāha de, chi mozo maá Jítoho yō cúu de, te cuu sāha ya jeē ma stívi de.

5 Te suni íyó ñayuu jeē jéni ni jeē íí gā ññ quivī vésú inga quivī. Te inga ñayuu chi jéni ni i jeē ñnuú-ni cúu táca quivī. Te táca i na cúndaā vāha ni maá i siquī jeē jéni ni i.

6 Chi téee jeē neé íí quivī, chíñúhún de maá Jítoho yō jeē sāha de súcuan. Te téee jeē tu neé íí quivī, suni chíñúhún de Jítoho yō jeē sāha de súcuan. Te téee jeē yéji ndinuū-ni, chíñúhún de maá Jítoho yō jeē sāha de súcuan, chi nácuatáhú de nuū Yaā Dios. Te téee jeē tu yéji ndinuū, suni chíñúhún de Jítoho yō jeē sāha de súcuan, te suni nácuatáhú de nuū yā.

7 Chi ni ññ yó tu técu yō jeē vāha maá-ni yó, te ni ññ yó tu jíhí yō jeē cúní maá yó.

8 Chi núu técu yō, te técu yō jeē cuajníñu yó núu maá Jítoho yō. Te núu cuu yō, te suni cuu yō siquī jeē cúní maá Jítoho yō. Núu súcuan te núu jeē cótecu yō chí jéee cuu yō, te yíhi yó ndaha Jítoho yō.

9 Chi ni jíhí Cristo te ni natecu yā, návāha cuu ya Jítoho nuū ñayuu ni jíhí jín ñayuu técu.

10 Te rōhó, ¿naun jéni neé ni rō jito ró jnáhan ró núu súcuan? ¿Te naun cújéee ni rō jito ró de? Chi táca yó cuiñi yó yuhu mesa Cristo jeē sándaā yā jniñu yó.

11 Chi suhva yósó núu tútu ññ:

Jendaá ndije chi nuū maá rí cuiñi yítí táca ñayuu,

te ndihi i cahān jeē maá rí
cúu Yaā Dios, áchí máá
Jítóho yō.

12 Núu súcuan te ná ñn ná
ñn yó nacuāha yó cuenta
nuū Yaā Dios ndese jniñu ni
casáha yó.

*Ma sáha yó jéē quívi jnáhan
yó cuēchi*

13 Te jeē yúcuan ma cahán
neé gá yō coto yó jnáhan yó.
Chi sa tee ni rō jeē ma sáha
ró ni ñn jniñu jeē sáha jeē stívi
jnáhan ró te quívi i cuēchi.

14 Te jíní rī jeē ni ñn jeē ni
sáha Yaā Dios, tu stívi ánuá yō.
Chi súcuan ni cucáhnu vāha ni
rī síquī jeē cándíje rí Jítóho yō
Jesús. Te núu ñn ñayuu jéni ni i
jeē iyó jéē stívi ánuá i, yūcuán
na te súcuan sáha un jín máá
i.

15 Te núu jnáhan ró tu
cúvāha ni de jeē yéji rō cūñu
ni casocō ñayuu nuū ídolo, chi
jéni ni de jeē stívi un ánuá rō,
núu súcuan te tu cúndáhú ni rō
de jeē sáha ró súcuan. Coto má
snáā rō anuá jnáhan ró síquī
jeē yéji rō ñn jeē jéni ni de jeē
cuēchi cúu. Chi suni jehē maá
de ni jihī Cristo.

16 Ma sáha ró jniñu jeē
cahán i síquī, vēsú jíní maá
ró jeē iyó váha.

17 Chi jeē ndácu Yaā Dios
jniñu nuū yō, nasūu síquī
ndese caji yō coho yó cúu, chi
sa suhva síquī jeē na sáha yó
jniñu ndaā, te coyūcu mání yō
jín jnáhan yó, te cusī ni yō
sáha Espíritu Santo.

18 Te ñayuu jeē súcuan
jéjniñu nuū Cristo, chi cusī
ni Yaā Dios jín i, te suni
cájejnúhún ñayuu i.

19 Núu súcuan te na cóndihvī
ni yō coyūcu mání yō, návāha
jín yúcuan chindéē ñájnañan
yó ije yó jín jnúhun ya.

20 Te ma cuáha ró jnúhun
jeē ndeyu yéji rō snáā jniñu ni
sáha Yaā Dios jín jnáhan ró.
Chi iyó ndoo ndije ndihi jeē
yéji yō, te vēsú súcuan te tú
vāha jeē yéji rō ndeyu jeē sáha
jín jnáhan ró jéē caji de jeē
jéni ni de jeē cuēchi cúu.

21 Vāha ga ma cáji rō cūñu,
ni ma cóho ró vino, te ni
ñn ma sáha ró jéē stívi ánuá
jnáhan ró, te quívi de cuēchi,
te caca yátá de nuū jnúhun
cándíje de.

22 Te núu cándíje ró jéē tú na
vé sáha jeē yéji rō, te súcuan
na cándíje máá-ni ró núu Yaā
Dios. Te nacā ndetū tēe jeē
tu sáha jín ánuá de jeē cuēchi
cúu núu caji de coho de.

23 Te tēe yéji ñn jeē jéni ni
de sanaa te stívi ánuá de, núu
súcuan te sáha de cuēchi, chi tu
cándíje de jeē iyó váha jeē yéji
de. Chi tāca jéē sáha yó, núu
tu cándíje yó jéē iyó váha, te
cuēchi cúu.

*Jeē na sáha yó jéē cusī ni
jnáhan yó*

15

1 Te yóhó jéē ni ije yó jín
jnúhun ya, cánuú condito yó
ñayuu jeē ná tu ije jín jnúhun
ya, návāha cándíje vāha i. Te
ma sáha yó jéē maá-ni yó cusī
ni.

2 Chi ná ñn ná ñn yó na
sáha yó jéē cusī ni jnáhan yó,
návāha quendōo vāha i te ije i
jín jnúhun cándíje i.

³ Chi ni Cristo, tu ní sáha ya jeē cúsiī ni maá yá, chi sa suhva jeē cúsiī ni Tatá yā. Chi suhva cáhán tutu iī: Tāca jnúhun ndevāha jeē cácahān ndevāha ñayuu siquī ní, ni ndīvi siquī maá ná, áchí Cristo jín Tatá yā.

⁴ Chi tāca jnúhun jeē ni jecosō nuū tútu iī nde jehán, chi ni jecosō návāha stéén nuū yō, te nihín yō jnúhun jeē sáha jeē cuandeyí ni yō te ndusiī ni yō. Te súcuan te cocuhun ni yō tāca jéē váha jeē cóo.

⁵ Te máá Yaā Dios jeē jéhe jnúhun cuandeyí ni jín jnúhun ndúsī ni, na sáha ya jeē cóo inuú ni rō, nájnūhun cúní Cristo Jesús.

⁶ Te súcuan te in-ni coo ró te inuú-ni cuu cahān rō jeē yóhoyo váha Yaā cúu Yaā Dios, Tatá Jitoho yō Jesucristo.

Jeē ni jítē jnúhun váha ya nuū ñayuu tācá nación

⁷ Núu súcuan te cuatáhú ró tāca jnáhan ró, nájnūhun ni jetáhú Cristo yohó, návāha cuni ñayuu jeē luu cújéhu Yaā Dios.

⁸ Chi cáhán rī jeē ní quiiji Cristo Jesús, ni sáha ya tāca jniñu jeē quéndōo váha ñayuu hebreo, návāha cundaā tāca jnúhun jeē ni jéjnūhun Yaā Dios nuū tāca jí i. Te súcuan ni steén Cristo jeē squícu Yaā Dios tāca jéē ni jéjnūhun ya.

⁹ Te suni ni quiiji ya návāha ñayuu tācá nación jeē tu jíní jnúhun ya, cahān i jeē yóhoyo váha ni Yaā Dios jeē cundáhú ni yā i. Chi suhva cáhán tutu iī:

Núu súcuan te cahān na jéē yóhoyo váha ni ní, cuni ñayuu tācá nación, te cata ná yaa jeē chiñúhún ná nihín.

¹⁰ Te cáhán tucu tutu iī: Róhó ñayuu tācá nación, inuú na cúsiī ni rō jín ñayuu maá yá.

¹¹ Te cáhán tucu: Róhó ñayuu tācá nación, na cáhán rō jeē yóhoyo váha ni Jitoho yō Yaā Dios, te róhó ñayuu tācá-ni ñuu, suni na cáhán rō jeē yóhoyo cújéhu ya.

¹² Te suni ni tee Isaías jnúhun yáha:

Nuū yúcūn Isaí quiiji in jeē cújéhu,

te ndacu ya jniñu nuū ñayuu tācá nación.

Te ñayuu ún chi cocuhun ni i tāca jéē sáha ya.

Achí tutu.

¹³ Te máá Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo sī ndasí ni rō jín jéē cóo ndeyí ni rō siquī jeē cácañíje nihín ró yá. Te súcuan te cocuhun teyí gá ni rō tāca jéē váha jeē coo, sáha poder maá Espíritu Santo.

¹⁴ Nání mání, cúcáhu ni rī jeē váha ndasí cándihvī ni rō jín jniñu váha, te váha ndasí cájecūhun ni rō, te cúu stíhví jnáhan ni rō.

¹⁵ Te ni jeni ni rī jeē tee ri carta yáha cáhán cají rí jín ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha rí siquī jeē váha ni Yaā Dios te ni jéhe ya jniñu nuū rī

16 Jeē jejniñu ri nuū Jesu-
cristo, jeē nácani ri jñuhun
nuū ñáyuu tácá nación jeē tu
jíní jñuhun ya. Te nácani ri
jñuhun vāha Yaā Dios nuū i
jeē jnáma ya i. Súcuan sáha ri
návāha ñayuu tácá nación, cuu
squívi ri i ndaha ya jeē cúu i
nájñuhun in jeē socó rī nuū yā
jeē cúsi ni yā jíin. Chi ni sáha
Espíritu Santo jeē iyó ndoo íyó
íi i nuū yā.

17 Núu súcuan te siquī jeē
candíje ri Cristo Jesús, te cúsi
ni rī jeē jejniñu vāha ri nuū
Yaā Dios.

18 Chi ma cúu cahān rī siquī
jniñu cásaha inga tēe, chi
máa-ni siquī ndese ni jejniñu
Cristo ruhū jeē sáha ri jeē
ñáyuu tácá nación tu ní jíní
jñuhun Yaā Dios, vijna jétáhú
i nuū yā. Chi súcuan ni cuu jíin
jñuhun ni cahān rī jíin jniñu ni
sáha ri.

19 Chi ni sáha ri jniñu jéhu
ndíso poder jeē steén jeē
cujéhu ya, te ni íyo poder
Espíritu Santo jíin rí. Te
súcuan ni nacani ndihí ri
jñuhun ndese jnáma Cristo
ñayuu. Te ni nacani ri nde ñuu
Jerusalén, jíin ndihí tácá ñuu,
jíin nde ní región Ilírico.

20 Súcuan cúu jeē ní
condihvī ni rī ni nacani ri
jñuhun jeē jnáma ya ñayuu. Te
ni jehēn rī nuū ñáyuu jeē ná
tu cuni jñuhun Cristo, chi tu
ní cúní rī nacani ri nuū ñáyuu
jeē jé ni jini i ni canacani inga
tēe.

21 Chi sa suhva ni sáha ri
nájñuhun cáhán tutu i:

Tāca ñáyuu jeē tu ní quíji
jñuhun ya nuū i, vijna

chi cuni i jñuhun ya,
te tāca ñáyuu jeē tu ní jíní
cuiti jñuhun ya, vijna
chi jecūhun ní i.

Achí tutu.

*Jeē ñuhun ni Pablo jeē
quihín de Roma*

22 Te jeē yúcuan cúu jeē
cuehē jínu ni cujnéhu ri, te
tu ní cúu jecondēhe rí rohó
jínáhan ró.

23 Te vijna chi ni ndihí
jniñu ri ní cáhnu tácá región
ndañū yáha. Te je ni cuu
cuehē cuiyā jeē cuní rī jeē rī
nuū rō.

24 Núu súcuan te ñuhun ni
rī jecondēhe rí rohó jínáhan
ró núu na yáha ri quihín rī
España. Te ñuhun ni rī jeē
núu je ni cusí ni rī jeē ní
jito jnáhan yó, yūcuán na te
chindéé ñáhán ró ruhū jeē
quihín gā rī.

25 Te xihna gā na quihín
rī ñuu Jerusalén quindēca ri
xūhún cuu hermano cáyūcu
yúcuan.

26 Chi ñayuu Macedonia jíin
Acaya ni cajeni ni i jeē cáquin
i xūhun quihín nuū hermano
cándoho ndáhú ñuu Jerusalén.

27 Chi súcuan ni cacusi ni i
ni casáha i. Te íyó váha jeē
súcuan, chi máa i jeē cácuu
i ñayuu tāca gá nación, táu i
jeē sáha vāha i nuū ñáyuu he-
breo un. Chi ñayuu hebreo ni
casáha jeē ní quiji jñuhun Yaā
Dios nuū i jeē quéndō vāha
ánuá i sáha. Jeē yúcuan cánuú
jéé chindéé ñáhán i ñayuu he-
breo cácandíje jíin ndajniñu
ñayiví yáha.

28 Núu súcuan te jeē jínu
jniñu yáha jéé quindēca ri

xūhun yáha nuū i, yūcuán na te jecondēhe rí rohó jíjnáhan ró jēē yáha rí quihīn rī España.

²⁹ Te jíni vāha rí jeē quivī jinú rī nuū rō, te vāha ndasí quendōo ró jēē nacani ga rī jnūhun vāha Cristo nuū rō.

³⁰ Hermano jijnáhan ró, cáhán ndahú rí jíni ró jeē chindéé ñáhán ró ruhū cacān tahu rō jehē rī nuū Yaā Dios síquī jníñu ndúcú ndéyí rí. Súcuan sáha ró síquī jeē candíje yó Jítoho yō Jesucristo, jíni síquī jeē cundáhú ni yō jnáhan yó sáha máá Espíritu.

³¹ Te cacān tahu rō jeē na cácu rí nuū téē región Judea jeē tu cácandíje, jíni jēē na cúsi ni tēcá hermano ñuu Jerusalén jeē quíndēca rí xūhun yáha cuu de.

³² Te súcuan te núu cúní Yaā Dios te jecondēhe rí rohó jíjnáhan ró, te cusí ni yō, te nanihīn ni rí jeē condee rí jíni ró.

³³ Te máá Yaā Dios jeē jéhe jnūhun ndeyí sí ni, na cóo ya jíni ró jijnáhan ró. Amén.

Jeē cahán Pablo jeē sándeýí ni i

16

¹ Te vijna te cáhán rí jíni ró jijnáhan ró jēē na chindéé ñáhán ró hermana Febe, chí cúu ña ñahan jéjníñu jeē síquí jnúhun ya nuū ñayuu cácandíje ñuu Cencrea.

² Te cuatáhú ró ña nájnūhun cúní maá Jítoho yō, chí súcuan cánuú sáha hermano cácandíje. Te chindéé ñáhán ró ña na-ni vé cúu jeē jíni

ñúhún ña, chí súcuan ní chindéé ñáhán máá ña cuehē ñayuu, te suni nde ruhū.

³ Cahán rō jíni Priscila jíni Aquila jeē sándeýí ni ndindúú de, áchí rí, chí cáchindéé ñájna han de jíni rí síquí jníñu Cristo Jesús.

⁴ Chí ná ni iyo jnūndóho jeē cuu rí nuú, te ni cachundeyí ni de ni canducú de scácu de ruhū, vésú suni cuu maá de núú. Te nácuatáhú rí nuū ndindúú de, te nasūu máá-ni ruhū, chí suni tēcá grupo ñayuu cácandíje tēcá nación.

⁵ Te suni cahán rō jíni ñayuu cácandíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, tēē maní rí jíni. Chí ñuu Acaya, máá de cúu jeē ní candíje xīhna gā nuū Cristo.

⁶ Suni cahán rō jeē sándeýí ni María, ñahan jeē ní je-jníñu ndasí jeē síquí jnúhun ya mēhñu ró jijnáhan ró.

⁷ Te cahán rō jeē sándeýí ni Andrónico jíni Junias, tēē cácuu jnáhan ñuu rí jeē ní cahīn jíni rí vecāa. Te tēcá apóstol chí cájejnúhún de ndindúú téē jíñá, te xīhna gā de ni cacandíje Cristo vésú maá rí.

⁸ Cahán rō jeē sándeýí ni Amplias, tēē maní rí jíni, chí cándíje de Jítoho yō.

⁹ Te cahán rō jeē sándeýí ni Urbano, tēē chindéé ñájna han jíni yó síquí jníñu Cristo Jesús, te suni súcuan Estaquis, tēē jeē maní rí jíni.

¹⁰ Suni cahán rō jeē sándeýí ni Apeles, tēē jeē ní stéen jeē candíje vāha de Cristo, te suni

súcuan cahān rō jīn ñáyuu vehe Aristóbulo.

¹¹ Cahān rō jeē sándeýí ni Herodión, tēe cúu jnáhan ñuu rī. Te suni súcuan ñayuu vehe Narciso jeē cácadíje maá Jítoho yō.

¹² Te suni cahān rō jeē sándeýí ni Trifena jīn Trifosa, ñahan cáśajniñu siquī jnúhun máa Jítoho yō. Te suni sándeýí ni Pérsida, hermana jeē maní yō jīn, chi suni ni sájniñu ndasí ña siquī jnúhun Jítoho yō.

¹³ Te cahān rō jeē sándeýí ni Rufo, tēe cájejnúhún ñáyuu jeē vāha cándíje de máa Jítoho yō. Te suni súcuan cahān rō jīn náná de, te máa ña suni ni jito ña ruhū nájnūhun jeē naná rī cúu ña.

¹⁴ Te cahān rō jeē sándeýí ni Asíncrito jīn Flegonte jīn Hermas jīn Patrobas jīn Hermes jīn táca hermano jeē cáyūcu jīn de.

¹⁵ Te suni súcuan Filólogo jīn Julia jīn Nereo jīn cuáha de, jīn Olimpas jīn ndihi hermano cácadíje cáyūcu jīn de jijnáhan de.

¹⁶ Te jeē cahán táca ró jīn jnáhan ró, te yíñúhún techūhu ró ndaha i. Te táca grupo ñayuu cácadíje nuū Cristo, cáhán i jeē na sándeýí ni rō.

¹⁷ Te cáhán ndahú rí jīn ró, hermano jijnáhan ró, jéē cóto ró máa ró nuū ñáyuu cútucu ni te ndúcú stávi jnáhan jīn jnúhun tu quíjnáhan jīn jéē ní cacutūhva ró. Te cujiyo ró núū i jijnáhan i.

¹⁸ Chi ñayuu súcuan, tu jéjníñu i nuū Jítoho yō Jesu-

cristo, chi máni ndíhvi ni i siquī jeē cáji i. Te yōhyo ndúxí i jīn jnúhun cácahān i, te súcuan stáhú i ñayuu jeē tu jíní vāha.

¹⁹ Te máa ró jijnáhan ró, chi je cájini ndihi ñayuu ndese vāha cájetáhú ró nuū yā, te jeē yúcuan cúsiñi ni rī. Te cúni rī jeē cóo listo vāha ró sáha ró jniñu vāha, te ma sáha ró jniñu néé.

²⁰ Te máa Yaā Dios jeē jéhe jnúhun ndeyí sñi ni, yachí sáha ya jeē cúndeýí ró siquī jexeén jeē cúu Satanás. Te ñúhun ni rī jeē Jítoho yō Jesucristo na sáha ya jeē vāha rōhó jijnáhan ró.

²¹ Sándeýí ni rō jijnáhan ró, áchí Timoteo, tēe chindéé ñáhán jīn rí siquī jnúhun ya. Te suni súcuan cácahān jnáhan ñuu rī Lucio jīn Jasón jīn Sosípater.

²² Te ruhū jeē naní Tercio, jeē tēe ri carta yáha jéē cahán Pablo, suni cáhán rī jeē sándeýí ni rō jeē cácadíje ró Jítoho yō.

²³ Te Gayo, tēe ni jéhe núu vehe ndéé ruhū Pablo, cáhán de jeē sándeýí ni rō jijnáhan ró. Te suni jéhe núu de vehe nuū táca ñáyuu cácadíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

²⁴ Te ñúhun ni rī jeē maá Jítoho yō Jesucristo, na sáha ya jeē vāha rōhó jijnáhan ró. Amén.

Jnúhun sándihi jéē cahán jeē yóhyo cújéñu ya

²⁵ Te vijna na cáhán yō jeē yóhyo cújéñu Yaā Dios.

Chi máá yá cuu sáha jeē cuíñi nīhin ga rō jijnáhan ró jíin jnúhun jnáma ya rohó jeē nácani ri, jíin jnúhun Jesucristo jeē steén ri. Chi súcuan ni steén Yaā Dios jnúhun sáhi yá, jeē ní yisáhi ní cáni nde ná tu jecōo ñayīví.

²⁶ Te vijna te je ni nane cájí. Chi jíin tútu iī jeē ní catee tēe ni canacani jnúhun ya, ni jitē núu jnúhun sáhi yáha nuū ñáyuu tācá nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

²⁷ Te ní cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá iin-ni ya iyó te yóhyo ndíchí yá. Súcuan na cóo. Amén.

CARTA HN JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jín hermano yō Sóstenes

² cátee ri carta yáha cuájeē nuū rohó ñáyuu ñuu Corinto jeē cácañdije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jínáhan ró jéē coo ndoo coo ií ró nuū yā. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhiyo i. Chi Jítoho táca yó jín i cúu ya.

³ Te cáñuhun ni rī jeē Tata yō Yaā Dios jín Jítoho yō Jesucristo na sáha ga yā jeē váha rohó, te sáha ya jeē coo ndeyí coo sī ni rō.

Cristo sáha ya táca jéē váha yóhó

⁴ Te níní nácuatáhú rí nuū Yaā Dios jeē siquí rohó jínáhan ró, chi jeē jín Cristo Jesús ni sáha ya jeē váha rohó.

⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhiyo cúca ró jín táca jnūhun ya, chi cájecūhun váha ni rō te cúu nácani ró.

⁶ Chi súcuan cúu jeē cáhīn nīhin ró jín jnūhun Cristo jeē ní canacani ri nuū rō.

⁷ Te súcuan te tu cúmanī ni iin tahū jeē jéhe ya cuu ánuá rō níní jéē cándetu ró quiṽi jeē quénda ndijin Jítoho yō Jesucristo.

⁸ Te máá yá chi sáha ya jeē cuiñi nīhin ró nde na jínu quiṽi, návāha ma cóo cuéchi siquí rō quiṽi ndíji Jítoho yō Jesucristo.

⁹ Te squícu Yaā Dios táca jéē ni jéjnūhun ya, te ni cana ya rohó jínáhan ró návāha cuni jnáhan ró jín Séhe ya, Yaā cúu Jítoho yō Jesucristo.

Siquí jeē ma cóo sīn ni i jín jnáhan i

¹⁰ Hermano, nde jín síhví Jítoho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo sīn ni rō. Chi váha inuú na cóo ni rō jín táca jéē cájeni ni rō.

¹¹ Súcuan cáhán rī, ñánī mánī, chi ni cacastūhun ñáyuu vehe Cloé nuū rī jeē cátejnáhan ró.

¹² Chi táca iin iin ró sīn sīn cácahān rō: Ruhū chi jín Pablo índichi rī, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō.

¹³ Te jeē cácahān rō súcuan ¿te á cájeni ni rō jeē sīn sīn Cristo iyó jéē canacani ri jnūhun? ¿Te á rúhū Pablo ni jihí jicā cruz jehē rō? ¿Chí jín síhví rúhū ni cajendute ró, chí naún?

¹⁴ Tú cuíti. Te na cútahū rī nuū Yaā Dios jeē tú cuehē

rō ni scuándute ri, chi máa Crispo jíin Gayo-ni,

¹⁵ návāha ma cahán ni ñn rō jeē jíin síhví rí ni jendute ró.

¹⁶ Te sá núcūhun ni rī jeē suni ni scuándute ri Estéfanas jíin ñayuu vehe de. Te sanaa te súcuan-ni cúu ñayuu ni scuándute ri, jéni ni rī.

¹⁷ Chi tu ní téjníñu Cristo ruhū jeē scuándute ri, chi sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rī nuū rō ñn modo ndichí jéē ma jécūhun ni rō, chi núu súcuan te ma cúu jecūhun vāha ni rō jnūhun jeē ni jíhī Cristo jicā cruz.

Jíin Cristo ni steén Yaā Dios poder yā jíin jnūhun ndichí yá

¹⁸ Te jnūhun jeē ni jíhī yā jicā cruz jeē jnáma ya ñayuu, chi jnūhun cánéé íi cúu nuū ñayuu cuango nuū jnahnú ndetū. Te máa yó jeē cuahán yō nuū cácu yó, chi jíni yō jeē jnūhun Yaā Dios jeē ndíso poder cúu.

¹⁹ Chi suhva yósó núu tútu íi jeē ni cáhān Yaā Dios:

Na snāā rī jnūhun ndichí cácahān ñayuu ndichí cuenta ñayīvī yáha, te ma cuátáhú rí jnūhun cácahān ñayuu jeē jéni ni jeē jíni vāha.

Achí yá.

²⁰ Núu súcuan ¿te ndé cua-jníñu tēe ndichí cuenta ñayīvī yáha, jíin tēe cástéén tutu, jíin tēe cánanducú yúcún síquī jeē steén ñayuu ñayīvī yáha? Chi tāca jnūhun ndichí cuenta ñayīvī yáha, ni cahān Yaā Dios jeē jnūhun cánéé íi cúu.

²¹ Te yōhyo ndichí sáha Yaā Dios. Chi tāca jnūhun ndichí cájini ñayuu ñayīvī, ni cachi ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíin jnūhun ya jeē cánacani ri te jnama ya ñayuu cácañdije, vēsú cájini ni ñayuu ñayīvī jéē jnūhun cánéé íi cúu.

²² Chi ñayuu hebreo, máni cáconi i jeē sáha Yaā Dios cuehē jniñu jénu jeē steén poder yā. Te ñayuu griego chi máni síquī jnūhun ndichí cándihvī ni i.

²³ Te máa rí chi sa suhva cánacani ri jnūhun jeē ni jíhī Cristo jicā cruz jeē jnáma ya ñayuu. Te jnūhun yáha sáha jeē jnáníni ni ñayuu hebreo, te ñayuu tāca gá nación chi cájini ni i jeē jnūhun cánéé íi cúu.

²⁴ Te ñayuu jeē ní cana ya ni quīvicoo ndaha ya, vēsú ñayuu hebreo chí ñayuu griego, chi jíni i jeē jíin Cristo ni steén Yaā Dios poder yā jíin jnūhun ndichí yá.

²⁵ Chi jnūhun Yaā Dios jeē cácahān ñayuu jeē jnūhun cánéé íi cúu, yōhyo ndichí gá vēsú jnūhun ndichí ñayuu. Te cájini ni ñayuu jeē tú na poder yā ná ni jíhī Jesús jeē jnáma ya yohó, te tuú chi níhin téyí gá poder yā ún vēsú poder ñayuu.

²⁶ Hermano, máa ró cácuu jeē ní cana ya ni quīvicoo ró ndaha ya. Te condēhe ró jeē tú cuehē rō ndichí jíin jnūhun ñayīvī, ni tú cuehē rō cándacu jniñu, ni tú cuehē rō cácuu sēhe ñayuu cujéñu.

²⁷ Chi sa suhva ni nacāji

Yaā Dios tāca jéē cácahān ñayuu ñayīvi jéē tu ndíchí cuíti, návāha coo jñūhun canu nuū tāca jéē ndichí. Te ni nacāji ya ñayuu tu téyí ini ñayīvi, návāha coo jñūhun canu nuū ñayuu teyí.

28 Te suni ni nacāji Yaā Dios tāca jéē tu cújéhnu ini ñayīvi, jín táca jéē sajéē ni i nuū, nde jín táca jéē tú jniñu cájeni ni i, návāha snúu ya tāca jéē cujéhnu ini ñayīvi.

29 Súcuan ni sáha ya návāha ni ñn ñayuu ma cúu sátéyí i máá i nuū yā.

30 Te máá ró jijnáhan ró chi ni sáha Yaā Dios jeē nduú ró jín Cristo Jesús. Chi nde nuū maá yá ni canihñ yō jñūhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chi ni jnama ya yohó.

31 Te jeē yúcuan na cóo nájñūhun cáhán tutu íi: Núu ñn ñayuu cuní i cutéyí i, te na cutéyí i síquī jeē ni sáha máá Jítoho yō jehē i, áchí.

Jeē nácani Pablo jñūhun jeē ni jñhí Cristo

2

1 Te ruhū, hermano, ná ni jeē rī nuū rō jijnáhan ró jéē nácani ndaā rī jñūhun Yaā Dios, te tu ní nácani ri jñūhun ndíchí jéē ma jécūhun ni rō.

2 Chi ná ni iyo ri jín ró te tú na ñnga jñūhun ní ndúcú rí castūhun rí nuū rō, chi máni máá jñūhun Jesucristo jeē ni jñhí yā jicā cruz jeē jnáma ya yohó.

3 Te ná ni jinū rī nuū rō jijnáhan ró, chí tú na fuerza rī, te yúhú rí, te quísi i ruhū.

4 Te ná ni nacani ri jñūhun nuū rō, chí nasūu jín jñūhun ndíchí ñayuu ñayīvi ní scándíje ri rohó, chí sa suhva jín máá poder Espíritu yā ni steén rī nuū rō jijnáhan ró,

5 návāha ma cuíñi ró síquī jñūhun ndíchí cácahān ñayuu, chí cuíñi ró síquī poder Yaā Dios.

Jín Espíritu te steén Yaā Dios ndese Yaā cúu ya

6 Te ndaā chí ndíchí cácahān rī jín ñayuu jeē jé ni ije jín jñūhun cándíje i ya. Te nasūu jñūhun ndíchí jéē iyó ini ñayīvi yáha, ni nasūu jñūhun ndíchí cácahān tēe cácujuhnu ñayīvi yáha, chí tēe ún yáha-ni jeē cácujuhnu de.

7 Chi jñūhun cácahān rī cúu jñūhun ndíchí máá Yaā Dios jeē ní yisāhí. Chi jñūhun ndíchí un jéē ní yisāhí, ni jequin Yaā Dios nde ná tu jecōo ñayīvi, návāha cácu yó jéē cótecu yō ní cáni sáha jñūhun ún.

8 Chi ni ñn tēe cújéhnu nuū ñayīvi yáha, tu ní jécūhun ni de jñūhun ndíchí un. Chi núu ni jecūhun ni de núu, te ma cáhni cuíti de máá Jítoho yō, Yaā cujéhnu luu.

9 Chi cúu nájñūhun cáhán tutu:

Tāca jéē ni sátūhva Yaā Dios jeē cúu ñayuu jeē maní jín yá,

ni ñn ún tu ní jito jínúu ñayuu, ni tu ní jini sōho i,

ni tu ní quíji jeē súcuan cani ni i.

Achí tutu.

¹⁰ Te máá yó jijnáhan yó chi ni steén Yaā Dios tācá un núū yō jeē jín Espíritu yā. Chí máá Espíritu jíní vāha ya te steén yā ndihi, chí nde ndihi jeē ndichí gá máá Yaā Dios.

¹¹ Chí ni ñn ñayuu ma cúu cuni i ndese jéni ni inga ñayuu, chí máá-ni i jín ánuá i cúu jeē jíní. Te suni súcuan ni ñn ñayuu tu jíní i ndese jéni ni Yaā Dios, chí máá-ni Espíritu Yaā Dios cúu jeē jíní.

¹² Te máá yó chí ni nihīn yō Espíritu un jéē véji nuū Yaā Dios, te tu cájeni ni yō nájnūhun cájeni ni ñayuu ñayiví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā.

¹³ Te suu síquī tāca jéē yáha cúu jeē cácahān rī, te nasūu jín jnúhun jeē castéén ñayuu ndichí, chí jín jnúhun jeē steén máá Espíritu. Chí castéén rī jnúhun Espíritu nuū ñayuu cánevāha Espíritu.

¹⁴ Te ñayuu ñayiví tu cájetáhú i tāca jnúhun jeē véji nuū Espíritu Yaā Dios, chí cájeni ni i jeē jnúhun cánéé íi cúu. Te ma cúu jecūhun ni i, chí tu cánevāha i máá Espíritu jeē sáha jeē jécūhun ni i.

¹⁵ Te ñayuu cánevāha Espíritu, chí cájecūhun ni i ndese iyó ndihi-ni. Te ñayuu ñayiví ma cúu jecūhun ni i ndese ñayuu cácuu ñayuu ún.

¹⁶ Chí suhva cáhán tutu ī: ¿Ndé ñn cuu cuni ndese jéni ni máá Jítóho yō? ¿Te ndé

ñn cuu stéén nuū yā? Ni ñn ma cúu. Achí tutu. Te vēsú súcuan te máá yó chí cájeni ni yō nájnūhun jéni ni Cristo.

Jeē cáchindéé ñájnáhan de cájejniñu de nuū Yaā Dios

3

¹ Te ruhū, hermano, tu ní cúu cahān rī jín ró jijnáhan ró nájnūhun cáhán rī jín ñayuu jíca jín Espíritu. Chí ni cahān rī jín ró nájnūhun jín ñayuu cájica jín modo máá, chí cácuu ró nájnūhun sūchi lúli jéē ná tu ije ró jín jnúhun Cristo.

² Ni steén rī nuū rō jeē tú yí, chí cácuu ró nájnūhun sūchi lúli jéē jéxin gā. Te tu ní cáhán rī jín ró jnúhun yí jeē cúu nájnūhun jeē ndáva jeē yéji ñayuu ni ije, chí ná tu canda ró jín ndé saá. Te ni vijna ná tu canda ró jín.

³ Chí cájica ga rō jín modo neé máá ró. Chí cácuuésún ni rō, te cácajnáhan ró, te cácusñn ni rō. Núu súcuan te cácuu ró nájnūhun ñayuu ñayiví jéē cájica jín modo neé máá.

⁴ Chí ñn ró cáhán: Ruhū chí jín Pablo índichi rī. Te inga rō cahán: Ruhū chí jín Apolos. Te súcuan cúu jeē cájica ró jín modo neé máá ró

⁵ ¿Te ndé ñn cúu ruhū, te ndé ñn cúu Apolos núu súcuan? Chí máá mozo-ni Yaā Dios cácuu rī, te ni jejniñu ya ruhū návāha candíje ró máá Jítóho yō. Chí ná ñn ná ñn rī ni sáha jniñu ndese ni jēhe máá Jítóho yō nuū rī.

⁶ Ruhū, nájñūhun ni taji ri jñūhun ya ini anuá rō, te Apolos, nájñūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jñūhun ini anuá rō.

⁷ Núu súcuan te tú na vé cúu sáha tēe táji ni tēe chúhun ndute, chi sa suhva máá Yaā Dios cúu jeē scuéhnu.

⁸ Te tēe táji jín tēe chúhun ndute, ñn-ni cácuu de. Te tãca de chí cuāha ya yāhu nuū de ndese jñiñu ni casáha ñn ñn de.

⁹ Chi ruhū jijnáhan ri chí tēe chíndéé ñájñáhan cájeñiñu nuū Yaā Dios cácuu ri. Te máá ró jijnáhan ró cácuu nájñūhun itu Yaā Dios jeē jícu ya jín.

Te suni nájñūhun ñn vehe jeē sáha Yaā Dios cácuu ró.

¹⁰ Te ruhū chí cúu ri nájñūhun ñn maestro albañil jeē ní jequin rī cimientu vehe ún, cúu jeē ni scándije ri rohó. Te ñnga de cásama de siquī, cúu jeē castéén gā de nuū rō. Núu súcuan te ná ñn ná ñn de na cóo cuidado de ndese sáma de siquī.

¹¹ Te Jesucristo cúu cimientu vehe ún, te ni ñn ma cúu caquin ñnga cimientu, chí máá yá cúu jeē ní ndahva cuēchi ró.

¹² Te tãca ñáyuu cácañdije, chí sáha i vehe siquī cimientu un, núu jín ndajñiñu vāha nájñūhun oro chí plata chí yūu luu, chí jín jēe yachí naa, nájñūhun yujnu chí ite chí ndayóhō.

¹³ Te natūu jñiñu un jēe ní sáha ñn ñn i, te suu cúu ndese ni condihvī ni i siquī

maá yá. Chi máá quivī juicio jeē sándaā yā jñiñu ñayuu, quivī ún natūu cáji jñiñu i. Chi jín ññūhun quiji quivī ún, te nájñūhun sáha ññūhun jeē jéhu tãca jēe cúu cayū, súcuan coto ndee ya jñiñu ñn ñn i.

¹⁴ Te núu tú cayū jñiñu ní sáha i siquī cimientu un, te nihín i tahū i.

¹⁵ Te núu tu ní cóndihvī ni i jín jñiñu ya, te ma nihín i tahū i, chí nájñūhun cayū jñiñu i. Te máá i chí cācu ánuá i, vēsú nájñūhun je yajni cayū i nuū yáññūhun.

¹⁶ ¿A tu cájini rō jeē cácuu ró nájñūhun templo Yaā Dios, chí ndéé Espiritu Yaā Dios ini anuá rō?

¹⁷ Te núu ñn tēe stívi de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá ró.

¹⁸ Ni ñn ró ma stahú ró maá ró jín jēe jéni ni rō. Núu ñn ñayuu jéni ni i jeē ndichí i jín jñūhun ñayivi yáha, vāha ga na siáa i ún, návāha coo ndichí ndije i jín jñūhun máá yá.

¹⁹ Chí jñūhun ndichí jēe iyó ini ñayivi yáha, jñūhun cánéé lí cúu nuū Yaā Dios. Chí cáhán nuū tútu i: Ñayuu ndichí cuenta ñayiví, chí nájñi ya i siquī jñūhun ndichí i jeē jési i jñūhun ya, achí.

²⁰ Te cáhán tucu tutu: Máá Jítoho yō jiní yā tãca jēe jéni ni ñayuu ndichí, chí máni jeē jéni cāhá ni i, achí.

²¹ Núu súcuan te ni ñn ró má cutéyí ró jeē siquī ni ñn tēe ndichí. Chí cuenta máá ró cúu ndihí-ni.

22 Cúu Pablo, cúu Apolos, cúu Pedro jeē castéén nuū rō. Cúu ndihi jeē iyó ini ñayīví, jeē iyó vijna jíin jéē quíji. Te vēsú núu cotecu rō chí cuu rō, te ndihi-ni chi cuenta maá rō cúu.

23 Te maá rō cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jnúhun ya

4

1 Núu súcuan te na cáni ni rō jijnáhan rō jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yīsáhi ndé jehahán.

2 Te ndaā chi tēe jeē sájniñu siquī ún, iyó responsable ná ñn ná ñn de jeē squícu vāha de.

3 Te ruhū tu sáha ri cuenta núu cánanducú rō siquī rī ndese sáha ri, chí núu cánanducú ñáyuu cácujuhnu ini ñayīví. Te ni maá rí tu chíhi ri cuenta siquī maá rí.

4 Chi vēsú jíin rī jíin ánuá rī jeē tú na cuēchi rī, te nasūu yúcuan cúu jeē quéndōo ndaā rī, chi maá Jítoho yō cúu jeē jíto ndee ruhū.

5 Jeē yúcuan ma nánducú rō siquī jniñu jnáhan rō, chi nde na queē maá quívī te cuni rō. Chi nde na ndíji maá Jítoho yō te nastúu ndijin yā tācá jniñu jeē yīsáhi núu néē, te steén ndijin yā tāca jéē jéni ni ñayuu jíin ánuá i. Yūcuán na te maá Yaā Dios cuajnúhún yá ná ñn ná ñn i ndese ni casáha i.

6 Hermano, tāca jnúhun yáha ní cahán rī návaha quéndōo vāha rō jijnáhan

ró. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rī jeē súcuan cácuu ri, návaha cutūhva rō caní ni rō maá-ni nájñuhun cáhán tutu ñ. Chi ma sandúxí rō jeē cuajnúhún rō ñn tēe steén, te inga de tuú.

7 ¿Te naun cácutéyí rō nuū jnáhan rō núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun casátéyí rō maá rō jeē nájñuhun jeē nasūu jéē ní cacutahū rō cúu?

8 Va je ni cacucúca rō, chi je cánevāha rō ndihi, cájeni ni rō. Te je cándacu maá rō jniñu, te ni tuá cájini ñúhún rō ruhū, cájeni ni rō. Tú vāha jeē súcuan cácutéyí rō. Te nacā jeē váha núu jeē cándacu ndije nde rō jniñu núu, návaha suni cuāha rō jnúhun jeē ndacu nde ri jniñu jíin rō jijnáhan ri.

9 Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñuhun tēe núu ga nuū ñáyuu, nájñuhun tēe jeē jé ni cundaā jeē cúu. Te ní ñáyīví jíin andiví cándēhe váha nuū rī, cúu ndajéhé Yaā Dios jíin ñáyuu.

10 Chi jeē siquí Cristo te cácahán i jeē tēe cánéé cácuu ri. Te tāca róhó va ndíchí rō jíin jnúhun Cristo, cájeni ni rō. Te tāca rúhū chi tu fuerza rī, te róhó va iyó fuerza rō, cájeni ni rō. Te róhó chí cáhīyo yíñuhún ñáyuu nuū rō, te nuū rī chí casájéē ni i.

11 Ní véjicoo ri cájiī rī sōco te nde vijna. Te cájichí rī

ndute, te cúmanī sahma ri, te tu cásáha vāha ñayuu jiín rí, te ni tu cánevāha ri vehe.

12 Te nīhin cásájniñu ri jiín ndaha ri. Cácahān neé i nuū rī, te cácahān vāha ri jiín i. Cájito xeēn i ruhū, te cájendeyí ni rī.

13 Cácahān neé i siquī rī, te sa cácahān manī rī jiín i. Te cácuu ri nájnūhun yācá ini ñayiví, te cásquéhichī i ruhū nde vijna.

14 Te nasūu jéē téē ri yāha jéē cúcanu rō, chí sa suhva jeē stihví ni rī rohó, chí cácuu ró nájnūhun sēhe ri chí manī rī jiín ró.

15 Chí vēsú na cóo uxī mil tēē stéēn jnūhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chí ni scandíje ri rohó jéē ní nacani ri jnūhun vāha Cristo Jesús jeē jnáma ya yohó.

16 Núu súcuan te cáhán ndahú rí jiín ró jeē na ndácu ró rúhū jijnáhan ró.

17 Te jeē yúcuan cúu jeē tají rí Timoteo cuajeē de nuū rō. Chí cúu de nájnūhun sēhe ri jeē maní rī jiín de, te squícu vāha de nuū máá Jítoho yō. Te máá de nacachí tucu de nuū rō ndese jíca ri jeē candíje ri Cristo, jiín ndese stéēn rī nuū tāca grupo ñayuu cácandíje tāca lado.

18 Te sava ró chí cásátéyí ró máá ró, chí cájeni ni rō jeē ma jéē cuíti gā rí nuū rō.

19 Te tuú chí yachī jeē rī nuū rō te núu súcuan cúní máá Jítoho yō. Yúcuán na te nanducú rí siquī téē cácutéyí, te ma sáha ri cuenta jnūhun

cácahān-ni de, chí sa coto ndee rī de núu cuu squícu nde de.

20 Chí jeē ndácu Yaā Dios jniñu nuū yō, nasūu máá jéē cahán ñ-ni yó cúu, chí jíni ñúhún condiso poder jnūhun cáhán yō jiín jniñu sáha yó.

21 Núu súcuan ¿te ndese cácuu rō? ¿A jéē cuxeēn rī nuū rō núu na jéē rī, siquī jeē tu cánacani ni rō, chí nacani ni rō te jeē rí jiín jnūhun cúndáhú ni jiín jnūhun vitá ni?

Jeē sándaā Pablo siquī ñn cuēchi

5

1 Te ni nihīn rī jnūhun jeē jíca jnéni ñn tēē jeē íne mēhñu ró, chí ndéca de naná uū de. Te xeēn ndasí sáha tēē ún, chí ni ñayuu jeē tu cájini jnūhun Yaā Dios, tu cásáha i súcuan.

2 Te vēsú súcuan te cásátéyí ró máá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quénehen ró téē sáha cuēchi ún na quénda de mēhñu rō.

3 Te ruhū, vēsú tu íyó rí jiín ró, te nájnūhun jeē iyó rí jiín ró cúu jeē ñúhún ni rī rohó. Te je ni sándaā rī siquī téē ni sáha cuēchi ún, chí nájnūhun jeē iyó rí jiín ró cúu.

4 Núu súcuan te na ndútútú ró jijnáhan ró, te máá Jítoho yō Jesucristo coo ya jíni ró. Te máá rí chí nájnūhun cone ri jíni ró, chí ñúhún ni rī rohó. Te poder máá Jítoho yō Jesús suní coo jíni ró.

5 Te na chíhi yó téē ún ndaha Satanás, návāha na ndóho yiquí cúñu de, te

nacani ni de te cācu ánuá de quivī ndiji Jitoho yō Jesús.

⁶ Tuú vāha jeē casátéyí ró maá ró. ¿A tu cájini rō jnūhun cáhán suhva? Vēsú jecu-ni levadura te ndāa ní ñujen sáha, áchí.

⁷ Núu súcuan te quenehen ró tée un nájñūhun scáne ró levadura jeē ni tívi. Te súcuan te cuu ró nájñūhun pan jeē cúvāha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chí cúu ya nájñūhun londe pascua jeē ni jíhī.

⁸ Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñūhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájñūhun levadura jeē ni tívi.

⁹ Nuū inga carta jeē ní tee ri nuū rō jijnáhan ró ni cahān rī jeē ma quivī nduu rō jíin ñáyuu cájica jnéni.

¹⁰ Te tu ní cáchi rī jeē ma quíjnáhan cuiti rō jíin ñáyuu tu cácandije jeē cájica jnéni, jeē ndíyo ni, jeē sácuhná, jeē chiñúhún ídolo. Chi núu súcuan te jíni ñúhún jeē quénda ró ini ñayiví núu, chí tuá na inga modo jeē cújiyo ró núu i chí ndéé yó ñayiví jíin i.

¹¹ Chi sa suhva ni cachi rī jeē ma quivī nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chísó

jnūhun i siquī jnáhan i, chí nájini i, chí cuíhná i. Te ni ma cáji cuiti rō staā jíin ñáyuu casáha súcuan.

¹²⁻¹³ Chi nasúu jniñu ri cúu jeē sándaā rī siquī ñáyuu jeē tu cáhīin jíin yó. Yaā Dios cúu jeē sándaā siquī i. Te ñáyuu cáhīin jíin ró chí cánuú jéé sándaā rō siquī i. Núu súcuan te cánuú jéé quenehen ró tée ni sáha cuēchi un jéé íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácandije

6

¹ Te núu jnáhan ró jéé candíje ni sáha cuēchi siquī rō, ¿te naun jéngoo ró jíin de nuū tohó jeē tu cácandije jíin yó? ¿Te naun tu casándaā rō nuū jnáhan ró cácandije Yaā Dios?

² ¿A tu cájini rō jeē ñáyuu cácandije Yaā Dios chí ñin quivī te sándaā i jniñu ñáyuu ñayiví? Te núu ñin quivī sándaā rō jniñu ñáyuu ñayiví, ¿te á má cúu sándaā rō vijna siquī tāca cuēchi lúlí casáha jnáhan ró?

³ ¿A tu cájini rō jeē ñin quivī te sándaā yō nde jniñu tāca ndajéhé andiví? Te nagā ni cuu jniñu ñayiví yáha jeē ma cúu sándaā yō.

⁴ Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca téé jeē tu cúu de jnáhan ñáyuu cácandije jeē sándaā de siquī cuēchi ún?

⁵ Súcuan cáhán rī návāha na cúcanu rō jijnáhan ró. ¿A tu íyó ni ñin téé jécūhun ni mēhñu ró jeē cuu sándaā de siquī rō?

⁶ Tú vāha jeē ñn hermano caquin cuēchi siquī inga hermano nuū tohó jeē tu cácanđije.

⁷ Te jeē cájequin rō cuēchi siquī jnāhan rō, chi jeē castívi íi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu rō?

⁸ Te tuú chi sa máá rō cásáha cuēchi te cáquende rō ndajniñu, te nuū tǎcá hermano rō cúu jeē casáha rō.

⁹⁻¹⁰ ¿A tu cájini rō jeē ñayuu tu íyó ndáa, ma nihín tahú i quívi i ñuu nuū ndácu Yaā Dios jniñu? Ma stahú rō maá rō cani ni rō jeē nihín tahú rō, chi ni ñayuu jeē jíca jnéni, ni ñayuu chiñúhún ídolo, ni ñayuu casíquí ndéē jnāhan, ni tēe sáha ndiyī jíin jnāhan yí, ni ñayuu cuíhná, ni ñayuu ndíyo ni, ni ñayuu nájini, ni ñayuu chisó jnúhun siquī jnāhan, ni ñayuu stahú jnāhan siquī xúhun, ma nihín tahú i quívicoo i ñuu nuū ndácu Yaā Dios jniñu.

¹¹ Te súcuan ni candāa sava rō núu, te vijna chi je ni nacate ya rohó, te cáhīyo ndoo cáhīyo íi rō nuū yā. Chi je ni ndahva yā cuēchi rō jéē jíin máá Jítoho yō Jesús jíin Espíritu Yaā Dios.

Jeē íyó ndoo íyó íi yiqui cúñu ñayuu cácanđije

¹² Te ndaā cúu jeē cácahān jeē ndihí-ni jniñu íyó váha sáha yó núu ndese cúní yō. Te vēsú súcuan te nasūú ndihí sáha jeē quéndōo vāha ánuá yō. Ndihi chí cuu sáha yó, te vēsú súcuan te tu íyó váha

jeē quívi yó núu jniñu jeē stívi ánuá yō.

¹³ Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñn quívi te tuá coo súcuan, chí naa ndindúú un sáha Yaā Dios. Te nasūu siquī jeē cáca jnéni yó cúu jeē íyó yiqui cúñu yō, chí sa suhva jeē sáha yó jéē cuní maá Jítoho yō. Te Jítoho yō chí ndíto ya yiqui cúñu yō.

¹⁴ Te nájniñuhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

¹⁵ ¿A tu cájini rō jeē yiqui cúñu tǎcá ñn ñn rō cúu nájniñuhun tǎca parte yiqui cúñu Cristo? Núu súcuan ¿te á cuu quende yó ñn parte yiqui cúñu Cristo te squíjnāhan yó jíin ñn ñahan jíca jnéni? Ma cúu cuíti súcuan.

¹⁶ ¿A tu cájini rō jeē tēe quíjnāhan jíin ñahan jíca jnéni, ñn na yiqui cúñu ni nduu de jíin ña? Chí cáhán tutu íi: Jeē ndindúú chí ñn na yiqui cúñu cuu, áhí.

¹⁷ Te ñayuu jeē quijnāhan jíin máá Jítoho yō, chí suni súcuan ñn na cúu i jíin yá siquī jeē candíje i ya.

¹⁸ Núu súcuan te cunu rō jéē ma quívi rō núu jnúhun jíca jnéni. Chí tǎca gá cuēchi jeē sáha ñayuu, chí nasūú yiqui cúñu i stívi í. Te núu jíca jnéni í, te siquī yiqui cúñu i cúu jeē sáha i cuēchi.

¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá rō cácuu rō.

20 Chi Yaā Dios yahu ni cuu jeē ní nacuaan ya rohó jijnáhan ró. Te jeē yúcuán cánuú jéē cáca yíñúhún ró nuū Yaā Dios jeē sáha ró jniñu váha nde jíin yiqui cúñu rō jíin ini jíin ánuá rō, chi máni cuenta Yaā Dios cúu.

Jnūhun cástūhun síquī tēe jíin ñasihí

7

1 Vijna te na cáchi rī síquī tāca jnūhun jeē ní cacajñūhun ró ruhū nuū carta. Jendaá jeē vāha ga quendōo ñn tēe núu tú condeca de ñahan.

2 Te síquī jeē iyó jnūhun jnéni, te vāha ga jeē tāca tēe na cóo ñasihí máá de, te suni tāca ñahan coo yíi máá ña.

3 Te yíi na squícu vāha de nuū ñasihí de jeē cúu de yíi ña. Te suni súcuán ñasihí na squícu vāha ña nuū yíi ña.

4 Chi ñasihí chi tu cúu sáha ña jeē cuní ña jíin yiqui cúñu ña, chi suni jeē cuní yíi ña. Te suni súcuán yíi tu cúu sáha de jeē cuní de jíin yiqui cúñu de, chi suni jeē cuní ñasihí de.

5 Te ma sasáhán ró maá ró nuū jnáhan ró. Te núu cácuani rō jeē vihyá gā cacān tahu rō jecu tiempo, te núu cáhīyo conforme ndíndúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó síquī jñūhun jnéni.

6 Te nasūu jéē ndácu ri jniñu jeē cánuú quijnáhan ró, chi jeē jéhe ri jñūhun cúu.

7 Chi nújnahan ni rī jeē tāca tēe na cóo máá ñn-ni de, nájñūhun íyó máá rí. Te sñn

sñn ni sáha Yaā Dios jíin ñn ñn de ndese cúu máá de, chi sava de cuu quendōo máá ñn-ni de, te inga de chi tuú chi sñn ni sáha ya jíin de.

8 Núu súcuán te cáhán rī jíin ñáyuu cáhīyo máá ñn-ni, jíin ñahan ní caquendōo ndáhú, jeē vāha ga te núu quendōo máá ñn-ni i, nájñūhun íyó máá rí.

9 Te núu jíni i jeē ma cánda i quendōo máá ñn-ni i, te na quijnáhan i núu súcuán. Chi vāha ga jeē quijnáhan i vésú jeē ndúquji i.

10 Te nuū ñáyuu jeē jé ni quijnáhan chi ndácu ri jniñu jeē ñahan ma ndusñn ña jíin yíi ña. Te nasūu rúhú cúu jeē ndácu jniñu, chi máá Jítoho yō.

11 Te núu ñn ñahan ndusñn ña jíin yíi ña, te na quéndōo máá ñn-ni ña, chí cuu naquijnáhan ña jíin yíi ña. Te yíi suni ma ndusñn de jíin ñasihí de.

12 Te jíin sava ga ñayuu chi cahān rī yāha jéé jéni ni maá rí, te nasūu jéé ní cachi maá Jítoho yō cúu. Núu ñn hermano ndéca de ñahan jeē tu cándíje, te núu nújnahan ni ña condee ña jíin de, te ma ndusñn de jíin ña.

13 Te núu ñn ñahan ndéca ña tēe jeē tu cándíje, te núu nújnahan ni de condee de jíin ña, te ma ndusñn ña jíin de.

14 Chi tēe tu cándíje, yíhi cuenta de nuū Yaā Dios síquī jeē ní quijnáhan de jíin ñahan cándíje. Te ñahan tu cándíje, yíhi cuenta ña nuū Yaā Dios síquī jeē ní quijnáhan ña jíin tēe cúu hermano cándíje. Chi núu tu súcuán te sēhe i ma

quĩhi cuenta i nuũ Yaã Dios, te vijna chi yĩhi cuenta i nuũ yã.

15 Te yĩi chí ñasihí tu cándije, núu fuerza cuní i ndusĩn i jín jnáhan i, te na ndúsĩn i. Chi núu súcuan cúní i, te hermano chí hermana candije tu cánuú casi i jeē ndusĩn jnáhan i jeē tu cándije. Chi ni cana Yaã Dios yohó jéē condee manī yō jín jnáhan yó.

16 Te röhó jéē cácuu ñasihí, tu cájini rō, sanaa te candije yĩi rō sáha rō, te cācu de. Te suni súcuan röhó jéē cácuu yĩi, tu cájini rō, sanaa te candije ñasihí rō sáha rō, te cācu ña.

17 Te ná ĩn ná ĩn rō na quéndōo rō ndese ni sáha Jitoho yō jeē cúu rō, jín ndese íyó rō ná ni cana ya rohó ní candije rō. Te súcuan ndácu ri nuũ tāca grupo ñayuu cácandije.

18 Núu ni cana ya ĩn tēe jeē ní cuu circuncidar, te súcuan na quéndōo de. Núu ni cana ya ĩn tēe jeē tu ní cúu circuncidar, te ma cúu de circuncidar.

19 Chi tú na vé sáha núu cúu yó circuncidar chí tuú, chí jeē cánuú gá cúu jeē na squĩcu vāha yó jniñu cúní Yaã Dios.

20 Ná ĩn ná ĩn rō na quéndōo rō ndese íyó rō ná ni cana ya rohó ní candije rō.

21 Núu mozo jeē ní jeen ñayuu cúu rō ná ni cana ya rohó, te ma cóndihvĩ ni rō jeē quénda rō. Te núu íyó modo jeē quénda rō nduu libre rō, te íyó váha jeē sáha rō.

22 Chi tēe cúu mozo jeē ní jeen ñayuu, te núu ni cana

Jitoho yō de, te vijna chi ni nduu libre de nuũ cuéchi de, jéjniñu de nuũ maá Jitoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jéjniñu nuũ Cristo jeē ní nacuaan ya de.

23 Chi yahu ni cuu jeē ní nacuaan Yaã Dios rohó jijnáhan rō, cúu jeē ni jíhĩ Sēhe ya jehē rō. Núu súcuan te ma cuajniñu rō núu jniñu cáhá-ni jeē ndácu ñayuu ñayĩví.

24 Núu súcuan hermano, ná ĩn ná ĩn rō na quéndōo rō núu Yaã Dios ndese íyó rō ná ni cana ya rohó.

25 Te vijna te siquĩ ñayuu jeē íyó máa-ni, tú na jnūhun ní ndácu Jitoho yō nuũ rĩ. Te na cáhán rĩ jeē jéni ni maá rí, chí ni cundáhú ni Jitoho yō ruhū, te ni sáha ya jeē cúu cahān ndaā rĩ.

26 Jéni ni rĩ jeē vāha-ni núu quendōo-ni tēe ndese cáhiyo de, jeē siquĩ jeē íyó jnúndóho tiempo yáha.

27 Núu íyó ñasihí rō, te ma ndusĩn rō jín ña. Te núu tu íyó ñasihí rō, te ma nducú rō ña.

28 Te núu quijnáhan rō, te nasūu cuéchi cúu. Te núu quijnáhan sūchi sñhí, te suni nasūu cuéchi cúu. Te ñayuu quijnáhan, chí nihĩn i jnúndóho ñayĩví yáha, te cúní rĩ jeē ma nihín rō jnúndóho.

29 Hermano jijnáhan rō, jnūhun jeē cahán rĩ yáha cúu jeē yachĩ-ni ndihí tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvĩ gā ni de siquĩ

jniñu máa yá vēsú siquī ña.

³⁰ Te ñayuu jeē ni jīhī jnáhan vehe i, na sáha i nájñūhun jeē tu cúcuíhyá ni i. Te ñayuu cúsiñ ni, na sáha i nájñūhun jeē tu cúsiñ ni i. Te ñayuu jéen, na sáha i nájñūhun jeē nasūú ndajniñu i cúu. Ma cuáha i jñūhun jeē cási tāca un jéē ma cúu condihvī ni i jniñu máa yá.

³¹ Te ñayuu jeē ní cacondihvī ní siquī ndajniñu ñayiví yáha, ma cujnéñu ga i jín. Chi je yajni naa tāca jéē iyó ñáyiví yáha.

³² Cúni rī jeē ma nácani ndasí ni rō siquī tāca jéē iyó ini ñayiví. Chi tēe cúu soltero, ndihvī ni de jniñu máa Jítoho yō, ndese cusī ni Jítoho yō sáha de.

³³ Te tēe iyó ñasihí chi ndihvī ni de jniñu iyó ñayiví, ndese cusī ni ñasihí de sáha de.

³⁴ Te suni súcuan sññ sññ jéni ni ñahan iyó yī jín ñahan iyó máa. Chi ñahan iyó máa, ndihvī ni ña jniñu máa Jítoho yō, chi cúni ña jeē coo ndoo coo iī anuá ña jín yiqui cúñu ña cuajniñu ña nuū yā. Te ñahan iyó yī chi ndihvī ni ña jniñu iyó ñayiví, ndese cusī ni yī ña sáha ña.

³⁵ Jeē váha máa ró jijnáhan ró cúu jeē ni cáhān rī súcuan. Chi nasūu jéē nducú rí casī rī jeē quijnáhan ró, chi sa suhva cúni rī jeē caca yñúhún ró te nune ró cuajniñu cutú ró núu máa Jítoho yō.

³⁶ Te núu ññ tēe iyó sēhe síhí de, te núu cuayī i, te núu jéni ni de jeē váha ga jeē quijnáhan i, núu súcuan te na sáha de jeē

jéni ni de, te cuáha de jñūhun quijnáhan i, chi nasūu cuéchi cúu.

³⁷ Te núu ññ tēe ni cundaā ni de jeē cóndee sēhe síhí de súcuan-ni, jeē ma cuáha de i vēsú fuerza jícán ñayuu i, núu súcuan te cuu quendōo i nájñūhun cúni de, chi jeē váha sáha de.

³⁸ Núu súcuan te tēe jéhe jñūhun quijnáhan i, váha sáha de. Te tēe tu jéhe jñūhun, chi váha ga sáha de.

³⁹ Te ñahan ní quijnáhan, chi yīhī ña ndaha yī ña níni jeē técu de. Te núu je ni jihī yī ña, yūcuán na te je ni cuu libre ña jeē quijnáhan tucu ña jín na-ni tēe cúu ni ña, te núu tēe cándíje nuū Jítoho yō cúu de.

⁴⁰ Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jín Espíritu Yaā Dios cúu jeē cahán rī.

Siquī cūñu ni sócō nuū ídolo

8

1 Te vijna te na cáchi rī siquī cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jín jñūhun ya.

2 Núu na-ni ñayuu jéni ni i jeē jiní váha i, te tuú chi ná tu cuni cuiñi i nájñūhun cánuú cuni i.

3 Te sa suhva ñayuu jeē maní i jín Yaā Dios, máa i cúu jeē jetáhú yá.

⁴ Núu súcuan te na cástūhun rí siquī cūñu jeē ní casocō ñayuu nuū ídolo. Ndaā chi jíní yō jeē tāca ídolo ñayīví, tú ndaā cuiti. Te tú na inga yaā iyó, chi máá ñn-ni Yaā Dios.

⁵ Te ñayuu chi cájeni ni i jeē iyó táca yāā ini andīví jíní ñáyīví, chi cácahān i jeē iyó ndije cuehē yaā i jíní jítoto i.

⁶ Te nuū maá yó chi ñn-ni Yaā iyó, jeē cúu Tátá yō Yaā Dios. Te máá yá ni sáha tāca jēē iyó, te cuenta maá yá cúu yó jijnáhan yó. Te suni iyó ñn-ni Jitoto yō Jesucristo, te nde nuū maá yá vēji tāca jēē iyó, te suni máá yá ni sáha yóhó.

⁷ Te ñayuu cácañdije, chi tú ndihi i jíní jnūhun yáha. Chi sava i ni cacān i ni chiñúhún i ídolo nde ná tu candije i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquī jeē ná tu ije i jíní jnūhun Yaā Dios, te jéni ni i jeē cunjéhén ánuá i sáha cūñu jeē ni sócō nuū ídolo ún.

⁸ Te ndaā chi nasūu jēē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndō vāha ga yō nuū Yaā Dios. Te núu tu yéji yō, ni tu sáha jeē quéndō ndáhú gá yō nuū yā.

⁹ Te vēsú tú ni ñn jési jeē ma cúu caji rō cūñu ún, te coto ró jnáhan ró jēē ná tu ije jíní jnūhun ya, te ma sáha ró jēē suni caji i jeē jéni ni i jeē cuēchi cúu.

¹⁰ Vāha ga ma cáji rō núu súcuan, chi sanaa te hermano

rō jeē ná tu ije jíní jnūhun ya, coto de rōhó jēē yéji rō ini vehe ídolo, chi jíní vāha ró jēē tú na vé sáha. Te súcuan te sáha ró jēē cájni ni de jeē suni caji maá de cūñu jeē ni sócō nuū ídolo, vēsú jéni ni de jeē cuēchi cúu.

¹¹ Te súcuan stívi ró anuá hermano rō jeē ná tu ije jíní jnūhun ya, vēsú jíní vāha máá ró jeē tú na vé sáha jeē cáji rō. Te tú vāha sáha ró, chi suni jehē maá de ni jihí Cristo.

¹² Te núu súcuan stívi ró anuá hermano rō jeē ná tu ije jíní jnūhun ya, núu súcuan te siquī Cristo cúu jeē sáha ró cuēchi.

¹³ Núu súcuan te núu cūñu un sáha jeē quívi hermano rī cuēchi, te ma cáji cuiti ga rī cūñu ún, návāha ma sáha rī jeē quívi de cuēchi.

Siquī jeē iyó derecho tēe cácuu apóstol

9

¹ Te máá rí chi jíca libre rī, te iyó derecho rī siquī jeē cúu rī apóstol, tēe ni taji yá scáca jnūhun ya. Chi ni jito rī nuū maá Jítoto yō Jesús, te máá ró jijnáhan ró cácuu jniñu jeē ni sáha rī jeē ni squívi rī rohó ndaha Jítoto yō.

² Te núu sava ga ñayuu tu jétáhú i jeē cúu rī apóstol, te nuū maá ró chi suu cúu ndije rī. Chi siquī jeē ní scandije rī rohó jijnáhan ró, te jeē yúcuan cácuu ró prueba jeē steén jeē ndíso jniñu rī cúu rī apóstol nuū maá Jítoto yō.

³ Te jnūhun yáha cáhán rī jehē maá rí nuū ñáyuu cácahān siquī rī.

⁴ Achí rí: Iyó derecho rī caji rī coho ri jeē cájēhe ñayuu núu cúní rī.

⁵ Te suni iyó derecho rī núu jeē cuní rī condeca ri ñn hermana candíje cuu ñasihí rí, caca ña jíin rí, nájñūhun iyó ñasihí Pedro jíin táca gá apóstol jíin tēe cácuu ñani maá Jítóho yō.

⁶ ¿Chí cájeni ni rō jeē maá rúhū-ni jíin Bernabé tú na derecho rī jeē stóo ri jniñu cása ha ri jeē cótecu rī, návāha nune ga rī nacani ri jnūhun vāha ya, chí naún?

⁷ ¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tí? Tú cuíti. ¿Te á suni tu iyó derecho rī cotecu rī siquī jnūhun ya naún?

⁸ Te ma cáni ni rō jeē tāca jēē cahán rī yāhá, máni maá jēē cácahān ñayuu ñayiví cúu. Chi nde maá ley yā jeē ni jēhe ya nuū Moisés, cáhán súcuan.

⁹ Chi cáhán nuū tútu ley yā: Ma chúhun ró ñunu yuhu stíquī, quíti jéxín trigo, achí. Te ndaā chi nasūu máni siquī stíquī cúu jeē ni cáhán yā súcuan.

¹⁰ Chi suni siquī maá yó ní cahán yā. Chi ley un ní jēhe ya jeē váha maá yó, chi stéén jeē tēe jítu jíin tēe jéxín trigo cánuú jeē nihín de sava un quívī ndutútú.

¹¹ Te suni súcuan ruhū jijnáhan ri jeē ní cataji ri jnūhun Espíritu ini anuá rō, ¿te á véyi

cúu jíin ró núu nastútú rí jeē cótecu rī nuū rō?

¹² Te núu sava ga tēe cástéén nuū rō, iyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chí sa suhva ni jendeyí ni rī coto máá rí jeē caji rī, návāha ma cási rī jeē cáca jnūhun vāha Cristo.

¹³ Te cájini rō jeē sutū ni cajejníñu ini templo, ni cacotecu de siquī jeē ní casocō ñayuu ini templo. Chi sutū ni cajejníñu nuū altar nuū ní casocō i quíti, suni ni cayejí de sava quíti ún.

¹⁴ Te suni súcuan ni ndacu máá Jítóho yō jniñu jeē tēe cánacani jnūhun jeē jnáma ya yohó, siquī jniñu un níhín de jeē cótecu de.

¹⁵ Te ruhū tu ní jíicán cuíti rī derecho rī yāhá, te suni nasūu jēē tēe ri jnūhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jēē quíhín ri jeē cuāha ró, chí casi jeē cúsiñ ni rī scáca ri jnūhun ya súcuan-ni.

¹⁶ Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi ñn jeē ní tejníñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya.

¹⁷ Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chí cánuú sáha ri, chí máá Yaā Díos ni tee ya jniñu siquī rī.

¹⁸ Núu súcuan te yāhu ri cúu

jeē cúsī ni rī jeē súcuan-ni nácani ri jnūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jnūhun ya.

19 Chi vēsú tú ni ñn ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo.

20 Núu íne ri jíin jnáhan ri hebreo te sáha ri nájnūhun cásáha i, návāha cuu scándíje ri i. Chi násáha ri maá rí nájnūhun tēe cáyihī chīji ley Moisés, návāha cuu scándíje ri i jeē cáyihī i chīji ley un, vēsú tuá yíhi ri chīji ley un.

21 Te suni násáha ri maá rí nájnūhun ñayuu tu cáyihī chīji ley Moisés, návāha cuu scándíje ri ñayuu ún. Te vēsú súcuan te yíhi ri chīji ley Yaā Dios, chi suu cúu ley Cristo jeē squícu ri.

22 Te núu íne ri jíin ñáyuu jeē ná tu ije jíin jnúhun ya, te sáha ri maá rí nájnūhun jeē ná tu ije ri jíin jnúhun ya, návāha cuu scándíje ga rī i. Núu súcuan te násáha ri maá rí núu ndese cándāa tāca ñáyuu, návāha tācá-ni modo un te cuu scándíje ri sava i.

23 Tāca yáha sáha ri jeē siquí jnúhun jeē jnáma ya yohó, návāha suni nihīn rī tahū jeē ndíso jnūhun ya.

24 Je cájini rō jeē tēe cájini carrera, jendaá chi ndihi de cájini, te ñn-ni de cundeyí níhīn premio. Te suni súcuan nducú ndéyí maá ró squícu ró, návāha nihīn rō premio nuū yā.

25 Te tāca tēe cúní cundeyí síquī ñn deporte, chi cáscuáha de te cándito de máa de. Súcuan cásáha de návāha nihīn de ñn premio jeē cúu corona ndaha yújnu jeē náa yachī. Te máa yó chi sa suhva cánducú ndéyí yó návāha nihīn yō ñn premio jeē ma náa cuíti.

26 Te máa rí suni nducú ndéyí rí nájnūhun tēe cájini, te tu nducú ndéyí cāha rí. Te sáha ri nájnūhun tēe cácajnáhan juego jeē tu jéhe iyú de, chi quée jniñu sáha ri.

27 Chi sa suhva stóho ri yiqui cúñu rī, te stíhví ni rī maá rí squícu ri. Chi vēsú ni stíhví ni rī inga ñayuu jeē nducú ndéyí i, te núu tu nducú ndéyí maá rí te snāa rī premio rī.

Siquí jeē ma chíñúhún i ídolo

10

1 Hermano jijnáhan ró, cúní rī jeē na jécūhun ni rō ndese ni cajica jíi yō jenahán. Chi ndihi de ni cajica chīji vicō jeē ni stéén ichi nuū de, te ndihi de ni cayāha mēhñú ndute Mar Rojo jeē ní cusín, ni nune ichi.

2 Súcuan cúu jeē ní canduu ñnuú ndihi i jíin Moisés, chi ni candiquín i de chīji vicō jíin méhñu mar.

3 Te ndihi i chi ñnuú-ni ni cayeji i alimento jeē ni jéhe máa Espíritu.

4 Te suni ndihi i ni cajihī ndute jeē ni jéhe Espíritu. Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájnūhun cava

un jéē jéhe ya ndute cotecu yō ní cáni.

⁵ Te vēsú súcuan te cuehē i ni cunīhni ni i, te tu ní cúsiī ni Yaā Dios jíin i, te jeē yúcuān ní cajihī i nuū ñúhun téhé.

⁶ Te tāca jéē ní cuu ún, ñn ejemplo cúu nuū yō, návāha ma ndíyo ni yō tāca jéē neé, nájñūhun ni candiyo ni ñayuu ún.

⁷ Te ma chiñúhún ró ídolo, nájñūhun ni casáha sava i. Chi súcuan cáhán nuū tútu īī: Ní cacucōo ñayuu ún, ni cayeji i ni cajihī i vico ídolo, te ni ndocuñī i ni cajita jéhé i, áchí.

⁸ Te ni ma cáca jnéni ró nájñūhun ni casáha sava i, te ni cajihī ocō unī mil i jeē ñn quivī-ni.

⁹ Te ni ma sáha ró jniñu jeē squití ni rō Jitoho yō, nájñūhun ni casáha sava i, te ni cajihī i jeē ní catuu coō i, ni sáha ya.

¹⁰ Te ni ma cahán sōó ró síquī Yaā Dios, nájñūhun ni cacahān sōó sava i, te ni cajihī i jeē ní jehni ndajéhé yā i.

¹¹ Te tāca jéē ní cuu ún, chi ñn ejemplo cúu nuū yō. Te súcuan yósó núū tútu návāha na chūhun vāha ni maá yó. Chi cácuu yó ñayuu cátecu quivī cuándihī ñayivī.

¹² Núu súcuan te róhó jéē cájeni ni rō jeē cáhīin nīhin ró jéē ma sáha ró cuéchi, coto má quivī ró cuéchi.

¹³ Chi máni íyó jéē nducú squivī róhó cuéchi, te ñnuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jñūhun jeē vihyá gá coto

ndee jexeén róhó vēsú jeē cúu cundeyí ró jíin. Chi sa suhva núu vēji jeē nducú squivī róhó cuéchi, te chindéé ñáhán yá rohó quenda ró te cundeyí ró síquī.

¹⁴ Ñánī mánī, ma chiñúhún cuitī rō ídolo núu súcuan.

¹⁵ Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jñūhun cáhán rī.

¹⁶ Máá copa īī jeē cájicān tahu yō jehē, suu cájihī cáhnu yó jéē steén yō jeē ñnuú cúu ndihī yó, chi ni jeti niñī Cristo jeē síquī yō ná ni jihī yā jicā cruz. Te pan jeē sacuéchí yó cáyeji cáhnu yó, stéén jeē ñnuú cúu ndihī yó síquī jeē ni jéhe Cristo yiqui cúñu yā ni jihī yā jehē yō.

¹⁷ Te vēsú cuehē yō iyó, te ñn-ni ñayuu cácuu yó, chi ñn-ni pan un cáyeji cáhnu yó síquī jeē cácandíje yó.

¹⁸ Condēhe ró ndese casáha ñayuu Israel. Tāca téē jeē yéji quiti jeē ni sócō nuū yā, chi ñnuú-ni cúu ndihī de síquī jeē cáyeji de jeē ni sócō ún.

¹⁹ Núu súcuan te cáhán rī jeē tu ndé jéjñīñu ídolo, ni tu jéjñīñu cúñu jeē ni sócō nuū ídolo, chi ñnuú cúu jíin táca gá cúñu.

²⁰ Te suni cáhán rī jeē ñayuu tu cájini jñūhun Yaā Dios, núu cásocō i, te nuū tachī cásocō i, nasuu núu Yaā Dios. Te tu cúnī rī jeē cuajñīñu ró núu tachī.

²¹ Ma cúu coho ró copa maá Jitoho yō te núu cájihī ró jéē ni sócō nuū tachī. Te ma cúu caji rō nuū mesa Jitoho yō te núu cáyeji rō jeē ni sócō nuū tachī.

22 Ma quívi nduu yō súcuan jíin táchī, návāha ma cucuñí Jítoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

Ndihī chí sáha yó jíin jnúhun cúndáhú ni

23 Te ndaā cúu jeē cácahān jeē ndihī-ni jniñu íyó váha sáha yó núu ndese cúní yō. Te tuú chí nasūú ndihī sáha jeē quéndō vāha ánuá yō. Ndhī chí cuu sáha yó, te vēsú súcuan te nasūú ndihī sáha jeē ije jnáhan yó jíin jnúhun ya.

24 Chí cánuú sáha yó jéē váha jnáhan yó, nasūu máni máá jéē váha máá yó.

25 Cuu caji rō ndihī-ni cūñu cúyāhu nuū yáhu, te ma cájnūhun rō ni ma cáni ni rō núu jeē ni sócō nuū ídolo cúu.

26 Chí cuenta maá Jítoho yō cúu ñayívi jíin ndivii jeē iyó ini, te cuu cuajniñu yó.

27 Te núu ñn tēe tu cándíje, cana de róhó caji rō jíin de, te núu cácuni rō quihīn rō, núu súcuan te caji rō táca jéē cáni de nuū rō. Te ma cájnūhun rō ni ma cáni ni rō núu jeē ni sócō nuū ídolo cúu.

28 Te núu cachí ñn i nuū rō jeē cūñu ni sócō nuū ídolo cúu, yūcuán na te ma cáji rō, chí siquī jeē jéni ni i jeē cuēchi cúu, te tu cúní rō sáha rō jéé quívi i cuēchi.

29 Te súcuan cáhān rī siquī jeē inga i cájeni ni i jeē cuēchi cúu, te nasūu jéē súcuan cájeni ni maá rō.

Te sanaa te cahān ñn ró: ¿A tu iyó libre rī caji rī jeē cúní

maá rí, vēsú cájeni ni inga i jeē cuēchi cúu?

30 ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō.

31 Tuú chí ndihī jeē sáha rō, vēsú jeē caji rō chí jéē coho rō, chí na-ni jniñu sáha rō, ndihī na sáha yíñúhún rō jíin Yaā Dios, návāha cuni ñayuu jeē luu cújéhu ya.

32 Te ma sáha rō jniñu jeē squívi rō ñayuu nuū cuēchi, cúu ñayuu hebreo, cúu ñayuu táca nación jeē tu jíní jnúhun ya, cúu ñayuu cácañíje Yaā Dios.

33 Te ruhū chí ndúcú rí jeē na cúsi ni táca ñayuu jíin táca jniñu sáha rī. Tu ndúcú rí jeē váha máá-ni rī, chí sa ndúcú rí sáha rī jeē váha cuehē ñayuu, návāha cácu i.

11

1 Te na ndácu ró ruhū jijnáhan rō, najnūhun ndácu máá rí Cristo.

Siquī ndese cánuú sáha ñahan cándutútú

2 Váha casáha rō, hermano, jeē niní cánucūhun ni rō ruhū, te cándihvi ni rō jíin táca jniñu jeē ni steén rī nuū rō.

3 Te cúní rī jeē na jécūhun ni rō jeē Cristo cúnuú yá nuū táca tée. Te tēe cúnuú de nuū ñasihí de. Te Yaā Dios cúnuú yá nuū Cristo.

4 Núu ñn tēe ñúhun de lélú te jícán tahú de chí nácani de jnúhun nuū ndutútú ñayuu cácañíje, núu súcuan te jéhe de jnúhun canu máá de.

5 Te sa núu ñn ñahan tu ndési xinī ña te jícán tahú ña chí

nácani ña jñūhun, núu súcuan te jéhe ña jñūhun canu máá ña, chi ñn-ni cúu un núu ní sáte xinī ña.

⁶ Chi núu tú casi ña xinī ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jeē sáte ña ña, te na cásí ña núu súcuan.

⁷ Te tēe chi ma cásí de xinī de, chí máá de cúu muestra jeē steén ndese cúu Yaā Dios jeē cujéhnū ya. Te ñahan chí steén ña jeē cujéhnū tēe.

⁸ Chi ná ni sáha ya tēe, te nasūu jíin yiqui ñahan ni sáha ya, chí sa suhva jíin yiqui tēe ni sáha ya ñahan.

⁹ Te ñahan chí ni cuvāha ña jeē siquí tēe, nasūu tēe jeē siquí ñahan.

¹⁰ Te jeē yúcuan cánuú jéē cóndesi xinī ñahan, te suu steén jeē cujéhnū tēe, chí suni cándehé ndajéhé yā ndese sáha ña.

¹¹ Te vēsú súcuan te yóhó jéē candíje yó, chí jíin yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe.

¹² Chi vēsú ni sáha ya ñahan jíin yiqui tēe, te vijna cácu tēe chíji ñahan, te máá Yaā Dios cúu jeē sáha tēcá-ni.

¹³ Na sáha máá ró cuenta ¿á íyó vāha núu tu ndesi xinī ñahan te jícán tahu ña nuū Yaā Dios?

¹⁴ Chi sáha yó cuenta jeē ini ñayivi yáha, núu cáni ixi tēe te cúcanu de sáha.

¹⁵ Te ñahan chí sa vāha jító ña te núu cáni ixi ña, chí suu ni jēhe ya jeē cóndesi xinī ña.

¹⁶ Te núu ndé ñn ñayuu cuní i cahān i siquī jñūhun yáha, te ruhū jíin táca grupo ñayuu

cácandíje nuū Yaā Dios, tú na inga costumbre jejnúhún rí siquī jñūhun yáha.

Jeē castívi i siquī Cena Jitoho yō

¹⁷ Te íyó inga jñūhun cánuú cahān rī jíin ró, chí tu cúu cahān rī jeē vāha cásáha ró. Chí nuū cándutútú ró te tu sáha jeē quéndōo vāha ga rō, chí sa jeē castívi ró.

¹⁸ Xīhna jñūhun yáha cáhán rī, jeē nihín rī jñūhun jeē nuū cándutútú ró te cácusñn ni rō. Te jéni ni rī jeē ndaā cúu.

¹⁹ Chi níni coo sava ró jéē cusñn ni, návāha natūu ndé-ni cúu jeē cácandíje vāha mēhñu ró.

²⁰ Te jeē cácusñn ró súcuan nuū cándutútú ró, te nasūu cena maá Jitoho yō cúu jeē cáyeji rō núu súcuan.

²¹ Chi núu cáyeji rō, te tēcá ñn ñn ró cúní caji xīhna gā vēsú jñahan ró. Te súcuan te sava ró tu cániñn, te cájiñ sōco, te sava ró cáñajīni jeē cájihi cuehē.

²² ¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu íyó yíñúhún ró ini vehe nuū cándutútú ñayuu cácandíje Yaā Dios, chí cásáha ró jéē cácucañu ñayuu jeē tú na vé névāha. ¿Ndesese cahān rī jíin ró núu súcuan? ¿A cáhán rī jeē vāha cásáha ró? Tuú chí nasūu jéē vāha cúu jeē casáha ró súcuan.

Siquí jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

23 Chi jnūhun yáha jéē ní nastéén rī nuū rō, chi nuū maá Jítoho yō ni nihīn rī: Jeē maá jecuáa jeē ní nastúu de Jítoho yō Jesús, te ni quihin ya pan.

24 Te ni nacuatáhú yá, te ni tahu cuéchi yá, te ni cahān yā jín tée cáscuáha jín yá: Quihin te caji rō jijnáhan rō, chi yāha cúu yiqui cúñu rī jeē ní sócō rī jeē siquí rō. Te níni caji rō súcuan jeē cáñuhun ní rō ruhū jeē ní jíhī rī jehē rō. Achí yá.

25 Te suni súcuan ni quihin ya copa ná ni cuu ni cuxíni ya jín de, te ni cahān yā: Jeē ñúhun copa yáha cúu niñī rī jeē sácútu contrato jeé jeē jnáma rī ñayuu. Te tāca jínu jeé cájhi rō, te nucūhun ní rō ruhū. Achí yá.

26 Chi tāca jínu jeē cáyeji rō pan un te cájhi rō copa un, súcuan cástéén rō jeē ní jíhī Jítoho yō jehē yō. Te súcuan na sáha rō ndé quivī ndíji ya.

Ndese caji yíñúhún i Cena yā

27 Te núu na-ni ñayuu caji i pan un chí coho i copa Jítoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu iyó yíñúhún i siquí yiqui cúñu maá Jítoho yō jín siquí niñī yá.

28 Núu súcuan te coto ndee rō maá rō núu iyó ndoo ánuá rō jeē tú cuéchi rō. Te sáa te cuu caji rō pan un te coho rō copa un.

29 Chi núu ñn ñayuu tu yéji tu jíhi yíñúhún i te tu nucūhun ní i jeē yiqui cúñu yā cúu, ñayuu

ún chi nihīn i castigo núu na cáji i coho i.

30 Jeē yúcuan cúu jeē iyó cuéhē ñayuu cácuñu jín jeē ní cacuxíi, cáhiyo mēñu rō. Te sava i je ni cajihī.

31 Te núu coto ndee yō maá yó nde ná tu caji yō, te Jítoho yō ma cuáha ya castigo yohó.

32 Te núu Jítoho yō jéhe ya castigo yohó, te súcuan stóho ya yohó návāha ma jnahnú ndetū yō jín ñayuu ñayīví.

33 Ñánī mánī, núu súcuan te jeē cándutútú rō jeē cáji rō Cena yā, te condetu rō te caji inuú rō.

34 Te núu ñn ñayuu jíi i sōco, te xīhna gā na cáji i vehe i návāha ma stívi i nuū cándutútú rō. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

Siquī tāca táhū jeē jéhe Espíritu

12

1 Hermano, cúní rī jeē na jécūhun ní rō siquí tāca táhū jeē jéhe Espíritu nuū yō, suu tāca modo jejniñu ñn ñn yó núu Yaā Dios.

2 Te cájini rō jeē ná ni cuu rō ñayuu ná tu candíje, te ni cacondíhvī ní rō ní cachíñúhún rō ídolo ñihín.

3 Te vijna te na jécūhun ní rō jeē núu ndé ñayuu cahán ndevāha i siquí Jesús, te nasūu jín poder Espíritu Yaā Dios cúu jeē cahán i súcuan. Te ni ñn i ma cúu cahān i jeē Jítoho i cúu Jesús, te núu tu ndéé poder Espíritu Santo ini i.

⁴ Te s̄in s̄in tahū jéhe ya jeē cuajniñu ñn ñn yó nuū yā, te ñn-ni máá Espiritu cúu jeē jéhe.

⁵ Te s̄in s̄in jéjniñu yó, te nuū maá ñn-ni Jitoho yō jejniñu yó.

⁶ Te s̄in s̄in modo sáha yó jniñu ya, te ñn-ni Yaā Dios cúu jeē sáha jniñu un jín yó.

⁷ Te nuū ná ñn ná ñn yó ní jéhe Yaā Dios tahū jeē sáha Espiritu yā jín yó, návāha na sáha yó jéē ije jnāhan yó jín jnúhun ya.

⁸ Chi sava yó ní canih̄in tahū jeē ndichí cáhán yō jnúhun ya, sáha máá Espiritu. Te sava ga yō ni canih̄in yō jeē cúu jécūhun vāha ni yō te castūhun yó, te suni máá Espiritu sáha.

⁹ Te nuū sava ga yō ni jéhe ya tahū jeē cúu cándije ñhin yó jéē sáha ya jeē jicán yō, te sava ga yō cúu sáha yó jéē ndúvāha ñayuu cácuñu, te suni máá Espiritu sáha.

¹⁰ Te sava ga yō cúu sáha jniñu jéhnú jín fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuū Espiritu yā chí tuú. Te sava ga yō ni ñih̄in tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnāhan yó jín inga yuhu ún.

¹¹ Te tāca táhū yáha, chi ñn-ni máá Espiritu sája, te s̄in s̄in jéhe ya nuū ñn ñn yó, ndese nújnahan ni maá yá.

Ndih̄i yó cúu nájñuhun ñn na

yiqui cúñu

¹² Chi nájñuhun ñn yiqui cúñu iyó cuéhē parte, súcuan cúu yó jín Cristo jeē cúu yó nájñuhun yiqui cúñu yā, chi ñn na cúu yó jín yá. Te vēsú cuehē parte cácuu yó te ñn-ni cúu yó, nájñuhun ñn yiqui cúñu jeē iyó cuéhē parte.

¹³ Chi ñn na ni canduu yó jín yá ni sáha ñn-ni máá Espiritu ná ni cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñayuu chí téé sájniñu cuenta maá. Te ndih̄i yó chi ñn-ni Espiritu ni canih̄in yō.

¹⁴ Te ñn yiqui cúñu chi nasūú ñn-ni parte cúu, chi sa cuehē parte cúu.

¹⁵ Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín.

¹⁶ Te núu sōho cahān: Nasūu cuenta yiqui cúñu cúu ri, chí nasūu tinūu cúu ri, te tuú chí parte yiqui cúñu cúu nahín.

¹⁷ Núu ñí yiqui cúñu yō cúu tinūú, ¿te ndese cuni sōho yó núu súcuan? Te núu ñí yiqui cúñu yō cúu sōho, ¿te ndese cuaan yó xícō núu súcuan?

¹⁸ Te Yaā Dios ni chujnáhan ya ñn ñn parte yiqui cúñu, nájñuhun cúní yā jeē coo.

¹⁹ Chi núu ñn-ni parte cúu ndih̄i, te nasūú ñn ñí yiqui cúñu cúu núu súcuan.

²⁰ Te tuú chí cuehē parte iyó, te ñn-ni yiqui cúñu cúu.

²¹ Te ni ma cúu cahān tinūu jín ndaha: Tu jíní ñúhún rí rohó. Te ni xinī ma cúu cahān jín jéhe: Tu jíní ñúhún rí rohó.

22 Chi sa suhva tāca parte yiqui cúñu jeē jéni ni yō jeē núu ga fuerza, suu cúu jeē cánuú gá.

23 Te tāca parte yiqui cúñu jeē jéni ni yō jeē tu cáa vāha, suu cúu jeē yucún gá chühun yó sahma. Te parte jeē tú-ni luu cáa, sa vāha ga jési yō.

24 Chi parte jeē lúu cáa, tu cánuú jéē condihyū. Chi súcuan ni chujnáhan Yaā Dios yiqui cúñu, jeē yucún gá ndító yó jéē tu cáa luu.

25 Súcuan ni sáha ya návāha ma cusín tāca parte yiqui cúñu, chi sa chindéé ñájnáhan vāha jíin jnáhan.

26 Te núu jétú ñn parte yiqui cúñu, te suni níí cáhnu-ni jétú. Te núu ñn parte ndító yucún yó, te suni ndihi-ni parte quéndōo vāha.

27 Te rōhó jíjnáhan ró chi nájnūhun yiqui cúñu Cristo cácuu ró, chi ñn na cúu yó jíin yá. Te ná ñn ná ñn ró cúu ñn ñn parte yā.

28 Núu súcuan te sñn sñn jniñu ni jēhe Yaā Dios nuū tāca ñayuu cácañdeje jeē cácuu i nájnūhun ñn ñn parte yā: Te suu ñn parte yā cúu tāca apóstol jeē ní jeni ya xīhna gā jeē scáca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñayuu casáha jniñu jéhu jíin fuerza yā, jíin ñayuu casáha jeē ndúvāha ñayuu cácuu, jíin ñayuu cachíndéé ñájnáhan, jíin ñayuu cándiso jniñu, jíin ñayuu cácañ sñn sñn yuhu jeē tu cájecūhun ní.

29 ¿A ndihi yó cácuu apóstol,

chí naún? ¿A ndihi yó cánacani jnūhun? ¿A ndihi yó cástéén? ¿A ndihi yó cuu sáha jniñu jéhu?

30 ¿A ndihi yó cuu sáha jeē ndúvāha ñayuu cácuu? ¿A ndihi yó cuu cañán sñn sñn yuhu? ¿A ndihi yó cuu nacastūhún yuhu ún, chí naún? Tuú chi sñn sñn tahū ní canihñ yō.

31 Núu súcuan te na cóndihvī ní rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñn jeē vāha ga nuū tāca gá tahū ún, suu jnūhun cúndáhú ní jnáhan.

Jnūhun jeē cundáhú ní jnáhan

13

1 Vēsú núu cuu cañán yō tijni yuhu jeē cácañ ñayuu chí jéē cácañ ndajéhé Yaā Dios, te núu tu cúndáhú ní yō jnáhan yó, te jnūhun cañán yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu.

2 Te vēsú cuu nacani vāha yó jnúhun ya, te cuu jecūhun ní yō tāca jnúhun sáhi yá jíin tāca jnúhun ndíchí, te núu tu cúndáhú ní yō jnáhan yó, te tu ndé jéjniñu cuiti yō núu súcuan. Te vēsú cuu cándije téyí yó jeē nde cuu cañán yō jeē cújiyo yucu, te núu tu cúndáhú ní yō jnáhan yó, te tu ndé jéjniñu cuiti.

3 Te vēsú na sája yó ndihi jeē névāha yó cuu ñayuu ndahú, te vēsú núu cuáha yó jnúhun cahmu ñayuu yohó jéē siquí

jnūhun ya, te núu tu cúndáhú ni yō jnáhan yó, te tu ndé jéjníñu cuiti.

⁴ Ñayuu cundáhú ni chi íyó paciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máá.

⁵ Tu sájéē ni, tu ndúcú jéē cúu máá-ni, tu quítí ni, tu ñúhun ni jnūhun quítí ni.

⁶ Tu cúsī ni jíto jniñu néé cásáha jnáhan, chi sa cúsī ni jíin jniñu váha.

⁷ Ñayuu cundáhú ni chi ndihi jéhnde ni ndoho jehē jnáhan, te tu jécuiñī jeē candíje jnáhan, jíin jéē ñúhun ni jeē squícu jnáhan, jíin jéē jéndeýí ni jíin jnáhan.

⁸ Jnūhun cúndáhú ni chi ma náá cuiti. Te quiji quivī jeē tuá nacani i jnūhun, ni tuá cahān i tijni yuhu, ni tuá jíni ñúhún jnūhun ndíchi.

⁹ Chi tu jíni váha váha yó vijna, te jnūhun cánacani yó suni jecu-ni cúu.

¹⁰ Te núu na quíji quivī jeē cúni yō ndihi, yūcuán na te tuá coo jeē jíni yō jecu-ni.

¹¹ Ná ni cuu yó súchi lúlí te ni cahān yō, ni jeni ni yō, ni jécūhun ni yō nájnūhun sūchi lúlí. Te ná ni jehnu yó te ni stóo yó modo sūchi lúlí.

¹² Te suni súcuan, jecu-ni jécūhun ni yō vijna, nájnūhun jeē jíto yó núu ñn espejo jeē tú ndijin váha. Te cúcuéé gá te jécūhun cájí ni yō ndihi. Te vijna chi jecu-ni jíni yō, te cúcuéé gá te cuni váha yó ndese Yaā cúu ya, nájnūhun jíni váha ya yohó ndese ñayuu cúu yó.

¹³ Núu súcuan te íyó únī jnūhun jeē quéndōo cutú níí cáni: Jeē candíje ñihin yó jéē squícu ya jeē ni jéjnūhun ya, jeē cócuhun ni yō táca jéē váha coo, jíin jéē cundáhú ni yō jnáhan yó. Te jnūhun cúndáhú ni chi jéhnú ndasí gá cúu nuū táca jéē yáha.

Siquí jeē cácahān i tijni yuhu

14

¹ Na cóndihvī ni rō cundáhú ni rō jnáhan ró, te suni condihvī ni rō cacān rō táca táhū jeē jéhe Espíritu. Te tahū jeē cánuú gá cúu jeē nácani ró jnúhun ya.

² Chi tēe névāha tahū jeē cahán de tijni yuhu jeē tu jécūhun ni de, chi máá-ni Yaā Dios jíni jeē cahán de, nasūu ñáyuu. Chi ni ñn i ma jécūhun ni jeē cahán de. Chi sáha Espíritu jeē cahán de táca jnúhun yísāhí.

³ Te sa suhva tēe nácani jnūhun ya, chi jíin ñáyuu cahán de návāha ije i jíin jnúhun ya, te stíhvī ni de i, te cahán ndeyí ni de jíin i.

⁴ Te tēe jeē cahán tijni yuhu, chi máá-ni de ije jíin jnúhun ya. Te tēe jeē nácani jnūhun ya, chi sa suhva sáha de jeē ñáyuu cácaandíje ije i jíin jnúhun ya.

⁵ Nújnahan ni rī jeē ndihi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhnú ga jniñu sáha tēe nácani jnūhun ya vésú tēe cahán tijni yuhu. Chi núu tú tēe castūhun jnúhun cahán

de, te ma cuajníñu jeē íje ñayuu cá candíje.

6 Jeē yúcuán hermano jijnáhan ró, núu na jéé rī nuū rō, te núu cahān rī tijni yuhu jeē tu jécūhun ni rō, ¿te ndé cuajníñu ún? Te núu na cáhán rī ññ jeē ni stéén yā, chí ññ jeē cútūhva ró jnúhun ndaā, chí ññ jeē nácani ri jnúhun ya, chí ññ jeē steén rī nuū rō, yúcuán cúu jeē cuajníñu.

7 Sáha yó cuenta jeē nájnūhun instrumento música, vésú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta?

8 Te núu corneta tu jécú cájí, te ni ññ tēe ma sátūhva de quihñ de guerra.

9 Te suni súcuán róhó jijnáhan ró, núu tu cáhán cájí ró jnúhun jecūhun ni ñayuu, ¿te ndese cuni i na vé cahán rō? Chi jnúhun cáhán rō ndíso tachī cuahān jíin.

10 Te ndaā chí íyó cuéhē yuhu ini ñayīví, te tācá yuhu chí íyó ñáyuu jécūhun ni.

11 Te núu tu jécūhun ni yō yuhu cáhán ññ tēe, te cúu yó nájnūhun tēe ñuu jicá núu tēe cáhán, te suni nájnūhun tēe ñuu jicá cúu de nuū maá yó.

12 Jeē yúcuán róhó jéē cácuni ndasí ró nihñ rō tahū jeē jéhe Espíritu, na cácan rō tahū jeē sáha jeē íje ñayuu cá candíje jíin jnúhun ya.

13 Núu súcuán te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún.

14 Chi núu jicán tahú yō jíin inga yuhu, te maá ánuá-ni yó cúu jeē jicán tahú, te tu ndé jéjníñu nuū jeē níjnūni yō.

15 ¿Ndese sáha yó núu súcuán? Na cácan tahú yō jíin ánuá yō, te suni jíin jéē níjnūni yō. Na cáta yó yaa íi jíin ánuá yō, te suni jíin jéē níjnūni yō.

16 Chi núu nácuatáhú ró máni jnúhun jeē ní quiji nuū anuá rō te tu jécūhun ni rō, núu súcuán te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnúhun cáhán rō.

17 Ndaā chí vāha nácuatáhú maá ró, te inga de chí tú na vé nihñ de jeē íje de jíin jnúhun ya.

18 Na cútahū rī nuū Yaā Dios jeē cahán gā rī jíin tijni yuhu vésú maá ró jijnáhan ró.

19 Te vésú súcuán te núu íne ri nuū cáyūcu tútú ñayuu cá candíje, te nújnahan gā ni rī cahān rī uhūn-ni jnúhun jeē jécūhun ni i te stéén nuū i, vésú jeē cahán rī uxī mil jnúhun jíin inga yuhu jeē tu jíni cuiti i.

20 Hermano jijnáhan ró, ma cáni ni rō nájnūhun sūchi lúlí, chí sa suhva na íje ró jéē jecūhun vāha ni rō. Te coo ró nájnūhun sūchi lúlí jéē tu jíni i jniñu néé.

21 Te yósó núu tútu ley yā jehán: Jíin jnúhun cácahān tēe inga yuhu, jíin jnúhun cácahān tēe ñuu jicá, sáha ri jeē cúni sōho ñayuu yáha jnúhun ri. Te ni jíin súcuán ma sáha i cuenta jnúhun cahān rī, achí maá Jítóho yō.

22 Núu súcuán te tahū jeē

cahán yō tijni yuhu, yūcuan cúu ñn jeē steén poder Yaā Dios nuū ñáyuu tu cácanđije, nasūu núu ñáyuu cácanđije. Te jeē nácani yó jnúhun ya, yūcuan cúu jeē steén nuū ñáyuu cácanđije, nasūu núu ñáyuu tu cácanđije.

23 Núu súcuan te núu ndihi ró ñáyuu cácanđije cáhīyo tūtú, te tāca ró cácahān sñn sñn yuhu, te quivicoo ñayuu tu jécūhun ni jín ñáyuu tu cácanđije, ¿te á má cahán i jeē ní canduu loco rō?

24 Te núu tāca ró cácanani jnúhun ya, te núu quivi ñn tēe tu cácanđije chí ñn tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jín jnúhun cácanani ró.

25 Te nucūhun ni de tāca jéē ní jeni yuhu ni de jín ánuá de. Yūcuán na te jecuiñi yití de te chiñúhún de Yaā Dios. Te cahān de jeē íne ndije Yaā Dios jín ró jijnáhan ró.

Siqui jeē yucún yñúhún na cóo nuū ndutútú yó

26 Núu súcuan hermano jijnáhan ró: Nuū cándutútú ró te tāca ró coo ñn yaa iī cata ró, chí ñn jnúhun stéén rō, chí ñn jnúhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jéē nácastūhun ró jnúhun inga yuhu ún. Te ndihi ún na sáha ró návāha ije ñayuu cácanđije jín jnúhun ya.

27 Te núu cáhīyo tēe cahān inga yuhu, te na cahán uū de chí únī-ni de, te ná ñn ná ñn de na cahán. Te suni jini ñúhún

jeē nácastūhún ñn tēe jnúhun ún.

28 Te núu tu íyó tēe jeē cúu nácastūhun jnúhun ún, te tēe cácahān inga yuhu, vāha ga ma cahán de nuū cándutútú ró, te na cahán maá-ni de jín Yaā Dios.

29 Te suni súcuan tēe cácanani jnúhun, na cahán uū de chí únī de, te sava ga rō nacani ni rō núu íyó ndāā jeē cácahān tēe ún.

30 Te núu inga tēe néne ni nihín de ñn jnúhun jeē ni stéén yā nuū de, núu súcuan te tēe cahán na jécuiñi jeē cahán de, návāha cahān inga tēe ún.

31 Te súcuan te ná ñn ná ñn ró cuu nacani ró jnúhun jeē steén yā nuū rō, návāha cutūhva ró te coo ndeyí ni rō.

32 Te tēe cácanani jnúhun, jini ñúhún cuatáhú de jeē nácani inga tēe jnúhun te jecuiñi jeē cahán maá de.

33 Chi Yaā Dios cuní yā jeē coo nayúú méhñu ró, násūu jéē sacā núu cuvaā rō.

Te nájnūhun cásáha tāca grupo hermano cácanđije,

34 suni súcuan tācá ñahan cándutútú jín ñáyuu cácanđije, na cóo nayúú ña. Chi tú vāha jeē cahán ña, chi sa cuatáhú ña nájnūhun cahán tutu ley yā.

35 Te núu cuní ña cucáhu ni ña ñn jnúhun, te nde vehe na cájnūhún ña yñ ña. Chi jnúhun canu cúu jeē cahán ñn ñahan méhñu núu cándutútú ró.

36 Te na sáha ró cuenta jeē tu ní quénda jnúhun Yaā Dios nuū maá ró jijnáhan ró, te nasūu máá ñn máá ró ní cániñ jnúhun ya.

37 Núu ìn tēe jéni ni de jeē tēe nácani jnūhun ya jín tēe névāha Espíritu cúu de, núu súcuan te na cuájnuhún de jeē jniñu ní ndacu Jitoho yō cúu jeē tēe ri yāhá.

38 Te núu tu jétáhú de jnūhun yāha, suni ma cuatáhú yó de.

39 Núu súcuan, ñānī mánī jijnáhan ró, na cóndihvī ni rō nacani ró jnúhun ya, te ma cásī rō nuū tēe cácahān sīn sīn yuhu.

40 Te yúcún yíñúhún na sáha ró táca jniñu.

Jnūhun jeē ní natecu Cristo

15

1 Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhiin nīhin ró jín.

2 Te suni jín jnúhun ún te ni jnama ya rohó, te núu cáhiin nīhin ró jín jnúhun ni nacani ri nuū rō, te núu tu ní cácañdije cāha ró.

3 Chi jnūhun cánuú gá jeē ni níhīn maá rí ni nastéen rī nuū rō: Jeē ni jíhī Cristo siquī cuéchi yó, nájnuhun je cáhán tutu ìi nde jenahán.

4 Te ni quindūji ya, te ni natecu yā nuū uní quivī, nájnuhun cáhán tutu ìi.

5 Te ni nane ya nuū Pedro. Te sáa te ni nane ya nuū ndihúxí gá apóstol.

6 Te sáa te ni nane ya nuū vihyá gá uhūn ciento hermano jeē cáyūcu tūtú. Te sava

i técu gā nde vijna, te sava i je ni jihī.

7 Te sáa te ni nane ya nuū Jacobo, yūcuán na te nuū ndihī ga apóstol.

8 Te jeē sándihí na te ni nane ya nuū maá rí. Te nájnuhun ìn jeē ní cacu yúte, súcuan cúu jeē ìn sanaa-ni te ni nduu ri apóstol.

9 Chi tēe núu ga nuū táca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácañdije nuū Yaā Dios.

10 Te siquī jeē ni sáha Yaā Dios jeē vāha ruhū, jeē yúcuan cúu ri apóstol vijna. Te jeē ni sáha ya jeē vāha ruhū, chi tú cāha ní cúu, chi sa ni scāca ga rī jnūhun ya vēsú táca gá tēe apóstol. Te nasūu máa rí ni sáha, chi Yaā Dios ni sáha ya jeē vāha un jín rí.

11 Núu súcuan te vēsú ruhū chí táca gá tēe ún, súcuan cánacani ri jnūhun, te súcuan ni cacañdije ró.

Jnūhun jeē natecu ndīyi

12 Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jēe ma nátecu ndīyi?

13 Chi núu jeē tú natecu ndīyi, te suni tu ní nátecu Cristo nuú.

14 Te núu jeē tu ní nátecu Cristo, te cánacani cāha rí jnūhun ya nuú, te suni cácañdije cāha ró núu.

15 Chi núu jeē súcuan cúu núu, te cácuu ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te

núu jeē tú natecu ndije ndīyi, núu súcuan te tú ndaā jeē ní nastécu Yaā Dios Cristo.

16 Chi núu tú natecu ndīyi, te ni Cristo suni tu ní nátecu yā nuū.

17 Te núu tu ní nátecu Cristo, te cácanđije cāha ró te cándiso īi gā rō cuēchi ró núú.

18 Te núu jeē súcuan cúu núú, te suni je ni cajnahnú ndetū ñayuu ni cacandíje Cristo.

19 Chi núu tú natecu ndīyi, te núu máá ĩn-ni síquī vida yáha ñūhun ni yō jeē sáha Cristo jeē váha yóhó, núu súcuan te ndahú ndasí gá cácuu yó vēsú tāca gá ñayuu, chí cácanđije cāha yó nuú.

20 Te tuú chí íyó ndáā jeē ní natecu Cristo mēhñu ndīyi. Te máá yá cúu jeē xihna gā ni natecu nuū tāca gá ndīyi jeē natecu.

21 Chi síquī jeē ni stívi ĩn-ni tēe Adán, te ni quejéé jhí ñayuu. Te suni súcuan síquī jeē ni sáha ĩn-ni tēe Cristo, te natecu ñayuu.

22 Chi nájnūhun cájihī ndihi yó síquī jeē cácuu yó yúcūn Adán, suni súcuan natecu ndihi yó síquī jeē yíhi yó ndaha Cristo.

23 Te ná ĩn ná ĩn ndese ndíquín jnáhan máá: Xihna gā Cristo ni natecu yā, te sáá te quivī ndíji ya te natecu tāca ñayuu yíhi ndaha ya.

24 Yūcuán na te jīnu tiempo, te snáā yā poder tācá enemigo jeē cujéhnū jín jéē ndácu jniñu jín jéē iyó poder. Te ndihi jeē ndácu ya jniñu nuū, nacuaña ya nuū Tatá yā Yaā Dios.

25 Chi cánuú jéē ndacu Cristo jniñu nde quiji quivī jeē quénde Yaā Dios poder tāca jéē jító uhū nuū Cristo, te stóho ya.

26 Te jeē sándihí na te snáā yā cuehyi jéhnī ñayuu.

27 Chi cáhán tutu īi jeē sáha Yaā Dios jeē cujéhnū Cristo síquī ndihi, te cuatáhú núu yā. Te jeē cahán jeē cujéhnū ya nuū ndihi-ni, te jíní vāha yó jéē maá Yaā Dios ma quíhi ya ndaha Cristo, chí Yaā Dios cúu jeē ni chíhi tācá un ndaha Cristo.

28 Te ná ni quivī ndihi ún ndaha Cristo, yūcuán na te suni máá Cristo jeē cúu ya Sēhe, quivī ya ndaha Tatá yā, Yaā jeē ní chíhi tācá un ndaha ya. Te súcuan te máá Yaā Dios jñi ya ndihi-ni.

29 Te íyó ñayuu cájendute jehē ndīyi. Te núu tú natecu cuiti ndīyi, ¿te najehē cájendute i jehē ndīyi núu súcuan?

30 Te ruhū jijnáhan ri, ¿najehē cúu jeē ndiquivī cájendeyí ni rī jító ri jnūndóho cuu rī, te núu tú natecu ndīyi?

31 Hermano, nájnūhun íyó ndáā jeē cúsi ni rī síquī jeē cácanđije ró Jítóho yō Jesucristo, suni súcuan íyó ndáā jeē ndiquivī nducú ñayuu cahni ruhū síquī jniñu ya.

32 Te jeē ní ndoho ri ni casáha tēe xeēn ñuu Efeso, jeē cácuu de nájnūhun quiti xéén, ¿te na vé nihín rī síquī un núu súcuan? Chi núu tú natecu ndīyi, te cuu cahán yō nájnūhun áchí ĩn jnūhun: Na

cúsī ni yō caji yō coho yó, chi sanaa te sajnē te cuu yō, achi yō nuú.

³³ Ma cuáha ró jnúhun stáhú ñáyuu rohó. Chi áchí ñn jnúhun: Núu cájica ró jíin ñáyuu neé, te stívi i róhó jéé tuá caca ndaā rō.

³⁴ Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuán cáhán rī návāha na cúcanu rō.

Ndese natecu ndíyi

³⁵ Te sanaa te cahān ñn ró: ¿Ndese natecu ndíyi? ¿Ndese coo yiqui cúñu i? achi rō.

³⁶ Tu jécūhun cuiti ni rō núu súcuán. Chi cúu nájnūhun jeē cátají ró táca tata chīji ñuhun návāha nane yucū i.

³⁷ Te tata jeē quívi chīji ñuhun, núu trigo chí inga tata, chi nasūu yúcū cúu, chi máa núnī-ni cúu.

³⁸ Te cuéé gá te cane, chi Yaā Dios ni jēhe ya yucū tata ún, ndese ni nujnahan ni maá yá, te ná ñn ná ñn tata chi sñn sñn cáa yucū ni sáha ya.

³⁹ Te suni súcuán tēcá yiqui cúñu, chi tú inuú cándāa. Chi sñn cáa ñáyuu, te sñn cáa quití, te sñn cáa saa, te sñn cáa chácá.

⁴⁰ Te suni súcuán cúu tēcá jéé ín andiví jíin táca jéé iyó ñáyiví. Te sñn luu cáa jeē ín andiví, te sñn luu cáa jeē iyó ñáyiví.

⁴¹ Te sñn ndíndēe níāndii, te sñn ndíndēe yóō, te sñn ndíndēe táca quími. Te tēcá ñn ñn quími chi suni sñn sñn ndíndēe.

⁴² Te suni súcuán coo jíin ndíyi jeē natecu. Ndíyi jeē chíndūji yó chi téhyū, te jeē nastécu yā chi ma cúu gā.

⁴³ Jeē chíndūji yó chi ndáhú cáa, te jeē nastécu yā chi luu cujénu. Jeē chíndūji yó chi tú na fuerza, te jeē nastécu yā chi coo fuerza.

⁴⁴ Jeē chíndūji yó chi ñn yiqui cúñu cuenta ñayiví cúu, te jeē nastécu yā chi ñn yiqui cúñu cuenta Espíritu yā cúu. Chi iyó yiqui cúñu cuenta ñayiví, te suni iyó yiqui cúñu cuenta Espíritu.

⁴⁵ Chi súcuán yósó núu tútu ñi: Adán, tēe xīhna ñúhún, ni cuvāha de jíin vida cuenta ñayiví, áchí. Te Cristo cúu nájnūhun inga Adán uū, te máa yá cúu Espíritu jeē jéhe vida.

⁴⁶ Te nasūú yiqui cúñu cuenta Espíritu cúu jeē ní cuvāha xīhna gā, chi sa suhva yiqui cúñu cuenta ñayiví, te sáá te nduu cuenta Espíritu.

⁴⁷ Te cuenta ñayiví cúu tēe xīhna ñúhún, chi ní cuvāha de jíin tícachā ñuhun. Te Adán uū jeē cúu máa Jítoho yō, chi nde andiví ní quiji ya.

⁴⁸ Te ñáyuu ñayiví yáha, chi cúu i jnáhan Adán jeē ní cuvāha jíin tícachā ñuhun. Te ñáyuu jeē quívicoo andiví, chi ndúu i nájnūhun máa Yaā ní quiji nde andiví.

⁴⁹ Chi jeē cáa yó nájnūhun tēe ní cuvāha jíin tícachā ñuhun, suni súcuán coo yó nájnūhun cáa máa Yaā ní quiji nde andiví.

⁵⁰ Jnúhun yáha cástūhun rí nuú rō jijnáhan ró, hermano,

jeē yiqui cúñu yō cuenta ñayivī yáha, ma cúu quivī ñuu nuū ndácu Yaā Dios jniñu. Chi jeē jihí cúu, te ma cúu quivī nuū cótecu ní cáni.

⁵¹ Te cúní rī jeē na jécūhun ni rō jñūhun yáha jeē ní yisāhí: Nasūú ndihi yó cuu, te ndihi yó chi nasāma yiqui cúñu yō.

⁵² Chi quivī jeē cuécu sandihí na trompeta, te ñn yachī-ni, nájñūhun ñn jeē nácuenī-ni yó, te nasama ya yohó. Chi cuecu trompeta un, te natecu tāca ndíyī jeē ma cúu gā i. Te tāca yó jeē cátecu yō quivī ún, chi nasama ya yiqui cúñu yō.

⁵³ Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúu cuiti gā.

⁵⁴ Chi jeē jihí jeē tehyú, chi quiji quivī jeē nucūhun jeē ma cúu gā ma tehyú gā. Yūcuán na te cundaā jñūhun yósó núū tútu i: Jíin poder yā ni snāā yā cuehyī jéñi ñayuu.

⁵⁵ Cuehyī jéñi yóhó ¿ndese ga cuu sáha xeēn jíin yó? Chi natecu yō. ¿Te ndese ga cundeyí jíin yó? Chi snāā yā. Achí tutu.

⁵⁶ Chi cuēchi cúu jeē sáha jeē cundeyí cuehyī jéñi ñayuu. Te ley yā jenahán sáha jeē náne cuēchi siquī yō.

⁵⁷ Te na cútahū yō nuū Yaā Dios, chi jíin máá Jítóho yō Jesucristo sáha ya jeē cundeyí yó siquī cuéchi jíin síquī jñūhun cuu yō.

⁵⁸ Jeē yúcuan, ñánī mánī, cuiñi ñihín ró te ma cáca yátá ró jijnáhan ró. Te níni na sájniñu vāha ró jíin jniñu máá

Jítóho yō. Chi je cájini rō jeē tu casájniñu cāha ró jíin máá Jítóho yō.

Siquī jeē cáquin i xūhún cuu tācá hermano

16

¹ Te vijna te cahān rī siquī xūhun jéē cáquin rō cuu hermano cácandije cándoho ndáhú. Suni na sáha máá ró jijnáhan ró nájñūhun ni ndacu ri nuū tāca grupo ñayuu cácandije ichi Galacia.

² Tācá domingo te ná ñn ná ñn ró chuvāha sñn ró jecu xūhún, núu ndese ni ñihín maá ró, návāha quivī jeē jinú rī nuū rō te je íyó túhva.

³ Te jeē jeé rī, te cuāha ri carta nuū tāca téee jeē nácāji ró, te tají rí de quingoo de nuū tācá hermano cáyūcú Jerusalén, quísiáha de xūhun jéē ní casocō rō.

⁴ Te núu íyó váha jeē quihín rī, te suni quihín rī jíin de jijnáhan de.

Jeē cahán Pablo siquī jeē quícondēhé de ñayuu cácandije

⁵ Te jeē jeé rī nuū rō jijnáhan ró, te jíni ñúhún jeē xíhna gā jeē rī región Macedo-
nia, yūcuán na te jeē rī ñuu rō Corinto.

⁶ Te sanaa te quendōo ri jíin ró jijnáhan ró jecu tiempo, chí sanaa te coyūcu yó ní tiempo mījin. Yūcuán na te cuu chindéé ñáhán ró ruhū, núu ndé chi quihín tucu ri.

⁷ Chi tu cúní rī jeē rī nuū rō vijna te yáha yachī rī quihín rī, chi ñúhún ni rī jeē quendōo

ri jíin ró jecu tiempo, te núu cuáha Jitoho yō jnūhun.

⁸ Te cone ri űuu Efeso yāhá nde na yáha quivī Pentecostés.

⁹ Chi coo cuehē űayuu scandíje ri, te vāha quihīn jniū Jitoho yō. Te suni íyó cuehē űayuu cácuu contra.

¹⁰ Te núu na jée Timoteo, te sāha ró jée coo sī ni de mēhñu ró, te ni ĩn ma cáni ni de siquī. Chi suni jniū máá Jitoho yō sāha de, nájnūhun máá rí.

¹¹ Núu súcuan te ni ĩn ró má sajee ni rō nuū de. Chi sa suhva chindée űájnáhan ró jíin de jeē na quihín gā de, te coo ndeyí coo sī ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹² Te hermano Apolos chi ni cahān ndahú rí jíin de jeē na jée de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni rō jijnáhan ró, te cuiñi nihin ro jíin jnūhun cácandíje ró. Te téyí na cóo ni rō, te na cóo fuerza ini rō.

¹⁴ Te tāca jée casáha ró, na sāha ró jíin jnūhun cúndahú ni jnáhan.

¹⁵ Hermano, cájini rō jeē xihna gā űayuu vehe Estéfanos ni cacandíje ichi Acaya. Te ni cajēhe i máá i nuū jniū jeē chindée űáhán i tācá hermano cácandíje.

¹⁶ Te cúní rí jeē suni máá ró jijnáhan ró, cuatáhú váha ró űayuu casáha súcuan, jíin tāca

űáyuu cachindée űájnáhan te casájniū siquī jniū ya.

¹⁷ Cúsī ni rí jeē ní quiji-coo Estéfanos jíin Fortunato jíin Acaico, chi tēe yáha ni ca-jejniū de nuū rí jehē rō jeē tu ní cáhīyo ró jíin rí.

¹⁸ Chi ni ndundeyí ni rí, te suni súcuan máá ró jijnáhan ró, ni casáha de. Te cánuú cuajnúhún ró tāca tēe cándāa súcuan.

¹⁹ Sándeyí ni rō jijnáhan ró, áchí tāca grupo űayuu cácandíje cáyūcu Asia. Aquila jíin Priscila jíin űáyuu cácandíje jeē cándutútú vehe de, cácahān i jeē sándeyí ndasí ni rō jíin jnūhun máá Jitoho yō.

²⁰ Te tācá hermano cácahān i jeē sándeyí ni rō. Te jeē cahán rō jíin tāca jnáhan ró, te yíñúhún techūhu ró ndaha i.

²¹ Ruhū Pablo, jíin ndaha máá rí tēe ri jnūhun yáha jeē na sándeyí ni rō jijnáhan ró.

²² Te núu ndé ĩn tu íyó manī jíin Jitoho yō Jesucristo, te na jnáhnú ndetū i núu súcuan. Te na cáhán yō: Jitoho ná, cúní na jée yachī ndiji ní.

²³ Te űūhun ni rí jeē maá Jitoho yō Jesucristo na sāha ga yā jeē váha rōhó jijnáhan ró.

²⁴ Te manī rí jíin ró jijnáhan ró jée cácandíje ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndĩndúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cácañdeje ró Yaā Dios, jín núu ndihí rohó jéē cáyihí ndaha Yaā Dios jeē cáyūcu ní cáhnu Acaya.

² Te cáñuhun ni rí jeē Tatá yō Yaā Dios jín Jítóho yō Jesucristo na sáha ga yā jeē váha rohó te sáha ya jeē coo ndeyí coo sñ ni rō.

Siquí jeē ní ndoho Pablo jñūndóho

³ Na cáhán yō jeē yóhoyo cújéhnu Yaā Dios, Yaā cúu Tátá maá Jítóho yō Jesucristo. Chi máá yá cúu Tátá yō jeē cundáhú ni yohó, te níní sáha ya jeē ndúsñ ni yō.

⁴ Chi sáha ya jeē ndúsñ ni yō siquí táca jñúndóho ndóho yó, náváha suni cuu sáha máá yó jeē ndúsñ ni jñáhan yó jéē cándoho jñūndóho. Chi nájnūhun ni sáha ya jeē ndúsñ ni maá yó, suni súcuan sáha yó jéē ndúsñ ni i.

⁵ Chi jeē ndóho yó cuehē jñūndóho nájnūhun ni ndoho Cristo, suni súcuan nihīn yō cuehē jñūhun ndusñ ni, sáha Cristo.

⁶ Jeē yúcuan núu cándoho ri jñūndóho te súcuan te cuu sáha ri jeē ndúsñ ni rō te quendōo vāha ga anuá rō. Te jeē sáha Yaā Dios jeē ndúsñ ni rí, suu sáha tucu jeē ndúsñ ni maá ró, te quendōo vāha ga anuá rō. Te súcuan te nihīn rō fuerza jeē cuáñdeyí ni rō jín táca jñúndóho nájnūhun cándoho rí.

⁷ Te cáñuhun ndasí ni rí jeē cúu rohó, chi cájini rí jeē nájnūhun cándoho ró jñúndóho jín rí, suni súcuan ndusñ ni rō jín rí sáha máá Yaā Dios.

⁸ Hermano, cácuni rí jeē na cúni rō jijnáhan ró ndese ni candoho ri ichi Asia. Chi yóhoyo xeēn jñūndóho ni cajito ri, nde je yajni tuá canda ri, te ni jeni ni rí jeē cuu rí nuú.

⁹ Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma ténuū rí maá rí chi tú jniñu ri, chi sa suhva Yaā Dios jeē nastécu ndiyí tenuū rí.

¹⁰ Chi máá yá ni scácu ruhū jijnáhan ri nuū jñúndóho xeēn jeē jé yajni cuu rí nuú, te suni súcuan scácu ya ruhū vijna. Te ñúhun ni rí jeē suni scácu tucu ya ruhū ichi núu gā.

¹¹ Te suni na chíndéé ñáhan ró rúhū jijnáhan ri jeē cacān tahú rō jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

Jeē ní cucuéé Pablo quihīn de ñuu Corinto

¹² Iyó ñn jeē sáha jeē cácusñ ni rí: Chi váha iyó ni anuá rí jeē váha ndoo te ndaā ni

cajica ri nuū ñáyuu ñayīví, te víhyá gā nuū maá ró jijnáhan ró. Chi siquī jeē váha ni Yaā Dios, te ni chindéé ñáhán yá ruhū, te nasūu siquī jéē ndichí máá rí cúu jeē ní cajica ri súcuan.

13 Te jnūhun cátee ri nuū tāca carta rī, chi máni jeē cúu cahu ró te jecūhun ni rō cúu. Te ñūhun ni rī jeē jecūhun vāha ga ni rō,

14 nájñūhun je cájecūhun ni rō jecu. Te súcuan te cuu cusī ni rō siquī rī quivī ndīji Jitoho yō Jesús, nájñūhun cácusī ni rī siquī maá ró.

15 Te siquī jeē súcuan ni cucáhnū ni rī, te jeē yúcuan ní jeni ni rī jeē núu na quihín rī Macedonia te jeē rī nuū maá ró xīhna gā, návāha cusī ni rō jeē jécondēhe rí rohó úu jínu núu.

16 Chi ni jeni ni rī jeē jécondēhe rí rohó, te yāha ri quihín rī Macedonia, te jeē nándicó rí Macedonia te ndiji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea núu.

17 Te jeē súcuan ni jeni ni rī, ¿te á téte tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájñūhun ñayuu ñayīví jéé yachī cahán jeē cuu, yūcuán na te tuú, chí naún?

18 Tuú chi máá Yaā Dios jíní yā jeē tu cáhán rī jín ró jeē cuu, te yachī nácāhán rī jeē ma cúu.

19 Chi ruhū jín Silvano jín Timoteo ni canacani ri jñūhun Jesucristo Séhe Yaā Dios nuū rō jijnáhan ró. Te

máá yá tu cáhán yā jeē cuu te nacāhán tucu ya jeē ma cúu. Chi squícu ya jeē cahán yā.

20 Chi ndihī jeē ni jéññūhun Yaā Dios, squícu máá Cristo. Te jeē yúcuan cácahán yō jeē yóhoyo luu cújéhnū Yaā Dios, te cácahán yō Amén, chi ndihī squícu Cristo Jesús.

21 Te Yaā Dios cúu jeē sáha jeē ruhū jijnáhan ri jín róhó jijnáhan ró, cáhīn nīhin yó jín Cristo, te ni sándoo ya yohó jéé cuajñīñu yó núu yā.

22 Te suni ni jēhe ya Espíritu yā jeē cóndee ini anuá yō, te cúu ya nájñūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndáā ni yō jeē cuāha Yaā Dios tahū yō.

23 Te jeē ná tu jeē rī nuū rō ñuu Corinto, nájñūhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jíní jeē cahán ndaā rī. Te iyó váha jeē na cúu rī te núu tu cáhán ndaā rī.

24 Te nasūu jéé cácuni rī ndacu nīhin ri jñīñu nuū rō siquī jñūhun cácañdije ró yá, chí je cáhīn nīhin ro jín jñūhun ún. Chi sa suhva cácuni rī chindéé ñáhán rí rohó jéé na cúsi gā ni rō.

2

1 Núu súcuan te ni jeni ni rī jeē ma jéé rī ñga jínu nuū rō jín jñūhun cuxeēn rī te cucuíhyá ni rō sáha ri.

2 Chi núu cucuíhyá ni rō sáha ri, ¿te ndé ñáyuu sáha jeē cusī ni maá rí? Tuá na ñga ñayuu, chí máni máá róhó, te

ndese cuu te núu ni sáha ri jeē cucuíhyá ni rō.

³ Te jeē yúcuau cúa jeē ní tee ri carta un núu rō, návāha nacani ni rō siquī cuēchi ró sáha, te ma cucuíhyá ni rī sáha cuēchi ró quívi jeē rī nuū rō. Chi sa suhva sáha ró jéē cúsiī ni rī. Te jíní vāha ri jeē núu cusī ni rī, te suni ndihī ró jijnáhan ró cusī ni rō.

⁴ Te jeē ní tee ri carta un núu rō, te yōhoyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téé ri jeē sáha ri jeē cucuíhyá ni rō, chi sa suhva návāha cuni rō ndese yōhoyo manī rī jíní ró.

Jeē íne cáhnu ni Pablo nuū téé ni sáha cuēchi

⁵ Te jeē ní cucuíhyá ni rī ni sáha tēe jeē ni sáha cuēchi ún, te nasūu máá-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí.

⁶ Te jíní jéē ní cacuxeēn rō nuū de ná ni candutútú ró, te jíní yúcuau-ni te ni cuu-ni.

⁷ Te vijna chi jíní ñúhún jeē cóne cáhnu ni rō nuū de, te sáha ró jéē ndúsī ni de, chi sanaa te caa ga cucuíhyá ni de, te ma ndúsī gā ni de.

⁸ Núu súcuan te cáhán ndahú rí jíní ró jijnáhan ró jéē steén tucu ró jéē iyó manī rō jíní de.

⁹ Chi jeē siquí jniñu yáha cúa jeē ní tee ri carta un núu rō, návāha coto ndee rī rohó núu cuatáhú váha ró jniñu ndácu ri nuū rō.

¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē maní rī jíní ró jito jínúu Cristo.

¹¹ Chi cánuú cone cáhnu ni yō, chi tu cúní yō jeē nihín Satanás cuēchi siquī yō, chi je jíní vāha yó ndese ndúcú un stáhú yóhó sáha yó cuēchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ni íyo modo jeē nácani ri jnūhun ya.

¹³ Te yēsú súcuan te tu ní íyo nayúú ni anuá rī, chi tu ní nijnáhan ri jíní hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnūhun jeē kujéhnu ndúú yó jíní Cristo

¹⁴ Te na cútahū yō nuū Yaā Dios, chi níní ndéca vāha ya yohó cuángoo yó jíní Cristo Jesús, te ndúú yó jíní yá jeē kujéhnu ndasí yá snāā yā poder ndihī enemigo yā. Te jéjníñu ya yohó jéē scuité núu yó jnūhun ya tēcá-ni lugar, nájñūhun jité núu ñn xicō asīn.

¹⁵ Te cúu yó nájñūhun ñn sūje jeē jeén asīn nuū Yaā Dios sáha Cristo. Te nájñūhun jeē jínú xicō un núu ñáyuu cācu ánuá jíní núu ñáyuu jnahnū ndetū.

¹⁶ Nuū ñáyuu jnahnū ndetū chi cúu yó nájñūhun ñn xicō jeē cúu i sáha, te nuū ñáyuu

cācu ánuá chi cúu yó nájñūhun ñn xicō váha jeē cótecu i sáha. Te ni ñn yó ma cánda yó sáha yó jñiñu yáha, te núu ma chindéé ñáhán yá yohó.

17 Te ruhū jijnáhan ri, tu cásáha ri nájñūhun cásáha cuehē tēe jeē cánducú de nihīn de xūhun síquī jñūhun Yaā Dios. Chi sa cánacani ndaā rī jñūhun ya, chí máá Yaā Dios ni tají rúhū, te máá yá jiní jeē cánacani ndaā rī síquī jeē cá candíje ri Cristo.

Jñūhun síquī contrato jeé

3

1 Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jiní ñúhún jéē steén rī carta recomendación nuū rō, chí jéē cacán rī cuāha ró núū rī jijnáhan ri, nájñūhun cásáha sava i?

2 Tuú chi máá-ni ró cácuu nájñūhun ñn carta recomendación rī. Te jeē ñúhun ni rī jeē ní cacandíje váha ró ni sáha ri, suu cúu nájñūhun jeē yosó jñūhun carta un ini anuá rī. Te ndihī ñayuu chí nájñūhun cáhu i, cúu jeē jiní i ndese ni nasāma ró.

3 Chi máá ró cácuu nájñūhun ñn carta jeē ní tee Cristo te cáscaca ri. Te nasūu jín tinta ni tee ya, chí sa suhva jín Espíritu Yaā Dios, Yaā técu. Te nasūu núū tabla yuū nájñūhun ni tee ya ley yā, chí sa suhva nuū anuá ñayuu ni tee ya.

4 Te cácahān rī súcuan, chí cácuacáhu ni rī Yaā Dios síquī jeē ni sáha Cristo.

5 Te nasūu jéē cájeni ni rī jeē cúu canda máá rí sáha ri jñiñu ún. Chi sa suhva máá Yaā Dios sáha jeē cuu síquī ri.

6 Te máá yá ni sáha jeē cuu cuajñiñu váha ri síquī contrato jeé yá. Te contrato yáha tu cáhán jeē síquī yó ley jeē ní tee jín letra, chí sa suhva jeē caca yó jín vida jeé, suu jeē ni jéhe Espíritu yā. Chi contrato ley jeé yosó jín letra, jñahnū ndetū ñayuu sáha. Te jeē sáha máá Espíritu cúu jeé cótecu yō ní cáni.

7 Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni cujéhu, te ni ndindéé ndasí ni sáha, te nde Moisés ndí nuū de ni sáha. Te tu ní cúu coto váha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndindéé núū de. Te núu súcuan ni cujéhu ndasí ley jeé sáha jeé cuu ñayuu te jñahnū ndetū i,

8 te sa víhyá gā cujéhu ndasí gá jñūhun cotecu yō jeé jéhe Espíritu nuū yō.

9 Chi núu yōhyo ni cujéhu ley un jéē jñahnū ndetū ñayuu sáha, te sa víhyá gā cujéhu jñūhun jeē ndáhva Yaā Dios cuéchi yó.

10 Chi ley un jéē ní cujéhu nde saá, tuá cujéhu cuiti, síquī jeé cujéhu ndasí gá jñūhun Espíritu jeé iyó vijna.

11 Te núu súcuan ni cujéhu ley jeē ni íyo jecu-ni tiempo,

te sa kujéhu ndasí gá jnūhun jeē coo hí cáni.

12 Te jeē súcuan cáñuhun ni rī, jeē yúcuan cáhīyo téyí ni rī nácani ri jnūhun yáha.

13 Chi tu cásáha ri nájñūhun ni sáha Moisés jeē ní jesi de ññ sahma nuū de, návāha tú coto ñayuu Israel ndese cuandahvā jeē ní ndindēe núū de.

14 Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chí nájñūhun jési sahma un núū jeē níjnūní i, te tu cújiyo cuítí. Chi nde jeē candíje i Cristo, yūcuán na te cujiyo.

15 Te suni súcuan nde vijna núu cácahu i tutu ley Moisés, te nájñūhun jeē jési ññ sahma nuū jeē níjnūní i.

16 Te jeē násāma ini ññ ñayuu quívi i nuū maá Jítoho yō Cristo, yūcuán na te cújiyo-ni jeē jési ún.

17 Chi Jítoho yō cúu máá Espíritu. Te nuū íne Espíritu maá Jítoho yō, yūcuan cúu nuū iyó libre ñayuu jeē tuá yáhi i chíji ley jenahán.

18 Te jeē yúcuan máá yó jijnáhan yó, tuá jési nuū jeē níjnūní yō. Chi cácuu yó nájñūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhu máá Jítoho yō. Te máá yó tāca quívi cuanasāma yó cuanduu luu ga anuá yō nájñūhun cáa máá yá. Chi máá Jítoho yō jeē cúu ya Espíritu, súcuan sáha ya jíin yó.

4

1 Núu súcuan te tu ndínuu ni rī cánacani ri jnūhun ya. Chi siquī jeē ní cundáhú ni yā ruhū jijnáhan ri te ni jéhe ya jniñu yáha nuū rī.

2 Te tu cásáha ri jniñu néé jeē cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni tāca ñayuu ini anuá i jeē cácahān ndaā rī jító jíinúu Yaā Dios.

3 Te núu íyó ñayuu tu jécūhun ni jnūhun jnama ya yohó jéé cánacani ri, te súcuan cúu nuū máni máá ñayuu jnahnū ndetū.

4 Te jeē tu cácaandíje i, te máá jéxeén jeē ndácu jniñu ini ñayívi yáha, ní jesi nuū jeē níjnūní i, návāha ma ndíndēe jnūhun Cristo ini anuá i, te ma cúni i jeē yóhyo luu cújéhu Cristo, Yaā jeē ínuú cáa jíin Yaā Dios.

5 Te jeē cánacani ri jnūhun, te nasūu jnūhun máá rí, chí sa suhva jnūhun Jítoho yō Jesucristo cánacani ri. Te máá rí chí cácuu ri mozo-ni nuū rō jijnáhan ró jéé siquī jeē maní rī jíin Jesús.

6 Chi ná ni sáha Yaā Dios ñayívi te ni cahān yā jeē na cúndijin nuū néē. Te suni súcuan ni sáha ya jeē ní cundijin nuū anuá yō jeē cájecūhun ni yō siquī Jesucristo, ndese ndíndēe núū yā, cúu jeē yóhyo luu cújéhu ya nájñūhun cúu Yaā Dios.

Jeē cándiquīn yō jnūhun cácaandíje yó yá

7 Te tāca jnúhun yáha jeē yóhoyo luu cújéhnú, chí nájñúhun jeē ñúhun ini ñn quísi ñuhun. Chí cácuu yó nájñúhun quísi ñuhun, chí tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder síquī jnúhun yáha jeē yóhoyo luu cújéhnú, te nasūu fuerza maá rí cúu.

8 Te jeē yúcuan, vēsú tāca lado cájito ri jñúndóho, te tu sáha jeē ma ndúsī gā ni rī. Te vēsú cácuuhyá ni rī síquī jñúndóho, te cáñuhun ni rī jeē quee vāha jñiñu ri.

9 Te vēsú cájito xeēn ñayuu ruhū, te maá yá tu stóo ya ruhū jijnáhan ri. Te vēsú cánducú i snáa i ruhū jijn jñiñu sáha ri, te ma cúu.

10 Te ndé-ni cúu nuū cuángoo rī, te nájñúhun ni ndoho Jesús jeē ni jíhī yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī.

11 Chí jeē niní cátecu rī, te tāca quívī je yajni cahni ñayuu ruhū jeē síquī Jesús. Te súcuan te cájito ñayuu jeē técu Jesús ini yiqui cúñu rī jeē cúu.

12 Núu súcuan te ruhū jijnáhan ri, níní cúu jeē jé yajni cuu rī síquī jnúhun ya, te yúcuan sáha jeē cotecu maá ró ní cáni jijnáhan ró.

13 Te yósó núu tútu iī: Ni candíje ri te jeē yúcuan ní cahān rī, achí. Te suni jeē cáncandíje máá rí cúu jeē cáncani ri jñúhun ya.

14 Chí cájini rī jeē maá Yaā jeē ní nastécu Jitoho yō Jesús,

suní súcuan nastécu yā ruhū, te sáha ya jeē ñn cáhnu ni cuiñi ndihi yó núu yā.

15 Chí tāca jnúndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhoyo cuehē i nacuatáhú i nuū Yaā Dios, te cújéhnú ga yā sáha.

16 Jeē yúcuan cúu jeē tu ndínuu ni rī, te vēsú cuandihí fuerza yiqui cúñu rī, te sa suhva cuanduu fuerza gā anuá rī tāca quívī.

17 Chí jñúndóho jeē ndóho yó ñayiví yáha, tú-ni xeēn cúu, te yachī yāha. Te sáha jeē nihín yō ñn tahū jeē cújéhnú yó ní cáni jeē cáa ndasí gá vēsú jñúndóho ún.

18 Te tu táñúhún yó nuū tāca jñúndóho jíto yó núu vijna, chí sa suhva táñúhún yó nuū tāca jéé vāha jeē tu jíto yó núu vijna. Chí tāca jéé jíto yó núu vijna, chí yachī ndihi, te tāca jéé tu jíto yó núu, chí coo ní cáni.

5

1 Chí yiqui cúñu yō jeē ndeé yó ñayiví yáha, cúu nájñúhun ñn vehe jeē náā. Te cájini yō jeē núu na náā, te cuāha Yaā Dios ñn yiqui cúñu jeé, te suu cúu nájñúhun ñn vehe jeē coo ní cáni ichi ándiví. Te nasūú ñn vehe jeē sáha ñayuu cúu, chí jeē sáha Yaā Dios cúu.

2 Te níní jéé ndeé yó vehe yáha jeē cúu yiqui cúñu yō, te cájitū ni yō sáha, chí yóhoyo cúní yō jeē núcūhun yó yiqui cúñu jeé yó nde ándiví.

³ Chi jeē núcūhun yó un, te ma cóo máá na anuá yō jeē nāá yiqui cúñu yō yáha.

⁴ Chi níni jéē iyó gá yō ini vehe yiqui cúñu yō yáha, te jítú ni yō te cúcuíhyá ni yō. Te nasūu jéē cuní yō jeē stóo yó yiqui cúñu yō te coo máá-ni ánuá yō. Chi sa suhva cuní yō nucūhun yó jéē jeé, návāha ndahvā yiqui cúñu yō jeē nāá, te coo máá jéē cótecu ní cáni.

⁵ Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndáá ni yō jeē cuáha Yaā Dios tahū yō.

⁶ Núu súcuan te níni cúu jeē cá cucáhnu ni rī. Chi cájini rī jeē niní ndéé gá rī chíji yiqui cúñu yáha, te jíca cúu rī jíin núu ndéé máá Jítóho yō.

⁷ Chi vijna chi cá candíje ri jeē iyó yá jíin rí, vēsú ná tu coto ri nuū yā.

⁸ Te cá cucáhnu ni rī, chi sáha ri cuenta jeē váha ga núu na quénda ri chíji yiqui cúñu yáha te quihīn rī condee rī jíin máá Jítóho yō.

⁹ Jeē yúcuán cúu jeē cánducú ndéyí rí sáha ri jeē cusī ni yā jíin rí, vēsú núu ndéé gá rī yiqui cúñu rī chí vēsú núu condee rī jíin yá.

¹⁰ Chi cánuú jéē ndihí yó cuiñi yuhu mesa Cristo jeē sándaā yā jniñu yó. Te ná ĩn ná ĩn yó níhīn yō siquī ndese ni casáha yó, á jéē váha chí jéē neé, ná ni condee yō chíji yiqui cúñu yō.

Siquī jeē ndávicoo yó núu jnúhun manī Yaā Dios jíin yó

¹¹ Núu súcuan te cándiso iyo ri nuū maá Jítóho yō, te jeē yúcuán ndúcú ndéyí rí scandíje ri ñayuu. Te jíni Yaā Dios jeē cáhīyo ndaā rī, te ñúhun ni rī jeē suni súcuan cájini maá ró.

¹² Te nasūu jéē cánducú tucu ri cahān rī jeē váha ga tēe cácuu ri, chi sa suhva cástūhun rí jeē cuu cusī ni rō jeē siquī rī jíināhan ri. Te súcuan te cuu stío cuiñi rō nuū ñayuu jeē cutéyí i siquī ndese cáa ñayuu, te tu sáha i cuenta ndese cáa ini anuá ñayuu.

¹³ Te va sanaa te cájeni ni rō jeē tēe loco cácuu ri jeē cácahān rī súcuan. Te siquī jeē cándihvī ni rī jehē Yaā Dios cúu. Te tuú chí cáhīyo váha xinī rī, te jeē yúcuán cájejnīñu ri jeē quéndōo váha ró.

¹⁴ Chi siquī jeē ní cundáhú ni Cristo ruhū jíināhan ri cúu jeē cánuú nacani ri jnúhun ya. Chi cájini váha ri jeē ni jíhī mañúhún-ni ya jeē siquī ndihí yó, te jeē yúcuán nájnūhun ni jíhī ndihí yó jíin yá.

¹⁵ Chi ni jíhī yā jeē siquī ndihí yó návāha tāca yó jéē técu, ma cótecu ga yō jeē sáha yó jéē cuní maá yó, chi sa suhva jeē cuní maá yá jeē ni jíhī yā te ni natecu yā jeē siquī yō.

¹⁶ Jeē yúcuán tuá casáha ri cuenta ndese-ni cándāa ñayuu, nájnūhun casáha ñayuu ñayiví. Te vēsú súcuan ni casáha ri cuenta siquī Cristo nde saá, jeē ĩn tēe-ni cúu ya, te vijna chí cájini rī jeē cúu ya Sēhe Yaā Dios.

¹⁷ Chi núu ĩn ñayuu yíhi i

ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

18 Te Yaā Dios cúu jeē sāha ndihi jeē yāha, chi jíin Cristo ni sāha ya jeē ní ndívicoo yó núu jnúhun manī yā jíin yó. Te ni tejníñu ya ruhū jeē cánacani ri jnúhun jeē ndívicoo ñayuu nuū jnúhun manī yā jíin i.

19 Chi jíin Cristo te ni sāha Yaā Dios jeē ñáyuu ñayivi ndívicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yāha ndese ndívicoo i nuū jnúhun manī yā jíin i.

20 Núu súcuan te cácuu ri tēe cájica jniñu máa Cristo. Te jeē cahán rī, te nájñuhun jeē máa Yaā Dios cahán ndahú yā jíin ró. Núu súcuan te cácahān ndahú rí jíin ró jeē cahán Cristo, jeē na ndívicoo ró núu jnúhun manī Yaā Dios jíin ró.

21 Te Cristo, vēsú tú ni iin cuēchi ya, te ni sāha Yaā Dios jeē ní nucondee cuēchi yó síquī yā. Te súcuan te yóhó jéē yíhi ndaha Cristo, ni nucondee síquī yō jeē iyó ndáa yō nájñuhun iyó ndáa Yaā Dios.

6

1 Núu súcuan te síquī jeē cácuu ri tēe casájniñu jíin yá, te cácahān ndahú rí jíin ró jeē ma stóo uun ró jnúhun jeē ni sāha Yaā Dios jeē váha róhó.

2 Chi áchí yá nuū tútu i:

Máa tiempo cuní maá rí te cuní sōho rí jnúhun cáhán ndahú ró jíin rí.

Te máa tiempo jnáma ri ñayuu, te jnama ri rohó.

Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quiiji Yaā jnáma yóhó.

3 Te cánducú rí jeē ma sāha ri ni iin jniñu jeē casi jeē candíje ñayuu, návāha ma cahán i síquī jniñu ndíso ri.

4 Chi sa suhva cánducú rí jeē ndihi jeē sāha ri, steén jeē cácuu ri tēe cájegniñu nuū Yaā Dios. Jeē yúcuán cájendeyí ni rī jíin jéē ndóho ri jnúndóho, jíin jéē cúmanī nuū rī, jíin jéē yíhó sāha jíin rí.

5 Chi ni iyo tijni jínu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu nihin ri, jeē ní cajehni rī mähna máa rí, jeē ní cahīyo ndite ni rī.

6 Te suni cánducú rí jeē cuajnúhún i ruhū síquī jeē ndoo cájica ri, te cájecūhun vāha ni rī jnúhun ndaā, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnáhan ri.

7 Te cánacani ndaā rī jnúhun, te poder Yaā Dios íne jíin rí. Te jíin jnúhun ndaā cándahva rī tācá jniñu néé, chi nájñuhun jeē cájegnihán ri síquī. Chi nájñuhun jeē ndónnda un síquī rī te ndónnda ri síquī.

8 Iyó jínu yíñúhún ñáyuu jíin rí, te iyó jínu tuú. Iyó jínu jéjnúhún i ruhū, te iyó jínu cácahān i síquī rī. Iyó jínu

cácahān i jeē tée stáhú cácuu ri, te íyó jínu cácahān i jeē tée ndaā cácuu ri.

⁹ Iyó jínu cásáha i nájnūhun jeē tu jíni i ruhū jijnáhan ri, te íyó jínu jeē jini vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha.

¹⁰ Te vēsú iyó jēē cácuuhyá ni rī, te níni cácusī ni rī. Te vēsú tée ndáhú cácuu ri, te sácúcá rí cuehē ñayuu jíin jnúhun ya. Te vēsú tú na vé cánevāha ri, te jíin máá yá te ndihi-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jíin ró jijnáhan ró, chi siquī jeē maní rī jíin ró, jeē yúcuan cáchí ndihi ri ndese cándoho rí.

¹² Máá rí jijnáhan ri cácahān cají rí siquī jeē maní ndasí rí jíin ró, te máá ró jijnáhan ró sanaa te tu súcuan cúu.

¹³ Nájnūhun cáhán tatá jíin séhe, súcuan cáhán ndahú rí jíin ró jeē nájnūhun íyó maní rī jíin ró, súcuan na cóo maní tucu ró jíin rí.

Siquī jeē cúu yó templo Yaā Dios

¹⁴ Ma quívi nduu rō jíin jniñu néé cásáha ñayuu tu cácañje, chi ma cúu coo inuú ró jíin i. ¿Chi ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyūcú inuú ñayuu cájica jíin luz yā jíin ñayuu cájica nájnūhun nuū néé?

¹⁵ ¿Ndese cuu coo inuú ni Cristo jíin Satanás? ¿Te

ndese cuu cuiñi cáhnu ñayuu cácañje jíin ñayuu tu cácañje?

¹⁶ ¿Te ndese cuu quijnáhan templo Yaā Dios jíin ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájnūhun ni cahān yā:

Condee rī ini i te caca cuu ri mēhñú i,

te cuu ri Yaā Dios maá i, te cuu i ñayuu maá rí.

¹⁷ Te jeē yúcuan ní cahān gā yā:

Ma quívi nduu rō jíin jniñu néé cásáha i,

te cusñn ró jijnáhan ró, áchí Jítóho yō.

Te ma jñi ró tāca jéē tú ndaā.

Yūcuán na te naquihin ri rohó,

¹⁸ te cuu ri Tatá rō jijnáhan ró, te cuu ró séhe yí rí jíin séhe

sñhí rí,

áchí Jítóho yō, Yaā jñi ndihi poder.

Achí tutu.

7

¹ Núu súcuan, ñánī maní, cánevāha yó tāca jnúhun yáha jéē ni jéjnūhun ya. Jeē yúcuan na sándoo yó máá yó tāca jéē sajnéhén yiqui cúñu yō jíin ánuá yō. Te na cóonso iyo yó núu Yaā Dios, te coo ndoo coo iī yō nuū yā jíin ndihi jniñu cúni yā.

Jeē ní canacani ni ñayuu Corinto siquī cuéchi i

² Coo maní rō jíin rí jijnáhan ró víi. Chi tu ní sáha ri falta nuū ní ñn ró, te tu ní stívi rí anuá ni ñn ró, te ni ñn ró tu ní stáhú rí.

³ Te nasūu jēē nducú rí cahān rī nuū rō cúu jeē cahān rī súcuan, chi je ni cahān rī jeē yóhoyo manī rī jíin rō. Te níni űnhun ni rī rohó, vēsú cuu yó chí cotecu yō.

⁴ Te cúcāhnu ndasí ni rī rohó jíināhan rō, te cúsiī teyí ni rī jeē siquí rō. Te vēsú cájito rí tāca jnūndóho yáha, te íyó ndeyí ni rī te cúsiī ndasí ni rī jeē siquí rō.

⁵ Ná ni jengoo ri Macedo-
nia te tu ní íyo nayúú ni anuá rī, chi sa suhva yí ní íyo jnūndóho jíin rí tāca lado. Chi ni íyo jeē ní castáhān jnāhan jíin rí, te ni cayūhu rí sanaa te caca yátá űnyuu cácadíje.

⁶ Te Yaā Dios jeē sáha jeē ndūndeyí ni űnyuu cácuuíhyá ni, ni sáha ya jeē ní candundeyí ni rī, chi ni quiji Tito ni sáha ya.

⁷ Te ni candusiī ni rī, nasūu máá ĩn-ni siquí jeē ní quiji de, chi suni jeē ní ndundeyí ni de ni casáha rō. Chi ni castūhún de jeē cáñuhun ni rō coto tucu rō rúhū, jíin jēē cácuuíhyá ni rō jeē siquí cuéchi rō, jíin jēē cánacani ni rō jehē rī. Te jeē yúcuán ní cusīī gā ni rī.

⁸ Te carta jeē ní tají rí nuū rō, vēsú ni sáha jeē ní cacu-
cuuíhyá ni rō, te tuá nácani cuuíhyá ni rī jeē ni sáha súcuan. Chi vēsú ni cucuíhyá ni rī saá, te vijna te tuá, chi jíiní rī jeē jecu-ni quiví ni cacuuíhyá ni rō ni sáha.

⁹ Te vijna te cúsiī ni rī, te nasūu siquí maá jēē ní cacu-
cuuíhyá ni rō. Chi cúsiī ni rī jeē ní jejniñu jeē ní cacuuíhyá ni rō, chi ni sáha jeē ní canacani

ni rō siquí cuéchi rō. Chi ni cacucuíhyá ni rō nájñuhun cúni maá Yaā Dios, te nasūu jēē ni sáhuhū rī rohó.

¹⁰ Chi núu cúcuuíhyá ni yō nájñuhun cúni Yaā Dios, te suu sáha jeē nácani ni yō siquí cuéchi yó te jnama ya yohó, te ma cóo ga jeē nácani cuuíhyá ni yō. Te jeē cácuuíhyá ni űnyuu tu cácadíje, tu jejniñu jeē nácani ni i, chi sa jnahnū ndetū i.

¹¹ Te ni cacucuíhyá ni rō nájñuhun cúni Yaā Dios, te vijna te cájito rō náa vāha ni jejniñu. Chi ni canacani ndasí ni rō ni sáha, te ni canducú rō jeē quéndōo ndaā rō, te ni cacuxeēn rō nuū téē ni sáha cuéchi, te ni cayūhu rō jeē ní castíví rō núu yā. Yūcuán na te yóhoyo ni cacuni rō coto tucu rō núu rī, te yóhoyo ni candihví ni rō ni cacuxeēn rō nuū téē ni sáha cuéchi ún. Te súcuan ni castéén rō jeē tú cuéchi rō, chi tu ní cájejnúhún rō cuéchi ni sáha téē ún.

¹² Te jeē ní tee ri carta un, nasūu máá-ni jeē cúxeēn rī nuū téē ni sáha cuéchi ún, ni nasūu máá-ni jeē cahān rī jehē téē ni ndoho ni sáha de. Chi sa suhva ni tee ri návāha nucūhun ni rō ndese yóhoyo ni canacani ni rō jehē rī jíto jíinúu Yaā Dios.

¹³ Jeē yúcuán ní candusiī ni rī jeē siquí rō.

Te víhyá gā ni cacusiī ni rī jeē ní jini rī jeē cúsiī ni Tito, chi ni nduu nayúú ini de ni casáha rō.

¹⁴ Chi je ni cahān rī jíin de jeē cúsiī ni rī jeē váha űnyuu cácuu rō, te vijna te tu ní

quéndōo ri jnūhun canu jeē siquī rō. Chi nájñūhun ni cajini rō jeē iyó ndáā tāca jnūhun ni cacahān rī jín rō, suni súcuan ni cundaā jnūhun ni cacahān rī jín Tito jeē cúsī ni rī siquī rō jeē váha cásquicu rō.

¹⁵ Te víhyá gā manī de jín rō vijna jeē ñūhun ni de jeē váha ni cajetáhú rō jeē cahán de, te ni cahīyo yíñúhún rō ni candiso īyo rō núu de.

¹⁶ Núu súcuan te cúsī ni rī siquī jeē cucáhnu ndasí ni rī rohó jijnáhan rō.

Jeē na cúsī ni i socō i cuehē

8

¹ Hermano, vijna te suni cācuni rī castūhun rí nuū rō jijnáhan rō ndese cuehē jeē váha ni sáha Yaā Dios jín ñayuu cācandíje cáyūcú Macedonia.

² Chi vēsú yōhyo ni jito ndee jnūndóho i, te suni yōhyo ni cacusī ni i jín jnūhun ya. Te vēsú ñayuu ndahú ndasí cācuu i, te yōhyo váha ni cajequin i cuehē xūhun jéē cúu ñayuu ndahú cācandíje.

³ Chi cúu rī testigo jeē ní cacusī ni maá i ni cajēhe i ndésaa ni canda i, te nde víhyá gā ni cajēhe i.

⁴ Chi ni cacahān ndahú ndasí i jín rí jeē na cuáha rī jnūhun chindéé ñáhán i jín yó cuáha i xūhún cuu hermano cāndoho ndáhú.

⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i maá i nuū Jítoho yō, te sáa te ni cajēhe i maá i sáha i tāca jéē cācuni rī, ndihi ndese núnjahan ni Yaā Dios.

⁶ Te jeē súcuan ni casáha ñayuu Macedonia, te ni castūhvī ni rī Tito jeē na jéé tucu de nuū maá rō, sáha de jeē jīnu jniñu jeē ni squéjéé de jín rō jeē suni caquin rō cuehē xūhún cuu ñayuu ndahú.

⁷ Chi maá rō yōhyo váha casáha rō táca-ni, chi váha cācandíje rō, váha cānacani rō jnūhun, váha cājecūhun ni rō, váha cāndihvī ni rō, váha manī rō jín rí jijnáhan rī. Núu súcuan te suni cānuú sáha váha rō jniñu yáha jéē cuáha rō jéē cúu ñayuu ndahú.

⁸ Te nasūu jéē cuní rī ndacu ri jniñu nuū rō, chi sa cástūhun rí nuū rō ndese yōhyo cācusī ni sava ga ñayuu jéhe i xūhún, te súcuan te cuni rī jeē suni maá rō cācundáhú ndije ni rō ñayuu ndahú.

⁹ Chi je cājini rō ndese yōhyo váha ni Jítoho yō Jesucristo jín yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núu. Te súcuan ni sáha ya jeē cācucúca rō ndihi jeē ndíso jnūhun ya, siquī jeē ní nasáha ndáhú yá maá yá.

¹⁰ Te jeē váha maá rō cúu jeē na cáchi rī ndese jéni ni rī siquī jniñu yáha. Váha ni caquejéé rō nde jendujin, chi nasūu maá-ni jeē ní cajequin rō xūhún, chi suni yōhyo ni cacusī ni rō sáha rō.

¹¹ Núu súcuan te vijna te sínu rō. Te nájñūhun ni cacusī ni rō ni caquejéé rō jín, suni súcuan na cúsī ni rō sínu rō, chi cuáha rō núu ndese

cánevāha ró.

¹² Chi núu cúsī ni yō cuāha yó, te jétáhú yá núu ndese névāha yó, chi tu jícán yā jeē cuāha yó jēē tu névāha yó.

¹³ Te nasūu jeē cahán rī jeē cáhni ndahú ró máá ró jeē cáa ga nihīn i vēsú jeē ndóo nuū maá ró.

¹⁴ Chi sa suhva jeē ĩn cūhva-ni conevehāha ró jíin i. Chi cánevāha cuehē rō vijna, te cuu cuāha ró jēē cúmanī nuū i. Yūcuán na te núu ndé ĩn quivī conevehāha i, te suni cuu cuāha i te núu ni cumani nuū rō. Te súcuan te ĩn cūhva-ni conevehāha ró jíjnāhan ró,

¹⁵ nájnūhun cáhán tutu ĩ siquī ñayuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jíin úu gā jnāhan de

¹⁶ Te na cútahū rī nuū Yaā Dios jeē ní sáha ya jeē ndihví ni Tito jehē rō nájnūhun cándihvī ni maá rí.

¹⁷ Chi ní jétáhú de jeē ní cacahān rī jíin de jeē jeé de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cátají rí ĩn hermano cuajeē jíin Tito nuū rō. Te tāca grupo ñayuu cácandíje cájejnūhún i tēe un jēē váha jéjníñu de siquī jnūhun jeē jnáma ya yohó.

¹⁹ Te tāca grupo ñayuu cácandíje suni ní catee i jniñu siquī de jeē cáca de jíin rí chindéé ñáhán de quindēca

de xūhun jíin rí jeē ní cajēhe ñayuu. Te jniñu yáha cásáha rí návāha cahān ñayuu jeē yóhyo váha Yaā cúu máá Jítoho yō, chi cuni i ndese yóhyo cácusī ni rō cásocō rō xūhún.

²⁰ Te quingoo ndindúú rí návāha ni ĩn ñayuu ma tēe i cuēchi siquī rī siquī xūhun cásocō ñayuu.

²¹ Chi ndúcú rí jeē squícu ndaā rī tācá jniñu, nasūu máá ĩn-ni nuū Yaā Dios, chi suni nuū ñayuu.

²² Te suni cátají rí ĩnga hermano yō cuajeē de jíin ndindúú tēe yáha. Te tijni jínu ni steén de jeē yóhyo cúsī ni de ndihví ni de tācá jniñu. Te vijna chi ndihví gā ni de jehē rō, chi cúcāhnu ndasí ni de jeē cásquícu ró.

²³ Te núu cácajnūhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnūhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácandíje, te cáhīyo yíñúhún de nuū Cristo.

²⁴ Núu súcuan te stéén rō nuū de jeē cáhīyo manī ndije ró jíin de, návāha na cúni tāca grupo ñayuu cácandíje. Te súcuan cuni i jeē tu ní cácusī cāhá ni rī siquī rō.

Siquī jeē cájequin i xūhún cuu tācá hermano

9

¹ Te vijna te tuá jíni ñúhún tee rí nuū rō siquī xūhun jeē cájequin rō cuu tācá hermano cándoho ndáhú.

² Chi je jíni rī jeē cánujnahan ni rō cuāha ró. Te jeē yúcuan

máni cúsih ni rī cahán rī jín ñáyuu Macedonia jeē rohó ñáyuu Acaya, je ni casátūhva ró xúhun ndé jendujin. Te jeē súcuan ni cacushi ni maá ró, te jeē yúcuan cuehē ñayuu Macedonia ni cacondihvi ni i ni cajēhe maá i.

³ Te táji rí ndinúni hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnúhun ni cahán rī jeē squícu vāha ró jín jniñu ún. Chi coo tūhva ndije ró jín xúhun nájñuhun ni cahán rī jín i.

⁴ Chi sanaa te jecoo jecu tē Macedonia jín rí, te núu cuni de jeē tu cáhīyo tūhva ró, te coo jñuhun canu nuū rī, te suni nuū maá ró jijnáhan ró, chi ni cahán teyí rí jeē cáhīyo tūhva ndije ró.

⁵ Jeē yúcuan ní jeni ni rī jeē cánuú cahán rī jín táca hermano yáha jecoo de xīhna gā, te saá te jinū rī, návāha stíhví ni de róhó jēē yáchī na cóo tūhva xūhun jēē ní cacahán rō jeē cuáha ró. Te súcuan te coo tūhva siquī jeē vāha ni rō, te nasūu jēē safuerza rī rohó.

⁶ Cocuhun ni rō jñuhun yáha, jeē núu jecu-ni cuāha ró te suni jecu-ni nanihín rō: Chi tē jeē tihlí-ni táji, suni tihlí-ni nastútú. Te tē jeē táji cuehē, suni cuehē nastútú. Achí tutu.

⁷ Tācá ñn ñn ró cuāha ró ndésaa ni tee ni rō. Ma cúxi ni rō cuāha ró, chi nasūu fuerza cúu. Chi Yaā Dios manī yā jín ñáyuu jeē cúsih ni cuāha.

⁸ Te maá Yaā Dios cuu sáha ya jeē nducuehē ndinuū

jeē vāha cuu ró jijnáhan ró, návāha níni cone vāha ró ndihi táca jeē jini ññuhún ró, te coo sobra gā jeē cuāha ró jēē cúu táca jniñu vāha.

⁹ Chi súcuan cáhan tutu i siquī táca ñáyuu jēhe:

Ni scáa i ni jēhe i nuū ñáyuu ndahú.

Te táca jniñu vāha sáha i, chi quendōo ní cáni.

Achí tutu.

¹⁰ Te Yaā Dios jēhe ya tata nuū tē táji, te nihín de staā jeē cáji de. Te suni súcuan cuāha ya ndinuū jeē vāha cuu ró, te sáha ya jeē cáyā te nducuehē jniñu vāha cásáha ró.

¹¹ Súcuan cucúca ró jín táca-ni, návāha cuu cuāha cuehē rō. Te xūhun jēē cuáha ró quíhín nuū hermano cándoho ndáhú, suu sáha jeē nácuatáhú i nuū Yaā Dios.

¹² Chi xūhun jēē cuáha ró núu i, nasūu maá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios.

¹³ Te cahán i jeē yóhoyo vāha Yaā cúu Yaā Dios, chi xūhun jēē ní cajēhe ró stéen jeē vāha cá candíje ró jnúhun Cristo. Te suni sáha jeē cahán i jeē yóhoyo cújéhnú Yaā Dios siquī jeē ní cajēhe cuehē rō nuū i jín núu sava ga ñayuu.

¹⁴ Te suni cacān tahú i jehē rō, chi coo manī ndasí i jín ró siquī jeē yóhoyo vāha ni sáha Yaā Dios jín ró.

¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ñn tahū cáhnu ndasí jēē ma cánda cuiti yō castúhún ndihi yó.

Jeē ndíso jniñu Pablo cúu de apóstol

10

1 Te ruhū Pablo, cáhán ndahú rí jín ró jijnáhan ró jín modo maá Cristo jeē vítá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jín ró, te núu ndéé jícá rí te tu yúhú cuiti rī cahān nīhin ri jín ró, cácahān rō.

2 Núu súcuan te cáhán ndahú rí jín ró jeē núu na jée rī te ma cahān rō jnūhun jeē sáha jeē cuxeēn rī nuū rō. Chi sava ró cácahān jeē casáha ri jniñu ya siquī jeē máni jeē na níhín rī siquī ún. Núu súcuan te íyó túhva ri cuxeēn rī nuū ñayuu cácahān súcuan.

3 Chi vēsú cácuu ri ñayuu cáyūcú ini ñayīví, te tu cájejnáhan ri modo cájejnáhan ñayuu ñayīví. Chi nájnūhun jeē cájejnáhan ri siquī tācá jniñu neé.

4 Chi nasūú ndajniñu ñayīví jéjníñu ri cájejnáhan ri, chi jín poder Yaā Dios cájejnáhan ri snāā rī tāca fuerza jeē cúu contra siquī yā.

5 Súcuan cásnāā rī tāca jnúhun ndúxí jín jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi ri nuū ndihi jeē tú vāha jeē cájeni ni ñayuu, návāha cuandetū i nuū Cristo.

6 Te jeē jínu cuandetū vāha máá ró, yūcuán na te coo túhva ri cuāha ri castigo nuū tāca gá ñayuu jeē tu cájendetū.

7 Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe

jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan ri.

8 Te núu ni cahān teyí rí jín ró jeē ndíso jniñu ri, te tu cúcanu rī sáha. Chi máá Jítoho yō ni tejníñu ya ruhū jijnáhan ri, návāha sáha ri jeē ije ánuá rō jín jnúhun ya, nasūu jée snāā rī.

9 Núu súcuan te tu cúni rī jeē cáni ni rō jeē nducú rí siúhú rí rohó jín carta rī.

10 Chi cácahān sava ró jée tāca carta rī yōhyo stāhví ni te nīhin ndácu jniñu, te sa suhva núu ndéé rí jín ró te tu cúndeyí ni rī ndacu nīhin ri jniñu, te suni tu cúu cahān vāvíhí rí, achí rō.

11 Te ñayuu cácahān súcuan na sáha i cuenta jeē nájnūhun nīhin cáhán carta rī jeē íne jícá rí, suni súcuan nīhin ndacu ri jniñu nuū rō jeē cóndee rī jín ró.

12 Te va ma chúndeyí cuiti ni nde ri jeē sajhenu ri maá rí, nájnūhun cásáha sava tēe un jée cájejnúhún nde de máá de. Tāca tēe ún chi cáacunéé de jeē cájeni ni de jeē cujénu ga de vēsú jnáhan de, te tu cásáha de cuenta ndese cúni Yaā Dios jeē caca de.

13 Te ruhū jijnáhan ri, chi cuteyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jéhe jnūhun jeē ni jínū rī nuū rohó ñayuu ñuu Corinto.

14 Jeē yúcuan ná ni jinūcoo ri nuū rō jeē xíhna ñúhún te

nasūu jēē ni yáha ri nuū cúhva jniñu ní jéhe ya nuū rī. Chi xīhna gā maá rí ni jinūcoo nuū rō ni canacani ri jnūhun vāha Cristo.

¹⁵ Te tu cácutéyí rí siquī jniñu ní casáha inga tēe, nájñūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níni máá cúhva jeē ni jéhe ya nuū rī.

¹⁶ Yūcuán na te cácuni rī scuité núu ga rī jnūhun jnáma ya yohó núu tāca gá ñuu yúcu ndé yūcuan gá. Te súcuan te ma quívi nduu rī cutéyí rí nuū jeē jé ni canacani inga tēe jnūhun.

¹⁷ Te núu ndé tēe cúní de cutéyí de, na cutéyí de siquī jeē sáha máá Jítoho yō, nasūu siquī jēē sáha máá de.

¹⁸ Chi nasūu tēe jeē jējñuhún máá cúu jeē quéndōo yíñuhún, chi sa suhva tēe jeē jējñuhún máá yá.

Jeē cahán Pablo siquī tēe cánacani jnūhun stáhú

11

¹ Cone cáhnu ni rō jijnáhan ró jeē cahán rī jecu jnūhun modo nájñūhun cácahān ñayuu canéé. Núu súcuan te cáhnu coo ni rō víi.

² Chi cúcuñí rí jehē rō jijnáhan ró, nájñūhun cúcuñí Yāa Dios. Chi cácuu ró nájñūhun ñn sūchi síhí íyó ndoo, te ni sáha ri jeē quijnáhan ró jíin Cristo, nájñūhun quijnáhan ñn sūchi síhí jíin máñuhún-ni yíi i.

³ Te yúhú rí sanaa te cuāha ro jnūhun stáhú táca tēe un róhó, te siáá rō jnūhun jeē chiñuhún ndáa rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini ñn coō, te ni stáhú un ña jíin jnūhun ndíchí stáhú.

⁴ Chi núu quíjicoo tēe nuū rō jeē tu cánacani ndaā de jnūhun Jesús nájñūhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnūhun jeē ní ca-candíje ró jēē jnáma ya rohó.

⁵ Te tāca tēe cácaandíje ró un jēē cácahān jeē apóstol cujéhnu ga cácuu, tú cuiti jeē cujéhnu ga nde de nuū rī.

⁶ Chi vēsú tu níhín vāha nde ri modo cahán rī, te jécūhun vāha ni rī. Chi jíin ndihí jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jíicán rī xūhun núu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnūhun ya. ¿Te va cuēchi ni sáha ri jeē ni sáha ri súcuan, chí naún?

⁸ Chi sava ga grupo ñayuu cácaandíje ni quihín ri xūhun jēē ní cajéhe i nuū rī, návāha súcuan-ni nacani ri jnūhun ya nuū rō jijnáhan ró.

⁹ Te ná ni condee rī jíin ró te ni ndihí xūhun rí, te tu ní jíicán cuiti rī nuū ní ñn ró. Chi hermano jeē ní quijicoo ichi

Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiti rī.

¹⁰ Te nájnūhun cúcáhnu vāha ni rī jeē jiní rī jnūhun ndaā Cristo, suni súcuan jíní rī jeē ma quíhin ri xūhún nuū ni ññ ñayuu ní ndáñúū Acaya, návāha ma cási i jeē cúsi ni rī jeē súcuan-ni nácani ri jnūhun ya.

¹¹ ¿Te á síquī jeē tú manī rī jín ró cúu jeē cahán rī súcuan, jéni ni rō, chí naún? Tuú chí máá Yaā Dios jiní yā jeē maní rī jín ró jijnáhan rō.

¹² Te sáha ri ná-ni sáha ri, chí ma quíhin ri xūhun rō, návāha casi rī nuū jeē casátéyí téé un máá de jeē cácahān de jeē ñnuú cásáha de jniñu ya jín rí.

¹³ Te tēe ún chi nasūú apóstol ndaā cácuu de, chí máni máá jnūhun stáhú cácahān de, te cásáha de máá de jeē cácuu de apóstol Cristo.

¹⁴ Te tu náā ni yō jító yó jēe casáha de súcuan, chí je jíní yō jeē suni Satanás násama máá te stáhú jēe sáha máá nájnūhun ññ ndajéhé Yaā Dios jeē jíca jín luz yā.

¹⁵ Te jeē yúcuan suni tu náā ni yō jító yó jēe téé cájejniñu nuū Satanás, cásáha de máá de jeē téé ndaā cácuu de. Te ññ quivī te nanihīn de síquī jniñu néé cásáha de.

Jnūndóho ni ndoho Pablo síquī jeē cúu de apóstol

¹⁶ Inga jínu cáhán rī jín ró jeē ni ññ rō ma cáni ni rō jeē téé cánéé cúu rí. Te núu

súcuan cájeni ni rō, te va cuatáhú nde rō jēe cahán rī nájnūhun tēe cánéé, návāha suni cuu cutéyí nde ri jecu nájnūhun cásáha tēe ún.

¹⁷ Jeē cahán rī vijna chi nasūu jēe ní ndacu máá Jítoho yō cúu, chí sa nájnūhun tēe cánéé cáhán rī jeē cutéyí nde ri.

¹⁸ Chi cuehē de cásatéyí de máá de modo jeē iyó ini ññayiví, te suni súcuan na sátéyí nde ri máá rí núu súcuan.

¹⁹ Te va tēe cáhīyo cájí xíní cácuu nde rō, te jeē yúcuan cúu vāha ni nde rō cuatáhú rō ññ tēe cánéé núu súcuan.

²⁰ Chi va vāha-ni cájendeyí ni rō nuū téé un jēe casáfuerza de rōhó cuajniñu rō núu de, chí cásáha de jeē ndundáhú rō, chí cáquende de ndajniñu rō, chí cásájéhnu de máá de nuū rō, chí ndé cácatu de nuū rō.

²¹ Te vēsú cúcañu nde ri cahán rī, te na cáhán rī jeē tu ní cúndeyí ni nde ri satéyí rí máá rí nájnūhun casáha tēe ún.

Te vijna te núu iyó sava tēe chúndeyí ni de sátéyí de máá de, te va suni chundeyí ni nde máá rí núu súcuan. Te va cáhán rī nájnūhun cáhán ññ tēe cánéé.

²² Núu cácutéyí de jeē téé hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū.

²³ Núu tēe cájejniñu nuū jnūhun Cristo cácuu de, te víhyá gā ruhū. Te va cáhán rī nájnūhun tēe cánéé jēe cutéyí rí súcuan. Chí ni caa ga

ni sájniñu ri vēsú maá de jínáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū.

²⁴ Te jnáhan ri hebreo, uhūn jínu ni cacani xeēn de ruhū jín cuarta ñi, in cūhva jeē jé vajni cuu rī sāha.

²⁵ Unī jínu ni cacani de ruhū jín yujnu xíi, te in jínu ni cajēhe de yuū xinī rī. Unī jínu ni quēe barco jeē ní jica ri siquī jnúhun ya. Te in jecuáa jín in ndiáca ni yosō candá rí nuū cunú ndute mar.

²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuñhá. Ni cācu ri nuū ñayuu nación rī jín nú ñayuu ñuu jicá. Ni cācu ri cháha chúcuan ná ni iyo ri ñuu jín rancho jín mar. Ni cācu ri nuū táca jnáhan ri jeē tu íyó ndáa.

²⁷ Ni sájniñu nihin ri te yí ní ndoho ri. Cuehē jínu ni jehni rī maá rí māhná. Ni jii rī sōco, ni jichī rī ndute. Cuehē jínu ni iyo ndite ni rī, ni cuijnu rī, ni cumanī sahma ri

²⁸ Te siquī táca jéē yáha chi íyó gá. Chi ndiquivī ndóho ri jeē nácani ndasí ni rī jehē táca grupo ñayuu cácadíje.

²⁹ Núu in ñayuu tu fuerza ini i, te suni ndóho ri jehē i. Te núu in ñayuu quivī i cuēchi sāha jnáhan i, te ndóho ri jnúhun cúcanu jín jnúhun náxeēn ni.

³⁰ Núu súcuan te núu cánuú cutéyí nde ri, te va cutéyí rí siquī táca jéē steén jeē tú na fuerza ini rī.

³¹ Te Yaā Dios, Yaā cúu Tátá maá Jítoho yō Jesucristo, jíní yā jeē cahán ndaā rī. Te ní cáni na cáhán ñayuu jeē vāha ndasí Yaā cúu ya.

³² Ná ni iyo ri ñuu Damasco, te gobernador jeē ndácu jniñu ndañū jeē jnī rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chi jnī de ruhū quihīn rī vecāa ni cuni de núu.

³³ Te ni quivī ri chíji in jīca, te ñayuu cácadíje ni cascúun i ruhū ventana in vehe jeē néne jicá jeē ndihyú ñuu ún. Te súcuan ni cācu ri nuū téé ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī.

² Jíní rī in tēe cándíje Cristo, te je ni cuu uxī cuūn cuiyā jeē ní sāha ya jeē ní caa tēe un ní jehēn de nde andivī únī. Te tu jíní rī núu ni jehēn rī jín yiqui cúñu rī, chí ní jehēn anuá-ni rī. Máa Yaā Dios cúu jeē jíní.

³ Te jíní rī jeē ní ndonehen ya ruhū. Te á ní jehēn rī jín yiqui cúñu rī, chí ní ndōo, tu jíní rī, chí máa-ni Yaā Dios cúu jeē jíní.

⁴ Chi ni sāha ya jeē ní caa ri ni jehēn rī nde jardín andivī. Te yūcuan ní jini sōho ri táca jnúhun sáhi ndasí jéē ma cúu castūhun yóhó ñayuu.

⁵ Te siquī jeē ni sāha ya súcuan jín rí cúu jeē cutéyí rí,

te ma cutéyí rí siquī ndese cúu maá rí. Chi cutéyí rí máni jeē tú na fuerza ini rī.

⁶ Te núu cúní rī cutéyí rí siquī maá rí nuú, te nasūu jéē canéé rí núu sáha ri súcuan núu, chi ndaā cúu jeē iyó jeē cutéyí rí. Te ni ma sáha ri, chi tu cúní rī jeē caní ni ñayuu jeē kujéhnú ga rī vēsú jeē ní jito i chí jéē ní jini i jnūhun rī.

⁷ Te tu cúní yā jeē yáha ri cutéyí rí siquī jeē ni stéén ndijin yā jniñu jéhnú ndasí un núu rī, te jeē yúcuan ni quiji ñn jnūndóho jeē ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí.

⁸ Te uní jínu ni cahān ndahú rí jín maá Jítoho yō jeē na téjyo ya quihīn.

⁹ Te ni cahān yā jín rí: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chi súcuan te nducuehē gā fuerza Cristo ini rī.

¹⁰ Jeē yúcuan cúu jeē cúsiñ ni rī jeē tú na fuerza rī, jín jéē cácahān ndevāha ñayuu jín rí, jín jéē cúmanī nuū rī, jín jéē cájito xeēn i ruhū, jín jéē ndóho ri jnūndóho siquī Cristo. Chi jeē tú na fuerza maá rí, yúcuan sáha jeē nihín rī fuerza maá yá.

Jeē nácani ni Pablo siquī ñayuu cácañdije ñuu Corinto

¹¹ Te va tēe canéé cúu ri jeē ni sátéyí nde ri maá rí. Te

siquī jeē tu cácañdije ró rúhū, jeē yúcuan ní sátéyí rí maá rí. Chi cánuú jéē maá ró cua-jnúhún ró ruhū nuú. Chi vēsú tú jniñu ri jeē maá rí, te va tu núu cuiti nde ri nuū tāca tēe un jéē cácahān rō jeē apóstol kujéhnú cácuu de.

¹² Chi mēhñu ró ní sáha ri tācá jniñu jeē steén jeē cúu ndije ri apóstol. Chi jín cuéhē paciencia ni sáha ri tācá jniñu jéhnú jeē steén poder Yaā Dios, jín tāca jniñu jeē nahán ní canaa ni rō ni cajito ró.

¹³ Te tu ní sáha ri jeē núu ga cácuu ró núu tāca gá grupo ñayuu cácañdije, chi maá ñn-ni jeē tu ní stáhān rī rohó jéē cuáha ro jéē jini ñúhún rí. Cone cáhnu ni rō núu súcuan ni sáha nde ri falta nuū rō víi.

¹⁴ Te vijna je iyó túhva ri jecondēhe rí rohó vuelta unī. Te suni tú na vé cacán rī nuū rō, chi nasūu ndajniñu ró cúu jeē cúní rī, chi sa suhva jeē quendōo vāha ró jín jnūhun ya. Chi nájñuhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuáha de jeē quendōo vāha sēhe de.

¹⁵ Jeē yúcuan cúsiñ ni rī stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jín ró, vēsú sanaa te jecu-ni cáhīyo manī rō jín rí.

¹⁶ Te iyó jecu rō cácahān jeē vēsú tú na vé ni jícán rī nuū rō, te tēe stáhú cúu ri, chi ni nducú rí modo ndichí nihín rī xūhun ró, cácahān rō.

13

17 ¿A táca tée ní taji rí nuū rō, á ñn máá de ni stahú de rōhó jeē nihín de xūhun ró cuu máá rí, chí naún? Tú cuiti.

18 Ni cahān ndahú rí jín Tito jeē jécondēhé de rōhó, te ni taji rí ñn hermano ni jeē jín de. ¿Te chí ní stahú Tito rohó ní quihin de xūhun núū rō jeē cuu máá de, chí naún? Tuú chí ñnuú-ni casáha ndindúú rí, te ñn-ni ánuá ndindúú rí.

19 ¿Sanaa te cájeni ni rō jeē cahán rī jñūhun yáha návāha quendō vāha ri jín ró, chí naún? Nasūu súcuan cúu, chí Yaā Dios jiní yā jeē cahán rī maá-ni jñūhun jeē cuní Cristo. Te ndihí jeē cahán rī chí ndúcú rí jeē ije ró jín jñūhun ya, ñánī mánī.

20 Chi yúhú rí jeē núu na jée rī, te sanaa te cuni rī jeē tu casáha ró jñiñu núnahan ni rī. Te máá ró jijnáhan ró, suni ma núnahan ni rō ruhū. Chi sanaa te cátejnáhan ró, cáccuésún ni rō, cáquití ni rō, casándúxí ró, casájnúhún ró, cácahān rō siquī jnáhan ró, cácutéyí ró, cájica neé ró.

21 Te yúhú rí jeē núu na jée tucu ri te cuāha Yaā Dios jñūhun canu nuū rī jeē súcuan casáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jñiñu jnéhén jñiñu jíca jnéni jín jñiñu neé ndasí ní casáha ró.

*Saludo jín jñūhun cástūhun
Pablo jeē sándihí*

1 Yāha cúu vuelta unī jeē jécondēhe rí rohó. Te sándaā yō jñiñu nájñūhun cáhán tutu: Jín jñūhun jeē cahán uū chí unī testigo te cundaā tāca jñiñu, áchí.

2 Te vijna jeē íne jíca rí te cáhán tucu ri nájñūhun ni cahán rī ná ni ine ri jín ró. Cáhán rī nuū ñáyuu ni casáha cuēchi un jín núū ndihí ró, jeē núu na jée tucu ri te ma cóo vitá ni rī jín ró.

3 Te yūcuán cuu prueba jeē cánducú ró, suu núu jendaá jeē cahán rī jín fuerza Cristo. Chi Cristo tu cúmanī fuerza yā jeē sándaā yā jín ró, chí stéén yā poder yā mehñu ró.

4 Te vésú tu ní stéén yā fuerza yā ná ni jihí yā jíca cruz, te vijna chí técu yā jín poder Yaā Dios. Te nájñūhun ni ndoho máá yá, suni súcuan cándoho ri vijna jeē tu fuerza rī. Te vésú súcuan te jín poder Yaā Dios cátecu rī jín yá jeē cuajniñu ri nuū rō jeē siquí jñūhun ya.

5 Coto ndee rō maá ró núu cáhīn nihin ró jín jñūhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró?

6 Te ñūhun ni rī jeē suni cáccáhnu ni rō jeē maá rí cácandíje ndije ri.

7 Te cájicān tahu rī nuū Yaā Dios jeē ma sáha ró ni ñn jñiñu neé. Te vésú núu cuajñúhún ró jeē váha ndácu ri jñiñu nuū rō, chí vésú núu ma

cuajnúhún ró, te tú na vé sáha, chi máni jeē na sáha ró jniñu ndaā cúu jeē cánducú rí.

⁸ Chi tu jési ri nuū jniñu ndaā, chi sa suhva scáca rí.

⁹ Núu súcuan te cácusī ni rī núu tú na fuerza maá rí, te núu íyó fuerza maá ró. Te níni cácan tahu rī jeē na íje ga ni rō jijnáhan ró jíin jnúhun ya.

¹⁰ Te tée ri carta yáha nuū rō nde ná tu jeē rī, návāha núu na jée rī te tuá jíni ñúhún cuxeēn rī nuū rō. Chi ni jēhe Jítoho yō jniñu ndíso ri yáha jée sáha ri jeē íje ánuá rō jíin jnúhun ya, nasūu jée snāā rī.

¹¹ Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō ije ró jíin jnúhun ya, te coo ndeyí ni rō. Te na cóo inuú ni rō te coyūcu mánī rō jíin jnáhan ró. Te Yaā ndíso jnúhun ndeyí sī ni jíin jnúhun cundáhú ni, coo ya jíin ró jijnáhan ró.

¹² Te jeē cahán rō jíin táca jnáhan ró, te yíñúhún techūhu ró ndaha i.

¹³ Sándeyí ni rō jijnáhan ró, áchí hermano cácandíje jeē cáyūcu yáha.

¹⁴ Te ñúhun ni rī jeē Jítoho yō Jesucristo na sáha ga yā jeē váha róhó jíin áhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

1 Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jiín Tátá yō Yaā Dios, Yaā ní nastécu Jesús mēhñu ndíyí.

2 Te ruhū jiín táca hermano cáyūcu jiín rí yāhá, cátee rí carta yáha cuájeē nuū rohó ñáyuu cácandije ní región Galacia.

3 Te cáñuhun ni rí jeē Tátá yō Yaā Dios jiín Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō.

4 Chi Jesús ni socō yā maá yá jeē ni jíhī yā jeē siquí cuéchi yó, návāha jnama ya yohó nuū táca jéē neé íyó ñayīví yáha, chi súcuan ni nujnahan ni maá Tátá yō Yaā Dios.

5 Jeē yúcuan na cáhán yō jeē yóhyo luu cújéhnu ya ní cáni. Súcuan na cóo. Amén.

Siquí jeē tuá na inga jnūhun cācu ñayuu

6 Te náhán náā ni rí jító ri jeē yóhyo yachī cánducú ró stóo ró Yaā Dios, Yaā ní cana róhó jéē quíví ró ndaha ya siquí jeē cundáhú ni Cristo yohó. Chi ni candiquīn rō inga jnūhun jeē sīn cáhán.

7 Te tú cuiti na inga jnūhun jnama yóhó íyó. Te cáhīyo jecu ñayuu castáhān i róhó,

te cácuni i nasama i jnūhun ndese jnáma Cristo yohó.

8 Te núu iin ñayuu nacani inga jnūhun nuū rō ndese jnáma ya rohó, te núu tu quíjnáhan jiín jnūhun ni canacani ri nuū rō xīhna gā, na jnáhnú ndetū ñayuu ún. Te vésú maá rí chí iin ndajéhé jeē quíji nde andiví nacani inga jnūhun núú, na jnáhnú ndetū.

9 Je ni cahān rī jiín ró, te suni súcuan cáhán tucu ri vi-jna: Na-ni tēe nacani inga jnūhun nuū rō, te núu tu quíjnáhan jiín jnūhun jeē ní ca-jetáhú ró, na jnáhnú ndetū tēe ún.

10 Te jeē cahán rī súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu jiín rí, cájeni ni rō? Núu ndúcú gá rí jeē cúsi ni ñayuu jiín rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

11 Te cástūhun rí nuū rō, hermano jijnáhan ró, jéē jnūhun jnáma ya yohó jéē nácani ri, nasūu jéē ní jeni ni maá rí jiín ñáyuu cúu.

12 Chi nasūu ñáyuu ni stéén nuū rī, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rī.

13 Chi je ni cajini jnūhun ró ndese ni sáha ri nde saá, ná ni chíñúhún rí sahān jnáhan ri ñayuu hebreo. Te cájini rō jeē yóhyo ni jito xeēn rī ñayuu cácandije nuū Yaā Dios, te ni condihví ni rī snāā rī i núú.

14 Te vāha ga ni cutūhva ri sahān ún vēsú cuehē gā tēe nación rī jeē ní cajehnu jín rí, chí ni condihvī gā ni rī siquī tāca jēe ní cajequin jí rī.

15 Te vēsú súcuan te Yaā Dios je ni nacāji ya ruhū nde ná tu cacu ri, te in quivī te ni cusī ni yā ni cana ya ruhū jeē quivī ri ndaha ya, siquī jeē yóhoyo ni cundáhú ni yā ruhū.

16 Te ni steén yā Sēhe ya nuū rī, návāha nacani ri jnūhun ndese jnáma ya ñayuu tāca nación jeē tu jíní jnūhun ya. Yūcuán na te tu ní cájnūhun rí ni in ñayuu,

17 ni tu ní jéhén rī ñuu Jerusalén nuū tēe cácuu apóstol xīhna gā vēsú ruhū. Chí sa suhva ni jehēn-ni ri nde región Arabia, te sáa te ni nuhūn tucu ri ñuu Damasco.

18 Yūcuán na te nde ni yāha unī cuiyā, te ni jehēn rī Jerusalén. Te ni jini jnáhan ri jíin Pedro, te ni condee rī jíin de xahūn-ni quivī.

19 Te tu ní jíto ri nuū tāca gá apóstol, chí máa in-ni nuū Jacobo ñani maá Jítoho yō.

20 Jnūhun yāha jēe tēe ri cua-jeē nuū rō, chí jíin Yaā Dios jeē ndaā cúu.

21 Yūcuán na te ni jehēn rī ní región Siria jíin Cilicia.

22 Te ñayuu cácuandíje jeē yíhi ndaha Cristo, jeē cáyūcú región Judea, ná tu coto cuiti i nuū rī saá.

23 Chí máni jnūhun-ni ni cajini i cácahān ñayuu: Tēe ni jito xeēn yohó ndé saá, vijna chí nácani de jnūhun cándíje yó jēe ní nducú de snāa de nde saá, áchí i.

24 Te ni cacahān i jeē yóhoyo cújéhnu Yaā Dios jeē súcuan ni sáha ya jíin rí.

Jeē ní cajetáhú táca gá apóstol un Pablo

2

1 Yūcuán na te nde nuū uxí cuūn cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí.

2 Te ni jehēn rī chí máa Yaā Dios ni steén yā jeē jíni ñúhún quíhīn rī. Te ni candutútú sīn nene tēe cácujuhnu nuū ñayuu cácuandíje ún. Te ni castūhun rí nuū de siquī jnūhun jnáma ya yohó jēe nácani ri nuū ñayuu tāca nación tu jíin jnūhun ya. Te súcuan ni sáha ri návāha cuajnúhún de jniñu ri, te ma quéndō cāhá jniñu sáha ri jíin jēe ni sáha ri.

3 Te ni tu ní cásaha fuerza de Tito, tēe ni jica jíin rí, jeē cóndee jnunī circuncidar de, vēsú nasūu tēe hebreo cúu de.

4 Te súcuan ni cundaā, vēsú ni quívicoo jecu tēe stáhú jēe sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar siquī jeē yíhi yó ndaha Cristo Jesús. Chí cácuu de jeē squícu tucu yó ley un, nduu tucu yó mozo nuū ley un.

5 Te tu ní cajetáhú cuiti rī nuū tēe ún, chí cúní rī jeē quéndō nīhin ró jíin náhan ró jíin jnūhun jnáma ya yohó.

6 Te máa tēe cácujuhnu nuū ñayuu cácuandíje ún, tuá na inga jniñu jēe ní cándacu de nuū rī. Te máa rí chí tu

ní chíhi ri cuenta siquī jeē cácujuhnu de, chi suni Yaā Dios tu sáha ya cuenta, chi inuú-ni cúu ndivii tēe nuū yā.

⁷ Chi sa suhva ni cajini de jeē jnúhun jnáma ya yohó, ndíso jniñu ri nacani ri nuū ñáyuu tācá nación jeē tu casáha circuncidar, nájñuhun nácani Pedro jñuhun un núu ñáyuu hebreo jeē casáha circuncidar.

⁸ Chi Yaā Dios jeē ní tají Pedro jeē nácani de jñuhun nuū ñáyuu hebreo, suni máá yá ni tají rúhū jeē nácani ri jñuhun nuū ñáyuu tācá nación tu jíní jñuhun ya.

⁹ Jeē yúcuan, Jacobo jín Pedro jín Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñáyuu cácañíje jeē maá de cácujuhnu ga. Te ni cajni de ndaha ri jín ndaha Bernabé, jeē ní castéén de jeē cáhīyo manī de jín rí, jín jēé ní cacundaā ni de jeē maá rí quingōo nacani jñuhun nuū ñáyuu tāca gá nación, te máá de jínáhan de nuū ñáyuu hebreo.

¹⁰ Te máá ñn-ni jeē ní cajicān de cúu jeē cónahān rí chindéé ñáhān rí ñáyuu cándoho ndáhú, te jniñu ún je ni condihvī ni rī ni sáha rí.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu.

¹² Chi nde ná tu quecoo sava jnáhan de hebreo jeē ní tají Jacobo, te yéji de staā jín ñáyuu jeē násūu hebreo

cácuu. Yūcuán na te nuū ní quecoo tēe ún, te ni cusín de jeē tuá yéji de jín i, chi yúhú de jeē cúni tāca tēe un jēé tuá squícu de ley jnáhan de hebreo. Chi áchí ley jeē ma cúu caji de staā jín ñáyuu jeē tu casáha circuncidar.

¹³ Te sava ga tēe hebreo jeē cácañíje, suni ni cacujiyo de nuū i, nájñuhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhān de ni cujiyo.

¹⁴ Yūcuán na te ni jini rī jeē ní canayūhú de caji de staā jín ñáyuu ún, cúu jeē tuá jíca de jín modo jeē cahān jñuhun jnáma ya yohó. Te ni cahān rī nuū Pedro, jító jínúu tācá de: Róhó jéé cúu tēe nación yō hebreo, tuá squícu ró ley jnáhan yó hebreo, chi yéji rō jín ñáyuu ún. ¿Te najehē sa-fuerza rō i jeē squícu i ley jnáhan yo hebreo núu súcuan? ni achi rī.

Ñn-ni modo jnáma ya ñáyuu hebreo jín táca gá nación

¹⁵ Te yohó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó.

¹⁶ Te vēsú súcuan te jíní yō jeē ní ñn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahān, chi máá jēé candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó siquī jeē candíje yó, násūu jín jēé nducú yó squícu yó ley un. Chi áchí tutu ñ: Ni ñn ñáyuu ma quéndōo ndaā i

nuū Yaā Dios jiín jēē nducú i squícu i jniñu jeē ndácu ley, achí.

17 Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ni jīhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun tāca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiṭi jeē súcuan.

18 Chi sa núu naquihin tucu yó ley jeē ni stóo yó un, te súcuan téé yó cuēchi síquī maá yó.

19 Chi ruhū, nájnūhun ni jīhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios.

20 Chi nájnūhun je ni jīhī rī jicā cruz jiín Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī.

21 Núu súcuan te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jiín yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jīhī Cristo nuú.

Jnúhun ley jiín jnúhun cándíje

3

1 Róhó hermano ñuu Galacia, ¿naun tu cájecūhun ni rō? ¿Ndé téé ni saca núu xinī rō jeē tuá cájetáhú ró jnúhun ndaā? Chi ná ni canaçani ri jnúhun ya nuū rō, te cájī ndasí ni cajecūhun ni rō jeē ni jīhī Jesucristo jicā cruz jehē rō.

2 In-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jēé ní cacundeyí ró squícu ró jniñu ndácu ley Moisés? Tú cuiṭi, chi jeē ní cacandíje ró jnúhun jnáma ya rohó jēé ní cajini sōho ró.

3 ¿Ndese cúu jeē tu cájecūhun cuiṭi ni rō? Chi xīhna gā ni cacandíje ró jēé ni jīhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún?

4 Núu súcuan te tu ndé ní jéjníñu cuiṭi jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cacandíje ndije ró yá.

5 ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jēé ní cajini sōho ró.

6 Abraham ni candíje de jeē sáha Yaā Dios jeē ni jéjnūhun ya, te jeē yúcuan ní ndahva yā cuēchi de.

7 Núu súcuan te na jécūhun ni rō jijnáhan ró jéé ñayuu

cácandíje jeē sáha Yaā Dios jehē i, ndívi i yucūn Abraham siquī jeē súcuan cácanđíje i.

8 Chi nde jenahán je cáhán tutu i jeē ñáyuu tãcá nació n tu jíni jñuhun Yaā Dios, ndahva yā cuēchi i núu candíje i ún. Te nde ná tu cuu tãca jéē yáha te je ni jejnūhun ya jñuhun vāha yáha nuū Abraham: Jeē rohó cúu jeē quendōo ndetū ñayuu tãcá nació n.

9 Núu súcuan te ñayuu cácanđíje, quendōo ndetū i jíin Abraham, tēe ni candíje jeē ni jéjnūhun ya.

10 Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núu tútu i: Jnahnū ndetū tãca ñáyuu jeē tu squícu ndihi cuiti jñuhun yósó núu tútu ley, achí.

11 Núu súcuan te cájí cúu jeē ni in ñayuu ma quendōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí.

12 Te ley Moisés tu cáhán jeē cótecu yō ní cáni siquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

13 Te Cristo ni jnama ya yohó núu jñuhun cáhán ley jeē jnahnú ndetū yō siquī cuēchi yó, chi máá yá ni ndoho siquī jñuhun jeē jnahnú ndetū yō. Chi yósó núu tutu i: Tãca ñáyuu condita caa jicā yújnu, jnahnū ndetū i, achí.

14 Te Cristo Jesús ni jihī

yā jicā yújnu cruz návāha quendōo ndetū ñayuu tãcá nació n sáha ya. Chi jñuhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quiiji.

Siquī ley jíin siquī contrato jeē ni jéjnūhun ya

15 Hermano, na cáhán rī in jñuhun ndese cásáha ñayuu ñayívi: Núu in tēe sáha de in contrato chí in acta, te núu je ni cucutú ni sáha de firmar, te ma cúu ga najnanū, ni ma cúu jecosō gā.

16 Te suni súcuan ni sáha Yaā Dios in contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu i siquī cuehē yucūn de, chi sa cáhán siquī in-ni yucūn de, te suu cúu Cristo.

17 Núu súcuan te jñuhun jeē cahán rī yáha cúu jeē xīhna gā ni sáha Yaā Dios in contrato jíin Abraham, jeē quiiji Cristo jnama ya yohó, te ni sácutú yá. Yūcuán na te ni yáha cuūn ciento ocō uxī cuiyā, te sáá te ni jēhe ya ley nuū Moisés. Te ley un jéē ní quee cueé gá, ma cúu nacanū contrato un, ni ma cúu casi nuū jñuhun jeē ni jéjnūhun ya jeē jnama ya yohó.

18 Chi núu jeē jíin ley Moisés jnama Yaā Dios ñayuu, yūcuán na te nasūu síquī contrato jeē ni jéjnūhun ya cúu. Chi sa suhva siquī maá jéē ni jéjnūhun Yaā Dios nuū Abraham cúu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jēhe ya un cuéé gá návāha nastúu cuēchi i. Te ni ndacu jniñu máá-ni nde ná tu quiiji Cristo, Yaā cúu yucūn jeē ni jéjñūhun Yaā Dios jeē quiiji. Te nde ná ni jēhe Yaā Dios ley un núu ñayuu, te ni tají yá tǎcá ndajéhé yā ni cacastūhun núu Moisés, te Moisés ni nacachī nuū i.

20 Te sǎn cúu jñūhun jeē ni jéjñūhun ya nuū Abraham jeē quiiji Cristo, chi máñúhún-ni ya ni jejnūhun, te tu ní jini ñúhún ni ñn jeē nacachī nuū Abraham.

Siquī ndese jéjníñu ley jenahán

21 Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjñūhun ya ún? Tú cuíti jeē súcuan. Chi núu jeē ni jēhe Yaā Dios ñn ley jeē cótecu ñayuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núú.

22 Te tuú chi yósó núu tútu ñi jeē ndíhi ñayuu ñayíví, nájnūhun yíndihyū i vecāa chi cáyíhi i chíji cuēchi. Te súcuan cúu návāha tǎcá i jeē candíje i jeē ni jíhi Jesucristo jehē i, nihīn i máá jēē ni jéjñūhun ya nuū i siquī jeē candíje i ún.

23 Chi nde ná tu quee jñūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quiívi quiiji Cristo, Yaā candíje yó.

24 Núu súcuan te ley ni cuu ñn jeē ndíto yóhó nájnūhun ñn

mozo ndíto sūchi lúlí, te ni jejníñu nde quiívi ní quiiji Cristo, návāha candíje yó jēē ni jíhi yā jehē yō, te ndahva Yaā Dios cuēchi yó.

25 Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

26 Chi ndívi rō cácuu sēhe Yaā Dios siquī jeē ní cacandíje rō Cristo Jesús.

27 Chi tǎca rō jeē ní jendute rō síquī jeē ni quiívi rō ndaha Cristo, ni sáha ya jeē ní nduu rō nájnūhun cúu máá yá.

28 Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi ñn na cúu rō núu yā jeē cáyíhi rō ndaha Cristo Jesús.

29 Te núu cáyíhi rō ndaha Cristo, núu súcuan te yucūn Abraham cácuu ndije rō, te nihīn rō maá tǎhū jeē ni jéjñūhun ya.

4

1 Jeē cahán rī jíin rō jijnáhan rō cúu jeē yáha: ñn sūchi chíi tǎhū, vésú maá i naquihin ndíhi jeē névāha tátá i, te núu lúlí i chi inuú cúu i jíin mozo.

2 Chi yíhi i ndaha tǎca jéē ndíto i jíin jéē ndíto ndajníñu i, nde quee quiívi jeē ní jeni tátá i, te sáa te nihīn i.

3 Te suni súcuan yóhó, chi nde ná tu jecūhun ni yō siquī Cristo te ni cuu yó nájnūhun sūchi lúlí, te ni yíhi yó chíji tǎcá costumbre jeē ní cajequin ñayuu ñayíví.

4 Te nde ná ni quee quivĩ jeē ní jeni Yaā Dios, te ni tají yá Sēhe ya, ni cacu ya chĩji ñin ñahan, te ni cacu ya yucūn ñayuu nación hebreo jeē cáyihĩ chĩji ley Moisés.

5 Súcuan ni cacu ya návāha jnama ya yohó jēē tuá quihĩ yó chíji ley un, te návāha naquihin Yaā Dios yohó cuu yó séhe ya.

6 Te siquĩ jeē cácuu ró séhe ya, te ni tají Yaā Dios Espíritu Sēhe ya ni quivĩ ini anuá rō, te sáha ya jeē cácahān jee ró: Tátá maá ná.

7 Núu súcuan te tuá cácuu ró nájnūhun mozo, chí séhe ya cácuu ró. Te jeē cácuu ró séhe Yaā Dios, te suni nihĩn rō maá táhū jeē ni jéjnūhun ya jeē jíin Cristo.

Jeē nacani ni Pablo siquĩ ñáyuu cácañdĩje

8 Chi nde saá, nde ná tu jecūhun ni rō ndese Yaā cúu Yaā Dios, te ni cacu ró mozo nuū tāca jēē násūu yāā ndaā cúu.

9 Te vijna chi je cájini rō ndese Yaā cúu ya, te vāha ga na cáhān rĩ jeē maá yá je jíin yā rohó. Núu súcuan ¿te najehē cácuni rō nandió cóo ró nduu tucu ró mozo nuū tācá costumbre ñayuu ñayivĩ jēē tu níhĩn jíinũ cuitĩ?

10 Chi máni jeē cánēe ñi rō quivĩ jíin yóō jíin vico jíin cuiyā.

11 Te yúhú rí sanaa te tu ní jéjnĩũ cuitĩ jeē ní nacani ri jnūhun nuū rō.

12 Cáhān ndahú rí jíin ró hermano, jeē na cáni ni rō nájnūhun jéni ni maá rí jeē

tuá squícu ri costumbre ñayuu hebreo. Chi ruhū ni nasáha ri maá rí nájnūhun máá ró jeē tu ní cáyihĩ ró núu ley costumbre ñayuu hebreo. Te tú na vé ni casáha ró jēē cucuíhyá ni rĩ nde saá.

13 Chi cájini rō ndese ni cuu ná ni nacani núu rí jnūhun nuū rō ndese jnáma ya yohó. Chi siquĩ jeē cuhú rĩ te ni jecuíñĩ rĩ ñuu rō ni nacani ri jnūhun.

14 Te vēsú jnūndóho ni cuu jeē ní cocuhū rĩ, te tu ní casájēē ni rō nuū rĩ, ni tu ní casquéhichĩ ni rō ruhū. Chi sa ni cajetáhú ró ruhū nájnūhun jeē cúu ri ñin ndajéhé Yaā Dios, chí nájnūhun jeē cúu ri maá Cristo Jesús.

15 Núu súcuan ¿te najehē cúu jeē tuá cácusĩ ni rō jíin rí vijna? Chi náhān rí jeē vāha ni casáha ró jēē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuú.

16 Te vijna ¿á ní nduu ri enemigo rō siquĩ jeē cachĩ rí máni jnūhun ndaā nuū rō, chí naún?

17 Te cáhĩyo tēe jeē cándihvĩ ni siquĩ rō jíjnāhan ró, te nasūu jēē quéndōo vāha ánuá rō, chí sa jeē cácuni de nasásĩn de róhó jíin rúhū, návāha condihvĩ ni rō jeē cúu máá de.

18 Te íyó vāha jeē cándihvĩ ni de jehē rō, te núu jeē quéndōo vāha ánuá rō cúu núu. Chi níin jíinĩ ñúhún sáha de jeē vāha róhó, vēsú núu íne ri jíin ró chí núu tú ri íne.

19 Sēhē mánĩ jíjnāhan ró, jeē siquĩ rohó cúu jeē inga jínu

jnáhuhū ni rī, chi nájñūhun ññ ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo.

²⁰ Nacā jeē váha núu jeē ndeé rí jín ró vijna ññhún, návāha cuu cahān manī rī jín ró. Te tu cújnúní cuiñi ni rī ndese ga cúu jeē cáni ni rī siquī rō.

Jñūhun yátá síquī Agar jín Sara

²¹ Róhó jínñahan ró jēē cācuni rō quiñi ró chíji ley Moisés, cachī nuū rī: ¿A tu ní cájini sōho ró ndese cáhán ley un?

²² Chi cáhán tutu ññ jeē Abraham ni ñyo uū sēhe yí de. Te ññ i cúu sēhe Agar, ññahan cúu mozo vehe de. Te inga i cúu sēhe ññahan íyó libre, suu ññasihí de Sara jeē ní cuu ññ ññahan numá.

²³ Te sēhe ññahan cúu mozo, ni cacu i nájñūhun cácu tāca gá sūchi lúli. Te sēhe ññahan cúu libre, ni cacu i máá síquī jeē súcuan ni jeññūhun Yaā Dios.

²⁴ Te yāha cúu ññ jñūhun yátá, chí ndíndúú ññahan un cúu ññ nájñūhun ndíndúú contrato jeē ní sáha Yaā Dios jín ññayuu. Máá ññahan nání Agar, cúu ññ nájñūhun contrato ley jeē véji nde yucu Sinaí. Te ññayuu cáyñi chíji contrato ley, cácuu i mozo nuū ley un.

²⁵ Chi Agar cúu nájñūhun ley jeē ní jēhe Yaā Dios xinī yucu Sinaí jeē ññ nde Arabia. Te cúu ññ nájñūhun Jerusalén, ññuu ññayuu hebreo, jeē íyó vijna, chí tāca sēhe ññuu

Jerusalén, cácuu i nájñūhun mozo nuū ley un.

²⁶ Te Jerusalén jeē íyó andiví, chí sa suhva íyó libre nájñūhun Sara. Te yóhó ññayuu cácandíje, nájñūhun sēhe un cácuu yó, chí íyó libre yó nuū contrato ley.

²⁷ Chi suhva yósó núu tútu ññ:

Róhó jeē ní cuu ró ññahan numá jēē tú sēhe ró, na cúñi ní rō.

Róhó jēē tu ní jéhnde chíji ró jēē scácu ró, na cána jee ró jēē cúñi ní rō.

Chi coo cuehē gā sēhe róhó jēē ní cuu ró ññahan numá vēsú ññahan jeē jé ní scácu sēhe.

Achí tutu.

²⁸ Hermano, sēhe Yaā Dios cácuu yó, chí súcuan ni jeññūhun ya nuū yó, nájñūhun ni jeññūhun ya nuū Abraham jeē cacu sēhe de Isaac.

²⁹ Te nde saá te inga sūchi ní cacu nájñūhun cácu tāca gá ññayuu, ni jito xeēn i Isaac, sūchi ní cacu ni sáha Espíritu. Te nájñūhun ni ñyo saá, suni súcuan cájito xeēn ññayuu tāca sēhe Yaā Dios nde vijna.

³⁰ ¿Te ndese cáhán tutu ññ? Achí: Quenehen ró ññahan cúu mozo na quiñi ññ jín sēhe ññ. Chi sēhe ññahan cúu mozo, ma nihín i tahū jín sēhe ññahan libre, achí yá jín Abraham.

³¹ Núu súcuan hermano, tu cúu yó nájñūhun sēhe ññahan cúu mozo, chí nájñūhun sēhe ññahan libre cúu yó.

Na cuiñi ññhin yó jín jñūhun jeē ní sáha libre yóhó

5

1 Te Cristo ni sáha libre yā yohó jéē tuá yíhi yó chíji ley Moisés. Núu súcuan te cuiñi nihin ró jíin jnúhun jeē ni sáha libre yā yohó, te ma ndivícoo tucu ró cuu ró mozo nuū ley un.

2 Sáha ró cuenta jijnáhan ró, chi ruhū Pablo cahán rī jíin ró jeē núu squícu ró ley circuncidar, yūcuán na te tu níhín jníñu cuiñi jeē ní candíje ró jéē ni jíhi Cristo jehē rō.

3 Te inga jínu cáhán nihin ri jíin táca téē cánducú cuu circuncidar, jeē núu súcuan te suni cánuú jéē squícu de ndivii cuiñi gā jnúhun cáhán ley Moisés.

4 Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jnúhun jeē ndahva yā cuēchi ró síquī jeē cundáhú ni Yāā Dios rohó.

5 Te máá yó chi cájica yó jíin Espíritu, te cácdíje yó jéē ní ndahva yā cuēchi yó, te jeē yúcuán ñúhun ni yō jeē quendōo ndaā yō quivī cuiñi yó núu Yāā Dios.

6 Chi yóhó jéē cáyíhi ndaha Cristo Jesús, vēsú núu jeē cúu yó circuncidar chí tu cúu yó, tú na vé níhín jníñu. Jeē nihín jníñu cúu jeē candíje yó jeē sáha ya jehē yō. Te yūcuán sáha jeē cundáhú ni yō jnáhan yó.

7 Vāha ni cacandíje ró núu. ¿Te ndé ñn ni jesi jeē tuá cájetáhú ró jnúhun ndaā núu súcuan?

8 Jnúhun jeē ní cascáhán de róhó, chí tú vēji nuū maá Yāā ní cana róhó ní quivícoo ró ndaha ya.

9 Te ma náā ni rō jeē téē cástáhú róhó, jnúhun cástéén de cúu nájnúhun levadura, chí vēsú jecu-ni levadura, te ndáa ndihi ñujen sáha.

10 Te cúcáhnú ni rī jeē maá Jítóho yō sáha ya jeē ma cándíje ró jíijnáhan ró inga jnúhun jeē sñn cáhán. Te máá Yāā Dios cuāha ya castigo téē jeē sáca núu xinī rō, núu na-ni téē cúu de.

11 Te ruhū, hermano, núu jeē nácani ga rī jnúhun ley circuncidar nde vijna, te jnáhan ri ñayuu hebreo ma cóto xeēn i ruhū nuú. Chi ma quití ni i jeē nácani ri jnúhun jeē ni jíhi Cristo jicā cruz, núu jeē súni nácani ri jnúhun circuncidar nuú.

12 Te tāca téē jeē sáca núu xinī rō síquī jnúhun ún, vāha ga na cáhnde gā de máá de núu súcuan.

13 Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quivícoo ró táca cuēchi jeē cúu modo neé cúní máá ró, chí sa suhva na sáha ró máá ró mozo jeē chindéé ñáhán ró jnáhan ró síquī jeē cundáhú ni rō i.

14 Chi je ni squícu ró ndihi ley núu squícu ró ñn-ni jnúhun ndácu jniñu yáha: Cundáhú ni rō jnáhan ró nájnúhun cundáhú ni rō máá ró, achí.

15 Te núu máni jeē ndónnda xeēn rō siquī jnáhan ró jéē cuajnáhan ró, te coto ma snáā rō jniñu jeē ni sáha ya mēhñu rō jijnáhan ró.

Modo cuní ñayuu tu cándíje jín modo sáha Espíritu

16 Súcuan cáhán rī jín ró jijnáhan ró: Caca ró nájnūhun cúní maá Espíritu, te yūcuán na te ma sáha ga rō modo jeē cuní maá ró.

17 Chi táca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndindúú yáha chi cájesi nuū jnáhan, te jeē yūcuan tu cúu sáha ró jniñu váha jeē cuní rō sáha ró.

18 Te núu máá Espíritu steén nuū rō, núu súcuan te tuá cáyihí ró chíji ley jenahán.

19 Te íyó ndijin táca jniñu cásáha ñayuu cájica jín modo neé máá, te yáha cúu: Cásiquí ndéē jnáhan i, cásáha i jniñu jnéhén, cásáha neé ndasí i.

20 Cáchiñúhún i ídolo, cásáha tási i, cájito uhū jnáhan i, cájejnáhan i, cáccucuíñi ni i. Te yachī cáquití ni i, te cándihvī ni i jeē cúu máá-ni i, te cátejnéhan i cásásin i máá i.

21 Te cáccucuésun ni i, cájehni i ndīyi, cánajini i, cásáha i vico neé, jín táca gá jeē súcuan. Te cáhán nihin ri jín ró, nájnūhun je ni cahān rī jín ró saá, jeē ñáyuu casáha súcuan, ma nihín tahu i quivicoo i ñuu nuū ndácu Yaā Dios jniñu.

22 Te ñayuu jeē nduú i jín Espíritu, táca jniñu yáha sáha ya jín i: Jeē cundáhú ni

jnáhan, jeē cúsiñi ni, jeē iyó ndeyí sñi ni, jeē iyó paciencia, jeē maní ni, jeē váha ni, jeē squícu váha,

23 jeē tu sáha jeē cujéhnu, jín jéē jési modo jeē cuní maá. Te tú na ley cacān cuēchi siquī rō núu sáha ró táca jniñu yáha.

24 Te ñayuu cáyihí ndaha Cristo, nájnūhun je ni cajehni i modo neé máá i jicā cruz, nde jín táca jéē ndíyo neé ni i te cútíndí i.

25 Te jeē súcuan ni jēhe máá Espíritu in vida jeé núu yó, te suni na cáca yó jín modo steén Espíritu.

26 Te ma sandúxí yó jéē squítí ni yó jnáhan yó, te ni ma cucuésun ni yó siquī jnáhan yó.

Jnūhun jeē chindéé ñáhán yó jnáhan yó

6

1 Hermano, núu in jnáhan ró ni sáha cuēchi, te róhó jéē cájica jín Espíritu, na náchuhun ichí ró i. Te jín jnúhun vītá cahān rō jín i, te suni condito ró máá ró jeē ma cacān ini rō sáha ró táca cuēchi.

2 Te chindéé ñáhán ró jnáhan ró núu na vé cúu jeē ndóho i, chi súcuan cúu jeē squícu ró ley Cristo.

3 Chi núu in ñayuu jéni ni i jeē ñáyuu teyí cúu i, vésú nasūu súcuan cúu, te stáhú i máá i núu súcuan.

4 Te táca in in ró na coto ndee rō ndese cáa jniñu sáha ró. Te núu váha sáha ró, yūcuán na te cuu cusñi ni rō jín jéē sáha máá ró, te tu níni

jeē scáni jnáhan ró máá ró jíin jnáhan ró.

⁵ Chi tācá ñin ñin yó cánuú squícu yó jíin jniñu ní jéhe ya nuū máá yó.

⁶ Te róhó jeē cascuáha jnūhun vāha ya, na chindéé ñáhán ró tēe cástéén nuū ró jíin táca jeē váha cánevāha ró.

⁷ Ma stívi ró cani ni rō jeē cuu sáha ró cuéchi. Chi ma cúu sácatā rō nuū Yaā Dios cani ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i.

⁸ Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní máá i ún. Te ñayuu jeē sáha jeē cuní máá Espíritu, chi nihīn i jeē cótecu i ní cáni andiví sáha Espíritu.

⁹ Te ma cuíta yó jeē sáha yó jniñu váha núu súcuan, chi jeē quée maá quívi te nanihīn yō, te núu ma cuíta yó.

¹⁰ Núu súcuan te tāca jínu jeē cúu sáha yó, te na sáha vāha yó jíin táca ñayuu, te hermano yō jeē cácan díje cúu jeē cánuú gá.

Saludo jíin jnúhun cástūhun Pablo jeē sándihí

¹¹ Condēhe ró jeē náhnu le-tra tée ri cuajeē nuū rō jijnáhan ró, chi ndaha máá rí tée ri yāhá.

¹² Te tēe jeē casáfuerza de róhó cuu ró circuncidar, casáha de síquī jeē cácuni de cuajnúhún ñayuu de. Te casáha de návāha ma cóto xeēn ñayuu de jeē cánacani de jnūhun jeē ni jíhī Cristo jehē yō.

¹³ Te ni máá de jeē casáha de circuncidar, suni tu squícu vāha de ndihí ga ley jenahán. Te cácuni de jeē cuu ró circuncidar, návāha cuu sátéyí de máá de núu quihin ró jnúnī circuncidar sáha de.

¹⁴ Te ruhū tu cúní rī satéyí rí máá rí síquī ní ñin jeē yúcuan, chi máá ñin-ni síquī jeē ni jíhī Jitoho yō Jesucristo jíca cruz. Chi síquī yúcuan cúu nájnūhun ni jíhī rī, chi ni siaá rī tāca jéé iyó ini ñayīvi, te suni nájnūhun ñin ndīyí cúu ri nuū ñayīvi.

¹⁵ Chi núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō.

¹⁶ Te ñūhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo sī ni rō, te cundáhú ni yā rohó. Te suni ñūhun ni rī jeē súcuan sáha ya jíin táca gá i jeē cúu ndije i ñayuu cácan díje Yaā Dios.

¹⁷ Te vijna jíin ní gá cuahān yō, cúní rī jeē ma stáhān gā ni ñin ñayuu ruhū. Chi yiqui cúñu rī ndíso seña jeē ni tújī rī ni ndoho ri jeē cúu ri mozo máá Jitoho yō Jesús.

¹⁸ Hermano, ñūhun ni rī jeē na sáha ga Jitoho yō Jesucristo jeē váha róhó jíin áhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te tée ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácañdije ró Cristo Jesús.

² Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sīi ni rō.

Jeē sáha Cristo jeē quéndōo váha ánuá yō

³ Na cáhán yō jeē yóhoyo cújéhnú Yaā Dios, Yaā cúu Tátá Jítóho yō Jesucristo. Chi ni jēhe ya tāca jēē váha íyó andiví jēē quéndōo váha ánuá yō, chi yíhi yó ndaha Cristo.

⁴ Chi nde ná tu jecōo ñayiví te ni nacāji ya yohó jēē quíví yó ndaha Cristo, návaha coo ndoo ánuá yō te caca ndaā yō nuū yā.

⁵ Je ni cundáhú ni yā yohó nde saá, te ni tana ya yohó jēē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya.

⁶ Te jeē yúcuan níní na cáhán yō jeē yóhoyo cújéhnú ya, chi yóhoyo váha ni sáha ya yohó jíin táca jēē váha ni yā, siquī jeē yíhi yó ndaha Cristo, Sēhe ya jeē maní yā jíin.

⁷ Te siquī jeē yóhoyo váha ni yā jíin yó, te Sēhe ya un ní jnama ya yohó jēē ni jíhi yā jehē yō, te ni ine cáhnu ni yā nuū cuéchi yó.

⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchi yó jíin jnúhun ya.

⁹ Te ni sáha ya jeē cuni yō ñin jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya.

¹⁰ Te yāha cúu jnúhun ún: Nde na quée tiempo te sáha ya jeē ndihi jeē yúcu andiví jíin jēē yúcu ñayiví, inuú-ni nduu, quíhi ndaha Cristo.

¹¹ Te siquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tāca-ni jeē jé ni cundaā ni yā jeē nujnahan ni yā sáha ya.

¹² Súcuan ni sáha ya návaha máá rí jeē xihna gā ni cacandije ri Cristo, caca ndaā rī te súcuan sájéhnú ri yā jeē yóhoyo luu cújéhnú ya.

¹³ Te suni máá ró jijnáhan ró, ni cajini ró jnúhun ndaā jnúhun váha jeē jnáma ya rohó, te ni cacandije ró Cristo. Te ni canihīn rō Espíritu Santo jeē ni jéjnúhun ya jeē cuáha ya. Te ndéé Espíritu yā ún ini anuá yō, te cúu ya nájnúhun sello jeē steén jeē cúu yó séhe Yaā Dios.

¹⁴ Te sáha ya jeē jiní ndije yó jēē cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu

yā. Te quivī ún cahān yō jeē cujéhnū ya, chi yōhyo luu cujéhnū ya.

Jeē jicán tahú Pablo jehē ñáyuu cácadíje

15 Te ruhū ni jini jnūhun ri ndese cácadíje ró jēē ni sáha Jitoho yō Jesús jehē rō, jíin ndese cácadáhú ni rō ndíhi ñayuu cáyíhi ndaha Yaā Dios.

16 Te jeē yúcuān tu jécuiñī rī jeē nácuatáhú rí jehē rō, te jeē jicán tahú rī te tu náā ni rī cacān tahú rī jehē rō.

17 Chi jicán tahú rī jeē na sáha Yaā Dios jeē jécūhun vāha ni rō te ndundíhí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jitoho yō Jesucristo, te cúu ya Tatá yō jeē lúu ndasí cújéhnū.

18 Te jicán tahú rī jeē na sándijin gā yā nuū jeē níjnūnī rō, návāha jecūhun ni rō ndese cáa ndíhi jeē cáñuhun ni rō nihīn rō síquī jeē ní cana ya rohó. Te jecūhun ni rō ndese cúcá cacuu ró jíin táca jnúhun jéhnū luu ndíso jnūhun ya jeē cúu ñayuu máá yá.

19 Te jicán tahú rī jeē na jécūhun ni rō ndese yōhyo jéhnū poder yā jeē sájniñū ya ini anuá yohó jēē cúu yó ñáyuu cácadíje. Chi tu ndíhi cuiti poder yā.

20 Te suu poder un cúu jeē ni stéén yā ná ni sáha ya iin jniñū jéhnū ga jeē ní nastécu yā Cristo mēhñū ndíyī te ni scúcōo ya lado váha ya nde andiví.

21 Te ni jeni ya Cristo síquī táca jēē cujéhnū, jíin jēē ndíso

jniñū, jíin jēē jnī poder, jíin jēē ndácu jniñū, jíin síquī táca jeē cácahān ñayuu jeē cujéhnū, cúu tiempo yáha, cúu tiempo quiji.

22 Te ni jēhe ya jeē cujéhnū Cristo síquī ndivii. Te ni sáha ya jeē cúnuú yá cujéhnū ya nuū ñáyuu cácadíje.

23 Te ñayuu cácadíje un cacuu i nájnūhun yiqui cúñū ya, chi iin na cúu i jíin yá te ñúhun chitú yá ini anuá i, chi Yaā jeē ñúhun chitú ní cáhnu-ni cúu ya.

Ni cācu yó síquī jeē ní cundáhú ni yā yohó

2

1 Te ni sáha ya jeē cotecu rō ní cáni jíin Cristo. Chi je ni cacuu ró nájnūhun ndíyī nuū yā, ni sáha cuēchi ró jíin jniñū néé ní casáha ró.

2 Chi ni cajica ró jíin jniñū yúcuān nde saá, ná ni cacondiquīn rō jniñū ñayuu ñayiví, ná ni cajetáhú ró núū jexeén jeē ndácu jniñū nuū táca táchī xeén, te jíca nuū tachí. Te suu cúu jeē scánda ini ñayuu níhni ni nuū Yaā Dios.

3 Te máá rí jijnáhan ri, suni súcuān ni cajica ri, chi ni casáha ri jniñū néé jēē cuní máá rí, jíin táca jēē jicán yiqui cúñū rī, jíin jēē cájeni néé ni rī nde saá. Jeē yúcuān suni ni cacuu ri ñayuu jeē nihīn castigo xeén jeē cuáha ya nuú, chi inuú-ni ni casáha ri nájnūhun casáha máá i.

4 Te Yaā Dios chi yōhyo cuehē ni cundáhú ni yā yohó, te vāha ndasí ni yā jíin yó.

5 Te náa cúu yó nájñuhun ndīyī nuū yā ni sáha cuēchi yó, te ni nastécu yā yohó jéē cótecu yō ní cáni jín Cristo. Chi siquī jeē yóhyo vāha ni yā cúu jeē ní jnama ya yohó.

6 Te ni nastécu yā yohó jéē cótecu inuú yó jín Cristo Jesús, te scúcōo ya yohó jín yá nde andiví.

7 Súcuan ni sáha ya návāha ní gá tiempo jeē quiji, te stéén yā ndese yóhyo manī yā jín yó, jín ndese vāha ni yā jín yó jeē siquī Cristo Jesús.

8 Chi siquī jeē yóhyo manī yā jín ró cúu jeē ní jnama ya rohó, chi ni cacandīje ró jéē sáha ya jehē rō. Te nasūu siquī jeē ní casáha máá ró cúu, chi tahū jeē ni jéhe ya nuū rō cúu.

9 Chi tú na jniñu vāha ní casáha yó jéē jnáma ya yohó, te jeē yúcuan ni ñn yó ma cúu sátéyí yó maá yó.

10 Chi cúu yó ñn jniñu luu jeē ní nasáha máá yá, chi ni nasáha ya yohó jéē cundúú yó jín Cristo Jesús, návāha sáha yó táca jniñu vāha jeē jé ni sátūhva Yaā Dios jeē sáha yó.

Jeē sáha Cristo jeē ndīvi yó nuū jñuhun manī Yaā Dios jín yó

11 Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñayuu hebreo, chi sa suhva ni cacuu ró ñayuu táca nación jeē tu jíní jñuhun ya. Te ñayuu hebreo jeē casáha circuncidar yiquí cúñu, ni cacahān i jeē cácuu ró ñayuu tu sáha circuncidar.

12 Na núcūhun ni rō jeē ndé saá tu ní cáhīn ró jín Cristo, te ni cacuu ró ñayuu ñuu jicá núu nación Israel. Te tu ní cájini rō táca jñuhun contrato jeē ni jéjñuhun Yaā Dios. Te tu ní ñne Yaā Dios jín ró ñayiví yáha, te tú na vé jeē vāha ní cáñuhun ni rō jeē cóo.

13 Te vijna chi ni ndīvicoo ró núu Yaā Dios jeē tu ní cájini rō jñuhun ya nde saá, chi ni quivicoo ró ndaha Cristo siquī jeē ni jhī yā jehē rō.

14 Chi Cristo cúu Yaā sáha jeē ndúmanī jnáhan yó. Chi ni sáha ya jeē ñayuu hebreo jín ñayuu táca gá nación, ni nduu yó ñn na nuū yā. Chi ni sáha ya jeē tuá jito uhū jnáhan yó, te suu cúu nájñuhun jeē ní jenu ya ñn jeē ndihyú sava mēñu yó jeē sásñn yóhó.

15 Chi ni socō yā maá yá ni jhī yā, te súcuan ni ndahva yā ley jenahán jín jñuhun ndácu jniñu jín jéē tajnúní ndiso máá. Chi ley un ní sásñn ñayuu hebreo jín táca nación jeē tu ní jíní i ley un. Te ni nasquijnáhan ya ndihí yó jéē ní nduu yó ñn na nación jeē, yíhí yó ndaha ya. Te súcuan ni sáha ya jeē ní ndumanī jnáhan yó.

16 Te jín jéē ni jhī yā jicá cruz, te ni snáa yā jñuhun cájito uhū jnáhan ñayuu hebreo jín táca gá nación. Te ni sáha ya jeē ndīvicoo yó núu jñuhun manī Yaā Dios jín yó, te ni nduu yó ñn na ñayuu maá yá.

17 Chi ni quiji Cristo ni nacani ya jñuhun vāha nuū táca ñayuu jeē na ndīvi i nuū

jnūhun manī yā jīn i, cúu róhó ñáyuu tu ní cájini jnūhun ya, te suni ñayuu jnáhan ri hebreo jeē cájini jnūhun ya.

¹⁸ Te vijna te siquī jeē ni jīhī Cristo, te ndihi yó, cúu ñayuu hebreo chí ñáyuu tāca gá nación, cuu quivicoo yó núu Tatá yō Yaā Dios, te in-ni Espíritu yā sāha.

¹⁹ Núu súcuan te tuá cúu ró nájñūhun ñayuu ñuu jicá ni ñayuu tatú, chí in na ni nduu ró jīn ñáyuu ñuu maá yá. Te jnáhan ñayuu vehe Yaā Dios cácuu ró.

²⁰ Te cácuu ró nájñūhun in in parte in vehe cáhnu jeē cúvāha siquī cimientu, te cimientu un cúu jnūhun Cristo jeē ní canacani tāca apóstol jīn té ni canacani jnūhun ya jenahán. Te maá Jesucristo cúu nájñūhun yuū cánuú gá jeē yítuu vehe.

²¹ Te ní vehe cúvāha vāha siquī maá yá, cúu súcun cuáhān, cúu in templo i jeē ndeé maá Jítoho yō.

²² Te suu cúu maá ró jijnáhan ró, chí ndúú ró jīn Cristo, te inuú-ni sāma ya rohó jīn tāca ñáyuu cácañdije, cácuu ró nájñūhun in in yuū templo. Te suu cúu jeē ndeé Espíritu Yaā Dios ini ró nájñūhun ini in templo.

Jeē ndiso jniñu Pablo nácani de jnūhun nuū ñáyuu tu jíní jnūhun Yaā Dios

3

¹ Te jeē yúcuān ruhū Pablo, jicán tahú rī nuū yā. Te íne rī vecāa siquī jeē ní nacani rī jnūhun Cristo Jesús nuū rohó

ñáyuu tāca nación jeē tu ní jíní jnūhun ya nuú.

² Te jíní rī jeē ní cajini ró jnūhun ndese yōhoyo vāha ni sāha Yaā Dios jīn rí, chí ni jēhe ya jniñu nuū rī jeē nácani rī jnūhun vāha ya nuū rō.

³ Te jnūhun ya jeē ní yisāhí, ni nastúu ya nuū rī, nájñūhun je ni tee rī jecu siquī un núu rō.

⁴ Te núu na cáhu ró te cuu jecūhun ni rō jeē ní jini vāha rī jnūhun Cristo jeē ní yisāhí un.

⁵ Te tu ní stéén yā jnūhun sāhí un núu ní in ñayuu tāca cuíyā ní quiiji ichi yátá. Te vijna cúu jeē stéén ndijin yā jīn Espíritu yā nuū tāca apóstol jeē ní jeni ndoo ya, jīn núu té canacani jnūhun ya.

⁶ Te súcuan cáhān jnūhun ní yisāhí un: Ñayuu tāca gá nación, in cáhnu-ni nihīn i tahū i jīn ñáyuu hebreo, chí ni cacandije i jnūhun jeē jnáma ya i. Te inuú-ni ni nduu ndihi i, te in cáhnu-ni quéndōo ndetū anuá i sāha Cristo, nájñūhun ni jejnūhun Yaā Dios.

⁷ Te jeē siquí jnūhun yāha cúu jeē ní jeni ya ruhū jeē nácani rī jnūhun nuū rō. Chí ni cutahū rī jniñu luu yāha jeē ni jēhe ya nuū rī. Te jīn poder yā ni sāha ya un jīn rí.

⁸ Te ruhū chí cúu rī té núu ga nuū tāca ñáyuu núu ga jeē yíhi ndaha ya. Te vésú súcuan te nuū maá rí ni jēhe ya jniñu luu yāha jé nácani rī jnūhun vāha ya nuū ñáyuu tāca nación jeē tu jíní, ndese yōhoyo cúca yó ndihi jeē ndiso jnūhun Cristo, jeē ma cánda

cuiti yō jecūhun ni yō.

⁹ Chi ni jeni ya ruhū jeē steén cají rí jeē suni máá i jnama ya i. Te yūcuan cúu jnūhun Yaā Dios jeē ni yísāhi ndé jenahán ndasí, chi máá yá ni sáha ndihī-ni.

¹⁰ Te súcuan ni sáha ya jín ñáyuu, návāha vijna te tāca jéē cácujuhnu jín jéē ndíso jníñu nuū sucún, na cūni ndese ndíchí ndasí Yaā Dios. Chi ndíchí ndasí ni sáha ya jín ñáyuu cácañdije.

¹¹ Chi súcuan ni tee ni yā nde ní cáni, te ni sáha ya jeē Jítóho yō Cristo Jesús ni squícu ya ún.

¹² Te siquī jeē ni sáha Cristo, te vijna te jíní ndije yó jéē cúu quívi yó cáhān yō jín Yaā Dios siquī jeē candíje yó Cristo.

¹³ Núu súcuan te cáhān ndahú rí jín ró jeē ma cucuíhyá ni rō siquī jnūndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

Cristo yōhyo cundáhú ni yā yohó

¹⁴ Te jeē yūcuan cúu jeē jécuiñī yití rí nuū maá Yaā cúu Tátá Jítóho yō Jesucristo.

¹⁵ Te máá yá cúu Tátá nuū ndihī ñáyuu yā jeē yúcu andiví jín ñáyiví.

¹⁶ Te jícán tahu rí jeē jín poder yā jeē cujéhnū ndasí yá, na sáha ya jeē íje vāha ni rō jín jnūhun ya, te coo fuerza ini anuá rō, sáha Espíritu yā.

¹⁷ Te jícán rí jeē candíje nīhin ró Cristo, návāha condee yā ini anuá rō, te jni

vāha ró jnūhun jeē cundáhú ni yā rohó, te cuiñi nīhin ró jín.

¹⁸ Te súcuan te cuu jecūhun vāha ni rō jín táca ñáyuu candíje, ndese cáca jnūhun cundáhú ni Cristo yohó. Chi yōhyo jité, cáni, cúnú, súcún jnūhun ún, chi yōhyo cuehē sáha.

¹⁹ Te jícán rí jeē na cūni vāha ró ndese cundáhú ni yā yohó, vésú tu cúu cuiti jecūhun ni yō ndihī ndihī. Te súcuan te cundúú ró jín Yaā Dios jeē cunuú yá ini anuá rō.

²⁰ Núu súcuan te na cáhān yō jeē yōhyo luu cújéhnū ya, chi máá yá cúu Yaā iyó poder jeē sáha ya jeē vāha ndasí gá vésú ndihī jeē jicán yó chí jéē jéni ni yō. Te sáha ya un jín poder yā jeē sájniñu ini anuá yō.

²¹ Te na cáhān yō jeē yōhyo luu cújéhnū ya jeē siquí jeē ni sáha ya jehē ñáyuu cácañdije jín jéē siquí Cristo Jesús. Te súcuan na cóo nde ní cáni cuiti tiempo jeē quíji. Amén.

Inuú-ni cácuu ñáyuu cácañdije sáha Espíritu

4

¹ Te ruhū jeē íne ri vecāa siquí jnūhun maá Jítóho yō, cáhān ndahú rí jín ró jeē na cáca ndaā rō nájñūhun cánuú caca ró jéē cácuu ró ñáyuu ni cana ya.

² Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jín jnāhan ró jéē cundáhú ni rō i.

³ Te na cóndihvī ni rō coyūcu mánī inuú ró, sáha

máa Espíritu nuū véji jnūhun manī ni.

⁴ Chi ñn-ni cácuu ñayuu maá yá, te íyó ñn-ni Espíritu, te inuú cáñūhun ni yō jeē cóo jeē váha siquī jeē ní cana ya yohó.

⁵ Te íyó ñn-ni Jitoho yō, jíin ñn-ni jnūhun cándíje yó, jíin ñn-ni jnūhun jéndute yó.

⁶ Te íyó ñn-ni Yaā Dios jeē cúu Tátá yō jijnáhan yó. Te máa yá cujéhu siquī ndihi yó, te sájniñu ya jíin ndihi yó, te ndéé yá ini ndihi yó.

⁷ Te tācá ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō.

⁸ Jeē yúcuan cáhán tutu i:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin.

Te ni saja ya tahū nuū tāca ñayuu.

⁹ Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yáha.

¹⁰ Te Yaā ní cuun, suni máa yá cúu jeē ní ndaa nde nuū sucún gá andiví, návāha cūhun chitú yá ní cáhnu-ni.

¹¹ Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jnūhun ya, te sava ga scándíje ñayuu jnūhun jeē jnáma ya i, te sava ga coo pastor condito ñayuu cácandíje, te sava ga steén.

¹² Súcuan ni jeni ya ñayuu maá yá jeē cuajniñu i nuū

yā, návāha cuehnu ga ñayuu Cristo jíin jnūhun ya.

¹³ Te súcuan coo nde nduu inuú-ni ndihi yó jíin jnūhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihi jnūhun jeē ñūhun chitú ini Cristo.

¹⁴ Te súcuan te ma cóo ga yō nájñūhun sūchi lúli jēe yachi jeni yāha jeni yūcuán ni i, ni ma quívi nduu yō cháha chúcuan jíin sñn sñn jnūhun jeē cástéén tēe stáhú jēe yóhyo ndito de squívi de yóhó nuū jnūhun stáhú.

¹⁵ Chi sa suhva na cóndiquñ yō jnūhun ndaā jíin jnūhun cúndáhú ni. Te súcuan cuehnu yó jíin táca jniñu cúní Cristo, Yaā cujéhu nuū ñayuu cácuu nájñūhun yiqui cúñu yā, chi ñn na cúu i jíin yá.

¹⁶ Te sáha ya jeē nduu inuú ni tācá i jeē cáhije i cuahān i, chi cácuu i nájñūhun ñn na yiqui cúñu jíin yá. Te jéjniñu vāha tācá ñn ñn i ndese ni nihñ jniñu i, návāha scuéhu jnáhan te ije jijnáhan jíin jnūhun cúndáhú ni.

Jeē ndújeé yó sáha Cristo

¹⁷ Núu súcuan te yāha cúu jnūhun cáhán rī jíin ró, te jeē achí Jitoho yō cúu jeē cahán nihñ ri jíin ró: jeē ma cáca ga rō nájñūhun cájica sava ga ñayuu jeē tu jíní i ndese Yaā cúu Yaā Dios, chi cájica i jíin jnūhun jeē jeni sáa-ni máa i.

¹⁸ Te íyó nee nuū jeē níjnūni i, te tu névāha i Espíritu jeē véji nuū Yaā Dios, chi tu jíní i jnūhun ya, siquī jeē nihni ni i.

19 Te tuá cúcanu i, chi ni quivicoo i jíin jniñu néé ndasí, te ndíhví ni i sáha i tãcá jniñu jnéhén.

20 Te róhó jíjnáhan ró, nasūu súcuan ní cáscuáha ró jnúhun Cristo,

21 te núu ndaā jeē ní cajini ró jnúhun ya jíin jéē ní cacutūhva ró jíin jnúhun ndaā Jesús.

22 Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cujnéhén ánuá rō ni sáha jniñu néé stáhú jéē ní ndiyo ni rō.

23 Te na ndújeé ánuá rō jíin jéē níjnūnī rō.

24 Te na cuáha ró jnúhun ndujeé ró, chi nasáha Yaā Dios rohó nájnūhun cuní maá yá jeē cáca ndaā rō jíin jniñu váha jniñu ndoo.

25 Núu súcuan te ma cahán gā rō jnúhun stáhú, te na cáhán ndaā rō jíin táca jnáhan ró, chi ñn-ni cácuu ndíhi yó.

26 Núu vēji ñn jeē squití ni rohó, te ma quití neé ni rō. Te ma quití ni rō nde quēe niāndii.

27 Ma cuáha ró jnúhun jeē sáha jexeén jeē quíví ró cuéchi.

28 Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu váha, návāha nihīn i jeē cuáha i nuū ñáyuu cúmanī nuū.

29 Ni ñn jnúhun néé ma cahán rō, chi sa suhva na cáhán rō jnúhun váha jeē scuéhnu jnáhan jíin jnúhun

ya, te sáha jeē quéndōo vāha ñayuu jíni sōho.

30 Ma sáha ró cuéchi návāha ma cucuíhyá ni Espíritu Santo Yaā Dios. Chi Espíritu yā cúu nájnūhun sello jeē steén jeē cúu yó séhe Yaā Dios, nde quíji quíví jínu jniñu jeē jnáma ya rohó.

31 Te na siáá rō táca jnúhun cútuco ni, jíin jnúhun xeēn ni, jíin jnúhun quití ni, jíin jnúhun cáhán ndevāha, jíin táca jnúhun néé.

32 Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájnūhun ni ine cáhnu ni Yaā Dios nuū rō siquī Cristo.

Ndese cánuú caca ndaā séhe Yaā Dios

5

1 Núu súcuan te na ndácu ró Yaā Dios, chi cácuu ró séhe ya jeē maní yā jíin.

2 Te níni cundáhú ni rō jnáhan ró, nájnūhun ni cundáhú ni Cristo yohó, te ni socō yā maá yá jehē yō, ni cuu ya nájnūhun ñn londe jeē jeén asīn nuū Yaā Dios jeē ni sócō yā maá yá.

3 Te vijna jeē cácuu ró séhe Yaā Dios, te ni ma sáha ró ni ma ndájnuhun ró síquī jnúhun jíca jnéni, ni tãcá jniñu jnéhén, ni jnúhun ndíyo ni ndajniñu.

4 Te ni ma cahán rō táca jnúhun sáha jeē cúcanu jnáhan, ni jnúhun cánéé íi, ni jnúhun jeē tu ndé jéjniñu cuítí. Chi táca un tu níhín jniñu. Chi sa suhva na nácuatáhú ró nuū Yaā Dios.

5 Chi je cájini rō jeē ní ññayuu cájica jnéni, ni jeē sáha jniñu jnéhen, ni jeē ndiyo ni táca ndajniñu, ma nihín tahu i quívi i ndaha Cristo jín Yaā Dios jeē ndacu ya jniñu nuū i. Chi táca jeē ndiyo ni i cúu nájñuhun ídolo i jeē cáchiñúhún i.

6 Te coto rō jeē ma stahú ni ññ i rōhó jín táca jñuhun cáhán saá ni i, chi siquī táca jñuhun néé yáha cúu jeē quíji castigo xeēn Yaā Dios nuū táca ñayuu nihni ni.

7 Ma quívi nduu rō jín i núu súcuan.

8 Chi táca quívi saá ni coyūcu rō nájñuhun nuū néé, te vijna chi cáyūcu rō jín luz maá Jítoho yō, cúu jeē cájecūhun ni rō siquī yā. Te na cáca rō nájñuhun cájica ñayuu jeē steén luz yā ini anuá i.

9 Chi jniñu sáha luz yā jín yó cúu táca jniñu manī ni, jniñu ndaā, jín jniñu váha.

10 Scuáha rō sáha rō táca jniñu jeē nújnahan ni maá Jítoho yō.

11 Te ma quívi nduu rō jín táca jeē tu nihín jniñu jeē casáha ñayuu cáyūcu nájñuhun nuū néé. Chi sa suhva steén rō nuū i jeē tú váha casáha i.

12 Chi cúcanu yō cahān yō siquī jniñu casáha yuhu maá i.

13 Te luz yā sáha jeē nátūu táca jniñu néé casáha i. Te núu cuatáhú i luz yā te caca i jín luz ún.

14 Jeē yúcuan cáhán tutu:

Róhó jeē cúhuun ni, jeē nájñuhun quíxi, natahū ni,

te quenda rō méhñu ñáyuu jeē cácuu nájñuhun ndīyi.

Te Cristo steén yā luz yā ini anuá rō.

Achí tutu.

15 Núu súcuan te coto váha rō ndese caca yúcun rō. Te ma cáca rō nájñuhun cájica ñayuu canéé, chi caca rō nájñuhun cájica tēe ndíchi.

16 Ma snáa rō tiempo, chi condihvī ni rō jín jniñu ya, chi iyó cuéhē cuēchi quívi yáha.

17 Núu súcuan te ma cóo néé xini rō, chi sa suhva na jécūhun váha ni rō na jniñu nújnahan ni maá Jítoho yō.

18 Te ma nájini rō, chi tivī rō sáha. Chi sa suhva na ndúcú rō jeē cúnuú Espíritu Santo ini anuá rō.

19 Te cahān rō jín jnáhan rō jín salmo jín himno, yaa iñ jeē cahán jñuhun ya. Te ini anuá rō cahān rō jín yá jín táca yaa, chi yúcuan cúu jeē jíta ánuá rō nuū yā chíñúhún rō yā.

20 Te níni nacuatáhú rō siquī táca-ni nuū Tatá yō Yaā Dios te ndacunehen rō síhvī maá Jítoho yō Jesucristo.

Ndese squícu váha ñayuu cácandíje nuū jnáhan i

21 Te cuatáhú rō nuū jnáhan rō siquī jeē cáhīyo yíñúhún rō nuū Cristo.

22 Róhó ñahan cácuu ñasihí, cuatáhú rō nuū yíi rō, nájñuhun jétáhú rō nuū Jítoho yō.

23 Chi yíi cújéhnú nuū ñasihí, nájñuhun cújéhnú Cristo nuū yohó ñáyuu cácandíje, jeē cácuu yó nájñuhun yiqui cúñu yā, chi

ñin na cúu yó jíin yá. Te máa yá jnáma ya yohó.

24 Chi nájnūhun ñayuu cá candíje cájetáhú i nuū Cristo, suni súcuan ñasihí cuatáhú ña ndihi jeē cahán yii ña.

25 Te róhó tée cácuu yii, cundáhú ni rō ñasihí rō, nájnūhun ni cundáhú ni Cristo yohó ñayuu cá candíje, te ni socō yā maá yá jehē yō.

26 Súcuan ni sáha ya jeē cóo ndoo coo ii yō nuū yā, te ni nacate ya anuá yō jíin jnúhun ya jíin jeē ní jendute yō.

27 Te yóhó ñayuu cá candíje chi cuiñi yó núu yā, te luu cujéhnú yó. Te ma cóndee cuēchi ánuá yō, ni jeē tú luu, ni ñin jeē súcuan, chi sa suhva coo ndoo coo ii yō nuū yā, te tú na vé cumaní gā.

28 Te nájnūhun Cristo ni cundáhú ni yā ñayuu cá candíje, suni súcuan cánuú jeē cundáhú ni yii ñasihí de, nájnūhun cundáhú ni de máa de. Chi téē cundáhú ni de ñasihí de, máa de cundáhú ni de.

29 Chi ni ñin téē tu jíto uhū de máa de, chi sa suhva yéji de te ndíto yúcún de máa de. Te suni súcuan sáha Cristo jíin yóhó ñayuu cá candíje nuū yā.

30 Chi cácuu yó nájnūhun yiqui cúñu yā, te ñin ñin yó cácuu nájnūhun ñin ñin parte yiqui cúñu yā.

31 Te suu cúu nájnūhun téē jeē stóo de tátá de náná de, te quijnáhan de jíin ñasihí de, te ñin na cúu ndíndúú de.

32 Yōhyo jéhnú jnúhun sáhi yáha, te cáhán rī jeē

ñáyuu cá candíje suni súcuan quijnáhan i jíin Cristo.

33 Te suni súcuan ná ñin ná ñin rō cundáhú ni rō ñasihí rō, nájnūhun cundáhú ni rō maá rō. Te ñasihí na cúu yíñúhún ña jíin yii ña.

6

1 Te róhó séhe jíjnáhan rō, cuandíje rō núu tatá rō nuū naná rō, chi yūcuan cúu jeē váha sáha rō jeē candíje rō Jítóho yō.

2 Chi yáha cúu ñin jnáhan jeē uxí jnúhun ndácu jniñu jeē ni jéhe ya, te xíhna gā jnúhun yáha ndíso tahū: Coó yíñúhún rō nuū tatá rō nuū naná rō,

3 náváha quendōo ndetū rō, te náhán cotecu rō ini ñayivi yáha. Achí.

4 Te róhó tátá jíjnáhan rō, ma squití ni rō séhe rō, chi sa suhva scuéhnu rō i jíin jnúhun cuandíje i, te stéén rō nuū i jeē candíje i máa Jítóho yō.

5 Te róhó mozo jíjnáhan rō, cuandíje rō núu patrón rō ñayivi yáha, te coo yíñúhún rō te conso iyo rō núu de. Te na sájniñu ndaā sájniñu ndíje rō, caní ni rō jeē nuū Cristo cájejniñu rō.

6 Ma sájniñu ndúxí rō jeē maá jeē coto de te cuajnúhún de róhó. Chi sa suhva sáha rō cuenta jeē mozo Cristo cácuu rō. Te sáha rō jeē nújnahan ni Yāā Dios nde jíin ini jíin ánuá rō.

7 Te na cúsiñi ni rō sájniñu rō, te na cáni ni rō jeē nuū maá Jítóho yō cájejniñu rō, nasūu núu ñayuu.

⁸ Chi je cájini rō jeē jniñu váha sáha ñn ñn ró, te nihñ rō yáhu jniñu yúcuan núu maá Jítoho yō, vēsú cūu ró mozo chí téē sájniñu máá.

⁹ Te rōhó patrón jijnáhan ró, suni súcuan sáha ró jíin mozo rō, te ma cahán xeēn rō jíin i. Chi na cócuhun ni rō jeē suni máá ró jíin máá i yñi ró ndaha Jítoho yō, Yaā ndeé andiví. Te tu sáha ya cuenta ndese cūu ñn ñn ñayuu, chi inuú sáha ya jíin i.

Na cúcutú yó jíin táca fuerza Yaā Dios

¹⁰ Te iyó inga jñuhun, hermano jijnáhan ró. Nducú ró jeē na cóo fuerza ini rō jíin fuerza maá Jítoho yō jeē nduú yá jíin ró, chí iyó téyí poder yā.

¹¹ Na cúcutú ró jíin táca fuerza Yaā Dios, návaha cuu cuiñi ñihin ró jéē ma stahú jexeén rōhó.

¹² Chi nájnūhun jeē cájejnáhan yó jíin táca jéē neé. Te nasūu ñayuu cūu jeē cájejnáhan yó jíin, chí sa suhva jíin táca táchī cájica nuū sucún. Te yūcuan cūu jeē cácujuhnu, jíin jéē cándiso jniñu, jíin jéē cándacu jniñu nuū ñayuu ñayiví yáha jeē nájnūhun cájica i nuū néé.

¹³ Núu súcuan te na cúcutú ró jíin ndihí fuerza Yaā Dios, návaha cuu cuiñi ñihin ró quiví jito ndee jexeén rōhó. Te súcuan coo tūhva ró jíin táca ndihí jeē cuiñi ñihin ró jíin.

¹⁴ Núu súcuan te cuiñi ñihin ró jíin jñuhun ndaā jeē cūu nájnūhun jeē yñi ñihin sanchí chīji ró. Te sácútu ró maá ró jíin jñuhun caca ndaā

rō, te suu cūu nájnūhun jeē cúcutú soldado jíin sahma cáa jeē ndihyú de.

¹⁵ Te níni cotūhva ró nacani ró jñuhun ndeyí jñuhun sñi ni jeē véji nuū Yaā Dios. Te suu cūu nájnūhun jeē chíhi soldado ndijēn jehē de.

¹⁶ Te jeē cánuú gá cūu jeē candíje ró jeē iyó yá jíin ró. Te yūcuan cūu nájnūhun jeē tūhva ró máá ró yatā ñn escudo. Chi jíin jñuhun cándíje ró un te cuu ndahva rō ndihí jeē tají máá jéxeén, jeē cūu nájnūhun nduva jeē cayú yáñuhūn punta.

¹⁷ Te cuiñi ró jíin jñuhun ni jnama ya rohó, jeē cūu nájnūhun ñn lélú cáa. Te cuajniñu ró jñuhun jeē yosó núu tútu Yaā Dios jeē ni jéhe Espíritu Santo nuū rō. Chi yūcuan cūu nájnūhun jéjniñu soldado espada de.

¹⁸ Te níni cácan tahú rō nuū Yaā Dios siquī ndihí-ni, te cahán ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñayuu maá yá.

¹⁹ Te suni cahán rō jehē rī, návaha nihñ rī jñuhun cahán rī, te coo téyí ni rī nacani cáji rí jñuhun jeē jnáma ya yohó, suu jñuhun jeē ní yisāhí un.

²⁰ Chi ni tají yá ruhū jeē jíca ri nácani ri jñuhun ya ún, te jeē siquí un cūu jeē íne ri vecāa. Te na cácan tahú rō jeē coo téyí ni rī cahán rī jñuhun ya, nájnūhun cánuú cahán rī.

Saludo jeē sándihí

²¹ Tíquico cúu ìn hermano jeē maní yō jíin, te cúu de tēe squícu vāha chíndéé ñájnáhan jíin rí nuū jníñu máá Jítóho yō. Te máá de castūhún ndihí ndese cuahān jniñu ri te ndese íyó rí.

²² Jeē yúcuan ní tají rí de cuajeē de nuū rō, návāha cachi de ndese cáhīyo ri, te coo ndeyí ni rō jijnáhan ró sáha de.

²³ Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo sī ni tāca róhó jéē cácuu hermano, te coo maní gā rō jíin yá, te candíje vāha ró.

²⁴ Te ñúhun ni rī jeē na sáha ga yā jeē vāha róhó jijnáhan ró jéē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

¹ Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tée cájejniñu mēhñu ró.

² Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō.

Jeē jicán tahú Pablo jehē ñáyuu cácañdije

³ Tāca jínu jeē núcūhun ni rī rohó jíjnáhan ró, te nácuatáhú rí nuū Yaā Dios.

⁴ Te náa jicán tahú rī, te níni cúsi ni rī jicán tahú rī jehē rō.

⁵ Chi ni chindéé ñájnañhan ró jíin rí jeē scáca yó jnúhun váha ya, nde quivī ní cacandije ró te nde vijna.

⁶ Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quivī ndíji Jesucristo, te sínu ndihí ya.

⁷ Te íyó váha jeē súcuan jéni ni rī siquī tāca róhó, chi yōhyo manī rī jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tée cújéñu, cahān rī jehē jnúhun

jeē jnáma ya yohó jéē jnúhun ndaā cúu.

⁸ Chi Yaā Dios jiní yā ndese yōhyo manī rī jíin ró jíjnáhan ró, nájñuhun yōhyo manī Jesucristo jíin yó.

⁹ Te jicán tahú rī jeē na cága jeē cundáhú ni rō jnáhan ró, jíin jéē na jécūhun ga ni rō te cundichí ró jíin táca jnúhun ya.

¹⁰ Te súcuan te cuu nacāji ró táca jéē váha condiquīn rō, te caca ndaā rō, te ma cóo ni ñin cuēchi siquī rō quivī ndíji Cristo.

¹¹ Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñuhún ñáyuu jíin Yaā Dios te cahān i jeē yóhyo luu cújéñu ya.

Jnúhun jeē técu nduú yó jíin Cristo

¹² Hermano, cúni rī jeē na cúcáñu ni rō jíjnáhan ró ndese ni sáha jnúndóho ni ndoho ri. Chi ni sáha jeē ni jítē núu ga jnúhun jeē jnáma ya yohó.

¹³ Chi tāca soldado cáyūcú ini palacio, jíin táca gá ñáyuu, cájini i jeē íne ri vecāa jeē siquī Cristo.

¹⁴ Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tāca hermano cácañdije nuū Jítóho yō. Te cáhīyo téyí gá ni de nácani de jnúhun ya, te tu ndé ndínuu ni de.

¹⁵ Te ndaā chi sava tée cánacani de jnúhun Cristo siquī jeē cuesún ni de jíin jéē nduxí de. Te sava ga de chí sa

suhva cānacani de jnūhun ya siquī jeē váha ni de.

16 Sava de cānacani jnūhun Cristo siquī jeē nducú de jeē váha máa-ni de, te tú ndije de, chí cācuni de jeē nihīn gā rī jnūndóho jeē íne ri vecāa.

17 Te sava ga de chí cānacani de jnūhun siquī jeē cundáhú ni de ruhū, chí cājini de jeē íne ri vecāa siquī jeē cahán rī jehē jnúhun jeē jnáma ya yohó.

18 Tú na vé sáha núu súcuan, chí tǎcá-ni modo cascuíté núu de jnūhun Cristo, vēsú núu ndije de chí tuú. Te yāha cúu jeē cúsih ni rī sáha.

Te suni cusih gā ni rī,

19 chí jíní rī jeē tǎca jéē yáha sáha jeē váha ga coo jíin rí, chí cājicān tahu rō jehē rī, te Espírítu Jesucristo chindéé ñáhán yá ruhū.

20 Chí ñúhun ni rī te cúu ndasí ni rī jeē ma sáha ri ni ñn jeē sáha jeē cucanu ri nuū yā. Chí sa suhva coo téyí ni rī cahán rī jnūhun ya, návāha ndujéhnú ga Cristo sáha máa rí vijna, nájñūhun je ni sáha ri ní véji ri, te vēsú na cótecu rī chí vēsú na cúu rī.

21 Chí jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí.

22 Te núu cotecu gā rī, te cuu scáca ga rī jniñu máa Jítoho yō. Núu súcuan te tu cúcáhnú ni rī ndé ñn cúu jeē váha ga, núu jeē cótecu rī chí jéé cúu rī.

23 Chí mēhñú ndindúú jnúhun yáha íne ñihin rī. Chí ñn cúu jeē cuní rī quihīn rī condee rī jíin Cristo, chí yúcuan cúu jeē vihyá gā váha

coo jíin rí.

24 Te suni cánuú gá jeē cótecu gā rī jeē siquí rohó jíjnáhan ró.

25 Núu súcuan te íyó ndáa ni rī jeē quéndōo ri condee gā rī jíin ró, návāha stéén gā rī nuū rō ndese caca váha ga rō jíin yá, te cusih gā ni rō jíin jnúhun cācandije ró.

26 Núu súcuan te condee tucu ri jíin ró, te cusih teyí ni rō jeē siquí ruhū, sáha máa Cristo Jesús.

27 Te máa ñn-ni jeē condihvī ni rō caca ndaā rō, nájñūhun cánuú caca ró siquī jeē cācandije ró jnúhun Cristo. Yūcuán na te vēsú na jínú rī coto jnáhan yó, chí condee jíicá rí, te nihīn rī jnūhun ro jéé cāhīn ñihin ró jíin jnúhun ya, te cāhīyo ñnuú ni rō, te ñnuú-ni cānducú ndéyí ró siquí jnúhun jeē cācandije yó jéé jnáma ya yohó.

28 Te ma yūhú cuiti rō sáha jeē cājito uhū rohó. Chí jeē jito uhū i róhó, yúcuan stéén jeē jnahnú ndetū i, te suni stéén jeē cācu ánuá maá ró jíjnáhan ró sáha Yāa Dios.

29 Chí ni jēhe Cristo uū jeē váha nuū rō: nasūu máa ñn-ni jeē candije ró yá, chí suni jeē na ndóho ró jéé siquí yā.

30 Chí máa rí jíin róhó jíjnáhan ró, nájñūhun jeē cājejnáhan yó jíin tǎca jéé neé. Chí ni cajito ró jéé súcuan ni sáha máa rí, te cānihīn rō jnūhun jeē sáha ga rī nde vijna.

Jeē ni sáha suchí yá maá yá te ni ndujéhnú ya

2

¹ Núu súcuan te sáha Cristo jeē cáhīyo ndeyí ni rō, jíin jeē cúsihī ni rō siquī jeē váha ni yā jíin ró. Te ndéé Espíritu yā jíin ró, te manī rō jíin jnáhan ró, te cájito ndáhú ró i.

² Núu súcuan te na cócu ga rō jíin táca jnúhun yáha, návāha cusihī teyí ni rī. Te inuú-ni na cóo ni rō, te coyūcu mánī rō, te inuú na cóo ánuá rō, te inuú canī ni rō.

³ Te ni ĩn jniñu ma sáha ró jeē nducú ró jeē váha máa-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró.

⁴ Te ma cóndihvī ni rō maá-ni jniñu jeē quéndō vāha máa-ni ró, chi suni na cóndihvī ni rō jniñu jeē quéndō vāha jnáhan ró.

⁵ Te na cáni ni rō jijnáhan ró nájnūhun ni jeni ni Cristo Jesús.

⁶ Chi máa yá kujéhu inuú yá jíin Yaā Dios, te vēsú súcuan te tu ní jéni ni yā jeē kujéhu inuú yá jíin Yaā Dios.

⁷ Chi ni siaá yā jeē kujéhu ya, te ni nduu ya nájnūhun índāa mozo, te ni cacu ya ni nduu ya tēe.

⁸ Te ná ni nduu inuú yá jíin tée, te ni sáha suchí yá maá yá. Te ni jendije ya nde jíin jnúhun jeē cúu yā, te nde jíin jnúhun canu jeē cúu yā jíicā cruz.

⁹ Jeē yúcuan ní sáha Yaā Dios jeē yóhoyo ni ndujéhu luu ya, te síhvī yá kujéhu ndasí gá nuū táca gá síhvī.

¹⁰ Te táca jeē cáhīin andiví jíin ñáyīvi jíin chíji ñáyīvi, núu

na cūni i síhvī Jesús te jecuiñī yití i.

¹¹ Te cahān ndaā ndivii i jeē Jesucristo cúu máá Jítóho. Te súcuan stéén i jeē yóhoyo cújéhu máá Tátá yā Yaā Dios.

Ñayuu cá candije cúu i nájnūhun quimi jeē ndíndé

¹² Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jíicá rí jíin ró. Te condihvī ni rō jeē caca ndaā rō jíin jnúhun ní jnama ya rohó, te caca yíñuhún ró conso iyo ró núu yā.

¹³ Chi Yaā Dios jícu ya jíin ró jeē cúu ni rō sáha ró jniñu váha, te chíndéé ñáhán yá rohó jeē squícu ró jniñu nújnahan ni yā.

¹⁴ Ndihi jeē sáha ró, ma cahán sōo ró, ni ma tejnáhan ró,

¹⁵ návāha cuu ró séhe Yaā Dios jeē tú na cuēchi coo siquī rō te coo ndaā rō. Te caca ndoo ró méhñu ñáyuu níhni ni jeē casáha néé. Chi méhñu ñáyuu un stéén rō jniñu váha ró, te súcuan cácuu ró nájnūhun quimi jeē ndíndē núu néé ñáyīvi.

¹⁶ Te stéén rō jnúhun ya nuū i jeē cótecu i ní cáni sáha. Te súcuan te cusihī teyí ni rī quiví ndíji Cristo, chi cuni rī jeē tu ní jíca cáhá rí, ni tu ní sájniñu cáhá rí.

¹⁷ Te vēsú na cúu rī jeē socō rī maá rí nuū yā jeē siquí rohó, te yūcuan cúu jeē nducú rí scandije ga rī rohó, návāha

socō rō maá ró sáha ró jniñu váha jeē cá candíje ró yá. Jeē yúcuan cúsiñ ni rī, te cúní rī jeē suni cusñ ni rō jín rí jijnáhan ró.

¹⁸ Núu súcuan te na cúsiñ ni maá ró jín rí, te inuú na cúsiñ ni yō jijnáhan yó.

Jñuhun Timoteo jín Epafrodito

¹⁹ Te ñuhun ni rī jeē cuáha máa Jítoho yō Jesús jñuhun jeē tají yáchī rī Timoteo jeē de nuū rō, návāha ndusiñ ni rī núu na níhín rī jñuhun ndese cáhīyo ró.

²⁰ Chi tuá na inga tēe íyo yáha jēe inuú jéni ni jín rí, nájnūhun máa de jeē ndihví ndije ni de jehē rō.

²¹ Chi tācá de cánducú de jeē cúu máa de, te nasūu jēe cuní Cristo Jesús.

²² Te je cájini rō jeē tée vāha cúu Timoteo. Chi nájnūhun sēhe jín tátá, súcuan ni jejñiñu de jeē nácani de jñuhun vāha ya jín rí.

²³ Núu súcuan te ñuhun ni rī tají rí de jeē de nuū rō, te núu je ni cucáhnū ni rī ndese coo jín rí.

²⁴ Te jéni ndije ni rī jeē cuáha Jítoho yō jñuhun jeē suni máa rí jinū yachī rī nuū rō jijnáhan ró.

²⁵ Te suni jéni ni rī jeē cánuú tají rí hermano yō Epafrodito jeē de, chi tēe sájniñu jín rí siquí jñuhun ya cúu de te chindéé ñajnáhan de jín rí. Chi máa ró ni catají ró de jeē cuajñiñu de nuū rī tāca jéé cúmanī nuū rī.

²⁶ Chi yōhyō cúu ni de ndacoto tucu de nuū rō jijnáhan

ró. Te ni cucuíhyá ndasí ni de, chi ni canihīn rō jñuhun jeē ní cocuhū de.

²⁷ Chi jendaá ni cocuhū de, te je yajni cuu de núu. Te Yaā Dios ni cundáhú ni yā de, te nasūu máñuhún-ni de, chi suni ruhū, návāha tú caa ga cucuíhyá ni rī jehē de núu.

²⁸ Jeē yúcuan cúu jeē ndihví gā ni rī tají rí de nuū rō, návāha ndusiñ ni rō jeē ndácoto tucu ró núu de. Te suni ruhū ma cucuíhyá ndasí gá ni rī.

²⁹ Núu súcuan te na cúsiñ ni rō jeē nájinū de nuū rō, chi cúu de hermano yō jeē candíje de máa Jítoho yō. Te coo yñuhún ró jín táca tēe índāa nájnūhun cáa de.

³⁰ Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chindéé ñáhán de ruhū jín jniñu jeē tu ní íyo modo sáha máa ró jijnáhan ró.

Jñuhun jeē cáca ndaā vāha yó

3

¹ Te vijna, hermano jijnáhan ró, na cúsiñ ni rō jín máa Jítoho yō. Ruhū chi tu jnánini ni rī jeē tée tucu rí jñuhun yáha núu rō, chi cuajñiñu jeē quéndōo vāha ga rō.

² Condito ró máa ró nuū tée casáha jniñu néé, jeē cándāa ná cándāa ina. Chi cánducú de stújí de róho jéé casáha de circuncidar, te tu casáha de jniñu ndaā.

³ Te máa yó cácuu ñayuu ni cuu circuncidar ndije, chi

cáchiñúhún yó nuū Yaā Dios nde jiín ini jiín ánuá yō, te cácusī ni yō jeē yihí yó ndaha Cristo Jesús, te tu ténuū yō jeē quéndō ndaā yō jiín jniñu jeē sáha máá-ni yó.

⁴ Núu jeē súcuan cúu te ruhū chi suni cuu tenuū rī jniñu jeē sáha máá-ni ri nuú. Chi núu ndé tée jéni ni de jeē cuu tenuū de máá de, te ruhū chi víhyá gā cuu tenuū rī maá rí.

⁵ Chi ni casáha circuncidar ruhū nuū uná quivī ná ni cacu ri. Te yucūn Israel cúu ri, te suni jnáhan yucūn Benjamín, te ñn hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rī hebreo.

⁶ Te ni jito xeēn rī ñayuu cácadíje, chi yōhyo ni condihvī ni rī jeē ma sáma i modo ley jenahán. Te ni ñn tu ní cúu cahān jeē tu squícu ri ley un, chi ni squícu vāha ri.

⁷ Te tāca jéē ní tenuū rī ún, chi sáha ri cuenta jeē tu ndé nihín jniñu cuiti, chi vijna te ni candíje ri Cristo.

⁸ Te suni chíhi ri cuenta jeē vāha ga na náa ndihi jeē ní tenuū rī ún, chi vāha ndasí gá cúu jeē ni quivī ri ndaha máá Jítoho rī Cristo Jesús. Te jeē siquí maá yá te ni siaá rī ndihi ún, te sáha ri cuenta jeē nájnūhun yācá-ni cúu. Chi ni quivī ri ndaha Cristo,

⁹ te ndúú yá jiín rí. Te tuá nducú rí quendō ndaā rī jeē jiín ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndō ndaā yā

ñayuu cácadíje.

¹⁰ Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jiín rí. Te cúní rī ndoho ri jiín yá, te nde jinū rī ndoho ri nájnūhun ni ndoho máá yá jeē ni jíhi yā.

¹¹ Chi yōhyo ñūhun ni rī natecu rī nájnūhun ni natecu yā.

Jeē nducú ndéyí Pablo sínu de carrera de

¹² Te ná tu nihín rī ndihi jeē ni cáhān rī ún, ni ná tu ije ri jiín. Te nducú ndéyí rí siquí ún, chi ñūhun ni rī jeē nihín rī tācá un, chi jeē yúcuan cúu jeē ni nihín Cristo Jesús ruhū xīhna gā.

¹³ Hermano jijnáhan ró, tu sáha ri cuenta jeē jé ni nihín rī ndihi ún. Te iyó ñn jeē sáha ri, cúu jeē squéndō ri tāca jéē ní cuu ichi yátá, te nducú ndéyí rí nihín rī tāca jéē iyó ichi núú.

¹⁴ Chi cúu un nájnūhun jeē jínu ri ñn carrera cuahān rī nde jinū rī andiví, te nihín rī premio jeē cuáha Yaā Dios. Chi ni cana ya yohó jéē quihín yō nuū yā andiví siquí jeē yihí yó ndaha Cristo Jesús.

¹⁵ Te tāca yó jeē jé ni ije vāha yó jiín jnūhun cándíje yó, súcuan na cáni ni yō. Te núu ndé ñn ró sín jéni ni rō, te Yaā Dios suni stéén yā nuū rō jeē násūu súcuan cúu.

¹⁶ Te jini ñūhún cani ni yō te caca yó modo jeē quijnáhan jiín jéē jé ni nihín yō.

¹⁷ Hermano, na ndácu ró rúhū jijnáhan ró. Te condēhe vāha ró ndese cájica ñayuu

ndaā, chi cájica i nájñuhun ni castéén rī nuū rō.

18 Te je ni cuu tijni jínu ni cahān rī jíin ró, te nde ndahyú rī cahán tucu rī vijna, jeē iyó cuéhē ñayuu cájica i ñn modo jeē steén jeē jíto uhū i jñuhun jeē ni jíhī Cristo jicā cruz.

19 Te ñn quivī te jnahñū ndetū ñayuu ún. Chi máni jeē caji vāha i cúu jeē cáchiñuhún i. Te sátéyí i máá i jíin jniñu neé jeē jéhe jñuhun canu. Te máni máá jéē iyó ini ñayivī cúu jeē ndihví ni i.

20 Te máá yó chi ñayuu coyūcú andiví cúu yó, te cándetu yó jéē nde yūcuán ndiji Jitoho yō Jesucristo, Yaā jnáma yóhó.

21 Te máá yá nasama ya yiqui cúñu ndahú yó, návāha nduu yó nájñuhun cáa máá yá jeē lúu cújéñu ya. Te súcuan sáha ya jíin poder yā jeē kujéñu ya siquī ndihī ni.

Níní na cúsiñ ni yō jíin Jítoho yō

4

1 Núu súcuan hermano jijnáhan ró, cuiñi ñihin ró jíin jñuhun máá Jítoho yō. Chi yōhyo manī rī jíin ró, te cúní rī jeē coto jnáhan yó, te cúsiñ ni rī jíin ró, te nájñuhun premio rī cácuu ró.

2 Te cáhán ndahú rí jíin róhó Evodia jíin Síntique jeē inuú na cóo ni rō, chi cácuu ró hermana jeē cácadíje ró máá Jítoho yō.

3 Te suni cáhán ndahú rí jíin róhó, téé jeē ní chindéé ñájñáhan vāha jíin rí, jeē na chindéé ñáhán ró hermana

un, chi ni casájniñu ñihin ña jíin rí siquī jñuhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō síhví i nuū libro jeē yosó síhví ñayuu cotecu níí cáni.

4 Te níní na cúsiñ ni rō jijnáhan ró jíin máá Jítoho yō. Te inga jínu cáhán rī jeē na cúsiñ ni rō.

5 Sáha vāha ró jíin táca ñayuu, návāha cuni i jeē súcuan vāha ni rō. Chi máá Jítoho yō, yajni-ni cúu ya jíin ró.

6 Ma nácani ndasí ni rō siquī ni ñn. Chi sa cahān rō jíin Yaā Dios siquī táca jéē nácani ni rō. Chi cacān tahu rō, te cahān ndahú ró, te suni nacuatáhú ró nuū yā.

7 Yūcuán na te sáha Yaā Dios jeē cóo ndeyí coo siñ ndasí ni rō, te súcuan coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jéē níjnūnī rō, coo cuehē jñuhun ndeyí jñuhun siñ ni jíin ró, siquī jeē yíhī ró ndaha Cristo Jesús.

Jeē na cáni ni yō siquī táca jéē vāha

8 Te ñn na jñuhun íyó, hermano jijnáhan ró. Na cáni ni rō siquī táca jéē iyó ndáá, jíin jéē sáha yíñuhún, jíin táca jniñu sáha vāha, jíin jniñu íyó ndoo, jíin táca jéē iyó manī ni, jíin jéē lúu sáha. Te máni na núcūhun ni rō táca jéē vāha jeē sáha jeē nacuatáhú ró nuū yā.

9 Táca jéē ni steén rī nuū rō, jeē ní cacutūhva ró núu rī, jíin

jeē ní cajini ró ní cahān rī, jīn jeē ní cajito ró ní sáha ri, tāca yúcuān suni na sáha máá ró. Yūcuān na te máá Yaā jeē jéhe jnūhun ndeyí sī ni, coo ya jīn ró.

Jeē ní casocō ñayuu Filipos nuū Pablo

¹⁰ Te yōhyo cúsi ni rī sáha máá Jítoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jeē ní naa ni rō sáha ró súcuān, chi siquī jeē tu ní íyo modo.

¹¹ Te nasūu jeē cahán rī siquī jeē ndóho ndáhú rí, chi je ni cutūhva ri cusī ni rī jīn jéé névāha ri.

¹² Jíní rī cotecu ndahú rí, te jíní rī cotecu cucá rí. Chi ni cāan ri jīn táca-ni, núu jeē ndutú chíji ri chí jéé ndóho ri sōco, núu jeē cónevāha cuehē rī chí jéé cúmanī nuū rī.

¹³ Ndihi-ni cúu sáha ri, chi máá Cristo jéhe ya fuerza ini rī.

¹⁴ Te vēsú súcuān te vāha ni casáha ró jéé ní chindéé ñáhán ró ruhū jīn jnūndóho jeē ndóho ri.

¹⁵ Te róhó ñayuu ñuu Filipos, je cájini rō ndese ni cuu. Chi nde quivī ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnūhun ya ni nacani ri. Te ni ñn grupo ñayuu cácanjíje tu ní sáha súcuān, chi máá-ni róhó jijnáhan ró.

¹⁶ Te ná íne ri ñuu Tesalónica, te ni catajī ró jecu

jeē jíní ñúhún rí, ni jinū ñn uū jínu.

¹⁷ Te nasūu jeē nducú rí jeē cuáha ró núu rī, chi sa nducú rí jeē na cáyá gā jniñu váha ró, návāha cayā tahū rō nuū Yaā Dios.

¹⁸ Chi je ni nihīn rī ndihī jeē jíní ñúhún rí, te ndóo ga. Te íyó cuéhē nuū rī, chi ni nihīn rī jeē ní catajī ró vēji jīn Epafrodito. Te jeē ní catajī ró cúu nájñūhun ñn ofrenda jeē asín jeén, ni casocō rō nuū Yaā Dios, te cúsi ni yā jīn.

¹⁹ Te Yaā Dios chí cuáha ya nuū rō tāca jéé cúmanī nuū rō, chí cucá ndasí yá jīn táca jéé váha jeē lúu íyó núu Cristo Jesús.

²⁰ Te na cáhán yō jeē yóhyo luu cújéhnu Tátá yō Yaā Dios ní cáni. Amén.

Saludo jeē sándihí

²¹ Cachi rō nuū tāca ñayuu maá yá jeē sándeýí ni i, áchí rí, chí cácanjíje i Jesucristo. Te hermano yō cáyūcu jīn rí yáha, cácahān de jeē sándeýí ni rō jijnáhan ró.

²² Te tāca ñayuu maá yá jeē cáhīyo yáha, suni cácahān i jeē sándeýí ni rō. Te ñayuu cáyūcú vehe rey cújéhnu ñuu Roma yáha, máá i cácahān gā súcuān.

²³ Te ñúhun ni rī jeē maá Jítoho yō Jesucristo, na sáha ga yá jeē váha róhó jijnáhan ró. Súcuān na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo

² cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha rohó, te sáha ya jeē coo ndeyí coo sīi ni rō.

Jeē jicán tahu Pablo jehē ñáyuu cácandíje

³ Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatáhú rí nuū yā jeē siquí rohó jíjnáhan ró.

⁴ Chi ni cajini jnūhun ri ndese vāha cácandíje ró Cristo Jesús, jíin ndese cácundáhú ni rō táca ñáyuu maá yá.

⁵ Chi cáñuhun ni rō nihīn rō jeē ñūhun vāha nde andiví cuu ró. Chi ná ni cajini ró jnūhun ndaā jeē jnáma ya rohó, te ni caquejéé ró ñūhun ni rō.

⁶ Te jnūhun un jéē ní canacani nuū rō, chi ndúcuehē cuahān te nihín jniñu níi cáhnu ñayiví. Te suni súcuan ni sáha jíin rohó jíjnáhan ró ndé quiví ní cajini ró te ni cajecūhun ni rō jeē

ndaá cúu jeē yóhyo vāha ni Yaā Dios jíin ró.

⁷ Te jnūhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjñiñu squícu vāha nuū Cristo jeē ndíto de rohó.

⁸ Te máá de ni castūhun núu rī siquí rohó, ndese cácundáhú ni rō jnáhan ró sáha máá yá.

⁹ Jeē yúcuan suni tu cájecuñī rī jeē cájicān tahu rī jehē rō, nde quiví ni níhīn rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jnūhun ya, sáha máá Espíritu, návāha cuni rō ndihi ndese nújnahan ni maá yá.

¹⁰ Te cájicān rī jeē caca ndaā rō nájñūhun cánuú caca ró jéē cácuu ró ñáyuu maá Jítóho yō. Te súcuan te sáha ró ndihi jeē nújnahan ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios.

¹¹ Te cájicān rī jeē cuáha ya fuerza ini rō, nájñūhun iyó fuerza maá yá jeē cujéhnu luu ya. Te súcuan te cuu cuandeyí ni rō jíin táca-ni jnūndóho, te cusīi teyí ni rō.

¹² Te cuu nacuatáhú ró nuū Tatá yō, chi máá yá ni chihí fuerza yohó jéē ñn cáhnu-ni jíin táca ñáyuu maá yá nihīn yō tahu yō. Chi cájica yó jíin luz yā jeē yíhi yó ndaha ya.

¹³ Chi ni jnama ya yohó jéē ni yíhi yó ndaha máá jéē jnū poder nuū néē, te ni squívi ya yohó ndaha Séhe ya jeē maní

yā jíin, ndácu ya jniñu nuū yō.
 14 Chi Sēhe ya un ní jnama
 ya yohó jēē ní jhī yā jehē
 yō, te ni ine cáhnu ni yā nuū
 cuēchi yó.

*Jeē ni sáha Cristo jeē ní
 ndávi yó núū jnúhun manī Yaā
 Dios jíin yó*

15 Yaā Dios jeē tu cúu coto
 yó, ni sáha ya jeē ní quiji Sēhe
 ya, te súcuan ni jito yó máá yá.
 Te Sēhe ya ún, je íyó yá nde ná
 tu jecōo tāca jēē iyó.

16 Chi jíin Sēhe ya ni sáha
 Yaā Dios ndihi jeē ní jécōo,
 ndihi jeē iyó andívi jíin jēē iyó
 ñayívi, jeē jiní yō nuū jíin jēē
 tu jíin yō nuū. Te suni ni sáha
 ya tācá ndajéhé jeē cándacu
 jniñu, jíin jēē cándiso jniñu,
 jíin jēē cácujuhnu, jíin jēē cájni
 poder. Jíin Cristo ni sáha Yaā
 Dios jeē ní jécōo ndihi, te jeē
 cúu Cristo cúu.

17 Te je íyó Cristo nde ná tu
 coo ndihi jeē iyó. Te ndaha
 máá yá yíhi vāha ndihi-ni.

18 Te máá yá cújéhnu nuū
 ñáyuu cácandíje, nájnūhun
 cújéhnu xinī nuū yiqui cúñu,
 chí nájnūhun yiqui cúñu yā
 cácuu i, cúu jeē in na cúu i jíin
 yá. Te máá yá sáha jeē cotecu i
 ní cáni, te xīhna gā máá yá ni
 natecu mēhñu ndíyi, návāha
 cújéhnu ya nuū tācá-ni.

19 Chi ni cusī ni Yaā Dios jeē
 ndihi ndese cúu máá yá, suni
 súcuan cúu Cristo.

20 Te siquī jeē ní jhī Cristo,
 te ni cusī ni Yaā Dios sáha
 ya jeē ndávicoo tācá-ni nuū
 jnúhun manī yā jíin, tāca
 jēē yúcu ñayívi jíin jēē yúcu
 andívi. Chi jíin jēē ní jhī

Cristo jicā cruz, te ni sáha Yaā
 Dios jeē ndávicoo tācá-ni nuū
 jnúhun manī yā jíin.

21 Te máá ró jijnáhan ró,
 chí sín siquī ni cahīin ró ndé
 saá, te ni cajito uhū rō yā ini
 anuá rō, chí máni jniñu néé ní
 casáha ró. Te vijna chí je ni
 sáha Yaā Dios jeē ní ndávicoo
 ró núū jnúhun manī yā jíin ró.

22 Súcuan ni sáha ya siquī
 jeē ní sócō Cristo maá yá ni
 jihī yā, návāha coo ndoo coo i
 rō cuiñi ró núū yā, te ma cóo
 jnéhén ró, te tú na cuēchi coo
 siquī rō.

23 Te súcuan sáha ya núu
 cuiñi níhin ró jēē candíje vāha
 ró, te núu quendōo níhin ró
 jíin jnúhun vāha jeē cáñuhun
 ni rō jeē jnáma ya rohó, te ma
 siaá cuiti rō. Chí jnúhun un
 ní cajini ró, te ni jite núu ní
 cáhnu ñayívi. Te ruhū Pablo
 suni jéjniñu ri jeē nácani ri
 jnúhun ún.

*Jeē jéjniñu Pablo siquī
 ñáyuu cácandíje*

24 Te vijna te cúsi ni rī jeē
 ndóho ri jehē rō jijnáhan ró.
 Chí jíin yiqui cúñu rī ndóho
 ri jeē cúmanī gā ndoho ri jíin
 Cristo jehē ñáyuu cácandíje,
 suu ñáyuu cúu nájnūhun yiqui
 cúñu yā.

25 Te cúu ri tēe jéjniñu siquī
 ñáyuu cácandíje, chí súcuan ni
 tejniñu Yaā Dios ruhū, návāha
 nacani ndihi ri jnúhun ya nuū
 rō te quendōo vāha ró.

26 Te nácani ri jnúhun ya jeē
 ní yisáhi, jeē tu ní cájini ñáyuu
 nde jenahán ndasí te nde ní
 cáni vēji. Te vijna te je ni steén

cají yá jnūhun un núū ñáyuu maá yá.

²⁷ Chi ni cusī ni yā jeē steén yā nuū i ndese cúcúca ndasí i jín ndihī jeē ndíso jnūhun sāhi yáha jēé lúu cújēhnu, te cuitē núu quihīn nuū tāca nación jeē tu jíní. Te jnūhun sāhi yáha cúu jeē ndeé Cristo ini anuá rō, ndúú yá jín rō, te jeē yúcuan cáñuhun ni rō tāca jéé lúu jēhnu jeē coo.

²⁸ Te jnūhun Cristo un cúu jeē cánacani rī, te cástíhvī ni rī tāca ñáyuu, te cástéén rī jnūhun ya návāha jecūhun vāha ni i. Te súcuan te ije vāha ni ndivī i jeē yīhi i ndaha Cristo Jesús.

²⁹ Te siquī yúcuan cúu jeē sájniñu rī, chi ndíhvī ni rī nácani rī jnūhun jín tāca fuerza Cristo jeē chindéé ñájnáhan ya jín rí.

2

¹ Chi cúní rī jeē na jécūhun ni rō ndese yōhyo ndúcú ndéyí rí jehē rō, jín jēhē ñayuu ñuu Laodicea, jín ndé tāca ñáyuu jeē tu ní cájini cuiti nuū rī.

² Chi cúní rī jeē coo ndeyí ni anuá i, te inuú-ni coyūcu mánī i, te jecūhun ndihī ni i ndese yōhyo cúca i jín jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísāhí un.

³ Te ini Cristo yísāhí tāca jnúhun jeē cucúca rō jín, suu jnūhun ndíchí jín jnúhun jécūhun ni.

⁴ Te jnūhun yáha cáhán rī jín rō jijnáhan rō, návāha ma

stahú ni ñin i rōhó jín tāca jnúhun stahú jéé lúu cáhán.

⁵ Chi vēsú ndeé jícá rí jín rō, te ñúhun ni rī rohó, te cúsi ni rī jeē jiní rī ndese cájica ndaā rō te cácandíje nīhin rō Cristo.

⁶ Núu súcuan te nájñūhun ni cajetáhú rō jeē Jítóho rō cúu Jesucristo, suni súcuan na cáca ndaā rō jín yá.

⁷ Te na jnī vāha jnūhun ya ini rō, te na ije vāha rō jín jnúhun cácandíje rō yá, nájñūhun je ni cajini rō. Te níní nacuatáhú rō nuū Yaā Dios.

Jeē ndújeé yó sáha Cristo

⁸ Coto má cuāha rō jnúhun jeē stahú ni ñin ñayuu rohó jín jnúhun ndíchí jéé tu jéjníñu, jín jnúhun ndúxí stahú. Chi tu cácandíje i jnūhun Cristo, chi sa cácandíje i tāca jéé tajnúní ñayuu, modo jeē castéén ini ñayīvi yáha.

⁹ Chi ndihī ndese cúu máá Yaā Dios, suni súcuan cúu Cristo.

¹⁰ Te ndihī ndese cúu Cristo, suni súcuan cúu rō jijnáhan rō, chi cáyihī rō ndaha ya. Te máá yá cújēhnu nuū tāca jéé kujēhnu jín jéé ndíso jníñu andiví.

¹¹ Te siquī jeē cáyihī rō ndaha ya, suu cúu jeē nájñūhun ni cuu rō circuncidar. Te jeē súcuan ni sáha ya circuncidar rohó, chi nasúú ñin jnunī jeē yīhi yiqui cúñu rō cúu, chi sa suhva jeē ní sándoo ya tāca cuéchi ni casáha rō jín modo neé máá rō. Chi súcuan cúu jeē sáha Cristo circuncidar rohó.

12 Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jēe jíin poder Yaā Dios ni nastecu yā Cristo mēhñu ndíyi.

13 Chi ni cacuu ró nájnūhun ndíyi nuū yā siquī cuēchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuēchi ró.

14 Te nájnūhun jeē iyó ñin acta jeē jicán cuēchi siquī yō jeē ni stívi yó ley yā. Te ni ndahva yā acta un, chi ni chunaa Cristo cuēchi yó jēe ni jíhī yā jicā cruz.

15 Chi ná ni jíhī yā jicā cruz, te ni quende yā ndíhi poder tāca jéneé jēe cácujeñhu jíin jēe cájni poder. Te ni quende yā jeē tuá cujeñhu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

16 Núu súcuan te ma cuatáhú ró núu cácahān ñayuu cuēchi siquī rō, siquī ñin jeē yéji rō chí siquī ñin jeē jíhi ró, chí jēe tu nēe ñi rō quiví víco jíin quíví núcosō yoō jíin quíví ndétátú.

17 Chi tāca ley siquī un ní jejniñu máá ndé ná tu quiji Cristo. Te vijna te ni quiji ya te tuá jíni ñúhún tāca ún.

18 Ma cuáha ro jnúhun jeē cási ni ñin ñayuu jeē níhín rō tahū rō. Chi cáchiñúhún i tācá ndajéhé yā, te cácahān i jeē súcuan cása ha suchí i máá i. Te cácahān i jeē cájini ndije i

jeē iyó ndāā jnūhun cánacani i, te tuú. Te súcuan cása ha téyi sáa-ni i máá i, chi cájeni nēe ni i.

19 Te tu cáhīin i jíin Cristo, Yaā cujeñhu nuū ñáyuu cácuu nájnūhun yiqui cúñu yā chi ñin na cúu i jíin yá. Chi máá yá scuéñhu ya i jíin jnúhun ya, te nduu ñnuú ni tācá i jeē cáhije i cuahān i, nájnūhun ni jeni ni Yaā Dios.

20 Núu súcuan te nájnūhun jeē je ni cajihī rō jíin Cristo, cúu jeē ní casiáá rō tāca jēe tajnúni jeē castéén ini ñayívi. Núu súcuan ¿te naun cása ha ga rō nájnūhun cása ha ñayuu ñayívi jēe jéndije ró tāca jēe tajnúni i?

21 Chi cácahān i: Ma quehé ró ma cáji rō jeē yáha chí jēe yúcuan, ni ma jní ró, áchí i.

22 Te máni jeē tajnúni ñayuu jíin costumbre máá i cúu te tu níhín jniñu jeē quéndōo ndāā ñayuu.

23 Te ndāā chi cájeni ni i jeē jnúhun ndíchí cúu ún, chí sáha jíin i jeē chiñúhún níhin i, jíin jēe sáha suchí i máá i, jíin jēe stóho i yiqui cúñu i. Te tu níhín jniñu cuiti jeē casi tācá jniñu nēe jēe cuní i sáha i.

3

1 Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndíyi ni sáha cuēchi ró. Te na cóndihvī ni rō siquī tāca jēe iyó andiví núu ndeé Cristo lado váha Yaā Dios nuū cujeñhu ya.

² Te na cáni ni rō siquī tāca jēe iyó andiví, nasūu síquī jēe iyó ini ñayīví.

³ Chi nájnūhun je ni cajihī rō jíin Cristo, te vijna chi nájnūhun cátecu rō jíin yá andiví, chi cáyihī ró ini ndaha Yaā Dios.

⁴ Te quivī ndíji Cristo, Yaā sáha jēe cótecu yō níf cáni, yūcuán na te suni quenda-coo ndijin maá ró jíin yá, te kujénu luu ró jíin yá.

Ñayuu jíca jíin modo cuni maá, jíin ñayuu ní ndujeé

⁵ Núu súcuan te çasi rō tāca modo cuni maá ró jēe cáhīyo ró ini ñayīví yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóo ró, ma ndíyo ni rō ndajniñu. Chi táca ndajniñu jēe ndíyo ni yō cúu nájnūhun ídolo yō jēe chiñúhún yó.

⁶ Chi siquī táca jniñu yáha cúu jēe cuáha Yaā Dios castigo xeēn nuū ñayuu niñni ni nuū yá.

⁷ Te suni jíin jniñu yáha ní cajica ró ndé saá, ná ni casáha ró súcuan.

⁸ Te vijna te na stóo ró táca jēe yáha: jēe quití ni, jēe xeēn ni, jēe sáha jniñu néé, jēe cahán ndeváha nuū jnáhan, jíin jēe cahán táca jnúhun tú váha.

⁹ Ma stahú ró jnáhan ró, chi yūcuan cúu modo maá ró jēe ní cajica ró jíin ndé saá, te je ni castóo ró.

¹⁰ Te ni canduu ró ñayuu jēe, cuandacu ró máa Yaā ni sáha rohó, te cuajecūhun váha ni rō ndese Yaā cúu ya.

¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jēe ní indāa néé, ni mozo jēe ní jeen ñayuu, ni ñayuu sájniñu cuenta maá, chi inuú cúu ndihī i nuū yá. Chi Cristo cúu Jitoho ndihī i, te ndéé yá ini anuá ndihī i, ndúu yá jíin i.

¹² Chi ni nacāji Yaā Dios rohó jíináhan ró jēe cúu ró ñayuu maá yá jēe maní yá jíin. Núu súcuan te níni cundáhú ni rō jnáhan ró, te coo váha ni rō jíin jnáhan ró. Te coo suchí ni rō, te coo vítá ni rō, te coo paciencia ni rō.

¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máa ró.

¹⁴ Te jēe cánuú gá cúu jēe cundáhú ndasí ni rō jnáhan ró. Chi yūcuan sáha jēe ndúu inuú ni rō te íje váha ni rō jíin jniñu váha.

¹⁵ Te jnúhun coyūcu mánī na cúnuú ini anuá rō sáha Yaā Dios. Chi ni cana ya rohó jēe nduu ró in na ñayuu jēe cóyūcu mánī rō. Te níni na nácuatáhú ró nuū yá.

¹⁶ Te scuáha váha ró jnúhun Cristo náváha cunuú jnúhun ún ini anuá rō. Te stéén rō nuū jnáhan ró, te stihví ni rō i jíin táca jnúhun ndíchí yá. Te jíin salmo jíin himno, yaa i jēe cahán jnúhun ya, na cáta luu ró jēe nácuatáhú ró ini anuá rō nuū Yaā Dios.

17 Te tǎcǎ jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnú sǐhví máá Jítóho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cácandíje nuū jnáhan i

18 Róhó ñahan cácuu ñasihí, cuatáhú ró nuū yíi ró, chí súcuan cánuú sáha ró síquī jeē candíje ró Jítóho yō.

19 Te róhó tée cácuu yíi, cundáhú ni rō ñasihí ró, te ma cútucu ni rō jíin ña.

20 Róhó séhe jíjnáhan ró, tǎcǎ-ni jniñu cuandíje ró núu tatá rō nuū naná rō, chí súcuan cúsi ni máá Jítóho yō.

21 Te róhó tátá jíjnáhan ró, ma squíi ni rō séhe ró, návāha ma cucuíhyá ni i.

22 Róhó mozo jíjnáhan ró, tǎcǎ-ni jniñu cuandíje ró núu patrón rō ñayívi yáha. Ma sájniñu ndúxí ró jeē máá jéē coto de te cuajnúhún de róhó. Chí na sájniñu ndaā sájniñu ndíje ró, te conso iyo ró núu Yaā Dios.

23 Te tǎcǎ jniñu sáha ró, na cúsi ni rō sáha ró, te na cáni ni rō jeē nuū Jítóho yō cájejniñu ró, nasūu núu ñáyuu.

24 Chí je cájini rō jeē máá Jítóho yō cuāha ya cuehē tahū cuu ró ní cáni. Chí nuū máá Cristo cájejniñu ró, chí máá yá cúu Jítóho rō.

25 Te ñayuu casáha jniñu néé, chí sa suhva ndutahū i síquī jeē ni sáha i. Chí tu sáha Yaā Dios cuenta ndese cúu ñi ñi ñayuu, chí inuú sáha ya jíin i.

4

1 Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni iyó Jítóho máá ró, Yaā ndeé andívi.

2 Te ndívi rō ma jécuiñi rō jeē jícán tahú rō, chí coo ndito ni rō jíin, te nacuatáhú ró núu Yaā Dios.

3 Te suni cacān tahú rō jehē rí jíjnáhan rí, jeē na sáha Yaā Dios jeē cóo ga modo nacani rí jnūhun, návāha cuu cahān rí jnūhun Cristo jeē ní yisāhí, jeē tu ní cájini ñayuu jenahán. Te síquī jnúhun un cúu jeē íne rí vecāa.

4 Te cacān tahú rō jeē cuu cahān cají rí ndese cánuú cáhān rí.

5 Sáha yúcún váha ró jíin ñáyuu tu cácandíje. Ma cúhuun ni rō síquī i, chí condíhví ni rō scandíje ró i.

6 Te máni cahān vāha ró jíin ñáyuu, te cahān rō jnūhun cuajniñu jeē quéndōo vāha i sáha. Te cani ni rō ndese vāha nastió cuíñi rō jnūhun nuū ñi i.

Saludo jeē sándihí

7 Tíquico cúu ñi hermano jeē maní yō jíin, te tēe squícu vāha chindéé ñájnáhan jíin rí cúu de, te jéjniñu de jíin rí nuū máá Jítóho yō. Te máá de castūhún ndihí nuū rō ndese cuahān jniñu rí.

8 Jeē yúcuan ní tají rí de cuajeē de nuū rō jíjnáhan ró, návāha cuni rō ndese cáhíyo rí jíin jniñu, te coo ndeyí ni rō sáha de.

9 Te suni cuajeē Onésimo jíin de, tēe cúu jnáhan máá ró jíjnáhan ró. Te cúu de

hermano jeē squícu vāha jeē maní yō jíin. Te ndindúú de castūhun núū rō ndese cuahān tācá jniñu ichi cháha.

¹⁰ Sándeyí ni rō jijnáhan ró, áchí Aristarco, tēe ine jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu ni jecandēhé de rōhó te sáha vāha ró jíin de.

¹¹ Te suni súcuan cáhán Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cácandíje jeē chindéé ñáhán cácanani jnūhun jíin rí siquī ndese ndácu Yaā Dios jniñu. Te yōhyo ndeyí íyó ni rī casáha de.

¹² Sándeyí ni rō jijnáhan ró, áchí Epafra, tēe cúu jnáhan máá ró, te mozo Cristo cúu de. Te níni jícán tahu ndasí de jehē rō, jeē na cuñi nihin ró, te ije vāha ni rō jeē squícu vāha ró ndihí jniñu cúní Yaā Dios.

¹³ Chi cáhán ndaā rī jeē yóhyo ndíhví ni de jehē rō jijnáhan ró, jíin jéhē ñáyuu ñuu Laodicea jíin Hierápolis.

¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cácandíje cándutútú vehe ña.

¹⁶ Te ná ni jīnu ni cacahu ró carta yáha, te suni tají ró na cáhu ñáyuu cácandíje ñuu Laodicea. Te suni cahu

máá ró carta jeē cuahán nuū ñáyuu Laodicea te ndiji nuū rō.

¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jitoho yō siquī de, áchí rí.

¹⁸ Ruhū Pablo, yāhá-ni cúu jeē tēe ri jíin ndaha máá rí, jeē sándeyí ni rō. Te nucūhun ni rō ruhū jeē ine ri vecāa. Te ñúhun ni rī jeē na sáha ga Yaā Dios jeē vāha rōhó jíijnáhan ró. Súcuan na cóo. Amén.

CARTA HIN JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jín Silvano jín Timoteo, te cátee rí carta yáha cuájeē nuū rohó ñáyuu cácadíje ñuu Tesalónica, jeē cáyihí ró ndaha Tátá yō Yaā Dios jín Jítóho yō Jesucristo. Te cáñuhun ní rí jeē Tátá yō Yaā Dios jín Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sī ní rō jijnáhan ró.

Ñayuu Tesalónica cúu i hin ejemplo váha

2 Níní cánacuatáhu rí nuū Yaā Dios jeē siquí rohó jijnáhan ró, te tu náā ní rí cacān tahu rí jehē rō jeē cájicān tahu rí.

3 Te níní ndácunehen rí rohó núu Tátá yō Yaā Dios, jeē váha casáha ró táca jniñu chí cácadíje ró, jín jēé váha cájegniñu ró núu yā chí manī rō jín yá, jín jēé cájendeyí ní rō chí cáñuhun ní rō jeē coo jeē váha sáha Jítóho yō Jesucristo.

4 Chí manī Yaā Dios jín ró jijnáhan ró hermano, te cájini rí jeē ní nacāji ya rohó.

5 Chí ná ní canacani rí jñuhun nuū rō jeē jnáma ya rohó, te nasūu jēé ní cáhān rí súcuan-ni, chí ní nacani rí jín poder Espíritu Santo, te ní cacucáhu váha ní rí jeē

jñuhun ndaā cúu. Te cájini rō ndese ní casáha váha rí ná ní coyūcu rí jín ró, chí ní nducú rí jeē quéndōo váha ró.

6 Te rōhó jijnáhan ró chí ní candacu ró rúhū, te suni ní candacu ró máá Jítóho yō. Chí ní cajetáhu ró jñuhun ya, te ní cacusi ní rō ní sáha Espíritu Santo, vésú ní cajito ró cuehē jñūdóho siquí ún.

7 Te súcuan cácuu ró hin ejemplo nuū ndihí ñayuu cácadíje jeē cáyucú región Macedonia jín Acaya jñā.

8 Chí jeē siquí rohó jijnáhan ró cúu jeē ní jite núu jñuhun Jítóho yō, te nasūu máni Macedonia jín Acaya, chí suni ní cáhnu-ni ní jité núu jñuhun ndese cácadíje ró Yaā Dios. Te jeē yúcuan tuá jini ñúhún jeē nacani máá rí jñuhun nuū í.

9 Chí sa máá i cánacani ndese ní cajetáhu váha ró rúhū ná ní jecoo rí nuū rō, jín ndese ní castóo ro ídolo te ní quívicoo ró ndaha Yaā Dios, Yaā ndaā Yaā técu, jeē cuajniñu ró núu yā.

10 Te cánacani i jeē cándetu ró jēé ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

Jniñu jeē ní sáha Pablo ñuu Tesalónica

2

1 Chí cájini rō hermano, jeē tu ní jecoo cáhá-ni rí nuū rō.

2 Te cájini rō jeē ní castóho i ruhū te ní cacahān ndeváha i nuū rí ini ñuu Filípos. Te vésú súcuan te máá Yaā Dios

ni chindéé ñáhán yá ruhū, ni sáha ya jeē ni íyo ndeyí ni rī, te ni jecoo ri ñuu rō ni canacani ri jnūhun jeē jnáma ya rohó. Súcuan ni casáha ri vēsú xeēn ni íyo jnūndóho.

³ Te jnūhun ni canacani ri, nasūu jnūhun ni castívi ri cúu, ni nasūu jéē nihín rī siquī rō, ni nasūu jéē ní castáhú rī rohó.

⁴ Chi máa Yaā Dios ni jito ndee yā ruhū, te ni tejníñu ya ruhū jeē nácani ri jnūhun jeē jnáma ya rohó. Te jeē yúcuan cúu jeē cácahān rī. Te tu cácahān rī jnūhun jeē núnjahan ni ñayuu, chi sa jeē núnjahan ni Yaā Dios, chi máa yá jito ndee anuá rī.

⁵ Te cájini rō jeē tu ní cánducú rī cuajnúhún rī rohó ñn modo stahú, ni tu ní cácahān rī jeē cúsi ni rī jíin ró návāha nihín rī xūhun ró. Te jíni Yaā Dios jeē súcuan cúu.

⁶ Te ni tu ní cánducú rī jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núu, chi apóstol Cristo cácuu rī.

⁷ Chi sa suhva víta ní cacahān rī jíin ró, nájnūhun sáha ñahan ndéca yiquín jéē yucún ndító ña sēhe ña.

⁸ Te siquī jeē cácondáhú ndasí ni rī rohó, jeē yúcuan ní cacondíhvī ni rī nacani ri jnūhun vāha Yaā Dios nuū rō. Te nasūu máa yúcuan-ni, chi suni nde vida rī cuāha ri jeē siquí rō nuú, chi yōhyo manī rī jíin ró.

⁹ Te cánahan ró hermano, jeē tú ni ñn ní stáhān rī jeē cacān rī nuū rō ná ni canacani ri jnūhun vāha Yaā

Dios nuū rō. Chi ni canducú ndeyí rī ni casájniñu ndasí rī siquī jeē cótecu rī. Te nduú ñuu ni casájniñu rī.

¹⁰ Máa ró cájini rō, te suni Yaā Dios jíni yā ndese ndaā ndoo ni cajica ri nuū rohó ñayuu cácañdije. Te ni ñn tu cúu cahān cuēchi siquī rī.

¹¹ Te suni cájini rō ndese ni castíhvī ni rī ná ñn ná ñn ró, te ni cacahān rī jnūhun ndeyí ni jíin ró, nájnūhun sáha ñn tátá jíin séhe de.

¹² Te ni cacahān nīhin ri jíin ró jeē na cáca ndaā rō nuū Yaā Dios nájnūhun cánuú caca ró. Chi ni cana ya rohó jéē quíngoo ró núu ndácu ya jniñu, nuū luu cujéhnu ró jíin yá.

¹³ Te jeē yúcuan ní nacuatáhú rī nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnūhun ñn tēe cúu, chi jnūhun Yaā Dios cúu. Te máa jéndaá jeē jnūhun un sájniñu ñni anuá rohó ñayuu cácañdije nde ndacu ró yá.

¹⁴ Hermano, ñayuu ñuu rō ni cajito xeēn i róhó, te súcuan ni candoho ró nájnūhun ni candoho ñayuu cácañdije cáyūcú región Judea jeē cáyihī ndaha Yaā Dios jíin Cristo Jesús. Chi nájnūhun ni candoho i ni sáha jnáhan i ñayuu hebreo, suni súcuan ni candoho ró.

¹⁵ Chi suu ñayuu hebreo ni cajehni de máa Jítoho yō Jesús, nájnūhun ni cajehni de táca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni

cascúnu de. Te cásáha de jniñu jeē tu nújnahan ni Yaā Dios, te cúu de contra siquī tāca ñáyuu.

¹⁶ Chi jésicoo de jeē ma nácani ri jnūhun nuū ñáyuu tācá nación jeē tu jíní, návāha tú cācu i. Te súcuan sáha de jeē nducuehē gā cuēchi siquī de. Te vijna te yachī quiji quivī jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷ Hermano, ni cacujiyo ri ñin núnúu-ni nuū rō jijnáhan rō. Te vēsú tu cájito jnáhan yó, te níní cáñuhun ni rī rohó. Te yōhyo ni cacuu ni rī ndacoto ri nuū rō jijnáhan rō.

¹⁸ Te jeē yúcuan ní cajeni ni rī jecoo ri nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesi ichi ri jijnáhan ri.

¹⁹ Chi tuá na inga cáñuhun ni rī, te tuá na inga cácusñ ni rī, chi suu máá rō jijnáhan rō. Te jeē siquí maá rō cúu jeē nihín rī premio rī te cusñ teyí ni rī cuiñi yó núu maá Jítoho yō Jesucristo quivī ndíji ya.

²⁰ Suu jeē siquí rohó cúu jeē cácusñ teyí ni rī.

3

¹ Te jeē yúcuan tuá ni cácada ri condetu ri nde nihín rī jnūhun ndese cáhīyo rō. Te ni casándaā rī jeē quéndōo máá-ni ri ñuu Ateñas.

² Te ni catajī rí hermano yō Timoteo, tēe jéjníñu jín rí nuū Yaā Dios siquī jnúhun jeē jnáma Cristo yohó. Te ni jecondēhé de rōhó návāha

sáha de jeē cuiñi nīhin rō te coo ndeyí ni rō jín jnúhun cácadíje rō.

³ Te ni jeē de návāha ma náyūhú ni ñin rō siquī tāca jnúndóho jeē sáha ñayuu. Chi je cájini rō jeē súcuan cánuú ndoho yó.

⁴ Chi nde ná ni coyūcu rí jín rō, te ni cacastūhun rí nuū rō jeē nihín nahín yó jnúndóho. Te je cájini rō jeē súcuan ni cuu, nájñuhun ni cacahān rī.

⁵ Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo rō, te ni tají rí de ni jeē de, návāha cuni rī núu cácadíje nahín rō. Chi ni jeni ni rī á sanaa te jexeén jeē jító ndee yohó ní cundeyí jín rō, te naa cāhá-ni jniñu jeē ní casáha ri jín rō.

⁶ Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē cácadíje vāha rō, te cákundáhú ni rō jnáhan rō. Te ni cachi de jeē cáñuhun ni rō ruhū, chi cáhīyo manī rō jín rí. Te cácuni rō ndacoto rō núu rī, nájñuhun cácuni rī ndacoto ri nuū rō.

⁷ Te jeē yúcuan ní candusñ ni rī siquī jeē cácadíje vāha rō, hermano, vēsú xeēn iyó jnúndóho siquī rī.

⁸ Te vijna je ni cananihín ni rī, chi cáhīn nīhin rō jín máá Jítoho yō.

⁹ Núu súcuan te tu jínu cuiñi nacuatáhú rí nuū Yaā Dios jeē siquí rohó jijnáhan rō. Chi jító ya jeē cácusñ ndasí ni rī jeē súcuan cáhīyo rō.

¹⁰ Te nduú ñuú cájicān tahú

ndasí rí jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquī jnūhun cácadíje yó.

¹¹ Te cáculi rī jeē maá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu ri nuū rō.

¹² Te na sáha maá Jítóho yō jeē cuehē ndasí gá cundáhú ni rō jnáhan ró jíin táca gá ñayuu, nájnūhun cákundáhú ni rī rohó jíináhan ró.

¹³ Te na sáha ya jeē íje ánuá rō jeē cuiñi nīhin ró, návāha coo ndoo ró jéē ma cóo cuéchi ró núu maá Tátá yō Yaā Dios, quiṽṽ ndíji Jítóho yō Jesucristo jíin táca ñayuu yíhi ndaha ya.

Siquī jeē caca ndaā yō modo jeē cúsh ni yā

4

¹ Te vijna hermano, íyó inga jnūhun jeē cácahān ndahú rí jíin ró te cáhān nīhin ri jíin ró, chi súcuan cúni maá Jítóho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rí jíin ró jeē sa víhyá gā na cáca ró súcuan.

² Chi je cájini rō na jniñu ni candacu ri nuū rō jeē ní ndacu maá Jítóho yō Jesús.

³ Te cúni Yaā Dios jeē na cóo ndoo coo íi rō nuū yā, te ma cáca jnéni ró.

⁴ Te ná ñn ná ñn ró na cóndeca yíñuhún ró ñasihí maá ró, te súcuan caca ndoo ró.

⁵ Te ma sáha ró jniñu néé jéē ndíyo ni rō jesihí, nájnūhun cása ha ñayuu táca nación jeē tu cájini i jnūhun Yaā Dios.

⁶ Ni ñn ró ma sáha ró cuéchi jeē quénde rō ñasihí jnáhan ró. Chi maá Jítóho yō cuāha ya castigo xeēn nuū ñayuu casáha táca jniñu súcuan, nájnūhun je ni cacahān nīhin ri ni castūhun rí nuū rō.

⁷ Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó.

⁸ Núu súcuan te ñayuu jeē squéhichī jnūhun yáha, nasūu jnūhun ñn tēe squéhichī i, chi sa jnūhun Yaā Dios, Yaā ni jéhe Espíritu Santo nuū yō.

⁹ Te tu jíni ñuhún jéē tēe ri nuū carta yáha jéē coo manī rō jíin táca hermano, chi je ni steén Yaā Dios nuū rō jeē coo manī rō jíin jnáhan ró.

¹⁰ Te je cáhīyo manī rō súcuan jíin táca hermano cáyūcu ní cáhnu Macedonia jíñā. Te cáhān ndahú rí jíin ró hermano, jeē sa víhyá gā na cóo manī rō jíin i.

¹¹ Te na cóndihvī ni rō coyūcú nayúú ró, te ma cóndihvī ni rō siquī ndese cása ha jnáhan ró, chi condihvī ni rō sáha ró jniñu maá ró, nájnūhun ni candacu ri nuū rō.

¹² Súcuan na sáha ró návāha ñayuu tu cándíje, cuatáhú i rōhó, te suni ma cúmanī jeē cotecu rō.

Siquī jeē ndíji Jítóho yō

¹³ Suni cáculi rī, hermano, jeē na jecūhun ni rō jijnáhan ró siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi.

¹⁴ Chi nájnūhun cácadíje yó jéē ni jíhī Jesús te ni natecu yā,

suní súcuan cácadíje yó jéē nastécu Yaā Dios tāca ñáyuu ni cacandíje nuū Jesús te ni cajihī.

15 Jeē yúcuan cácastūhun rí ñin jñūhun jeē ní castūhun máá Jítóho yō nuū rī: Jeē yóhó jéē cátecu gā quivī ndíji máá Jítóho yō, nasūu máá yó cosnūu jéē ndaa yó quihīn yō. Chi xīhna gā ñayuu je ni cajihī ndaa i quihīn i.

16 Chi máá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéhé cujéhnu ga, te cuecu trompeta Yaā Dios. Te xīhna gā natecu tāca ndáyí jeē ní cacandíje Cristo.

17 Yūcuán na te yóhó jeē cátecu gā yō quivī ndíji ya, suni ndonehen ya yohó jíin i, quihīn yō mēhñu vícō. Te naquijnáhan yó jíin máá Jítóho yō sava andiví. Te súcuan condee yō ní cáni jíin máá Jítóho yō.

18 Núu súcuan te jíin jñūhun yáha cahān ndeyí ni rō jíin táca jnáhan rō.

5

1 Te tu jíini ñúhún jéē téé rí nuū carta yáha síquī cuiyā chí quivī jeē coo tācá un, hermano.

2 Chi je cájini vāha rō jéē ñin sanaa ni yō te quee quivī ndíji máá Jítóho yō, nájnūhun ñin sanaa ni yō te quiji ñacuīhná jecuáā.

3 Chi ná-ni cácahān ñayuu jeē nayúú-ni ñin te tú na jñūndóho coo, te ná-ni cácahān i súcuan te ñin sanaa ni i te quiji jñūndóho síquī i

jeē náā i, te ma cácu cuiti i. Chi quiji quivī un nájnūhun ñin sanaa-ni te quéjéé jéhnde chíji ñin ñahan scácu sēhe.

4 Te rōhó hermano, tu cácuu rō ñáyuu cájica nájnūhun nuū néé jeē ñin sanaa-ni te quiji quivī un síquī rō nájnūhun quiji ñacuīhná.

5 Chi ndihi rō cácuu ñayuu jeē nájnūhun cájica rō nduú, chi stéén luz yā ini anuá rō. Chi tu cácuu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néé.

6 Núu súcuan te ma cúhuun ni yō nájnūhun ñayuu cáquixī, chi sa ndito na cóo ni yō te coo cájí xīnī yō.

7 Chi jecuáā cúu jeē cáquixī ñayuu, te suni jecuáā cúu jeē nájni i.

8 Te máá yó chi nájnūhun jeē cájica yó nduú, te na cóo cájí xīnī yō. Te na cúcutú yó jíin jñūhun cándíje ñihin yó jíin jñūhun cúndáhú ni yō jnáhan yó, nájnūhun cúcutú soldado jíin sahna cáa. Te na cúcutú yó jíin jñūhun jeē cáñuhun ni yō jeē cácu yó, nájnūhun cúcutú soldado jeē ñūhun lélú cáa xīnī de.

9 Chi Yaā Dios tu ní jéni ya yohó jéē cuáha ya castigo yohó, chí sa suhva jeē jnama ya yohó sáha máá Jítóho yō Jesucristo.

10 Te máá yá ni jihī yā jehé yō, návāha cotecu inuú yó jíin yá, vésú núu cotecu gā yō ñayiví yáha chí cúu yō.

11 Núu súcuan te cahān rō jñūhun ndeyí ni jíin táca jnáhan rō, te scuéhnu jnáhan

ró jíin jnúhun ya, nájnūhun je cásáha ró.

Jeē jéni ichí Pablo tācá hermano

¹² Te cácahān ndahú rí jíin ró hermano, jeē cuatáhú ró tēe cájejniñu cándito róhó, jeē cácujeñnu de nuū rō jíin jniñu máá Jítóho yō, te cájeni ichí de róhó.

¹³ Te coo yíñúhún ndasí ró nuū de, te coo manī rō jíin de siquī jniñu ya jeē casáha de. Te na cóyūcu mánī rō jíin táca jnáhan ró.

¹⁴ Te suni cácahān ndahú rí jíin ró hermano, jeē na stíhví ni rō ñayuu cájica cúxí. Te cahān rō jnúhun ndeyí ni jíin ñayuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni rō jíin ndihi ñayuu.

¹⁵ Te coṭo má nasáha ndevāha rō jíin ni ñin ñayuu te núu sáha ndevāha i jíin ró. Chi mánī jeē váha nducú ró sáha ró jíin táca jnáhan ró jíin ndihi-ni ñayuu.

¹⁶ Níní na cóo sī ni rō jinnáhan ró.

¹⁷ Te níní na cácan tahu rō.

¹⁸ Te nacuatáhú ró jeē siquí tācá-ni. Chi súcuan cúní Yāā Dios jeē sáha ró jéē cácañdije ró Cristo Jesús.

¹⁹ Te ma cásí rō nuū jniñu jeē sáha Espíritu Santo jíin ró.

²⁰ Te ni ma cujéē ni rō nuū jnúhun cácahān tēe cánacani jnúhun Yāā Dios.

²¹ Chi coṭo ndee rō tāca jnúhun, te núu jeē váha cúu, te cuatáhú ró.

²² Te ma quívi nduu rō jíin ni ñin jniñu néé.

²³ Te máá Yāā Dios jeē jéhe jnúhun ndeyí sī ni, ñúhun ni rī jeē sáha ndihi ya jeē cóo ndoo coo i rō nuū yā. Te ñúhun ni rī jeē cóndito vāha ya anuá rō jíin jéē níjnūnī rō, jíin yiquí cúñu rō, návāha tú na cuēchi coo siquí rō quiví ndíji máá Jítóho yō Jesucristo.

²⁴ Chi Yāā jeē ní cana róhó, sáha ya ndihi un jíin ró, chi squícu ya jeē ni jéjnūhun ya.

Saludo jíin bendición jeē sáñdihí

²⁵ Hermano jinnáhan ró, cacān tahu rō jehē rī jinnáhan ri.

²⁶ Te núu na cáhán rō jíin táca hermano, te techūhu yíñúhún ró ndaha i.

²⁷ Te cáhán ñihin ri jíin ró, chi súcuan cúní máá Jítóho yō, jeē na cáhu ró carta yáha núu tācá hermano.

²⁸ Te ñúhun ni rī jeē máá Jítóho yō Jesucristo na sáha ga yā jeē váha róhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cácañdije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo.

2 Te cáñuhun ni rī jeē Tata yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō jijnáhan ró.

Jeē sándaā yā cuēchi quivī ndíji Cristo

3 Cánuú jéē niní nacuatáhú rí nuū Yaā Dios jeē síquí rohó jijnáhan ró hermano. Chi súcuan íyó váha, chi yōhyo váha cuahije ró jíin jnúhun jeē cácañdije ró yá, te yōhyo cuanducuehē jeē cácañdáhú ni rō táca jnáhan ró.

4 Te jeē yúcuan cúu jeē cácusī teyí ni rī cánacani rí jnúhun ró núu táca grupo ñayuu cácañdije nuū Yaā Dios. Chi váha cácañdije ró, te váha cájendeyí ni rō jeē cájito xeē ñayuu rohó jíin jéē cándoho ró táca gá jnúndóho.

5 Te jíin táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi síquī ñuu un cúu jeē cándoho ró. Te jeē súcuan chíhi ya cuenta síquī

rō, yáha stéén nuū yō jeē váha Yaā cúu ya.

6 Te suni íyó váha jeē nastóho ya ñayuu castóho rōhó.

7 Te quivī ndíji Jítóho yō Jesús, quivī un sáha Yaā Dios jeē ndétātu rōhó jéē cándoho, te suni ruhū jijnáhan rí. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder.

8 Te cuáha ya castigo nuū ñáyuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i.

9 Te ñayuu ún chi ndoho i ní cáni, chi cujiyo i nuū maá Jítóho yō, te ma cúu quívicoo i nuū lúu ndasí cújéhu ya jíin poder yā.

10 Súcuan sáha ya quivī ndíji ya jeē lúu cújéhu ya sáha ñayuu cácañdije jeē yíhi ndaha ya. Te nahán naa ni i coto i nuū yā. Te suni súcuan rōhó jijnáhan ró, chi ni cacandije ró jnúhun jeē ní canacani rí nuū rō.

11 Te jeē yúcuan cúu jeē niní cájicān tahu rī jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē síquí ró táca jniñu váha jeē ní catee ni rō sáha ró síquí jeē cácañdije ró.

12 Te súcuan te cújéhu máá Jítóho yō Jesucristo sáha ró, te suni cújéhu máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

*Jnūhun siquī maá té sáha
xeēn cuēchi*

2

¹ Vijna te cahān rī siquī jeē ndíji máá Jítóho yō Jesucristo jíin jéē ndutútú yó núū yā. Cácahān ndahú rí jíin ró jijnáhan ró hermano,

² jeē ma cuáha ró jnūhun sacā nuu cani ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuiti rō vēsú núu cahān i jeē ni níhīn i ñn jnūhun siquī un núū Espíritu, chí ñn jnūhun jeē ni cáhān inga, chí núu cachi i jeē ruhú jijnáhan ri ni tají ñn carta jeē cahán súcuan.

³ Ma cuáha cuiti rō jnūhun jeē stahú ni ñn i róhó. Chi nde ná tu quiiji quivī ún te xīhna gā nduníhni ni cuehē ñayuu nuū yā, te quenda ndijin máá té sáha xeēn cuēchi, te tēe jnāhnū ndetū cúu máá téé ún.

⁴ Chi tēe jító uhū Yaā Dios cúu de, te ndonda de contra siquī táca jéē casnání i yaā i jíin táca jeē cáchiñhún i. Te xeēn gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A cánahán ró jnūhun yáha? Chi súcuan ni cahān rī jíin ró ná ni iyo ri jíin ró.

⁶ Te je cájini rō ndé vé cúu jeē jési jeē ná tu quenda ndijin tēe ún, chi nde na quee quivī maá de.

⁷ Chi je jícu sáhi táca cuéchi xeēn ini ñayiví, te vijna chí iyó jéé jési nuū, návāha ma cáa

ndasí gá cuēchi, chi nde na cújiyo máá jéé jési nuū.

⁸ Te sáa te quenda ndijin maá téé xeēn ún. Te máá Jítóho yō Jesús cahni ya tēe un jíin táchī yuhu-ni ya, te jíin jéé ndíndēe yá ndiji ya te snáhnū ndetū yā de.

⁹ Te jeē quíji tēe xeēn ún chi máá Satanás sáha. Te quiiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i.

¹⁰ Te jíin táca jniñu néé te stahú ndasí de ñayuu jeē jnahnú ndetū, chí tu ní cúní i cuatáhú i jnūhun ndaā jeē cácu i núú.

¹¹ Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stahú un.

¹² Te súcuan te jecondee cuēchi siquī ndihi i jeē tu ní cácaandíje i jnūhun ndaā, chí sa jniñu néé ni cacushī ni i jíin.

*Ñayuu jeē ní nacāji ya jeē
cācu i*

¹³ Te cánuú jéé niní nacu-atáhú rí jijnáhan ri nuū Yaā Dios jeē siquí rohó jéé cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéé jnáma ya rohó. Chi sáha Espíritu yā jeē cáhiyo ndoo cáhiyo i rō nuū yā te cácaandíje ró jnūhun ndaā.

¹⁴ Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quivicoo ró núu cujéhu luu ró jíin máá Jítóho yō Jesucristo.

¹⁵ Núu súcuan te cuiñi ñihin ró hermano, te conahán váha ró jnúhun jeē ní cacutühva ró núu rī, núu jeē ní cacahān rī chí jeē ní tee ri nuū carta.

¹⁶ Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo sī ni yō ní cáni, jíin jeē ñúhun ni yō táca jeē váha jeē coo siquī jeē váha ni yā jíin yó.

¹⁷ Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō táca jnúhun váha ya, te sáha ró táca jniñu váha.

Jeē na cacán tahu i jehē de

3

¹ Te íyó inga jnúhun cánuú, hermano. Na cacán tahu rō jehē rī jijnáhan ri, návāha yachī cuitē núu jnúhun máá Jítóho yō, te cuatáhú váha ñayuu, nájnūhun ni cajetáhú máá ró.

² Te suni cacán tahu rō jeē na cácu ri nuū táca tée casáha neé jeē cátejnáhan jíin rí. Chí tú ndíhi tée cáccandíje jnúhun ya.

³ Te máá Jítóho yō chí váha squícu ya jeē ni jéjnūhun ya, te sáha ya jeē íje ni táca ró jíin jnúhun ya, te coto ya rohó núu jeneé.

⁴ Te cáccáhnu ni rī sáha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin.

⁵ Te ñúhun ni rī jeē maá Jítóho yō steén gā yā ndese coo manī gā rō jíin Yaā Dios nde jíin ini jíin ánuá rō, jíin

jeē cuándeýí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chí súcuan ni ndacu máá Jítóho yō Jesucristo, jeē na cújiyo ró núu táca hermano cájica cúxí te tu cájica váha de nájnūhun ni castéén rī nuū rō.

⁷ Chí je cájini rō ndese cánuú ndacu ró rúhū jijnáhan ri, chí tu ní cájica cúxí rí ná ni cahíyo ri jíin ró.

⁸ Ni tu ní cáyeji rī staā ni ñn ró súcuan-ni, chí ni cachunaa rī. Chí sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró.

⁹ Te vésú íyó derecho rī jeē cacán rī nuū rō nuú, te tu ní cájicān rī, chí súcuan ni casáha ri návāha cuu ri ñn ejemplo nuū rō ndese sáha ró jíjnáhan ró.

¹⁰ Chí ná ni coyūcu rí jíin ró, te ni candacu ri jniñu yáha nuū rō: Núu ndé ñn ñayuu tu cúní i sájniñu i, te suni ma cáji i núu súcuan.

¹¹ Chí ni canihīn rī jnúhun jeē cájica cúxí sava ró, te tu casájniñu ró, chí yāha yúcuan-ni sáha ró.

¹² Te cándacu ri jniñu nuū rohó jeē casáha súcuan, te cástíhví ni rī rohó jeē na cóo nayúú ró te sájniñu ró, návāha nihīn rō jeē cáji rō siquī jniñu sáha máá ró. Chí súcuan ndácu máá Jítóho yō Jesucristo jniñu.

¹³ Hermano, ma ndínuu ni rō jijnáhan ró sáha ró táca jniñu váha.

¹⁴ Te núu ndé ñn i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jíin i, návāha na cúcanu i te nacani ni i.

¹⁵ Te nasūu jéē cóto uhū rō i, chi sa cahán rō jíin i nájnūhun jíin ñani rō jeē na sájniñu vāha i.

Bendición jeē sándāhí

¹⁶ Te ñūhun ni rī jeē maá Jítóho yō, Yaā jeē jéhe jnūhun ndeyí sñ ni, níní na sáha ya jeē coo ndeyí coo sñ ni rō siquī tācá-ni, te coo ya jíin ró jijnáhan ró.

¹⁷ Ruhū Pablo, yāhá-ni cúu jeē tée ri jíin ndaha máá rí jeē cahán rī jeē sándeýí ni rō jijnáhan ró. Te súcuan jéhe ri firma nuū tāca carta rī, návāha cuni rō jeē carta maá rí cúu. Súcuan cáa letra rī.

¹⁸ Te ñūhun ni rī jeē maá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.

CARTA HN JEE NI TEE SAN PABLO APOSTOL NUU TIMOTEO

1 Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnúhun ya.

2 Te tée ri carta yáha cuájeē nuū rō Timoteo, chi cúu ndije ró nájnúhun sēhe ri siquī jeē ni scándije ri rohó. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jeē ma candije i tāca jnúhun stáhú

3 Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān ñihin ró jíin sava ñayuu yúcuan jeē ma stéén i inga jnúhun jeē tú ndaā.

4 Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnúhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnúhun cácdandije yó.

5 Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo íyó

ndáā anuá i, te cácdandije ndije i ya.

6 Te sava ñayuu chi ni cajúca yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu.

7 Chi cácuini i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén ñihin i.

8 Te jíiní yō jeē iyó váha ley un, te núu jecūhun ni yō ndese jéjníñu.

9 Chi cánuú sáha yó cuenta jeē tu ní jécōo ni ñin ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuéchi, jeē tu cáchiñúhún Yaā Dios ni tu cácdandije ley yā, jeē cájehni tatá jíin náná, jíin jéē cájehni ndíyi.

10 Te suni ni jecōo siquī ñáyuu cájica jnéni, jíin téé casáha ndíyi jíin jnáhan yí, jíin ñáyuu casácuíhná inga ñayuu, jíin ñáyuu castáhú, jíin ñáyuu cácahān ñihin jnúhun yáá. Te ni jecōo siquī tāca gá ñayuu jeē casáha jniñu tu quíjnahán jíin jnúhun ya jeē steén ndaā váha.

11 Te jnúhun ya un cúu jnúhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

Jeē nácuatáhú Pablo siquī jeē ní cundáhú ni yā de

12 Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu

ri, te ni tejníñu ya ruhū nácani ri jñuhun ya.

¹³ Te súcuan ni sáha ya jíin rí vésú ni cahān ndevāha ri siquī yā nde saá, te ni sáha ndevāha ri jíin ñáyuu cá candíje, te xeēn ni sáha ri. Te vésú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri.

¹⁴ Súcuan ni sáha Jitoho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnāhan ri siquī jeē ni quívi ri ndaha Cristo Jesús.

¹⁵ Te ndaā ndije cúu jñuhun yáha, te jeē cánuú candíje ndihī ñáyuu cúu: jeē ní quiji Cristo Jesús ini ñayīvi návāha jnama ya ñayuu iyó cuéchi. Te ruhū cúu tēe jeē vihyá gā ni sáha cuéchi.

¹⁶ Te ni cundáhú ni Yaā Dios ruhū, návāha jíin rúhū jeē vihyá gā ni sáha cuéchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñáyuu candíje ní cuáhān yō, návāha nihīn tahú i cotecu i ní cáni.

¹⁷ Núu súcuan te ní cáni na cáhān yíñúhún yó jeē yóhyo luu cújéhnu máá Yaā jeē cúu Rey siquī ndihī, jeē técu ní cáni, jeē tu náā cuiti. Te tu cúu coto yó núu yā vijna, te máá ñin-ni ya iyó, te ndíchí yá. Amén.

¹⁸ Nájñuhun sēhe ri cúu ró Timoteo, te jniñu yáha téjníñu ri rohó, jéē na ndúcú ndéyí ró siquī jniñu váha. Te na cándíje vāha ró, te na cóo ndaā anuá rō. Chi nde saá je ni cacahān

tācá hermano jíin jñuhun Yaā Dios jeē súcuan condiso jniñu ró.

¹⁹ Chi sava ñayuu tuá iyó ndāā anuá i nuū yā, te ni casnáā i jñuhun cá candíje i.

²⁰ Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jñundóho ún te cutūhva de jeē ma cáhān ndevāha ga de siquī Yaā Dios.

Siquī ndese cacān tahú yō

2

¹ Núu súcuan te xīhna gā ndácu ri jeē cacān tahú rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i.

² Te cacān tahú rō jehē tāca tēe cácujuhnu jíin jéē ndácu jniñu, návāha sáha de jeē cuu coyūcu váha yó te tú na jñundóho coo siquī yō, te cuu chiñúhún váha yó Yaā Dios te sáha yíñúhún yó jíin táca-ni.

³ Chi yáha cúu jeē váha jeē núnjahan ni Yaā Dios, Yaā jnama yóhó.

⁴ Chi máá yá cuni yā jnama ya tāca ñáyuu te cuni i ndese iyó jñuhun ndaā yā.

⁵ Chi iyó ñin-ni Yaā Dios, te suni iyó ñin-ni Yaā jeē cahān jíin Yaā Dios jehē ñáyuu. Te Yaā un cúu máá Jesucristo jeē ní nduu tēe.

⁶ Te ni socō yā maá yá ni jihī yā jeē ní chunaa yā cuéchi ndihī yó. Te ná ni quiji máá quívi ún, te ni quejéé ní canacani jñuhun ún.

⁷ Te jeē siquī yúcuan ní jeni ya ruhū cúu ri apóstol jeē nácani ri jnūhun ya, návāha stéén rī nuū ñáyuu tǎcá nacióon jeē tu jíni jnūhun ya, jeē na cándije i jnūhun ún te sáha i jniñu ndaā. Te siquī jeē candije ri Cristo te ndaā cúu jeē cahán rī.

⁸ Núu súcuan te cúni rī jeē ndihi-ni lugar na cácan tahú tǎca tée. Te na cóo ndoo ánuá de jeē ma quití ni de ni ma tejnáhan de.

⁹ Te suni súcuan tǎcá ñahan, na cási vāha ña máá ña nájñuhun cánuú, návāha ma cóo jnūhun canu. Te ma cóndihvī ni ña jeē sáha luu ndasí ña xinī ña, chí jeē cuhun ña siquī oro chí perla chí sahma váha ga.

¹⁰ Chi sa suhva na quéndōo luu ánuá ña jíni jniñu váha sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios.

¹¹ Te núu cáhīin ña jíni ñáyuu cascuáha jnūhun ya, te na cúni nahín ña te cuatáhú ña.

¹² Chi tu jéhe ri jnūhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúni nahín ña.

¹³ Chi xīhna gā Adán ni sáha ya, te saá te ni sáha ya Eva.

¹⁴ Te tu ní stáhú jexeén Adán, chi sa suhva ni stáhú un ñasihí de, te ni sáha ña cuēchi.

¹⁵ Te jeē scácu tǎcá ña sēhe te coo vāha ña, te núu na quéndōo ña jíni jnūhun cándije ña ya, jíni jeē cundáhú ni ña jnáhan ña, jíni jeē cóo ndoo

ánuá ña, jíni jeē sáha yíñuhún ña.

Ndese cánuú coo tēe cándiso jniñu nuū ñáyuu cácandije

3

¹ Ndaā cúu jnūhun yáha: Núu ñin tēe cúni de condiso jniñu de condito de ñáyuu cácandije, te vāha jniñu ndúcú de sáha de.

² Núu súcuan te tēe ndíso jniñu nuū ñáyuu cácandije, cánuú jeē ma cóo ni ñin jeē nihín ñáyuu cuēchi siquī de. Te na cóo ñin-ni ñasihí de, te cáji coo ni de, te ndito coo xinī de, te sáha yíñuhún de. Te cánuú jeē niní cuanúu de vehe nuū ñáyuu cájica, te níní stéén vāha de jnūhun ya.

³ Te ma cúu de tēe nájīni, te ma tejnáhan de, te ma ndíyo ni de xūhún. Chi sa suhva coo vāha ni de, te coo vītá ni de, te ma cutóo ni de siquī xūhun.

⁴ Te cánuú jeē na ndácu vāha de jniñu ini vehe de, te sáha de jeē squícu vāha sēhe de te coo yíñuhún i nuū de.

⁵ Chi núu ñin tēe tu jíni de ndacu vāha de jniñu ini vehe de, ¿te ndese cuu condiso jniñu de nuū ñáyuu cácandije nuū Yaā Dios?

⁶ Núu súcuan te tēe ndíso jniñu nuū ñáyuu cácandije, ma cúu de tēe jeē saá ní candije, chí núu súcuan te sanaa te sándúxí de máá de, te inuú-ni cuēchi jecondee siquī de jíni jexeén.

⁷ Te cánuú cuu de tēe jeē suni nde ñáyuu tu cácandije, cuajnúhún i de, návāha ma nihín i cuēchi siquī de, te ma cúndeyí jexeén jíni de.

Ndese cánuú coo tēe cájejniñu mēhñu ñáyuu cá candíje

⁸ Te suni súcuan tēe cájejniñu mēhñu ñáyuu cá candíje, cánuú jēē na cóo yíñuhún de, te na squícu de jíin jnúhun cáhán de. Te ma cóo de tēe nájini, te ni ma ndíyo ni de xúhún.

⁹ Te na cuñi nihin de jíin jnúhun cándíje yó jēē ní yisáhi ndé jenahán, te na cóo ndoo anuá de.

¹⁰ Te cánuú jēē xíhna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cá candíje.

¹¹ Te suni súcuan ñasihí de jíjnáhan ña, cánuú coo yíñuhún ña, te ma sajnúhún ña, te cáji coo ni ña, te squícu vāha ña tācá-ni jniñu.

¹² Te tēe cájejniñu mēhñu ñáyuu cá candíje, na cóo in-ni ñasihí de, te na ndácu vāha de jniñu nuū sēhe de jíin núu ñáyuu vehe de.

¹³ Chi tāca tēe cájejniñu vāha mēhñu ñáyuu cá candíje, chi vāha quéndōo yíñuhún de, te níhin de modo jeē cají gá nácani de jnúhun Cristo Jesús jeē cá candíje yó.

Jnúhun sāhi yá jeē cá candíje yó

¹⁴ Te vēsú ñuhun ni rī cuajeē yachī rī coto jnáhan yó, te tēe ri jnúhun yáha cuájeē nuū rō,

¹⁵ návāha núu cucuéé rí, te je jíni rō ndese cánuú sáha vāha ñáyuu cácuu sēhe Yāa Dios. Chi máa i cácuu ñáyuu cá candíje nuū Yāa Dios, Yāa tēcu. Te máa i cásáha jeē iyó

cutú jnúhun ndaā, chi cáhīn nihin i jíin.

¹⁶ Te jendaá ndije chi jéhnú ndasí cóo jnúhun yáha jeē cá candíje yó, jeē ní yisáhi ndé jenahán:

Yāa Dios ni steén yā maá yá, chi ni nduu ya tēe,

te Espíritu ni steén jeē iyó ndáa jniñu ni sáha ya,

te tācá ndajéhé andiví ní cajito jniñu ní sáha ya.

Te ni jitē núu jnúhun ya nuū ñáyuu tācá nación,

te ni cacandíje ñáyuu ní ñáyiví núu yā,

te ni ndaa ya cuanuhun yā andiví.

Siquí ñáyuu cájica yátá nuū jnúhun cá candíje yó

4

¹ Te cáji steén Espíritu Yāa Dios jeē quiví cuándihí te coo sava ñáyuu caca yátá i nuū jnúhun cá candíje yó. Te cuatáhú i tāca jēē cácahān jnúhun stáhú jíin jnúhun ní castéén tachí.

² Chi cuni nahín i jnúhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de.

³ Te cahān de jeē cuēchi cóo jeē coo ñasihí tēe, te suni súcuan núu cají ñáyuu sava ndeyu. Te ndeyu ún chi ni sáha Yāa Dios jeē cóo ñáyuu cá candíje jeē jíini jnúhun ndaā, návāha cají i te nacuatáhú i nuū yā.

⁴ Chi ndihí jeē ni sáha Yāa Dios, iyó vāha, te ma squexícó

yō ni ñn, chi sa nacuatáhu yó te caji yō.

⁵ Chi jíin jéē cáhu yó jnúhun Yaā Dios jíin jéē nácuatáhu yó nuū yā, te íyó ndoo ndihí-ni.

Tēe jéjníñu vāha nuū Jesu-cristo

⁶ Te núu stéén rō jnúhun yáha núu tācá hermano, núu súcuan te cuu ró tēe jéjníñu vāha nuū Jesucristo, te íje ró jíin jnúhun vāha ya jeē candíje ró, chi ni cutúhva ró te ndíquín rō.

⁷ Te ma quívi nduu rō jíin táca jnúhun jeē cúu cuento-ni jeē cájени cāhá ni ñayuu. Chi níni na scuáha ró ndese chíñúhún vāha ró Yaā Dios.

⁸ Chi jeē scuáha yó ejercicio jeē cóo ndacuī yiqui cúñu yō, jecu-ni níhín jníñu. Te jeē scuáha yó chíñúhún vāha yó yá, suu yúcuan cúu jeē vāha níhín jníñu siquī tācá-ni, jeē cúu vida yáha jíin vida quiji.

⁹ Te ndaā ndije cúu jnúhun yáha, te jeē cánuú candíje ndihí ñayuu cúu.

¹⁰ Te jeē siquī yáha cúu jeē sájniñu níhin yó siquī jnúhun ya te ndóho yó jéē cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñayuu, te ñayuu cácaandíje jnúhun cúndáhu ni yā i, máá i cúu jeē jnáma ya.

¹¹ Tāca jnúhun yáha cánuú jeē ndacu ró núu i te stéén rō.

¹² Ma cuáha ro jnúhun jeē kujéē ni ni ñn i nuū rō siquī jeē suchí ró. Chi sa coo ró ñn ejemplo nuū ñayuu cácaandíje, jeē cúni i ndese vāha cáhán rō, ndese vāha sáha ró, ndese

cúndáhu ni rō jnáhan ró, ndese cándíje ró, ndese íyó ndoo ánuá rō.

¹³ Te níni ndé ná tu jinū rī nuū rō, te condihvī ni rō jeē cáhu ró tutu īi nuū hermano cándutútú, jíin jéē stihví ni rō i, jíin jéē steén rō nuū i.

¹⁴ Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi tāca tēe jéhnu cándiso jníñu nuū ñayuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jníñu ró.

¹⁵ Núu súcuan te cocuu ró jíin táca jníñu yáha, te condihvī ni rō jíin, návāha cuni táca ñayuu jeē vāha íje ró cuáhān rō jíin.

¹⁶ Coo cuidado rō jeē caca ndaā rō jíin jéē steén vāha ró jnúhun ya, te cuiñi níhin ró jíin ndihí. Chi núu súcuan sáha ró te quendōo vāha ánuá maá ró jíin ñayuu chuhun ni jnúhun cáhán rō.

Ndese sáha vāha yó jíin ñayuu cácaandíje

5

¹ Ma cúxeēn rō nuū tāca tēe jéhnu, chi sa cahān vāha ró jíin de jeē ma stívi de, nájnūhun cáhán rō jíin tátá rō. Te tāca tēe suchí, suni cahān vāha ró jíin de nájnūhun jíin ñani rō.

² Te suni súcuan cahān rō jíin táca ñahan jéhnu, nájnūhun jíin náná rō. Te suni súcuan jíin táca ñahan suchí, nájnūhun jíin cuáha ró, te yíñúhún nda-jnúhun ró jíin ña.

³ Te ñayuu cácaandíje na cuáha i jeē jíni ñúhún ñahan ni caquendōo ndáhu, te núu ni

quendō ndáhú ndije ña jeē tú na ñayuu condito ña.

4 Chi ñin ñahan ní quendō ndáhú, núu iyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xihna gā nuū ñáyuu vehe i squícu i coto i. Te na nácoto i náná i tátá i siquī jeē ní cacondito ña i. Chi yāha cúu jniñu váha jeē núnahan ni Yaā Dios.

5 Te ñin ñahan ní quendō ndáhú ndije jeē máá ñin na ña, ñúhun ni ña jeē máá Yaā Dios condito ya ña, te tu jécuiñi ña jeē jicán tahu ña nduú ñuú.

6 Te sa suhva núu máni ndíhvī ni ña siquī tāca jéē cúsiñi ni maá-ni ña, yūcuán na te vēsú técu ña, te nájñūhun je ni jihī ña.

7 Jniñu yāha ndacu ró núu ñáyuu, návāha ma cóo cuēchi siquī i.

8 Te núu ñin ñayuu tu ndíto i jnāhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnāhan jíin jnúhun cándíje yó, te cúu i ñin jeē neé gá vēsú ñáyuu tu cácañíje.

9 Te ñahan viuda cuu quívi síhvī ña nuū lista ñayuu jeē cáchindéé ñáhán ró jíin xúhun, te núu je ni jínu ña unī xico cuiyā, te núu ni íyo ñin-ni yii ña.

10 Te suni cánuú jéē cua-jnúhún ñáyuu ña jeē váha jniñu ni sáha ña, núu jeē ni scuéhnu vāha ña séhe ña, jíin jéē ní jēhe núu ña vehe nuū ñáyuu cájica, jíin jéē ní jejniñu ña nuū hermano cácañíje, jíin jéē ní chindéé ñáhán ña

ñayuu cándoho jñúndóho, jíin jéē ni sáha ña tāca gá jniñu váha.

11 Te tācá ñahan viuda jeē iyó suchí gá, chi ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndíhvī ni ña siquī Cristo, chi cuu ni ña condeca tucu ña tēe.

12 Te súcuan jecondee cuēchi siquī ña, chi tu ní squícu ña jeē ní jéjnūhun ña ná ni jecosó síhvī ña nuū lista.

13 Te suni caca cuu ña tācá-ni vehe te quee cúxí ña. Te nasūu máni jeē cáca cúxí ña, chi suni siquī jeē sajnúhún ña, te quívi nduu ña cahān ña jñūhun jeē tu iyó váha jeē cahán ña.

14 Jeē yúcuan cúní rī jeē tācá ñahan viuda jeē iyó suchí, na nándāha ña, te scuéhnu ña séhe, te coto vāha ña vehe ña, návāha ñayuu cácuu contra ma cúu cahān i siquī ña.

15 Chi sava ñahan viuda je ni cajica yátá ña te sáha ña jniñu jeē cuní Satanás.

16 Te núu ñin tēe chí ñin ñahan cándíje, núu iyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácañíje, návāha cuu cuāha vāha i nuū ñahan viuda jeē tu ndé ñin coto ña.

17 Te tāca tēe jéhnu cándito ñayuu cácañíje, na jécunaā doble yāhu de, te núu cándíhvī ni de cástéén de cánacani vāha de jñūhun ya.

18 Chi cúu nájñūhun cáhán tutu ii: Ma cánda siquī caxīn tī trigo, núu ma cuāha ró jéē cáji tī. Te suni cáhán: Tēe

jeē sájniñu tátú, jíni ñúhún quiyāhu de, áchí.

19 Ma cuajnúhún ró te núu jéquin ñayuu cuēchi siquī ñn tēe jéhu cándito ñayuu cácañdije te núu tu íyó úu chí únī testigo.

20 Te núu cásáha ñayuu cuēchi, te cánuú cuxeēn rō nuū i, jíto jínúu ndihi ñayuu, návāha na cónso íyo sava ga i.

21 Te cáhán ñihin ri jíin ró, jíto máa Yaā Dios jíin Jítoho yō Jesucristo jíin táca ndajéhe yā jeē ní nacāji ya: Squícu vāha ró jniñu yáha, te ma sáha ró cuenta ndese cúu ñn ñn i, chí ñnuú-ni sándaā rō siquī ndihi-ni i.

22 Ma cáni yachī rō ñn tēe jeē condiso jniñu de nuū ñáyuu cácañdije, chí xīhna gā coto ndee rō de. Chí sanaa te stívi de, te cuēchi de suni condee siquī rō jíin de. Te coto ró máa ró jeē ma quívi ró jíin jniñu néé.

23 Te siquī jeē núu-ni núu-ni cúhú chíji ró, te ma cóho ga rō máni ndute, chí suni coho ró jecu vino.

24 Cuēchi sava ñayuu chí je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natū nahín.

25 Te suni súcuan táca jniñu váha, chí íyó ndijin. Te vēsú ná tu natūu jniñu váha ún, te ma cúu quisāhi ñí cáni, chí natūu nahín.

6

1 Táca ñáyuu cácuu mozo, na cóo yíñúhún váha i nuū patrón i, návāha ma cahán neé

ñayuu siquī Yaā Dios jíin siquī jnūhun ya jeē castéén yō.

2 Te mozo jeē yíhi nuū patrón cácañdije, ma cáni ni i jeē cúhva-ni sáha yíñúhún i nuū de siquī jeē hermano cácañdije cácuu de. Chí sa cuajníñu vāha ga i nuū de, chí tēe cácañdije tēe manī i jíin cúu táca tēe un jéē sájniñu i nuū. Jnūhun yáha stéén rō te stíhvi ní rō i.

Siquī jeē chíñúhún váha yó yá te cusī ni yō jíin cúhva jeē névāha-ni yó

3 Te núu ndé tēe stéén de jnūhun tú ndaā jeē tu quíjnáhan jíin jnūhun vāha ndaā máa Jítoho yō Jesucristo, jíin jnūhun ni steén Yaā Dios jeē cácañdije yó,

4 núu súcuan te máni tēe ndúxí tēe tu jécūhun cuítí ni cúu de. Chí cánéé xíní de, chí máni cúní de tejnáhan de siquī táca jnūhun stéén de. Te táca un sáha jeē cácuuésún ni, jíin jéē cátejnáhan, jíin jéē cácahān ndevāha, jíin jéē cájeni néé ni siquī jnáhan,

5 jíin jéē máni cástáhān jnáhan. Súcuan cásáha tēe jeē ní ndunéé xíní, jeē tu cájini jnūhun ndaā. Te cájeni ni de jeē nihín de cuehē xūhun siquī jnūhun cácañdije de stéén de. Na cújiyo ró núu ñáyuu cándaā súcuan.

6 Te jendaá jeē yóhoyo vāha quéndōo yó te núu chíñúhún váha yó yá, te núu cúsi ni yō jíin cúhva jeē névāha-ni yó.

7 Chí tú na vé ni cácu yó jíin ñayívi yáha, ní tú na vé condiso yó quíhñ yō jíin núu na cúu yō.

⁸ Te núu íyó jéē cáji yō jeē cusúcún yó, te na cúsī ni yō jíin yúcuan-ni.

⁹ Chi ñayuu jeē cuní cucúca, chi yachī quívi i cuēchi jeē jito ndee jexeén i. Te quívi i jíin cuéhē jniñu cánéé jniñu stívi jéē ndíyo ni i. Te tāca un sáha jeē tívi ñáyuu te jnahnū ndetū i.

¹⁰ Chi jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cáca ndíje i, te ni canihīn i cuehē ndasí jnúndóho.

Jeē na ndúcú ndéyí yó siquī jnúhun cándíje yó

¹¹ Te róhó chi tēe jéjníñu nuū Yaā Dios cúu ró, te cunu ró coto ró táca cuéchi yáha. Te condiquīn rō jniñu ndaā, te chiñúhún váha ró Yaā Dios, te candíje vāha ró, te cundáhú ni rō jnáhan ró, te cuandeyí ni rō, te coo víta ni rō.

¹² Te nducú ndéyí ró siquī jnúhun cándíje yó yá. Te cuiñi nīhin ró jíin jnúhun jeē ni níhīn tahu yō cotecu yō ní cáni. Chi jeē yúcuan cúu jeē ní cana ya rohó, te cáji ní cahān rō jeē vāha cándíje ró yá, jito jínúu cuehē ñayuu.

¹³ Te cáhán nīhin ri jíin ró, jito máa Yaā Dios, Yaā jeē sáha jeē técu tāca-ni, jíin Jesucristo, Yaā jeē cají ní cahān yā ni nacani ya jnūhun vāha nuū Ponceo Pilato.

¹⁴ Squícu vāha ró jniñu ndácu ya nuū rō, te ma stívi ró sáha ró, návāha ma cahān ñayuu cuéchi siquī rō. Te

súcuan sáha ró ní ndé quívi ndíji Jitoho yō Jesucristo.

¹⁵ Chi quíji ndijin yā maá quívi jeē ní jeni Yaā Dios. Te Yaā Dios chi máa ĩn-ni ya cúu Yaā yōhyo ndetū, te jnái ya ndíhi poder. Te cúu ya Rey nuū táca rey, jíin Jitoho nuū táca jítoho.

¹⁶ Te máñúhún-ni ya cúu jeē iyó ní cáni. Te ndéé yá ĩn luga nuū ndíi ndaxín, nuū ma cúu quívi yó. Te ni ĩn ñayuu ñayívi yáha tu ní jito cuiñi i nuū yā, te ni ma cúu coto i nuū yā. Te ní cáni na cóo yíñúhún yó nuū yā, chi jnái máa yá poder ní cáni. Amén.

¹⁷ Te cahān rō jíin ñáyuu cucá ndajníñu ñayívi yáha, jéē ma cúndúxí i. Te ma ténuū i xūhún i, chi yachī naa ún. Chi sa suhva na ténuū i jeē coo vāha i sáha Yaā Dios, Yaā técu, chi máa yá jéhe cuehē yā tāca-ni jeē cúsī ni yō jíin.

¹⁸ Te ndacu ró jniñu nuū i jeē na sáha vāha i, chi jeē sacúca ndije i máa i cúu jeē sáha i tāca jniñu vāha. Te na cúu i ñayuu vāha ni jeē cuáha i jeē cúu jnáhan i.

¹⁹ Te súcuan caya i cuehē jniñu vāha jeē coo cúca i nuū yā ní tiempo jeē quíji. Te nihīn tahu i cotecu i ní cáni.

Jniñu sándīhi ndácu Pablo nuū Timoteo

²⁰ Te róhó Timoteo, condito ró táca jniñu ní chíhi ya ndaha ró. Te ma quívi nduu rō jíin táca jnúhun cáhá-ni, cuenta ñayívi yáha, jíin táca jnúhun stáhú jéē cácahān i jeē jnúhun ndíchí ndaā cúu.

²¹ Chi sava ñayuu cándiquīn
tāca jnúhun yáha, ni cajica
yátá i ni castóo i jnúhun
cácañdije i ya.

Te ñúhun ni rī jeē Yaā Dios
na sáha ga yā jeē váha róhó.
Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nuj-nahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús.

² Te tée ri carta yáha cuájeē nuū rō Timoteo, chi cúu ro nájñūhun sēhe ri jeē maní rī jín. Te ñūhun ni rī jeē Tatá yō Yaā Dios jín Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīi ni rō.

Jeē nácani de jnūhun Cristo

³ Níní tu náā ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejníñu ri, nájñūhun ni casáha tāca jí rī, te íyó ndoo ánuá rī nuū yā.

⁴ Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusīi ndasí ni rī.

⁵ Te núcūhun ni rī jeē váha ndije cándíje rō Cristo, nájñūhun ni candíje náná jéhnu rō Loida, jín náná rō Eunice xīhna gā. Te cúcáhnu ni rī jeē suni súcuan cándíje máá rō vijna.

⁶ Te jeē yúcuan nástíhví ni rī rohó jéē na cóndihví gā ni rō jín táhū jeē ni jéhe Yaā Dios

nuū rō jeē nácani rō jnūhun ya. Te tahū un ní nihīn rō ná ni tee ri ndaha ri xinī rō.

⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jín jéē cundáhú ni yō jnáhan yó, jín jéē ndíto íyó xinī yō.

⁸ Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquī jnūhun ya. Chi sa cuāha rō jnūhun ndoho rō jín rí siquī jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō.

⁹ Chi ni jnama ya yohó, te ni cana ya yohó jéē coo ndoo ánuá yō cuajníñu yó núu yā. Te tu ní cána ya yohó siquí jeē váha ni sáha yó, chi siquí jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó.

¹⁰ Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snāa yā poder cuehyí jéhni yóhó, chi jín jnūhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyuu tāca nación jeē tu jíní jnūhun ya.

¹² Te siquí un cúu jeē ndóho ri tāca jnúndóho yáha íne ri

vecāa. Te tu cúcanu rī, chi jíní rī ndese Yaā cúu Yaā candíje ri, te cúcáhnú ni rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

13 Te cuiñi nihin ró jín táca jnúhun ya jeē steén ndaā, suu jnúhun jeē ni steén rī nuū rō. Te caca ró jín jnúhun cándíje yó, te cundáhú ni rō jnáhan ró siquī jeē yíhi ró ndaha Cristo Jesús.

14 Te condito ró táca jniñu váha jeē ní chihi ya ndaha ró, sáha poder maá Espiritu Santo jeē ndeé ini yō.

15 Je jíní rō jeē táca ñáyuu cáyūcu Asia ni castóo i ruhū. Te uū i cúu Figelo jín Hermógenes.

16 Te jícán tahu rī jeē cundáhú ni Jitoho yō ñáyuu vehe Onesíforo, chi cuehē jínu ni nanihín ni rī ni sáha de, te tu ní cúcanu de siquī rī jeē ní ine ri vecāa.

17 Chi sa suhva ná ni quiji de ñuu Roma, te ni nanducú yúcún de ruhū nde ni nanihín de ruhū.

18 Te jícán tahu rī jeē maá Jitoho yō cundáhú ni yā de quivī ndíji ya. Te je jíní váha maá ró ndese yōhoyo ni chindéé ñáhán de ruhū ná ni cahíyo ri ñuu Efeso.

Jeē cúu yó nájnūhun soldado váha nuū Jesucristo

2

1 Núu súcuan te rōhó, séhé mání, na cóo fuerza ni rō siquī jeē yíhi ró ndaha Cristo Jesús te sáha ya jeē váha rōhó.

2 Te táca jnúhun jeē ní jini ró ní cahán rī, jito jínúū ñáyuu cuehē, jnúhun ún na nástéén rō nuū tēe cásquícu váha, návāha suni çuu stéén tucu máá de nuū sáva ga i.

3 Te rōhó na cuándeýi ni rō coto ró jnúndóho, chi cúu ró nájnūhun ñn soldado váha nuū Jesucristo.

4 Ni ñn soldado jeē ñin nuū guerra, tu sájnēñu de máá de jín jniñu máá de, chi cánuú jeē sáha de máni máá jéé ndácu tēe ní tejniñu de.

5 Te suni súcuan tēe cásiquí deporte, ma nihín de premio te núu tú condihvī ni de cosíquí váha de máá modo chíjniñu.

6 Te tēe sájniñu nihin ñuhun, máá de cúu jeē nihín xīhna gā jeē cuáha itu.

7 Nacani ni rō siquī jeē cahán rī, te máá Jitoho yō sáha ya jeē jécūhun ni rō siquī ndíhi.

8 Te cocuhun ndasí ni rō Jesucristo, Yaā ní quiji yucún rey David, te ni natecu yā mēhñu ndíyí, nájnūhun cáhán jnúhun jnáma ya yohó jéé nácani ri.

9 Te jeē siquí jnúhun un ndóho ri jnúndóho, te nde ni cajihni i ruhū íne ri vecāa nájnūhun ñn tēe ni sáha cuēchi xeēn. Te jnúhun Yaā Dios chi ma cúu cuhni i jeē ma cuité núu.

10 Núu súcuan te jéndeýi ni rī jito ri táca jnúndóho yáha síquí jeē cundáhú ni rī ñáyuu jeē ní nacāji ya, návāha suni cácu máá i jeē quivī i ndaha Cristo

Jesús, te quihīn i nuū cujéhnū
i níí cáni.

¹¹ Chi ndaā cahán jnūhun
yáha:

Núu vēsú na cúu yō jeē siquí
yā, te suni cotecu yō
jín yá,

¹² te núu cuandeyí ni yō
ndoho yó, te suni
ndacu yó jniñu jín yá.

Te núu ma cuajnúhún yó yā,
te suni ma cuajnúhún
yá yohó.

¹³ Te vēsú tu squícu vāha yó, te
máá yá chi máni squícu
ya,

chi tu cúu sáfalta yā, chi squícu
ya jeē ni cáhān yā.

*Tēe sájniñu squícu vāha jín
jnūhun ya*

¹⁴ Jnūhun yáha na násthvī
ni rō ñayuu, te cahán nihin ro
jín i, jító máá Jítóho yō, jeē
ma téjnahān i siquī tāca jnūhun
sáa-ni. Chi tu ndé jéjníñu
cuiti, chi sa stívī ñayuu jini
sōho.

¹⁵ Te nducú ndeyí ró jeē
cuajnúhún Yaā Dios rohó, jéē
cúu ró tēe sájniñu squícu vāha
jín jnūhun ya, návāha ma
cúcanu rō nuū yā siquī ní in,
chi vāha nacani ró jnūhun
ndaā yā.

¹⁶ Te ma quívi nduu ró jín
tāca jnūhun sáa-ni ñayívi yáha,
chi suu sáha jeē ndúcuehē
gā jniñu néé quívicoo ñayuu
cácahān.

¹⁷ Te tāca jnūhun cástéén i
chi cúu nájnūhun in ndíhyi
xeēn jeē sacáhú gá cuahān. Te
Himeneo jín Fileto cúu uū tēe
jeē casáha súcuan.

¹⁸ Chi tēe un ní cajica
yátá de nuū jnūhun ndaā, te

cácahān de jeē jé ni cuu ni
canatecu ndíyi. Te súcuan
cásaca nuu de xinī sava ñayuu
cácahān.

¹⁹ Te Yaā Dios ni jeni ya
ñayuu maá yá, te íyó cutú ndáā
i jeē ma cáca yátá i, nájnūhun
yósó núu tútu i: Je jíní Ji-
toho yō Yaā Dios tāca ñayuu
jeē yíhi ndaha máá yá. Te
suni cáhān: Tāca ñayuu jeē
ndácunehen síhvī Cristo, na
cújiyo i nuū jniñu néé, áchí.

²⁰ Te ini in vehe cáhnu íyó
cuéhē cohō, nasūu máni cohō
oro cohō plata, chi suni cohō
yujnu cohō ñuhun. Te íyó jéē
fino te íyó jéē corriente.

²¹ Te núu in ñayuu sándoo i
máá i jeē quénda i nuū tāca
jniñu néé, te cuu i nájnūhun
in cohō fino. Te coo ndoo
coo i i nuū Jítóho yō, te nihīn
jniñu i ndese cúní maá yá. Te
coo tūhva i jeē sáha i tāca jniñu
vāha.

²² Núu súcuan te cunu ró
coto ró tāca jéē tú vāha jeē
cándiyo ni tēe suchí. Te
condiquīn rō jniñu ndaā,
jín jnūhun cándíje ró yá,
jín jnūhun cúndáhú ni, jín
jnūhun coyūcu mání jín
jnāhan. Te súcuan sáha ró ndé
jín táca ñayuu ndoo ánuá jeē
ndácunehen síhvī máá Jítóho
yō.

²³ Te ma quívi nduu ró jín
tāca jnūhun cánéé lí jeē tu íyó
cájí, chi je jíní rō jeē sáha jeē
tejnahān ñayuu.

²⁴ Te mozo maá Jítóho yō,
tú vāha jeē tejnahān de, chi sa
suhva cánuú jéē coo vāha ni
de jín táca ñayuu. Te coo vāha

ni de stéén de, te cuandeyí ni de jíin i.

²⁵ Te jíin jéē víta ni de te cani ichí de ñayuu nīhni ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā.

²⁶ Te nducájí ni i te cācu i nuū jexeén jeē ní jñi ún i, chi ni cundeyí jíin i jeē sáha i jeē cuní maá.

Siquī ndese coo ñayuu sáha neé quivī cuándihi

3

¹ Te suni na jécūhun ni rō jeē quivī cuándihi te quee quivī coo jnūndóho.

² Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquī Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios.

³ Te ma cóo manī i jíin jnáhan i ni ma cundáhú ni i. Te sájnúhún i, te ma cúu casi i tāca jéē ndíyo neé ni i, te yōhyo xeēn coo i, te quití ni i coto i tācá jniñu váha.

⁴ Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quivī i nuū Yaā Dios.

⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quivī nduu rō jíin ñayuu casáha súcuan.

⁶ Chi sava tēe ún quivī de vehe te stáhú de tācá ñahan cánéé jéē iyó ndasí cuēchi. Te yachí quivīcoo ña jíin tāca

jnúhun tú ndaā jeē cúsi ni ña jíin.

⁷ Te vēsú niní scuáha ña na-ni jnúhun, te tu cúu cuiti jecūhun ni ña jnúhun ndaā yā.

⁸ Te nájñūhun ni casáha tēe tási Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūní de, chi ma candíje ndije de jnúhun cándíje yó.

⁹ Te ma quée jniñu sáha de, chi cuni tāca ñayuu jeē tēe cánéé xíní cácuu de, nájñūhun ni cajini ñayuu jeē ni íyo neé xíní ndíndúú tēe jeē ní nducú casi nuū Moisés.

Jniñu sándihi ndácu Pablo nuū Timoteo

¹⁰ Te róhó chi je ni cutūhva vāha ró ndese stéén rī, ndese jíca ndaā rī, ndese tēe ni rī sáha ri, ndese cándíje ri yā, ndese nee ri paciencia, ndese cundáhú ni rī jnáhan ri, jíin ndese jéndeýí ni rī.

¹¹ Chi ni cajito xeēn ñayuu ruhū, te ni ndoho ri jnūndóho. Te jíin rō tāca jéē ní ndoho ri ñuu Antioquía, ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítoho yō ni jnama ya ruhū nuū ndihi ún.

¹² Chi ndaā cúu jeē tāca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i.

¹³ Te ñayuu casáha jniñu neé jíin ñayuu castáhú, chi sa víhyá gā cocuu i jíin jniñu neé, chi stáhú i ñayuu, te suni cándíje máá i jnúhun stáhú.

14 Te róhó chí sa cuiñi nihin ró jíin jéé ní cutühva ró jíin jéé ní cucáhnú vāha ni rō. Chí jíiní rō ndese ñayuu cúu jeé ní castéén nuū rō.

15 Chí nde ná lulí ró, te je jíiní rō ndese cáhán tutu íi jeé steén nuū rō ndese candíje ró jeé ni jíihí Cristo Jesús jehē rō návāha cācu ró.

16 Te hí tutu íi cúu jnūhun jeé ni cáhān Yaā Dios, te vāha níhín jniñu jeé steén nuū yō, jeé cahán nuū yō, jeé náchuhun ichí yóhó, jíin jéé scuéhnu yóhó jíin jniñu ndaā,

17 návāha tēe cájejniñu nuū Yaā Dios, ije ni de te coo tūhva vāha de sáha de tācá jniñu vāha.

4

1 Te cáhán rī jíin ró, jíto Yaā Dios jíin Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jíin ñayuu ní cajihí.

2 Cáhán nihin ri jeé na nácani ró jnūhun ya, te stáhví ni rō i candíje i. Te níni sáha ró súcuan núu núne i chí vēsú tu núne i. Te sáha ró jéé na jécūhun ni i, te cahān rō nuū i, te caní ichí vāha ró i, te jíin cuéhē paciencia steén rō nuū i.

3 Chí quee tiempo jeé ma cuájnuhún cuítí ñayuu jnūhun ya jeé steén ndaā vāha, chí sa cuájnuhún i jnūhun cúsií ni maá i, te nducú i cuehē maestro jeé steén nuū i máni jnūhun jeé nújnahan ni i cuni nahín i.

4 Te cujiyo i nuū jnūhun ndaā, te condíhví ni i tāca jnūhun jeé maá cuento-ni cúu.

5 Te róhó chí níni coo ndito ni rō, te cuandeyí ni rō jíin jnúndóho, te condíhví ni rō nacani ró jnúhun jnáma ya yohó, te squícu vāha ró jíin jniñu ya jeé sáha ró.

6 Te ruhū chí je ni socō rī maá rí jeé cúu rī, te je cuacuyajni quíhví cuu rī.

7 Te je ni cundeyí rí jeé ní nducú ndeyí rí síquí jniñu vāha, te je ni jínu ni jica rí ñayíhví yáha, te tu ní siáá rī jnūhun cándíje ri yā.

8 Te vijna je íyó tūhva premio jeé nihín rī síquí jeé ní jica ndaā rī. Chí jítoho yō cuāha ya un núu rī maá quíhví sándaā yā jniñu, chí maá yá cúu juez ndaā. Te nasūu núu maá íin ruhū cuāha ya, chí suni cuāha ya nuū tāca ñayuu jeé cúu ni i jeé ndíji ya chí maní i jíin yá.

Jeé cána Pablo quiji Timoteo nuū de

9 Nducú ndeyí ró quiji yachí rō nuū rī.

10 Chí Demas ni stóo de ruhū, chí ndíyo ni de ndajniñu ñayíhví yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia.

11 Te maá íin na Lucas íne jíin rí. Te jeé quíji ró, te condeca ró Marcos quiji ró jíin de, chí vāha cuajniñu de jeé chindéé ñáhán de ruhū jíin jniñu ya.

12 Tíquico ni tají rí de cuahān de ñuu Efeso.

13 Te jeé quíji ró, te condaha ró cotón jeé ni stóo rí vehe Carpo ñuu Troas. Te suni condaha ró tāca libro, te jeé

cánuú gá cúu tǎcá tutu ní tee máá rí.

¹⁴ Alejandro, tēe cúu herero, yōh̄yo xeēn ni sáha de jíin rí. Te máá Jítóho yō cuāha ya yāhu de jeē súcuan ní sáha de.

¹⁵ Te condito ró máá ró nuū de, chí yōh̄yo ni cuu de contra siquī jnūhun cástéén yó.

¹⁶ Te ná ni ine ri jeē xíhna ñúhún núu tǎca tóhō, te tú ni ñn tēe ní índichi jíin rí, chí ndih̄i de ni castóo de ruhū. Te ñúhún ni rī jeē Yaā Dios cone cáhnu ni yā nuū de.

¹⁷ Te vēsú súcuan te máá Jítóho yō ni chindéé ñáhán yá ruhū, te ni jēhe ya fuerza ini rī, te súcuan ni sínu rí ni nacani ndih̄i ri jnūhun jnáma ya yohó, ni cajini nahín ñáyuu tǎcá nación tu jíin jnūhun ya. Súcuan ni jnama Jítóho yō ruhū nuū tǎca tēe xeēn.

¹⁸ Te jnama ga yā ruhū nuū tǎcá jniñu néé, te condito ya ruhū nde quiv̄i ri andiv̄i núu ndácu ya jniñu. Te na cáhán yō jeē yóh̄yo luu cújéhnu ya ní cáni. Amén.

Saludo jíin bendición jeē sándih̄í

¹⁹ Te cahān rō jeē sándeyí ni Prisca jíin Aquila, jíin ñáyuu vehe Onesíforo, achí rí.

²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de.

²¹ Te condihv̄i ni rō quiji ró nde ná tu quejéé vico míjin. Sándeyí ni rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhún ni rī jeē maá Jítóho yō Jesucristo na cóo ya

jíin ró, te Yaā Dios sáha ga yā jeē váha róhó jíinahan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó,

² te cocuhun ni i jeē cótecu i ní cáni. Chi nde ná tu jecōo ñayiví te ni jejnūhun Yaā Dios jeē cótecu yō, te íyó ndáā jnūhun ni cahān yā.

³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya.

⁴ Te tée ri carta yáha cuájeē nuū rō Tito, chi nájñūhun sēhe ri cúu ndije ró síquī jeē ínuú-ni cándíje yó yá. Te ñūhun ni rī jeē Tatá yō Yaā Dios jíin Jítoho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní ró táca tée jéñu condito ñayuu cáncandíje táca ñuu, nájñūhun ni ndacu ri jniñu nuū rō.

⁶ Te tée jéñu un cánuú jeē ma cóo ni ñn jeē nihín ñayuu

cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha vāha i chí jéē níñni ni i nuū de.

⁷ Chi tée cácujeñu cáncandíso jniñu nuū ñayuu cáncandíje, cánuú caça ndaā de chi cáncandíso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tée nájñni, ma cuajnáhan de, te ma ndíyo ni de xūhún.

⁸ Chi sa cánuú jéē niní cuāha núu de vehe nuū ñayuu cájica, te níni sáha de jniñu váha, te ndito coo xiní de, te coo de tée ndaā, te coo ndoo ánuá de, te casi de modo jeē cuní maá de.

⁹ Te cánuú cuiñi níñin de jíin jnūhun ndaā jeē ni scuáha de, návāha cuu stíhví ni de ñayuu jíin táca jnūhun ndaā vāha, te suni cuu sáha de jeē jécūhun ni ñayuu cácuu contra, te casi i yuhu i.

¹⁰ Chi íyó cuéhē ñayuu níñni ni, te cástéén i inga modo jéni ni maá i jeē súcuan cācu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan.

¹¹ Te cánuú jéē casi rō yuhu tāca tée ún, chi cástéén de jnūhun jeē tu íyó váha stéén de, chi cuní de nihín de xūhun síquī ún. Te súcuan sáca nuu de xiní ndíhi ñayuu táca vehe.

¹² Te ñn tée isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stáhú cácuu i, te nájñūhun quití xéén casáha i, te máni

ndíhví ni i caji cuehē i, te cúxi i, áchí de.

¹³ Te ndaā cúu jnūhun ni cahān tēe ún. Jeē yúcuān na cúxeēn rō nuū i, návāha ndaā vāha na cándíje i.

¹⁴ Te ma sáha i cuenta tāca jnúhun ni catava jnáhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i tācá-ni. Te ñayuu tu cándíje jeē tu ní ndúndoo jeē níjnūní, máni jéni ni i ñin modo tú ndoo tú váha siquī tāca jéē jíto i. Chi nde jeē níjnūní i jíin ánuá i íyó jnéhén.

¹⁶ Te vēsú cácahān i jeē jíni i Yaā Dios, te jíin jniñu cásáha i te jíni yō jeē tú ndije i. Chi ñayuu ndevāha ñayuu nīhni ni cácuu i, te tu cúu sáha i ni ñin jniñu váha.

Jnúhun ya jeē steén ndaā vāha

2

¹ Te máá ró chi níni na cáhān rō tāca jnúhun jeē quí-jnáhan jíin jnúhun ya jeē steén ndaā vāha.

² Te cahān rō jíin tāca tēe jénu jeē na cóo cájí ni de, te sáha yíñúhún de, te ndito coo xinī de, te candíje nīhin de jnúhun cúndáhú ni yā de, te cundáhú ni de jnáhan de, te cuandeyí ni de.

³ Te suni súcuān tācá ñahan jénu, na sáha yíñúhún ña, te ma sajnúhún ña, te ma nájini

ña. Te na stéén ña tāca jéē váha.

⁴ Te na stéén ña nuū tācá ñahan súchí jéē coo manī ña jíin yí ña jíin séhe ña.

⁵ Te ndito coo xinī ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yí ña, návāha ma cahán neé ñayuu siquī jnúhun Yaā Dios.

⁶ Te suni súcuān stíhví ni rō tāca tēe suchí jeē ndito na cóo xinī de.

⁷ Te róhó, cuu ró ñin ejemplo nuū de jeē sáha ró táca jniñu váha. Te jeē steén rō nuū de te ndaā steén rō te coo ndije ni rō.

⁸ Te ndaā vāha stéén rō, návāha ma cúu cahān ñayuu siquī. Te súcuān te cucanu ñayuu cácuu contra, chi ma cúu cahān i ni ñin cuēchi siquī rō.

⁹ Te cahān rō jíin ñayuu cácuu mozo jeē na cuatáhú i nuū patrón i, te na sáha i tācá jniñu jeē nújnahan ni de, te ma cahán maá i núu ndácu de jniñu nuū i.

¹⁰ Te ma sacuíhná i nda-jniñu de, chi na cúu i ñayuu ndaā ndije, návāha jíin táca jniñu jeē sáha i, te cuni tāca ñayuu jeē yóhyo luu cúu jnúhun jeē steén siquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sáha ya jeē váha ñayuu, chi cúni yā jnama ya ndíhi ñayuu ñayívi.

¹² Te jnúhun jeē váha ni yā jíin yó, suu stéén nuū yō jeē na síáá yō jniñu neé jíin táca jéē ndíyo neé ni yō. Te ndito na cóo xinī yō ini ñayívi yáha,

te caca ndaā yō, te chiñúhún váha yó Yaā Dios.

¹³ Te suni stéén nuū yō jeē cocuhun ni yō jeē quéndōo ndetū yō jeē quíji máá quívī jéhnū jeē quénda ndijín Yaā Dios, Yaā kujéhnū ndasí, suu Jesucristo, Yaā jnáma yóhó.

¹⁴ Chi ni socō yā maá yá jehē yō, návāha jnama ya yohó núū táca jniñu néé, te sándoo ndihi ya anuá yō jeē cuu yó ñáyuu maá yá, te condihvī ni yō sáha yó jniñu váha.

¹⁵ Tāca jnúhun yáha cánuú stéén rō, te stíhvī ni rō i, te cahān rō nuū i, chi súcuan ndíso jniñu ró. Te ma cuáha ro jnúhun jeē sajeē ni ni ñn i nuū rō.

Ndese cánuú sáha ñayuu cácandíje

3

¹ Te na nástíhvī ni rō i jeē cuatáhú váha i nuū tēe cácujehnū jín tēe cándiso jniñu ñuu. Te na squícu i jniñu cándacu de, te coo ñamā ni i sáha i tācá jniñu váha.

² Te ma cahán neé i siquī ni ñn ñayuu, te coyūcu mánī i jín ñáyuu, te coo váha ni i, te coo vítā ni i jín ndihi ñayuu.

³ Chi máá yó suni ni cuu yó ñáyuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jnúhun tú ndaā, te ni cajejniñu sáa-ni yó núū tāca jéé ní ndiyo néé ni yō jín na-ni jniñu ni cusī ni yō. Te ni cajica yó jín jniñu néé jín jnúhun cuésún ni. Chi ni cajito

uhū ñayuu yohó, te ni cajito uhū yō i.

⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndihi ñayuu ñayívī.

⁵ Te ni jnama ya yohó, te tú na jniñu váha ní cásáha yó jéé jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jín máá Espiritu Santo.

⁶ Te yōhyo ni cunuú Espiritu Santo ini anuá yō, jeē ni sáha Yaā Dios jeē jín Jesucristo, Yaā jnáma yóhó.

⁷ Te súcuan te ni ndahva yā cuēchi yó siquī jeē váha ni yā, te nihín tahú yō cotecu yō ní cáni, nájnūhun ñūhun ni yō.

⁸ Ndaā cúu jnūhun yáha, te cúní rī jeē niní cahān nihín ro táca jnúhun yáha, návāha ñayuu cácandíje Yaā Dios, na cóndihvī ni i cocuu i jín jniñu váha. Chi íyó váha tāca jéé yáha, te níhín jniñu jeē quéndōo váha ánuá ndihi ñayuu.

⁹ Te ma quívī nduu rō jín táca jnúhun canéé íi, jín jnúhun siquī ndese vēji tāca jíi yō, jín táca jnúhun sáha jeē cátejñáhan i cácahān i jeē cánuú squícu yó ley Moisés. Chi mánī jnūhun cāhá-ni jeē tu níhín jniñu cúu.

¹⁰ Te núu íyó ñáyuu jeē sáha jeē ndusín ini ñayuu cácandíje, te cahān rō nuū i ñn uū jínu, te núu ma chúhun ni i, te quenehen ró i.

¹¹ Chi jíní rō jeē ñn ñayuu

sáha súcuan, stívi ndasí i chi jíni i jeē tú vāha sáha i, te jeē yúcuan jécondee cuēchi siquī i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núū rī ñuu Nicópolis, chí je ni cundaā ni rī jeē yúcuan condee rī tiempo mījin.

¹³ Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéē jíni ñúhún de jeē quíngoo ga de ichi nuū quihín de. Te coto ró jéē ma cúmanī ni ñn nuū de.

¹⁴ Te ñayuu cáhīn jíin yó, cánuú cutūhva i sáha i tācá jniñu váha, te chindéé ñáhán i ñayuu cúmanī nuū, návāha ma cótecu saá-ni i.

Saludo jíin bendición jeē sándihí

¹⁵ Tāca ñayuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácadíje yó. Te ñúhun ni rī jeē na sáha ga Yaā Dios jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU FILEMON

1 Máá rí cúu Pablo, te íne ri vecāa jeē siquī jnúhun Cristo Jesús. Te jín hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jín, chi chindéé ñájnáhan ró jín rí siquī jníñu Yaā Dios.

2 Te suni cátee ri carta yáha nuū ñáyuu cácan díje cándutútu ini vehe ró, te suni nuū hermana yō Apia, jín núu Arquipo, tēe chindéé ñájnáhan jín yó siquī jníñu cánducú ndeyí yó jín.

3 Te cáñuhun ni rī jeē Tata yō Yaā Dios jín Jítoho yō Jesu-cristo, na sáha ga yā jeē váha rohó jínáhan ró, te sáha ya jeē coo ndeyí coo sī ni rō.

Tēe cúndáhú ni te cándíje váha cúu Filemón

4 Te jeē jicán tahu rī nuū Yaā Dios te tu náā ni rī cacān tahu rī jehē rō, te níni nácuatáhú rí nuū yā jeē siquī rō.

5 Chi níhín rī jnúhun jeē váha cándíje ró jnúhun cúndáhú ni Jítoho yō Jesús rohó, te cúndáhú ni rō tāca ñáyuu yíhi ndaha Yaā Dios.

6 Te jicán tahu rī jeē ñáyuu ni cacandíje siquī jeē candíje máá ró, na jécūhun váha ga ni i siquī tāca jéē váha jeē sáha ya yohó jeē jín Cristo Jesús.

7 Chi cúsi ndasí ni rī te íyó ndeyí ni rī, hermano,

siquī jeē cúndáhú ni rō ñáyuu cácan díje. Chi máá ró ni sáha jeē ní ndusi ni i.

Jeē jicán Pablo ñn favor jehē Onésimo

8 Núu súcuan te cáhán ndahú rí jín ró, vésú cuu ndacu ri nuū rō ndese cánuú sáha ró, chi cúu ri apóstol Cristo.

9 Te tuú chi sa cáhán ndahú rí jín ró siquī jeē cáhīyo manī yō. Te cúndáhú ni rō ruhū sáha ró jéē cuní ruhū Pablo, chi je jéhu ri, te íne ri vecāa jeē siquī jnúhun Cristo Jesús.

10 Te cáhán ndahú rí jín ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

11 Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jín núu rī.

12 Te nátají rí i najeē i nuū rō. Núu súcuan te cáhán váha ró jín i, te sáha ró cuenta jeē nájnūhun máá rí ni najinū, chi yōhyo manī rí jín i.

13 Te cusī ni rī núu jeē na cúu quendōo i jín rí yāhá, návāha cuajníñu i nuū rī lu-gar máá ró níni jéē íne ri vecāa jeē siquī jnúhun váha ya.

14 Te tu ní cuní rí sáha ri súcuan, chi nde cuāha máá ró jnúhun. Chi nasūu jéē sa-fuerza rī rohó, chi jeē váha ni rō te sáha ró favor jín rí, nájnūhun cúsi ni maá ró.

15 Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jín ró sáha Yaā Dios.

16 Te vijna tuá cúu i ñn mozo jeē ní jeen ró, chí ni nduu i ñn jeē váha ga, suu ñn hermano jeē maní rō jíin. Te ruhū chí yōhyo manī rī jíin i, te nagā ni cuu máá ró jeē ma cóo manī rō jíin i. Te nasūu jēē maní rō jíin ñn tēe súcuan-ni, chí siquī jeē cúu i ñn hermano jeē candíje nuū Jítóho yō.

17 Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jíin i jeē jinú i nuū rō, nájnūhun jeē ruhū cahān rō jíin.

18 Núu na-ni falta ni sáha i nuū rō, chí núu táu i nuū rō, te cacān rō chunaa máá rí.

19 Ruhū Pablo, jíin ndaha máá rí tēe ri yāha jēē máá rí nachunaa. Súcuan cáhán rī vēsú cuu cahān rī jeē sa máá ró táu nuū rī sáha ró jēē cúsiñ ni rī siquī jeē ni scándíje ri rohó te ni cācu ánuá rō.

20 Núu súcuan, hermano, sáha ró favor yáha jíin rí siquī jeē candíje ró Jítóho yō. Sáha ró jēē ndúsñ ni rī, siquī jeē cúu ró hermano candíje Cristo.

21 Te tēe ri yáha núu rō, chí cúcáhnū vāha ni rī jeē cuatáhú ró, te nde vihyá gā sáha ró vēsú jeē ni jíicān rī.

22 Te suni jíicān rī jeē sátūhva ró núu cóndee rī, chí ñūhun ni rī jeē quēnda ri yāhá te jeē rī nuū rō sáha Yaā Dios siquī jeē cájicān tahu rō jehē rī.

Saludo jíin bendición jeē sándihí

23 Epafras, tēe íne jíin rí vecāa jeē siquí jnúhun Cristo Jesús, cáhán de jeē sándeyí ni rō.

24 Te suni súcuan cácahān Marcos, jíin Aristarco, jíin De-mas, jíin Lucas, tēe cáchindéé ñájnáhan jíin rí siquī jníñu ya.

25 Te ñūhun ni rī jeē Jítóho yō Jesucristo na sáha ga yā jeē váha rōhó jíjnéhan ró. Súcuan na cóo. Amén.

CARTA JEE CUAHAN NUU ÑAYUU HEBREO

*Jeē ní taji Yaā Dios Sēhe ya
ni nacani ya jnūhun*

1 Tijni jínu te tijni modo ni cahān Yaā Dios jín táca jí yō nde jenahán, chi ni taji yá tēe ni canacani jnūhun ya.

2 Te vijna te tiempo cuándihi yāha ní taji yá maá Sēhe ya ni nacani ya jnūhun nuū yō. Te jín Sēhe ya ni sáha ya ñayīvi jín táca gá, te ndivii jeē iyó ní chihi ya ndaha Sēhe ya.

3 Te Sēhe ya yōhyo luu cújéhnū ya, nájnūhun luu cújéhnū maá yá. Te ndihi ndese cúu maá yá, suni súcuan cúu Sēhe ya. Te jín poder jnūhun ni cahān Sēhe ya te iyó cutú ndihi-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnū nde andiví.

*Jeē cújéhnū ga Sēhe Yaā
Dios vēsú tēcá ndajéhé yā*

4 Te ni ndujéhnū ndasí gá Sēhe ya vēsú tēcá ndajéhé andiví, chi ni nihīn yā tahū jeē ndíso ya jniñū jéhnū ndasí gá vēsú jniñū cándiso ndajéhé.

5 Chi súcuan ni cahān Yaā Dios jín Sēhe ya, te nasūu jín ndajéhé yā:

Máa ró cúu Sēhe ri,
te vijna te ni sajuhnu ri rohó
jeē cúu ri Tatá rō.

Te suni ni cahān yā jnūhun Sēhe ya, te nasūu jnūhun ndajéhé yā:

Máa rí cúu Tatá nuū Sēhe ri,
te máa i cúu Sēhe nuū rī.

6 Te suni ná ni taji yá Sēhe ya cújéhnū, ni quiji ini ñayīvi yáha, te ni cahān yā:

Ndihī ndajéhé rī na chíñúhún
i Sēhe ri.

7 Te ni cahān tucu ya jnūhun ndajéhé yā:

Nájnūhun quée tachī, súcuan
cájica ndajéhé rī sáha ri,
te tēcá un jeē cájejniñū nuū
rī, nájnūhun yáñuhún
cácuu.

8 Te jnūhun Sēhe ya chi sa suhva cáhán yā:

Máa ró cúu Yaā Dios, te ndacu
ró jniñū ní cáni,

te jniñū ndacu ró, máni jniñū
ndaā cúu.

9 Cúsiī ni rō jín jniñū váha, te
jító uhū rō jniñū néé.

Jeē yúcuan ruhū, Yaā Dios
maá ró, ni sáha ri

jeē yōhyo ga cúsiī ni rō vēsú
tēcá gá jeē iyó andiví.

10 Te suni cáhán yā:

Máa ró cúu Jitoho, te nde
xīhna ñúhún ni sáha ró
jeē ni jécōo ñayīvi.

Te andiví chi suni jeē ni sáha
ró cúu.

11 Te tēcá un chi naa, te máa
ró chi ní cáni iyó ró.

Te tēcá un chi cutúhú
nájnūhun cutúhú ñ
sahma,

12 te nacaquin jnahnū rō te
nasama ró jíjnáhan.

Te máa ró chi ma sáma cuiti
rō,

te quiví cótecu rō ma ndihī
cuiti.

13 Te súcuan ni cahān tucu yā jīn Séhe ya, te nasūu jīn ndajéhé yā:

Cucōo ró lado váha ri nuū cujéhnú ró,
te na sáha ri jeē quende rō poder tāca jéē cájito uhū rohó.

Achí yá.

14 Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jīn jnúhun jnáma ya yohó

2

1 Núu súcuan te cánuú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó.

2 Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndāā. Te ñayuu ñihni ni jīn ñáyuu tu ní cájendetū jnúhun ún, vetū-ni ni canihīn i castigo.

3 Te núu súcuan ni cuu, te yóhó, ¿ndese cācu yó núu ma chúhun ni yō jnúhun cánuú gá jeē jnáma ya yohó? Chi xīhna gā maá Jítoho yō ni nacani ya jnúhun yáha, te sáá te tēe jeē ní cajini nahín ni canacani ndaā tucu máá de nuū yō.

4 Te Yaā Dios suni ni chindéé ñáhán yá de jeē ní canacani de jnúhun ya. Chi ni sáha ya jīn de jeē ní casáha de sán sán jniñu jéhnú jeē nahán náá ni yō jíto yó poder yā. Te suni ni jéhe ya Espíritu Santo yā nuū ñin ñin yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

5 Te Yaā Dios nasūu núu ndajéhé yā ni jéhe ya jnúhun jeē condiso jniñu síquī ñayíví jéē quíji, chi sa suhva nuū Séhe ya Cristo ni jéhe ya. Te síquī ñayíví un cúu jeē cahán rī yāhá.

6 Chi suhva yósó núu tútu jeē ni cáhán David jīn yá:

¿Na vé cúu ñayuu jeē ñúhun ni ní i?

Te ndíhví ni ni síquī i, te máá ñáyuu cúu í.

7 Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajuhnu ní i te squéndōo yíñúhún ní i, te caní ní i jeē ndacu i jniñu nuū tāca jéē ni sáha ní.

8 Te ndíhi jeē iyó chi sáha ní jéē cujéhnú i síquī.

Achí tutu. Te jeē ni sáha Yaā Dios jeē cujéhnú i síquī ndíhi, núu súcuan te ma quéndōo ni ñin jeē ma cújéhnú i síquī. Te vésú súcuan te vijna te ná tu coto yó jéē cujéhnú i síquī ndíhi jeē iyó.

9 Te jeē jiní yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhī yā jehē yō, te jeē yúcuan ní ndujéhnú luu tucu ya, te ndíhi cáhīyo yíñúhún núu yā. Chi jeē váha ni Yaā Dios jīn yó, jeē yúcuan ní jíhī Jesús jehē yō.

10 Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núu luu cujéhnú i jīn yá. Te váha níhín

jniñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca vāha ya ñayuu ní jnama ya.

¹¹ Chi Jesús jeē ni sándoo ya i te máá i jeē ní candundoo i, chi ñin-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí nuū i.

¹² Chi yósó nuū tútu jeē ni cáhān yā jíin Tátá yā:

Cachi na jnúhun ní nuū tācá hermano na,
te mēhñu nuū cándutútú i cata
ná ndese cújéhnu ní.

¹³ Te suni cáhān yā nájñuhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá sēhe Yaā
Dios jeē ni jéhe ya nuū
rī.

Achí Jesús.

¹⁴ Te nájñuhun cácau ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāá yā poder jexeén jeē squívi ñayuu nuū cuéchi te jíhí i.

¹⁵ Te ni cacu ya súcuan návāha cuu quenehen ya tāca ñayuu chíji jñuhun jeē yuhú i cuu i. Chi ní vida i ndóho i sáha ún.

¹⁶ Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañdíje jeē ní nduu yucūn Abraham.

¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū cújéhnu jeē squícu vāha ya tācá jniñu jehē i nuū Yaā Dios.

Chi ni cundáhú ni yā i, te ni ndahva yā cuéchi i jeē ni sócō yā maá yá jehē i.

¹⁸ Chi suni máá yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jito ndee jnūndóho i.

*Cújéhnu ga Jesús vēsú
Moisés*

3

¹ Hermano, ni cana Yaā Dios rohó, te cácuu ró ñayuu ndoo máá yá. Núu súcuan te na nácani vāha ni rō síquī Cristo Jesús, Yaā cúu apóstol jeē ní tejníñu Yaā Dios, te suni cúu ya sutū cújéhnu síquī jnúhun cácañdíje yó.

² Chi ni squícu vāha ya nuū Yaā Dios, Yaā ní tee jniñu un síquī yā, nájñuhun ni squícu vāha Moisés nuū ñayuu jeē ni cáhān Yaā Dios jeē cácuu i ñayuu vehe ya.

³ Chi cújéhnu ndasí gá Jesús vēsú Moisés, nájñuhun cújéhnu ndasí gá tēe sáha vehe nasūu máá vehe.

⁴ Chi tācá vehe íyó tēe ni sáha. Te máá Yaā Dios cúu jeē ni sáha tāca jēe iyó.

⁵ Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de síquī tāca jnúhun jeē steén yā tiempo quíji.

⁶ Te Cristo chi sa cúu ya maá Séhe jeē ndácu jniñu nuū ñayuu vehe Tátá yā, te vāha squícu ya jeē ní jéjñuhun ya nuū i. Te suni máá yó cácuu ñayuu vehe ya, te núu na cuíñi nīhin yó jíin jnúhun cácañdíje yó

ndé quivī sándihí, te núu cúsi
ni yō jeē ñúhun ni yō tāca jée
váha jeē coo.

*Jnúhun jeē ndetātu ñáyuu
Yaā Dios*

⁷ Núu súcuan te na chúhun
ni yō jeē cahán Espíritu Santo
nuū tútu i:

Vijna te núu cuni sōho ró jée
cahán Yaā Dios,

⁸ te ma cúnihni ni rō nájñuhun
ni cacunihni ni ñayuu
jenahán.

Chi tu ní cájendetū i nuū yā ná
ni cajica i nuū ñúhun
téhé.

⁹ Chi yúcuan ní casáha jíi rō
jniñu jeē ni quitī ni rī,
achí yá,

vēsú ni cajito i tācá jniñu ni
sáha ri uū xico cuiyá.

¹⁰ Jeē yúcuan ní quitī ni rī jíin
ñáyuu tiempo un.

Te ni cahán rī jeē máni jeē
castóo i ichi ndaā,

chi tu cácu ni i condiquīn i
jñuhun ri.

¹¹ Te jeē yúcuan ní quitī ni rī,
te ni cahán teyí rí

jeē ma quívicoo cuiṭi i nuū
ndetātú i sáha ri.

Achí yá.

¹² Núu súcuan hermano,
coto má conéé ánuá ni ñin ró
jée cáca yátá ró jeē tuá candije
ró Yaā Dios, Yaā técu.

¹³ Chi sa suhva tāca quivī na
stíhví jnáhan ni rō, níni gá iyó
tiempo, návāha ma cúnihni ni
ni ñin ró te stáhú rōhó sáha ró
cuéchi.

¹⁴ Te núu na cuíñi ñihin yó
ndé quivī sándihí jíin jnúhun
jeē ní quejéé yó jíin, yúcuan
na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jée
cahán Yaā Dios,
te ma cúnihni ni rō nájñuhun
ni cunihni ni ñayuu je-
nahán.

Achí.

¹⁶ ¿Te ndé-ni cúu ñayuu jeē ní
jini jnúhun ya te ni cunihni
ni? Suu ndihí ñayuu jeē ni
scácu Moisés jeē ní quenda-
coo Egipto.

¹⁷ ¿Te ndé-ni cúu ñayuu jeē
ni quitī ni yā nuū uū xico
cuiyá? Suu ñayuu jeē ní
casáha cuéchi, te ni cajihí i
nuū ñúhun téhé.

¹⁸ ¿Te ndé-ni i cúu jeē ni cáhán
teyí yá jeē ma quívicoo cuiṭi
i nuū ndetātú i sáha ya? Suu
máa ñáyuu jeē tu ní cájendetū
nuū yá.

¹⁹ Núu súcuan te jíni yō jeē tu
ní cúu quívicoo i nuū ndetātú
i, siquī jeē tu ní cácuandije i ya.

4

¹ Te níni iyó gá jnúhun jeē ni
jéjñuhun ya jeē quívicoo ñayuu
nuū ndetātú i sáha ya, te na
cónso ñyo yó jée ma stívi yó,
návāha tú coo jíin sava ró jée
ma nihín rō quiví ró.

² Chi suni máa yó ni ca-
jini sōho yó jnúhun jeē jnáma
ya yohó, nájñuhun ñayuu je-
nahán un. Te nuū máa i tu
ní jéjñuhun jnúhun ni cajini i ún,
siquī jeē tu ní cácuandije i.

³ Te yohó jée cácuandije, máa
yó cúu jeē quívicoo yó núu
ndetātu yó. Te siquī ñáyuu tu
cácuandije ni cahán yá suhva:

Jeē yúcuan ní quitī ni rī, te ni
cahán teyí rí

jeē ma quívicoo cuiṭi i nuū
ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayīví.

4 Chi súcuan yósó jnúhun nuū tútu i siquī quivī uxá:

Ni sínu Yaā Dios táca jēē ni sáha ya, te ni ndetātu yá quivī uxá.

5 Te suni nuū tútu un yósó tucu:

Ma quívicoo cuiti i nuū ndetātú i sáha ri.

Achí yá.

6 Núu súcuan te sava ñayuu chi quívicoo nahín i nuū ndetātú i. Te ñayuu jenahán jēē ní cajini jnúhun jeē jnáma ya i, tu ní quívicoo i siquī jeē tu ní cájendetū i nuū yā.

7 Jeē yúcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jēē cahán yā,

te ma cúnihni ni rō núu súcuan.

Achí tutu.

8 Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quivī jeē quívicoo i nuū ndetātú i.

9 Núu súcuan te íyó túhva nahín ñn nuū ndetātu ñáyuu Yaā Dios, nájnūhun ni ndetātu máá yá.

10 Chi ñayuu jeē quívicoo nuū ndetātú i jíin yá, chi ndetātú i jeē ní casájniñu i, nájnūhun ni

ndetātú Yaā Dios nuū jniñu ni sáha máá yá.

11 Núu súcuan te na ndúcú ndéyí yó quivī yó núu ndetātu yó un, te ma sáha ni ñn yó cuéchi jeē ma cándije yó, nájnūhun ni casáha i nde saá.

12 Chi jnúhun Yaā Dios ndíto técu te íyó poder. Chi cúu nájnūhun ñn espada jeē xeén ndíndúú lado, chi nástúu cáji ndese íyó jēē níjnūni yō jíin ánuá yō, nájnūhun sáha espada jeē jéhnde te nástúu nuū ñujnáhan yiqui jíin meque. Te jnúhun ya nástúu ndihí ndese jéni ni yō jíin ndese cúní yō sáha yó.

13 Te tu íyó ni ñn jeē yísahí jeē tu jíin maá Yaā jeē náquihin cuenta, chi ndihí-ni jíin vāha ya, te ndihí-ni túu ndijin nuū yā.

Jesús cúu sutū cujéñu ga

14 Te cánevāha yó ñn sutū cujéñu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi ñihin yó jíin jnúhun jeē ní cándije yó.

15 Chi névāha yó ñn sutū cujéñu jeē jíto ndáhú yóhó jeē tu fuerza yō squícu vāha yó. Chi nájnūhun ndóho yó jēē jíto ndee jexeén yohó, suni súcuan ni ndoho ya jeē ní jíto ndee un yá, vēsú tú cuiti cuéchi ya.

16 Núu súcuan te ma yūhu yó, chi na quívi yó yuhu mesa yā, cúu jeē cacān tahú yō. Chi manī yā jíin yó, te cúndáhú ni yā yohó, te siquī jeē vāha ni yā te chíndéē ñáhán yá yohó táca jínu jeē jíni ñúhún yó.

5

¹ Chi tāca sūtū jeē ní cujéhnū jenahán, ni nacāji Yaā Dios de mēhñū ñáyuu, te ni jeni ya de jeē cuíñi de nuū yā jehē ñayuu, te socō de ndajñiñū jín quiti nuū yā jeē siquí cuēchi i.

² Te cuu cahān vītá de jín ñáyuu tu jécūhun ni jín ñáyuu castívi, chi máá de suni tú na fuerza ini de squícu vāha de.

³ Jeē yúcuan cúu jeē suni cánuú sócō de quiti nuū yā jeē siquí cuēchi máá de, nasūu máá-ni jeē siquí cuēchi ñayuu.

⁴ Te ni iin tēe tu cúu sájéhnū de máá de jeē cuu de sutū cujéhnū, chi sa máá Yaā Dios cúu jeē nacāji ya de, nájñūhun ni nacāji ya Aarón nde jenahán.

⁵ Te suni súcuan Cristo, tu ní sájéhnū ya máá yá jeē cuu ya sutū cujéhnū, chi sa Yaā Dios ni sáha, chi ni cahān yā jñūhun yáha:

Máá ró cúu Sēhe ri,
te vijna te ni sajéhnū ri rohó
jēe cúu ri Tatá rō.

⁶ Te suni cáhán tucu ya nuū tútu i:

Ní cáni cúu ró sūtū,
nájñūhun sutū Melquisedec
jenahán.

⁷ Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jín Yaā Dios, Yaā jeē cúu jnama ya jeē ma cúu yā nuú. Te siquí jeē yíñuhún ní chiñuhún yá Yaā Dios, te ni chindéé ñájñahan Yaā Dios jín yá nuū jñūndóho ún.

⁸ Chi vēsú Sēhe Yaā Dios cúu ya, te ni jendetū yā ni ndoho

ya ini ñayiví, te súcuan ni jini yā ndese cúu jñūhun jéndetū.

⁹ Te ná ni cuu ni squícu ndihi ya jeē ní jendetū yā, te ni cucutú jñūhun jeē jnama ya tāca ñáyuu jéndetū nuū yā, te cotecu i ní cáni.

¹⁰ Chi ni jeni Yaā Dios yā jeē cúu ya sutū cujéhnū nájñūhun sutū Melquisedec.

Siquí jeē ma cáca yátá i

¹¹ Te iyó cuéhē jñūhun jeē castūhun rí siquí tāca jēe yáha. Te yí cúu jeē jécūhun ni rō sáha ri, siquí jeē tu cácuni rō chuhun ni rō.

¹² Te je ni cunahán cácandíje ró, te jini ñuhún jēe cúu ró tēe stéen nuú. Te tuú chi sa cájini ñuhún tucu máá ró tēe stéen nuū rō tāca jñūhun Yaā Dios jeē tú yí cuiti. Chi sa ni canduu ró nájñūhun sūchi yíquín jēe jini ñuhún caxin i, chi ná tu ije i caji i jeē ndáva. Súcuan cácuu ró chi ná tu ije ró jín jñūhun yí gá.

¹³ Chi núu máni máá nájñūhun sūchi yíquín jéxin cácuu ró, núu súcuan te tu cúu jecūhun vāha ni rō jñūhun ndaā.

¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nacāji i jeē vāha jín jēe neé.

6

¹ Núu súcuan te na yáha yó núu tāca jñūhun Cristo jeē tú-ni yí, te na quíhín yō nuū jñūhun yí gá, návāha na íje vāha ni yō jín jñūhun ya. Te ma ndejéé tucu yó jín jñūhun jeē ni scuáha yó xíhna gā, suu jñūhun jeē nacani ni yō stóo yo

cuéchi yó jéē cúū yō sáha, jíin jéē candíje yó Yaā Dios,

² jíin síquī jeē jéndute, jíin síquī jeē soó ndaha xinī ñáyuu, jíin síquī jeē nátecu ndīyi, jíin síquī jeē jnahnú ndetū ñayuu ñí cáni.

³ Núu súcuan te na yáha yó núū tāca jéē yáha te quivī yó núū jnúhun yí gá, te núu cuāha Yaā Dios jnúhun.

⁴ Chi íyó ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quivī i nuū jnúhun stéén Espíritu Santo,

⁵ te suni je ni jini i jnúhun vāha Yaā Dios jíin ndese coo poder yā tiempo quiji.

⁶ Te ñayuu un núu caca yátá i, te ma cúu ga ndejéé jeē i jeē nácani ni i. Chi jeē cáca yátá i cúu nájñuhun jeē nácagni tucu i Sēhe Yaā Dios jicā cruz, te cájēhe i jnúhun canu yā cájito ñayuu.

⁷ Te ñayuu chi cácuu i nájñuhun ñuhun jeē cúun vāha saū nuū te ndóyo vāha. Te núu cánecoo jeē vāha caji tēe cásájñiñu, yūcuán na te cúsiñ ni Yaā Dios jíin.

⁸ Te núu máni iñu yóquin jíin yucū sajnéñu cánecoo nuū, núu súcuan te tu jéjñiñu cuiti, te squéndōo iñ yā, te iñ quivī te cayū. Súcuan jnahnū ndetū ñayuu cájica yátá.

Jeē núhun ni yō tāca jéē vāha jeē coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeē cácuu ró ñayuu cuiñi ñihin, chí ñayuu ni jnama ya cácuu ró.

¹⁰ Te Yaā ndaā cúu Yaā Dios, te tu náā ni yā jniñu cásáha ró. Chi síquī jeē cáhīyo manī rō jíin yá te ni cacundáhú ni rō hermano rō cácuahnu, te ni cachindéé ñáhán ró i, te súcuan cásáha ró ndé vijna.

¹¹ Te cácuu rī jeē niní súcuan sáha ga ná iñ ná iñ ró ndé quivī sándihí, chí jeē sáha ró súcuan te nihīn rō ndihí jeē cáñuhun ni rō.

¹² Te cácuu rī jeē ma cúhuun ni rō, chí sa ndacu ró ñáyuu cácuahnu jeē jíin paciencia cándetu i, te jeē yúcuan ñihin tahú i tāca jéē ni jéjñuhun ya.

¹³ Chi quivī jeē ni jéjñuhun Yaā Dios nuū Abraham, te ni ndacunehen ya maá yá jeē ni jéjñuhun téyí yá, chí tuá na inga ndacunehen ya jeē cujéñu ga vēsú maá yá jeē cuu testigo yā.

¹⁴ Te ni cahān yā: Jendaá ndije jeē vāha ndasí sáha rī jíin ró, te sáha rī jeē nducuehē ndasí yúcūn rō, achí yá jíin Abraham.

¹⁵ Te jíin paciencia ni cándetu de, te súcuan te ni nihīn de jeē ní jéjñuhun ya.

¹⁶ Te núu cáhán téyí ñáyuu, te ndacunehen i síhví iñ jeē cujéñu ga vēsú maá i. Te núu íyó iñ jnúhun jeē tu cácuahnu jnáhan, te núu iñ tēe cáhán téyí de jíin síhví Yaā Dios, yūcuán na te jécuiñiñ jeē cátejñáhan.

¹⁷ Te suni súcuan Yaā Dios, chí ni jéjñuhun téyí yá nuū ñáyuu jeē cuāha ya tahū i. Chí ni cuni yá jeē cuahnu vāha ni i jeē ma nácani yátá ni yá síquī jeē ni jéjñuhun ya nuū i.

18 Chi ma nácani yátá cuiti ni yā siquī jnúhun jeē ni cáhān yā uū jínu, ñn jeē ni jéjnūhun ya, te inga jeē ni cáhān teyí tucu ya siquī suni jnúhun ún. Chi tu stáhú cuiti yā. Te jeē yúcuan máá yó jeē ní tūhva yó yá, chi yōhvo íyó ndeyí ni yō, te cáñuhun teyí ni yō jeē squícu ya jeē ni cáhān yā.

19 Te siquī jeē súcuan ñúhun ni yō, te suu sáha jeē quéndō nīhin ánuá yō jín jnúhun ya, te quéndō ndaā ni yō, nájñuhun quéndō nīhin barco jeē jñí gancho yuū. Te sáha jeē cúu quívi yó andiví núū íí gā, nájñuhun cuarto íí gā jeē ní íyo ichi yátá sahma ni ndita caa ini vehe íí jenahán.

20 Te ini yūcuán chi xīhna gā Jesús ni quívi, návāha nune ya ichi quívicoo yó. Te jeē yúcuan ní cáni cúu ya sutū kujéñnu nájñuhun sutū Melquisedec.

Jeē cúu Jesús sutū nájñuhun Melquisedec

7

1 Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā kujéñnu téyí. Te ni jejnahan de Abraham ná ni nandicó Abraham jeē ní cundeyí de ni cajejnáhan de jín táca rey. Te ni jicān tahu de jehē Abraham.

2 Te táca úxī ndajníñu jeē ní quende Abraham nuū táca rey un, ni jēhe de ñn ñn siquī un núū Melquisedec. Te síhví Melquisedec cuní cahān: rey jeē sáha jniñu ndaā. Te suni nání de rey Salem, te jnúhun Salem cuní cahān: jeē iyó

ndeyí sñ ni. Te jeē yúcuan suni nání de: rey jeē sáha jeē iyó ndeyí sñ ni ñayuu.

3 Te tu cáhān tutu jnúhun tátá de ni náná de ni táca jíí de. Ni tu cáhān núu ni cacu de, ni núu ni jihí de. Chi cúu de nájñuhun Jesús, Sēhe Yaā Dios, chi hí cáni cúu de sutū.

4 Te condēhe jíjnáhan ró náa jéñnu ni cuu Melquisedec, chi jíí jéñnu yó Abraham ni jēhe de ñn ñn siquī táca jéē uxí nuū de siquī táca jéē ní quende de nuū rey un.

5 Te jíní yō jeē táca úxī ndajníñu ni canihīn ñayuu, ni cajēhe i ñn ñn siquī un ní caquihin tēe cácuu sutū yucūn Leví, nájñuhun cáhān ley Moisés. Te ni caquihin de nuū ñáyuu cácuu jnáhan de, chi ñn-ni yucūn Abraham cácuu de jín i.

6 Te Melquisedec nasūu yucūn Leví cúu de, te vésú súcuan te ni quihin de ñn ñn siquī táca jéē uxí nuū Abraham. Te suni ni jicān tahu de jehē Abraham, vésú cúu Abraham tēe jeē ni jéjnūhun ya nuū.

7 Te jíní vāha yó jéē tēe kujéñnu ga cúu jeē jicān tahu jehē tēe núu ga.

8 Te ñayívi yáha chi táca sūtū cáquihin de ñn ñn siquī táca jéē uxí nuū ñáyuu, vésú cácuu te tēe cájihī. Te Melquisedec suni ni quihin de, te máá de chi cáhān tutu íí jeē técu de.

9 Te suni cuu cahān yō jeē Leví, tēe jeē ní quihin ñn ñn siquī táca jéē uxí nuū ñáyuu, suni nájñuhun nuū máá

de ni quihin Melquisedec ñn ñn siquī tāca jēē uxí. Chi jeē ni jēhe Abraham nuū Melquisedec, suu cúu nájñuhun jeē suni ni jēhe de jeē siquí Leví jíñ ndihi ga yucūn de jeē quiji.

10 Chi yucūn Abraham cúu Leví, te vēsú ná tu cacu de quiví jeē ni jéñahan Melquisedec Abraham, te nájñuhun jeē ni jēhe máá de cúu jeē ni jēhe Abraham.

11 Te yucūn Leví ni cane sutū Aarón jíñ tāca gá sutū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jíñ ley un núu, te tuá cánuú jeē núcuiñí inga clase sutū lugar Aarón jíñ yucūn de. Te inga clase sutū cúu Cristo jeē cúu ya nájñuhun sutū Melquisedec.

12 Te núu núcuiñí inga clase sutū, te suni cánuú sáma ley siquī yucūn de.

13 Núu súcuan te ni sáma ley un, chi cáhán tutu iñ jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñn ní cúu sutū.

14 Chi jíñí vāha yó jēē chíji yucūn Judá ni cacu Jítoho yō. Te yucūn ún chi tu ní cáhán cuíti Moisés jeē cánecoo sutū.

15 Te cájí cúu jeē ní núcuiñí Cristo jeē cúu ya inga clase sutū nájñuhun sutū Melquisedec.

16 Te tu cúu ya sutū jeē ní cacu chíji yucūn Leví nájñuhun cáhán ley jenahán.

Chi cúu ya sutū siquī jeē ndíso ya poder cotecu yā ní cáni te ma cúu cuíti yā.

17 Chi súcuan ni cahān Yaā Dios jñuhun ya:

Ní cáni cúu ró sūtū, nájñuhun sutū Melquisedec.

18 Núu súcuan te jñíñu jeē ní ndacu ley jenahán siquī sutū, chi ni naa vijna, chi tu ní níhín jñíñu quendōo ní cáni.

19 Chi ley Moisés tu ní sáha jeē quendōo ndaā ñayuu. Te ni níhín yō ñn jñuhun vāha ga jeē ñuhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

20 Te jíñ jēē ni cáhán teyí Yaā Dios te cúu Jesús sutū.

21 Chi tāca gá tēe ún, nasūu jíñ jñuhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítoho yō Yaā Dios, te ma nácani yátá ní yā:

Ní cáni cúu ró sūtū, nájñuhun sutū Melquisedec. Achí yá.

22 Núu súcuan te jíñ Jesús ni cucutú ñn contrato vāha ga vēsú ley jenahán.

23 Te tāca gá sutū ún, chi ni iyo cuehē de, chi siquī jeē cájihí de te tu ní cúu cuiñí de ní cáni.

24 Te Jesús chi cúu ya sutū jeē cuiñí ní cáni, chi técu yā ní cáni.

25 Jeē yúcuan ndíso jñíñu ya jnama ya ñayuu quíjicoo nuū Yaā Dios, cotecu i ní cáni. Chi ní cáni técu yā te cáhán yā jehē i jíñ Yaā Dios.

26 Núu súcuan te vāha ndasí sutū cujéñu cúu Jesús, jeē

nájnūhun jīni ñúhún yó. Chi sutū ìi cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújéhnú tēyí yá nde nuū sucún gá andiví.

²⁷ Te máá yá tu jīni ñúhún sáha ya nájnūhun ni casáha sutū cácujuhnu jenahán, jeē ndiquiví ni casocō de quití siquī cuēchi máá de xīhna gā, te sáá te siquī cuēchi ñayuu. Chi ìn jīnu-ni ni socō yā maá yá jehē yō, te ni cuu-ni.

²⁸ Chi ni jeni ley Moisés táca sūtū cujéhnú jeē tú na fuerza squícu vāha. Yūcuán na te cuéé gá te ni cahān tēyí Yāā Dios. Te jīn jēē ni cáhān tēyí yá, te ni jeni ya Sēhe ya jeē cúu ya sutū cujéhnú, te sutū ndaā sutū vāha cúu ya ní cáni.

Jeē ndíso jniñu Cristo siquī ìn contrato jeé

8

¹ Núu súcuan te jnūhun cánuú gá jeē jé ni cahān rī cúu yāhá: Névhā yó ìn sutū cujéhnú nájnūhun ni cahān rī, te ndéé yá lado váha mesa nuū ndácu jniñu máá Yāā cujéhnú nde andiví.

² Te vijna te cúu ya sutū nde andiví, jeē cúu ndije lugar ìi jeē ni sáha máá Jítoho yō Yāā Dios, nasūu ñáyuu. Chi tu cáa nájnūhun vehe ìi jenahán jeē ní casáha ñayuu.

³ Te táca sūtū cujéhnú ni jeconaā de jeē socó de ndajniñu jīn quití nuū Yāā Dios. Núu súcuan te Jesucristo suni ni jīni ñúhún jeē socó yā jeē cúu ya sutū.

⁴ Te núu ní íyo ga yā ini ñayiví, te ni ma quijnáhan jeē cúu ya sutū jīn táca gá sutū, chi níni cásocō gā de quití nájnūhun cáhán ley Moisés.

⁵ Te jniñu casáha de, tu quijnáhan jīn jēē iyó andiví. Chi cúu ìn muestra-ni jeē steén siquī andiví. Te cúu nájnūhun jeē ni cáhān Yāā Dios jīn Moisés quiví ní quejé de sáha de vehe ìi jenahán: Coto vāha ró jēē sáha ró táca ndajniñu nájnūhun jító jeē ni steén rī nuū rō nde xiní yúcu, áchí Yāā Dios jīn de.

⁶ Te vijna te sáha Cristo jniñu jéhnú ndasí gá vésú jeē casáha táca sūtū ún, chi ndíso jniñu ya siquī contrato jeé jēē yóhyo vāha ga, chi ndíso jnūhun jéhnú ga jeē ni jéjnūhun Yāā Dios.

⁷ Chi contrato ley xīhna ñúhún, núu jeē ni sáha jeē quéé vāha jniñu núú, te tuá cánuú jēē cóo contrato uū.

⁸ Chi ñayuu jenahán un jéē tu ní cáquendōo ndaā, suhva ni cahān Yāā Dios jīn i, áchí tutu:

Quiji quiví jeē nasáha ri ìn contrato jeé

jīn ñáyuu Israel jīn ñáyuu Judá, áchí Jítoho yō Yāā Dios.

⁹ Te ma cóo nájnūhun contrato jeē ni sáha ri jīn jí i jenahán,

quiví jeē ní jniñu ri ndaha de jijnáhan de,

te ni quenehen ri de ini nación Egipto.

Chi tu ní cásquícu vāha de jīn contrato ley rī.

Jeē yúcuan tuá ni táñúhún rí de, áchí Yaā Dios.

¹⁰ Núu súcuan te suhva coo contrato jeē nasáha ri jín ñayuu Israel,

nde na quíji quívi yúcuan, áchí Jítóho yō Yaā Dios:

Sáha ri jeē jécūhun ley rī nuū jeē níjnūní i,

te suni ini anuá i tee ri jnūhun ley rī.

Te cuu ri Yaā Dios maá i, te maá i cuu ñayuu maá rí.

¹¹ Te tuá jíní ñúhún stéén i nuū jnáhan i nuū ñáni i,

návāha cuni i ndese Yaā cúu Jítóho í.

Chi ndíhi i cuni ndese Yaā cúu rí,

nde ñayuu núu ga jín ndé ñayuu kujéhu ga.

¹² Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuéchi ni casáha i.

Achí Yaā Dios.

¹³ Te jeē ni cáhān yā jeē cuáha ya ñn contrato jeé cúu jeē ní cachi yā jeē tuá cuajniñu contrato xihna ñúhún. Te ñn jeē ní cutúhú jéé tuá jejniñu, chi jíní yō jeē je yajni naa.

Vehe ñ ñayívi yáha ní steén ndese cáa andívi

9

¹ Te ndaā chi contrato xihna ñúhún ní ndacu jniñu ndese chiñúhún i ya, jín ndese coo ñn vehe ñn ini ñayívi yáha.

² Te ni cuvāha vehe ñn ún, te ni ñyo uū cuarto. Te cuarto xihna ñúhún jéé naní cuarto ñn, ni ñn candelero oro jín mesa oro jín pan ñn.

³ Te ni ñyo sahma jeē ndíta caa jeē ndíhyú ñnga cuarto jeē naní cuarto ñn ndasí gá.

⁴ Te ini un ní ñyo ñn altar oro nuū cayú sūje cútú, jín yéjnū jeē ñúhun contrato ley, te máni oro cúu ní síquí yejnú. Te ini yejnú un ñne ñn tijehēn oro jeē ñúhun maná jeē ní cuun andívi. Te suni ñne vara Aarón jeē ní nane numa, jín tabla yuū jeē yosó jnūhun contrato ley.

⁵ Te síquí yejnú un ní cahīn ndindúú figura ndajéhé querubín jeē steén jeē ñne Yaā Dios. Te ni sáha cuandahū síquí tapa yejnú nuū ní cóso yuyú níñi jeē ndáhva cuéchi. Te tu núne yó cáhān gā yō síquí tāca yúcuan vijna.

⁶ Te ná ni jínu tācá un, te núu-ni núu-ni quívicoo sutū ini cuarto xihna ñúhún jéé casáha de jniñu jeē cúu de sutū.

⁷ Te ini cuarto uū, chi tu cúu quívicoo na-ni sutū jín ñnga ñayuu, chi máñúhún-ni sutū kujéhu ga cúu jeē quívi, te suni ñn-ni vuelta jeē cuiyá. Te suni ma cúu quívi de núu tú níñi quiti jeē socó de nuū Yaā Dios jeē síquí cuéchi maá de jín síquí cuéchi ñayuu.

⁸ Te jín yúcuan stéén Espíritu Santo nuū yō jeē ná ni ñyo ga cuarto ñn xihna ñúhún ini ñayívi, te tu ní núne ichi jeē quívi ñayuu ini lugar ñn ndasí jeē cúu andívi.

⁹ Chi tāca yúcuan cúu jeē ní steén ndese cúu tiempo vijna. Chi jeē ní casocó i ndajniñu jín quiti nuū Yaā Dios, chi tu ní cúu cuiti sáha jeē quéndōo

ndoo ánuá ñayuu ní casocō ún.

¹⁰ Chi tǎcá un ní steén máni siquī yiqui cúñu yō, ndese caji yō, ndese coho yó, ndese ndundoo yó. Te ni jejníñu máa-ni nde ni quiji Cristo jíin iin modo vǎha ga.

¹¹ Chi vijna je ni quiji Cristo, te cúu ya sutū cujéñu ga jeē ndíso jníñu ya siquī tǎca jéé vǎha jeē ní quiji vijna. Te cúu ya sutū ini lugar iī nde andiví jéé cujéñu ga te vǎha ga vésú cuarto iī jenahán. Te nasūu jéé ní casáha ñayuu cúu, chi nasūu cuenta ñayiví yáha cúu.

¹² Te jeē ni quíví ya ini lugar iī ndasí gá nde andiví, te nasūu jíin níñi ndixúhú ni níñi becerro, chi jíin níñi maá yá ni quíví ya, ni socō yā iin jíinu-ni jeē ní cáni. Te súcuan ni jnama ya yohó jéé cótecu yō ní cáni.

¹³ Chi nde jenahán te níñi stǎquī jíin níñi ndixúhú jíin yáa becerro jeē ni cáyū nuū altar, ni cacosō yuyú de siquī ñayuu jeē tu iyó ndoo ánuá i, te súcuan ni ndundoo i nuū yā.

¹⁴ Te núu ni nihīn jníñu níñi tǎcá quiti ún, te nagā ni cuu níñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē iyó ní cáni. Te níñi yā nácate ánuá yō nuū jníñu néé jéé cúu yō sáha. Te súcuan te cuu cuajníñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya siquī iin contrato jeé. Chi ni jihī yā, te súcuan ni quende yā cuēchi ni casáha ñayuu ná ni iyo i chíji con-

trato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeé cóo ní cáni, nájnūhun ni jejnūhun ya.

¹⁶ Chi cúu nájnūhun núu sáha iin tēe acta jeē cahán siquī tahū, te nde na cúu de te níhín jníñu.

¹⁷ Chi núu técu gā tēe ni sáha, te tu níhín jníñu. Te nde núu ni jihī de, te sáa te jéjníñu.

¹⁸ Te suni súcuan contrato xīhna ñúhún, suni ni jini ñúhún cucutú jíin níñi quiti ní jíhī. Te contrato jeé chi ni cucutú jíin níñi Cristo jeē ni jíhī yā.

¹⁹ Chi ná ni cuu ni cachi Moisés tǎcá jniñu ndácu contrato ley un núu ndivii ñayuu, te ni quihin de níñi becerro jíin níñi ndixúhú jíin ndute, te jíin ixi cácuéhé jíin yúcū hisopo ni cosō yuyú de siquī libro ley jíin siquī ndivii ñayuu.

²⁰ Te ni cahán de: Yáha cúu níñi jeé cúcutú contrato ley jeé ní sáha Yaā Dios jíin yó, achí de.

²¹ Te suni níñi un ní cosō yuyú de nde maá vehe ií jíin tǎca ndajníñu ni cajejníñu de jeé cáchiñúhún de ya.

²² Te je yajni ndihī ndajníñu, chi cahán ley un jeé jíni ñúhún ndundoo jíin níñi. Te núu ma cáti níñi te ma cóne cáhnu ni yā nuū cuēchi núu.

Jeē ni sócō Cristo maá yá jeé quénde yā cuēchi

²³ Núu súcuan te tǎcá ndajníñu un jéé cácuu muestra tǎca jéé iyó andiví, ni jini ñúhún ndundoo jíin níñi quiti.

Te tāca máá jēē iyó andiví, chi ni jini ñúhún ndundoo jíin níñi Cristo jeē yóhoyo vāha ga.

²⁴ Te Cristo chi tu ní quívi ya ini lugar i jeē ní casáha ñayuu, chi ñin muestra-ni ni cuu un jēē steén ndese iyó lugar i ndije nde andiví. Chi máá andiví ní quívi ya, te vijna íne ya nuū Yaā Dios jeē cahán yā jehē yō.

²⁵ Te máá sūtū cujéhu ga quívi de tāca cuíyā ini cuarto i gā jeē socó de níñi quiti. Te Cristo tu ní sócō yā máá yá cuehē jínu, chi ñin jínu-ni.

²⁶ Chi núu jeē súcuan te cánuú jēē cuehē jínu ndoho ya nde ná ni jecōo ñayiví te nde vijna núú. Te tuú chi sa tiempo cuándihí yāhá ni quenda ndijin yā ñin jínu-ni jeē ní cáni, ni socó yā máá yá jeē ní quende yā cuēchi.

²⁷ Te nájñūhun ni cundaā jeē cúu tāca ñayuu ñin jínu-ni, yūcuán na te sándaā Yaā Dios jniñu i,

²⁸ suni súcuan Cristo ni jihí yā ñin jínu-ni jeē ní sócō yā máá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jēē socó tucu ya máá yá jeē quende yā cuēchi, chi sa suhva jeē jnáma ya ñayuu jeē cándetu i jeē ndíji ya.

10

¹ Chi ley Moisés ni cuu ñin muestra-ni tāca jēē váha jeē ní quiji jíin Cristo, ñin jeē steén-ni ndese coo máá jēē váha. Jeē yúcuan tu cúu cuiti sáha ley un jēē quéndōo ndaā ñayuu jeē quíjicoo i nuū Yaā

Dios jeē cásocō i quiti nuū cuiyá nuū cuiyá.

² Chi núu ní cúu sáha ley un jēē quéndōo ndaā i, te jecuiñi jeē cásocō i quiti núú. Chi núu ní cúu, te ñin jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ní sáha i cuēchi núú.

³ Te tuú chi jeē cásocō i quiti ún táca cuíyā, sa sáha jeē núcūhun ni i cuēchi i.

⁴ Chi níñi stíquī jíin níñi ndixúhú, ma cúu cuiti quende cuēchi.

⁵ Jeē yúcuan ná ni quiji Cristo ini ñayiví, te ni cahán yā jíin Yaā Dios:

Jeē jéhni i quiti jíin jēē jéhe i ofrenda nuū ní, chi tu ní nújnahan ni ní.

Te ni sātūhva ní yiqui cúñu máá ná jeē socó na.

⁶ Te tu ní cúsi ni ni jēē jéhu i quiti te sócō i ti jeē ndúndoo cuēchi i núú.

⁷ Yūcuán na te ni cahán ná: Yāha véji ná jēē squícu ná jniñu jeē nújnahan ni ní, Tátā Yaā Dios.

Chi súcuan je yósó jnúhun na núu tútu.

Achí Jesús.

⁸ Xihna gā ni cahán yā jeē tu ní nújnahan ni Yaā Dios te tu ní cúsi ni yā jeē jéhni i quiti te jéhe i ofrenda, jíin jēē jéhu i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

⁹ Te ni cahán gā yā: Yāha véji ná jēē squícu ná jniñu jeē nújnahan ni ní, Tátā Yaā Dios. Te jeē ní cahán yā súcuan, te ni sáha ya jeē jecuiñi jeē cásocō i quiti, chi ni socó yā máá yá.

10 Te ni sáha Yaā Dios jeē iyó ndoo iyó íi yō nuū yā siquī jeē ni sáha Jesucristo jeē núnjahan ni Yaā Dios, suu jeē ni sócō yā yiqui cúñu yā ññ jínu-ni jeē ní cáni.

11 Te tāca sūtū ún ndiquivī ni cahīn de ni cajejníñu de nuū yā, te cuehē jínu cájehni de suu quitī jeē socó socó de. Te tācá un chi ma cúu cuiti quende cuēchi.

12 Te Cristo chi ññ jínu-ni jeē ní cáni ni sócō yā maá yá jeē siquí cuéchi yó. Te sáa te ni cucōo ya lado váha Yaā Dios nuū kujéhu ya.

13 Te yūcuan ndétu ya vijna nde quiji quivī jeē quénde yā poder tāca jéē jító uhū nuū yā.

14 Chi jeē ni sócō yā maá yá ññ jínu-ni, te ni sáha ya jeē ní cáni quendōo ndaā ñayuu ni sándoo ya.

15 Te máá Espíritu Santo suni cájí cáhán yā siquī jnúhun yáha, chi xihna gā cahán yā:

16 Suhva coo contrato jeē nasáha ri jíin i,

nde na quíji quivī yūcuan, áchí Jítóho yō Yaā Dios:

Sáha ri jeē jécūhun ley rī ini anuá i,

te suni nuū jeē níjnūnī i tee ri jnúhun ley rī.

17 Yūcuán na te cáhán gā yā:

Ma núcūhun cuiti gā ni rī tāca cuéchi jíin jniñu néé ní casáha i.

Achí yá.

18 Nūu sūcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quivī yó núu Yaā Dios

19 Jeē yūcuan hermano, ma ññ jeē cáni ni yō, chi cuu quivī yó lugar ññ ndasí ndé nuū iyó Yaā Dios, siquī jeē ní jeti ññ Jesucristo.

20 Chi ni nune ya ññ ichi jéé jéé cótecu yō ní cáni sáha ya. Chi ná ni jihī yā te ni tahndē sahma ndíta caa jeē ndihyú lugar ññ ndasí gá ini vehe ññ. Te sūcuan ni steén Yaā Dios jeē nūne quivī yó lugar ññ ndasí gá nuū iyó yá.

21 Te Jesús cúu sutū kujéhu ndasí jeē ndító yóhó ñayuu cácuu sēhe Yaā Dios.

22 Nūu sūcuan te na quívicoo yó núu Yaā Dios, te na cóo ndije ndaā anuá yō, te na cándíje ññhin yó jéé iyó ndáa ndihi jnúhun ya. Chi jíin níññ Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute.

23 Te na cuíñi ññhin yó jíin jnúhun jeē cácahán yō jeē ññhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ní jéjnūhun ya nuū yō.

24 Te na nácani ni yō ndese sthví jnáhan ni yō jeē cundáhú gá ni yō jnáhan yó, jíin jéé sáha yó jniñu váha.

25 Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na sthví jnáhan ni yō, chi je cájini yō jeē cuácuyajni quivī ndíji ya.

26 Te núu je ni jecūhun ni yō te ni jetáhú yó jnúhun ndaā,

te núu máni sáha sáha-ni yó cuéchi, núu súcuan te tuá na inga iyó jéé cúu siquī cuéchi yó.

²⁷ Chi sa quéndōo máni ga jnūhun xeēn siquī yō jeē quiji quivī juicio te quiji yáñuhūn xeēn jeē cayū ñayuu jeē cájito uhū i ya.

²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cúndáhú ni iyó.

²⁹ Te nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjníñu niñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū maá Espíritu Yaā Dios jeē sáha jeē váha yóhó.

³⁰ Chi je jíni yō jeē ni cáhān maá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítoho yō. Te suni cáhān: Máá Jítoho yō sándaā yā siquī cuéchi ñayuu yā.

³¹ Núu súcuan te xeēn ndasí cúu jeē quivī ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tijni jnūndóho xeēn.

³³ Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnúhun cuiñi ró jíin ñayuu ni candoho

súcuan.

³⁴ Chi ni cacundáhú ni rō ñayuu ní cahīin vecāa jeē siquī yā, te ni cacusiñ ni rō vésú ni caquende ñayuu ndajníñu ró. Chi ni casáha ró cuenta jeē ndé andiví cánevāha ró iñ tahū jeē váha ndasí gá jeē coo ní cáni.

³⁵ Núu súcuan te ma siaá rō jnūhun jeē ní candije ndije ró jéé váha ni yā, chi cuehē ndasí táhū nihīn rō siquī ún.

³⁶ Chi cánuú jéé cuándeyí ni rō návāha sáha ró jéé nújnahan ni Yaā Dios, te nihīn rō jeē ni jéjnūhun ya.

³⁷ Chi cáhān tutu iñ: Iñ núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuéchi i, cotecu i jeē candije i jeē sáha ri jehé i.

Te núu na cáca yátá i, te ma cúsiñ ni rī jíin i.

Achí Yaā Dios.

³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácandije yó jéé nihín tahū yō cotecu anuá yō.

Siquī jnūhun cándije

11

¹ Te jeē candije yó, suu cúu jeē cúndaā ndije ni yō jeē nihín yō tāca jéé ñūhun ni yō, jíin jéé jíni vāha yó jéé iyó ndije tāca jéé tu cájito yó núu vijna.

² Te ñayuu jenahán chi ni jejnúhún yá i siquī jeē súcuan ni cacandije níhin i.

³ Siquī jeē candije yó cúu jeē jécūhun ni yō jeē ni sáha Yaā Dios ñayiví jíin jnúhun ni cahān-ni ya. Te jíin poder Yaā

Dios jeē tu jító yó núū, ni jecōo tāca jéē jító yó núū.

4 Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Caín. Te jeē yúcuan ní jejnūhún yá jeē iyó ndāā de, chi ni jetáhú yá jeē ni sócō de quití nuū yā. Te vēsú ni jihī de, te cáhán gā ejemplo de jíin yó nde vijna, chi ni candíje ndaā de.

5 Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jihí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jíin tāca jéē ni sáha de.

6 Te núu tu cándíje yó jéē sáha ya jehē yō, te tú na modo cusī ni Yaā Dios jíin yó. Chi ñayuu jeē cuní quivicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñáyuu jeē nducú i candíje i ya.

7 Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

8 Te Abraham ni candíje de jeē sáha ya jehē de, te jeē yúcuan ní jetáhú de ná ni

cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de.

9 Ni candíje de jeē sáha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ññ, te suni súcuan Isaac jíin Jacob, chi sēhe de ún suni ñnuú níhīn tahū i jíin de jeē ni jéjnūhun ya.

10 Chi ni ñūhun ni de condee de máá ñuu andiví jéē iyó cutú cimientu, te máá Yaā Dios ni jequin yā ni sama ya ñuu ún.

11 Te suni ni candíje máá Sara jeē sáha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu ñn sēhe yí ña, chi ni candíje ña jeē squícu Yaā Dios jeē ni jéjnūhun ya.

12 Te súcuan ni cuu jeē ni táhū cuehē ñayuu ni sáha ñn-ni Abraham, vēsú je jéhnū ndasí de. Te yucūn de ni nducuehē ndasí, nájnūhun quimi andiví, jíin ññti yumar, jeē ma cúu cuiti cahu yó.

13 Te tāca téē cándíje un, ní cajihí de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusī ni de jeē cóto de inga tiempo. Te súcuan ni cacahān de jeē ñáyuu ñuu jicá ñáyuu tatú cácuu de ini ñayiví yáha.

14 Te tāca téē jeē cahán súcuan, chi stéén cají de jeē nducú de ñn ñuu jeē cúu andiví núu cúu ñuu maá de.

15 Chi núu jeē cānacani ni de siquī ñūū nuū ní quendacoo de, te íyó modo jeē nāndicó cóo de te núu jeē cáconi de núu.

16 Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuān tu cúcanu Yaā Dios jeē naní yá Yaā Dios de jíjnāhan de, chi je ni sātūhva ya ñn ñuu nuū cóyūcú de.

17 Ni candíje Abraham jeē sáha ya jehē de, te jeē yúcuān ní jehēn de jíin Isaac jeē socó de i, ná ni jito ndee ya de. Te ni íyo tūhva de jeē socó de sēhe de un jēē mañúhún ni i nuū de, vēsú ni nihīn de jnūhun jeē ni jéjnūhun ya suhva siquī i:

18 Isaac cúu tēe jeē squejéé rí yucūn rō quihīn, achí jnūhun ni jejnūhun ya.

19 Te ni sáha de cuenta jeē cúu nastécu Yaā Dios i. Te nájñūhun súcuān ni cuu, chi cuu cahān yō jeē nájñūhun ni jihī i te ni natecu i nuū de, chi ni jesi-ni ya jeē ma cáhni de i.

20 Ni candíje Isaac jeē sáha ya jehē de, te jeē yúcuān ní cahān de jeē vāha tahū nihīn sēhe de Jacob jíin Esaú tiempo quiji.

21 Te suni súcuān ni candíje Jacob, te jeē yúcuān, náa je yajni cuu de te ni cahān de jeē vāha tahū nihīn ndīndúú sēhe yí José. Te yítuu de vara de, ni chíñúhún de Yaā Dios.

22 Te suni súcuān ni candíje José, te jeē yúcuān, náa cuacuyajni cuu de, te ni cahān de jeē tāca yúcuān Israel, ñn quiví quendacoo i nación Egipto. Te ni ndacu de jniñu

jeē chíndūji i yiqui de ñuu nuū quívicoo i.

23 Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuān ní cacondito sáhí de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yí.

24 Te suni súcuān ni candíje Moisés, te jeē yúcuān ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto.

25 Chi sa ni cuu ni de ndoho de jíin tāca jnāhan de ñayuu Yaā Dios, nasūu jēē cusī ni de jecu-ni tiempo jíin cuéchi.

26 Chi ni sáha de cuenta jeē núu cahān neé ñayuu siquī de jeē siquí Cristo, te yúcuān sáha jeē cucá ndasí gá de ndihí jeē ndíso jnūhun Yaā Dios, vēsú jeē nihín de ndihí ndajniñu cúcá íyó nación Egipto. Chi ni ñuhun ni de jeē cuáha ya tahū de.

27 Te jeē súcuān ni candíje de, jeē yúcuān ní quenda de nación Egipto cuahān de. Te tu ní yúhú de jeē quití ni rey nuū de. Chi ni ñn nihīn de siquī jniñu sáha de, chi ni sáha de cuenta jeē je jito de nuū Yaā jeē tu cúu coto yó núu vijna.

28 Te jeē súcuān ni candíje de, te jeē yúcuān ní cahān de jeē na cáhni ñayuu londe pas-cua. Te ni ndacu de jniñu jeē na cóso yuyú i niñí tī yehyí i, návāha núu na quíji ndajéhe jeē cáhni yā tāca sēhe nuú ñayuu Egipto, te ma cáhni yā sēhe nuú ñayuu Israel.

29 Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ni cajihī de.

30 Ni cacandíje soldado jeē sáha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quivī.

31 Te Rahab, vēsú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condēhé yuhu ndese íyó ñuu ña. Te jeē yúcuan tu ní jíhí ña jíin ñayuu nīhni ni ñuu ña ún.

32 ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jnúhun ya nde jenahán.

33 Ni cacandíje de jeē sáha ya jehē de jíináhan de, te jeē yúcuan ní cacundeyí de ni canajñi de tācá ñuu náhnu, te vāha ni candacu de jniñu nuū, te ni chindéé ñáhán yá de nájnúhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de.

34 Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihīn ni de náa tuá fuerza de núú, te ndacuī teyí ní íyo de nuū guerra, te ni cacundeyí

de siquī soldado tācá ñuu jicá jeē jíto uhū ún de.

35 Te sava ñahan ni natecu sēhe ña jeē ni jíhī i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu váha ga i andiví.

36 Te sava ga i ni casácatā ñayuu nuū i, te ni cacani ñayuu i, te nde ni caconuhñi cadena i ni cahīin i vecāa.

37 Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñi lánchi máá ñi ndíxúhú ní cañuhun i. Ni candoho ndáhú i, ni cajito i jnúndóho, ni castóho ñayuu i.

38 Vāha ndasí ñayuu ni cacuu i jeē tú cuiti ñayuu ñayiví súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīin i yaū cava jíin yāū ñuhun.

39 Te tāca ñayuu yáha, vēsú ni jejnūhún yá i jeē ní cacandíje nīhin i jeē sáha ya jehē i, te tu ní cájito i nuū jeē ni jéjnūhun ya.

40 Chi ni sátūhva Yaā Dios ñi jniñu vāha ga, te suu cúu jeē sáha Cristo jíin yó, návāha ñi cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndihī tahū i.

Jeē na cócunuū yō nuū maá ñi-ni Jesús

12

¹ Te íyó cuéhē ndasí ñayuu un jée ní cacandíje nīhin i jeē sāha ya jehē i, te nájñūhun ní jicó ndūū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jée sajnéñu jíin cuéchi jeē ní cáan yó jíin. Te na cuándeyí ní yō cunu yó jíin carrera jeē ní jéhe ya jeē cunu yó.

² Te na cócunuū vāha yó Jesús, Yaā jeē ní scándíje yóhó te sāha ya jeē íje vāha yó jíin jñūhun ya nde jíinu ije yó. Chi máá yá ní jendeyí ní yā ní ndoho ya jicā cruz. Te vēsú jñūhun canu cúu jeē súcuan cuu yā, te tu ní sāha ya cuenta. Chi ní ñuhun ní yā jeē sa cusī ndasí ní yā ná ní cuu ní ndoho ya. Yūcuán na te ní cucōo ya lado váha mesa nuū ndácu Yaā Dios jñiñu.

³ Te na nácani ní rō ndese ní jendeyí ní yā ní ndoho ya jeē ní sāha ndevāha ñayuu iyó cuéchi jíin yá. Te súcuan te ma cuíta ró ní ma ndínuu ní rō jíin jñúndóho.

⁴ Chi ní ná tu ndoho ró jée ndé cuu rō jeē cánducú ndéyí ró snáā rō cuéchi.

⁵ Te sanaa te je ní canaa ní rō jñūhun cáhán tutu íi, jeē stihví ní Yaā Dios rohó jée cácuu ró séhe ya:

Séhē, ma quití ní rō jeē snahnú Jitoho yō rohó, te ní ma ndínuu ní rō núu cáhán yā nuū rō.

⁶ Chi Jitoho yō snahnú yā ñayuu jeē maní yā jíin,

te jéhe ya castigo tāca jée náquihin ya cuu séhe ya.

Achí tutu.

⁷ Núu súcuan te na cuándeyí ní rō jeē snahnú Yaā Dios rohó, chí sāha ya jíin ró nájñūhun sāha tátá jíin séhe. Chí tú na séhe íyó jée tu snahnú tátá i.

⁸ Te núu ma snahnú yā rohó, nájñūhun ndóho tāca séhe, núu súcuan te nájñūhun séhe ndáhú cácuu ró, nasūu séhe ndíje ya.

⁹ Te tátá yō ñayívi yáha, suni ní snahnú de yóhó, te ní íyo yíñúhún yó jíin de. Te nagā ní cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni.

¹⁰ Te ndaā chí máá de ní casnahnú de yóhó jecu-ní quívi, ndese ní cuu ní maá de. Te máá yá chí snahnú yā yohó ñn modo jeē quéndōo vāha ga yō, návāha coo ndoo yó nájñūhun íyó ndoo máá yá.

¹¹ Te ndaā chí tu cácusī ní yō maá hora jeē ndóho yó castigo, chí sa cúcuíhyá ní yō. Te cúcuéé gá te cuni yō jeē ní quéndōo ndaā yō te coo ndeyí sī ní yō jeē ní snahnú yā yohó.

Siquí ñayuu jeē casquéhichí i jñūhun cáhán Yaā Dios

¹² Núu súcuan te ma cóo ró nájñūhun tēe ní cuíta íi ndaha te quísi i xini yití, chí sa ndacuí na sāha ró máá ró nuū jñúndóho.

¹³ Te sāha ró ichi ndóo caca ndaā rō, návāha nduvāha róhó jée tu fuerza ini, jeē cácuu ró nájñūhun tēe chácuá jeē tu cúu caca vāha.

14 Te na cóndihvī ni rō jeē condee manī rō jíin táca ñáyuu, jíin jéē cóo ndoo coo īi rō nuū yā. Chi ma cúu coto ni ñin ñayuu nuū maá Jítóho yō te núu tu iyó ndoo i.

15 Te coto má cáca yátá ni ñin ró te scuíta ró jnúhun jeē sáha Yaā Dios jeē váha rōhó, návaha tú cuu ró nájñūhun ñin yucū uvuá jeē stívi te sáha dañó jíin cuéhē ñayuu.

16 Te ni ñin ró ma cáca jnéni. Te ni ma cóo jéē ni rō nuū Yaā Dios, nájñūhun ni īyo Esaú. Chi máá ñin cohō ndeyu ni jicān de nuū ñáni de, ni sama de jíin derecho de jeē cúu de sūchi núú, te súcuan ni xícó de derecho de.

17 Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chí tuá ni táñúhún Yaā Dios de. Chi tu ní nihīn jniñu jeē ní nacani ni de, vésú ni nducú ndéyí de te nde ndahyú de.

18 Te rōhó jíjnáhan ró tu ní quíjicoo ró núu īyo cúu, nájñūhun īyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jíto, te quéé tachī xeén.

19 Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i.

20 Chi tu ní cúndeyí i jíin jnúhun jeē ní ndacu ya jniñu nuū i, chí ni cahān yā: Vésú ñin quití-ni núu quívi tí yucu yáha, jíni ñúhún cuu tī jíin yúu

chí jíin lanza, achí yá.

21 Te siquī jeē īyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

22 Te vijna rōhó jéē cácandíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē iyó andívi, nuū cáhīyo tútú cuéhē ndasí mil ndajéhé cáchiñúhún Yaā Dios.

23 Te ni quívicoo ró núu cáyūcu tútú ñáyuu cácandíje jeē cácuu sēhe Yaā Dios, jeē iyó lista i andívi. Te ni quívicoo ró núu Yaā Dios, Yaā sándaā jniñu ndíhi ñayuu, jíin núu cáhīyo ánuá ñayuu vāha jeē jé ni squéndōo ndaā yā i.

24 Te suni nuū maá Jesús, Yaā ndíso jniñu siquī contrato jeé ní quívicoo ró. Te yahu ndasí gá jniñu sáha niñī yā jeē ni jéti jeē ndáhva cuēchi yó, nasūu niñī Abel jeē ni jicān cuēchi.

25 Núu súcuan te coto má squéhichī rō jnúhun jeē cahán yā jíin ró jíjnáhan ró. Chi ñayuu jeē tu ní cájetáhú ná ni cahān yā jíin i ñayívi yáha, tu ní cáca cu i. Te xeén gā ndoho yóhó te núu ma cuatáhú yó nuū yā jeē cahán yā nde ichi andívi núu súcuan.

26 Te nde saá ní quísi i ñayívi jeē ni cahán yā. Te vijna chí cahán yā: ñin na jínu quísi rí ñayívi, te nasūu máa-ni ñayívi, chí suni tāca jéē ín andívi, achí yá.

27 Te jnúhun yáha jéē cahán, ñin na jínu, chí cúní cahán jeē

téjiyo ya tāca jēē tu íyó cutú, suu jeē ní cuvāha, návāha na quéndōo jeē cóo cutú ní cáni.

²⁸ Núu súcuan te cuāha Yaā Dios ñn ñuu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návāha cusī ni yā jíin yó.

²⁹ Chi Yaā Dios maá yó cúu nájnūhun ñn ñuhūn jeē snáá ndihī jeē neé.

Ndese sáha yó te cusī ni Yaā Dios

13

¹ Ma jécuiñī rō jijnáhan ró jeē cundáhú ni rō hermano rō cá candíje.

² Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ní cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

³ Te conahán ró chindéé ñáhán ró ñayuu cáhīin vecāa, chí sáha ró cuenta jeē nájnūhun cáhīin cáhnu ró jíin i vecāa. Te suni nacani ni rō jehē jnáhan ró jēē cándoho i sáha ñayuu, chí núu súcuan coo jíin máá ró te suni ndoho ró.

⁴ Coo yíñúhún ró síquī jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñayuu casíquí ndéē jnáhan.

⁵ Te ma ndíyo ni rō xūhún, chí na cóo sī ni rō jíin jēē cánevāha ró. Chi máá yá ni cahān: Ma siaá cuiti rī rohó, ni ma stóo cuiti rī rohó, áchí yá.

⁶ Núu súcuan te ma ñn jeē cáni ni yō, chí cuu cahān yō:

Máá Jítoho rī chindéé ñáhán yá ruhū,

te ma yūhu rí núu na vé cuni ñayuu sáha i jíin rí.

Achi yō.

⁷ Te na núcūhun ni rō tāca pastor rō, jeē ní castéén de jnúhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te na ndácu ró de jeē ní candíje de jeē sáha ya jehē de.

⁸ Te Jesucristo chí ñn-ni cáa ya ichi yátá jíin vijna jíin ní cáni.

⁹ Núu súcuan te ma cuáha ró jnúhun candíje ró táca jnúhun jeē sīn cáhán jeē tu quíjnáhan jíin jnúhun máá yá. Chi íyó váha jeē na íje ánuá yō sáha jnúhun jeē váha ni yā jíin yó. Te tu jíni ñúhún yó jnúhun jeē tajnúní síquī jeē yéji yō, chí tu nihīn jníñu cuiti jíin ñayuu cáhīin jíin.

¹⁰ Te máá yó chí cánevāha yó ñn jeē ní sócō máá jehē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihīn de nuū yā jeē ní sócō yā máá yá.

¹¹ Te sūtū cujéhnū ga, ná ni socō de niñī tācá quiti ini cuarto iī gā jeē síquí cuéchi, te yíquí cúñu tī ni cajehmu de ichi yátá ñuu.

¹² Te suni súcuan ni ndoho máá Jesús ichi yátá ñuu, návāha jíin níñī maá yá te sándoo ya ñayuu.

¹³ Núu súcuan te ma cóo inuú gā ni yō jíin ñayuu tu cá candíje, chí nájnūhun quihīn

yō jín yá ichi yátá ñuu, te na ndóho yó jín yá jeē sácata i.

14 Chi ñayivi yáha tu iyó ñuu nuū coo yó ní cáni, chi sa cánducú yó máá ñuu nuū cóyūcu yó quiví quiji.

15 Núu súcuan te jeē jín Jesucristo te níni na cáhán yō jeē yóhyo cújéhnú Yaā Dios, chi suu cúu nájnūhun ñn jeē socó yō nuū yā, suu jeē nácuatáhú yó nuū yā.

16 Te ma náā ni rō sáha vāha ró núū jnáhan ró, te cuāha ró jéē cúmanī nuū i. Chi nájnūhun ñn jeē cásocō rō nuū Yaā Dios cúu táca jéē yáha, te cúsiñ ni yā jín.

17 Te cuandije ró núū tēe cácuu pastor rō, te cuandetū rō nuū de. Chi cándito de róhó jéē quéndōo vāha ánuá rō, chí cájini de jeē cánuú nacuāha de cuenta nuū yā. Te condihví ni rō sáha vāha ró, návāha cusīñ ni de siquī rō te ma cucuíhyá ni de siquī rō. Chi núu tu súcuan te ma cóo jeē vāha jín ró.

18 Te cacān tahu rō jehē rī jijnáhan rī. Chi vāha iyó ni anuá rī jeē tú na cuēchi rī. Chi cácuni rī caca yíñúhún rī jín táca jniñu.

19 Te suni cáhán ndahú rī jín ró jeē cacán tahu ndasí ró jehē maá rī, návāha cuāha ya jnūhun jeē yachī gā cuajeē tucu rī nuū rō.

Bendición jín saludo jeē sándihí

20 Te máá Yaā jeē jéhe jnūhun ndeyí sīñ ni nuū yō, ni nastécu yā Jitoho yō Jesucristo méhñu ndíyí. Te Jesús cúu pastor cújéhnú jeē

ndíto ñayuu cácuu nájnūhun lanchi ya. Chi jín níñi yā ni sácutú yá contrato jeé yá jeé coo ní cáni.

21 Te ñūhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñūhun ni rī jeē jín fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jín. Te na cáhán yō jeē yóhyo luu cújéhnú ya ní cáni. Amén.

22 Hermano jijnáhan ró, cáhán ndahú rī jín ró jeē cone cáhnu ni rō jeē stihví ni rī rohó jín jecu-ni jnūhun ni tee rī nuū carta yáha.

23 Te cástūhun rī jeē hermano yō Timoteo, je ni quenda de vecāa. Te núu yachī quiji de yāhá, te cuajecoo ndindúú rī nuū rō coto jnáhan yó.

24 Te cahān rō jín táca tēe cácuu pastor rō jín táca hermano cácandije jeē sándeyí ni de, áchí rī. Te ñayuu Italia suni cácahān i jeē sándeyí ni rō.

25 Te ñūhun ni rī jeē na sáha ga Yaā Dios jeē vāha róhó jijnáhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaā Dios jíin Jítóho yō Jesucristo. Te téé ri carta yáha cuájeē nuū rohó ñayuu cacandíje jeē cácuu ró ndihúxí uū yucūn Israel, te ni cajitē núu ró níí ñáyiví. Sándeyí ni rō jijnáhan ró.

Yaā Dios sáha jeē jécūhun ni yō

2 Ñánī mánī, na cúsiī ndasí ni rō jijnáhan ró núu quiji tijni táca jnūndóho siquī rō.

3 Chi cájini rō jeē núu jító ndee jnūndóho róhó núu cacandíje vāha ró, te yūcuan sáha jeē cútūhva ró cuándeyí ni rō.

4 Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

5 Te núu ndé ñin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i.

6 Te jeē jicán rō, te cánuú candíje ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jisó cóyo cuahān cháha chúcuan sáha tachī.

7 Ñayuu ún ma cáni ni i jeē sáha Jítóho yō jeē jicán i.

8 Chi ñayuu jeē jéni ñin jéni uū ni, chi máni násāma ni i jíin táca jniñu cásáha i.

9 Tācá hermano ndahú, na cúsiī ni de jeē sáha Yaā Dios jeē kujénu de.

10 Te hermano cucá, na cúsiī ni de núu ni ndundáhú de. Chi táca téé cucá, yachī naa jeē cucá de, nájnūhun náā ita yucū.

11 Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho táca téé cucá níni sá jícu de jíin jniñu de.

Siquī jeē jító ndee jnūndóho yóhó

12 Yóhyo ndetū téé jeē jéndeýí ni de núu jító ndee jnūndóho de. Chi núu je ni cundeyí de jíin, te nihīn de premio jeē kujénu de cotecu de níí cáni. Chi súcuan ni jejnūhun Yaā Dios jeē cuáha ya nuū ñayuu jeē maní jíin yá.

13 Núu ñin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni ñin ma cúu cuiti sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuéchi.

14 Chi sa suhva jeē ndíyo néé ni maá i, suu sáha jeē jicán ini i sáha i cuēchi, te scānda ini i chí stáhú un i.

15 Te jeē ndíyo néé ni i, yūcuan quéjéé cuéchi. Te cuēchi ún, núu je ni cunīhin, te sáha jeē jnahnú ndetū ñayuu.

16 Núu súcuan te ma stívi ró caní ni rō jijnáhan rō, ñánī mánī.

17 Tāca jéē cútahū yō jeē váha jeē lúu íyó, chí vēji nde andiví núu maá Yaā Dios, Yaā ni sáha tāca jéē ndíndēe ín andiví. Te máá yá tu násāma cuiti ini yā nájñuhun násāma nduva jíin cuándahū.

18 Te ni sáha ya jeē cótecu yō ní cání, chí ni candíje yó jñuhun ndaā yā. Te ni nduu yó nájñuhun sēhe nuú yá nuū tāca gá sēhe ya jeē quíji, chí súcuan ni nujnahan ni yā sáha ya.

Siquī ndese chiñúhún ndáā yō yā

19 Núu súcuan te tāca rōhó ñánī mánī, ñama na chúsóhó rō jñuhun ya, te sa suhva ma cahán yachī rō, ni ma quití yachī ní rō.

20 Chí ñayuu cáquití ni, tu sáha i jniñu ndaā jeē cuní Yaā Dios.

21 Núu súcuan te na siáá rō tācá jniñu jnéhén jíin jniñu néé jéē ni cáyā jíin rō. Te na cóo vitá ni rō te cuatáhú rō jñuhun ya jeē ni quívi ini anuá rō. Chí jñuhun un ndíso poder jeē cācu ánuá rō.

22 Te na squícu ró jéē steén jñuhun ún, te nasūu máá jéē cúní sōho ró súcuan-ni, chí núu súcuan te cástáhú ró maá ró, chí tu níhín jniñu núu tu squícu ró.

23 Chí tēe jeē jíni sōho de jñuhun ya súcuan-ni, te tu squícu de, cúu de nájñuhun ñn tēe jeē jíto de nuū espejo ndese cáa nuū de.

24 Te jíto vāha de nuū de, te cuahān-ni de, te náā ni de ndese cáa nuū de.

25 Te núu ñn tēe tu náā ni de jñuhun jíni sōho de, chí sa suhva chúhún vāha ni de jeē cahán maá ley ndaā Jesús jeē ni sáha libre yohó, te núu cuiñi níhin de jíin, te squícu de jeē ndácu, yūcuán na te quéndōo ndetū de jíin jniñu váha jeē sáha de.

26 Te núu ndé ñn ró jéni ní rō jeē chiñúhún váha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā.

27 Ñayuu jeē chiñúhún ndoo chíñúhún ndáā i máá Tátá yō Yaā Dios, chí jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jñūdóho íyó. Te tu sájnehén i ánuá i jíin jniñu néé íyó ñáyiví.

Ma cúhichī ni yō coto yó ñayuu ndahú

2

1 Ñánī mánī, cá candíje ró Jítoho yō Jesucristo jeē kujénu luu ya. Núu súcuan te ma sáha ró cuenta ndese cúu ñn ñn ñayuu, chí inuú sáha ró jíin ndihí i.

2 Chí íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñúhún de sahma váha. Te suni íyó jínu quívi ñn tēe ndáhú, te ñúhún de sahma tahndé.

3 Te tú vāha núu sáha yíñúhún ró jíin tēe ñúhún sahma váha, te cahán rō jíin de: Cucōo ní lugar váha yáhá.

Te cahān rō jīn tēe ndáhú: Yūcuān cuiñi ní, chí yáha cucōo ní nuū ñúhun, achi rō.

4 Chi núu cásáha ró súcuan, te tu jēni vāha ni rō siquī jnáhan ró, chí sīn sáha ró jīn tēe cúca jīn tēe ndáhú.

5 Ñánī mánī, chusóhó ró jnūhun cáhán rī: Yaā Dios ni nacāji ya ñayuu ndahú ini ñayivī yáha jēe cóo cúca i jīn jnúhun cácañdije i ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñáyuu jeē maní jīn yá.

6 Te máá ró chi sa suhva cájēhe ró jnúhun canu ñayuu ndahú. ¿Te á násūu tēe cúca cúu jeē castáhú róhó siquī jeē nihín de xūhun ró, te yachī jéquin de cuēchi siquī rō nuū tohó?

7 Te suni cácahān neé de siquī Cristo, te suu síhvī máá yá cúu jeē cánani ró cristiano.

8 Vāha cásáha ró te núu cásquicu ndije ró máá jnúhun jēhnu ga jeē cahán ley, nájnūhun yósó núu tútu īi: Cundáhú ni rō jnáhan ró nájnūhun cundáhú ni rō maá ró, achi.

9 Te núu sīn sáha ró jīn ñáyuu cucá jīn ñáyuu ndahú, núu súcuan te cuēchi cásáha ró, te jécondee cuēchi siquī rō jeē stívi ró ley Yaā Dios.

10 Chi núu īin ñayuu stívi i īin-ni jniñu ndácu ley, te vēsú na squícu i ndihī ga, te nájnūhun ni stívi i ndihī ley, te ndihī un jécondee cuēchi siquī i.

11 Chi Yaā jeē ni cáhān jeē ma cósiquí ndéē jnáhan ró, suni ni cahān yā jeē ma cáhni rō ndiyi. Te vēsú tu ní cásíquí

ndéē jnáhan ró, te núu ni jehni rō ndiyi, núu súcuan te je ni stívi ndihī ró ley.

12 Te tāca jēe cahán rō jīn jēe sáha ró, chí sáha ró cuenta jeē sándaā yā ndihī un jīn máá ley Jesús jeē ni sáha libre rohó.

13 Chi quivī sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ni cundáhú ni jnáhan, cusī ni i jeē ní ndahva yā cuēchi i máá quivī sándaā yā jniñu.

Tu jéjniñu jeē candije yó núu tu squícu yó

14 Ñánī mánī, núu cáhān īin tēe jeē candije de jeē sáha ya jehē de, te núu tu sáha de jniñu váha, ¿te ndé jéjniñu jeē candije de ún? ¿A cuu cācu ánuá de jīn jēe cahán-ni de jeē candije de, te núu tu sáha de jniñu váha?

15 Te núu īin hermano yō chí hermana yō, cúmani sahma i jīn jēe cáji i tāca quivī,

16 te núu īin ró cáhān jīn i: Cuandeyí ni rō, te cusúcun váha ró te caji vāha ró, achi rō jīn i, te núu tu ní jēhe ro jēe jīni ñúhún i cotecu i, ¿te ndé jéjniñu jeē cahán rō súcuan?

17 Te suni súcuan cúu jeē núu áchí ró jeē candije ró jeē sáha ya jehē rō, te núu tu sáha ró jniñu váha, núu súcuan te tu ndé jéjniñu cuiti jeē cahán-ni ró jēe candije ró.

18 Te sánaa te cahān īin ñayuu: Róhó chí cándije ró jēe sáha ya jehē rō, te ruhū chí sáha rī jniñu váha. ¿Na jīn stéen rō jeē candije ró jeē sáha

ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī.

¹⁹ Ndaā chi cándíje ró jeē iyó ñn-ni Yaā Dios. Te va iyó váha núu súcuan. Te tachī chi suni súcuan cácdíje, te cácuísi i jeē cáyūhú, chi tu cásáha jniñu váha.

²⁰ ¿Te naun tu jécūhun ni rō? ¿A tu jíni rō jeē núu tu sáha ró jniñu váha, te tu ndé jéjníñu cuiti jeē cahán rō jeē candíje ró?

²¹ Te jíi yō Abraham, ni ndahva yā cuēchi de siquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar.

²² Te jécūhun ni rō jeē siquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socō de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de.

²³ Te súcuan ni cundaā jnūhun cáhān tutu i: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cácdíje i jeē sáha ya jehē i, te nasūu máá jéē cahán-ni i jeē candíje i.

²⁵ Te suni súcuan Rahab, vēsú ñahan tǎjni ni ni cuu ña xihna gā, te ni ndahva yā

cuēchi ña siquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū tēe cánducú cahni de. Te jeē yúcuan ní ndahva Yaā Dios cuēchi ña.

²⁶ Te ñn ñayuu núu tuá anuá i nuū yiqui cúñu i, te ndíyi cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájñūhun ndíyi cúu yó.

Jnūhun siquī yaá yó

3

¹ Ñánī mánī, ma cáni ni cuehē rō cuu ró maestro steén jnūhun ya. Chi cájini rō jeē yóhó jéē steén jnūhun, cuehē gā cuēchi ndenehen ya siquī yō.

² Chi ndíhi yó stívi cuéhē jniñu. Te núu ñn tēe cuu condito de yáá de jeē ma stívi de jíin ni ñn jeē cahán de, núu súcuan te yōhyo vāha tēe cúu de, te suni cuu condito de níí gá de jeē ma stívi de.

³ Chi cúu nájñūhun jeē chíhi yó freno yuhu caballo, te súcuan snáhnú yō níí tí jeē quihín tǎ jíin yó ndé nuū cuní yō.

⁴ Te suni súcuan tāca barco, vēsú náhnū ndasí, te vēsú nīhin chūndahá táchī, te jíin ñn timón lulí-ni te cuu scuicó tēe scāca, te quihín de jíin ndé nuū cuní de.

⁵ Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíni yō jeē ñn ñūhūn lulí cuu jniñi jeē cayú ñn yucu cáhnū ndasí.

⁶ Te suni súcuan yáá yó, chi sáha nájñuhun ññ ññuhñ, chi scuíquín cuehē teyí jñiñu néé. Te yáá yó cúu ññ parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jñuhun néé jíñ yáá yó, te yáá yó scuíquín cuehē jñiñu néé ní tiempo jeē iyó yó ini ññayívi.

⁷ Te ññayuu chi cuu snáhnú i taca quiti jíñ saa jíñ cóo jíñ quiti ññuhun nuū mar, te je ni snáhnú i cuehē tñ.

⁸ Te ni ññ ññayuu ma cúu condito i yáá i. Chi ññ jeē neé jéē ma cúu condito i cúu. Te nájñuhun yuhu cóo jeē ññuhun chítú veneno jeē jéñni, súcuan cúu yáá yó.

⁹ Jíñ yáá yó chiñúhún yó Tata yō Yaā Dios, te suni jíñ yáá yó cahán ndevāha yo síquī ññayuu jeē ni sáha ya ánuá i nájñuhun iyó máá yá.

¹⁰ ññ-ni yuhu cáne jñuhun chíñúhún yó yá jíñ jñuhun cáhán ndevāha yó. Nání mání, tu iyó váha cuiti jeē súcuan.

¹¹ ¿A ññ-ni tesōcó cáne ndute váha jíñ ndute úvuá, chí naún?

¹² Nání mání, ¿a cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan ññ tesōcó ma cúu cane ndute úvuá jíñ ndute váha.

Jñuhun ndíchí jéē véji nuū Yaā Dios

¹³ Te núu ndé ññ ró ndíchí te jécūhun váha ni, núu súcuan te jíñ jéē jíca ndaā rō steén rō jeē súcuan cúu ró. Te na

cóo suchí ni rō modo jeē jéhe jñuhun ndíchí yá.

¹⁴ Te núu cáucuésún teyí ni rō te ndúcú ró jéē cujéñnu máá ró, núu súcuan te ma cutéyí ró caní ni rō jeē ndíchí ró. Chi suu cúu jeē stahú ró, te cúu ró contra síquī jñuhun ndaā.

¹⁵ Chi ññayuu cándāa súcuan, nasūu núu Yaā Dios véji jeē ndíchí i. Chi cuenta ññayívi, jíñ cuenta anuá neé ññayuu, jíñ cuenta máá jéxeén cúu.

¹⁶ Chi nuū iyó ññayuu cu-cuésún ni jíñ ññayuu nducú jéē cujéñnu máá, suni yūcuan iyó jñuhun sáca núu jíñ táca jñiñu néé.

¹⁷ Te jñuhun ndíchí jeē véji nuū Yaā Dios, núu ni sáha jeē ní ndundíchí ññayuu, yūcuán na te iyó ndoo ánuá i. Te suni yúcu maní i jíñ jñáhan i, te vītá ni i, te tú níñni ni i. Te cúndáhú ni i jñáhan i, te sáha i jñiñu váha. Te suni iyó ndáā i, te tu stahú i.

¹⁸ Te ññayuu cáyūcu mání jíñ jñáhan, jíñ jñuhun maní casáha i taca jñiñu ndaā, te nanihñ i jeē quéndōo ndaā i.

Jeē ma cutóo ni yō jeē iyó ini ññayívi

4

¹ ¿Te ndese quéjéé jéē cájeñáhan ró jíñ jéē cájeñáhan ró? Quéjéé síquī jeē cándiyo néé ni rō, te yōhyo scánda ini anuá rō.

² Chi cándiyo ni rō, te tu cánevāha ró, te suu sáha jeē cájehni rō ndíyí. Cándiyo ni rō jeē névāha jñáhan ró, te tu níhín rō, te suu sáha jeē

cátejnahán ró te cátejnahán ró. Te tu cánihīn rō jeē cuní rō, chí tu cájicān rō nuū Yaā Dios.

³ Te núu cájicān rō, te tu cánihīn rō, chí tu cájicān vāha ró, chí mání jeē cusī ni maá ró cúu jeē cájicān rō nuū yā.

⁴ Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chí ñayuu jeē cutóo ni jeē iyó ñayīví, ndúu i ñayuu jito uhū nuū Yaā Dios.

⁵ Te tu cáhán saá-ni jñūhun yáha jēe yosó núu tútu īi: Máa Espíritu jeē ni jéhe Yaā Dios jeē ndeé ini yō, cúcuíñi ni yā jeē súcuan casáha yó, chí manī yā jín yó, achí.

⁶ Te jeē vāha ni Yaā Dios, te jéhe ya fuerza ini yō jeē ma sáha yó súcuan. Chí cáhán tutu īi: Yaā Dios jési yā nuū ñayuu casáha téyí máa, te vāha ni yā chindéé ñáhán yá ñayuu casáha suchí máa, áchí.

⁷ Núu súcuan te cuandetū rō nuū Yaā Dios. Te cuiñi nihin ró jēe ma cuatáhú ró jexeén, te cunu coto róhó jijnáhan ró.

⁸ Manī gā coo ró jín Yaā Dios, te víhyá gā steén yā jeē maní yā jín ró. Róhó jēe casáha cuēchi, na sándoo ró máa ró, stóo ró cuēchi. Te róhó jēe cácuuni rō coo manī rō jín Yaā Dios níni jēe cácuuni rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan.

⁹ Na jnáhuū ni rō, te cu-cuíhyá ni rō, te na ndáhyú rō siquī jeē iyó cuēchi ró. Te vésú ni cajecū rō, te vijna na ndáhyú cohó ró. Te vésú

ni cacusī ni rō, te vijna na ndúcuíhyá ni rō.

¹⁰ Na sásuchí ró maá ró nuū Yaā Dios, te sájéhnū ya rohó.

Ma cóndihvī ni yō siquī cuēchi jnáhan yó

¹¹ Hermano jijnáhan ró, ma cahán neé ró siquī jnáhan ró. Chí tēe jeē cahán neé siquī jnáhan, chí jēe ndihvī ni siquī cuēchi jnáhan, nájnūhun jeē siquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu iyó ndáa ley yā. Te núu cáhán rō jeē tu iyó ndáa ley yā, núu súcuan te nasūu jēe squícu ró, chí sa jeē cahán rō siquī.

¹² Iyó ñn-ni Yaā jeē ni jéhe ley, te máa-ni ya cúu jeē sándaā siquī cuēchi. Te jnama ya ñayuu cácañdije te snáhnú ndetū yā ñayuu tu cácañdije. Núu súcuan ¿te na jniñu ndíso ró jēe sándaā rō siquī jnáhan ró?

Tú vāha jeē satéyí yó maá yó

¹³ Vijna te cáhán rī jín róhó jēe cácahān: Vijna chí sájnē te quihīn yō ñuu yúcuán, te coyūcu yó ñn cuiyā, te cuan yó xíco yó, te nihīn yō siquī, achí ró.

¹⁴ Te tu jíní cuiti rō ndese coo sajnē. ¿Chí na vé va víhí cúu vida ró? Cúu nájnūhun ñn vicó nūhún jēe ñn núnúu-ni núcūhun, te yūcuán na te ndéchi-ni cuahān.

¹⁵ Chí sa vāha ga na cáhán rō: Núu cúní máa Jítoho yō te cotecu yō te sáha yó jēe yáha chí jēe yúcuán, achí rō.

16 Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō.

17 Te núu ññayuu jiní i sáha i jniñu váha, te núu tu sáha i, te cuēchi cúu núu súcuan.

Jñuhun cáhán nuū tēe cúcá

5

1 Te cáhán rī jín táca róho tēe cúcá, jēe na ndáhyú rō te ndahyū cohó ró siquī jñūdóho jeē quiji nuū rō.

2 Chi ndajniñu cúcá cánevāha ró, je téhyú. Te sahma váha ró, je tēe tiquíxin.

3 Te oro jín plata cánevāha ró, chi je cáne xehyu. Te xehyu un stéén jeē ní casáha ró jniñu stáhú jín xúhun ró. Te yūcuan cúu jeē ndúnihin cuēchi siquī rō, nájnūhun ññuhūn jeē snāā yiqui cúñu rō. Chi ni cacaya cuehē rō ndajniñu váha quiivī cuándihi yáha.

4 Te táca tēe ni cajehnde trigo rō, tu ní cáchunaa váha ró yáhu de. Te vijna cácana jee de nuū Yaā Dios, Yaā cúu Jitoho nuū táca ndajéhé andiví, jeē súcuan ni casáha ró. Te jini sōho ya jeē cácana jee tēe ni cajehnde ún.

5 Cátecu vāha ndasí ró ññayiví yáha, te casáha ró táca jēe cácusñi ni maá ró. Te cájito yúcún ró maá ró, te cúu ró nájnūhun quití néñu jeē ndétu quiiví cúu.

6 Te ni catee ró cuēchi siquī ññayuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahú yō

7 Hermano, núu súcuan te coo paciencia ni rō condetu ró ndé quiiví ndíji maá Jitoho yō. Tēe sájniñu ññuhun, cánuú coo paciencia ni de condetu de nde quiji saū néhen jín saū néñu isa, te sáa te nihīn de nunī váha jeē jéhe itu.

8 Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jitoho yō.

9 Te ma cahán sōo ró siquī jeē sáha jnáhan ró, hermano, návāha ma jécondee cuēchi siquī rō. Chi maá Yaā jeē sándaā cuēchi, je yajni ndíji ya.

10 Ñánī mánī, conahan ró jijnáhan ró ndese ni casáha tēe ni canacani jñuhun maá Jitoho yō nde jenahán, chi ni cacuu de ññejemplo nuū yō. Chi vēsú ni candoho de, te ni iyo paciencia ni de.

11 Te cáhán yō jeē ññayuu cájendeyí ni jín jñūdóho, ndetū cúu i sáha Yaā Dios. Chi ni cajini ró jñuhun ndese ni jendeyí ni Job jín jñūdóho, te suni cájini rō jeē yóhoyo váha ga ni quendōo de ni sáha maá Jitoho yō ná ni yáha jñūdóho. Chi yóhoyo cúndáhú ni yā yohó, te vāha ndasí ni yā jín yó.

12 Ñánī mánī, jeē cánuú gá cúu jeē ma cahán cāha ró sihví Yaā Dios jín jñuhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ññayiví, te ni ññu ga jñuhun súcuan ma cahán teyí ró. Chi núu cahán rō jeē cuu,

te súcuan-ni cahān rō. Te núu cahān rō jeē tuú, te súcuan-ni cahān rō, ma scāa gā rō cahān rō, návāha ma ndénehen Yaā Díos cuēchi siquī rō.

13 Te núu íyó ñn ró jéē ndóho jnūndóho, te na cácan tahu rō. Te núu íyó ñn ró jéē cúsi ni, te na cáta ró yaa jeē chiñúhún ró yá.

14 Te núu íyó ñn ró jéē cuhú, te na cána ró téé jéhu cándito ñayuu cácandíje. Te na cácan tahu de jehē ñayuu cuhú. Te jíin síhví máá Jítoho yō na chíhi de aceite i.

15 Te núu cácandíje de jeē sáha Jítoho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i.

16 Núu súcuan te nacani ndaā rō cuēchi ró nuū jnáhan ró, te cacān tahu rō jehē jnáhan ró návāha nduvāha ró jíjnéhan ró. Chi núu ñn téé ndaā ndíhví ni de jícan tahu de, te yōhyo vāha níhín jníñu, chí sáha ya jeē jícan de.

17 Chi Elías, téé ni nacani jnūhun Yaā Díos jenahán, suni ñn téé jeē nájnūhun íyó máá yó ni cuu de. Te ni jícan tahu ndasí de jeē ma cúun saū, te tu ní cúun saū unī cuiyā iñū yoō.

18 Yūcuán na te ni jícan tahu tucu de, te ni cuun saū, te ni canecoo tucu tāca jéé jéhe ñuhun.

19 Nánī mánī, núu ñn ró ni stóo ichi ndaā, te núu inga rō nachuhichí ró jnáhan ró,

20 núu súcuan te cuni rō jeē núu ni nachuhichí ró téé ni quívi cuēchi, te je ni jnama ró

de jeē jnahnú ndetū de núu, te súcuan íyó jnúhun cáhnu ni nuū cuēché cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia.

2 Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayiví. Te jíin Espiritu Santo ni sáha ya jeē iyó ndoo iyó íi ró cájetáhú ró núu yā, te ni nacate ya anuá ró jíin níñi Jesucristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo sñ ni ró jíináhan ró.

Jeē ñúhun ni yō tāca jéē váha jeē cóo andiví

3 Na cáhán yō jeē yóhoyo cújéhnu Yaā Dios, Yaā cúu Tátá maá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, siquī jeē ní natecu Jesucristo mēhñu ndíyi. Te jeē yúcuan níni cáñuhun ni yō tāca jéē váha jeē coo.

4 Chi nihīn ró tahū jeē ñúhun váha ini andiví jeē cúu ró jíináhan ró. Te tahū un má náa cuiti, ni ma tívi cuiti, ni ma ndíhi cuiti.

5 Chi cávandíje ró jéē sáha Yaā Dios jehē ró, te jeē yúcuan ndíto ya rohó jíin poder yā,

návāha jnama ya rohó quíví sándihí, chi ni sándaā yā jeē súcuan coo.

6 Jeē yúcuan cácusñ ndasí ni ró, vēsú cájito ró cuéhē ndinuū jñúndóho jecu-ni quíví.

7 Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuū coto ndee jñúndóho róhó núu cávandíje nihin ró chí tuú. Chi jeē cávandíje nihin ró, chi yahu ndasí gá cúu vēsú oro, ndajníñu jeē náa. Te yúcuan cúu jeē cuajnúhún yá rohó, te sájéhnu ya rohó, te squéndōo yíñúhún yá rohó quíví quenda ndijin Jesucristo.

8 Te vēsú tu ní cájito ró núu yā, te cáhīyo maní ndasí ró jíin yá. Te cávandíje nihin ró yá vēsú tu cájito ró núu yā vījna. Te yóhoyo luu cácusñ ndasí ni ró, chi nde tuá níhín cuiti yō jñúhun castúhun yó ndese cúsn ni yō.

9 Te nihīn tahú ró jeē cácu ánuá ró, chi jeē yúcuan cúu jeē cávandíje ró.

10 Te tée ni canacani jñúhun Yaā Dios nde jenahán, ni cananducú yúcún de ni caca-jñúhun váha de siquī jñúhun ndese jnama ya yohó. Te ni cacachi de ndese sáha Yaā Dios jeē váha róhó jíináhan ró.

11 Chi nde ná tu coo, te ni steén Espiritu Cristo nuū de jíináhan de ndese quiji jñúndóho siquī Cristo jíin ndese luu ndujéhnu tucu ya jeē yáha jñúndóho ún. Te ni cananducú yúcún de jeē na jécúhun ni de ndé quíví quiji

Cristo te ndese coo tāca jéē ni cāhān maá Espíritu jeē ndeé ini de.

¹² Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jñūhun ún, chi tāca té nácani jñūhun jnáma ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jñūhun ún chi nde maá ndajéhé Yaā Dios cánanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xiní rō jijnáhan ró, te cáji coo ni rō. Te cocuhun ndasí ni rō jeē nihín rō tāca jéē váha jeē sáha Yaā Dios rohó quíví quenda ndijin Jesucristo.

¹⁴ Te na cúu ró séhe jeē cājetáhú váha. Te ma sáha ga rō tāca jniñu jeē ní cacusí ni rō sáha ró nde ná tu jecūhun ni rō jñūhun Yaā Dios.

¹⁵ Chi sa suhva na cóo ndoo ánuá rō jijn táca jniñu cásáha ró, chi Yaā ní cana rōhó, Yaā iyó ndoo cúu ya.

¹⁶ Chi súcuan cāhán tutu i: Na cóo ndoo ró jijnáhan ró, chi ruhū iyó ndoo ri, achí yá.

¹⁷ Te núu cācāhān rō Tatá rō jijn Yaā Dios, núu súcuan te na cáca yíñúhún ró nuū yā tāca quíví jéē cájica ró ñayívi yáha. Chi máá yá sándaā siquí ndese ni casáha in in yó, te tu sáha ya cuenta ndese cúu in in yó, chi inuú sáha ya jijn ndihi yó.

¹⁸ Chi ni jnama ya rohó núu tāca costumbre jeē ní cajequin jí rō, jeē ní cajejniñu cāha ró núu. Te cájini váha ró jéē yahu cúu jeē ní jnama ya rohó. Chi tu ní chúnaa yā jijn ndajniñu jeē náā, nájñūhun oro jijn plata,

¹⁹ chi sa suhva jijn níñi Cristo jeē yáhu ndasí gá cúu. Chi ni socō yā maá yá nájñūhun in londe, quití iyó váha iyó ndoo.

²⁰ Chi jeē yúcuan ní jeni Yaā Dios maá Cristo nde ná tu jecōo ñayívi, te ni cane ndijin Cristo maá tiempo cuándihi yáha, návāha quendōo váha ánuá rō jijnáhan ró.

²¹ Te jeē jijn Cristo te cācandíje ró Yaā Dios. Chi ni sáha Yaā Dios jeē ní natecu yā mēñu ndíyi jijn jéē ní ndujéhu ya. Te jeē yúcuan cācandíje ró Yaā Dios, te cāñuhun ni rō coto ró yá.

²² Te vijna chi je ni candundoo ánuá rō, chi ni cājetáhú ró jñūhun ndaā ni sáha Espíritu jijn ró, návāha cundáhú ndije ni rō hermano cācandíje. Núu súcuan te na cundáhú ndasí ni rō jnáhan ró nde jijn ini jijn ánuá rō.

²³ Chi je ni canacacu jeé ró, te nasūu chíji yucūn ñayuu jeē cúu. Chi sa jñūhun Yaā Dios jeē ndíto técu ní cáni ni sáha jeē ní nacacu ró.

²⁴ Chi súcuan cāhán tutu i: Nájñūhun yucū cúu ndihi tāca ñayuu, chi jecu-ni quíví técu i.

Te nájñūhun ita yucū cúu jeē cujéhu i.

Chi íchí-ni yucū, te ndáhvá-ni ita.

25 Te jnūhun Jitoho yō Yaā Dios, sa quéndōo ní cāni.

Achí tutu. Te jnūhun un cúu máá jnúhun jnáma ya yohó jée ní canacani ri nuū rō.

2

1 Núu súcuan te na siáá rō tāca jniñu néé, tāca jée stahú, jée tú ndije, jeē cucuésún ni, jín jée sajnúhún síquī jnáhan.

2 Te nájnūhun sūchi yíquín sá ní cacu jeē jéxin te jéhu, súcuan na cóndihvī ní rō scuáha ró jnúhun ndaā yā, návāha cuehnu ró jín te cācu ánuá rō.

3 Chi je cājini rō jeē yóhyo vāha ni máá Jítoho yō.

Cristo cúu nájnūhun yuū yítuu vehe

4 Núu súcuan te manī gā coo ró jínáhan ró jín Jítoho yō Cristo. Chi cácuu ró nájnūhun templo nuū ndeé Yaā Dios, chí ndeé yá ini anuá rō. Te Cristo cúu nájnūhun in yuū cánuú gá jeē yítuu yíquī templo, te sáha ya jeē cótecu rō ní cāni. Te ñayuu vēsú ní casquéhichī i ya, te Yaā Dios chí je ni nacāji ya Cristo chí cánuú ndasí yā, nájnūhun nacāji yó in yuū vāha jeē quítuu yíquī vehe.

5 Te máá ró chí cácuu ró nájnūhun in in yuū jeē cúvāha templo Yaā Dios, te cótecu rō ní cāni. Te na cuáha ró jnúhun jeē sama ya rohó jínáhan ró jée cúvāha templo yā, cúu jeē ndeé Espíritu yā ini anuá rō nájnūhun ini in templo. Te suní cúní Yaā Dios

jeē cuu ró sūtū cáhīyo ndoo cájejniñu nuū yā. Chi síquī jeē ní sáha Jesucristo jehē rō, te na sócō rō maá ró jeē cuajniñu ró núu yā sáha ró táca jniñu vāha jeē nújnahan ni Yaā Dios.

6 Chi súcuan cáhan tutu i: Vijna te nde ñuu rī Sion jéquin rī in yuū jeē cánuú gá jeē quítuu yíquī vehe, chí ni nacāji ri yā nájnūhun in yuū vāha jeē cánuú téyí. Te ñayuu jeē candíje i ya, jnama nahín yá i.

Achí Yaā Dios, achí tutu.

7 Te máá ró jeē cácandíje ró, chí yuū vāha jeē cánuú téyí cúu ya nuū rō. Te nuū ñayuu tu cácandíje chí tuú, chí sa cúndaā jeē cahán tutu i:

Máá yúu jeē ní casquéhichī tēe cásama vehe, suu cúu yuū cánuú gá yítuu yíquī vehe.

8 Te suní cúndaā jnūhun jeē cahán tutu síquī ñayuu tu cácandíje:

Cúu ya nájnūhun in yuū jeē cácachihī i jehē i, nájnūhun toto jeē cotúú i sáha. Achí. Chí jeē cácachihī i jehē i cúu jeē casánihni ní i nuū jnúhun ya. Te je ní cundaā jeē jnahnú ndetū i síquī jeē cácanihni ní i.

Jnūhun ñayuu maá Yaā Dios

9 Te máá ró cácuu ñayuu jeē ní nacāji Yaā Dios. Te suní cácuu ró sūtū cájejniñu nuū maá Yaā cúu Rey, te ñayuu cáhīyo ndoo, jín ñayuu maá yá cácuu ró. Súcuan ní sáha Yaā Dios rohó návāha nacani ró jnúhun ndese yóhyo jéhu jniñu sáha ya, chí máá yá

ni cana róhó ná ni coyūcu ró nájñuhun nuū néē. Te ni squívicoo ya rohó núū luz yā jeē yóhoyo vāha stéén yā ini anuá rō.

¹⁰ Chi nde saá te nasūu ñáyuu Yaā Dios cácuu ró, te vijna je ni nduu ró ñáyuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jíjnáhan rō.

Jeē cuajniñu vāha yó núū Yaā Dios

¹¹ Ñánī mánī, ini ñayīvi yáha cácuu ró nájñuhun ñayuu ñuu jicá jéē cájica cuu tátú. Núu súcuan te cáhán ndahú rí jíin ró jéē ma sáha ró táca jniñu jeē ndíyo néé ni rō jíin modo maá rō. Chi táca un cájejnáhan jíin ró, ndúcú jéē jnahnū ndetū anuá rō.

¹² Te ndaā na cáca ró méhñu ñáyuu tu jíin jñuhun Yaā Dios. Chi vésú cácahān i siquī rō, nájñuhun cácahān i siquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhoyo cújéhnu ya.

¹³ Jeē siquí maá Jítóho yō te cuatáhú ró nuū tāca tóhō cándiso jniñu nuū ñáyuu. Cuatáhú ró nuū maá rey, chi tēe cújéhnu ga cúu de.

¹⁴ Te cuatáhú ró nuū tāca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha.

¹⁵ Chi cúní Yaā Dios jeē sáha ró jniñu váha, te jeē súcuan sáha ró te táca ñáyuu canéé jéē tu cájecūhun ni, casi i yuhu i.

¹⁶ Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu vāha ró núū yā.

¹⁷ Coo respeto rō nuū tāca ñáyuu. Cundáhú ni rō hermano cácañíje. Conso iyo ró núū Yaā Dios. Coo yíñúhún ró nuū maá rey.

Jeē na ndóho yó jéhē jnáhan yó nájñuhun ni ndoho Cristo

¹⁸ Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū tēe vāha ni jíin tēe vītá ni, chi suni nuū tēe xeēn nī.

¹⁹ Chi ñn jeē váha cúu núu jéndeýí ni ñn tēe jeē stóho cáha ñáyuu de siquī jeē squícu de nuū Yaā Dios.

²⁰ Chi núu cástóho i róhó jéē casáha ró cuéchi, te ni ñn ma cuajnúhún róhó núu jéndeýí ni rō jíin jeē ndóho ró. Te núu cástóho i róhó jéē casáha ró jniñu váha, te núu jéndeýí ni rō jíin, yāha cúu jeē váha jeē nújnahan ni Yaā Dios.

²¹ Chi jeē yúcuan cúu jeē ní cana ya rohó jíjnáhan ró. Chi suni máa Cristo ni ndoho ya jeē siquí rō, te súcuan ni cuu ya ñn ejemplo nuū rō jeē na ndóho ró jéhē jnáhan ró, te súcuan condiquín rō ichi ya.

²² Te máa yá tú cuiti na cuéchi ní sáha ya, ni tú cuiti na jñuhun stáhú ní cáhán yā.

²³ Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnáhan ya jíin i, chi sa ni

chihi ya maá yá ndaha Yaā Dios, Yaā sándaā vāha siquī ndihi ún.

²⁴ Te ni condiso máá Cristo cuēchi yó jíin yiqui cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō.

²⁵ Chi ni casana rō nájnūhun lanchi, te vijna je ni candicó rō ni ndivicoo rō núu Cristo, Yaā cúu pastor rō te ndíto vāha ya anuá rō.

Ndese cánuú coyūcu vāha yīi jíin ñasihí

3

¹ Suni súcuan róhó ñasihí jíjnáhan rō, cuatáhú rō nuū yīi rō, návāha núu cúu de tēe tu cándije jnūhun ya, te cuu scándije rō de, jeē tuá niní jíin jéē cahán rō, chi máá jíin jéē casáha vāha rō.

² Chi cuni de jeē cájica ndaā rō te cáhīyo respeto rō.

³ Te jeē casáha luu rō máá rō, chi nasūu máni máá ichi síquī rō sáha rō, jeē sáha luu ndasí rō xinī rō, chí jéē cūhun rō síquī oro chí sahma vāha ga.

⁴ Chi sa nducú rō jeē quéndōo luu ánuá rō, te coo luu rō ñn modo jeē ma náā cuiti, suu jeē cóo víta ni rō te coo nahín ni rō. Chi yāha cúu jeē yahu ndasí gá nuū Yaā Dios.

⁵ Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yīi ña.

⁶ Te súcuan ni sáha Sara, chi ni jetáhú ña nuū yīi ña Abraham, te ni cahán yíñúhún ña jíin de. Te róhó jíjnáhan rō, núu sáha vāha rō te núu ma yūhu rō ni ñn, yūcuán na te coo rō nájnūhun ni Iyo Sara.

⁷ Te suni súcuan róhó yīi, na cóo víta ni rō jíin ñasihí rō. Te yíñúhún coo rō jíin ña, siquī jeē núu ga fuerza ña vésú rohó, te suni siquī jeē inuú ní canihín tahú rō cotecu rō ní cáni siquī jeē vāha ni Yaā Dios. Te súcuan sáha rō návāha tú casi nuū jnūhun jíicán tahú rō.

Jnūhun ñayuu cándoho siquī jeē cájica ndaā

⁸ Núu súcuan te inuú na cáni ni rō jíjnáhan rō, te cucuíhyá ni rō jeē ndóho jnáhan rō, te cundáhú ni rō i nájnūhun ñani rō. Te na cóo manī rō te cani suchí ni rō.

⁹ Núu casáha neé ñayuu jíin rō, te ma nasáha neé rō jíin i. Te núu cácahán neé i nuū rō, te ma nácahán neé rō núu i. Chi sa suhva cacán tahú rō jeē na quéndōo vāha i. Chi Yaā Dios ní cana ya rohó jéē suni súcuan quéndōo vāha rō.

¹⁰ Chi súcuan cáhán tutu iī: Ñayuu cácuni cotecu vāha te cusī ni táca quívī, na cóto i yuhu i jeē ma cáhán neé i, te na cóto i jeē ma cáhán i jnūhun stáhú.

¹¹ Na cújiyo i nuū jniñu neé, te na sáha i jniñu vāha.

Na nducú i coyūcu máni i, te na cóndihvī ni i jíin.

¹² Chi máá Jítoho yō ndíto ya ñayuu ndaā, te jíni nahín yá jeē cájicán tahú i.

Te ñayuu casáha jniñu néé, chi tu jétáhú yá i.

Achí tutu.

13 Te ni ñin ma sáha néé jíin ró te núu máni jniñu váha cándihvī ni rō sáha ró.

14 Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō.

15 Chi sa jíin ini jíin ánuá rō chiñúhún ró maá Jítoho yō Cristo. Te níní coo tūhva ró nastió cuñí vīta ró te cahān yiñúhún ró jíin ñayuu jeē castíhí rohó síquī tāca jéé cáñuhun ni rō.

16 Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáu yáhu i róhó jéé cájica ndaā rō chi cácañdije ró Cristo.

17 Chi núu cúní Yaā Dios te váha ga jeē ndóho ró síquī jeē casáha ró jniñu váha vēsú síquī núu sáha ró jniñu néé.

18 Chi máá Cristo suni ni ndoho ya, te ñin jinu-ni ni jihī yā jeē síquī cuēchi ndihī yó. Yaā váha cúu ya, te ni ndoho ya jehē yohó ñayuu ní casáha jniñu néé, návāha quīvicoo yó núu Yaā Dios sáha ya. Chi ni jihī yiqui cúñu yā, te ánuá yā chi técu-ni ní cáni.

19 Te ná ni jihī yā te ni jehēn anuá yā ni nacani ya jñuhun nuū anuá ñayuu cáyindihyū.

20 Chi nde jenahán tu ní cájetáhú i, ná ni ñyo paciencia ni Yaā Dios te ni condetu ya níní sáha Noé barco jeē naní arca. Te jíin arca un ní cácu jecu-ni ñayuu, chi unā-ni i ní cácu nuū ndúte.

21 Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéé ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cácu yó, chi ni cundúú yó jíin Jesucristo nuū jñuhun ni natecu yā.

22 Te ni ndaa ya cuanuhun yā andiví, te ndéé yá ichi ndávāha Yaā Dios nuū cujéñu ya. Te tācá ndajéhé andiví, jíin jéé cándacu jniñu, jíin jéé cájñi poder, cájendetū nuū yā.

Jeē na cuájniñu yó jíin táhū jeē ni jéhe ya nuū yō

4

1 Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuēchi.

2 Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo néé ni rō jíin modo maá ró.

3 Chi nde ní véji ró, te ni casáha ró cuéhē cuēchi jeē cánujñahan ni rō síquī jeē tu ní cájini rō jñuhun Yaā Dios. Te tiempo un máni máá jéé neé ni casáha ró, te ni candiyo ni rō tāca jéé neé, ni canajīni ró, ni casáha ró vico néé, ni cajihī ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó.

4 Te cáacunéé ni i jeē tuá cájica ró jíin i jeē sáha ró táca

cuéchi xeēn jíin i. Te jeē yúcuau cúu jeē cácahān neé i síquī rō.

⁵ Te máa i chi ñin quivī te nacuāha i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajihī.

⁶ Chi jeē yúcuau suni ni quiji jnūhun vāha ya nuū tāca ndíyī ná ni cotecu i. Te ni cundaā síquī cuéchi ni casáha i ñayivī yáha, nájnūhun cúndaā síquī ndihī ñayuu, návāha nacani ni i te cotecu anuá i ní cáni nájnūhun técu Yaā Dios.

⁷ Te je cuacuyajni quivī jeē náā tāca jéē iyó. Núu súcuau te ndito na cóo xinī rō jijnáhan ró, te condihvī ni rō cacān tahú rō.

⁸ Te jeē cánuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuehē cuéchi.

⁹ Sáha vāha ró jíin ñáyuu jeē jinú i vehe ró, te ma cúxī ni rō.

¹⁰ Tāca ró cuajniñu ró núu jnáhan ró, núu ndese iyó máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sñn sñn ni jéhe ya nuū ñin ñin ró.

¹¹ Núu tahū jeē nácani ró jnúhun cúu, te na cáhān rō nájnūhun jeē maá Yaā Dios cahán. Te núu tahū jeē chindéé ñáhān ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihī jeē casáha ró te cahān ñayuu jeē yóhvo cújéhnu Yaā Dios síquī jeē ni sáha ya jíin Jesucristo. Te na cáhān yō

jeē luu cújéhnu Cristo te jniñi ya poder ní cáni. Amén.

Jeē ndóho yó síquī jeē candíje yó Cristo

¹² Nánī mánī, núu vēji jnūndóho xeēn jeē coto ndee rohó, te ma cunéé ni rō cani ni rō jeē maá ró ni nihīn jnūndóho xeēn gā.

¹³ Chi sa cusī ni rō jeē cándoho ró jecu jnūndóho jeē ní ndoho Cristo, návāha suni cusī ndasí ni rō quivī quénda ndijin yā jeē cújéhnu luu ya.

¹⁴ Te yóhvo ndetū rō te núu cácahān neé i nuū rō síquī jeē cácaandíje ró Cristo. Chi máá Espíritu Yaā Dios jeē cújéhnu ndasí, ndéé yá ini rō. Máa i chi cácahān neé i síquī yā, te máa ró chi cáchiñúhūn ró yā.

¹⁵ Te núu ndoho ró, te na ndóho ró síquī jeē cácaandíje ró Cristo. Te ma ndóho ró síquī tāca cuéchi nájnūhun cándoho ñayuu jéhni ndíyī, ñayuu sacuíhná, ñayuu sáha jniñu neé, jíin ñáyuu quivī nduu nuū jniñu jnáhan jeē tu cánuú quivī nduu.

¹⁶ Te sa núu ñin ró ndóho síquī jeē candíje ró Cristo, te ma cúcanu rō, chi sa nacuatáhú ró nuū Yaā Dios síquī jeē cúu ró cristiano.

¹⁷ Chi je ni jinū quivī jeē quejéé sándaā Yaā Dios cuéchi, te xīhna gā ñayuu cácuu sēhe ya sándaā yā cuéchi. Te núu xīhna gā cuéchi máa yó quejéé yá sándaā yā, núu súcuau te xeēn gā coo jeē ndénehen ya cuéchi síquī ñáyuu jeē tu ní jétáhú jnúhun vāha ya.

18 Te núu yōhyo yí cácu ñayuu vāha, núu súcuan zte ndese cácu ñayuu casáha jniñu neé jíin táca cuéchi?

19 Núu súcuan te rōhó jēe cándoho siquī jeē súcuan cúní Yaā Dios, ma jécuiñī rō sáha ró jniñu váha, te na chíhi ró máá ró ndaha máá Yaā jeē ni sáha rōhó, chi squícu ya jeē ni jéjnūhun ya.

Jeē jéhe de consejo ñayuu cácañdije

5

1 Vijna te na cáhán rī jíin táca rōhó téé jéhnū cándito ñayuu cácañdije, chí suni téé jéhnū ndíto ñayuu cácañdije cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnū ri jíin ró sáha Cristo quiṽí quénda ndijin yā.

2 Na cóto yúcún ró ñayuu jeē ndeé jniñu ró condito ró, jeē cácuu i nájnūhun lanchi Yaā Dios. Te na cúsi ni rō condito ró i, chí súcuan cúní Yaā Dios. Te nasūu síquī jeē sáfuerza yā rohó, ni nasūu síquī jeē nihín rō xūhún, chí sa síquī jeē cúní rō cuajniñu rō.

3 Te nasūu jēe ndacu nihin ró jniñu nuū ñáyuu cándito ró, chí sa nducú ró cuu ró ñn ejemplo nuū i jeē cácuu i lanchi ya.

4 Yūcuán na te quiṽí quénda ndijin maá Yaā cúu Pastor kujéhnū nuū rohó téé cácuu pastor lanchi ya, te cuāha ya premio nuū rō jijnáhan ró jēe yóhyo luu te ma náa cuiṽi.

5 Te suni rōhó táca téé suchí, na cuándetū rō nuū táca téé jéhnū jíinā. Te ndíhi rōhó ñáyuu cácañdije, cuandetū rō nuū jnáhan ró, te cani suchí ni rō. Chí suhva cáhán tutu:

Yaā Dios jési yā nuū ñáyuu casáha téyí máá,
te vāha ni yā chíndéé ñáhán yá ñayuu casáha suchí máá.

Achí.

6 Núu súcuan te na cáni suchí ni rō, chí cáyihí ró ndaha Yaā Dios jeē jnā poder. Te sájéhnū ya rohó, na jíinú maá quiṽí.

7 Táca jēe cánacani ndasí ni rō síquī, chíhi ró ndaha máá yá te máá yá coto, chí ndíto ya rohó.

8 Te cájí na cóo xinī rō te ndíto coo ni rō. Chí jexeén jeē jito uhū rohó, jíca cuu nducú squívi rōhó jíjnáhan ró nuū cuéchi. Te xeén gā sáha vēsú ndicaha jeē iyo ndáhyú.

9 Te cuiñi nihin ró jēe ma cúndeyí jexeén jíin ró, te nihin candije ró jnúhun cúndáhú ni yā rohó. Chí cájini rō jeē suni súcuan cándoho hermano ró jeē cáyūcu ní cáhnu ñayívi.

10 Te núu ni jíinu jeē ndoho ró jecu-ni tiempo, te Yaā Dios chí sáha ya jeē ije vāha ni rō jíin jnúhun ya, jíin jēe cuiñi nihin ró, te cuāha ya fuerza ini rō, te quendōo cutú ró ní cáni. Chí máá yá cúu jeē sáha táca jēe váha yóhó, te ni cana ya yohó jēe kujéhnū luu yó jíin yá ní cáni, síquī jeē nduú yó jíin Jesucristo.

11 Te na cáhán yō jeē yóhyo luu kujéhnū ya te jnā ya poder ní cáni. Amén.

Saludo jeē sándhí

¹² Jíní rī jeē Silvano cúu ìn hermano jeē squícu vāha. Te máá de cuajeē nuū rō jín carta yáha jéē ní tee ri jecu jnūhun. Te jín yáha stíhví ní rī rohó, te cáhán rī jín ró jeē ndaá cúu jeē tāca jéē vāha ní sáha Yaā Dios rohó, suu stéén nuū rō jeē cundáhú ndije ní yā rohó. Te na cuíñi nīhin ró jín jnúhun yáha.

¹³ Ñayuu cá candíje jeē cáyūcú ñuu Babilonia, jeē ní nacāji ya i nájñūhun ní nacāji ya rohó, cácahān i jeē sándeýí ní rō. Te Marcos, tēe cúu nájñūhun sēhe ri, suni súcuan cáhán de.

¹⁴ Te núu na cáhán rō jín jnáhan ró, te techūhu mánī rō ndaha i.

Te na cóo ndeyí coo sī ní ndihí ró jéē cáyihí ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te téu ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihīn rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó.

² Te ñūhun ni rī jeē na sáha ga yā jeē váha ndasí rōhó jíin jēe yóhyo coo ndeyí coo sīi ni rō siquī jeē cájecūhun váha ni rō ndese Yaā cúu Yaā Dios jíin Jítoho yō Jesús.

Siquī ndese cánuú coo ñayuu cácanđije

³ Te Yaā Dios, jíin poder yā ni jēhe ya nuū yō tāca jēe sáha jeē cúu caca ndaā yō nuū yā jíin jēe chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújēhnu ya jíin táca jniñu jēhnu sáha ya.

⁴ Jeē yúcuan ní jejnūhun ya tāca jēe yóhyo jēhnu yóhyo váha sáha ya yohó, návāha jíin táca ún te nduu rō nájnūhun iyó máá yá, te cācu rō núu jniñu jeē cándiyo néé ni ñayuu casáha i ini ñayīvi yáha.

⁵ Núu súcuan te na ndúcú ndeyí rō jíin jnúhun yáha. Te jeē cácanđije rō, te siquī ún na

chísóó rō jeē caca ndaā rō. Te jeē cájica ndaā rō, te siquī ún chísóó rō jeē cóndihvī ni rō jecūhun váha ni rō.

⁶ Te siquī ún chísóó rō jeē casi rō modo jeē cuní maá rō. Te siquī ún chísóó rō jnūhun cuandeyí ni rō, te siquī ún chísóó rō jeē chiñúhún váha rō Yaā Dios.

⁷ Te siquī ún chísóó rō jeē cóo manī rō jíin jnáhan rō, te siquī ún chísóó rō jeē cundáhú ni rō jnáhan rō.

⁸ Chi núu cayā tācá jniñu yáha jíin rō, te suu sáha jeē ma cótecu saá-ni rō, chi sa quee váha jniñu sáha rō, siquī jeē cájecūhun ni rō ndese Yaā cúu Jítoho yō Jesucristo.

⁹ Te ñayuu jeē tu cásáha jniñu yáha, nájnūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá.

¹⁰ Jeē yúcuan na ndúcú ndeyí rō hermano, návāha coo seguro jeē ní cana ya rohó jíin jēe ní nacāji ya rohó. Chi núu sáha rō táca jniñu yáha, te ma cáca yátá cuiti rō.

¹¹ Yūcuán ña te nune váha ichi quīvi rō ini ñuu maá Jítoho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñī rī sáha ri jeē núcūhun ni rō tāca jnúhun yáha, vēsú je cájini rō te cáhīin nihin rō jíin jnúhun ndaā jeē cácanđije rō.

¹³ Chi jéni ni rī jeē iyó váha stíhvī ni rī rohó vijna técu ga rī, návāha nucūhun ni rō.

14 Chi máá Jítóho yō Jesucristo ni castūhun yá nuū rī jeē tuá cotecu nahán rí ñayīvi yáha.

15 Jeē yúcuan na ndúcú ndéyí gá rī stihví ni rī rohó, návāha núu je ni jihī rī, te níní nucūhun ni rō tāca jnúhun yáha.

Jeē ní cajito de jeē cujéhnu Cristo

16 Ná ni castéén rī jnúhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī ñn cuento-ni jeē ní catava ndichí ñáyuu. Chi ná ni cahīyo rī jíin yá xinī yúcu, te ni cajito jíin núu rī jeē tucu ni nduu ya jeē ní nduluu jéhnu ya.

17 Chi ni cajini rī jeē Tatá yō Yaā Dios ni cahān yīñúhún yá jíin Jesús, te ni sajeéhnu ya Jesús. Chi ichi ándiví ní quiji jnúhun luu, ni cahān Yaā Dios: Yāha cúu Sēhe rī jeē maní ndasí rí jíin, te cúsiñ ni rī jíin, áchí yá.

18 Te ni cajini sōho rī jnúhun un jéē ni cáhān ichi ándiví, chi ni cahīin rī jíin máá Jítóho yō xinī yúcu ñi ún.

19 Te súcuan cájini yō jeē iyó ndáā ndije tāca jnúhun ni catee tēe ni canacani jnúhun ya nde jenahán. Te vāha jeē na chúhun ni rō jnúhun un jíjnáhan ró, chi suu cúu nájnūhun ñn luz jeē cayú nuū néē, nde na cúndijin quivī ndíji ya, te stéén yā ini anuá rō nájnūhun jeē ndíndéé lucero.

20 Te xīhna gā na jécūhun ni rō jeē ni ñn jnúhun cáhān

tutu ñi, nasūu jéē súcuan-ni ni cajeni ni tēe cúu.

21 Chi tāca tēe ndoo jeē ní canacani jnúhun ya nde jenahán, tu ní cácahān cuiñi de jnúhun jeē cúu ni maá de. Chi sa suhva ni canacani de jnúhun Yaā Dios jeē ni stéén Espíritu Santo nuū de.

Siquī tēe cástéén jnúhun stáhú
(Judas 4-13)

2

1 Te mēhñu ñáyuu Israel ún suni ni cahīyo tēe ni canacani jnúhun stáhú. Te suni súcuan coo tēe stéén jnúhun stáhú méhñu ró. Te squiví de jnúhun stáhú jéē tívi ñáyuu sáha. Te ni ma cuajnúhún de Jítóho yō jeē jnáma ya de, te súcuan sáha de jeē jnahnú ndetū yachí de.

2 Te cuehē ñáyuu condiquīn i modo neé jéē castéén de. Te sáha de jeē cahán neé ñáyuu siquī jnúhun vāha ya jeē cúu ichi ndaā.

3 Te siquī jeē cándiyo ni de xūhún, te quende de xūhun ró siquī jnúhun stáhú stéén de nuū rō. Te tu quixín jnúndóho jnahnū ndetū de, chi nde jenahán je ndétu jnúhun ndonda ya siquī cuéchi de.

4 Chi tu ní íne cáhnu ni Yaā Dios nuū táca ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhñi jíin cadena. Te ni chindihyū yā nde quiví sándaā yā siquī.

5 Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te

máa-ni Noé, tēe ni nacani jnūhun ndaā, ni scácu ya de jíin úxā gā ñayuu.

6 Te suni ni ndonda ya siquī cuēchi ñayuu ñuu Sodoma jíin ñuu Gomorra, te ni cayū ñuu i ni nduu máa yāa na. Te súcuan cúu i ñn ejemplo nuū tāca gā ñayuu sáha néé jéé quíji ga.

7 Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha ñayuu neé un.

8 Chi tēe váha un ní condee de mēñu ñáyuu ún, te ndiquiví ni nacani cuíhyá ni de jeé ní jini sōho de ni jito de tāca jniñu néé ní casáha i.

9 Núu súcuan te máa Jítoho yō chi jnáma ya ñayuu cáchiñúhún núu yā, te núu vēji jnūndóho siquī i. Te chíndihyū yā ñayuu casáha néé, návāha ndoho i castigo quiví sándaā yā cuēchi i.

10 Te víhyá gā stóho ya tēe casáha jniñu jnéhén jéé ndíyo néé ni de, te cácuu jéé ni de siquī jniñu ndácu máa Jítoho yō. Nihni ndasí ni de, te cáchundeyí ni de sáha de jeé cácuu maá de, te tu cáyūhú de cahān ndevāha de siquī tāca jéé cácujuhnu nuū sucún.

11 Te ni máa ndajéhé jeé cáhīn nuū Jítoho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquī tāca jéé cácujuhnu ún.

12 Te tēe ún chi cácuu de nájnūhun quiti yúcu jéé ní jéconaā tī jíin modo sáha tī, te cátahū tī návāha nihīn ñayuu tī cahni i tī. Chi cácahān neé

de siquī tāca jéé tu cájecūhun ni de. Te cuu de nájnūhun jíhí tācá quiti ún.

13 Te jeé ní castóho de ñayuu, suni súcuan nanihīn de ndoho de. Te cácusī ni de jíin tāca jéé cácajni ni de, te casáha de tācá jniñu jeé cándiyo néé ni de. Te cácuu de tēe quini jeé casáha jniñu cúcanu ñayuu. Te jeé cándutútú de jíin ró vico ró, te níni cácusī ni de jíin jniñu néé jniñu stáhú.

14 Te cándiyo ni de cájito de ñahan, te tu cájecuñī de sáha de cuēchi. Te cástáhú de ñayuu tahya ni. Chi ni cacāan de jíin jnúhun ndíyo ni de tācá ndajniñu. Te tēe jnahnū ndetū cácuu de.

15 Te ni casana de, chi ni castóo de jnūhun jeé cúu ichi ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun síquī jnūhun néé jéé cahán de.

16 Te ñn burro ni cahān tī nájnūhun ñn ñayuu, vēsú quiti ñihīn cúu tī. Te ni cahān tī nuū tēe ún, te súcuan ni jesi tī jeé ma quihín de cahān de tāca jnúhun néé stívi.

17 Te tāca tēe súcuan chi cácuu de nájnūhun tesōco íchi, nájnūhun vicō jeé stechí táchi. Te jnahnū ndetū de quivicoo de nuū néé nuū lúchi jnúu coyūcú de ní cáni.

18 Chi yōhyo casándúxí de máa de jíin jnúhun cácahān saá-ni de. Te cánducú de squívi tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeé

sa ní quenda i ni cācu i nuū ñáyuu casáha jniñu néé.

¹⁹ Te cácahān de jeē cáhīyo libre i sáha i ndese-ni cúní maá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeē cúndeyí jíin ñn tēe jeē sáha de, suu yūcuan ndúu de mozo nuū.

²⁰ Chi núu je ni cajini de ndese Yaā cúu máá Jítóho yō Jesucristo, Yaā jnáma yóhó, te núu sūcuan ni quenda de ni cācu de nuū jniñu jnéhén íyó ini ñayíví, te yūcuán na te núu ndívicoo tucu de nuū jniñu un jéē cúndeyí tucu jíin de, núu sūcuan te néé gá quendōo de jeē sándihí vésú jeē xíhna ñúhún.

²¹ Chi vāha ga núu jeē tu ní cájini de jnūhun ichí ndaā nuú, vésú jeē ní cajini de, te stóo tucu de jniñu ndoo jeē ní ndacu ya nuū de.

²² Chi cúndaā jíin de nájnūhun cáhán ñn jnūhun jenahán: Ina ni nacaji tī jeē ní ndujen ti. Te quiní ní ndundoo, ni nacuchi tucu ti ndehyū, achí.

Siquí jeē ndíji Jítóho yō

3

¹ Ñání mání, yāha cúu carta uū jeē tée ri nuū rō. Te jíin ndíndúú carta yáha cúní rí jeē nacani ni rō siquí ndihí jeē váha ndaā jeē jení ichí rí rohó.

² Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítóho yō, Yaā jnáma yóhó. Te suu

cúu jeē ní castéén tēe cácuu apóstol nuū rō.

³ Te xíhna gā jnūhun yáha na jécūhun ni rō: Jeē nuū cuándihí quiví te quijicoo tēe sácata siquí jnúhun ndaā yā, chi sáha de tācá jniñu néé jéē ndíyo ni maá de.

⁴ Te cahān de jíjnáhan de: ¿Najehē cúu jeē tu ndíji Cristo nájnūhun ni jejnūhun ya? Chi nde quiví ní cajihí jíi yō te nde vijna, tu ndé sáma cui ti ndihí jeē iyó ndé ná ni jecōo ñayíví, achí de.

⁵ Chi tu cácumí de jecūhun ni de jeē ndé jenahán ní cuvāha andiví jíin jnúhun ni cahān Yaā Dios. Te ni ndacu ya jniñu jeē na cuvāha ñayíví jíin ndute, te mēhñú ndute ni nane ñuhun íchi.

⁶ Te suni jíin ndute ni naa ñayíví jenahán, chi ni ndaa ndute jeē ní cuun saū xeén.

⁷ Te suni sūcuan jíin jnúhun ni cahān Yaā Dios ni sātūhva ya jeē cayú andiví jíin ñáyíví íyó vijna. Chi máá quiví juicio te cayú ndihí, te jnahnū ndetū ñayuu ni casáha néé.

⁸ Te suni ma náā ni rō jnūhun yáha, ñání mání: Jeē nuū maá Jítóho yō chi ñn quiví cúu nájnūhun mil cuiyā, te mil cuiyā cúu nájnūhun ñn quiví-ni.

⁹ Chi nasūu jéē cucuéé máá Jítóho yō siquí jnúhun ni jejnūhun ya, nájnūhun cájeni ni sava ñayuu. Chi sa suhva íyó paciencia ni yā nuū yō, chi tu cúní yā jeē jnahnú ndetū ni ñn yó, chi sa cúní yā jeē ndihí yó nacani ni yō stóo yó cuéchi yó.

10 Te quivī ndíji máá Jítóho yō, ñn sanaa-ni te quee, nájnūhun ñn sanaa-ni te quee ñacuñhá jecuáa. Te quivī ún chi ñhñ ndasí andiví, te naa-ni. Te ndihí jeē iyó andiví chi naa sáha ñuhūn. Te ñayīvi jíin táca jéē iyó ini, ndihí cayū.

11 Te núu súcuan naa tãcá un, te cánuú ndasí jéē coo ndoo ánuá rō te chiñúhún váha ro yá jijnáhan rō.

12 Te condetu rō te condihvī ni rō jeē na quee yachī quivī ndíji Yaā Dios. Te quivī ún cayū andiví te naa-ni, te táca jéē iyó chi ndute sáha yáñuhūn.

13 Te máá yó chi cándetu yó andiví jéē jíin ñáyīvi jéé, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

14 Núu súcuan, ñánī mánī, níni jéē cándetu rō jéē squícu tãcá jniñu yáha, te na ndúcú ndéyí rō návaha quivī ndíji ya te nihñ yā rohó jéē cáyūcu mánī rō, te coo ndoo rō jéē tú na cuēchi rō.

15 Te na jécūhun ni rō jeē siquī jeē iyó paciencia ni máá Jítóho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de.

16 Te cáhán de siquī jnúhun yáha núu táca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cánasama i modo steén jnūhun yí un,

nájnūhun násama i jeē cahán sava ga tutu ñ. Te súcuan sáha i jeē jnahnú ndetū maá i.

17 Te rōhó ñánī mánī, vjna te je ni cajini rō ndese coo tãcá jniñu yáha. Núu súcuan te coto má condiquñ rō jnūhun stáhú cástéén ñayuu casáha néé. Chi núu tuú te snáa rō jnūhun cáhññ nihñ rō jíin.

18 Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhyo luu cújéñnu ya nde vijna jíin ní cáni. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nī cāni

1 Jnūhun cátee ri cuajeē nuū rō jijnáhan ró cúu jnūhun máa Yaā jeē je íyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínū rī yā, chi ni cajito vāha ri nuū yā, te ni cajni ri yā. Te máa yá cúu Jnūhun cotecu yō nī cāni.

2 Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síqu Yaā cúu Jnūhun cotecu yō nī cāni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri.

3 Jeē ní cajito ri jín jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhīyo inuú ni yō jín máa Tátá yō Yaā Dios jín Séhe ya Jesucristo.

4 Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

5 Te yáha cúu jnūhun ni steén Jesucristo nuū rī, te vjna cácastūhun rí nuū rō: Yaā Dios cúu luz, chi yōhyo ndaā

yā, te tú cuiti na jniñu néé íyó jín yá.

6 Núu cácahān yō jeē cáhīyo inuú ni yō jín yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūú jniñu ndaā casáha yó.

7 Te núu cájica yó jín luz yā jeē casáha yó jniñu ndaā, nájñūhun íyó máa yá jín luz yā jeē sáha ya jniñu ndaā, yūcuán na te cáhīyo inuú ni yō jín táca jnáhan yó. Te niñi maá Séhe ya Jesucristo sándoo yóhó núu ndihi cuēchi yó.

8 Núu cácahān yō jeē tú na cuēchi yó, te cástáhú yó maá yó jeē jéni ni yō súcuan, te tu ñūhun jnūhun ndaā ini yó.

9 Te núu nacani ndaā yō cuēchi yó núu yā, te cone cáhnu ni yā nuū cuéchi yó, te sándoo ya yohó ndihi jeē neé casáha yó. Chi jín yō jeē Yaā vāha Yaā ndaā cúu ya.

10 Te núu cácahān yō jeē tú na cuēchi yó, te nájñūhun sáha yó jéé Yaā stahú cúu ya, te tu cándije ndije yó jnúhun ya.

Cristo cúu Yaā cahán jehē yō

2

1 Tāca jnúhun yáha téé ri cuajeē nuū rohó jéé cácuu ró nájñūhun sēhe ri, návāha ma sáha ró cuéchi jijnáhan ró. Te núu ndé in ró ní sáha cuēchi, te íyó máa Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya.

2 Te ni socō yā maá yá jeē ndahva yā cuēchi yó, te nasūu

cuéchi máá-ni yó, chi suni cuéchi ñayuu ñí ñáyíví.

³ Núu squícu yó jniñu ndácu Yaā Dios nuū yō, jíin yúcuan cúcáhu ni yō jeē jini ndije yó ndese Yaā cúu ya.

⁴ Te núu cáhán ñn ñayuu: Ruhū chi jíni rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jñuhun ndaā.

⁵ Te sa ñayuu squícu jñuhun ya, je ni ije vāha ni i jeē maní i jíin yá. Súcuan te cuni yō núu ndúú yó jíin yá chí tuú.

⁶ Núu cáhán ñn ñayuu jeē nduú i jíin yá, cánuú jéē caca ndaā i nájnūhun ni jica Jesucristo.

Jniñu jéé ndácu ya nuū yō

⁷ Hermano, nasūú ñn jniñu jéé ndácu ri nuū rō jeē cahán rī jeē na cúndáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jñuhun ni cajini sōho ró ndé quiví ní quejéé ró candíje ró.

⁸ Te vēsú súcuan, te níni jniñu jéé cúu, te jniñu ndaā cúu nuū Cristo jíin núu maá ró jijnáhan ró. Chi je cuayāha jniñu néé jéé iyó núu néē, te je stéén maá luz ndaā ini anuá yō vjna.

⁹ Núu ñn ñayuu cahán i jeē jica i jíin luz yā, te núu jíto uhū i jnáhan i, ñayuu ún chí jica ga i nájnūhun nuū néé jíin cuéchi.

¹⁰ Te ñayuu jeē cundáhú ni jnáhan, chí jica i jíin luz yā, cúu jeē sáha i jniñu vāha. Te ni ñn ma cúu sáha jeē quiví i cuéchi.

¹¹ Te ñayuu jíto uhū jnáhan, chí iyó i nuū néē, te jica i nuū néē. Te tu jíni i ndé chí quihín i, chí nuū néē un ní jesi jeē tu jécūhun ni i.

¹² Róhó jéē cácuu sēhe, téé ri jñuhun yáha cuájeē nuū rō, chí jeē siquí Jesucristo te ni ine cáhu ni Yaā Dios nuū cuéchi ró.

¹³ Róhó tátá jijnáhan ró, suni téé ri nuū rō, chí cájini rō ndese Yaā cúu Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chí ni cacundeyí ró jeē tu ní cúu squíví jexeén rohó cuéchi.

Róhó jéē cácuu sēhe, téé ri jñuhun yáha cuájeē nuū rō, chí cájini rō ndese Yaā cúu máá Tátá yō Yaā Dios.

¹⁴ Róhó tátá jijnáhan ró, suni téé ri nuū rō, chí cájini rō Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chí cáhīn nīhin ró, te cácandíje ró jnúhun Yaā Dios, te ni cacundeyí ró siquí jéxeén.

¹⁵ Ma cutóó ni rō siquí ñayíví, ni tāca jéé iyó ini ñayíví. Chí núu ndé ñayuu cutóó ni i siquí ñayíví, ñayuu ún tu iyó mánī i jíin Tátá yō Yaā Dios.

¹⁶ Chí tāca jéé cúu cuenta ñayíví, nasūu ndé nuū Tátá yō Yaā Dios vēji, chí cuenta ñayíví cúu. Te yúcuan cúu tāca jéé cájini ni yō jeē cuní modo neé máá yó, jíin jéé ndíyo ni yō jeē jíto yó núu, jíin jéé sandúxí yó maá yó siquí nda-jniñu névāha yó.

¹⁷ Te cuandihí ñayíví jíin tāca jéé ndíyo néé ni yō. Te

ñayuu casáha jeē cuní maá Yaā Dios, chi cotecu i ní cáni.

Jnūhun ndaā jín jnúhun stáhú

18 Róhó jéē cácuu nájñūhun sēhe rí, cáhán rí jín ró jeē cuandíhi quiví. Te je ni cajini jñūhun ró jéē quíji máá tée cuu contra siquí Cristo. Te nde vijna je ni canecoo cuehē tēe jeē cácuu contra siquí Cristo. Te jeē yúcuan jíní yō jeē cuandíhi quiví.

19 Mēñū máá yó ni quendacoo de, te nasūu jnáhan yó cácadíje cácuu de. Chi núu jeē jnáhan yó cácuu de, te quendōo de jín yó nuú. Te ni quenda de cuango de, návāha cuni cají yó jéē násūu jnáhan yó cácuu ndihi de.

20 Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yúcuan cájini rō jñūhun ndaā.

21 Núu súcuan te tée ri yāha cuájeē nuū rō, siquí jeē cájini rō jñūhun ndaā, nasūu siquí jeē tu cájini rō. Te cájini rō jeē tú na jñūhun stáhú íyó nuū jnúhun ndaā.

22 ¿Ndeé ñn cúu jeē cahán máni jñūhun stáhú? Suu tēe jeē cahán jeē Jesús, tu cúu ndije ya Cristo, Yaā ní tají Yaā Dios. Yúcuan cúu tēe jeē cúu contra siquí Cristo, chi tu jéjñúhún de máá Tátá yō Yaā Dios jín Séhe ya.

23 Tāca ñáyuu jeē tu jéjñúhún i Séhe ya, suni tu íyó máá Tátá jín i. Te ñáyuu jeē jéjñúhún i Séhe ya, suni íyó máá Tátá jín i.

24 Núu súcuan te chuhun vāha ni rō maá jnúhun ni cajini sōho ró ndé jeē xíhna ñúhún. Te núu ñúhún vāha ni rō jñūhun ní cajini sōho ró ndé jeē xíhna ñúhún, yūcuán na te suni ndúú ró jín máá Tátá yō jín Séhe ya.

25 Te yāha cúu jñūhun jeē ni jéjñūhun Jesucristo nuū yō: jeē cótecu yō ní cáni sáha ya.

26 Jñūhun yāha ní tee ri nuū rō jeē cástūhun rí siquí ñáyuu cánducú stáhú róhó.

27 Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yúcuan tu jíní ñúhún jéē steén ni ñn ñáyuu nuū rō ndé vé cúu jendaá, chi máá Espíritu cúu jeē steén ndihi nuū rō, te steén yā jñūhun ndaā, chi tu stáhú cuiti yā. Núu súcuan te caca ndúú ró jín Cristo, nájñūhun stéén Espíritu nuū rō.

28 Séhē jijnáhan ró, vijna te na cáca ndúú ró jín Cristo, návāha núu na quénda ndijín yā, te ma yūhu yó, ni ma cúcanu yō nuū yā quiví ndíji ya.

29 Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jñíñū ndaā, sēhe Yaā Dios cácuu i.

Jñūhun ñáyuu cácuu sēhe Yaā Dios

3

1 Nacā jeē yóhyo ni cundáhú ni Tátá yō Yaā Dios yohó, chi ni ñihñ yō jñūhun cuu yó séhe ya, te suu cúu ndije yó. Jeē yúcuan, ñáyuu ñáyiví tu cájini i

jeē cúu yó séhe ya, chi tu jíní i ndese Yaā cúu máá yá.

² Ñānī mānī, vijna te cúu yó séhe Yaā Dios, te ná tu cuni yō ndese coo yó ní cáni. Te je jíní yō jeē quiṽi quénda ndijin Jesucristo, te nduu yó nájnūhun íyó máá yá, chi coto yó núu yā ndese íyó yá.

³ Te tāca ñáyuu jeē súcuan ñūhun ni i, chi sándoo i ánuá i, nájnūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā.

⁵ Te je cájini rō jeē ní quiji Jesucristo ini ñayṽi návāha quende yā cuēchi yó. Te máá yá tú na cuēchi ya.

⁶ Te tāca ñáyuu jeē nduú i jín yá, tu cájica i jín cuéchi. Te tāca ñáyuu cájica jín cuéchi, tu jíní i ya, ni tu jécūhun ni i ndese Yaā cúu ya.

⁷ Séhē jijnáhan ró, coto ró jée ma stáhú ni ñn i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájnūhun íyó ndaā máá yá.

⁸ Te ñayuu casáha cuēchi, máá i cácuu séhe jexeén. Chi jexeén cúu jeē sáha cuēchi vēji nde jeē xíhna ñūhún. Jeē yúcuan ní quiji Séhe Yaā Dios, jeē snāā yā tācá jniñu néé sáha jexeén.

⁹ Ni ñn ñayuu jeē cúu séhe Yaā Dios, tu jíca i jín cuéchi, chi ni sáha Yaā Dios jeē ní nduu i nájnūhun íyó máá yá. Te ma cúu ga caca i jín cuéchi, chi séhe Yaā Dios cácuu i.

¹⁰ Súcuan cuni yō ndé ñn cúu séhe Yaā Dios jín séhe jexeén: Tāca ñáyuu jeē tu sáha jniñu ndaā, jín jéē tu cúndáhú ni jnáhan, nasūu séhe Yaā Dios cúu i.

Jeē na cúndáhú ni yō jnáhan yó

¹¹ Yāha cúu jnūhun jeē ní cajini sōho ró ndé jeē xíhna ñūhún: jeē na cúndáhú ni yō jnáhan yó.

¹² Te ma sáha yó nájnūhun ni sáha Caín, jeē ní cuu de séhe jexeén, te ni jehni de ñani de. ¿Te najehē ni jehni de ñani de? Siqur jeē ñani de ni sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayṽi cáquitī ni i nuū rō.

¹⁴ Te máá yó chi siqur jeē cundáhú ni yō jnáhan yó, súcuan jíní yō jeē jé ni cácu yó jée cótecu yō ní cáni. Te ñayuu jeē tu cúndáhú ni jnáhan, íyó i jín jnūhun jnahnū ndetū i.

¹⁵ Chi tāca ñáyuu quití ni nuū jnáhan, nájnūhun ñayuu jéhni ndiyi cúu i. Te cájini rō jeē ñáyuu jéhni ndiyi, ma nihín tahu i cotecu i ní cáni.

¹⁶ Jeē ni jíhī Cristo jehē yō, yúcuan cúu jeē steén cají ndese cúu jnūhun cúndáhú ni. Te máá yó, chi suni súcuan jíní ñūhún cundáhú ni yō jnáhan yó vēsú na cúu yō jehē i.

¹⁷ Te núu névāha yó jée cótecu yō ñayṽi, te núu jíní yō jeē cúmanī nuū jnáhan yó, te núu tú cundáhú ni yō i cuāha yó jée jíní ñūhún i, núu súcuan

¿te á iyó mánī yō jīn Yaā Dios, chi naún?

18 Séhē jijnáhan ró, ma cundáhú ni yō jīn máá jnúhun cáhán-ni yó, chi sa suhva na cundáhú ndije ni yō nde jīn jniñu sáha yó.

Ndese cucáhnū ni yō jeē váha sáha yó núū Yaā Dios

19 Te súcuan cundaā ni yō jeē squícu yó jnúhun ndaā, te cucáhnū ni yō jeē váha sáha yó núū yā.

20 Chi núū ánuá yō tú váha sáha siquī jeē iyó cuéchi yó, te Yaā Dios chi cújéhnū ga yā vēsú anuá yō, te jínī ndīhi ya táca un.

21 Núū súcuan ñánī mánī, núū váha sáha ánuá yō siquī jeē tú na cuéchi yó, yūcuán na te cucáhnū ni yō jeē váha sáha yó núū Yaā Dios.

22 Te táca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsiñ ni yā.

23 Te yāha cúu jniñu ndácu ya: jeē na cándije yó jéē ni sáha Sēhe ya Jesucristo jehē yō, jīn jéē na cundáhú ni yō jnáhan yó, nájnūhun ni ndacu ya jniñu nuū yō.

24 Te táca ñáyuu squícu jniñu ndácu Yaā Dios, ndúú i jīn yá, te ndéé yá ini anuá i. Te jīn máá Espíritu jeē ni jéhe ya jeē ndeé ini anuá yō, jīn yúcuán te jínī yō jeē ndeé Yaā Dios ini yō.

Jnúhun jeē véji nuū Espíritu jīn jnúhun cáhán contra Cristo

4

1 Ñánī mánī, ma candíje ró táca téé jéē cácahān de jeē jīn Espíritu Yaā Dios cánacani de jnúhun. Chi sa suhva coto ndee rō de, núū nde nuū Yaā Dios vēji jnúhun cácahān de, chí tuú. Chi ini ñayīví je ni canecoo cuehē téé cánacani jnúhun stáhú, te cácahān de jeē ndé nuū Yaā Dios vēji.

2 Te súcuan nacuni rō ndé-ni i cúu jeē jīn Espíritu Yaā Dios cahán: táca ñáyuu jeē cácahān ndaā jeē ní quiji Jesucristo, ni nduu ya téé, máá i cúu jeē jīn Espíritu Yaā Dios cácahān.

3 Te táca ñáyuu jeē tu cácejnúhún jeē súcuan ni nduu ya téé, máá i chi nasūu jīn Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnúhun ró jéē quíjicoo ñáyuu súcuan, te vijna je cáhīyo i ini ñayīví.

4 Séhē jijnáhan ró, máá ró cácuu sēhe Yaā Dios, te je ni cacundeyí ró siquī téé cástáhú un. Chi jéhnū ga cúu poder maá Yaā jeē ndeé ini rō, vēsú poder maá jéē ndeé jīn ñáyuu ñayīví jéē castáhú.

5 Máá i cácuu cuenta ñayīví, te jeē yúcuán cácahān i jnúhun cuenta ñayīví. Te ñáyuu cácuu cuenta ñayīví, cájini nahín i jnúhun ún.

6 Te máá yó chi sēhe Yaā Dios cácuu yó. Te ñáyuu jeē cájini i ndese Yaā cúu Yaā Dios, máá i cájini nahín i jnúhun cácahān yō. Te ñáyuu jeē násūu sēhe Yaā Dios cácuu, máá i tu cájini nahín i jnúhun

cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cúndáhú ni iyó jíin Yaā Dios

7 Ñánī mánī, na cúndáhú ni yō jnáhan yó, chí jnūhun cúndáhú ni, nde nuū Yaā Dios vēji. Te tāca ñáyuu cundáhú ni jnáhan, chí sēhe Yaā Dios cúu i, te jíin i ndese Yaā cúu Yaā Dios.

8 Te ñayuu jeē tu cúndáhú ni jnáhan, tu jíin i ndese Yaā cúu Yaā Dios, chí máni jnūhun cúndáhú ni iyó jíin Yaā Dios.

9 Súcuan ni steén Yaā Dios ndese cúndáhú ni yā yohó, chí ni tají yá Sēhe ya ni quiji ini ñayīvi yáha, vēsú mañúhún-ni ya iyó, návāha cotecu yō ní cáni sáha ya.

10 Te yāha cúu jnūhun cúndáhú ni: nasūu jéē xīhna maá yó ni íyo manī yō jíin Yaā Dios, chí sa suhva maá yá cúu jeē ní cundáhú ni yā yohó. Te ni tají yá Sēhe ya ni quiji, návāha socō yā maá yá jeē quende yā cuēchi yó.

11 Ñánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó.

12 Ni ñin ñayuu tu ní jíto cuiú nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cúndáhú ni.

13 Te maá Espíritu Santo jeē ni jéhe ya jeē ndeé ini yō, maá yá steén jeē nduú yó jíin Yaā Dios, te ndeé Yaā Dios ini yō.

14 Te ni cajito ri te cácastūhun rí jeē maá Tátá yō ni tají yá Sēhe ya ni quiji návāha jnama ya ñayuu ñayīvi.

15 Te núu ndeé ñáyuu jnūhún i jeē Sēhe Yaā Dios cúu Jesús, te nduú i jíin Yaā Dios, te Yaā Dios ndeé yá ini i.

16 Te maá yó, je ni jini yō te ni candíje yó jéē cundáhú ni Yaā Dios yohó. Chí máni jnūhun cúndáhú ni iyó jíin Yaā Dios. Te ñayuu cundáhú ni jnáhan, nduú i jíin Yaā Dios, te ndeé yá ini anuá i.

17 Te súcuan cúu jeē íje vāha ni yō jíin jnūhun cúndáhú ni, návāha ma yūhu yó quiūví sándaā yā jniñu yó. Chí nájnūhun cúndáhú ni Cristo, suni súcuan cándaā maá yó ini ñayīvi yáha.

18 Te núu manī yō jíin yá, te tu yúhú yó nuū yā. Chí núu ni ije yó jíin jnūhun manī yō jíin yá, te tú na síquī yuhú yó nuū yā. Chí jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chí ná tu ije vāha i jíin jnūhun manī i jíin yá.

19 Te yohó chí manī ndasí yó jíin Yaā Dios, chí xīhna gā maá yá ni cundáhú ni yā yohó.

20 Te núu ñin ñayuu cahán i jeē maní i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chí núu ñin ñayuu tu íyo mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā.

21 Chí je ni ndacu ya jniñu yáha nuū yō: Ñayuu jeē maní

i jíin Yaā Dios, suni na cóo manī i jíin jnáhan i.

Jeē cúndeyí yó siquī jeneé íyó ini ñayíví

5

¹ Tāca ñáyuu jeē cá candíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cá cundáhú ni i ñayuu cácuu sēhe ya.

² Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya.

³ Chi jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chí tú vēyi.

⁴ Chi tāca ñáyuu cúu sēhe Yaā Dios, cúndeyí i siquī jeneé íyó ini ñayíví. Te jeē candíje yó jéē cundáhú ni yā yohó, yūcuan cúu fuerza jeē sáha jeē cúndeyí yó.

⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cúndeyí siquī jeneé íyó ini ñayíví.

Jnūhun cáhán ndaā siquī Séhe Yaā Dios

⁶ Te jeē ní quiiji Jesucristo ini ñayíví, chí ni jendute ya jíin ndute, te ni jeti niñi yā jeē ni jíhī yā jehē yō. Te nasūu máá ñn-ni jeē ní jendute ya jíin ndute, chí suni ni jeti niñi yā. Te máá Espíritu Yaā Dios cáhán ndaā siquī yā, chí nuū máá Espíritu vēji jnūhun ndaā.

⁷ Chi ini andiví íyó únī jeē cácahán ndaā siquī jnūhun yáha: máá Yaā cúu Tátá, jíin

Yaā cúu Jnūhun, jíin Espíritu Santo. Te ndinúni yá, chí ñn-ni cúu ya.

⁸ Te ini ñayíví suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñi yā. Te ndinúni yáha, chí inuū-ni steén siquī yā.

⁹ Te cájetáhú yó jnūhun cácahán ndaā tēe, te jéhu ga cúu jnūhun cáhán maá Yaā Dios. Te jnūhun ni cáhán yā cúu jnūhun siquī Séhe ya.

¹⁰ Ñayuu cá candíje jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhán Yaā Dios. Te ñayuu jeē tu cá candíje jeē ni cáhán Yaā Dios, návjūhun cása ha i jeē Yaā stahú cúu ya, chí tu cá candíje i jnūhun ni cáhán ndaā yā siquī Séhe ya.

¹¹ Te jnūhun ndaā un cúu jeē ni sáha ya jeē cótecu yō ní cáni, te Sēhe ya ndíso jnūhun cotecu yō.

¹² Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

Jnūhun consejo jeē sándihí

¹³ Jnūhun yáha tēe ri nuū rohó ñáyuu cá candíje Sēhe Yaā Dios, návāha cucáhnū ni rō jeē ni níhín tahú rō cotecu rō ní cáni.

¹⁴ Te cúcáhnū ni yō Yaā Dios, chí jíin yō jeē núu na vé jícán yō nuū yā jeē suni cúní maá yá, te jíin nahín yá jeē jícán yō.

¹⁵ Te núu jíin yō jeē jíin nahín yá jeē jícán yō, núu súcuan te suni jíin yō jeē sáha ya jeē jícán yō.

16 Nūu ñn ñayuu jíní i jeē sáha jnáhan i cuēchi jeē násūu cuéchi jeē jnahnú ndetū i cúu, te na cácan tahu i nuū Yaā Dios, te cuāha ya jnūhun cotecu jnáhan i, te nūu nasūu cuéchi jeē sáha jeē jnahnú ndetū i cúu. Iyó cuéchi jeē jnahnú ndetū i sáha, te tu cáhán rī jeē cacán tahu rō jehē ñayuu sáha cuēchi súcuan.

17 Tācá jniñu néé cúu cuēchi, te iyó cuéchi jeē násūu jéē jnahnú ndetū i cúu.

18 Te jíní yō jeē tāca ñáyuu cácuu sēhe Yaā Dios, tu jíca i jíin cuéchi. Chi Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

19 Te jíní yō jeē séhe Yaā Dios cácuu yó. Te ñayuu ní ñáyīvi yíhi i ndaha jexeén.

20 Te suni jíní yō jeē ní quiji Sēhe Yaā Dios, te ní sáha ya jeē jécūhun ní yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni.

21 Séhē jijnáhan ró, na cújiyo ró nūu tāca jéē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

*Jnūhun ndaā jīn jnúhun
cúndáhú ni*

¹ Máá ná cúu tēe jéhnú ndíso jníñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jīn núu séhe ní jijnáhan i. Te manī na jīn ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jiní jnūhun ndaā.

² Te manī na jīn ní jijnáhan ní síquī jeē cá candíje yó jnúhun ndaā yā jeē iyó ini anuá yō, te coo jīn yó ní cáni.

³ Te ñúhun ni na jēē Tátá yō Yaā Dios jīn Séhe ya Jitoho yō Jesucristo, na sáha ga yā jeē váha níhín, te cundáhú ni yā níhín, te sáha ya jeē coo ndeyí coo síh ni ní, jīn jnúhun ndaā jīn jnúhun cúndáhú ni.

⁴ Yōhyo ni cusī ni ná, chi ni jini na jēē sava séhe ní cájica i jīn jnúhun ndaā, nájnūhun ni ndacu máá Tátá yō Yaā Dios jniñu nuū yō.

⁵ Hermana, cáhán ndahú ná jīn ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūu ñin jniñu jéé sá ndácu ya cúu, chí jniñu ní ndacu ya nuū yō nde ná ni quejéé yó candíje yó cúu.

⁶ Te jeē cundáhú ni yō jnáhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu

ya cúu jeē caca ní jīn jnúhun cúndáhú ni, nájnūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo.

⁸ Coto ní jēē ma snáā ni táhū síquī jniñu váha ni casáha ní, chí sa suhva jeē na níhín ni ndíhi tahū ní.

⁹ Núu ndé ñáyuu jñí inga jnūhun, te tu quéndōo i jīn jnúhun ni steén Cristo, núu súcuan te tu iyó Yaā Dios jīn i. Te ñáyuu quéndōo jīn jnúhun ni steén Cristo, chí iyó Tátá yō jīn i, te suni iyó Séhe ya jīn i.

¹⁰ Te núu jinū ñin ñáyuu vehe ní, te núu tu quijnáhan jnūhun steén i jīn jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jīn i.

¹¹ Chi ñáyuu cahán jnūhun ndeyí ni jīn i, chíndéé ñájnáhan jīn i síquī jniñu néé casáha i.

Jnūhun sandíhí

¹² Iyó cuehē gā jnūhun cahán na jīn ní jijnáhan ní, te tu cúní na tee ná núu tútu jīn tinta. Chí ñúhun ni na cuájeē ná coto jnáhan yó, te ndajnūhun yó, návāha cusī ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sá ndeyí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

*Jeē jejnúhún de tēe nání
Gayo*

¹ Máá rí cúu tēe jéhnú ndíso jniñu, te tēe rí carta yáha cuájeē nuū rō, amigo Gayo, chí manī rī jíín ró sáha jnūhun ndaā.

² Nánī mánī, jícán tahu rī jeē vāha na quíhín tǎcá jniñu sáha ró, jíín jéē na cóo vāha ró, nájnūhun íyó vāha ánuá rō jíín jnúhun ya.

³ Yōhoyo ní cusī ní rī ná ní quecoo sava hermano te ní cacastūhún de nuū rī ndese vāha squícu ró tǎca jniñu ndaā, chí jíca ndaā rō.

⁴ Tuá na inga sáha jeē cúsi gā ní rī, chí mání jeē nihín rī jnūhun jeē cájica ndaā ñayuu cácuu nájnūhun sēhe rí siquī jeē ní scándíje rí i.

⁵ Nánī mánī, yōhoyo vāha sáha ró jéē chindéé ñáhán ró tǎcá hermano, te víhyá gā núu tēe ñuu jíca cácuu de.

⁶ Chí tēe un ní canacani de jnūhun nuū ñayuu cácadíje yāhá, ndese cúndáhú ní rō de. Te jícán rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájnūhun nújnahan ní Yaā Dios.

⁷ Chí tēe un ní quendacoo de cájica de siquī jniñu Jesu-cristo. Te tú na vé cáquihín de nuū ñayuu jeē tu jíni jnūhun Yaā Dios.

⁸ Jeē yúcuan cánuú coto yó de, chindéé ñáhán yó de jeē cánacani de jnūhun ndaā.

*Siquī jeē tú vāha sáha
Diótrefes*

⁹ Je ní tee rí ñin carta nuū ñáyuu cácadíje jíñā. Te Diótfrefes, tu jétáhú de jnūhun cáhán rī, siquī jeē cuní de cujéhnú máá de nuū i.

¹⁰ Jeē yúcuan, núu na jéé rí te cahān rī nuū de siquī jniñu sáha de, chí yōhoyo sájnúhún de te cáhán de jnūhun stáhú siquī rī jíjnáhan rí. Te nasūu máá yúcuan-ni sáha de, chí suni tu jétáhú de tǎcá hermano jéngoo nuū de, te jési de jeē ma cuátáhú ñáyuu nuū tǎcá hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

¹¹ Nánī mánī, ma ndácu ró ñáyuu casáha jniñu néé, chí sa suhva ñayuu casáha jniñu vāha. Chí sēhe Yaā Díos cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Díos.

*Jeē cácahān i jeē vāha sáha
Demetrio*

¹² Tǎca ñáyuu chí cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān máá rí, te cájini rō jeē iyó ndaā jnūhun cáhán rī.

Jnūhun sandíhí

¹³ Iyó cuéhē gā jnūhun cahān rī jíín ró, te tu cuní rí tee rí jíín tinta jíín pluma.

14 Chi ñúhun ni rī cuajeē yachī rī coto jnáhan yó, te ndajnūhun yó.

15 Te ñúhun ni rī jeē na cóo ndeyí coo sī ni rō. Tācá amigo yō yāha cácahān i jeē sándeýí ni rō. Te suni cahān rō jīn ñn ñn amigo jīñā jeē sándeýí ni i, áchí rí, te cocahān yō.

CARTA JEE NI TEE SAN JUDAS APOSTOL NUU ÑAYUU CACANDIJE

1 Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jíin. Te Jesucristo ndító vāha ya rohó jéē cáyihí ró ndaha ya.

2 Te ñūhun ni rī jeē na cúndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jíin ró, te na ndúcuehē gā tāca jéē yáha núu rō.

Siquī tēe cástéén jnūhun stáhú

(2 Pedro 2.1-17)

3 Ñānī manī, yōhyo ní cuu ni rī tee ri nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee ri carta jeē stihví ni rī rohó návāha nducú ndeyí ró jeē ma cási ñáyuu nuū jnūhun cácandíje yó. Te jnūhun ún chi je ni jēhe ya iin jínu-ni nuū tāca ñáyuu maá yá.

4 Chi sava tēe ni castáhú de rohó ní quīvicoo de mēhñu ró. Te tēe ún chi nde jenahán je cáhán tutu iī jeē jnahnú ndetū de siquī jníñu cása ha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni

sáha de jniñu néé, cácahān de. Te tu cájejnúhún ndije de Jitoho yō Jesucristo jíin Yaā Dios, jeē mañúhún-ni ya kujéhnú nuū yō.

5 Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jítoho yō. Chi ni jnama ya ñayuu Israel jenahán, ni chindéé ñájnáhan ya i jeē ní jinu i iní ñuu tatú Egipto cuahān i. Te vēsú súcuan te cuéé gá te ni snāā yā sava i jeē tu ní cácandíje i.

6 Te suni núcūhun ni rō siquī ndajéhé yā jeē ní castóo jniñu ndiso, te ni castóo nuū ní ndeē andiví. Te Yaā Dios ni chindihiyū yā jijnáhan, te cándetu nde quiji quiví cáhnu jeē sándaā yā jniñu. Te cánuhnī jíin cadena, cáyūcu ní cáni nuū cunú núu néé.

7 Te suni ní stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chi suni ni casáha néé i nájnūhun ni casáha tāca ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ní cáni, te súcuan cúu i iin ejemplo nuū ndihi ñayuu.

8 Te tēe cástáhú jeē ní quīvicoo mēhñu ró, vēsú cájini de jeē súcuan ni sáha ya, te cájeni cáhá ni de, te casáha jnéhén de yiqui cúñu de, te cásquéhichī ní de tēe cándacu jniñu Jitoho yō, te cácahān ndevāha de siquī tāca jéē cácujehnú nuū súcún.

9 Te nasūu súcuan ní sáha ndajéhé Miguel, vēsú ndajéhé

cujéhnú ga cúu ya. Chi tu ní cáhán ndevāha ya ni tu ní ndácunehen ya cuēchi siquī jexeén ná ni casásáhán jnāhan ya jíin jéxeén un jeē siquī yiqui cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jítoho, cuxeēn yā nuū rō, ni achi Miguel.

10 Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quitī yúcú jéē sá cáa ti, suu yūcuan sáha jeē jnahnú ndetū de.

11 Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuni de nihīn de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihī siquī jeē ní cunīhni ni de.

12 Tēe yáha núu cándutútú de jíin ró jeē cáyeji manī rō, te cásaaha de jniñu cúcanu rō. Chi cáyeji cájihī sī ni de, te tu cásaaha de cuenta ndese caji inga ñayuu, chi máni máá de ndíhvī ni de caji vāha de. Te cácuu de nájnūhun vicō íchi jéē stechí táchī. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuitī gā na modo nane numa.

13 Te nájnūhun jeē jisó cóyo ndute mar te cáne tiñū, súcuan jícu de jíin jniñu neé jéē cúu jnūhun canu. Te cácuu de nájnūhun quīmi jeē ní sana

ichi. Te je íyó túhva nuū néē nuū lúchi jnúú coyūcú de níí cáni.

14 Te jeē ní yāha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca tēe yáha, áchí de: Máá Jítoho yō ni steén yā nuū rī jeē ñn quivī te quiji ya jíin cuéhē mil ñayuu maá yā.

15 Te sándaā yā jniñu tāca ñáyuu, te snáhnú ndetū yā tāca ñáyuu casáha neé. Chi máni jniñu neé cásaaha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc.

16 Tāca tēe yáha máni cácahān sōo de, te cácahān de siquī ñayuu. Te máni jeē cúsi ni maá de cánducú de. Te cácahān de jeē tēe téyí cácuu de, te cácahān yiñúhún de jíin ñáyuu návāha nihīn de jecu nuū i.

Jeē stíhvī ni Judas ñayuu cácañdjé

17 Te máá ró jijnáhan ró ñánī mánī, na núcūhun ni rō jnūhun jeē jé ni canacani tēe cácuu apóstol maá Jítoho yō Jesucristo.

18 Chi ni cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de táca jniñu neé jéē ndíyo ni maá de. Súcuan ni cacastūhún apóstol.

19 Tēe un cúu jeē casásín ñayuu. Te máni cándihvī ni de tāca jéē cutíndí ni maá de, chi tu ndéé Espíritu yā jíin de.

20 Te máá ró ñánī mánī, na íje vāha ni rō jíin jnúhun ndoo ndasí jéē cácañdjé ró.

Te cacān tahu rō jín fuerza
Espíritu Santo.

²¹ Te quendōo nīhin ró jín
jnūhun jeē cundáhú ni Yaā
Dios rohó. Te condetu ró
quívī jeē cótecu rō ní cáni sáha
máa Jítoho yō Jesucristo siquī
jeē cundáhú ni yā rohó.

²² Te sava ñayuu jeē cájeni
siquí ni, nducú ró modo
scandíje ró i.

²³ Te sava ga i chi nducú
ndéyí ró jeē cácu i nuū cuéchi
i, jeē nájnūhun stáa ró i nuū
ñuhún. Te cundáhú ni rō i
jnama ró i, te coto ró máa ró,
te cuquini ni rō coto ró nde
sahma i jeē ní cujnéhén jín
jniñu néé cásáha i.

*Jnūhun cújéhnū Yaā Dios ní
cáni*

²⁴ Te Yaā Dios chi
máñuhún-ni máa yá cúu Yaā
ndichí, Yaā jnáma yóhó. Te
íyó poder yā jeē coto ya rohó
jéē ma quívī ró cuéchi, jín
jéē sáha ya jeē cuñī ró núū
ndíndēe yá, te quívī ún coo
ndoo ró núū yā, te cusī ndasí
ni rō sáha ya.

²⁵ Te na cáhán yō jeē yóhyo
luu cújéhnū ya siquī jeē ni
sáha ya jín Jítoho yō Jesu-
cristo. Te na cáhán yō jeē
cujéhnū téyí yá, te ndácu ya
jniñu jín poder jeē ndíso ya
nde jenahán ndasí jín ndé vi-
jna jín ndé ní cáni. Súcuan na
cáo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cácadíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeē cúu ri mozo yā.

² Te máá rí cástūhun ndáā rī siquī tāca jéē ní jito rī ún, te nácani ndaā rī jnūhun Yaā Dios jín jnúhun jeē ní cahān ndaā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quiṽi coo tācá jniñu yósó núu tútu yáha.

Jeē téé Juan carta nuū ndihúxá grupo ñayuu cácadíje

⁴ Máá rí cúu Juan, te téé ri jnūhun yáha cuájeē nuū rohó, ndihúxá grupo ñayuu cácadíje jeē cáyūcu Asia. Te ñúhun ni rī jeē maá Yaā Dios na sáha ga yā jeē váha róhó jíjnáhan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni

súcuan sáha ndihúxá Espiritu jeē cáhīn ya yuhu mesa nuū ndácu Yaā Dios jniñu.

⁵ Te ñúhun ni rī jeē suni súcuan sáha Jesucristo, Yaā cahán ndaā tāca jnúhun. Te xīhna gā maá yá ni natecu mēhñu ndíyi. Te cújéhu ya nuū tāca rey jeē iyó ñayṽí. Te máá yá cundáhú ni yā yohó, te ni nacate ya yohó núu cuéchi yó jín níñi yā.

⁶ Te ni sáha ya jeē ní nduu yó rey jíin sūtú cájejniñu nuū Tatá yā Yaā Dios. Te na cáhán yō jeē yóhyo luu cújéhu ya te jñi ya poder ní cáni. Amén.

⁷ Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayṽí ndahyū i jeē tu ní cácadíje i ya. Súcuan nahín coo.

⁸ Suhva cáhán maá Jítoho yō, Yaā jñi ndihi poder: Máá rí cúu nájnūhun letra A xīhna ñúhún jíin letra Z jeē sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

Jeē ní jito Juan jeē cújéhu luu Cristo

⁹ Máá rí cúu hermano rō Juan jíjnáhan ró. Te inuú-ni ndóho ri jnūndóho jíin ró siquī jeē cácadíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndaā rī jnūhun Jesucristo, jeē yúcuan ní cajñi i ruhū cuenta preso,

te ni cachune i ruhū isla jeē naní Patmos.

10 Te ñin domingo ni jito ndi-jin rī jeē ni stéén maá Espíritu Santo nuū rī. Te ni jini sōho ri ñin jeē cána jee nīhin ichi yátá rī nájnūhun jeē tívi trompeta.

11 Te ni cahān jíin rí:

Máá rí cúu nájnūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núū ñin tutu tāca jēé cóto ró, te tají ró quihīn nuū ndihúxá grupo ñayuu cá candíje jeē cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

12 Yūcuán na te ni ndicó cóto ri jeē cóto ri ndé ñin cúu jeē cahán jíin rí. Te ná ni ndicó cóto ri te ni jito ri uxā candelero oro.

13 Te mēhñú ndihúxá candelero un índichi maá Yaā ní nduu tēe. Te ñúhun ya ñin sahna cáni jeē jinú nde nuū jehé yā. Te núhni ñin cinturón oro jicā yā.

14 Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēe nájnūhun yáñuhūn.

15 Te jehé yā xíñú jíto nájnūhun cāa cuaán jēé ni ndúhvā nuū horno. Te nīhin ndasí cáhán yā, nájnūhun nīhin cuehē yūte náhnu.

16 Te ndaváha ya jnái ya uxā quími. Te yuhu ya quénda jeē cáa nájnūhun espada jeē xeén ndíndúú lado, te suu cúu jnūhun ya jeē niní sándaā yā síquī cuéchi. Te nuū yā cáa

nájnūhun niāndii jeē nándii ndaxín.

17 Te ná ni jito ri yā te ni cotúú rí nuū jéhē yā nájnūhun jeē ni jíhī rī. Te ni soó yā ndaváha ya síquī rī, te ni cahān yā:

Ma yūhu ró. Máá rí cúu Yaā iyó ndé xīhna ñúhún te coo ri ní cáni.

18 Te Yaā técu cúu ri. Chi ni jihī rī te ni natecu rī, te vijna chi técu rī ní cáni. Te máá rí jnái poder síquī cuéhyī jéhni ñayuu jíin síquī lugar nuū cáyūcu ánuá ndíyi.

19 Núu súcuán te tee ró núū tútu tāca jēé ní jito ró, jeē cúu vijna jíin jēé cóo ichi núú.

20 Te yāha cúu jnūhun sāhi síquī ndihúxá quími ni jito ró jnái ndaváha ri, jíin síquī ndihúxá candelero oro. Ndhúxá quími ún cúu nájnūhun ndihúxá jeē cácujuhnu nuū ndihúxá grupo ñayuu cá candíje. Te ndihúxá candelero cúu nájnūhun ndihúxá grupo ñayuu cá candíje.

Jnūhun cuahān nuū ndihúxá grupo ñayuu cá candíje:

Jnūhun cuahān ñuu Efeso

2

1 Tee ró jnūhun yāha na quíhín nuū jeē cujéhu nuū ñayuu cá candíje ñuu Efeso: Súcuán cáhán ruhū, Yaā jeē jnái ndihúxá quími jíin ndaváha ri, te jíca cuu ri mēhñú ndihúxá candelero oro.

2 Je jíiní rī tācá jniñu váha cásaha ró, jeē cándihvī ni

rō siquī jnúhun ri, jíin jéē cájendeyí ni rō. Te jíiní rī jeē tu cájēhe ró jnúhun quīvicoo ñayuu casáha néé méhñu ró. Te jíiní rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de.

³ Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jíin jniñu ri.

⁴ Te vēsú súcuan te íyó jecu jeē cahán rī nuū rō, chi tuá cáhīyo manī vāha ró jíin rí nájñuhun ni iyo manī rō jíin rí quīvī jehé.

⁵ Núu súcuan te nuçuhun ni rō ndese ni castóo ró jnúhun jeē ni íyo manī rō jíin rí, te nacani ni rō, te na sáha ró nájñuhun ni casáha ró ndé quīvī ún. Te núu ma nácani ni rō, te yachī jeē rī te stáa ri candelero rō nuū ín, cúu jeē ma cuíñi ga rō jíin ñayuu cácaandije.

⁶ Te vēsú súcuan te íyó ñin jeē váha casáha ró, chi tu cánujnahan cuítí ni rō cájito ró jniñu néé casáha ñayuu cándiquín jnúhun jeē steén Nicolás. Te suni máá rí tu nújnahan cuítí ni rí jíto ri.

⁷ Ñayuu iyó sóho na chúsóho i jeē cahán maá Espíritu Santo jíin táca grupo ñayuu cácaandije. Táca ñayuu jeē cúndeyí síquī jeneé, cuāha ri jnúhun caji i ndehē jeē cúun xinī yújnu jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

Jnúhun cuahān ñuu Esmirna

⁸ Te tee ró jnúhun yáha na quíhín nuū jeē cujéhnu nuū ñáyuu cácaandije ñuu Esmirna: Súcuan cáhán ruhū, Yaā jeē iyó ndé xīhna ñúhún te coo ri ní cáni, te ni jihī rī te ni natecu rī.

⁹ Je jíiní rī táca jniñu váha casáha ró, jíin jnúndóho cándoho ró, jíin jéē cándoho ndáhú ró. Te vēsú súcuan te cúca ró ndihí jeē ndíso jnúhun ri. Te jíiní rī jeē cácahān neé ñayuu siquī rō jijnáhan ró. Ñayuu un cácahān i jeē ñáyuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yñi ndaha Satanás cácuu i.

¹⁰ Te ma yūhú cuítí rō táca jeē ndoho ró. Chi jexeén je yajni sáha jeē quīvicoo sava ró vecāa jeē cóto ndee rohó jijnáhan ró, te ndoho ró jnúndóho uxī quiví. Te na cuíñi nihin ró ndé cuu rō, te cuāha ri premio jeē cótecu rō ní cáni.

¹¹ Ñayuu iyó sóho na chúsóho i jeē cahán maá Espíritu Santo jíin táca grupo ñayuu cácaandije. Táca ñayuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnúhun cuahān ñuu Pérgamo

¹² Te tee ró jnúhun yáha na quíhín nuū jeē cujéhnu nuū ñáyuu cácaandije ñuu Pérgamo: Súcuan cáhán ruhū, Yaā jeē névāha espada jeē xeén ndíndúú lado, te suu cúu jnúhun ri jeē sándaā rī siquī cuéchi.

13 Je jíni rī tācá jniñu váha cásáha ró, te jíni rī jeē cáyūcu ró mēhñu ñáyuu jeē ndácu Satanás jniñu nuū. Te vēsú súcuan te cáhīn nīhin ró jíin jnúhun ri, te tu ní cánayūhu ró jeē cácadíje ró rúhū, ni quivī ni jíhī Antipas, tēe ni squícu vāha ni nacani ndaā jnúhun ri. Chi ñuu rō cáyūcu ñáyuu cácejniñu nuū Satanás, te ni cajehni i Antipas.

14 Te vēsú súcuan te íyó jecu jeē cahán rī nuū rō jíjnáhan ró. Chi mēhñu róhó ñáyuu ñuu Pérgamo iyó sava ñayuu cándiquīn jnúhun ni steén Bal-aam. Chi tēe un ní steén de nuū Balac ndese squívi de ñayuu Israel cuēchi jeē cáji i jeē ni sócō nuū ídolo jíin jéé cosíquí ndéē jnáhan i.

15 Te suni íyó sava ñayuu mēhñu ró jeē cácadíje ga i jnúhun ni steén Nicolás, te jnúhun ún chi tu nújnahan cuiṭi ni rī.

16 Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quénda yuhu ri, te suu cúu jnúhun ri jeē sándaā rī síquī cuéchi. Te jíin yúcuan te stóho ri ñayuu jeē candíje ga jnúhun néé un.

17 Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácadíje. Tāca ñáyuu jeē cúndeyí síquī jeneé, scáji rī i maná jeē yísāhí ichi ándiví. Te suni cuāha ri ñin yuū cuijín núu i, te nuū ún condee ñin síhví jéé, te ni ñin ñayuu ma cūni síhví un, chi máá-ni i jeē nihín. Achí yá.

Jnúhun cuahān ñuu Tiatira

18 Te tee ró jnúhun yáha na quíhín nuū jeē cujéhnu nuū ñáyuu cácadíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xíñú jíto nájnūhun cāa cuaán jéé ni ndúhvā.

19 Je jíni rī tācá jniñu váha cásáha ró, chi cácadáhú ni rō jnáhan ró, te cácadíje nīhin ró rúhū, te cácejniñu ró núu rī, te cájendeyí ni rō. Te jíni rī jeē vihyá gā cásáha ró vijna vēsú nde quivī jehé.

20 Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jéé naní Jezabel, te cájēhe ró jnúhun stéén ña nuū rō. Te áchí ña jeē nácani ña jnúhun Yaā Dios. Te tuú chi jíin jnúhun stéén ña te stáhú ña ñayuu cácadíje jeē cácuu i mozo rī. Te sáha ña jeē casíquí ndéē jnáhan i, jíin jéé cáyeji i jeē ni sócō nuū ídolo.

21 Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casíquí ndéē ña.

22 Núu súcuan te na sáha ri jeē jécāva ña jíin cuéhyī. Te tāca ñáyuu casíquí ndéē jíin ña, suni cuāha ri jnúndóho xeēn nuū i, te núu ma nácani ni i stóo i jniñu néé nájnūhun sáha ña.

23 Te sáha ri jeē cúu ñayuu jeē ni scándíje ña. Te súcuan cuni tāca grupo ñayuu cácadíje jeē maá rí cúu Yaā jíni ndihí ndese cāa jeē níjnūní jíin ánuá ñayuu. Te cuāha ri yāhu ñin ñin ró núu ndese ni casáha ró.

24 Te sava ga rō jeē cáyūcú ñuu Tiatira, jeē tu ní cájetahú jñūhun stéén ñahan ún, ni tu ní cájnií rō jñūhun jeē cácahān i jeē jñūhun sāhi gá Satanás cúu, jíin máá rō cahán rī jeē ma tée ga rī inga jniñu siquī rō.

25 Chi máá-ni jeē na quéndō nīhin rō jíin jñūhun ndaā cácañdije rō, te quendō nīhin rō jíin ndé quivī ndíji ri.

26 Tāca ñáyuu jeē cūndeyí síquī jeneé, jíin jéē squícu vāha jniñu cúní rī nde vijna te nde quivī sándihí, sāha ri jeē cujéñu i ndacu i jniñu nuū tācá nación,

27 nájnūhun ni sāha Tátá rī jeē cujéñu ri ndacu ri jniñu. Te ndacu nīhin i jniñu nuū tācá nación. Te nájnūhun cúun yúú i quísi tahu, súcuan squéhichí i ñayuu tu cájendetū nuū rī.

28 Te sāha ri jeē coto i ruhū jeē luu cujéñu ri quenda ndi-jin rī, nájnūhun jito i lucero jeē cáne cūndijin.

29 Ñayuu iyó sóho na chúsóhó i jñūhun jeē cahán maá Espíritu Santo jíin táca grupo ñayuu cácañdije. Achí yá.

Jñūhun cuahān ñuu Sardis

3

1 Te tee rō jñūhun yáha na quíhín nuū jeē cujéñu nuū ñáyuu cácañdije ñuu Sardis: Súcuan cáhán ruhū, maá Yaā jeē névaha ndihúxá Espíritu Yaā Dios jíin ndihúxá quími. Je jíin rī táca jniñu cásaha rō, te cácahān ñayuu jeē cátecu rō,

te nuū rī chi nájnūhun ndíyi cácuu rō.

2 Na nátañu ni rō, te ndejéé nīhin rō jíin jniñu jeē jecu na iyó te ndúcú naa. Chi je jíin rī jeē tu squícu vāha vāha rō núu Yaā Dios.

3 Te na núcūhun ni rō tāca jñūhun jeē ní castéén nuū rō. Te cuatáhú rō jñūhun ún te nacani ni rō síquī cuéchi rō. Chi núu tú natañu ni rō, te cuajeē rī nuū rō ñn sanaa-ni nájnūhun jeē ñn sanaa-ni te quíji ñacuñhá, te ma cúní rō na hora jinū rī nuū rō.

4 Te vésú súcuan te iyó nahín jecu rō ñuu Sardis jeē tu ní cásaha rō cuéchi, jeē cúu nájnūhun jeē tu ní sájnehén rō sahma rō. Jeē yúcuan cujín yaa coo sahma rō caca rō jíin rí, chi ñayuu vāha cácuu rō.

5 Chi tāca ñáyuu jeē cūndeyí síquī jeneé, cuāha ri sahma cujín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ní cáni. Te cuajnúhún rí i nuū Tátá rī jíin núu tācá ndajéhé yā.

6 Ñayuu iyó sóho na chúsóhó i jñūhun jeē cahán maá Espíritu Santo jíin táca grupo ñayuu cácañdije. Achí yá.

Jñūhun cuahān ñuu Filadelfia

7 Te tee rō jñūhun yáha na quíhín nuū jeē cujéñu nuū ñáyuu cácañdije ñuu Filadelfia: Súcuan cáhán ruhū, Yaā ndoo Yaā ndaā, te névaha ri ndacáa rey David. Te máá rí núne jeē quívi ñayuu nuū ndacu ri jniñu, te ni ñn

ma cúu casi, te máá rí jési, te ni ñn ma cúu nune.

⁸ Je jíni rí tǎcǎ jniñu váha cásáha ró. Te ni nune ri nájnūhun ñn yéhyí quívicoo ró, te ni ñn ma cúu casi. Chi vésú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácan díje ró rúhū.

⁹ Te iyó sava ñayuu yñi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécōo i nuū rō te jecuñi yití i nuū rō, te cuni i jeē maní rí jíin ró.

¹⁰ Te vāha ni casquícu ró jnúhun ní cahān rí jeē cuándeyí ni rō. Te jeē yúcuan jnama ri rohó quíví jeē quíji ñn jnúndóho xeēn siquí ñayuu ní cáhnu ñayiví, jéē cóto ndee ún i jíjnáhan i.

¹¹ Te yachí ndiji ri. Núu súcuan te quendōo ñihin ró jíin jnúhun cácan díje ró, návāha ni ñn ma quénde premio rō.

¹² Tāca ñayuu jeē cúndeyí síquí jeneé, sáha ri jeē cuu i nájnūhun sihñn yuū luu ini templo Yaā Dios maá rí. Te ma cújiyo i nuū ndeé yá un. Te tee ri sihví Yaā Dios maá rí jneé i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí.

¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácan díje. Achí yá.

Jnúhun cuahān ñuu Laodicea

¹⁴ Te tee ró jnúhun yáha na quíhín nuū jeē kujéhu nuū ñayuu cácan díje ñuu Laodicea: Súcuan cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā. Te máá rí ni sáha ndihí jeē ní cáhān Yaā Dios jeē na jécōo.

¹⁵ Je jíni rí tǎcǎ jniñu cásáha ró. Te cácuu ró nájnūhun jeē tú mǐjin ni tú jihní, cúu jeē jecu-ni cácan díje ró jnúhun ri, te ni tu cájito uhū rō ni tu cándihvī ni rō siquí. Te nacá jeē váha núu jeē mǐjin ró chí jéē jihní ró nuú.

¹⁶ Te tuú chi máá yívixī-ni ró, chi ni tu cájito uhū rō ni tu cándihvī ni rō siquí. Te jeē yúcuan squéhichí rí rohó nájnūhun ñn jeē tésñi rí jeē séyūhu rí jeē tu nújnahan ni rí.

¹⁷ Te cácahān rō jeē cucá ró, te quéndōo vāha ró, te tu cúmaní ni ñn nuū rō. Te tu cásáha ró cuenta jeē cuécá lí cándoho ró, te ndáhú ndasí ró, te cácuáá ró, te máá ññ lí rō. Te tāca jéé yáha cúní cahān jeē tu cácan díje vāha ró.

¹⁸ Núu súcuan te cáhán rí jíin ró jeē nuū rí cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndije ró ndihí jeē ndíso jnúhun ri. Te nuū rí cuaan ró sahma cuijín cuhun ró, návāha tú cu-canu rō jeē máá ññ lí rō, cúu jeē quéndōo ndaā rō sáha ri. Te cuaan ró tájnā nuū rí, quíví tinūu ró, návāha ndundijin tinūu ró, cúu jeē jecūhun ni rō jnúhun ri.

19 Tāca ñáyuu jeē cundáhú ni rī, chi cáhán rī nuū i te stóho ri i, návāha na chúhun ni i. Núu súcuan te na cóndihvī ni rō jijnáhan ró, te nacani ni rō jeē stóo ró cuéchi ró.

20 Cuni sōho, chi iin ri yehyí ánuá rō te cáhán rī. Te núu ndé-ni róhó cuni sōho te nune ró yéhyí ánuá rō, te quivi ri caji rī staá jín ró, te suni caji maá ró jín rí. Te suu cúu jeē cóndee rī anuá rō.

21 Tāca ñáyuu jeē cúndeyí síquī jeneé, cuāha ri jnūhun conene i jín rí nuū mesa nuū ndácu ri jniñu. Chi máá rí suni ni snāa rī poder jeneé, te ni cucōo ri jín Tátá rī nuū mesa nuū ndácu ya jniñu.

22 Ñayuu iyó sóho na chúsóhó i jnūhun jeē cahán maá Espíritu Santo jín táca grupo ñayuu cácandije. Achí yá.

Tāca jēē cáyūcú andiví cáchiñúhún nuū yá

4

1 Yūcuán na te ni ndacoto ri, te ni jito ri jeē nune iin yéhyí andiví, te máá Yaā jeē ni cáhán jín rí jeē xihna ñúhún, ni cahán tucu jín rí nájnūhun jeē tívi trompeta. Te ni cahán:

Caa quiji ró yáha, te na stéén rī nuū rō táca jniñu jeē cóo ichi núu gā, achí yá.

2 Te máá Espíritu Santo ni scóto-ni ya ruhū. Te ni jito ri jeē andiví iin iin mesa nuū ndácu jniñu, te néne máá yá nuū mesa un.

3 Te máá yá jeē néne yūcuan cáa ya nájnūhun ndíndēē iin yuū quiyi ndí chí iin yuū

cuehé ndí. Te iin ticō vēhnde ní jicó ndúu yuhu mesa yā, te ndíndēē nájnūhun iin yuū cuí ndí.

4 Te xiin mesa yā ni jito ri jeē ní jicó ndúu ocō cuñ gā mesa nuū ndácu jniñu. Te nuū mesa un néne ocō cuñ tēe jéhnū cándiso jniñu. Te cáñuhun de sahma cuijín yaa, te xinī de cáñuhun corona oro.

5 Te nde nuū mesa nuū ndácu ya jniñu ndíndēē taja te nñin te cáhán taja. Te ichi núu mesa yā iin ndihúxá Espíritu Yaā Dios, jeē cáa nájnūhun uxā yiti náhnū jeē cayú ñuhūn.

6 Te ichi núu mesa yā ún suni íyó nájnūhun iin mar jeē jito quiyi nájnūhun vidrio.

Te xiin mesa yā un ní jicó ndúu cuñ jeē técu. Te íyó cuéhē tinūu ní cáhnū ichi núu jín ichi yátá un.

7 Te iin jeē técu un cáa nájnūhun ndicaha. Te inga cáa nájnūhun stiquī. Te jeē uní chi néne nuū tēe. Te jeē cuñ chi cáa nájnūhun yaha chócó jé jicó núu tachí.

8 Te ndicúun jeē técu un íyó íñū ndijēn jeē iin iin. Te máni máá tinūu cúu ní cáhnū nde jín ní chíji ndijēn. Te ndúu ñuú tu jécuiñi cuiti jeē cahán:

Yaā iī Yaā ndoo ndasí
cúu máá Jítoho yō Yaā Dios,
Yaā jníi ndihí poder,

Yaā iyó vijna, te ni iyo yá ní cáni, te coo ya ní cáni.

Achí.

9 Chi máni jeē cácahán ndicúun un jéē cujéhnū ndasí máá Yaā jeē néne nuū mesa, Yaā jeē técu ní cáni cuiti. Te

yíñúhún cácahān un jíin yá, te nácuatáhú núu yā.

¹⁰ Te tāca jínu jeē casáha súcuan, te ndihóco cuūn tēe jéhnú cándiso jníñu, cájecuññi yití de nuū Yaā jeē técu ní cáni cuiti, cáchiñúhún de ya. Te cástāa de corona de, cájequin de ichi núu jehé mesa yā. Te cácahān de:

¹¹ Jitoho ná te Yaā Dios na cúu ní.

Te vāha ndasí Yaā cúu ní jēe cácahān i jeē luu cújéhnú ní,

te cáhīyo yíñúhún i nuū ní, te jnái ní ndihí poder.

Chi máá ní ni sáha ndihí jeē iyó,

te siquī jeē súcuan ni cuu ni maá ní te ni jecōo ndihí.

Achí de jíjnáhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jníñu, ndaváha ya jnái ya ñn tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello.

² Te ni jito ri ñn ndajéhé yā jeē ndíso poder, te ni cahān jee:

¿Ndé ñn cúu tēe vāha ndasí jeē cóndiso jníñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jníñu nune tutu ún, ni jeē cóto nuū.

⁴ Te ni ndahyū ndasí rí, chí tu ní íyo ni ñn jeē cóndiso jníñu

nune te cahu tutu ún, ni jeē cóto nuū.

⁵ Yūcuán na te ni cahān ñn tēe jéhnú un jíin rí:

Ma ndahyú rō, chí íyó ñn Yaā ndíso jníñu jeē cahnde yā ndihúxá sello ndihyú tutu, te nune ya. Te máá yá chí íyó cuéhē poder yā, nájñuhun jeē íyó cuéhē fuerza ñn ndicaha. Te ni cacu ya chíji yucūn Judá, jeē cúu yucūn rey David. Te ni snāā yā poder tāca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un ín ya nuū ín mesa Yaā Dios, mēhñú ndicúun jeē técu, jíin tēe jéhnú cándiso jníñu. Te íyó úxā ndicuí jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ní cáhnu ñayiví.

⁷ Te Londe un ní jequihin ya tutu jeē jnái ndaváha Yaā jeē néne nuū mesa.

⁸ Te ná ni quihin ya tutu ún, te ndicúun jeē técu jíin ndihóco cuūn tēe jéhnú cándiso jníñu, ni cajecuiññi yití núu yā. Te ná ñn ná ñn tēe jéhnú un cándaha yaa jeē naní arpa, jíin cóhō cūu oro jeē ñuhun chitú súje cutú. Te sūje cutú un cúu máá táca jnúhun jeē cájicān tahu ñayuu yíhi ndaha Yaā Dios.

⁹ Te ni cajita de ñn yaa jeé, te suhva cáhan:

Vāha ndasí Yaā cúu ní jēe quihin ní tutu te cahnde ni sello jeē ndihyú.

Chi ni cajehni i níhín, te jíin níñi ní ní nacuaan ní ñayuu

mēhñu táca raza, tǎcǎ yuhu,
tǎcǎ ñuu, tǎcǎ nación,
návāha cuu i ñayuu Yaā
Dios.

¹⁰ Te ni sáha ní jeē cuu i rey jíin
sútū nuū Yaā Dios,
te ndacu i jniñu ini ñayīvī.
Achí de cájita de.

¹¹ Te ni jito ga rī, te ni
jini sōho ri jeē cácahān cuehē
ndajéhé yā jeē ní cajicó ndúū
xiin mesa yā, jíin xiin ndicúún
jeē técu, jíin xiin tēe jéhnu
cándiso jniñu. Te iyó cuéhē
ndasí millón ndajéhé un.

¹² Te suhva ni cacahān jee
ya:

Vāha ndasí Yaā cúu Londe jeē
ní cajehni i.

Te jeē yúcuan jñí ya poder, te
yōhoyo cúcǎ yá,

te yōhoyo ndíchí yá, te ndíso ya
cuehē fuerza,

te cáhīyo yíñúhún ndihi nuū
yā, te luu cújéhnu ya,

te cácahān i jeē váha ndasí Yaā
cúu ya.

Achí.

¹³ Te suni ni jini sōho ri jeē
cácahān ndihi jeē ni sáha Yaā
Dios jeē iyó ini andīvī jíin ini
ñayīvī jíin chíji ñayīvī jíin ini
mar. Te ndīvii un ní cacahān:
Cúsī ni yō cahán yō jeē yōhoyo
vāha Yaā cúu máá Yaā
néne mesa nuū ndácu
ya jniñu,

jíin Yaā cúu Londe Yaā Dios.

Te na cóo yíñúhún yó núu yā,
chí cújéhnu luu ya,

te jñí ya poder ní cáni cuiti.

Achí.

¹⁴ Te ni cacahān ndicúún jeē
técu:

Súcuan na cóo, áchí.

Te ndihócó cuūn tēe jéhnu
cándiso jniñu ni cajecuiñī yití

de, te ni cachiñúhún de nuū
Yaā jeē técu ní cáni cuiti.

Siquī ndihúxá sello

6

¹ Yūcuán na te ni jito ri jeē
Yaā cúu Londe Yaā Dios, ni
jehnde yā ñin jeē uxá sello un.
Te ni jini sōho ri jeē cahán
ñin jnáhan ndicúún jeē técu ún,
nájñuhun cahán taja:

Nehen te cuni rō.

² Te ni ndacoto ri, te ni
jito ri ñin caballo cuijín. Te
jeē yosó síquī tī un ndáhá ñin
arco jeē stáva nduva. Te ni
jecūhun ñin corona xinī. Te
ni quenda ni jejnáhan, te ni
cundeyí síquī ndihi.

³ Yūcuán na te Londe un ní
jehnde yā sello uū. Te ni jini
sōho ri jeē cahán inga jnáhan
ndicúún jeē técu:

Nehen te cuni rō.

⁴ Te ni quenda ñin caballo
cuehé, te jeē yosó síquī tī
ndíso jniñu jeē snāá jñuhun
cáyūcu mánī ñayuu ñayīvī, te
quejéé i cahni jnáhan i. Te ni
nihīn ún ñin espada cáhnu.

⁵ Yūcuán na te Londe un ní
jehnde yā sello unī. Te ni jini
sōho ri jeē cahán inga jnáhan
ndicúún jeē técu:

Nehen te cuni rō.

Te ni ndacoto ri, te ni jito ri
ñin caballo jnuú. Te jeē yosó
síquī tī ndáhá ñin balanza jeē
chícuāha, chí coo jnamā xeēn.

⁶ Te mēhñú ndicúún jeē técu
un ní jini sōho ri ñin jeē cahán:

Máá ñin kilo-ni trigo nihīn
i jíin yáhu i jeē sájñiñu i ñin
quivī. Te núu cebada, te
unī-ni kilo nihīn i jíin yáhu i
jeē sájñiñu i ñin quivī. Te aceite

jín vino chi ma sáha ró jéē cúmanī. Achí.

⁷ Yūcuán na te Londe un ní jehnde yā sello cuūn. Te ni jini sōho ri jeē cahán tucu inga jnáhan ndicúún jeē técu:

Nehen te cuni rō.

⁸ Te ni ndacoto ri, te ni jito ri ñn caballo cuaán yaa, te jeē yosó síquī tī cúu máa cuéhyī jéñi ñayuu. Te ichi yátá un ndíquín máa jnúhun jeē quívi ñayuu lugar nuū cáyūcu ánuá ndīyi. Te ndindúú un cándiso jniñu jeē ndóna síquī ñn jeē ndicúún parte ñayívi, te cuu sáha jeē cúu ñayuu jín guerra, jín jnámā, jín cuéhyī xeén, jín táca quitī xeén jeē iyó ñayívi.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i.

¹⁰ Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ni jéjnūhun ní. ¿Te nasaa ga tiempo coo te sándaā ni jéhē ná, te nacuāha ní jéē ndútahū ñayuu ñayívi jéē ní cajehni sāná? achí.

¹¹ Yūcuán na te ni jēhe ya sahma cuijín cuhun i jínáhan i, te ni cahān yā jín i jeē na ndétātú i jecu gā tiempo. Chi iyó gá hermano i jeē cájejniñu nuū yā, jeē suni jini ñúhún cuu i návāha jīnu número i, achí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te

ni cujnuú níāndii návñūhun ñn sahma jnuú. Te ní yóo ni nduu návñūhun niñi.

¹³ Te quími andiví ní ñngoyo nuū ñúhun návñūhun ñngoyo ndehē yíhi yujnu higo sáha tachí níhin.

¹⁴ Te andiví ní cujiyo cuahān návñūhun jeē nátuu ñn tutu cáhnu. Te táca yucu jín táca isla ni cujiyo cuangoo inga lado.

¹⁵ Te táca rey ñayívi, jín jéē cácujeñnu, jín jéē cucá, jín táca capitán, jín jéē cándiso poder, jín mozo jeē ní cajeen ñayuu, jín téé casájniñu cuenta maá, ní cachisāhi máa ini yaū cava jín méhñu cava chíji yucu.

¹⁶ Te ni cacahān i jín yucu jín cava:

Ndicó cáva síquī rī, na quísāhi rí návāha tú coto máa Yaā néne mesa ndácu jniñu, jín Yaā cúu Londe jeē cuáha ya castigo xeén ruhū.

¹⁷ Chi ni quee maá quívi cáhnu jeē cuáha ya castigo, ¿te ndé ñn canda condichi nuū yā? achí i jínáhan i.

Ñayuu táca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhñn ndicúún lado ñayívi. Te cájesi yā nuū ndicúún tachí, návāha ma quéé nuū ñúhun ni nuū mar ni nuū ní ñn yujnu.

² Te suni ni jito ri inga ndajéhé yā, vēji ichi núu cáne niāndii. Te ndáhá yá sello Yaā Dios, Yaā técu. Te ni cahān jee

ya jíin ndicúún ndajéhé un jéé ndíso jniñu jeé sáha daño nuū ñúhun íchi jíin núū mar:

³ Ma sáha ró daño nuū ñúhun ni nuū tǎcá yujnu ni nuū mar, chi nde na téé yó sello jneē tǎca ñáyuu cájejniñu nuū Yaā Dios yō.

⁴ Te ni jini sōho ri jeé achí jéé iyó ciento uū xico cuūn mil ñáyuu jeé ni jécondee sello jneē. Te ñáyuu un cácuu tǎca yúcūn ñáyuu Israel.

⁵ Te iyó úxī uū mil ñáyuu cácuu yucūn Judá jeé ni jécondee sello, jíin úxī uū mil yucūn Rubén, jíin úxī uū mil yucūn Gad,

⁶ jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés,

⁷ jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar,

⁸ jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeé ni jécondee sello.

Ñáyuu cuehē jeé cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñáyuu tǎcá nación jíin tǎca raza jíin tǎca yuhu jíin tǎca ñuu. Te cáhīn i nuū mesa nuū ndácu Yaā Dios jniñu jíin núū maá Yaā cúu Londe. Te siquī jeé cuehé ndasí i, te ni ñin ma cúu cahu nasaa i cúu. Te cáñuhun i sahma cuijín, te cándāhá i ñuū.

¹⁰ Te ni cacana jee i:

Yaā Dios maá yó cúu jeé ní jnama yóho,

Yaā jeé néne nuū mesa jeé ndácu jniñu,

jíin Yaā cúu Londe Yaā Dios.

Achí i jíináhan i.

¹¹ Te ndihi ndajéhé ni cajicó ndúū yā cáhīn ya xiin mesa Yaā Dios, jíin xiin tēe jéhnu cándiso jniñu, jíin xiin ndicúún jeé técu. Te ni cajecuiñī yití yá ni cachiñúhún yá Yaā Dios ichi núū mesa yā.

¹² Te ni cacahān yā:

Amén. Cúsī ni yō cahán yō jeé yóhyo vāha Yaā cúu Yaā Dios maá yó.

Te luu cújéhnu ya te ndíchí yá.

Te na nácuatáhú yó nuū yā, te na cóo yíñúhún yó núū yā.

Chi jnií ya poder, te ndíso ya cuehē fuerza jeé níí cáni cuiñi. Amén.

Achí tǎca ndajéhé yā.

¹³ Yūcuán ña te ni cahān ñin tēe jéhnu un jíin rí:

¿Ndé ñáyuu cúu yāha jéé cáñuhun sahma cuijín, te ndé chi véjicoo i?

¹⁴ Te ni cahān rī jíin de:

Máá ní cúu jeé jiní, Tátā.

Te ni cahān de jíin rí:

Yāha cácuu ñáyuu jeé ní cayāha i jeé ní cajito i jnūndóho xeēn. Te ni canacate i sahma i jíin níñī maá Londe, te ni nduyaa vāha, cúu jeé ní ndundoo ánuá i ní sáha ya.

¹⁵ Jeé yúcuan cúu jeé cáhīn i nuū mesa nuū ndácu Yaā Dios jniñu, te cájejniñu i ñin templo yā nduú ñuú. Te Yaā jeé néne nuū mesa, coto ya i jeé quéndōo vāha i nuū yā.

16 Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní.

17 Chi máa Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíjnáhan i, te ma ndahyú gā i. Achí téé jéhu ún.

Siquī sello uxā jíin cóhō cūu oro

8

1 Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájnūhun sava hora.

2 Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un.

3 Yūcuán na te ni quee inga ndajéhé, ndáhá yá iin cohō cūu oro, te ni jecuiñí yā nuū altar. Te ni jēhe cuehē sūje cutú núu yā, návāha socō yā jíin jnúhun cájicān tahu ndihi ñayuu cácadíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu.

4 Te nuū cohō cūu jnñi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácadíje Yaā Dios.

5 Yūcuán na te ni quihin ndajéhé un cóhō cūu un. Te ni scutú yá tīcua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān

taja, te ni nīhin, te ni ndindēé taja, te ni jnāa.

Jnūhun siquī trompeta

6 Yūcuán na te ndihúxá ndajéhé jeē cándahá ndihúxá trompeta, ni casátūhva ya jeē tiví yā.

7 Te ndajéhé iin ni tiví yā trompeta. Te ni cuun ñiñí ini ñayiví jíin ñuhūn jeē ni sácā núu jíin níñí. Te ni cayú iin jeē uní parte ñayiví, jíin iin jeē uní parte yujnu, jíin iin jeē uní parte ite cuí.

8 Te ndajéhé uū ni tiví yā trompeta. Te iin nájnūhun iin yucu cáhnu jeē cayú ñuhūn ni ñingava cuahān nuū mar. Te iin jeē uní parte mar ni nduu niñí.

9 Te ni jihí iin jeē uní parte quiti ñuhūn nuū mar. Te ni naa cuehē barco, chi iin iin jeē tāca úní ni naa.

10 Te ndajéhé uní ni tiví yā trompeta. Te ni ñingava iin quimi cáhnu ichi ándiví, te cayú nájnūhun cayú iin yiti cáhnu. Te ni ñingava siquī iin iin jeē tāca úní yūte jíin núu cáne ndute.

11 Te quimi un nání quimi uvuā. Te iin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

12 Te ndajéhé cuūn ni tiví yā trompeta. Te iin jeē uní parte niāndii jíin yóo jíin quimi ni tiví. Te ni ndunee iin jeē uní parte i, te tuá ni cundijin iin jeē uní parte nduú jíin ñuú.

13 Te ni ndacoto ri, te ni jini sōho ri jeē cána jee iin ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayīví, chi je yajni cuecu unī gā trompeta jeē tivī unī gā ndajéhé, achí yá.

9

¹ Te ndajéhé uhūn ni tivī yā trompeta. Te ni jito ri jeē ichi ándiví ní ñingava ñn quīmi nde ini ñayīví. Te nuū quīmi un ní jēhe ndacáa jeē nūne tūhnchi cúnú ndasí.

² Yūcuán na te ni nune un tūhnchi, te ni cane ñuhmā ni caa nájnūhun ñuhmā ñn ijnū cáhnu. Te ñuhmā un ní sáha jeē ní cunee niāndii jín nī nūū tachí.

³ Te nuū ñuhmā un ní canecoo tíca ndicuéhyí, ni jītē nūu ti ní cáhnu ñayīví. Te ni jēhe ya jnūhun jeē sáha ti nájnūhun cásáha tisuhma xeēn jeē iyó ini ñayīví.

⁴ Te ni ndacu ya jniñu nuū tī jeē ma sáha ti daño ite jín yūcū cuí jín yujnu, chi máni ñayuu jeē tu ndéé sello Yāā Díos jneē i cúu jeē tuu ti.

⁵ Te tu ní jēhe ya jnūhun jeē cáhni tī ñayuu, chi máni jeē stóho ti i uhūn yoō. Te sáha ti jeē jetú i nájnūhun jeē jetú ñayuu jeē túu tisuhma i.

⁶ Te quivī ún nducú ndasí ñáyuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa ti nájnūhun caballo jeē cáhīyo tūhva quingoo nuū cuájnañan. Te xinī tī ñūhun nájnūhun corona oro. Te née ti nuū téé.

⁸ Te iyó ixí tī jeē cáa nájnūhun ixí xíní ñahan. Te jnūhun tī cáa nájnūhun jnūhun ndícaha.

⁹ Te ní tī ndihyú nájnūhun sahma cáa. Te ñhín ndijēn tī nájnūhun ñhín jeē cuángoo cuehē caballo nuū guerra cáñuhun ti carreta.

¹⁰ Te suhmā tī ndíso iñu nájnūhun tisuhma. Te jín súhmā tī cuu stóho ti ñayuu uhūn yoō.

¹¹ Te iyó ñn jeē cujéhnu nuū tī, te suu cúu ndajéhé jexeén jeē ndíto tūhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jēē snāā.

¹² Je ni yāha ñn jnūndóho, te iyó úū gā jnūndóho jeē quíji.

¹³ Te ndajéhé iñu ni tivī yā trompeta. Te ni jini sōho ri ñn jnūhun jeē ni cáhān nde mēhñú ndicúún yiquī altar oro jeē ñn nuū Yāā Díos.

¹⁴ Te ni cahān un jín ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandajī ndicúún ndajéhé un, návāha cahni ñn jeē uní parte ñayuu ñayīví. Chi je cáhīyo tūhva ndajéhé un jeē siquí maá hora jín quivī jín yoō jín cuíyā jeē cóo súcuan.

¹⁶ Te ni jini sōho ri jeē achí jēē iyó úū ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī tācá caballo. Te tēe cáyoso siquī tī cáñuhun de camisa cáa jeē cuehé, jeē ndeé, jín jēē cuaán. Te xinī caballo un cándāa nájnūhun xinī ndícaha. Te yuhu ti

quénda ñuhūn jín ñúhmā jín azufre.

¹⁸ Te jín únī jeē quénda yuhu caballo un, te ni jihī ñn jeē uní parte ñayuu, suu jín ñúhūn jín ñúhmā jín azufre.

¹⁹ Chi yuhu ti jín súhmā tī iyó fuerza jeē cáhni tī ñayuu. Chi suhmā tī cándāa nájñuhun coō, te iyó xínī, te jín yúcuan stóho ti ñayuu.

²⁰ Te sava ga ñayuu jeē tu ní jihí jín táca jnúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i táca táchī jín ídolo jeē ní cuvāha jín oro jín plata jín cáa cuaán jín yúu jín yujnu. Te tǎcá un chi tu cúu coto, ni tu cúu cuni sōho, ni tu cúu caca.

²¹ Te ni tu ní canacani ni i stóo i jeē jéhni i ndiyi, jín jéē satásí i, jín jéē jíca jnéni i, jín jéē sacuíhná i.

Ndajéhé jeē ndahá libro lulí

10

¹ Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcún yá vicō, te xínī yā ñúhun ticō vėhndé. Te nuū yā ndíndēe nájñuhun niándii, te sñin ya cáa nájñuhun uū sñin jeē cáa ná cáa ñuhūn.

² Te ndáhá yá ñn libro lulí jéē núne. Te ni jeni ya jehē váha ya nuū mar, te jehē jecó yá nuū ñúhun íchi.

³ Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja.

⁴ Te ná ni cacahān uxā taja, te je iyó túhva ri jeē tée ri

jñuhun un núú. Te ni jini sōho ri ñn jñuhun ichi ándiví jeē ni cáhān jín rí:

Chuvāha ró táca jñuhun jeē ní cacahān uxā taja ún, te ma steén rō, ni ma tée ró, áchí.

⁵ Yūcuán na te ndajéhé jeē ní jito ri jeē ín nuū mar jín núú ñúhun, ni ndonehen ya ndaha váha ya ichi ándiví.

⁶ Te ni ndacunehen ya sñhví máa Yaā jeē técu ní cáni, Yaā ni sáha andiví jín ñáyiví jín mar jín táca ndihí jeē iyó ini. Te jín sñhví yá un ní cahān teyí ndajéhé:

Ma cucuéé gá jeē jínu ñayiví.

⁷ Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jñuhun sáhi yá, nájñuhun ni castūhun yá nuū táca mozo yā, tée ni canacani jñuhun ya nde jenahán, áchí ndajéhé.

⁸ Yūcuán na te máa jéē ní jini sōho ri jeē ni cáhān ichi ándiví, ni cahān tucu jín rí:

Cuáhán te quihin ró libro lulí jéē núne jeē ndahá ndajéhé jeē ín nuū mar jín núú ñúhun, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixí sáha ini yuhu ró nájñuhun ndūxi, te chíji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ini yuhu ri nájñuhun ndūxi.

Te ná ni cuu ni yeji rī, te ni jitē iyá ni rī.

¹¹ Te ni cacahān jíin rí:

Cánuú jēē nacani tucu ró jnúhun Yaā Dios, ndese coo siquī ñayuu cuehē ñuu jíin cuehē nación jeē sīn sīn yuhu, jíin siquī cuehē rey cándacu jniñu, áchí jíin rí.

Siquī uū testigo yā

11

¹ Yūcuán na te ni cajēhe in yujnu nuū rī, jeē cúu in cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán.

² Te ma chícuāha ró patio yatā templo. Chi je ni jēhe ya nuū ñáyuu tācá ñuu jicá. Te coyūcú i ini ñuu i yāhá, te uū xico uū yoō cueñū i siquī ñuu.

³ Te tají rí uū testigo rī jeē nácani jnúhun ri mil uū ciento unī xico quivī. Te cuhun de sahna ndáyí jēē cácuuhyá ni de siquī cuéchi ñayuu, achí yá.

⁴ Te ndindúú testigo un cúu nájnūhun ndindúú yujnu olivo jíin ndindúú candelero jeē ín nuū Yaā Dios, Yaā chíi ñayiví.

⁵ Te na-ni ñayuu núu nducú sáha ndevāha jíin ndindúú testigo un, te quenda ñuhūn yuhu ndindúú de, te cayū ndihi ñayuu cájito uhū i de. Te súcuan cuu tāca ñáyuu jeē nducú sáha ndevāha jíin de.

⁶ Te iyó poder ndindúú testigo un jēē cásí de jeē ma

cúun saū ní tiempo jeē nácani de jnúhun ya. Te suni iyó poder de sáha de jeē nduu niñī tācá ndute. Te cuu stívi de ñayiví jíin ndinuū jnúndóho, núu nasaa jínu cácuu de.

⁷ Te ná ni jínu ni canacani de jnúhun ya, yūcuán na te quenda quití xéén jeē néne tūhnchi ún. Te cuajnáhan jíin ndindúú de, te cundeyí jíin de, te cahni de.

⁸ Te ndívi ún cava nuū yáhu ñuu cáhnu nuū ní cajehni i máá Jítoho yō jicá cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuéchi iyó ñuu ún.

⁹ Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndindúú ndívi un únī quiví yosáva, te ma cuáha i jnúhun jeē quíndūji.

¹⁰ Te ñayuu ní cáhnu ñayiví cusī ndasí ni i jeē ní cajihī de, te sáha i vico, te cuāha i regalo nuū jnáhan i. Chi ndindúú téé ni canacani jnúhun ya ún, ní casáha de jeē ní candoho ndasí ñáyuu ñayiví.

¹¹ Te jeē yáha unī quiví yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí ñáyuu coto i jeē ní canatecu de.

¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quíngoo de andiví, cuni ñayuu cájito uhū i de.

¹³ Te máá hora un jnáa

ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē kujéhu Yaā Dios jeē ndeē andiví.

¹⁴ Súcuan yāha jnūndóho uū, te yachī coo jnūndóho uní.

Siquí trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihí ndaha máa Jítóho yō Yaā Dios

jíin Cristo jeē ní tají yá.

Te ndacu ya jniñu ní cáni cuií.

Achí.

¹⁶ Yūcuán na te ndihóco cuūn tēe jéhu cándiso jniñu jeē cánene de mesa de ichi núu Yaā Dios, ni cajecuiñí yití de, ni cachiñúhún de ya.

¹⁷ Te ni cacahān de: Na cútahū na núu ní, Tátā Yaā Dios,

chi máa ní jnāi ndihí poder, te cúu ní Yaā iyó vijna, te ni iyo ní ní cáni, te coo ní ní cáni.

Te ni najñi ní ndivii jeē iyó, te jíin poder ni ní quejéé ní ndácu ní jniñu nuū.

¹⁸ Ñayuu tācá nación ni caquiti ni i siquí ní.

Te vijna chi ni quee quiví jeē cuáha ní castigo i, jíin jéē sándaā ní jniñu tāca ndíyi.

Te cuáha ni táhū nuū tāca mozo ni jéé ní canacani jnūhun ní,

jíin núu tāca ñayuu cájejniñu nuū ní, jíin ñayuu cáchiñúhún núu ní, cúu ñayuu cácujeñu jíin jéé tuú.

Te vijna te snáhnú ndetū ni ñayuu castiví ñayiví.

Achí de jíinahan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnū jeē ñúhun contrato yā. Te ni ndindēé taja, te ñhin, te cáhán taja, te ni jnāa, te ni cuun xeēn ñiñí.

Jnūhun ñahan jíin cóo cáhnu

12

¹ Yūcuán na te ini andiví ní cane ñn jeē nahán náa ni yō jító yó: ñn ñahan jeē ñúhun ña niāndii nájnūhun sahma, te íin jehē ña siquí yoó, te ñúhun ñn corona xiní ña jeē ndeé uxí uū quimi.

² Te ñúhun sēhe ña. Te ni ndahyū cohó ña jeē ndóho ña jénde chíji ña jeē scácu ña i.

³ Yūcuán na te ini andiví ní cane tucu inga jeē náa ni yō jító yó: ñn coo cuehé cáhnu ndasí. Te iyó úxā xiní tī jíin úxí ndiquí ti. Te ndihúxá xiní tī ñúhun corona.

⁴ Te jíin súhmā tī ni stáa tī ñn jeē uní parte quimi jeē iyó andiví, te ni síngoo tī ini ñayiví. Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i.

⁵ Te ni scácu ña ñn sēhe yí, te sūchi un ní jeconāa jeē ndácu ñhin i jniñu nuū ndivii nación. Yūcuán na te ni ndoñúhún sēhe yí ña ún, ni ndaa i cuahān i nde nuū íin

mesa Yaā Dios nuū ndácu ya jniñu.

6 Te ñahan un ní jinu ña cuahān ña nde nuū ñuhun téhé nuū iyó ñn lugar jeē ní sātūhva Yaā Dios. Te yūcuán condee ña nihīn ña jeē cáji ña mil uū ciento unī xico quivī.

7 Yūcuán na te ni cajejnáhan ini andiví. Chi ndajéhé jéhnuga jeē naní Miguel jíin táca ndajéhé jeē cácuu mozo nuū yā, ni cajejnáhan jíin cóo cáhnu. Te coō un jíin táca ndajéhé maá, ni cajejnáhan jíin yá.

8 Te tu ní cácuñdeyí tí, te tuá ní cúu coyūcu tí andiví.

9 Súcuñ ni cuu jeē ní quenehen ya coō cáhnu un jéē iyó ndé jenahán ndasí. Te nání tí jexeén jíin Satanás, te maá tí cúu jeē stahú ndihi ñayuu ñayiví. Te ni scáne ya tí nde ini ñayiví jíin táca ndajéhé tí.

10 Yūcuán na te ni jini sōho ri ñn jnūhun jeē cahán jee ichi andiví:

Je ni quee quiví jeē jínu jnama ya yohó, jíin jéē steén ndijin yā jeē jní ya poder, jíin jéē ndácu ya jniñu, jíin jéē ndíso jniñu maá Cristo jeē ní tají yá. Chi je ni quenehen ya maá jéē cahán cuēchi siquī tācá hermano yō. Chi nduú ñuú ni cahán cuēchi siquī i nuū Yaā Dios maá yó.

11 Te ni cacundeyí i siquī Satanás un, ní sáha jnūhun jeē ní jíhí Yaā cúu Londe, jíin jéē ní cacahān ndaā i jnūhun Yaā Dios, jíin jéē tu ní cundáhú ní i maá i, chi ni jēhe i jnūhun

candíje i vēsú núu cuu i jeē siquí yā.

12 Núu súcuñ te na cúsiñ ndasí ni táca róhó jéē cáyūcú andiví. Te nacā xeēn ndoho táca róhó jéē cáyūcú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quití xeēn ni, chi jíin jeē tuá coo cuehē gā tiempo jeē stahú ñayuu. Achí.

13 Te ni jini coō cáhnu ún jéē ni scáne ya maá cuahān ini ñayiví, te ni jinu tí jíin ñahan ní scácu sēhe yí, jeē xeēn sáha tí jíin ña núu.

14 Te ni cajēhe uū ndijēn yaha chócó cáhnu nuū ñahan ún, návāha ndava ña quihīn ña lugar ña nuū ñuhun téhé, te cācu ña nuū coō ún. Te yūcuán condee ña unī cuiyā yosáva, te nihīn ña jeē cáji ña.

15 Te yuhu cóo un ní cane ndute nájnūhun ñn yūte cáhnu, cuahān yatā ña návāha jneni ña.

16 Te maá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún.

17 Yūcuán na te xeēn ni quití ni coō cáhnu ni jito tí ña. Te cuahān tí cuajnáhan tí jíin táca gá sēhe ña, suu ñayuu casquícu jniñu ndácu Yaā Dios te cácuñdeyí vāha i jnūhun Jesu-cristo.

Jnūhun siquī uū quití xéén

13

1 Te ni indichi rī yumár. Te ni jito ri jeē ní cane ñn quití xéén ini mar. Te iyó úxā xini tí jíin úxī ndiquí tí. Te ndihúxí ndiquí tí ñuhun corona. Te

ndihúxá xinī tī ndeé ñn síhví néé jéé quití ní Yaā Dios sáha.

² Te quití xéén jeē ní jito ri ún, cáa tī nájñūhun cuiñī, te ndaha tī cáa nájñūhun ndaha oso, te yuhu tī cáa nájñūhun yuhu ndícaha. Te nuū quití un ní jēhe coō cáhnu poder maá jíñ mesa nuū ndácu máá jñiñu. Te ní sáha jeē cujéhnu ndasí quití ún.

³ Te ní jito ri jeē ní tújī ñn xinī tī, jeē jé yajni cuu tī nuū. Te ní nduvāha tī jeē ní tújī tī. Te nahán ní naa ní ñayuu ní cáhnu ñayīví ní jito i, te ní cajetáhú i nuū tī.

⁴ Te ní cachiñúhún i coō cáhnu síquī jeē ní sáha tī jeē cujéhnu ndasí quití xéén un, te suni ní cachiñúhún i quití xéén un. Te ní cacahān i:

Tú ní ñn jeē cujéhnu nájñūhun quití yáha, te tú ní ñn cundeyí cuajnáhan jíñ tī, áchí i jíñáhan i.

⁵ Te tu ní jési ya jeē cahān tī jeē quítí téyí cúu tī, jíñ jéé cahán ndevāha tī síquī yā. Te ní nihīn jñiñu tī jeē ndácu tī jñiñu uū xico uū yoō.

⁶ Te ní quejéé tī ní cahān ndevāha tī síquī Yaā Dios, jíñ síquī síhví yá, jíñ síquī nuū ndeé yá, jíñ síquī táca jéé iyó andiví.

⁷ Te tu ní jési ya jeē cuajnáhan tī jíñ ñáyuu maá Yaā Dios, te cundeyí tī jíñ i. Te suni ní nihīn jñiñu tī jeē ndácu tī jñiñu nuū ñáyuu táca yúcūn, táca ñuu, táca yuhu, táca nación.

⁸ Te ñayuu ní cáhnu ñayīví jéé tu yósó síhví i nuū tútu, ní cachiñúhún i quití xéén un.

Te Yaā cúu Londe jeē ní cahēni i, máá yá névāha tutu un jéé yosó síhví ñáyuu cotecu ní cáni, te je yósó síhví i nde quiví ní jécōo ñayīví.

⁹ Ñayuu iyó sóho na chúsóho váha i jñūhun cahān rī yāhá.

¹⁰ Táca ñáyuu jeē sáha jeē quíví jñáhan vecāa, suni vecāa cone máá i. Te táca ñáyuu jeē jéhni jñáhan jíñ espada, suni jíñ espada cuu maá i. Núu súcuan te ñayuu maá Yaā Dios chí jíñi ñúhún cuandeyí ní i jíñ jñúndóho te ma jécuiñī i candíje i jñūhun cúndáhú ní yā i.

¹¹ Yūcuán na te ní jito ri ñga quití xéén jeē ní cane chíji ñuhun. Te iyó uū ndiqui tī jeē cáa nájñūhun ndiqui lánchi. Te nájñūhun tachī coō cáhnu, súcuan tachī cahān tī.

¹² Te nájñūhun ndácu quití xéén xīhna ñúhún jñiñu, suni súcuan ndácu quití uū ún jñiñu, ín tī nuū quití xīhna ñúhún. Te quití uū sáha tī jeē chíñúhún táca ñáyuu ní cáhnu ñayīví nuū quití xīhna ñúhún, quití ní tújī jeē jé yajni cuu tī te ní nduvāha tī.

¹³ Te quití uū suni sáha táca jñiñu jéhnu jeē nahán náā ní yō jito yó. Chí ní scúun tī ñuhún ichi ándiví ní quiñi ini ñayīví, ní cajito ñayuu.

¹⁴ Te ní stahú tī ñayuu ñayīví jíñ táca jñiñu jéhnu jeē ní nihīn tī poder jeē sáha tī, jito jínúū quití xīhna ñúhún. Te ní ndacu tī jñiñu jeē na sáha ñayuu imagen quití xīhna ñúhún, quití ní tújī jíñ espada, jeē jé yajni cuu tī te ní nduvāha tī.

15 Te quití uū ni nihīn tī poder jeē chutáchí tī xijnī imagen quití xihna ñúhún, návāha cuu cahān, te cahni tāca ñáyuu jeē tu cájetáhú i chiñúhún i máá.

16 Te tāca ñáyuu cujéhnú jín ñáyuu tu cújéhnú, tāca ñáyuu cucá jín ñáyuu ndahú, tāca ñáyuu sájniñu cuenta maá jín mozo jeē ní cajeen ñayuu, ni sáha tī jeē ni jécondee ñn jnunī ndaváha i chí jnéé i.

17 Te ni ñn ñayuu ma cúu cuaan i xicó i te núu tu ndíso i jnunī jeē cúu síhví tī chí jnunī número jeē cúu síhví tī.

18 Jnūhun ndíchí cúu jeē cahán rī yāhá: Tāca ñáyuu jécūhun vāha ni cuu tava i cuenta número quití xéén un, chi número un cúu síhví ñn tēe. Te número un cúu iñū ciento unī xico iñū.

Yaa jeē cájita 144,000 ñayuu

14

1 Yūcuán na te ni ndacoto ri, te ni jito ri jeē ín máá Yaa cúu Londe xinī yucu Sión. Te cáhīn ciento uū xico cuūn mil ñayuu jín yá. Te jneé i ndéé síhví máá yá jín síhví Tátá yā Yaa Dios.

2 Te ni jini sōho ri jeē ñhīn ndasí ichi ándiví, nájñūhun jeē jíca cuehē yūte chí jéé cahán ñhīn taja. Te jeē ñhīn un sáha nájñūhun jeē cátee cuehē ñayuu yaa jeē naní arpa.

3 Te cáhīn i ichi núu mesa nuū ndácu Yaa Dios jniñu, jín núu ndicúún jeē técu, jín núu ndihócó cuūn tēe jéhnú cándiso jniñu. Te ni cajita i ñn yaa jeé. Te ni ñn ñayuu tu cúu cutūhva i yaa ún, chí

máni máá ciento uū xico cuūn mil ñayuu jeē ní jnama ya i ini ñayíví.

4 Te tāca tēe yáha cácuu jeē tu ní casáha cuēchi jín ñahan casáha néé, chí tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chí ni jnama ya de ini ñayíví, te máá de cácuu tēe jeē xihna gā ni cacandíje nuū Yaa Dios jín núu Yaa cúu Londe.

5 Te tú cuiti na jñūhun stáhú cácahān de, chí tēe ndoo ánuá cácuu de, cáhīn de nuū mesa Yaa Dios.

Jñūhun jeē ní cacahān ndinúni ndajéhé yā

6 Yūcuán na te ni jito ri inga ndajéhé yā jeē ndáva cuahān sava andiví. Te ndíso ya jñūhun jeē jnama Yaa Dios ñayuu cotecu i ní cáni. Te ni nacani ya jñūhun un núu tāca ñáyuu ní cáhnu ñayíví, nuū ñáyuu táca nación, tāca yúcūn, táca yuhu, táca ñuu.

7 Te ni cahān jee ya:

Conso iyo ró núu Yaa Dios, te na cáhán rō jeē yóhoyo cújéhnú ya, chí je ni quee quiví jeē sándaā yā síquī rō ndese ni casáha ró. Te na chíñúhún ró yā, chí máá yá ni sáha andiví jín ñayíví jín mar jín táca núu cáne ndute, áchí ndajéhé yā.

8 Yūcuán na te ndíquín inga ndajéhé yā vēji, te ni cahān yā:

Je ni naa iñū teyí Babilonia. Chí ni sáha jeē ñáyuu táca nación casíquí ndéé i Yaa Dios jeē ní castóo i ya te cándiquīn i ídolo jín táca jniñu néé, áchí ndajéhé uū.

9 Yūcuán na te ndíquín inga ndajéhé unī vēji, te ni cahān jee ya:

Xeēn coo siquī ñayuu cáchiñúhún quiti xéén jíin imagen tī, te jéhe i jñūhun condee jnunī tī jneē i chí ndaha i.

10 Chi nihīn i castigo xeēn siquī cuéchi ni casáha i, chi quitī ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhé Yaā Dios jíin Yaā cúu Londe.

11 Te ñuhmā nuū cándoho i cánda ní cáni cuiṭi. Te nduú ñuú tu ndétātú ñayuu cándoho ún jeē ní cachíñúhún quiti xéén jíin imagen tī, jíin jéē ni jécondee jnunī sihvī tī.

12 Jeē yúcuan ñayuu maá Yaā Dios jeē casquicu i jniñu ndácu ya te cácandije vāha i Jesús, cánuú jéē cuándeýí ni i. Achí ndajéhé unī.

13 Yūcuán na te ni jini sōho ri ñn jñūhun ichi ándiví jéē ni cahān jíin rí:

Tee ró jñūhun jeē cahán rī jíin ró yāhá: Nacā jeē ndetū tāca ñayuu cácandije Jitoho yō jeē cájihī vijna jíin ndé ní cuáhān yō. Jendaá chi ndetātú i jeē ní casáha i jniñu vāha, te jniñu i un má nāá chi sáha jeē quendōo vāha i ní cáni, áchí Espíritu.

Jeē ní nastútú yá ñayuu ñayiví

14 Yūcuán na te ni ndacoto ri, te ni jito ri ñn vicó cuijín. Te nuū vicó un néne Yaā ní nduu tēe. Te xinī yā ñūhun corona oro, te ndáhá yá ñn hoz xeēn.

15 Te ni quenda inga ndajéhé yā ini templo, te ni cana jee, te cáhán jíin Yaā néne nuū vicó un:

Cahnde ni jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájnūhun táhndé trigo jeē jé ni cuaan, áchí.

16 Yūcuán na te Yaā néne nuū vicó ni nastútú yá ñayuu váha ini ñayiví, nájnūhun táhndé trigo jíin hoz.

17 Yūcuán na te ni quenda inga ndajéhé yā ini templo jeē iyó andiví, te suni ndáhá yá ñn hoz xeēn.

18 Te nde nuū altar ni quenda tucu inga ndajéhé, te ndíso jniñu ya siquī ñuhūn altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayiví, nájnūhun jeē cájehnde i chutū ndehē uva jeē jé ni jichi, áchí.

19 Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayiví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnaa i ndehē uva nuū taxín.

20 Te ni jéhe ya castigo i yatá ñūú, te ni jica niñi i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jíin ndihúxá jñūndóho jeē sándihí

15

¹ Te ni jito ri inga jniñu jéhnu ichi ándiví jéē nāā ni yō jito yó. Chi cáhīn uxā ndajéhé yā jeē cuāha ndihúxá jnūndóho sandihí na. Te jeē jīnu ndihúxá jnūndóho yáha, te jīnu jeē cuáha Yaā Dios castigo xeēn siquī cuéchi.

² Te suni ni jito ri ñn jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhīn ñayuu ni cacundeyí síquī quití xéén jíin imagen tí, jíin jéē tu ní cáquihin i jnunī número jeē cúu síhví tí. Te cándāhá i yaa jeē naní arpa jeē ni jéhe Yaā Dios nuū i.

³ Te cájita i yaa jeē ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhán yaa ún:

Yōhyo nāā ni na cájito ná ndihi jniñu jéhnu teyí jéē sáha ní,

Tátā Yaā Dios, chi jnā ní ndihi poder.

Te máni jniñu ndaā jniñu váha sáha ní, jeē cúu ní Rey nuū tācá nación.

⁴ Tú ni ñn i íyó jéē ma cónso íyo i nuū ní, Tátā Yaā Dios. Te ndihi i cahān nahín i jeē yóhyo cújéhnu ní.

Chi máñuhún ni máá ní cúu Yaā ndoo Yaā íi.

Te quiijicoo ñayuu tācá nación, chiñuhún i níhín, chi je ni cajini i jeē ndaā váha sáha ní tāca jniñu.

Achí i cájita i.

⁵ Yūcuán na te ni ndacoto ri, te ni jito ri jeē ini ándiví núne

cuarto íi ini templo nuū íne tabla yuū jeē yosó ley yā.

⁶ Te ini templo un ní quendacoo ndihúxá ndajéhé jeē cándiso jniñu síquī ndihúxá jnūndóho. Te cáñuhun ya sahma fino iyó ndoo te xíñu. Te núhni cinturón oro jicā yā.

⁷ Te ñn jnáhan ndicúun jeē técu ni jéhe ñn ñn cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jéhe Yaā Dios, Yaā técu ní cáni.

⁸ Te ni chitú ndā ñuhmā ini templo, te suu ni steén jeē yóhyo cújéhnu Yaā Dios jíin poder jnā ya. Te ni ñn tu ní cúu quívi ini templo, chi nde na ndihi ndihúxá jnūndóho jeē cuáha ndihúxá ndajéhé yā.

Siquī ndihúxá cohō jeē ñuhun castigo

16

¹ Yūcuán na te ini templo ni jini sōho ri ñn jñuhun cáhán jee jíin ndihúxá ndajéhé yā:

Cuangoo te catí ró síquī ñayívi ndihúxá cohō jeē ñuhun castigo xeēn jeē ni jéhe Yaā Dios, achí.

² Te cuahān ndajéhé ñn, te ni jeti ya cohō yā síquī ñayívi. Te tāca ñayuu jeē ndeé jnunī quití xéén un jíin jéē cáchiñuhún imagen tí, ni canecoo ndihyí xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájñuhun níñi ndíyi. Te ni cajihí tācá quití jeē ñuhun ini mar.

⁴ Te ndajéhé uní ni jeti ya cohō yā ini tāca yúte jíin tāca

nūū cáne ndute, te ni nduu niñi.

⁵ Te ni jini ri jeē cahán ndajéhé jeē ndiso jniñu siquī ndúte:

Tátā Yaā Dios, maá ní cúu Yaā ndoo Yaā iī, Yaā iyó vijna, te ni iyo ní ní cáni. Te ndaā sáha ní jeē súcuan ni ndonda ní siquī cuéchi i.

⁶ Chi ni casáha i jeē ní jeti niñi ñayuu ndoo ní jín ñayuu ní canacani jñuhun ní. Te vijna chi ni sáha ní jéé cájiji i niñi, chi ñayuu casáha jniñu néé cácuu i, jeē cánuu ndoho i súcuan.

⁷ Te ni jini sōho ri jeē cahán inga nde nuū altar:

Tátā Yaā Dios, máá ní cúu jeē jñi ndihi poder. Te jniñu váha jniñu ndaā ni sáha ní jéé ní ndonda ní siquī cuéchi i. Achí.

⁸ Te ndajéhé cuūn ni jeti ya cohō yā siquī níandii, te ni jéhe Yaā Dios jñuhun jeē ndujíhni ndasí níandii návaha cayū ñayuu.

⁹ Te xeēn ndasí ní cayū táca ñayuu. Te vésú súcuan te tu ní canacani ni i stóo i cuéchi i, ni tu ní cácahān i jeē cujéhnu Yaā Dios. Chi sa suhva ni cacahān ndevāha i siquī yā jeē ni jéhe ya táca castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quiñi xéén jniñu. Te ni cunee ní cáhnu nuū ndácu ti jniñu. Te cánacayñi ñayuu yuhu i jeē cájetū ndasí i.

¹¹ Te vésú súcuan te tu ní canacani ni i stóo i jniñu néé casáha i. Chi sa ni cacahān ndevāha i siquī Yaā Dios

andiví siquī jeē cájetū ndasí i jín ndihyi xeēn cándoho i.

¹² Te ndajéhé iñū ni jeti ya cohō yā siquī yúte cáhnu jeē naní Eufrates. Te ni ichi ndihi ndute yúte ún, návaha nune iñi ichi jeē quíjicoo táca rey ichi núū cáne niāndii.

¹³ Te ni jito ri jeē ini yuhu coō cáhnu jín ini yuhu quiñi xéén jín ini yuhu máá téé nácani jñuhun stáhú ní canecoo unī tachī jeē cáca nájnūhun sáhvá.

¹⁴ Te tachī ún chi ndajéhé jexeén cácuu, te casáha jniñu jéhnu jeē náā ni ñayuu cájito i. Te ni quendacoo tachī un jeē nastútú táca rey ní cáhnu ñayiví, jéé cuajnáhan de siquī Yaā Dios quiñi jeē ndiji ya. Te máá yá cúu jeē jñi ndihi poder.

¹⁵ Cuni sōho jijnáhan ró, chi sanaa ni rō te ndiji ri, nájnūhun jeē iñi sanaa-ni te quiñi ñacuñhá. Te nacā jeē ndetū ñayuu jeē ndito ni i, te ndito yúcún i sahma i, návaha ma cáca vichí lí i, cúu jeē tú na cuéchi coo siquī i jeē cucanu i nuū táca ñayuu, achí yá.

¹⁶ Te ni canastútú táchī un táca rey, ni candutútú iñi lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tachí. Te ini templo andiví jín núū mesa nuū ndácu ya jniñu, ni cane iñi jñuhun jeē ni cáhān jee:

Je ni jīnu, áchí.

¹⁸ Yūcuán na te ni ndindēé taja, te níñi, te cáhān taja, te ni jñāa ndasí. Chi nde ní cáni jeē iyó ñayuu ñayiví, tu ní

jnáa nīhin ndasí nájñuhun jeē ni jnáa ni jito ri.

¹⁹ Te máá ñuu kujénu Jerusalén, ni cusín ni nduu unī parte, te ní cáhnu ñayīví ni naa tāca ñuu. Te ñuu teyí Babilonia, chí ni sāha nahín yá jeē ní ndutahū i castigo xeēn, chí ni quitī ndasí ni yā siquī cuéchi i.

²⁰ Te ni naa tāca isla, te suni yucu tuá gā.

²¹ Te ichi ándiví ní cuun ñíñí náhnu siquī ñayuu, jeē véyí nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí ñíñí, chí ñn jñūdóho xeēn ni cuu.

Jeē ndonda ya siquī ñuu neé Babilonia

17

¹ Yūcuán na te ni quiiji ñn jñahan ndihúxá ndajéhé jeē ní candāhá ndihúxá cohō ún, te ni cahān yā jín rí:

Nehen, te na stéén rī nuū rō ndese coo castigo siquī maá ñahan jnéni jeē cúu ñuu kujénu íne nuū iyó cuéhē ndute.

² Chí tāca rey ñayīví nájñuhun ni casíquí ndéē de jín ñahan ún, cúu jeē ní castóo de Yaā Dios te cándiquīn de jñuhun néé ní steén ña. Te ni sāha ña jeē ñayuu ní cáhnu ñayīví, nájñuhun nájini i te casíquí ndéē i Yaā Dios cúu jeē ní castóo i ya te casáha ndasí i cuéchi. Achí ndajéhé yā.

³ Te ni sāha ga Espíritu Santo jeē ní jito ndijin rī, te ndajéhé yā un cuáhān yā jín rí nde nuū ñuhun téhé. Te ni jito ri ñn ñahan, yósó ña

ñn quití xéén cacuéhé. Te ní cáhnu ti ndeé jñuhun néé jéé quití ni Yaā Dios sāha. Te iyó úxā xinī tī jín úxī ndiqui ti.

⁴ Te ñahan un ñuhun ña sahma ndihí jín sahma cuehé, te suni ñuhun ña siquī oro jín yūu luu jín perla jeē ndeé yahu. Te ndáhá ña ñn cohō oro jeē ñuhun chitú jín jniñu néé ndasí jín jniñu jnehén jéé jíca jnéni ña.

⁵ Te jneē ña ndeé ñn síhví jéé cúu ñn jñuhun sāhí, te suhva cáhán: Yāha cúu ñuu teyí Babilonia, jeē cúu nájñuhun náná tāca jéé cájica jnéni jín jéé casáha néé ndasí ini ñayīví, áchí.

⁶ Yūcuán na te ni jini rī jeē ñahan un nájini ña jeē nájñuhun ni jihí ña niñí ñayuu maá Yaā Dios jín níñí ñayuu ni cajihí siquī jeē ní canacani ndaā i jñuhun Jesús. Te nahán ní naa ni rī ni jito ri ña.

⁷ Yūcuán na te ni cahān ndajéhé un jín rí:

¿Naun náa ni rō jíto ró? Na cástūhun rí nuū rō ndese cúní cahān jñuhun sāhí siquī ñahan un jín quití xéén yósó ña, jeē iyó úxā xinī tī jín úxī ndiqui ti.

⁸ Quití xéén jeē ní jito ró, chí ni cotecu tī, te vijna chí tuá tī. Te ndenda tucu ti ini tūhñchi cúnú, te yūcuán na te quihñ tī nuū jñahnú ndetū tī. Te ñayuu cáyūcu ní cáhnu ñayīví, naa ni i coto i nuū quití un jéé ní cotecu tī te ni jihí tī, te natecu tucu ti. Te cácuu i ñayuu jeē tu yósó síhví i nuū tútu jeē yósó síhví ñayuu cotecu ní cáni jeē ní jécosó síhví i nde quiví ni jécōo ñayīví.

9 "Tāca ñáyuu jécūhun vāha ni, cuu tava i cuenta ndese cúu: Ndihúxá xinī tī cácuu nájnūhun uxā yucu nuū néne ñahan ún.

10 Te ndihúxá xinī tī suni cácuu nájnūhun uxā rey. Te uhūn rey un je ni naa jeē ndácu de jniñu, te ñin de ndácu jniñu vijna, te inga de chi ná tu quiji de. Te núu na quiji de te jecu-ni tiempo coo de.

11 Te quiiti xéén jeē ní cotecu te tuá iyó tī vijna, máá tī cuu rey unā. Te ñin jnáhan ndihúxá rey un cúu tī. Te suni quihīn tī nuū jnahnú ndetū tī.

12 "Te ndihúxí ndiqui jeē ní jito ró cúu nájnūhun uxī rey, te ná tu ndacu de jniñu jíjnáhan de. Te máá de jíin quiiti xéén un, chi nihīn jniñu de cuu de rey jecu-ni tiempo.

13 Te ndihúxí rey un chi squíjnáhan de jnūhun, te nacuāha de poder de jíin jniñu ndíso de nuū quiiti xéén un návāha ndacu tī jniñu.

14 Te cuajnáhan de jíin Yaā cúu Londe. Te Yaā cúu Londe quende yā poder de jíjnáhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

15 Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación.

16 Te ndihúxí ndiqui jeē ní jito ró jéé névāha quiiti xéén un, suu cácuu rey jeē coto uhū de ñahan jíca jnéni un. Te sāha

de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún.

17 Chi Yaā Dios scānda ya ini de jeē na sāha de jniñu cúní yā. Te squíjnáhan de jnūhun jeē nacuāha de jniñu ndíso de nuū quiiti xéén un, ndacu tī jniñu nde na squícu tāca jnūhun ni cahān Yaā Dios.

18 Te ñahan jeē ní jito ró cúu máá ñuu teyí jéé cujéhnū nuū tāca rey ñayívi. Achí ndajéhé un.

Siqui jeē naa ñuu Babilonia

18

1 Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnū ndasí yá. Te jeē ndíndēe yá te ni ndíndēe núu ñayívi.

2 Te ni cana jee ya:

Je ni naa iñ ñuu teyí Babilonia. Te ni nduu vehe tāca táchi, nuū ñuhūn ndínuū tachí neé, jíin tāca téji, quiiti quíni jeē tu nújnahan ni yō.

3 Chi ñuu un cúu nájnūhun ñin ñahan ndevāha, te ni sāha ña jeē ñáyuu tācá nación, nájnūhun nájini i te cásiquí ndéé i Yaā Dios, cúu jeē ní castoo i ya te cásáha ndasí i cuēchi. Te tāca rey ñayívi, nájnūhun ni casíquí ndéé de jíin ñahan ún jeē ní cajetáhú de jnūhun neé ní steén ña. Te ñayuu ní ñayívi jéé cájeen caxícó, ní cacucúca i jíin cuéhē jeneé jeē ní nevāha ña.

4 Yūcuán na te ni jini sōho ri inga jnūhun jeē ni cahān ichi ándiví:

Máá ró jeē cácuu ró ñayuu maá rí, quendacoo ró ini ñuu jĩñā, návāha ma quívi nduu rō jín táca cuéchi jeē sáha ña, te návāha ma ndóho ró jnūndóho xeēn jeē ndoho ña.

⁵ Chi ni cayā cuehē ndasí cuéchi ña, nájñūhun in montón cáhnu ndasí jēē ní cusúcún ndé andívi. Te vijna te nduxeēn Yaā Dios siquī cuéchi ña.

⁶ Stóho ró ña nájñūhun ni sáha ña jeē ní ndoho sava ga ñayuu. Te nachunaa rō nuū ña doble jnūndóho jeē ni jéhe ña nuū inga ñayuu. Te sáha ró jeē nandicó cóo doble siquī ña vésú jeē ni sáha ña siquī inga ñayuu.

⁷ Te yōhyo ni satéyí ña máá ña, te cucá ndasí ní cotecu ña. Te suni jín cūhva yúcuan nacuāha ró jēē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuiti jnūndóho ndoho ri, achí ña.

⁸ Jeē yúcuan cúu jeē in quívi-ni te quíji cuehē jnūndóho siquī ña. Chi cuu ndíyi, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jítoho yō Yaā Dios, Yaā ní ndonda siquī cuéchi ña, achí.

⁹ Te tāca rey ñayívi jēē ní casíquí ndēē de jín ña te ni cotecu cucá ndasí de jín ña, ndahyū de te ndahyū cohó de coto de jeē cánda ñuhmā cayú ña.

¹⁰ Te cuiñi jícá de chi yūhú de coto de jeē súcuan ndoho ña castigo. Te cahān de

jijnáhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi in núnúu-ni te ni quee castigo jeē nāā rō, achi de jijnáhan de.

¹¹ Te tāca téē ñayívi jēē cájeen cáxícó ñuu ún, ndahyū de te ndahyū cohó de jehē. Chi tuá ndé in cuaan ndajniñu cáxícó de.

¹² Te ndajniñu cáxícó de un cúu oro, plata, yuū luu jín perla jeē ndeé yahu, jín sahma fino jín sahma seda jeē ndihí jín jēē cuehé. Te suni táca yujnu jeē asin jéen xicō, jín táca ndajniñu luu jeē ni sáha jín marfil jín yujnu lúu jeē ndeé yahu jín cáa cuaan jín cáa hierro jín yúu cuijín luu.

¹³ Te suni cáxícó de canela jín táca jíhyo asin jín súje cutú jín súje uvuā jín táca perfume jín vino jín aceite jín harina fina jín trigo. Te suni cáxícó de quití ndiso jín lanchi jín caballo jín carreta, te nde ñayuu cáxícó de jeē sájniñu sáá-ni i.

¹⁴ Te cahān de jín ñuu ún:

Ni cujiyo ndihi ndajniñu cucá jeē ní nujnahan ndasí ni rō. Te tāca jēē lúu jeē váha jeē ní cotecu cucá ró, chi ni naa ndihi, te ma nánihin cuiti gā rō, achi de jijnáhan de.

¹⁵ Te tāca téē ni cajeen ni caxico ní cacucucá jēē siquī ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de.

¹⁶ Te cahān de jijnáhan de:

Nacā jeē xeēn ndóho ñuu teyí yáha. Chi ni cuu nájnūhun ñin ñahan jeē ni ñúhun sahma fino, sahma ndihí jíin jéē cuehé. Te ni ñuhun ña siquī oro jíin yúu luu jíin perla jeē ndeé yahu.

17 Te vijna te ñin núnúu-ni te ni naa ndihi tācá ndajniñu váha ún, achi de jíinahan de.

Te cuiñi jíca táca téē cáscaca barco, jíin ñayuu cuángoo nuū barco, jíin téē casájniñu ini barco, jíin táca gá téē casájniñu nuū mar.

18 Chi coto de ñuhmā jeē cayú ñuu ún, te cana jee de jíinahan de:

¿Ndé íne ga ñuu teyí jéē cujéhnu nájnūhun ni íyo ñuu yáha? achi de.

19 Te cosō de ticachā ñuhun xinī de jeē cácuuíhyá ni de. Te ndahyū de te ndahyū cohó de. Te cana jee de jíinahan de:

Nacā jeē xeēn ndóho ñuu teyí yáha. Chi jíin ndajniñu cúca jeē ni íyo ñuu un ní cacucúca táca ñayuu cánevāha barco cájica nuū mar. Te vijna te ñin núnúu-ni te ni naa ndihi-ni, achi de.

20 Te na cúsiñi ni táca róhó jéē cáyūcú andiví, siquī jeē ní naa ñuu ún. Te na cúsiñi ni rohó, táca téē apóstol, jíin téē canacani jnūhun Yaā Dios, jíin ñayuu maá Yaā Dios. Chi ni sáha néé ñuu un síquī rō jíinahan ró, te jeē yúcuan ní ndonda Yaā Dios siquī, achi de.

21 Yūcuán na te ñin ndajéhé ndíso poder, ni quihin ya ñin yuū cáhnu nájnūhun ñin yōso

cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiti gā jeē cóto yó núu.

22 Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha táca ndajniñu. Te suni ma cúni sōho ga i jeē ñihin táca molino rō.

23 Te ni ñin lámpara ma sáha ga jeē cúndijin nuū rō. Te ni ma cúni sōho ga i vico jeē cácusñi ni ñahan téē nándāha mēñu ró. Te ñayuu ní cajeen ni caxícó nuū rō, ni cacujéhnu ndasí i ini ñayiví. Te ni stahú ró ñayuu táca nación jíin jniñu tasí jíin jniñu mágica. Achí ndajéhé un.

24 Te ñuu un ní nihñin castigo xeēn, chi siquī ñuu un ndeé cuéchi jeē ní jeti niñi táca téē ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i ní cáhnu ñayiví.

19

1 Te ná ni cuu táca jéē yáha, te ni jini sōho ri jeē cahán jee cuehé ndasí ñayuu ini andiví: Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te maá yá cujéhnu ndasí, te maá yá jniñi ndihi poder.

2 Te ndaā te vāha sándaā yā táca jniñu, chi ni ndonda ya siquī cuéchi ñuu neé cújéhnu ún.

Chi ni stívi un ñáyuu ní
cáhnú ñayīvi jíin jnúhun
cásíquí ndēē Yaā Dios.

Te ni sáha ya jeē ní ndu-
tahū ñuu un síquí jeē ní
jehni tāca mozo yā.

Achí i jíináhan i.

³ Te ni cacahān tucu i:

Yōhoyo cújéhnú ya. Chi ní
cáni canda ñuhmā ñuu un jéé
cayú, achí.

⁴ Te ndihóco cuūn tēe jéhnú
cándiso jniñú, jíin ndicúún jeē
técu, ni cajecuiñī yití de, te ni
cachiñúhún de Yaā Dios, Yaā
néne nuū mesa ndácu jniñú.
Te ni cacahān:

Amén. Súcuan na cóo. Yōhoyo
cújéhnú ya.

⁵ Te nde nuū mesa nuū
ndácu ya jniñú ni cahān ñn
jnūhun:

Róhó jéé cájejniñú nuū Yaā
Dios,
jíin róhó jéé cándiso īyo nuū
yā,

jeē cácujehnú jíin jéé tu
cácujehnú,
na cáhán rō jeé yóhoyo vāha
Yaā cúu ya.

Achí.

*Vico jeē nándāha Yaā cúu
Londe*

⁶ Te ni jini sōho ri jeē
cácahān ñayuu cuehē ndasí,
te níhin nájnūhun níhin cuehē
yūte, te nájnūhun jeē cahán
níhin taja. Te ni cacahān:

Yōhoyo cújéhnú ya. Chi Jitoho
yō Yaā Dios, Yaā jniñ
ndihi poder,

vijna te ndácu níhin ya jniñú.

⁷ Te na cúsiñ ní yō, te siñ ndasí
na cóo ní yō,

te na cáhán yō jeé yóhoyo
cújéhnú ya.

Chi ni quee quiñi jeē nándāha
máá Yaā cúu Londe.

Te je iyó túhva ñahan nándāha
jíin yá, te suu cúu ñayuu
máá Yaā Dios.

⁸ Te ni nihīn ña jnúhun cuhun
ña sahma fino jeē ndóo
ndasí te xíñú.

Achí i jíináhan i. Te sahma
fino un cúu tācá jniñú ndaā
jeé casáha ñayuu máá Yaā
Dios.

⁹ Te ni cahān ndajéhé yā jíin
rí:

Tee ró jnúhun yáha: Nacā
jeē ndetū tāca ñáyuu jeē
ní cana ya quingoo vico
nándāha Yaā cúu Londe.

Te ni cahān gā ndajéhé un
jíin rí:

Tāca jnúhun yáha cúu
jnūhun ndaā ni cahān Yaā
Dios, achí yá.

¹⁰ Te ni jecuiñī yití rí nuū
jehé ndajéhé un jéé chiñúhún
rí yā nuú. Te ni cahān yā jíin
rí:

Ma sáha ró súcuan. Chi
ruhū suni mozo Yaā Dios cúu
rí, nájnūhun máá ró jíin tāca
hermano rō jeé cácañije vāha
jnūhun Jesús. Sa suhva nuū
máá Yaā Dios chiñúhún ró.
Achí yá.

Chi jnūhun síquí Jesús
cúu jeé cácahān ndaā ñayuu
cánacani jnūhun Yaā Dios.

*Yaā yosó síquí caballo
cuijín*

¹¹ Yūcuán na te ni jito ri
jeē núne andiví. Te ni cane
ñn caballo cuijín, te Yaā yosó
síquí tī naní yá Yaā ndaā, Yaā
squícu, chí squícu ya jeē ní
jéjnūhun ya. Te ndaā sándaā
yā jniñú te ndaā ndóna ya
síquí tāca jéneé.

12 Te tinūu yá ndíndēe nájñuhun yáñuhūn. Te xinī yā ñúhun cuehē corona. Te yósó ñin síhví yá jeē maá-ni ya cúu jeē jiní.

13 Te ñúhun ya ñin sahma jeē ni ñúndaji nuū niñí, te nání yá Jñuhun Yaā Dios.

14 Te tācá ndajéhé yā jeē iyó andiví, cáyosō caballo cuijín, cándiquñ yatā yā. Te cáñuhun sahma fino cuijín iyó ndoo.

15 Te ini yuhu maá Yaā jeē yosó síquī caballo, quénda jeē cáa nájñuhun ñin espada xeēn. Te espada un cúu jñuhun ya jeē stóho ya ñayuu tācá nación. Te ñihin ndacu ya jniñu nuū i. Te sándaā yā síquī cuéchi i nájñuhun jeē jeñú síquī ndehē uva cájexīn. Te cuāha ya castigo xeēn ndoho i jeē quití ni yā síquī cuéchi i. Chi maá yá jñí ndihi poder.

16 Te sahma ya jín síhin ya yosó jñuhun yáha: Rey nuū tāca rey jín Jítoho nuū tāca jítoho, áchí.

17 Yūcuán na te ni jito ri ñin ndajéhé yā jeē ín nuū níandii. Te ni cana jee ya xinī tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios.

18 Te caji rō cūñu tāca rey jín capitán jín téé téyí, jín cūñu tācá caballo jín téé ni cayosō síquī tī. Te suni caji rō cūñu tāca gá ñayuu, cúu ñayuu casájniñu cuenta maá jín mozo jeē ní cajeen ñayuu, cúu ñayuu cácujeñu jín ñayuu tu cácujeñu. Achí ndajéhé yā.

19 Yūcuán na te ni jito ri maá quití xeēn jín tāca rey ñayiví

jín cuéhē soldado de. Te ni candutútú de jeē cuajnáhan de jín maá Yaā yosó caballo jín tāca ndajéhé yā.

20 Te ni jñi ya quití xeēn cuahān tī preso jín téé ni nacani jñuhun stáhú jeē ni sáha tācá jniñu jéñu jeē ní jito jínúu quití xeēn. Chi jín jniñu jéñu un cúu jeē ni stáhú de tāca ñayuu jeē ní cajēhe jñuhun condiso jñunī quití xeēn, jín jéé ní cachiñúhún imagen tī. Te quití xeēn un jín téé ni nacani jñuhun stáhú un, cátecu ndíndúú te ni scáne ya nuū laguna ñuhūn jeē cayú jín azufre.

21 Te jín espada jeē cáne yuhu Yaā yosó caballo ni cajiñí tācá soldado quití xeēn un. Te tācá quití ndáva nuū tachí ni candutú chíji tī ni cayeji tī cūñu de jíjnáhan de.

Siquī mil cuiyā

20

1 Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tñhchi cúnú ndasí. Te suni ndáhá yá ñin cadena cáhnu.

2 Te ni jñi ya maá cóo cáhnu jeē iyó ndé jenahán ndasí, te nání tī jexeēn jín Satanás. Te ni jihni yā jeē conuhnī mil cuiyā.

3 Te ni scáne ya ini tñhchi cúnú ndasí. Te ni jesi vāha ya, te ni sácutú yá yuyáú, návāha ma stáhú gá un ñayuu tācá nación, chí nde na jínu mil cuiyā. Te jeē yáha mil cuiyā ún, yūcuán na te cánuú

jeē ndajī caca cuu jecu na tiempo.

⁴ Te ni jito ri tāca mesa nuū ndácu jniñu, te yūcuan cáyūcu tāca ñáyuu jeē ní canihīn jniñu i sándaā i jniñu. Te suni ni jito ri anuá tāca ñáyuu jeē ní cajehnde xinī i siquī jeē ní canacani i jnūhun Jesús jíin jnúhun Yaā Dios. Te tu ní cáchiñúhún i quitī xéén jíin imagen tī, ni tu ní cájēhe i jnūhun jeē cóndee jnunī tījneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā.

⁵ Yāha cúu ndīyī jeē nátecu xīhna gā. Te tāca gá ndīyī, tu ní cánatecu i, chí nde jeē jíinu mil cuiyā.

⁶ Te nacā jeē ndetū tāca ñáyuu ndoo ánuá jeē nátecu xīhna gā. Chí ma cúu cuitī i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷ Te jeē jíinu mil cuiyā ún, te ndajī Satanás te quenda nuū yíndihyū.

⁸ Te stáhú tucu ñáyuu tāca nación ní cáhnu ñayīví. Te stáhú ñáyuu ñuu Gog jíin Magog. Te sáha jeē ndutútú tāca soldado ñuu un jéē cuajnáhan de. Te coo cuehē ndasí de nájñūhun ñītī yumar.

⁹ Te cuitē núu de quingoo de ní cáhnu ñayīví. Te cuicó ndúū de ñuu nuū cáyūcu ñáyuu maá Yaā Dios, ñuu jeē maní yā jíin. Te Yaā Dios chí scúun ya ñuhūn ichi ándiví, te cayū ndihí de.

¹⁰ Te jexeén jeē ni stáhú tāca ñáyuu ún, chí scáne ya quihīn nuū laguna ñuhūn jeē

cayú jíin azufre. Te yūcuán chí xīhna gā ni scáne ya quitī xéén jíin tée ni nacani jnūhun stáhú. Te yūcuán ndoho nduú ñuu ní cáni cuitī.

Jeē sándaā yā jniñu nuū mesa cuijín

¹¹ Yūcuán na te ni jito ri ñin mesa cuijín cáhnu, te néne máá Yaā ndácu jniñu. Te ñayīví jíin ándiví ni ndoñúhún cuáhān jeē ní jito ya nuū, chí tuá ni cúu quendōo nuū yā.

¹² Te ni jito ri tāca ndīyī, jeē ní cujéhnu jíin jéē tu ní cujéhnu, cáhīn nuū Yaā Dios. Te ni sáha ya jeē núne tāca libro, te suni ni nune inga libro jeē yosó síhví ñáyuu cotecu ní cáni. Te ni sándaā yā siquī tāca ndīyī ún, núu ndese jniñu ni casáha i jíin ndese yósó núu tāca libro un.

¹³ Te tāca ndīyī jeē ní cajihī nuū mar, ni nanecoo. Te suni ni nanecoo tāca ndīyī jeē ní cajihī i, jeē íne i máá lugar nuū cáyūcu ánuá ndīyī. Te ni sándaā yā siquī, núu ndese ni casáha ñin ñin i.

¹⁴ Yūcuán na te cuehyī jéhni ñáyuu jíin lugar nuū cáyūcu ánuá ndīyī, ni snāā yā ni scáne ya cuangoo nuū laguna ñuhūn. Te jeē ndóho ñáyuu nuū laguna ñuhūn, yūcuan cúu jeē cúu i vuelta uū.

¹⁵ Te yūcuan ní scáne ya tāca ñáyuu ni casáha jniñu néé jéē tu yósó síhví i nuū libro jeē yosó síhví ñáyuu cotecu ní cáni.

Ándiví jéé jíin ñayīví jéé

21

¹ Yūcuán na te ni jito ri andiví jée jíin ñáyiví jée. Chi andiví jíin ñáyiví xihna ñúhún ni naa. Te suni tuá mar.

² Te ruhū Juan, ni jito ri ñuu iī jeē cúu Jerusalén jeé. Te ñuu un ní cuun vēji ichi ándiví núū néne Yaā Dios. Te ñuu ún luu cáa nájnūhun iin ñahan jeē ni sátūhva ña ni cucutú ña jeē nándāha ña jíin yī ña.

³ Te ni jini sōho ri iin jnūhun jeē ni cáhān jee ichi ándiví:

Condēhé, chi vijna te ndée Yaā Dios mehū ñáyuu. Te condee yā jíin i jíjnāhan i, te cuu i ñáyuu maá yá. Te maá yá condee yā jíin i jeē cúu ya Yaā Dios i.

⁴ Te nacuaa yā ndute tínúú i jíjnāhan i. Te ma cúu gā ñáyuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnúndóho jeē ni íyo, áchí.

⁵ Yūcuán na te ni cahān maá Yaā néne nuū mesa:

Condēhé, chi nasáha jeé rí tāca jée iyó, áchí yá.

Te suni ni cahān yā:

Tee ró jnúhun yáha. Chi tāca jnúhun yáha cúu jnūhun jeē jini ndije ró jée ndaā cúu.

⁶ Te ni cahān gā yā:

Je ni jīnu. Máá rí cúu nájnūhun letra A xihna ñúhún jíin letra Z jeē sándihí na, chi máá rí ni squejée ndihí te máá rí sínu. Te tāca ñáyuu cájichí, súcuan-ni cuāha ri coho i ndute cáne jeē cótecu i ní cáni.

⁷ Tāca ñáyuu jeē cúndeyí síquī jéneé, nihīn i ndihí jeē

yáha cuu tahū i. Te cuu ri Yaā Dios i, te cuu i sēhe ri.

⁸ Te tāca ñáyuu jeē cáyūhú ndoho síquī jnúhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndiyí, jíin ñáyuu cájica jnéni, jíin ñáyuu casáha tásí, jíin ñáyuu cáchiñúhún ídolo, jíin táca ñáyuu castáhú, ñáyuu ún chi quivícoo i laguna ñuhūn jeē cayú jíin azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji iin jnāhan ndihúxá ndajéhé jeē ní candāhá ndihúxá cohō jeē ni ñúhún chitú ndihúxá jnúndóho sandihí. Te ni cahān yā jíin rí:

Nehen, te na stéén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰ Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jíin rí xiní iin yucu cáhnu súcún. Te ni steén yā nuū rī maá ñuu iī cujéhnu jeē cúu Jerusalén, te ni cuun vēji nde andiví núū néne Yaā Dios.

¹¹ Te ndíndéé ndasí ñuu un nájnūhun ndíndéé Yaā Dios. Te xíñú nájnūhun xíñú iin yuū luu jeē ndeé yahu ndasí, nájnūhun yuū cuijín jeē quiyí nájnūhun vidrio.

¹² Te yuhu ñúū un ní jicó ndúū iin jeē cáhnu súcún ndíhyú ñuu ún. Te íyo úxí uū yehyí. Te tāca yéhyí un lín iin ndajéhé yā. Te tāca yéhyí un yósó síhví ndihúxí uū yucūn Israel.

¹³ Te lado nuū cáne niāndii iyó úní yehyí. Te lado norte

suní íyó únī yehyí. Te lado sur suní íyó únī yehyí. Te lado nuū quéé niāndii suní íyó únī yehyí.

14 Te íyó úxī uū yuū nāhnu jeē cúu cimientu maá jéē ndihyú ñuu ún. Te tāca yūu un yósó síhví ndihúxí uū apóstol maá Yaā cúu Londe.

15 Te ndajéhé jeē ní cáhān jíin rí, ndáhá yá ñn yujnu oro jeē chícuāha yá ñuu un jíin tāca yéhyí jíin maá jéē ndihyú ñuu ún.

16 Te ñuu ún chí ñn cūhva-ni cúu ndicúún lado. Chí jeē cáni jíin jéē jité, ñnuú-ni cúu. Te ndajéhé un ní chicuāha yá ñuu un jíin yujnu ún. Te née uū mil uū ciento kilómetro jeē ñn ñn lado. Te ñnuú-ni cūhva jeē cáni, jeē sucún, jíin jéē jité.

17 Te suní ní chicuāha yá maá jéē ndihyú ñuu ún, te née unī xico cuūn metro jeē sucún. Te yūcuan cúu cūhva jejníñu ñayuu, jeē suní jéjníñu ndajéhé un.

18 Te maá jéē ndihyú ñuu un ní cuvāha jíin yūu cuijín quiyi. Te ñuu ún chí maá nene oro cúu, te cáa nájñuhun vidrio quiyi.

19 Te tāca yūu jeē cúu cimientu maá jéē ndihyú ñuu ún, ní cucutú jíin ndinuū yuū luu jeē ndeé yahu. Yuū ñn cúu yuū cuijín quiyi. Te jeē uú cúu yuū ndeé ndí. Te jeē uní cúu yuū pinto. Te jeē cuún cúu yuū cuí ndí.

20 Te jeē uhún cúu yuū pinto jeē ñuhun raya. Te jeē íñú cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndeé. Te jeē

ñn cúu yuū cuaán ndí. Te jeē uxí cúu yuū cuí cuijín. Te jeē uxí ñn cúu yuū cuehé cuaán. Te jeē uxí uū cúu yuū ndihí ndí.

21 Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te maá nene oro cúu calle cáhnu ñuu ún, te quiyi nájñuhun vidrio.

22 Te tú na templo ní jito ri ini ñuu ún, chí ní cáhnu ñuu un ndeé maá Jítoho yō, Yaā jñí ndihí poder, jíin Yaā cúu Londe.

23 Te ñuu ún tu jíni ñuhún cundijin jíin luz niāndii jíin yóō. Chí jeē ndíndēe maá Yaā Dios cúu jeē cundijin ñuu ún. Te luz ñuu un cúu maá Yaā cúu Londe.

24 Te ñayuu tācá nación ñayví jéē ní jnama ya, caca i jeē cundijin luz ñuu un núu i. Te tāca rey ñayví quijicoo de ñuu ún, quíndeca de tācá ndajníñu jeē ndeé yahu jíin jéē cujéhnu de sáha.

25 Te tāca yéhyí ñuu ún ma cóndihyū cuiti nduú, chí tú na jecuāa coo.

26 Te ini ñuu ún quijicoo ñayuu tācá nación, quíndeca i tācá ndajníñu jeē ndeé yahu jíin jéē cujéhnu i sáha.

27 Te ma quívicoo cuiti ní ñn jeē jnehén. Ní ma quívicoo ñayuu casáha jniñu née jíin jéē castáhú. Chí quívicoo máni maá ñayuu jeē yósó síhví i nuū libro jeē yósó síhví ñayuu cotecu ní cáni, jeē névāha Yaā cúu Londe.

22

1 Yūcuán na te ndajéhé yá

ni steén yā nuū rī ñn yūte íyó ndoo. Te ndute un sáha jeē cótecu yō ní cáni. Te xíñú nájñuhun vidrio, te cáne nuū mesa nuū ndácu Yaā Dios jniñu jíin Yaā cúu Londe.

² Te jíca yūte ún sava mēhñu calle cáhnu ñuu ún. Te ndíndúú lado yuyūte un yñi yujnu jeē cótecu yō ní cáni sáha. Te yujnu un jéhe ndehē uxī uū jínu jeē ñn cuiyā, chi tāca yóo cúun ndehē. Te ndaha yúcú i cúu tajná jeē ndúvāha ñayuu tācá nación.

³ Te tācá-ni jeē ni cáhān yā jeē násūu jéē váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jniñu jíin Yaā cúu Londe. Te ñayuu cáccandije jeē cácuu i mozo yā, chiñúhún i ya.

⁴ Te coto i nuū yā, te condee sihví yá jneē i.

⁵ Te ma cóo ga jecuáa ñuu ún. Te ñayuu cáyūcu yúcuan tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jiní ndije ró jéē ndaā cúu. Te Jítoho yō Yaā Dios, máá yá sáha jíin tée cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návāha stéén nuū ñayuu cácuu mozo yā tācá jniñu jeē yachí coo.

⁷ Ndjí yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuñi yití rí nuū jehé maá ndajéhé jeē ni stéén tācá jniñu yáha núu rí, jeē chiñúhún rí yā nuú.

⁹ Te ni cahān ndajéhé un jíin rí:

Ma sáha ró súcuan. Chi ruhū suni mozo Yaā Dios cúu rí, nájñuhun máá ró jíin tāca hermano rō jeē cánacani jnúhun ya, jíin ndihí ñayuu cájetáhú jnúhun yósó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró tāca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndihí.

¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuan. Te sa ñayuu casáha jniñu ndaā, na sáha ga i jniñu ndaā. Te ñayuu cáhīyo ndoo ánuá, na cáca ndoo ga i súcuan. Achí ndajéhé un.

¹² Jendaá jeē ndiji yachí rí, achí Jesús. Te quiji ri jíin táhú cuāha ri nuū ñn ñn ñayuu, núu ndese jniñu ni casáha i.

¹³ Máá rí cúu nájñuhun letra A xīhna ñúhún jíin letra Z jeē sándihí na, chi íyó rí nde xīhna ñúhún te coo ri ní cáni.

¹⁴ Nacā jeē ndetū ñayuu jeē jéhe i jnūhun ndundoo ánuá i nájñūhun ndúndoo sahma. Chi cuu caji i ndehē yujnu jeē sáha jeē cótecu i ní cání, te cuu quívicoo i yéhyí ñuu í ún.

¹⁵ Te ichi fuera ñuu ún cuiñi ñayuu tu cácanđije, jíin ñayuu casáha tásí, jíin ñayuu cájica jnéni, jíin ñayuu cájehni ndíyí, jíin ñayuu cáchiñúhún ídolo, jíin ñayuu cácusí ni stahú jnáhan.

¹⁶ Máá rúhū Jesús, ni taji rí ndajéhé rí návāha castūhun yá tāca jnúhun yáha nuū tāca grupo ñayuu cácanđije. Te máá rí ni sáha jeē ni íyo rey David, te ni quiji ri nuū yucún David. Te cúu ri nájñūhun lucero ndíndēe cáne cúndijin. Achí yá.

¹⁷ Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñayuu jeē jíni sōho, suni na cáhán í:

Nehen, quívicoo ró ndaha ya.

Te tāca ñayuu cájichí jeē cácani i coho í, na quívicoo i ndaha ya, te súcuan-ni na cóho i ndute jeē cótecu i ní cání sáha.

¹⁸ Te tāca ñayuu jíni sōho jnūhun Yaā Dios jeē yosó núu tútu yáha, cáhán níhin ri jíin í: Núu ndé ñayuu chisóo i nuū jnúhun cáhán tutu yáha, te Yaā Dios chisóo yá jnūndóho cáhán tutu yáha, ndoho í.

¹⁹ Te núu ndé ñayuu quende i jecu jnūhun cáhán tutu yáha, te Yaā Dios quende yā tahū i jeē yosó núu libro jeē yosó síhví ñayuu cotecu ní cání, te ma níhín i tahū i ini ñuu í ún. Te tutu yáha cúu jeē cahán siquí tācá un.

²⁰ Te Yaā jeē ni cáhān tāca jnúhun yáha, suhva cáhán yā:

Jendaá jeē ndiji yachí rí, achí yá.

Amén. Súcuan na cóo. Jítoho ná Jesús, jícán tahú na jéē ndíji yachí ní.

²¹ Te ñúhun ni rí jeē Jítoho yō Jesucristo na sáha ga yā jeē váha róhó jíjnāhan ró. Amén.